


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

Tí Nuevo Testamento cuènte Inchéni Jesucristo C'óna Nquìva

New Testament in Popoloca, San Juan Atzingo

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	66
SAN LUCAS	107
SAN JUAN	176
LOS HECHOS	227
ROMANOS	286
1 CORINTIOS	310
2 CORINTIOS	335
GALATAS	350
EFESIOS	358
FILIPENSES	366
COLOSENSES	372
1 TESALONICENSES	378
2 TESALONICENSES	383
1 TIMOTEO	386
2 TIMOTEO	393
TITO	398
FILEMÓN	401
HEBREOS	403
SANTIAGO	421
1 PEDRO	427
2 PEDRO	434
1 JUAN	438
2 JUAN	444
3 JUAN	445
SAN JUDAS	446
APOCALIPSIS	448

Tí tan jína chrónka ch'ín Mateo

*Tí sín k'uaxrjenixin ch'ín Jesús
(Lc. 3.23-38)*

¹ Tíhi mé chrónka nkexro kaín tí sín k'uaxrjenixin ch'ín Jesucristo. Mé jehe ch'án k'uaxrjenixin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án. ³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isai. ⁶ Ch'ín Isai mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjéjé sín tí yaon a ntá xrínahya ikui tí sín Babilonia sákjuúko sín tí sín israelita kixin ts'ejóhchina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjenixin tí ch'ín Abraham ntá kjuák'e ch'ín David la í jnko catorce t'áchrji k'uaxrjenixin tí ch'ín David la ntá tí sín Babilonia sákjuúko tí sín israelita chjasén sín la ntá í jnko catorce t'áchrji k'uéjéjé la ntá kokjíhi Cristo.

*Kokjíhi Jesucristo
(Lc. 2.1-7)*

¹⁸ Tí kokjíhi Jesucristo mé xikíhi kónhen. Tí tjan María iné ch'án mé tsotéhe tjan ch'ín José. A ntá naxa kuákjahya kichó sín ntá dínoxin kixin jehe tjan la ó tjejá tjan kixin tíha la kjuachaxién Nchakun. ¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxin chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonohya. ²⁰ Ntá tí naxa tjenkayáxin ch'án kixin xikaha sich'e ch'án ntá kotáchríén ch'án chrónkaxín titàya k'uikuèn ch'án ikui ijnko ángel kuènte Inchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuénté Nchakuen Dios ikui mé k'óna tí xjan a. ²¹ Sinchekokjíhi tjan ijnko xjan ntoa la its'in xjan Jesús mé xíkaha its'in xjan kixin jehe xjan tsjakjün ijíe chojni —mé xíkaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xíkíhi:

²³ Ijnko tjan naxá chóntahya chojni ntoa mé tsjak'eyá tjan la tsochónta tjan ijnko xjan,

la sinchek'in sín ch'án Emanuel,*

la tíha t'axrjexín kixin Dios tjejókoni. Mé xíkaha chrónka itén Dios.

²⁴ Ntá k'uáya ch'ín José ntá kjuínchexiteyá ch'án tí nkehe k'uetóan tí ángel kuénte Ìnchéni la kuákja ch'án tjan María ts'óna ichjién ch'án. ²⁵ A ntá kjónté xíkaha la naxá kójnkoiéhya sín tí naxá kokjéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjéxín ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uetuénhen ch'án tí nación a. A ntá xrináhya iso chojni ntoa kjuixín ijnko chjasin nó tjítóxin yaon mé kjuíi sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjen tí xjan tsíkókjíhi ts'óna tí rey ts'etueñhen tí sín judío? K'uíkonxínni tí konotsé kuénte ch'án nó tjítóxin yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xíkaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'uetóan kixin síxrakoa kaín tí sín nchat'á t'etóan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. ⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xíkaha tsíkjin tí sín tsíchrónka itén Dios. Ntáchro xíkíhi:

⁶ Jaha chjasin Belén nonte Judá,

jaha la jehya ijnko chjasin imá ntsí;

kixin tí nonte ts'axrjexín tí nkexro antsí t'etóan,

la jehe ch'án ts'ayakonhen tí chjasin kuéntana mé chjasin Israel.*

Mé xíkaha nixja itén Dios.

⁷ Ntá imó k'uíyehé ch'in Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé. ⁸ Ntá chrónka sín ntá tuénxín k'uetóan ch'án kixin sátsji sín chjasin Belén la ntáchro ch'án kixin:

—Sátjirá ntíha la tjéyará tí xjan la tió ts'itjará xjan la tsochónkará kixin ntá kjaxian janhan sátsjia ntíha tsotjahá xjan kjuasáya —mé xíkaha k'uetóan ch'ín Herodes.

⁹ Ntá kuínhin tí sín mago tí nkehe k'uetóan tí ch'ín rey ntá sákjuí sín la xík'ikon sín tí konotsé inaá la kjuítaón va ntíja la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e

* 1:23 Isaías 7.14 * 2:6 Miqueas 5.2

tí konotsé la imá kóchéhe sín. ¹¹ La k'uixenhen sín tí nchia la k'uikon sín tí xjan kjuák'eko tí tjan María iné xjan. Ntá k'uejóxin toch'in sín la chjéhe sín kjuasáya ntá kuakitjehe sín tí nkehe kjuikao sín la kjuanjon sín chica oro la ko ihnti tsochéxin chjincq la ko xroan xraxé náxrjón. ¹² Ntá chr'exín kotáchríen sín chrónkaxín kixin chrókjanhya sín tí tjen ch'in Herodes. Méxra kjanxin sín í jnko ntja la sákjuí sín chjasén sín.

Ch'in José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchríen ch'in José chrónkaxín titáya k'uikon ch'án ijnko ángel kuente Ìnchéni chrónka kixin:

—T'àyá sátsjikoa xjan la ko iné xjan la sátsjirá chjasin Egipto la ntahó ts'ejorá hasta tsóxrjankajia, kixin tí ch'in Herodes xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'in José k'uàya la ntá sákjuíko ch'án xjan la ko iné xjan la sákjuí sín chjasin Egipto tí tie a. ¹⁵ Ntahó k'uejó sín hasta ik'uén ch'in Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchrónka itén ch'án. Mé ntáchró sín kixin: “Chjasin Egipto kjuák'e xjana ntá k'uíyaha ch'án”. †

Ch'in Herodes mé k'uejtoan its'en xjan

¹⁶ A ntá kónohe ch'in rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uejtoan ch'án kixin its'en kaín tí chánjan ntoá siín chjasin Belén ó chóna iyó nánó la ko tí xjan naxa chóntahya iyó nánó. Mé xikaha k'uejtoan ch'án kixin ó xraxínkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjin tí ch'in Jeremías ntáchró ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkama tjan xjeen tjan.

Kohya nkexro sinchechéhe tjan kixin ó kaín xjan tsík'en xjan. ‡

Mé xikaha chrónka itén Dios.

¹⁹ Ntá tió kjuixin k'uén ch'in Herodes ntá ijnko ángel kuente Ìnchéni mé k'uikoxín ch'in José kotáchríen ch'án tí kjuák'e ch'án chjasin Egipto mé ntáchró kixin:

²⁰ —T'àyá sátsjikoa tí xjan la ko tí iné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uejtoan tí ch'in ángel.

²¹ Ntá ch'in José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel. ²² A ntá kuínhin ch'in José kixin ch'in Arquelao xjeen ch'in Herodes mé k'uejtoan ch'án tí estado Judea la ntá chrakon ch'án la sáchrókjuíhya ch'án ntiha. A ntá kotáchríen ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uejó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchró sín kixin jehe ch'án mé tsíkítexín sín nazareno.

3

Juan el Bautista mé kjuák'e ch'án nteje
(Mr. 1.1-8; Lc. 3.1-9, 15-17; Jn. 1.19-28)

† 2:15 Oseas 11.1 ‡ 2:18 Jeremías 31.15

¹ A ntá tí yāon a kjuák'e ch'in Juan Bautista nteje Judea la kjuako ch'an.

² Ntáchro ch'an kixin:

—Títóherá ijjará la tjínkirá tí nkehe tjenkayáxinrá kixin í séhya itsi kjuachaxién Dios.

³ Tí ch'in Isaías, mé ijnko ch'in tsíchrónka itén Dios, mé tsíkjin ch'an kuènte tí ch'in Juan mé chrónka ch'an kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixin Inchéni.

Takitjehérá ijnko ntja ntoí.”*

⁴ Tí iké ch'in Juan mé tsík'óna kaxree kocamello la ko tí nkehe chr'ínkat'óxin ch'an mé tsík'óna tjoa. A ntá tí nkehe kjóne ch'an mé kochjoá la ko itsjen kotsjenta tónoxín nteje. ⁵ Itsje chojni kuixín sín chjasin Jerusalén la ko í so chjasin siín estado Judea la ko chjinaxón tí ntarío Jordán kixin tsinhin sín nkexrí tjechrónka ch'an. ⁶ Ntá chrónka sín ijie sín ntá ch'in Juan kuikixín ch'an sín tí ntarío Jordán.

⁷ Ntá xrínghya k'uikon ch'in Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'an kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéherá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkojina chrókuákoxinrá kixin chaxín kjuítoxinhínrá tí nkehe tjenkayáxinrá. ⁹ Jahará nchehnerá ntáchrórá kixin k'uaxrjeníxinrá ch'in Abraham. Janhan ntáxrjan kixin kjónté tí xro i la Dios tsjacha chrókjuich'éna ch'an chojni k'uaxrjeníxin ch'in Abraham. ¹⁰ Tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche. ¹¹ Janhan mé intá tikítexián chojni kixin tsjakoxín sín kixin ó kjuítoxinhin sín ntje sín. A ntá tí nkexro itsi chr'éxin mé tsíkítexinrá tí Nchakuen Dios la ko xrohi. Antsí tjetóxin t'etóan ch'an a ntá janhan la kánhyó. Méxra chrókósuána sáchrókjuikjan tokaté ch'an. ¹² Jehe ch'an la ó tjexraá ch'an pala sinchetjuáxin ch'an noatrigó kixin tí ntachjiji trigo la ókjé ts'ejo ch'an a ntá tí noatrigó la tsjenájín ch'an la ts'enkachjina ch'an. A ntá tí ntachjiji trigo la tsjakaxín ch'an ijnko xrohi ts'ankahya jnkochrixín —mé xikaha kjuako ch'in Juan.

Kukite ch'in Jesús

(Mr. 1.9-11; Lc. 3.21-22)

¹³ Ntá ch'in Jesús kjuixín ch'an nó estado Galilea ikui ch'an tí ntarío Jordán tí tjen ch'in Juan kixin ch'in Juan tsíkite tí jehe ch'an. ¹⁴ A ntá tí saoxín chrohya ch'in Juan chrókuikite tí ch'in Jesús ntáchro ch'an kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka kixin jeheni chrókuikitia tí jaha —ichro ch'in Juan.

¹⁵ Ntá kjuátehe ch'in Jesús kixin:

—A ntá jie la tjtóhé tí xikaha tjenkayáxin kixin t'ichjánxin tsikiteni kixin sinchexiteyáni tí nkehe k'uetóan Dios.

Ntá ch'in Juan kuítekaon ch'an la xikaha kjuích'e ch'an. ¹⁶ Ntá tió kuikite tí ch'in Jesús la ntá xrínghya titáya xitjehe nkajni la k'uikon ch'an tí Nchakuen Dios, éxi kontóá tsjehe, k'uínkajinxín nkaya nkajni ntá kjuák'e chrítaón kja ch'in Jesús. ¹⁷ Ntá xrínghya kuínhin sín ijnko tan kuixín nkaya nkajni ntáchro kixin:

* 3:3 Isaías 40.3

—Tíhi mé xjanna la imá tjuah̄a ch'án la imá chàna kíxin nchexiteyàna ch'án.

4

Ch'ín Tsochren chrókjuachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sákjuiko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ² Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³ Ntá ch'ín Tsochren mé kóchjinehe tí ch'ín Jesús kíxin tjinkaon chrókjuachaxin ch'án. Ntáchro ch'án kíxin:

—Tí chaxín jaha Xjeen Dios la ntáche tí xr̄o i kíxin chrók'óna niot̄ja.

⁴ Ntá kjuát̄ehe ch'ín Jesús ntáchro kíxin:

—Náhi. Ntáchro xroon itén Dios kíxin: “Jehya niot̄ja ó chrók'uejóchónxin chojni. Náhi. Kaín tí tán nixja Dios tjejóchónxin chojni”^{*} —ichro ch'án.

⁵ Ntá ch'ín Tsochren mé sákjuiko ch'ín Jesús tí chjasin tjóá mé chjasin Jerusalén, la sákjuiko ch'án tí chrítaón tí kja n̄nko a ⁶ la ntáchro ch'án kíxin:

—Tí chaxín Xjeen Dios jaha la t̄tohé t'anót̄jexian tí noi ntihi kíxin ntáchro xroon itén Dios kíxin:

Dios mé ts'et̄uñhen tí sín ángel kuènte ch'án kíxin ts'ayakonhan sín.

Tsot̄sé sín it̄já

kíxin tsotéhya tot̄á ts'it̄ja xr̄o tí ts'anót̄jex̄†

—ichro ch'ín Tsochren.

⁷ Ntá kjuát̄ehe ch'ín Jesús ntáchro ch'án kíxin:

—Náhi. Kjaxin ntáchro xroon itén Dios kíxin: “Chj̄inihya chrókjuásixián kjuaxroan kjuachaxin kuènte Ìnchéni Dios”[‡] —ichro ch'ín Jesús.

⁸ A ntá tió kjuixixín sákjuiko ch'ín Tsochren tí ch'ín Jesús ijnko jn̄a imá noi ntá kjuako tí Jínahya kaín xín tí nacióon sín chjasintajni la ko tí nkehe t'et̄oan kuènte. ⁹ La ntáchro ch'ín Tsochren kíxin:

—Kaín tíha mé tsot̄jaha tí tsjak'éxian tóch'ian tsj̄ikosáyana tí janhan —mé x̄ikaha ichro ch'ín Tsochren.

¹⁰ Ntá kjuát̄ehe ch'ín Jesús ntáchro ch'án kíxin:

—Sát̄jia Satanás kíxin xroon itén Dios ntáchro kíxin: “Chrókjuikosáyehé Ìnchéni Dios la jehó ch'án chrókjuich'ehé xra”[§] —ichro ch'ín Jesús.

¹¹ A ntá ch'ín Tsochren mé kuít̄ohe tí ch'ín Jesús la iso tí sín ángel ikui tsj̄ink̄itsa tí jehe ch'án.

Ch'ín Jesús kjuankíxin ch'án tí xr̄a kuènte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án kíxin tí ch'ín Juan mé tjechjina ch'án nt̄oechiso a, a ntá jehe ch'án mé sákjuí ch'án estado Galilea. ¹³ Kuít̄ohehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé t̄jen chr̄inta ntayaon chjino estado Zabolón la ko estado Neftalí. ¹⁴ Mé x̄ikaha kjuích'e ch'án kíxin tsoxiteyá tí nkehe ts̄ikjin ch'ín Isaías, ijnko nkexro k'uéchrónka itén Dios. Ntáchro ch'án kíxin:

¹⁵ Tí estado Zabolón la ko Neftalí tí nt̄ja chr̄inta ntayaon la tí nó chók'á t̄j̄it̄oxin yaon tí ntarío Jordán, mé tí estado Galilea tí t̄jejó tí sín jehya judío.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

¹⁶ Mé ntiha tjejó tí sín síin tí sítié mé ts'ikon sín ijnko xrohi jíé, la tí sín éxí tsík'en xritjejó sín mé ts'inkaséyanxín ts'ejó sín.

¹⁷ Ntá kjuankixin kjuako ch'in Jesús ntáchro ch'án kixin:

—Tjitóxínhinrá ntjará. Tsákjárá ijnko ntja nixín kixin kjuachaxin kuènte Dios tjen nkaya nkajní la í séhya tsi.

Ch'in Jesús k'uíyehé noó chojni k'uétsé koche

(Mr. 1.16-20; Lc. 5.1-11)

¹⁸ Ntá sákjuí ch'in Jesús chrínta ntayaon Galilea ntá xrínghya k'uikon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xristé sín. Ntá tinkák'e sín nchísén chrínkí ntá. ¹⁹ Ntá ch'in Jesús nixjehé sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

²⁰ Ntá tuénxín kuitóhe sín tí nchísén k'uétséya sín koche, ntá sákjuíko sín ch'án.

²¹ Ntá kjínhya kjuíji ch'án ntá k'uikon ch'án ijnko yaá sín, jnkokoá kichó sín, mé tí ch'in Jacobo la ko ch'in Juan, mé xjeen tí ch'in Zebedeo. Tjejóko sín it'é sín tí ntabáro la tjejótjonite sín tí nchísén tséya sín koche. Ntá kjaxin tí sín a k'uíyehé ch'in Jesús. ²² La ntá tuénxín kuitóhe sín tí ntabáro la ko tí it'é sín ntá sákjuíchréhé sín tí ch'in Jesús.

Kjuakohé ch'in Jesús nchónhya chojni

(Lc. 6.17-19)

²³ Ntá sákjuí ch'in Jesús nkuixín tí estado Galilea la kjuakoxin ch'án tí njnko Israel síin jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekítóhe ch'án jína kaín chojni chónka kaín xín chin la ko kaín kjuatjoté. ²⁴ Ntá kaín xín tí sín tjejó tí estado Siria mé kuínhin sín kuènte Jesús la kjuíkao sín kaín xín tí sín níhi chónka kaín chin la ko tí sín imá tjetéhe sín la ko tí sín chónka nchakuen tí jínahya la ko tí sín t'aniáte sín la ko tí sín síxénká tóté sín, la ntá ch'in Jesús mé kjuínchekítóhe ch'án sín jína.

²⁵ Ntá itsjé chojni kjuíchréhé tí ch'in Jesús, mé kjuixín sín estado Galilea la ko tí chjasin chjinaxón Decápolis la ko chjasin Jerusalén la ko kuénté tí estado Judea la ko tí nó chók'á tjitoxin yaon tí ntario Jordán.

5

Kjuakoxin ch'in Jesús ijnko jna

¹ K'uikon ch'in Jesús kixin k'uéjó nchónhya chojni la ntá chrín ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án. ² Ntá ch'in Jesús kjuankixin kjuakohé ch'án sín kixin:

Tí nkexro tjejó náxrjón

(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuènte Dios kixin ntá jehé sín mé tsochónka sín tí kjuachaxin kuènte Dios.

⁴ Náxrjón tjejó tí sín t'ává kixin Dios mé sinchechéhe asén sín.

⁵ Náxrjón tjejó tí sín hnkehya asén kixin jehé sín mé ts'áyehé sín tí nonte tsjanjon Dios.

6 'Náxrjón tjejó tí sín éxí yóhē chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhē sín Dios ntá Dios tsjinkítsa sín kixin ts'áyéhē sín tí nkehe tjinkaon sín.

7 'Náxrjón tjejó tí sín tikonóhē kichó sín kixin ntá Dios kjaxin tsikonóhē tí jehe sín.

8 'Náxrjón tjejó tí sín kótjóá asén kixin ntá jehe sín sátsjik'ikon sín Dios.

9 'Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

10 'Náxrjón tjejó tí sín kjónté tjejó'tjasótexín sín kixin kjuínchexiteyéhē sín Dios kixin ntá jehe sín mé kuènte sín nkaya nkajní.

11 'Náxrjón tjejórá kjónté t'ántaxínhanrá sín la ko ntachrakonrá sín la ko kaín nkehe náxrjónhya ntáchro sín kixin tinkachónkirá tí janhan. 12 Chrókócháhará la ko kjuaxróxin chrók'uejórá kixin ntá chr'éxin jahará ts'ayéhérá ijnko nkehe antsí má jína nkaya nkajní. Mé xikaha kjuasóte tí sín k'uejó ósé k'uechrónka sín tí itén Dios.

Jahará la éxí yóhē xjnta la ko éxí xrohi t'inkaséyanxín chjasintajni

(Mr. 9.50; Lc. 14.34-35)

13 'Jahará mé yóhē éxí xjnta chjasintajni. A ntá tí chrók'uanékéhé tí jní tí xjnta la ntá xitjahya chrókójní inaá. Ninkehó chrókjuich'ehya xra la chrók'uiKITJÍ ntója la ko chrókuinkátja chojni.

14 'A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. 15 La ko kohya nkexro sinchek'ákjen ijnko lámpara ntá tsjak'e chrínki ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro síin tí nchia ntiha. 16 Mé xikaha tí jahará chrókóyóhará éxí tí xrohi t'inkaséyanxín kixin ts'íkon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuènte tí ley

17 'Jahará chróntáchrohyará kixin k'uinka kixin tsjakjían tí ley tsík'etóan ch'in Moisés la ko tí nkehe kjuako tí sín k'uechrónka itén Dios. Náhi. Jehya xikaha k'uinka kixin tsjakjían tíha. Náhi. K'uinka janhan kixin tsjákoxian nkehe chaxín t'axrxén tíha. 18 Chaxín xrjanka kixin tí naxa tjen nkajní la ko chjasintajni la kohya ninkehó ley tsjínhya, mé tsjínhya nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá.

19 Mé xikaha tí nkexro tsitekakonhya tí nkehe k'uetóan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsóntí sín tí tsi tí kjuachaxin kuènte Dios. A ntá tí nkexro tsitekaon la ko tsjakohē ókjé nkexro tsitekaon sín, mé antsí imá ts'etóan sín tí tsi kjuachaxin kuènte Dios. 20 Méxra tjonkará kixin t'ichjánxin kixin antsí jína ts'ejorá la tsoyóahyará tí sín tjako ley la ko tí sín fariseo kixin tí tsoyóhará sín la ntá xitjahya tsákjára tí kjuachaxin kuènte Dios tjen nkaya nkajní.

Kjuako ch'in Jesús kuènte tí kjuanínkaon

(Lc. 12.57-59)

21 'Jahará tsíkinhínra kixin tí sín ósé tsík'ítuenhen sín kixin: "T'oyánhyará kichuára* kixin tí nkexro t'oyán kichó mé t'ichjánxin tsjasóte sín." 22 A ntá janhan tjonkará kixin jnkojín nkexro tsonínkaonhen kichó mé t'ichjánxin tsjasóte. A ntá tí nkexro t'ántaxínhín kichó la mé tí sín t'etóan mé sinchekitóexín

* 5:21 Éxodo 20.13; Deuteronomio 5.17

ijjé ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótéxín tí síin xrohi. ²³ **A** ntá tí tsjikuehérá Dios nkehe tsochjehérá ch'án ntá tsjasánrá tí altar ntá tsoxráxinkáonrá tí jnkójín kichuára kjuánjonkoará sín ²⁴ la ntá tí xikaha la tjtóhérá tí nkehe tí altar la sátsjirá tsonixjehérá ch'án jnkójína kixin í tsokohya kjuanínkaon. La ntá tsjixin la ntá tsjihará tsjánjonrá tí nkehe tjínkáonrá tsjánjonrá.

²⁵ Tí síin jnkójín nkexro tjanchia jie tí jahará la tjinkaon chrókjuikoará ch'án juzgado, **a** ntá íchá jína jnkokoá chrókjuenkayáxinrá, jehe ch'án la ko jahará, ntjá ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntóechiso. ²⁶ **A** ntá chaxín tjonkará kixin tí ts'ikjahará sín ntóechiso la ts'axrjéxínhyará ntiha tsjixinjian tsjenkehérá sín kaín xín chichaon chontará.

Ch'ín Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ Jahará tsíkinhínrá tí nkehe tsík'ítuenhen tí sín ósé ntáchro kixin: “Chrókjuásinhyará jie, chróchóntahyará chojni chjin ókjé.”[†] ²⁸ **A** ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jie nkaya asén ch'án.

²⁹ **A** ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyán it'o cuerpo kuéntá kixin jehya kuéntá cuerpo kuéntá sátsji tsjasótéxín tí síin xrohi. ³⁰ **A** ntá tí itja chjina chrókjuásixián jie la chróchrínjian tí tjá a la chróchr'an ikjín kixin íchá jína ts'ítjáyán it'o cuerpo kuéntá kixin jehya kuéntá cuerpo sáchrókjuí tsjasóte tí síin xrohi.

*Ch'ín Jesús kjuako kixin chrók'uitjehya kichó sín
(Mt. 19.9; Mr. 10.11-12; Lc. 16.18)*

³¹ Kjaxin tsík'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxín kichó sín.[‡] ³² **A** ntá janhan tjonkará kixin ijnko nkexro tsjákehé ichjién tí chróchóntahya tjan ókjé nkexro la jehe ch'án kuítóhe ch'án tjan kixin tsjasin tjan jie. **A** ntá tí nkexro tsótehe ijnko tjan tsíkítsinkehe la kjaxin ó kjuasin ch'án jie.

Ch'ín Jesús kjuako kixin chjíníhya chrók'uákjenxinni ihnié Dios

³³ Kjaxin tsíkinhínrá tsík'ítuenhen tí sín ósé kixin: “T'ichjánxin sínchexitéyará tí nkehe tsíntáchorá kixin chrók'uákjenxínhyará ihnié Ínchéni chjini.”[§] ³⁴ **A** ntá janhan mé tjonkará kixin chrók'uákjenxínhyará ihnié Dios ninkehó la ko chrók'uákjenxínhyará nkajní kixin ntaha tjen Dios t'etóan. ³⁵ La ko chrók'uákjenxínhyará chjasintajni kixin ntaha tjejókjén toté ch'án la ko chrók'uákjenxínhyará chjasin Jerusalén kixin ntiha la itjen tí Rey t'etóan. ³⁶ La tjenkayáxixínhyará ikjárá ó kixin jahará xitjahya tsjakérá ijnko kaxíhi tjóá o nijnko kaxíhi tié. ³⁷ Tí nkehe tsontáchorá chaxín la chaxín la tí nkehe náhi la náhi la kohya nkehe chrókjuakét'oxinrá chróchrónkará. **A** ntá ichrén nkehe tjakét'oxinrá tsochrónkará la táha mé jínahya.

*Ch'ín Jesús tjako ch'án kuènté tí sín t'itjáyenhyá ichrén kjuanínkaon
(Lc. 6.29-30)*

[†] 5:27 Éxodo 20.14; Deuteronomio 23.21

[‡] 5:31 Deuteronomio 24.1-4

[§] 5:33 Números 30.2;

Deuteronomio 23.21

³⁸ Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxínrá chrókuakitsjenkírá ikon sín. A ntá tí chrókuakitsjenkí sín nènora la kjaxínrá chrókuakitsjenkírá neno sín kjaxin.* ³⁹ A ntá janhan mé tjonkará kixin tí jnkojin nkexro ichrén nkehe jínahya sit'ahará la jahará ch'ehyará xikaha. Náhí. Tí chjéhe ijnko nkexro ijnko tuğan la ntá tjóka tí í jnko nänko tuğan. ⁴⁰ La tí siin jnkojin nkexro tjanchia jie la tjinkaon sín chrókuakitsjaha sín camisá la tjtóhé sín sátsjiko sín tí ka t'ínkayate kjaxin. ⁴¹ La tí t'etuğanhanrá sín tsámára nkehe ijnko kilómetro la tjakét'oxinrá í yaá kilómetro. ⁴² Tí jnkojin nkexro tsjanchia nkehe la tí tjinkaon ch'án nkehe la chróntáchrohyará kixin “náhí”, chrókjuinchejjenrá ch'án.

Tjuèhérá tí sín nínkakonhanrá sín
(*Łc. 6.27-28, 32-36*)

⁴³ Kjaxin ó tsíkinhínrá tsík'ítuenhen tí sín ósé kixin: “Tjuèhérá tí nkexro choxinrá la tsonínkákonhénrá tí sín jínahya kjuít'ahará.” † ⁴⁴ A ntá janhan mé tjonkará kixin chrójtjuèhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjínkakonhya tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xikaha sich'erá la ntá jahará chaxín xjeen It'eni tjen nkaya nkajní kixin jehe ch'án mé t'etoan ch'án tsjitoñ yaon ts'ínkaséyehenhen tí sín jínahya la ko tí sín jína la ko kjaxin t'etoan ch'án kixin ts'aniá ichrin tí siin tí sín jína la ko tí sín jínahya. ⁴⁶ Tí jehó tjuèhérá tí nkexro tjuàhará, ¿la ntá nkehe chrókjuachará? A ntá kjaxin tí sín nchejjenkí la xikaha ch'e sín. ⁴⁷ La tí jehó nixjehérá tí sín kichuárá la ntá, ¿á chaxín imá jína tíha ní? Kixin tí xikaha la kjaxin tí sín chónhya Dios la xikaha ich'e sín. ⁴⁸ Kjaxinrá jahará ntoá chrók'uejorá kixin It'eni tjen nkaya nkajní la antsí má ntoá tjen ch'án.

6

Kjuako ch'in Jesús kuènté tí xra jína

¹ Chrókjuásixínhyará kjuaxroan tí nkehe tinkachónkirá kixin tjínkáonrá chrók'uikon chojni ó. A ntá jahará tí xikaha chrókjuich'erá ntá It'eni tjen nkaya nkajní la ninkehó nkehe tsotjáhyará ch'án. ² Tí tjínkitsará ijnko chojni nõa la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen njnko la ko tí ntja kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrjan kixin ó kjuixin k'uáyéhé sín nkehe la í ts'áyéhya sín inaá. ³ A ntá tí jahará tió chrókjuinkitsará ijnko chojni chaxín nõa la íchá jína kixin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjeheni Dios
(*Łc. 11.2-4*)

⁵ A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhín sín ts'ejóxin toté sín nkaxenhen njnko la ko ts'ejó sín esquina calle kuènté ntasin kixin ts'ikon kañ chojni kixin tjejónixjehé sín Dios. Ntá janhan chaxín ntáxrjan kixin jehe sín la xikaha kjuich'e sín la ó

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

kjuixin k'uáyéhe sín nkehe la í ts'áyèhya sín inaá. ⁶ A ntá tió nixjehérá Dios la t'ixenhénrá nchia ntóará la t'ikjehérá tí puerta la nixjehérá It'eni kixin ntaha tjekoárá ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjateehya chrónixjará kixin chrókoyáhyará éxi tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín. ⁸ A ntá jahará chrókoyáhyará éxi tí jehe sín. It'eni ó nohe ch'án nkehe t'ichjánxinhanrá kjónté naxa tjanchéhyará ch'án. ⁹ Méxra xikihi chróntáchorá:

It'eni tjen nkaya nkajní jaha imá tjóá.

¹⁰ Chrókui tí kjuachaxin kuénta.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

¹¹ Ijie la tsjánjuan tí niótja t'ichjánxinhinni.

¹² T'oxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'ehe ni chojni.

¹³ Tjtoéhyani kixin xrahya chrókjuasinni jie. Nchekaáni kaín tí jínahya chrókónhenni,

kixin jaha mé kuéntá tí kjuachaxin kixin ó noheni kixin jaha tjetétoan tí kjuachaxin jnkochrín. Amén.

¹⁴ Tí jahará ts'itjáyanhanrá tí nkexro kjuasinhánrá ichrén jie la mé kjaxin It'eni tjen nkaya nkajní mé ts'ikon ch'án kixin xikaha kjuich'erá la ntá kjaxin jehe ch'án ts'oxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá kjaxin It'eni tjen nkaya nkajní ts'ikon kixin xikaha kjuich'erá k'uitjáyanhyará la ntá kjaxin jehe ch'án la ts'oxíkahya ch'án tí jie chontará.

Ch'in Jesús kjuako kixin chrók'óxroanhya sín kixin kjónehya sín

¹⁶ A ntá tí jahará tí naxa kjóntehyará kixin tjinkáonrá tsonixjehérá Dios la ntá chrók'uejohyará éxi t'avará éxi ch'e tí sín jehya jnkójínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxa kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ¹⁷ A ntá tí jahará kjónté naxa kjóntehyará kixin tjinkáonrá tsonixjehérá Dios la t'ontirá ikonrá la tjéntoárá kjará ¹⁸ kixin tsonoehya chojni kixin naxa kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete síin nkaya nkajní

(Lc. 12.33-34)

¹⁹ Jahará chrókjuásitonhyará nkehe tjete ntihi chjasintajni kixin ntihi la ts'ín kué tí nkehe tjete sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará. ²⁰ Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáyan nkehe la tsochjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² Tí ikonrá mé éxi yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuénté tí cuerpo kuéntará mé chóna xrohi. ²³ A

ntá tí ikonrá la jínahya la ntá kuenté tí cuerpo kuentará la sítie tjen. A ntá tí chrókjuak'ehya tí xrohi la ntá antsi má chrókjuinchetié tí sítie.

Dios la ko tí chichaon

(Lc. 16.13)

²⁴ Kohya ninkexró tsjacha sich'ehe xra yaá lamó. Tí xikaha chrókjuich'eh ch'án la ntá ijnko tsonínkakonhen ch'án la tí í jnko tsotjuêhe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'eh chojni xra Dios tí tjinkaon sín chróchónta sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsi má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsi má sínkí tí cuerpo kuentará, a ntá kánhyó sínkí tí ka chrók'uitsará? ²⁶ Xráxinkáonrá nkexrí síin tí koxroxé xritjaka. Jehé va la t'enkahya va noa la ko tjáhya va la ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsi tjetooan a ntá tí koxroxé la kénhyó. ²⁷ ¿Á tjejó jnkojinrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

²⁸ ¿Nkekuenté kixin imá tóxakonhanrá ikará ó? Tsjehérá nkexrí sít'ánkí tí catsjo síin nteje. Tí itsjo la ní ch'ehya xra la ko tjonhya. ²⁹ La tjonkará kixin kjónté ch'in rey Salomón k'uéchónta itsjé chichaon la naxa kjuíncheyóehya ch'án nkexrí náxrjón tsjehe tí tsjo a. ³⁰ A ntá tí Dios la nchek'itsa tí ka yoá síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsi chrókjuintak'itsará ch'án. ¿A ntá nkekuenté títekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará. ³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kaín nkehe t'ichjánxinhanrá. ³³ A ntá senó mé chrókjuéyará tí kjuachaxin kuenté Dios la chrókjuinchexiteyará tí nkehe jína tjinkaon ch'án, a ntá jehé ch'án mé tsjanjon ch'án kaín nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuente.

7

Chrók'uantaxienhyará kichuára

(Lc. 6.37-38, 41-42)

¹ Chrókuékahyará ókjé chojni jie kixin ntá Dios kjaxin chrókjuanchahya jie tí jahará. ² A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sjch'erá la mé xikaha tsonhanrá kjaxin. ³ ¿A ntá nkekuente tsjehé tí chjinínó ntsí tjenkánkí ikon tí kichuá tí naxa antosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Tjítóhé tsakitsjenkíni tí chjinínó ntsí tjenkánkí tí kuan?" ⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uiquan tsakitsjenkiá chjinínó ntsí tjenkánkí ikon tí kichuá.

⁶ 'Chróchjeéhyará tí nkehe tsikótjóá tí konjā kixin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

⁷ Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyéhe tí nkehe la tí nkexro tjeýá nkehe la ts'itja la tí nkexro t'inka puerta la tsoxitjehe.

⁹ '¿Á tjejó jnkójín nkexro ntihi chrókjuanjon xro chrókjóné xjeen tí chrókjuanchia xjan niótja? Kja náhi. ¹⁰ Q tí chrókjuanchia xjan ijnko koche la, ¿á chróhjehe ch'án tí xjeen ch'án konche chrókjóné ní? Kja náhi. ¹¹ A ntá jahará kjónté jínahará la ó nohará nkehe jína chjehérá xjaanrá. A ntá It'eni tjen nkaya nkajíní kjaxin aṅtsí tsochjehe ch'án nkehe jína tí nkexro tsjanchia nkehe.

¹² 'Méxra xikaha chrókjuikosáyehérá kichuárá éxí yóhe nkexrí tjinkáonrá chrókjuikosáyahará sín mé xikaha k'uetōan ch'ín Moisés la ko xikaha ntáchro tí xroon kuente tí sín k'uéchronka itén Dios ósé.

Tí puerta tekahya

(Lc. 13.24)

¹³ T'ixeenxínrá tí puerta tekahya. Kixin tí puerta la ko tí ntja ts'itjáyanxín chojni la imá iton la ko teka la nchónhya chojni sátsji tí ntja ntiha. ¹⁴ A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsōanxínni tí nta

(Lc. 6.43-44)

¹⁵ 'Méxra tóxakonhanrá tí ts'ikonrá itsi tí sín ch'ia tsontáchro sín kixin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jjehe. ¹⁶ Jahará la chrókjuátsōanxínrá tí jehe sín kixin tí xra ch'e sín kixin tí ntach'i la xitjahya chrók'óna to uva la ko tí kach'i xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrinjin la tsoche. ²⁰ Mé xikaha chrókjuátsōanxínrá jahará tí sín jehya jína kixin tí xra tjejóh'e sín.

Jehya kaín chojni ts'ixenhen tí kjuachaxiéén Dios tjen nkaya nkajíní

(Lc. 13.25-27)

²¹ 'Kénhya chojni tsontáchro: "Ìnchéni, Ìnchéni", mé ts'ixenhen sín tí kjuachaxiéén Dios tjen nkaya nkajíní. Náhi. Jehó tí nkexro sinchexiteyá tí nkehe tóxrjnhjn T'aná t'etōan tjen nkaya nkajíní. ²² Tsjixraká tí yaon a la ntá itsjé sín tsontáchro sín kixin: "Ìnchéni, Ìnchéni, k'uénixjaxínni ihníá la ko tí ihníá mé kuakitsjexínni nchakuen tí jínahya la ko kjuachaxiéén ihníá kjuasixínni nchónhya kjuaxroan." ²³ A ntá janhan tsjataha kixin: "Janhan la chonhya tí jahará. Tjtonará sájtjirá kixin jahará imá jínahará."

Ch'ín Jesús kjuíncheyóexin ch'án kixin yaá nchia

(Lc. 6.47-49; Mr. 1.22)

²⁴ 'Méxra tí nkexro tinhin tí nkehe ntáxrjan la titekaon ch'án la jehe ch'án mé éxí yóhe ijnko nkexro chóna kjuaxrexinkaon jína la kjuích'éna nchia chrítaón tjo. ²⁵ A ntá xrinahya xrakoa chrin, ikui yeé ntāninche la tjān chjéhe

xr̄int̄o la kjónté x̄ikaha la x̄ikaha tí nchia kíxin it̄jo tjekjen nchia. ²⁶ A ntá tí nkexro tinhin tí xr̄janka la titekakonhya mé jehe la éxí yóh̄e ijnko nkexro lont̄i la kjuích'éna ch'án ijnko nchia tí sín nchesen. ²⁷ La ntá xr̄in̄ahya xr̄akoa chr̄in ntá ant̄sí kóyee nt̄aninche tí ts̄aka la ko ch̄jéhe xr̄int̄o la ntá x̄ika tí nchia, la ijnko kjuachrakon kónhen tíha.

²⁸ A ntá tíó kjuixin nix̄ja ch'ín Jesús la ntá imá chrakon tí chojni kíxin nkexrí kjuako ch'án. ²⁹ Kíxin kjuako ch'án éxí ijnko nkexro chón̄ta imá kjuachaxin la tóyóehya ch'án tí sín maestro kjuako tí ley.

8

Ch'ín Jesús kjuínchekit̄ohe jína ijnko chojni chón̄ta chin lepra

(Mr. 1.40-45; Lc. 5.12-16)

¹ A ntá ch'ín Jesús k'uínkajinx̄in ch'án tí jn̄a la chr̄éh̄e nchón̄hya chojni. ² La ntá kóchjina ijnko ch'ín níhi chón̄ta chin lepra la kjuák'exín toch'in ch'án nkayakon ch'ín Jesús la ntáchro ch'án kíxin:

—Ínchéni tí tjínkávan la jína chrókjuínchekit̄ohéni jína —ichro ch'án.

³ Ntá ch'ín Jesús mé kjuak'etja it̄ja ch'án chr̄itaón tí ch'ín a la ntáchro ch'án kíxin:

—Méxra x̄ikaha tjínkávan. Ntá jie s̄intakit̄oha jína.

A ntá tuénxín kuít̄ohe ch'án jína la ó kjuín tí chin k'uéchón̄ta ch'án.

⁴ La ntá ntáchro ch'ín Jesús kíxin:

—Ninkexró ch̄enkahya ntihi. Jehó s̄átjia tjákohé tí ch'ín nchat'á kíxin kuít̄oha jína la ko s̄átjikoá tí nkehe tsík'et̄oan ch'ín Moisés* kíxin ntá x̄ikaha t̄soñoexín kain x̄in chojni kíxin ó kuít̄oha jína —mé x̄ikaha k'uet̄oan ch'ín Jesús.

Ch'ín Jesús kjuínchekit̄ohe jína ijnko nkexro ch'ehe x̄ra ijnko capitán romano

(Lc. 7.1-10)

⁵ A ntá tíó k'uixenhen ch'ín Jesús chjasin Capernaum la ntá xr̄in̄ahya kóchjina ijnko capitán romano la chrón̄òta ch'án ⁶ ntáchro ch'án kíxin:

—Ínchéni nt̄oeni it̄jen ijnko ch'ín ch'ehe ni x̄ra mé níhi ch'án, tjetsínka ch'án, tsík'en toté ch'án la imá t̄jotéhe ch'án —ichro ch'án.

⁷ A ntá ch'ín Jesús kjuát̄ehe ch'án ntáchro ch'án kíxin:

—¿Á s̄átjia s̄intakit̄oha jína tí ch'ín a? —ichro ch'án.

⁸ Ntá tí ch'ín capitán kjuát̄ehe kíxin:

—Náhi, Ínchéni, tósuéheni kíxin chrók'uixenhen nt̄oeni kíxin jehya chojni jíni. Jehó chrókjuánjuan kjuachaxin kuéntá, ntá tí ch'ín ch'ehe ni x̄ra chrókuit̄ohe ch'án jína. ⁹ Janhan na kjaxin chonta chojni t'etuanna la ko kjaxin janhan t̄etuñhan tí sín soldado. Tíó t̄etuñhan ijnko sín s̄átjsi sín la ntá ó s̄átjsi sín. La kjaxin tíó t̄etuñhan ijnko sín kíxin xr̄akoa sín la mé t̄ji sín. La ko tíó t̄etuñhan ijnko nkexro ch'ena x̄ra kíxin sich'e x̄ra la ich'e x̄ra —ichro ch'án.

¹⁰ Ntá kuínhin ch'ín Jesús ntá kóxakonhen ch'án kíxin x̄ikaha chro tí ch'ín a, ntá nix̄jeh̄e ch'án tí sín chr̄éh̄e ch'án ntáchro ch'án kíxin:

—Chaxín ntáxr̄jan kíxin kuénté tí nación Israel la k'uitjahya janhan ninkexró tinkáchónki x̄ikaha éxí tinkáchónki tí ch'ín i. ¹¹ Janhan xr̄janka kíxin nchón̄hya chojni ókjé tjix̄in tí tjitox̄in yaon la ko tí t̄ját̄oxin yaon la sineko sín tí ch'ín Abraham la ko Isaac la ko Jacob tí t̄jen tí kjuachaxin kuénte Dios. ¹² A

* 8:4 Levítico 14.1-22

ntá itsjé tí sín chrók'uejó tí tjen tí kjuachaxin kuènte Dios la ts'axrjexín sín ntiha, sátsji sín tí sítíe la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntáchro ch'án kixin:

—Sátjia nta. Éxí kuítekáván jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sáskjuí ch'ín Jesús tí ntøe ch'ín Pedro la ntaha k'uúikon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa. ¹⁵ Ntá itsé ch'án itja tjan la ntá kjuínhin tjan tí sóa la ntá k'uúinkatjen tjan la kjuankixin yaxínhin tjan kixin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínaha. La ntá jnkokoá nixja ch'án la k'uaxrjexín tí nchakuen tí jínaha tí jehe sín la kjaxin kjuínchekitohe ch'án jína kaín tí síníhi. ¹⁷ Mé xíkaha kjuích'e ch'án kixin tsoxiteyá tí nkehe tsíchronka tí ch'ín Isaías tí ch'ín k'uéchrónka itén Dios. Mé ntáchro ch'án xíkíhi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xíkaha ichro itén Dios.

Tí sín tjínkaon tsochréhe tí ch'ín Jesús

(Lc. 9.57-62)

¹⁸ Tió k'uúikon ch'ín Jesús kixin nchónhya chojni k'uántatjen sín ch'án la ntá k'uetøan ch'án kixin ts'átøye sín í jnko chrínta ntá. ¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjínkáván sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kixin:

—Tí koxróntá chóna va itjuéé va la ko tí koxroxé chóna va kaké va. A ntá tí Xjen Dios K'óna Chojni mé chónahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ínchéni, tjtøhéni senó sátsjikjaváni it'éni —ichro ch'án.

²² La ntá kjuátehe ch'ín Jesús ntáchro ch'án kixin:

—Náhi, chréhé tí janhan. Tjtøhé kixin tí chojni tsík'en la jnkokón sín tsík'en tsjavá kichó sín —mé xíkaha ichro ch'ín Jesús.

Ch'ín Jesús kjuínchek'ixrata tí xríntø la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uúixenhen tí ntabárco la k'uúixenko ch'án tí sín k'uájiko ch'án. ²⁴ La ntá xrínahya imá síchrica ntá la ó chjina sítikia ntá tí ntabárco. La kjánchó ch'ín Jesús la tjejuá ch'án. ²⁵ La ntá tí sín k'uájiko ch'án kjuínchek'áya sín ch'án la ntáchro sín kixin:

—Ínchéni nchekaáni kixin tí ntabárco la ó meró ts'aniánki ntá —ichro sín.

²⁶ Ntá kjuátehe ch'án ntáchro ch'án kixin:

—¿Nkekuénté kixin imá chrakonrá? Intsíkoá tinkachónkirá Dios —ichro ch'án.

Kjuixin ntáchro ch'án xíkaha ntá k'uáya ch'án la k'uetuènhen ch'án tí xríntø la ko tí ntayaon la ntá tuénxín k'uúixrata. ²⁷ La ntá imá chrakon sín la ntáchro sín kixin:

† 8:17 Isaías 53.4

—¿Xá nkexro tíhi? Kjónté xr̄nt̄o la ko nt̄ayaon la mé nchexiteyéhe ch'án —ichro sín.

Tí sín chón̄ta nch̄akuen tí jín̄ahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátòyè ch'ín Jesús tí nt̄ayaon a ntá kjuíji sín tí nonte Gadara. La ntá yaá chojni chón̄ta nch̄akuen tí jín̄ahya k'uaxr̄jexín tòyè chojni tsík'en la kóchjinehe sín ch'án. Jehé sín mé imá jiēhe sín la kohya ninkexró tjacha ts'atsínka tí nt̄ia ntiha. ²⁹ La ntá kjuankíxin k'óyako sín ntáchro sín kíxin:

—Tjiat̄éhya jaha tí jeheni jaha Jesús mé Xjeen Dios. ¿Á k'uinka n̄t̄ihi kíxin s̄inchekj̄asóteni kjónté n̄ax̄a kjuixrakáhya tí yaon tsjasóteni? —ichro sín.

³⁰ A ntá n̄tiha kán̄hyó kjín síin itsjé cochíno xr̄ine va. ³¹ La ntá tí nch̄akuen tí jín̄ahya mé chrónóēhe tí ch'ín Jesús kíxin:

—Tí tsét̄oan kíxin sátsjini la chrókjuán̄juan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kíxin:

—Tí x̄ikaha la sátsjia —ichro ch'án.

La ntá tí nch̄akuen tí jín̄ahya a mé k'uaxr̄jexín tí chojni la k'uixenhén tí cochíno. La ntá kaín xín tí cochíno kuinká va, k'uín̄kaj̄inx̄in va n̄tiha kjuítsínkayá va ts̄aka, ntá kjuítsínkankí va nt̄a, kjuín̄hin va nt̄a.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchón̄ta tí nch̄akuen tí jín̄ahya. ³⁴ A ntá kaín tí sín chjasin n̄tiha sákjuíts̄ehe sín ntá kjuíji sín tí t̄jen ch'ín Jesús ntá k'uikon sín kíxin x̄ikaha tsikónhen la chrónóēhe sín ch'án kíxin sáchrók̄jui ch'án ókjé.

9

Ch'ín Jesús kjuínchekitóhe jína ijnko chojni tsík'en toté

(Mr. 2.1-12; Lc. 5.17-26)

¹ La ntá kjuixin tíha ntá ch'ín Jesús mé k'uixenhén ch'án ijnko ntabárc̄o la k'uátsínka ch'án í jnko lado chr̄inta nt̄a la kjuíji ch'án chjasén ch'án. ² A ntá n̄tiha kuik̄ao sín ijnko ch'ín tsík'en toté la tjetsínkaták'á ijnko kania. Ntá k'uikon ch'ín Jesús kíxin chaxín tinkáchónki sín ch'án la ntá nixjēhe ch'án tí s̄inn̄íhi ntáchro ch'án kíxin:

—Xjeenni nchechéhé asán. Tí jiē chonta la ó kjuixin kjuín̄han —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kíxin:

—Tí ch'ín i mé ncheyóhe ch'án asén ch'án Dios kíxin x̄ikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín asén sín ntá ntáchro ch'án kíxin:

—¿Nkeuènté kíxin x̄ikaha jín̄ahya t̄jenkayáxinr̄á? ⁵ ¿Nkehe ānt̄sí x̄rahya chrón̄tátjan ch'án? ¿Á ānt̄sí x̄rahya chrón̄tátjan ch'án kíxin ó kjuixin kjuín̄hin ch'án tí jiē yámá ch'án o á ānt̄sí x̄rahya chrón̄tátjan ch'án kíxin chrók'uín̄katjen ch'án sáchrók̄jui ch'án? ⁶ Méx̄ra tsjákoxiān kíxin tí Xjeen Dios K'óna Chojni mé n̄t̄ihi chjasintajni chón̄ta kjuachaxin tsjak̄j̄in̄hin ijié chojni.

Ntá ntáche ch'án tí s̄inn̄íhi a kíxin:

—Ijie la t'ínkatjen tjatsíyan k̄aniāa na sátsjia nt̄oan —ichro ch'án.

⁷ Ntá tí ch'ín tsík'en toté na tuénxín k'uín̄katjen ch'án la sákjuí ch'án nt̄oan ch'án. ⁸ Ntá kaín tí sín síin n̄tiha k'uikon sín kíxin x̄ikaha kónhen la imá

chra^hkon sín la kjuanchehe sín Dios kjuasáya kíxin tí nkexro imá kjuakoxin ch'án kjuachaxin kuènte Dios.

Ch'in Jesús k'uíyehé ch'án tí ch'in Mateo

(Mr. 2.13-17; Lc. 5.27-32)

⁹ A ntá ch'in Jesús sákjuixin ch'án ntiha la k'uikon ch'án ijnko ch'in it'in Mateo tjetjaxin ch'án ntiha nchekjènkí ch'án. Ntá ntáchro ch'in Jesús kíxin: —Chrèhé tí janhan —ichro ch'án.

Ntá ch'in Mateo tuénxin k'uínkatjen ch'án chrèhé ch'án tí ch'in Jesús.

¹⁰ A ntá chr'èxin ch'in Jesús kjuák'e ch'án ntòe tí ch'in Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chónta jìe mé kjuíji sín la kjaxin kjóneko sín tí ch'in Jesús la ko tí sín k'uájiko ch'án. ¹¹ La ntá tí sín fariseo kjaxin k'uikon sín xíkaha la kjuanchankíhi sín tí sín k'uájiko ch'in Jesús, ntáchro sín kíxin:

—¿Nkekuènté kíxin tí ch'in maestro kuèntará mé neko ch'án tí sín nchekjènkí la ko tí í so sín chónta jìe? —ichro sín.

¹² Ntá ch'in Jesús la kuínhin ch'án nkehe tí tjo sín la ntáchro ch'án kíxin:

—Tí sín níehya la t'ichjánxienhya sín nkexro sich'e xroan. Náhí. Jehó tí chojni nihi mé t'ichjánxinhin sín nkexro sich'ehe sín xroan. ¹³ Sátjirá la ts'ítjará nkexrí t'axrxéjin tí nkehe ntáchro xroon itén Dios. Mé ntáchro kíxin: “Janhan tjínkavan kíxin chrókuikonóhérá chojni la tjínkakonhya kíxin chrók'oyánrá iko chrókjuánjonrá.”* Mé xíkaha ichro itén Dios. Janhan na k'uínkahya ntíhi kíxin chrók'uíyahá chojni jina tjejó. Náhí. K'uínka kíxin ts'íyahá tí chojni chónta jìe kíxin chrókuítòhe sín tí ijíe sín ntá chrókjuinkí sín tí tjenkayáxin sín —ichro ch'án.

Kjuanchankí sín kuènte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'in Juan Bautista mé kóchjinehe sín ch'in Jesús la kjuanchankíhi sín ch'án, ntáchro sín kíxin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuènte xíkaha ch'e sín? —ichro sín.

¹⁵ Ntá kjuátehe ch'in Jesús, ntáchro ch'án kíxin:

—¿Xá chrók'uává kaín tí sín tsík'íyehé sín tsochjina tso^htehe ijnko chojni kíxin naxá tjen tí ch'in tsíkótehe tjejóko sín ntiha? A ntá tsjixraká ijnko yaon tsotsé sín tí ch'in tsíkótehe sátsjiko sín ch'án ntá kaín tí sín tsikóchjina mé ts'ává sín la í sinehya sín.

¹⁶ Nijnko chojni chrókjuak'eniéhe tí ka ó ntaxin it'ò ka nixin kíxin ntá chrókjuixéhe tí ka nixin chrók'uitjjan tí ka ntaxin ntá antsí má chrók'uichje.

¹⁷ La ko kjaxin éxí yóhe chrókjuikiahya chojni xranvino nixin ijnko tjuaxran ó ntaxin kíxin tí xíkaha chrókjuich'e sín ntá chrók'uichje tí tjuaxran ntaxin. Ntá chrók'uitjýan tí xran la ko chrok'uitjýan tí tjuaxran. Ntá tí xranvino nixin chrókjuikia ijnko tjuaxran nixin la ntá xíkaha la yóí nkehe chrók'uitjýanhya.

Ch'in Jesús kjuínchexechón tí tjachjin xjeen ch'in Jairo la ko kjuínchekitòhe jina ijnko tjan kuákoxin iké ch'án

(Mr. 5.21-43; Lc. 8.40-56)

¹⁸ Ntá naxá tjenixja ch'in Jesús la ntá ikjui ijnko ch'in t'etòan kuènte tí sín judío la kjuák'exin toch'in ch'án nkayakon tí ch'in Jesús la chrónóhe ch'án kíxin:

* 9:13 Oseas 6.6

—Tí xjanna na ntá kjuixin k'uén. Xrjanóaha sáchrókjuini chrókuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuiko ch'án tí ch'ín a la ko sákjuikotoxin ch'án tí sín k'uájiko ch'án. ²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákoxin tjan tí iké ch'án ²¹ kixin tjenkayáxin tjan kixin kjónté chrínta iké ch'án ó chrókuákoxin tjan, la táhó chrókuítöexin tjan jína. ²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítöha jína kixin kuítekávan tí janhan —ichro ch'án.

Na ntá tuénxín ó kuítöhe tjan jína.

²³ Ntá tió kjuíji ch'ín Jesús ntöe tí ch'ín judío t'etöan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkama sín xjan. ²⁴ La ntá ntáchro ch'ín Jesús kixin:

—Tí xjan méhe títöherá, kixin tsík'enhya xjan, la tjejua xjan ó —ichro ch'an.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uixenhen ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuenté chjasin ntiha la kuínhin sín kixin xíkaha kónhen.

Ch'ín Jesús kjuínchekitöhe jína yaá sín t'ikonhya

²⁷ Ntá sákjuixin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehé sín ch'án ntáchro sín kixin:

—Tíkonóghéni jaha tsík'axrjeníxian David.

²⁸ Ntá k'uixenhen ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á títekávan kixin tsjácha sít'a xíkaha? —mé xíkaha kjuanchankí ch'án.

Ntá kjuátöhe sín kixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xíkaha kuítekávan la tsoxíteyá —mé xíkaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uétuñenhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxín chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitöhe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuíkao sín ijnko ch'ín nósin ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankíxin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xíkaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etüñenhen tí nchakuen tí jínahya tsíkjanjon kjuachaxin mé xíkaha takitsje tí ch'ín i tí nchakuen tí jínahya —mé xíkaha ichro sín.

Ch'ín Jesús kuíkonóhe ch'án chojni

³⁵ Ntá k'uátsínka ch'ín Jesús itsjé chjasin jié la ko chjasin ntsí la kjuakoxin ch'án jnkojnko njnko Israel. Chrónka ch'án tí tan jína nkexrí tjen tí kjuachaxin kuénte Dios. La ntá kjuínchekitöhe ch'án jína chojni níhi chóna kaín xín chin

la ko chojni chónṭa kjuatjoté. ³⁶ K'uikon ch'án kixin nchónhya chojni k'uéjé sín ntá kuikonóḗḗ ch'án sín kixin imá tóxakonhen sín la k'uéjé sín éxí kolélo chónṭahya nkexro t'ayakonhen. ³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xrá mé tsjéhya. ³⁸ Chrókjuancheherá tí Inché tí nonte kixin chróchr'án ch'án itsjé chojni chrókuich'e xrá —mé xikaha ichro ch'ín Jesús.

10

Ch'ín Jesús kjueyá teyó sín ts'ajiko ch'án
(Mr. 3.13-19; Lc. 6.12-16)

¹ Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuñhen asén chojni la ko sinchekitoḗḗ sín jína kaín chojni chónṭa kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxin mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjénki la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjaxin it'in ch'án Tadeo. ⁴ La ko kjaxin ch'ín Simón, mé kuente tí sín cananista, la ko kjaxin ch'ín Judas Iscariote, mé tí nkexro chr'éxin kjuínchekji tí ch'ín Jesús.

Ch'ín Jesús k'uetuñhen tí teyó sín kixin sátsjikako sín kjuachaxin kuente Dios
(Mr. 6.7-13; Lc. 9.1-6)

⁵ Ntá k'uetuñhen ch'ín Jesús tí teyó sín kixin sátsji sín la k'uetóan ch'án kixin:

—Tjíhyará tí tjejó tí sín jehya judío la ko t'ixeenhyará tí chjasin siín estado Samaria. ⁶ Náhi. Íchá jína sájtjirá tí tjejó tí chojni éxí kolélo kjuíchroe kuente nación Israel. ⁷ Sájtjirá tjákoherá sín kixin kjuachaxién Dios tjen nkaya nkajní la í séhya tsi. ⁸ Sinchekitoḗḗ jína chojni níhi la ko sinchekitoḗḗ jína tí sín chónṭa chin lepra la ko sinchexechónrá chojni tsík'en la takítsjerá tí nchakuen tí jínahya. Jahará kjaxin kujitonhanrá tí kjuachaxién Dios, méxra chrókuachahyará jahará kjaxin.

⁹ Chrókuikuahyará ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sájtjirá ntja la chrókuikuahyará ka bolsa la chrókuikuahyará yaá ka chrók'uínkayaterá la ko chrókuankahyará tokatárá la ko chrókuikuahyará nta tjixinrá. Tí nkexro ch'e xrá la jehí siín kjuachaxin ntiha chrókjone.

¹¹ A ntá tió tsjasánrá ijnko chjasin jié o ijnko chjasin ntsí la tjeyará ijnko nkexro tsjanjon kjuachaxin la ntḗ sín ntahó chrókuitḗhará ntá tsjixin tí xrá ntá sátsjirá. ¹² A ntá tió t'ixenhénrá ntḗ sín la nixjehérá sín tjákoxinrá jnkójina. ¹³ A ntá tí chaxín jína asén sín la ts'áyéḗ sín tí kjuaxróxin, a ntá tí náhi la sájtjikorá tí kjuaxroxin. ¹⁴ A ntá tí tsochrohya sín tsjanjon sín kjuachaxin tsitohará la tjinkakonhya sín tsinhin sín tí nkehe tsochronkará na mé t'axrxéxinrá tí ntḗ sín o tí chjasén sín la t'oxénjinrá tí inche chónṭa totará. ¹⁵ A ntá chaxín tjonkará kixin tió tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchónṭa sín jié la kánhyó tsjasóte sín, a ntá tí sín chjasin a la antsí tsjasóte sín kixin k'uéjóxroxinhya sín tí tan chrókuaáxin sín.

Ókjé sín tsonínkakohen tí sín kuente Cristo

16 'Janhan tsochr'an tí jahará éxí yóhē chróchr'an kolélo ts'ejóyjakan kolóbo. Listo chrók'uejorá éxí konche xíkaha la chrók'uejorá éxí kontóá chrókójiáhyará. 17 Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'etqan la ko nkaxenhen tí nínkqé sín tsjatiaxínrá sín. 18 La ntá tsjikaánrá sín tí tjejó tí sín t'etqan la ko tí siín tí sín rey kixin tinkachónkirá tí janhan. Ntá jína tsochrónkará kixin tinkachónkirá tí janhan nkayakon tí jehe sín la ko nkayakon tí sín chónhya Dios. 19 A ntá tió sátsjikoará sín tí tjejó tí sín t'etqan la tóxakuanhyará nkehe tsontáchrórá o nkexrí tsonixjará kixin tió tsjixraká tí hora la ntá Dios mé tsjinkqísará tsonixjará. 20 Kixin jehya jahará tsonixjará. Náhí. Tí Nchakuen It'eni mé tsochrónka nkehe tsonixjará.

21 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsónínkakohen tí it'é kixin its'en. 22 Kaínxin chojni chjasintajni tsónínkakohenrá sín kixin tinkachónkirá tí janhan. A ntá tí nkexro tsítqehya tsínkáchónki sín tí janhan hasta tsjéje chjasintajni mé tsaá. 23 Tió má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxá tjixinhya ts'atsínkará kaín tí chjasin Israel.

24 'Tí nkexro xrakohe la kánhyó tjetóan la tí maestro la antsí tjetóan, la ko kjaxin tí nkexro ch'e xrá la tjetóanhya la antsí tjetóan tí lamo. 25 A ntá tí nkexro xrakohe chrókjuakoxin ch'án éxí tí nkexro kjuakohe ch'án la ko tí nkexro ch'e xrá chrókjuakoxin ch'án éxí tí lámoé ch'án ch'ehe ch'án xrá. Tí ch'ín inché nchia la kjaxin nchek'in sín Beelzebú la kjaxin tí sín kjéhya xíkaha nchek'in sín.

Nkexro tí chróchrakhénrá (Lc. 12.2-9)

26 'Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin. 27 Tí nkehe tjonkará sítié la t'ichjánxin tsochrónkará tió itsi xrohi t'inkaséyanxin tí yaon. La ko tí nkehe tjonkará ijie ninxeró noehya la t'ichjánxin chrónkará chrókuinhin kaín sín. 28 Chróchrakuénhyará tí sín t'óyan cuérpqé chojni kixin asén chojni xitjahya ts'óyan sín. Íchá jína chróchrakhénrá tí nkexro tsjacha sinchek'itjáyaxin cuérpqé chojni la ko asén chojni tí xrohi ts'ankahya.

29 'Á chrókóxiñinhya yaá koxroxé ntsínsí ijnko chichaon ntsí? A ntá kjónté xíkaha la chrók'uanótjehya nijnko tí jehe va nonte tí chrókjuanjonhya It'eni kjuachaxin. 30 A ntá kjónté tí kaxihj chóna ikjára la ó nohe ch'án nkekjain ka chontará. 31 A ntá jahará chróchrakonhyará kixin tóyoáhyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuehya tsochrónka sín kixin tinkáchónki sín Cristo nkayakon chojni (Lc. 12.8-9)

32 'Kaín tí chojni tsochrónka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajni. 33 A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajni.

*Jnkokoáhya tsjenkayáxin chojni káxin ó kui Ìnchéni Jesús
(Lc. 12.51-53; 14.26-27)*

³⁴ Tjenkayáxinhyará káxin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Tsjanjonko kíchó chojni káxin k'uinka janhan. ³⁵ Janhan k'uinka káxin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tíkintá tsonínkakonhen ich'ee. ³⁶ Mé xíkaha tí sín tsonínkakonhen kíchó la mé tí sín naxá kjéhya sín.

³⁷ A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuéntana, la ko tí nkexro antsí tjuèhe xjeen sín la kánhyó tjuana sín la mé xitjahya ts'óna sín kuéntana. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana. ³⁹ Tí nkexro tjinkaon káxin kohya nkehe chrókónhen sín mé ts'it'íjanan sín, a ntá tí nkexro chrókjuinçek'it'íjyanxín asén káxin tinkáchónki sín tí janhan la mé tsaá sín.

*Tí nkexro ts'áyéhe nkehe
(Mr. 9.41)*

⁴⁰ Tí nkexro chrókjuanjón kjuachaxin chrók'uejorá la mé éxí chrók'uáyéhe sín tí janhan la ko tí nkexro chrók'uáyéhe tí janhan la éxí yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjón kjuachaxin tsjak'e ijnko nkexro nixja itén Dios káxin táha la Dios ichr'án la mé ts'áyéhe nkehe éxí ts'áyéhe tí nkexro kjuako. La ko tí nkexro chrókjuanjón kjuachaxin tsjak'e ijnko chojni jína káxin jína ch'án mé xíkaha ts'áyéhe sín nkehe éxí ts'áyéhe tí nkexro jína. ⁴² A ntá tí nkexro sinček'it'ónhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan káxin tí ch'ín a mé chaxín ts'áyéhe ch'án nkehe jína káxin xíkaha kjuich'e ch'án.

11

*Ch'ín Juan Bautista k'uetuēnhen iso sín
(Lc. 7.18-35)*

¹ Ntá ch'ín Jesús kjuixín kjuakohe ch'án tí teyó sín xriko ch'án la ntá sákjuixín ch'án ntiha la sákjuikjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntøechiso ntá xrínahya kuínhin ch'án nkerí xrá tjech'e Cristo. La ntá k'uetuēnhen ch'án iyó tí sín k'uék'ajiko ch'án káxin sátsjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchro sín káxin:

—¿Á jaha tí nkexro itsi ní o á naxá tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án káxin:

—Sátjirá tjichenkará tí ch'ín Juan tí nkehe k'uikonrá la ko tí nkehe kuínhínrá.

⁵ Chenkará ch'án káxin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchónta chin lepra la ó kótjóá sín kuítóhe sín jína la ko tí sín k'uékienhya la ó tinhin sín jie. Kjaxín tí sín tsík'en na ó zechón sín ináa la ko kaín tí sín nõa mé síxrakohe sín tí tan jína tsaáxin sín. ⁶ Méxra imá náxrjón tí nkexro kohya nkehe t'ínkákónhen tinkáchónki tí janhan.

⁷ Tío sákjuí sín ntá ch'ín Jesús kjuankáxin nixjéhe ch'án tí sín k'uéjé la chrónka ch'án kuènte ch'ín Juan ntáchro ch'án káxin:

—Tí sákjuítsjehérá ch'ín Juan nteje la, ¿nkexrí k'uikonrá tí jehe ch'án? ¿Á k'uikonrá ch'án éxí ijnko tji nchexrayehe xrínto? ⁸ Tí náhi, la ¿nkehe k'uikonrá? ¿Á k'uikonrá ch'án éxí ijnko nkexro tsík'itsa jína? Jahará ó nohará káxin chojni tsík'itsa jína la tjejó sín tí nchia kuènte tí sín rey. ⁹ ¿A ntá nkehe k'uikonrá? ¿Á

ijnko nkexro chrónka itén Dios? Jehe chaxín la antsí chóna ch'án kjuachaxin la tí sín k'uéchónka itén Dios la kánhyó. ¹⁰ Ch'ín Juan mé tí nkexro kui éxi xikaha chrónka xroon itén Dios ósé. Mé ntáchro xikihi:

Janhan mé tsochr'an ijnko nkexro tsochrónka itan kuéntana tsitónxin ntia, kixin tsjasiyóxin ch'án ntia kuénta.*

Mé xikaha chrónka itén Dios. ¹¹ Ntá ijnko nkehe chaxín tsotjonkará kixin kaín tí nkexro k'uéjé senó la kánhyó tjeoan sín la antsí tjeoan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjeoan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuénte nkaya nkajní. La jehó tí sín imá chóna kjuachaxin mé tsjacha sín. ¹³ Kaín tí sín profeta la ko tí ley kuénte ch'ín Moisés mé chrónka nkexrí tí kjuachaxin kuénte Dios hasta ikui ch'ín Juan. ¹⁴ A ntá tí jahará chrókuítekaónrá tíhi; kixin ch'ín Juan la mé ikui kixin tí xra kuénte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá. ¹⁵ Tí nkexro tjinkaon chrókuinhin la chrókuinhin.

¹⁶ ¿Nkexrí chrókuintayóaxian tí chojni tjejó ijie? Tóyóhe sín tí chánjan tjejótjaxín sín ntasin tsítan sín la t'íyehé sín kichó sín ¹⁷ ntáchro sín kixin: "K'uánoani flauta kjánchó jahará la t'ehyará. Itsjeni isón kuénte chojni tsík'en la ntá k'uaváhyará la ko tsjankahyará." ¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrórá kixin ijnko nchakuen tí jínahya mé chóna ch'án. ¹⁹ A ntá tíó kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna jie la ko tí sín nchekjènkí, ichrorá. A ntá tí kjuachaxin kuénte Dios mé tjakoxín tí xjeen ch'án.

Tí chjasin titekakonhya

(Lc. 10.13-15)

²⁰ Ntá ch'ín Jesús mé kjuankíxin ch'án ntáche ch'án tí sín tjejó iso tí chjasin imá kjuasixín ch'án kjuaxroan kixin kjónté xikaha la naxa kuínkáchónkihya sín Dios. ²¹ Ntá ntáchro ch'án kixin:

—Nòará jahará tjejorá chjasin Corazín la ko nòará jahará tjejorá chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakoxín sín chrók'uinkáya sín ka tié la ko nteso chrókjuinçek'ia sín asén sín. ²² Ntá ntáxrjan kixin tí yaon tsitoexín ijie chojni a ntá jahará antsí tsjasótíará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kixin imá nohará a ntá sátsjírá nkaya nkajní, ichrorá, kjánchó chaxínhya. Jahará la tsjasinkajinxinrá ntíha sátsjírá tsjasótíará tí síin tí sín tsík'en. Tí chrókjuásian tí kjuaxroan tí chjasin Sodoma éxi kjuásian chjasánrá la tí chjasin la kjá naxa chrók'uixin sín naxa chrók'uitjáyanhya sín tí yaon ijie kixin tjoka chrókuítekaon sín. ²⁴ A ntá tjonkará kixin tíó sinchekitóxén Dios ijie chojni la antsí tsjasótíará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará

(Lc. 10.21-22)

²⁵ Ntá tí yaon a ch'ín Jesús mé nixjehe ch'án It'é ch'án ntáchro ch'án kixin:

* 11:10 Malaquías 3.1

—Tjáncáha kjuasáya It'éni mé Ìnché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya. ²⁶ Mé xíkaha It'éni jaha kóxrjínhan kixin xíkaha tsonhen —ichro ch'ín Jesús.

²⁷ Ntá ntácho ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjeýá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsíkóxrjérá kjuich'erá xra la yamárá nkehe iye la ntá janhan mé sintak'ok'áhará. ²⁹ Tákjára tí xra kuèntana la ts'itjará kuèntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá. ³⁰ Tí xra tsotjahará la xrahya la tí nkehe tsotjahará la yehya.

12

Tí sín k'uajiko ch'ín Jesús mé ik'uín sín iso noatrigó ijnko yaon t'ok'éhe tí sín Israel

(Mr. 2.23-28; Lc. 6.1-5)

¹ A ntá ijnko yaon la ch'ín Jesús k'uaúsinka ch'án ijnko nonte siín noatrigó tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankixin sín ik'uín sín iso noatrigó a kixin sine sín. ² A ntá iso tí sín fariseo k'uúkon sín kixin xíkaha kjuich'e tí sín xriko ch'ín Jesús la ntá ntácho sín kixin: —Tsjehé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kixin:

—Jahará ¿a kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uúxenhén sín tí nchia kuènte Dios la kaín sín kjóne sín tí niojtja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó siín kjuachaxin sine tí sín nchát'á. ⁵ Jahará ¿á nchekuáxinhyará tí xroon tsíkjin ch'ín Moisés ntácho kixin tí sín nchát'á kuènte njnko mé t'ok'éhya sín tí yaon sábadó la kjónté xíkaha la jehya jie tíha? ⁶ Ntáxrjan kixin itjén janhan la antsí má chonta kjuachaxin la ntá tí njnko la kénhyó. ⁷ Jahará la tiénxinhyará nkexrí t'axrjexín tí nkehe ntácho xroon itén Dios. Mé ntácho kixin: “Janhan Dios tjínkavan kixin chrókuiikonóhéhá chojni la tjínkakhya kixin chrók'oyánrá iko chrókjuánjonrá.”* Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya. ⁸ A ntá tí Xjeen Dios K'óna Chojni mé chóna kjuachaxin ts'etqan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitöhe jina ijnko chojni tsixámá tja

(Mr. 3.1-6; Lc. 6.6-11)

⁹ Ntá ch'ín Jesús mé sákjuúxin ch'án ntiha la k'uúxenhén ch'án ijnko njnko Israel. ¹⁰ Mé ntiha itjen ijnko ch'ín tsixámá tja. Na ntá tjejóntaxín iso sín fariseo a tjínkaon sín tsjanchia sín jie. La ntá kjuanchankíhi sín ch'án kixin:

—¿Á siín kjuachaxin sinchekitoheni jina ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntácho ch'án kixin:

* 12:7 Oseas 6.6

—Jnkojín tí jahará chontará ijnko kolélo chrókjuítsínkáya ijnko tòye tí yaon t'ok'éheni zá chrókjuihyará chrókuakitsjetaónrá va tòye ní? ¹² Kjánchó tí chojni antsi má tjete sinkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra nixjehe ch'án tí ch'ín níhi a, ntáchro ch'án kixin:

—Tjéntoá tjá —ichro ch'án.

A ntá tí ch'ín níhi tja kjuentoá tja ch'án la ó kjuixin kuítóhe jína éxi tí í jnko tja ch'án xikaha. ¹⁴ Ntá tí sín fariseo kónínkaon sín k'uaxrxjén sín ntiha sákjuí sín la kjuenkayáxin sín nkexrí ts'óyán sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsjé sín chréhe sín ch'án. Kjuínchekitóhe ch'án jína kaín tí sjinníhi ¹⁶ la k'uetóan ch'án kixin tsochrónkahya sín noxín kixin nkexro tí jehe ch'án. ¹⁷ Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsintáchro ch'án xikihi:

¹⁸ Ntihi tjen tí nkexro ch'ena xra la janhan mé kjuéyá ch'án, janhan tjuaha ch'án la chàna kixin itjen ch'án.

Tsotjaha ch'án tí nchakuenná

la jehe ch'án mé tsochrónka ch'án nkexrí sjntakitóaxián ijíé chojni chjasintajni.

¹⁹ Tsonínkauenhya ch'án chojni la chjíníhya ts'óyako ch'án, la ko kohya nkexro tsinhin itén ch'an tí ntja.

²⁰ Ts'óchjenjinhya ch'án kjónté itji tsíxréya,

la ts'ók'an kahya ch'án kjónté ijnko nkehe sínhchikóá.

Jehe ch'án naxa sich'e ch'án xra tsjixrakájia tí yaon ts'etóan ch'án.

²¹ La kaín xín chojni chjasintajni mé tsitekaon sín tí jehe ch'án.†

Mé xikaha chrónka itén Dios ósé.

Tí sín fariseo mé ntáchro sín kixin ch'ín Tsochren t'etuenhen asén tí ch'ín Jesús (Mr. 3.19-30; Lc. 11.14-23; 12.10)

²² Ntá iso chojni sákjuíkohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitóhe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etóanxín sín, la ko kjaxín tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxín xikaha ts'itjáyán sín. ²⁶ A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetóan. ²⁷ Jahará ntáchrórá kixin janhan kuakítsjexián tí nchakuen tí jínahya kjuachaxin kuènte ch'ín Beelzebú. A ntá tí chaxín xikaha la ntá ¿nkexro chjéhe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehe sín mé tjakoxín sín

† 12:21 12.18–21 Isaías 42.1–4

kíxin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jínahya kjuachaxin kuènte Nchakuen Dios la túha mé chrókónoaxínrá kíxin tí kjuachaxién Dios mé ó kui tí tjejórá.

²⁹ ¿Nkexrí chrók'uixenhen ijnko nkexro ijnko ntøe ijnko ch'ín jiehe la chrókuakitsjehe ch'án tí nkehe chóntha ch'án? Senó la chrókóntøte ch'án kíxin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'ínkákonhen tí xra it'a.

³¹ Méxra xrxanka kíxin Dios tsjakjiin jnkojnko jie tjasin chojni la ko kaín nkehe jínahya nixja sín. A ntá tí t'ántaxínhin sín Nchakuen Dios la xitjahya tsjiin ijje sín. ³² La ko xrxanka kíxin kaín nkehe t'ántaxínhínra tí Xjeen Dios K'óna Chojni la tsjakjiin Dios. A ntá tí ts'antaxínhínra Nchakuen Dios la ntá mé í tsjiinnya tí ijjará kjónté ntihi chjasintajni la ko kjónté tí chr'éxin.

Tí nta chrókjuatsøanxin sín tí to jína

(Lc. 6.43-45)

³³ Tí nta tsík'ánki jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsøanxinni tí to a. ³⁴ Jahará tsík'axrjeníxinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxí ntáchro asánra mé nixja ir'vará. ³⁵ Ijnko chojni jína mé jína nixja kíxin jína asén ch'án. A ntá ijnko chojni jínahya mé nixja tí nkehe jínahya kíxin tí asén ch'án kjaxin jínahya. ³⁶ Ntá tjonkará kíxin itsi tí yaon tsjixixin tió sinchekitøexin Dios ijje chojni ntá tsonohará kaín nkehe chjini tsínixjará. ³⁷ Kíxin tí nkehe nixjará tsjakoxin á kjuásinrá jie ní o náhi.

Tí sín jehya jína tjanchehe sín ch'ín Jesús kíxin tsjakoxin ch'án ijnko kjuaxroan jie

(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kíxin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonøexinni kíxin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kíxin:

—Tí sín jínahya la ko tí sín kuítøe Dios mé tjanchia sín chrókjuásian kjuaxroan náxrjón. Kjánchó tsjakoxinnya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchónka itén Dios ósé. ⁴⁰ Éxí yóhe kjuák'e ch'ín Jonás iní yaon la iní tie nkaxenhen tsege koche jie mé xikaha tí Xjeen Dios K'óna Chojni tsjak'e nkaxenhen tøy tsoxravá iní yaon la iní tie. ⁴¹ A ntá tí yaon tsitøexin ijje chojni la ntá tí sín chjasin Nínive mé tsjanchia sín jie kíxin tí sín tjejó jie, kíxin tí sín chjasin Nínive mé kuítøe sín ijje sín tió kuínhin sín itén Dios chrónka ch'ín Jonás. A ntá ijje itjén janhan la antsí má chonta kjuachaxin. A ntá tí ch'ín Jonás la kénhyó k'uéchóntha ch'án kjuachaxin, kjánchó jahará kuítekákonhyará tí janhan. ⁴² Kjaxin tí yaon tsitøexin ijje chojni la tí tjan reina k'uøtoan kjuixin nó Sur mé tsjanchia tjan jie kíxin tí sín tjejó ijje kíxin jehe tjan kjuixin imá ikjin kíxin chrókuinhin tjan tí kjuaxrexinkaon jína k'uékjako ch'ín Salomón. A ntá ijje itjén janhan la janhan antsí má nõna a ntá ch'ín Salomón la kénhyó k'uénohe ch'án.

Tió tsokjan tí nchakuen tí jínahya

(Lc. 11.24-26)

⁴³ A ntá ijnko nchakuen tí jínahya tsík'axrjexín ijnko chojni la mé ixri tí nonte xamá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntóna k'uaxrjéxian”, ichro. A ntá tió ikjan tí nchakuen la t'ikon éxi ijnko nchia kohya ninxeró la éxi ijnko chojni tsík'ánjón ntóe la náxrjón tsjehe tí nkaxenhen nchia. ⁴⁵ A ntá k'uikon tí jínahya xikaha tjen nchia la ntá sákjuikakjín í jnko yato nchakuen tí jínahya antsí má jínahya. A ntá kaín k'uixenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín siín ijje titekakonhya.

*Tí iné la ko kichó ch'ín Jesús
(Mr. 3.31-35; Lc. 8.19-21)*

⁴⁶ Ntá ch'ín Jesús naxa tjenixjehé ch'án chojni la ntá xrínahya kjuíji iné ch'án la ko kichó ch'án. Ntá kuitóhe sín ntója ó la tjinkaon sín chrónixjehé sín ch'ín Jesús. ⁴⁷ Ntá ijnko nkexro ntiha sákjuíchénka tí ch'ín Jesús, ntáchro ch'án kixin:

—Íná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátéhe ch'án nixjehé ch'án tí nkexro chrónka a, ntáchro ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé naná la ko kichiná. ⁵⁰ Tí jnkójín sín i nchexiteyá nkehe tjinkaon T'aná tjen nkaya nkajni na mé táha mé naná la ko kichiná mé xikaha t'ikuán tí jehe sín —ichro ch'án.

13

*Ch'ín Jesús mé kjuíncheyóexin ch'án éxi ijnko chojni t'enka nontee
(Mr. 4.1-9; Lc. 8.4-8)*

¹ A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjaxin ch'án chrínta ntayaon. ² Ntá k'uúixikóhjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabarco kjuák'etjaxin ch'án la kaín sín na tí chrínta ntá ó kuitóhe sín. ³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxi ijnko ch'ín sákjuík'enka nontee ⁴ mé xikaha sákjuík'enka ch'án iso tí noatrigó a. Ntá iso noa la tsík'ánótjen ntja ntá ikui koxroxé k'uúinká va noa. ⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin ntaha tjínhya chóna nche. ⁶ Ntá tí kjujton yaon la ntá tí ka la xamá kixin njnkahya chóna nuèe. ⁷ A ntá í so noa kjuítsínkak'á tí siín kach'í na k'uánkí tí kach'í a na ntá í xitjahya k'uánkí tí noatrigó a kixin tsík'jate tí kach'í. ⁸ A ntá tí noa tsík'itji nche jína na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

*Nkekuénté kjuíncheyóexin ch'ín Jesús
(Mr. 4.10-12; Lc. 8.9-10)*

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuénté xikaha nixjehé sín ncheyóexián? —ichro sín.

¹¹ A ntá ch'ín Jesús kjuátéhe ch'án ntáchro ch'án kixin:

—Jahará la Dios me tsjinkĩtsa tsoṇohará tí nkehe noehya í so chojni kuènte tí kjuachaxin kuènte Dios. **A** ntá tí jehe sín a la náhi. ¹² Tí nkexro ó chóna nkehe la aṇtsí ts'áyéhe sín kixin aṇtsí má tsochóna sín. **A** ntá tí nkexro chónahya la kjónté tí ntsí chóna sín la ts'axrjehe sín. ¹³ Mé xikaha kjuĩntayóaxuán kjuákuaxiān sín kixin jehe sín t'ikon sín la ntá kjónté tĩtsoanhya sín la tjejótinhin sín a ntá kjónté kienxínhya sín. ¹⁴ Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xikihi:

Jehe sín tsinhin sín a ntá tsiexínhya sín
la ts'ikon sín la tsjatsqanhya sín tí nkehe ts'ikon sín.

¹⁵ Imá icha aṣén tí sín chjasin i.

Chóna sín ntatsjon kjánchó ts'íkjehe
la chóna sín ikon sín kjánchó t'ikonhya sín,
kixin chrók'uikonhya sín
la chrókuienhya sín la ko
xitjahya kienxín sín,

kixin í tjinkakonhya sín chrókjan sín kixin janhan mé chrókuĩntakitohā sín
jína.*

Mé xikaha tsíkjin ch'ín Isaías.

¹⁶ Ntá ntáchro ch'ín Jesús inaá kixin:

—**A** ntá jahará la imá náxrjón tjejorá kixin t'ikonrá la ko tinhínrá. ¹⁷ Chaxín xrjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuĩnhin sín tí nkehe tjejotinhínrá la ntá kuénhya sín.

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

¹⁸ Tinhínrá nkexrí t'axrjexín tí ch'ín sákjuík'enka ñontee. ¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kienxínhya sín la yóhe tí noa xènjintja ntja. Ó kui ch'ín Tsochren ntá kjuínchek'itjāyan ch'án tí itan jína kuínhin sín. ²⁰ **A** ntá tí tje kjuĩtsínkak'á xrō la mé t'axrjexín kixin tí chojni kuínhin itén Dios la tjoka kóxrjínhin sín la kuinkáchónki sín. ²¹ Kjánchó ñĩnkahya chóna nuèe na ntá itsí tí kjuaxróxinhya o tsochónkĩhi sín chojni chrók'óyán sín kixin tí itén Dios kuítekaon sín, a ntá tsítōhe sín tí tinkáchónki sín Dios. ²² **A** ntá tí tje kjuĩtsínkak'á kach'ĩ na mé éxi yóhe ijnko chojni kuínhin itan jína kjánchó tjitoxiēnha ntje sín kixin tóxakonhen sín tí xrā chóna sín chjasintajni la ko tjinkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xikaha xitjahya sich'ehe sín xrā Dios. ²³ **A** ntá tí tje k'uíka tí nonte chóna nche jína na mé yóhe tí chojni kuínhin tí itén Dios na ko kienxín sín la ntá xikaha jína ch'ehe sín Dios xrā. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxi tí kajnto k'uánkikué tí noatrigō

²⁴ Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'ín k'uēnkā noa jína ñontee ch'án. ²⁵ **A** ntá tió k'uéjójua kaín sín ntá ikui ijnko nkexro nĩnkakonhen sín la k'uēnkā ch'án kajnto chrík'á tí noa a la ntá sákjuík' ch'án. ²⁶ La ntá tí

* 13:15 13.14–15 Isaías 6.9–10

noatrigo k'uánkí la ntá ó sítintaa la ntá ntiha kjaxin kónoxixin k'uánkí tí kajnto. ²⁷ Ntá tí sín ch'e xra mé sákjuínixjehe sín tí lámoe sín la ntáchro sín kíxin: “Tí noa k'uènká nontaa la noa jína tíha. A ntá žnketí kjuixín tí kajnto tsík'ayan?” ichro sín kjuanchankí sín. ²⁸ Ntá kjuátehe tí inché tí nonte ntáchro kíxin: “Kjá ijnko nkexro nínkakonna mé kjuích'e xikaha”, ichro ch'án. Ntá tí sín ch'e xra mé kjuanchankí sín kíxin: “¿Á tjínkáván kíxin sátsjini tsakitsjenkíni tí kajnto?” ichro sín. ²⁹ A ntá kjuátehe ch'án kíxin: “Náhí. Tí sátsjia tsakitsjenkiá tí kajnto la kjá chónete tí katrigo ts'axrjenkí. ³⁰ Íchá jína títóhé kíxin ts'ánkíkué tsjixin tsotjájiani. Ntá ts'etuenhenni tí sín tsotjá kíxin senó ts'ejo sín tí kajnto la sinchenteto sín kíxin tsoche la ntá chr'éxin tsotjá sín tí noatrigo ntá ts'inkachjina tí noa a” —mé xikaha chrónka ch'in Jesús.

Ch'in Jesús kjuíncheyóexin ch'án éxí tí xroan ijnko ntayoa it'in mostaza (Mr. 4.30-32; Lc. 13.18-19)

³¹ Ntá ch'in Jesús kjaxin kjuíncheyóexin inaá ntáchro ch'án kíxin:

—Tí kjuachaxin kuente Dios mé éxí yóhe ijnko tje mostaza k'uenká ijnko chojni nontee ch'án. ³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkí ijnko nta imá jíe la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

Ch'in Jesús kjuíncheyóexin ch'án éxí tí xroan t'ánkíxin niotja (Lc. 13.20-21)

³³ Kjaxin kjuíncheyóexin ch'án tíhi mé ntáchro ch'án kíxin:

—Tí kjuachaxin kuente Dios mé éxí yóhe tí xroan t'ánkíxin niotja. Kjuinkíjjaxín ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'in Jesús tí nixja ch'án (Mr. 4.33-34)

³⁴ Ch'in Jesús kjuakohe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án. ³⁵ Mé xikaha kjuako ch'án kíxin tsoxiteyá tí nkehe tsíchrónka ijnko nkexro k'uéchrónka itén Dios ntáchro xíkíhi:

Mé tsoníjjaxían sántayóaxión nkehe tsontáxrjan tí nkehe nínkexró noehya desde k'óna chjasintajni.†

Ch'in Jesús chrónkaxín ch'án nkexrí t'axrjéxín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjehe ch'in Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kíxin:

—Chrónkaxián nkexrí t'axrjéxín tí kajnto k'uánkíkué tí noa trigo tí nonte —ichro sín.

³⁷ Ntá ch'in Jesús kjuátehe ch'án ntáchro ch'án kíxin:

—Tí nkexro k'uenká tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóhe tí chojni kuákja kjuachaxin kuente Dios. La ntá tí kajnto mé éxí yóhe tí chojni t'etuenhen Tsochren. ³⁹ Tí nkexro nínkakönhenni mé k'uenká tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xikaha tsonhen tíó tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etuenhen tí sín ángel kíxin tsakitsjéxín sín tí tjet'etóan

† 13:35 Salmo 78.2

Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja síin xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxí tí yaon xíkaha tsotsjehe sín tí tjet'etqan It'eni Dios. Tí nkexro tjinkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuènte Dios mé éxí yóhë ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'ema ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'ueña ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kixin:

—Kjāxin tí kjuachaxin kuènte Dios mé éxí yóhë ijnko nkexro tjejá xro perla náxrjón. ⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kixin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kixin:

—Kjāxin tí kjuachaxin kuènte Dios mé éxí yóhë ijnko nchísén tséya chojni koche t'enkí sín tí ntāyaon la ntá tsotsé nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntā la ntaha ts'ejótjāxin sín la tsíchéhe sín koche jína la t'enka sín ntaxra. La ntá tí jehya koche jína la it'e sín. ⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitqhe tí chojni jína. ⁵⁰ La tsochr'án sín tí sín jínahya sátsji sín tí tjen tja tí síin xrohi la ntaha tsotsjánka sín la ko sinetaón neno sín.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kixin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sín kixin:

—Jeén, Inchéni, ó kíenxínni —ichro sín.

⁵² Ntá ntáchro ch'ín Jesús kixin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhë ijnko inché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xíkaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankixin kjuakoxin ch'án tí nínko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín í la, ¿nketí tsíxraqohë ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjāxin tí sín chjin kichó ch'án na ntíhi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'in Jesús kixin:

—Nkuixín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntöe ch'án mé tjikosáyeheya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuitekakuenhya sín ch'án.

14

Ik'uén ch'in Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'in Herodes mé tí nkexro k'uoetöan tí estado Galilea mé kuínhin ch'án nkexrí ichro ch'in Jesús. ² Ntá nixjehe ch'án tí sín ch'ehe ch'án xra, ntáchro ch'án kixin:

—Kjá tíha la ch'in Juan Bautista ó tsixechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'in Herodes.

³ Méxra tí ch'in Herodes mé tsík'etöan kixin ch'in Juan tsontetoxín cadena la ko tsjak'echjina ch'án. Mé xikaha kjuich'e ch'án kixin xikaha tsikjanchia tí tjan Herodías, tí tjan ichjién tí ch'in Felipe, kichó ch'án. ⁴ Tí ch'in Juan tsintáche ch'án tí ch'in Herodes kixin:

—Jehya jina tsochonta tí ichjién tí kichuá —mé xikaha tsintáchro ch'án.

⁵ Ntá ch'in Herodes tjinkaon ch'án chrók'oyán ch'án tí ch'in Juan kjánchó chrakonhen ch'án tí chojni kixin kaín sín ntáchro sín kixin ch'in Juan mé nixja itén Dios, ichro sín. ⁶ A ntá tí yaon kia tsíkjitoxinhin nánó ch'in Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjinhin ch'in Herodes nkexrí ité tjan. ⁷ La ntá nixjehe ch'án tjan k'uákjexin ch'án ihnié Dios ntáchro ch'án kixin tsochjéhe ch'án tjan kjónté jnkójín nkehe tsjanchia tjan, ichro ch'án. ⁸ Ntá jehe tjan la senó kjuikjanchankíhi tjan iné tjan ntá iné tjan tsintachro kixin ikja ch'in Juan mé tsjanchia tjan ntá jehe tjan mé nixjehe tjan tí ch'in Herodes inaá ntáchro tjan kixin:

—Chjehéni ijnko plato tsjak'enkáya kja ch'in Juan Bautista —ichro tjan kjuanchia tjan.

⁹ Na ntá ch'in Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. ¹⁰ Méxra k'uoetöan ch'án kixin ts'óchrínjin sín ikja ch'in Juan tí tjen ch'án ntöechiso. ¹¹ Tí ch'in kjuikjé sín kjuikoyá sín tí kja ch'in Juan ijnko plato la chjéhe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpoé ch'án la sákjuikjavá sín. La ntá chr'éxin la sákjuí sín sákjuichénka sín tí ch'in Jesús kixin xikaha tsikónhen ntiha.

Ch'in Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'in Jesús kixin xikaha tsikónhen la ntá jehó ch'án sákjuí ch'án k'ui'tötjen ch'án ijnko ntabárcö la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjen ch'án la ntá k'uaxrxjén sín chjasén sín la ntá tötó sín sákjuíchréhe sín ch'án. ¹⁴ A ntá k'uaxrxjén ch'in Jesús tí ntabárcö a, a ntá k'uíkon ch'án kixin nchónhya chojni siín ntiha ntá kuikonóhe ch'án tí jehe sín na ntá kjuínchekitöhe ch'án jina tí sín níhi tsíkjkäo

sín. ¹⁵ La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kíxin:

—Ntá ó kóntó la kohya nkexro tjejó ntíhi. Na ntá jaha chrókuétuēnhén sín kíxin sátsji sín tí chjasin ntsí chjinaxón tsjik'ēna sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kíxin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kíxin:

—Chóntahyani itsjé nkehe. Jehó in'ó nioṭṭja la ko yaá koche chóntani —ichro sín.

¹⁸ Ntá ntáchro ch'ín Jesús kíxin:

—Xrakoanará tí nkehe méhe ntíhi —ichro ch'án.

¹⁹ Ntá k'uetōan ch'án kíxin kaín xín sín ts'ixitjaxín sín tí chrítaón kaxi a. Ntá kuákja ch'án tí in'ó nioṭṭja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ō ch'án tí nioṭṭja chjéhe ch'án tí sín k'uájiko ch'án la jehe sín mé k'óxikayēhe sín chjéhe sín tí chojni síin a. ²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxēhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjain tí sín a.

*Ch'ín Jesús mé tjetjitaón ch'án ntá
(Mr. 6.45-52; Jn. 6.16-21)*

²² Ntá kjuixin tíha ntá k'uetuēnhén ch'ín Jesús tí sín k'uájiko ch'án kíxin ts'it'ótjen sín tí ntabárcō ts'atōyē sín í jnko nánko ntayaon. Ntá jehe ch'án naxa kuítóhe ch'án nixjehe ch'án tí sín síin ntíha. ²³ Ntá kjuixin xíkayēhe sín na ntá jehó ch'án chríin ch'án ijnko jnā tsonixjehe ch'án It'é ch'án tjen nkaya nkajní. Na ntá ó k'uúxin tie la jehó ch'ín Jesús itjen ch'án ntíha. ²⁴ La ntá tí ntabárcō na mé tjenkátaón ntā jnkōsiné ntayaon. Ntá imá chjéhe ntā tí ntabárcō kíxin tí xríntō la chjéhe la xitjahya sátsji ntabárcō. ²⁵ Na ntá las tres nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon la ntá kóchjinehe ch'án tí tjejó sín. ²⁶ Na ntá tí sín k'uájiko ch'án mé k'uúkon sín kíxin tjetjitaón ch'án tí ntayaon na ntá imá chrakon sín la k'óyako sín. Ntáchro sín kíxin kjuacha sín ichro sín, chrakon sín.

²⁷ Na ntá nixjehe ch'ín Jesús tí jehe sín ntá ntáchro ch'án kíxin:

—Nchefuérte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehe ch'án Ìnchéni, ntáchro ch'án kíxin:

—Ìnchéni tí chaxín jaha la ntá chrókuánjuan kjuachaxin chrókuítaónni tí ntā tsjjini tí tjen jaha —ichro ch'án.

²⁹ Ntá ntáchro ch'ín Jesús kíxin:

—Xrákiá.

Ntá k'uínkajinxín ch'ín Pedro tí ntabárcō la kjuankíxin ch'án tjetjitaón ch'án ntā sákjuíchréhe ch'án tí tjen ch'ín Jesús. ³⁰ A ntá xrínahya ntá kónohe ch'án kíxin imá chjéhe xríntō chrítaón ntā, ntá chrakon ch'án la kjuankíxin tinkák'aniánkí ch'án ntā, ntá k'uéya ch'án ntáchro ch'án kíxin:

—Ìnchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kíxin:

—Intsíkoá tinkachónkia tí janhan. ¿Nkeuēnté titekákonhya? —ichro ch'án.

³² Na ntá tió k'ujit'ótjen sín yói sín tí ntabárcɔ la ntá tuénxín k'uixratá tí xrintɔ.
³³ Ntá kaín xín tí sín tjejóxenhén tí ntabárcɔ mé k'uéjóxín tochr'in sín nkayakon
 ch'in Jesús la ntá chro sín kixin:

—Jaha mé chaxín Xjeen Dios —ichro sín.

*Ch'in Jesús mé kjuínchekitɔhe jína tí chojni níhi nonte Genesaret
 (Mr. 6.53-56)*

³⁴ Ntá tió k'uátɔye sín tí ntayaon ntá kjuíji sín tí nonte Genesaret. ³⁵ Ntá tí
 sín síin ntiha tjoka kjuátsoan sín kixin jehe ch'in Jesús tíha, ntá kuínhin tí sín
 chjasin chjinaxón ntiha la ntá kuikɔ sín kaín tí sín níhi tí tjen ch'án. ³⁶ Na
 ntá chrónóɔhe sín ch'án kixin chrókuítɔhe ch'án kixin kjónté chrínta iké ch'án
 chrókuákóxin sín, la ntá kaín tí sín kuákóxin iké ch'án mé kuítɔhe sín jína.

15

*Tí jie tjasin chojni
 (Mr. 7.1-23)*

¹ A ntá chjasin Jerusalén kjuixín iso sín fariseo la ko iso tí sín maestro tjako
 tí ley la kjuíchréhe sín tí ch'in Jesús. Ntá kjuanchankíhi sín ch'án kixin:

² —¿Nkeuènté kixin tí sín xrikoa la nchexiteyáhya sín tí nkehe
 k'uékinkáchónki tí sín tsík'axrjeníxinni kixin t'óntihya sín itja sín ntá kjónté
 ine sín? —ichro tí sín fariseo a.

³ A ntá kjuanchankí ch'in Jesús kixin:

—¿Nkeuènté jahará kjaxin titekákonhyará nkehe tsík'etɔan Dios? A ntá
 jahará tjinkáonrá naxa chrókuinkachónkirá tí nkehe kuinkáchónki tí sín
 tsík'axrjeníxinná. ⁴ Ntá chro Dios kixin: “Tsochontehérá kjuasáya it'ará la
 ko inará”, la ko ntá chro ch'án kixin: “Tí nkexro t'ántaxínhin it'é la ko iné
 la chrók'uen.”* ⁵ A ntá jahará tsintá chrorá kixin ó nchoxon kixin ijnko
 nkexro tsochénta it'é la ko iné kixin: “It'eni, inéni, chrokjuahya tsjinkitsani
 tí jaha kixin kaín nkehe chóntani la ó chjéheni Dios.” ⁶ A ntá jnkojín nkexro
 tsonotá chro ch'án tíhi ntá í t'ichjánxínhya tsjinkitsa tí it'é la ko tí iné, mé xíkaha
 tsixorá. Mé xíkaha jahará kuítɔhérá tí nkehe k'uetɔan Dios kixin tjinkáonrá
 chrókjuich'erá éxi kjuich'e tí sín tsík'axrjeníxinná. ⁷ Jahará la jehya jnkojínxón
 tjenkayáxinrá. Ntoá tsintá chro tí ch'in Isaías, tí nkexro k'uéchrónka itén Dios
 ósé. Mé chrónka ch'án kixin nkexrí tjejorá la xíkaha tsíkjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan

a ntá tí asén sín la ikjín kuítɔhe sín tí janhan.

⁹ Méxra ó chónko tóchjina sín xraxinkaon sín tí janhan

kixin tí nkehe tjako sín la tí nkehe tsík'etɔan chojni ó.†

Mé xíkaha ichro itén Dios.

¹⁰ Ntá k'uíyɔhe ch'in Jesús tí chojni inaá la ntá chro ch'án kixin:

—Chrókuinhínrá la ko chrókuéinxinná. ¹¹ Kaín nkehe ine chojni la ó
 nchoxon, jehya jie. Tí jie la tí nkehe t'axrjexín ir'va chojni —mé xíkaha ichro
 ch'in Jesús.

¹² A ntá tí sín k'uájiko ch'in Jesús mé kóchjinehe ch'án la ntá chro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntá che
 sín? —ichro sín.

¹³ Ntá kjuátɔhe ch'án ntá chro ch'án kixin:

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

—Kaín tí ka jehya T'aná tjen nkaya nkajní k'uɛnkaxin la mé ts'axrjenkixin nuèe. ¹⁴ Nté tìtohé sín. Tí jehe sín la ntakótán sín la t'etuenhen sín í so sín ntakótán. A ntá tió ijnko chojni ntakótán tjitaón ntja la ntá yóí sín ts'anótjenyá sín ichrén tòye —ichro ch'án.

¹⁵ Ntá ntáchro ch'ín Pedro kixin:

—Chronka nkexrí t'axrjexín tíha —ichro ch'án.

¹⁶ Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhyará? ¹⁷ ¿Á tiénxinhyará kixin kaín tí nkehe ineni na sátji nkaya tseeni na ko xík'axrjexín tí cuérpøeni inaá? ¹⁸ A ntá tí nkehe t'axrjexín ir'va chojni la t'axrjenixin asén chojni la tíha la mé tí jie tjasixín chojni. ¹⁹ Kaín tíha mé t'axrjenixin asén chojni, mé tí jínahya tjenkayáxin sín la ko tí t'óyán kichó sín la ko tí tjachehe kichó sín la ko tí chóna sín í jnko chojni chjin ókjé la ko teé sín la ko tí kjuach'ia la ko tí t'ántaxinhin kichó sín. ²⁰ Tí nkehe a mé tjasixín chojni jie. A ntá tí sineni kjónté nchexiteyáhyani ts'ónti tjani la tíha la jehya jie —mé xíkaha ichro ch'ín Jesús.

*Ijnko tjan jehya sín israelita mé kuinkáchónki tí ch'ín Jesús
(Mr. 7:24-30)*

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²² Ntá ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kixin:

—Ìnchéni, Xjeen David, tikonóehéni kixin tí xjeenni chjin la mé níhi tjan chóna tjan ijnko nchakuen tí jínahya —ichro tí tjan a.

²³ A ntá ch'ín Jesús la ninkehó kjuáteehya ch'án. A ntá tí sín k'uájiko ch'án na kóchjina sín la ntáche sín ch'án kixin:

—Tétuèhén tjan sátsi tjan kixin tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kixin:

—Dios mé ichr'anna tsjéyá jehó tí kolélo kjuíchroe kuènte nación Israel —ichro ch'án.

²⁵ A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kixin:

—Ìnchéni, tjínkítsani —ichro tjan.

²⁶ A ntá ch'ín Jesús kjuátehe ch'án ntáchro ch'án kixin:

—Jehya tí jina chrókuakitsjahá niotjá tí xjan ntá chrótjahá konjá chrókjóne va —ichro ch'án.

²⁷ A ntá jehe tjan la ntáchro tjan kixin:

—Chaxín xíkaha, ìnchéni. Kjánchó kjónté tí konjá na tí nkehe tsjixènjinkí mesa kuènte ìnché la ine va —ichro tjan.

²⁸ Ntá ntáchro ch'ín Jesús kixin:

—Jaha imá tinkáchónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítøhe jina.

Ch'ín Jesús mé kjuínchekitøhe jina nchónhya chojni níhi

²⁹ Ntá ch'ín Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chr'ín ch'án ijnko jnã la ntiha kjuák'etjaxín ch'án. ³⁰ Ntá kójnkotsé itsjé chojni tí tjen ch'án la kjuíkao sín tí sinníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so

sinníhi. K'uejo sín tí sinníhi toté tí ch'ín Jesús kixin jehe ch'án mé sinchekitōhe ch'án sín jína. ³¹ Kaín chojni la imá chrakon sín kixin k'u'ikon sín kixin tí sín k'u'énixjahya la ó nixja sín la tí sín tsixénká la tsikitohe sín jína la tí sín xitjahya tji la ó tji sín la ko tí sín k'u'ék'ikonhya la ó t'ikon sín. Méxra kjuanchehe sín kjuasáyé tí Dios kuente tí sín Israel.

Ch'ín Jesús mé kjuínchekjine noó mil chojni
(Mr. 8.1-10)

³² Ntá k'uíyehē ch'ín Jesús tí sín k'uájiko ch'án la ntáchro ch'án kixin:

—Imá tikonóaha kaín tí chojni kixin ó ní yaon tjejókoni sín ntá kjuēhe sín nkehe sine sín. Tjinkakonhya chrókuétuanhan sín sáchrókjui sín ntōe sín kixin naxa nehya sín la ntja ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kixin:

—Ntá jaha la ó noha kixin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'an kixin:

—¿Nkekjaín niotja chontará? —ichro ch'án.

Ntá ntáchro sín kixin:

—Yato niotja chóntani la ko iso koche ntsínsi —ichro sín.

³⁵ Ntá ch'ín Jesús k'uetōan ch'án kixin kaín xín sín ts'ixitjaxín sín nonte, ichro ch'án. ³⁶ Ntá kuákja ch'án tí yato niotja la ko tí koche ntsínsi la kjuanchehe ch'án kjuasáyé Dios. Ntá kóchrít'ō ch'án tí niotja a la ntá k'uetuēnhen ch'án tí sín k'uájiko ch'án kixin ts'óxikayehē sín tí niotja la ko tí koche kaín xín tí sín siín a, sine sín. ³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'ō tí nkehe naxa síxehē. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehē ch'án sín sákjuí sín la ntá k'uit'ótjen ch'án ntabáro la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón
(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'ín Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios. ² A ntá ch'ín Jesús na kjuátēhe ch'án, ntáchro ch'án kixin:

—Jahará ntáchrórá kixin ijie ntá kónjín ó tsi ijnko yaon jína kixin kjátse nkajní. ³ La ntá nchtjen ntáchrórá kixin ijie la náxrjónhya kixin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sítónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuente ch'ín Jonás mé ts'ikonrá —mé xikaha ichro ch'ín Jesús.

Ntá kuitōhe ch'án sín la sákjuí ch'án.

Ch'ín Jesús ntáchro kixin chrókuitekakonhya sín tí nkehe tjako tí sín fariseo
(Mr. 8.14-21)

⁵ Ntá tí sín k'uájiko ch'ín Jesús mé k'uátōye sín ntayaon la ntá k'uitjāyēnhen sín tsíkikohya sín niotja. ⁶ Ntá ntáchro ch'ín Jesús kixin:

—Chrókóxakonhanrá kixin tí xroan ts'ánkixin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kichó sín ntachro sín kixin:

—Mé xikaha ichro ch'án kixin tsíkjikohyani niotja —ichro sín.

⁸ Ntá kónohe ch'ín Jesús kixin nkehe tí kjo sín kichó sín, ntá ntáchro ch'án kixin:

—¿Nkekuènté tjórá kixin chontahyará niotja? Jahará la intsíkoá tinkachónkirá tí janhan. ⁹ Jahará zá naxa tiénxinhyará la ko á xráxinkákonhyará tí in'ó niotja k'óxikeyeheni kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? ¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe? ¹¹ A ntá ¿nkekuènté kixin kuiénxinhyará kixin janhan la jehya kuènte niotja tjénixja tió ntáxrjan kixin chrókóxakonhanrá kixin tí xroan ts'ánkixin niotjé tí sín fariseo la ko tí sín saduceo? —mé xikaha ichro ch'ín Jesús.

¹² Na ntá kuiénxín sín kixin níxjahya ch'án kuènte tí xroan t'ánkixin niotja. Náhi. Tjénixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

*Chrónka ch'ín Pedro kixin ch'ín Jesús mé tí nkexro Cristo
(Mr. 8.27-30; Lc. 9.18-21)*

¹³ Kjuíji ch'ín Jesús chjino tí chjasin Cesarea de Filipino ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechorrá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajní mé kjuakoha tíha. ¹⁸ Méxra ntáxrjan kixin jaha mé Pedro mé t'axrjexín kixin ijnko xro la chritaón tí xro mé sít'ána nínko la kjónté tí kjuachaxin kuènte kjuach'én la tsjachahya sinchek'itjáyan. ¹⁹ Méxra jaha mé tsotjaha tí llave kuènte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní sín kjuachaxin.

²⁰ Ntá ch'ín Jesús mé k'uètuènen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

*Ch'ín Jesús chrónka ch'án kixin its'en ch'án
(Mr. 8.31—9.1; Lc. 9.22-27)*

²¹ Ntá ch'ín Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etōan kuènte nínko la tí sín nchat'á tjetōan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí níxin yaon mé

tsoxechón ch'án ínaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáχρο ch'án kíxin:

—Kjá Dios tsjanjonhya kjuachaxin xíkaha tsonhan Ìnchéni kíxin jaha la xitjahya tsjasóte xíkaha —ichro ch'ín Pedro.

²³ A ntá ch'ín Jesús mé kuinkátjía ch'án la nixjehe ch'án tí ch'ín Pedro, ntáχρο ch'án kíxin:

—Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakonhén tí nkehe tjinkaon Dios. Jaha tjenkayáxinhya éxi tjinkaon Dios. Náhi. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáχρο ch'án kíxin:

—Jnkojínrá tjínkáonrá tsochréhérá tí janhan la t'ichjánxin tsjtohérá kaín tí nkehe tjaké asánrá, ntá tsámára tí ntacruz kuéntará, a ntá tsochréhérá tí janhan. ²⁵ A ntá tí nkexro tjinkaon jehó sinchekaá asén la ts'itjayan. A ntá tí nkexro chrókjuinçek'itjayanxín asén kíxin tinkáchónki sín tí janhan la tsaá.

²⁶ ¿A ntá nkehe tsonhen tí chrókjuacha ijnko chojni chróchónta kaín nkehe siín chjasintajni a ntá tí kjuachón chrókjuinçek'itjayan? ¿Nkehe chrókjuenka chojni kíxin chróchónta tí kjuachón? ²⁷ Tí Xjeen Dios K'óna Chojni tsjkaó ch'án tí kjuachaxin jié kuènte It'é ch'án tjen nkaya nkajni la kaín tí sín ángel tsjkaó ch'án na ntá tsjenkehe ch'án jnkojnko chojni nkexrí tí xrá kjuích'e jnkojnko tí jehe sín. ²⁸ Chaxín xrjanka kíxin isorá tjejorá ntíhi la naxa ts'énhyará naxa ts'ikonjjará kíxin nkexrí tí kjuachaxin tsochónta tí Xjeen Dios K'óna Chojni tí tsjkaó ch'án kjuachaxin jié —ichro ch'ín Jesús.

17

Ch'ín Jesús mé k'uúxitóxin nkexrí tsjehe ch'án

(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jnā imá noi. ² Ntá ntiha tjejó sín ntá xrínahya k'uúikon sín kíxin ch'ín Jesús mé k'uúxitóxin nkexrí tsjehe ch'án. Tí nkayakon ch'án la imá tjákini tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan. ³ Na ntá xrínahya k'uúikon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kíxin:

—Ìnchéni, jina kíxin tjejóni ntíhi. Tí tjínkávan la chrókjuích'énani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

⁵ Ntá naxā tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaon tí jnā tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntáχρο kíxin:

—Tíhi mé xjanna. Imá tjuahā ch'án la ko chàna kíxin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xíkaha la ntá kjuítsínka sín nonte kíxin imá chrakon sín. ⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáχρο ch'án kíxin:

—T'áya chrakonhyará —ichro ch'án.

⁸ Na ntá xrínahya k'uúikon sín kíxin kohya ninkexró. Jehó ch'ín Jesús mé tjen.

⁹ Na ntá tí k'uúinkajinxín sín tí jnā ntá k'uətoan ch'ín Jesús, ntáχρο ch'án kíxin:

—Ninkexró chenkahyará tí nkehe k'uikonrá ijje hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'èxin itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe. ¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxi kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

*Ch'ín Jesús mé kjuínchekitohe jína ijnko xjan t'aniáte
(Mr. 9.14-29; Lc. 9.37-43)*

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'in ch'án nkayakon ch'án. La ntáchro ch'án kixin:

¹⁵ —Ínchéni, tikonóghéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án nta. ¹⁶ Ntá kjuíkaoni ch'án níhi la tí sín xríkoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jie. ¿Xá hasta nkesá tjínkáonrá naxa ts'ejóni? ¿Hasta nkesá tsjácha tsjak'é tsjákohará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uetuèhen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuítóhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakítsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxi ijnko tje mostaza intsí la ntá chróntácherá tí jna kixin: “Sátjixian ntihi la sátsjia ókjé”, chróchrórá chróntácherá tí jna la ntá tí jna sáchrókjuxin ntihi. Mé xikaha kaín nkehe chrókjuachará chrókjuijch'erá tí chaxín tinkachónkirá tí janhan. ²¹ A ntá tí tsakítsjerá ijnko nchakuen tí jínahya la t'ichjánxin tsonixjehérá Dios la ko sintehyará.

*Ch'ín Jesús chrónka ch'án inaá kixin its'en ch'án
(Mr. 9.30-32; Lc. 9.43-45)*

²² Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etqan sinchekjasóte sín ch'án ²³ la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenká ch'án tí nkehe kjuanchia tí sín kuènte njnko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkj kuènte nínko mé sákjuitsjehe sín tí ch'ín Pedro la kjuanchankí sín kixin:

—Tí maestro kuéntá la, ¿a tjenkaha ch'án tí nkehe tjanchia tí sín nchekjènkj kuènte nínko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá tjenka ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenka tí nkehe tjanchia tí sín t'etoan chjasintajni, á tí sín kuènte ntiho o á tí sín tsíkjixin ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkjixin ókjé mé tjenka sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenka sín. ²⁷ Kjáncho tjínkakonhya tsonínkaon ninkexró ntihi. La ntá sátsjia tí ntayaon sátsjikoá tí ichjon chóna gancho tséxin sín koche la ntaha itsé tí chjon chrínki ntayaon. Ntá tsákjá tí koche saxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenka kaín tí tjásikáha sín la ko tí tjásikehe sín jaha. Táha mé sátsjikoá tjenka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etoan tí kjuachaxin kuènte nkaya nkajni? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxi ijnko xjan ntsí ntá xitjahya tsákjárá tí kjuachaxin kuènte Dios. ⁴ Tí jnkójín nkexro ts'óna éxi tí chánjan ihnkehya la mé antsí tjetooan ntiha. ⁵ A ntá tí nkexro ts'áyéhe ijnko chánjan kixin tinkáchónki sín tí janhan la mé xikaha éxi chrók'uáyéhe sín tí janhan —mé xikaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuikakánkí ch'án ntayaon nínka. ⁷ Imá náxrjónhya tjejó tí sín chjasintajni kixin siín nkehe tjasixín chojni jie. Xráxin la jehí siín, a ntá nóa tí nkexro tjasin tí nkehe tsjasixín chojni jie.

⁸ Tí itjá o totá tjásixián jie na chrókójina chrókochrínjan chróchr'an ikjín kixin íchá jína chróchonta kjuachón kjónté it'óó itjá o it'óó totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohi jnkochrín.

⁹ La ko kjaxin tí ikuan tjásixián jie na chrókójina chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxi ijnko kolélo tsík'itjáyan
(Lc. 15.3-7)

¹⁰ 'Chrókókjoniéhyará nijnko tí chánjan ntsintsí. Tjonkará kixin nkaya nkajní la tí sín ángel kuente tí xjanntsi la xráxin tjejó sín tí tjen T'aná nkaya nkajní. ¹¹ Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹² '¿Jahará nkechrorá? Ijnko chojni chóna ijnko ciento kolélo ntá chrók'uitjáyan ijnko va na ¿á chrókuítóehya ch'án tí noventa y nueve va tí jna ó a ntá á chrókjuikjeyáhya ch'án tí ijnko tí ko k'uitjáyan ní? ¹³ A ntá tí tsjacha ch'án ts'itja ch'án va ntá antsí tsöchéhe ch'án kixin tí kolélo k'uitja ch'án la ntá kánhyó tsöchéhe ch'án kixin tjejó tí noventa y nueve ko tsík'itjáyanhya va. ¹⁴ Mé xíkaha kjaxin It'énri tjen nkaya nkajní la tjinkakonhya ch'án kixin chrók'uitjáyan ninkexró kjónté ijnko chojni kánhyó tjetean.

Chrók'uitjáyanhanrá tí jie kjuasinhanrá kichuára
(Lc. 17.3)

¹⁵ 'Tí kichuá tí chrókjuít'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jie kjuasin ch'án. A ntá tí kjuacha nixjehé tí kichuá la í kohya kjuanínkaon. ¹⁶ A ntá tí tahya ch'án kuentá nkechrua la ntá ntáche á jnko o yaá chojni sájtjioa kixin tsinhin sín á chaxín titekakonhya ch'án. ¹⁷ A ntá tí kjónté xíkaha naxa titekakuenhya ch'án sín la ntá chenka tí sín tsikójnkotsé nkehe tí jie kjuasin ch'án la ntá tí naxa titekakuenhya ch'án tí sín tsikójnkotsé la ntá ts'ikonrá ch'án éxi ijnko chojni tinkáchónkihya Dios o éxi ijnko chojni nchekjènkj.

¹⁸ 'Chaxín ntáxrjan kixin tí tsjánjonhyará kjuachaxin nkehe tsonhen ntíhi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntíhi chjasintajni la kjaxin ntaha nkaya nkajní tsjanjon Dios kjuachaxin.

¹⁹ 'Kjaxin ntáxrjan kixin tí tjejó yaára ntíhi chjasintajni la tí jnkokoá tjejójtjenkayáxinrá chrókjuancheherá Dios ijnko nkehe tjinkáonrá la ntá jehe ch'án mé tsotjáhará ch'án. ²⁰ Kixin tí tjejó yaá o iy'á chojni tjejó jnkokoá t'ákjexin sín níná la janhan koína tjéntaxian tí tjejó sín ntíha.

²¹ Ntá kóchjina ch'ín Pedro mé kjuanchankí ch'án ntáchro ch'án kixin:

—Inchéni, ¿nkejjaín veces chrók'uitjáyenheni tí jie kjuasin kichó ní? ¿Á yato veces ó ní? —ichro ch'án.

²² Ntá kjuátehe ch'ín Jesús, ntáchro ch'án kixin:

—Náhi, jehya yato veces ó. Náhi, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyanhya ch'án jje kichó ch'án

²³ 'Tí kjuachaxin kuente Dios la éxi yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xra. ²⁴ Ntá kjuankíxin ch'án tsítsínkaxín cuenta la ntá xrínahya kóchjina ijnko ch'ín ch'e xra síká nchónhya millones chichaon.

²⁵ Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetóan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko káin nkehe kuente ch'án kixin ntá xíkaha mé tsoxenka káin tí síká ch'án. ²⁶ A ntá tí nkexro ch'e xra mé kjuák'exín toch'in ch'án nkayakon tí rey la chrónóehé ch'án, ntáchro ch'án kixin: “Jaha Inchéni tikonóhéni la kjónté kjaxón tsjenkahani káin tí síkahani”, ichro ch'án. ²⁷ A ntá tí ch'ín rey kuikonóehé ch'án tí ch'ín a kjónté itsjé síká ch'án, ntá kuitóhe

ch'án sákjuí. ²⁸ A ntá tí sákjuí tí ch'ín a ntá xríngħya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkihi ch'án isin la ntáchro ch'án kixin: “¡Tsjénkana tí nkehe tjasíkana ní o náhí!” ichro ch'án. ²⁹ A ntá tí ch'ín chóxin ch'án mé kjuák'exín toch'in ch'án nkayakon ch'án la chrónóhehe ch'án ntáchro ch'án kixin: “Tikonóhéni ijie la kjónté kjaxón tsjenkħani kaín tí nkehe síkħani”, ichro ch'án. ³⁰ A ntá jehe ch'án la kujkonóehya ch'án. K'ueṭoan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. ³¹ Ntá tí í so sín ch'exón xra mé k'uiikon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká. ³² A ntá tí lamo mé k'ueṭoan tsjik'iyehē sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjýanhan tí nkehe tjasíkana kixin jaha chrónóana. ³³ A ntá jaha mé kjáxin chrókujikonóhé tí nkexro choxian éxi janhan kujkonóaha tí jaha”, ichro tí ch'ín lamo. ³⁴ A ntá imá kónínkaon tí lamo a la k'ueṭoan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjýanhanrá tí jje chónṭa kichuárá —ichro ch'ín Jesús.

19

Tjako ch'ín Jesús kuénte tí sín t'itjīhi kichó

(Mr. 10.1-12; Lc. 16.18)

¹ A ntá kjuixín nixja ch'ín Jesús kaín tíha, ntá sákjuíxin ch'án estado Galilea la kjuíji ch'án estado Judea nó tóhe tí ntario Jordán. ² Ntá nchónhya chojni kjuíjichréhe sín ch'án ntá ntiha mé kjuínchekitohe ch'án jina tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á síin kjuachaxin tsjákehe jnkojín chojni ichjién kjónté kohya jje jíé?
—mé xikaha kjuanchankí sín.

⁴ Ntá kjuátēhe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuíchéna kaín chojni síin chjasintajni tí xrankíxixín, la tí nkexro mé “kjuíchéna ch'án chojni ntoa ko chojni chjin”?* ⁵ La ko ntáchro kixin: “Mé xikaha tí chojni ntoa la tsítohe sín it'é sín la ko iné sín la tsakja sín ichjién sín la yóí sín la éxi ó jnko chojni xikaha ts'óna sín.”† ⁶ Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la í xitjahya ts'itjīhi kichó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'ueṭoan kixin ts'óna ijnko xroon tsakja tí ichjién kixin tsjákeéxín kichó sín?‡ —ichro tí sín fariseo.

⁸ Ntá ntáchro ch'ín Jesús kixin:

—A ntá jahará titekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjīxín kichuárá. Kjánchó tí xrankíxixín la xikahya kónhen. ⁹ Méxra ntáxrjan kixin jnkojín sín tjákehe ichjién tí kjuasinhya jje, chónṭahya tjan í jnko chojni, ntá kjuákehe ch'án tjan ntá tsakja ch'án í jnko

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

chjin mé xikaha la ó jie tíha. La ko kjaxin tí ijnko chojni chjin tsikítsinkehe ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjíhi kichó sín la íchá jína chrókótēhya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. ¹² Siín iso chojni tí tsik'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

Ch'ín Jesús mé kjuíncheyao ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyao ch'án sín. Ntá tí sín k'uájiko ch'án mé kónínkakonhen sín tí sín kjuikao tí xjan. ¹⁴ A ntá ntáchro ch'ín Jesús kixin:

—Nté títqherá tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajní la mé tóyóhé éxí tí jehé xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehé ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijnko ch'ín ntasoá sákjuítsjehé ch'án tí ch'ín Jesús la kjuanchankíhi ch'án kixin:

—Jaha la ijnko Maestro jína. La ntá ¿nkehe jína chrókjuich'eni kixin chróhóntani kjuachón jnkochrín? —ichro ch'án.

¹⁷ Ntá ch'ín Jesús kjuátēhe ch'án, ntáchro ch'án kixin:

—¿Nkeuènté ntáchrúa kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la títékávan tí nkehe k'uetqan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni ¹⁹ la ko chrókjuíkosáyehé it'á la ko ìná la ko chrórtjuèhé kichuá éxí tjuèxian asán. § —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxa t'itjáyán? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sijnchexiteyá la sátjia sijnchekjia kaín tí nkehe chonta la sijnchekitonhén tí sín nõa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chónta ch'án.

²³ Ntá ch'ín Jesús mé nixjehé ch'án tí sín k'uájiko ch'án, ntáchro ch'án kixin:

—Chaxín tjonkará kixin tí chojni chóna imá itsjé nkehe na imá xra ts'áyéhe sín tí kjuachaxin kuènte nkaya nkajní. ²⁴ Kjatée xrxanka kixin antsí xrahya chrók'uatínska ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la çá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'ín Jesús.

²⁷ Ntá ntáchro ch'ín Pedro kixin:

—Ínchéni, jeheni kaín ni la kuítóheni kaín nkehe chónani kixin tsochréheni tí jaha. A ntá çnkehe ts'áyéheni? —ichro ch'án.

²⁸ Ntá kjuátéhe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochóna kjuachaxin jié la ntá kjaxinrá jahará chréhérá tí janhan la ts'ejorá teyó trono sìnchekitoxinrá ijie kaín tí sín tsík'axrjenixin tí teyó xjeen ch'ín Israel. ²⁹ La ko kaín tí sín kuítóhe sín nteje sín la ko kuítóhe sín tí kichó sín la ko kuítóhe sín it'é sín o iné sín la ko kuítóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsí má tsochóna sín la ko kjaxin tsochóna sín kjuachón jnkochríxín.

³⁰ A ntá nchónhya tí sín t'etöan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etöan sín tí niha.

20

Ch'ín Jesús kjuíncheyóxin ch'án éxi tí sín ch'e xra

¹ Tí kjuachaxin kuènte Dios la éxi yóhe ijnko chojni chóna xra nontee ch'án la ntá ijnko yaon imá nchítjen sákjuíkjeýá ch'án chojni tsotjéhe ch'án to uva.

² Ntá tí k'uitja ch'án tí sín sich'ehe ch'án xra ntá ikjo ch'án sín kixin ijnko denario tsjenkehe ch'án sín tí xra sich'e sín nontee ch'án tí yaon a. ³ Ntá chr'éxin como las nueve nchítjen ntá sákjuí ch'án ntsin la k'uíkon ch'án í so sín tjejó ntsin chónahya sín xra. ⁴ Ntá nixjehe ch'án sín ntáchro ch'án kixin: “Kjaxinrá sáchrókjuirá chrókjuich'erá xra nonteeni la jína chrókjuénkahará”, ichro ch'án. La ntá jehe sín sákjuí sín. ⁵ A ntá tí ínché nonte la sákjuí ch'án inaá chonkixin naça xík'itja ch'án í so sín ch'ehe ch'án xra la nta tí las tres kónjín la xikaha naça xík'itja ch'án í so sín inaá. ⁶ A ntá las cinco kónjín sáxkji ch'án ntsin inaá la k'uitja ch'án í so chojni ntaha chónahya sín xra la ntá kjuanchankíhi ch'án sín kixin: “çNkekuènté tjejorá ntihi ch'ehyará xra kuenté yaon? —ichro ch'án.

⁷ Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'án kixin: “Kjaxinrá chrókjuirá chrókjuich'erá xra nonteeni la jína chrókjuénkahará”, ichro ch'án. ⁸ A ntá ó kóntó ntá tí ínché nonte mé nixjehe ch'án tí ch'ín t'etöan sítónhen xra nontee ch'án la ntáchro ch'án kixin: “T'iyehé kaín tí sín kjuich'e xra tjenkéhé sín. Tjankíxian tjenkéhé tí chojni kjuixixín k'uixenhen xra la chr'éxin tjenkéhé tí sín saoxín k'uixenhen xra”, ichro ch'án. ⁹ A ntá kóchjina kaín tí sín k'uixenhen xra las cinco kónjín la jnkojnko sín k'uáyéhe sín jnkojnko denario. ¹⁰ Ntá chr'éxin, tió kóchjina tí sín k'uixenhen xra nchítjen la ntá kjuenkayáxin sín kixin antsí itsjé chichaon

chrókuacha sín, ichro sín. Kjánchó kjaxin sín k'uáyéhe sín jnkojnko denario ó. ¹¹ A ntá tí kjuachahya sín tjete ntá kjuankíxin sín kónínkakonhen sín tí inché nonte ¹² la ntáchro sín kixin: “Tí sín ikui kjuixixin la kjuich'e sín xra jnkoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuích'eni xra kjónté sóa la kuenté yaon kjuích'eni xra”, ichro sín. ¹³ A ntá kjuátehe tí inché nonte nixjehe ch'án ijnko tí jehe sín, ntáchro ch'án kixin: “Janhan la kjuít'ayahará ninkehó. Ó kuítexinni kixin ijnko denario tsjénkahará tí yaon. ¹⁴ Ntá tsákjá chíchakōan la sátjia. Janhan tjínkavan tsjénkaha tí sín k'uixenhen kjuixixin éxí tí kjuénkaha jaha. ¹⁵ ¿Á chontahya janhan kjuachaxin xíkaha chrókuénkaha sín kixin tíha la chíchakonna? ¿Nkekuénté tóchjinoxínhan jaha kixin xíkaha kjuénkaha sín?” ichro ch'án. ¹⁶ Mé xíkaha iso tí sín tsjixixin chréhe sín la tí sín a senóxin ntíha la ntá itsjé tí sín senó la mé tsjixixin tsochréhe sín ntíha kixin nchónhya sín k'uíyaha kjánchó tsjéhya sín k'úitja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntíja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchat'á t'etōan la ko tí sín maestro tí tjako ley. Ntá jehe sín ts'etōan sín kixin its'en ch'án. ¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkaní sín ch'án ijnko ntacruz kjánchó yaon nixin mé tsoxechón ch'án inaá —mé xíkaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan

(Mr. 10.35-45)

²⁰ A ntá tí iné tí xjeen ch'ín Zebedeo mé kjuíkao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóhehe tjan ch'án. ²¹ Ntá ch'ín Jesús kjuanchankíhi ch'án tjan kixin:

—¿Nkehe tjínkavan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókuachará chrók'uirá tí nkehe itsjá its'ia janhan la ko á chrókuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókuak'erá tjaná chjina la í jnkorá chrókuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjan nkaya nkajni mé nohe kixin nkexro tsíkjeýá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xíkaha tsíkjanchia tí sín a ntá kónínkakonhen sín tí yaá a. ²⁵ A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'et'əoan chjasintajni la imá t'et'əuñhen sín kaín chojni la tí sín t'et'əoan imá nchehnkehe asén sín kixin ihyé sín t'et'əoan sín. ²⁶ Kjánchó jahará la xikahya chrókjuich'erá. Náhi. Tí jnkójínrá tjinkáonrá chrókuétəoanrá la chrókjuínkitsará tí í so sín. ²⁷ A ntá tí jnkójínrá tjinkáonrá chrókuétəoanrá mé t'ichjánxin senó chrókjuákoxínrá chrókjuich'eherá kichuáará xřá. ²⁸ Mé xikaha tí Xjeen Dios K'óna Chojni mé kuhya kixin chojni chrókjuich'ehe xřá. Náhi. Ikuí ch'án kixin sich'ehe ch'án sín xřá la ko ts'enyákonhən chojni kixin tsaáxin nchónhya sín.

Ch'in Jesús kjuínchekitohe jina yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús.

³⁰ Ntá ntaha chrínta ntia tjejótjəoxín yaá sín t'ikonhya. La ntá kuínhin sín kixin k'uatšínka ch'ín Jesús la ntá kjuankixin t'iyehə sín ch'án ntáchro sín kixin:

—Ínchéni, jaha tsik'axrjeníxian David, tikonóhəni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánírá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Ínchéni, jaha tsik'axrjeníxian David, tikonóhəni —ichro sín.

³² Ntá ch'ín Jesús kjuák'echónhen ch'án ntá k'uiyehə ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátehe sín ntáchro sín kixin:

—Jaha Ínchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kuíkonóhə ch'án tí jehe sín la kjuínchekuákoxín tja ch'án tí ikon tí sín t'ikonhya. Ntá tuénxín k'uíkon sín la chréhe sín tí ch'ín Jesús.

21

K'uixenhen ch'in Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfage itjen chjinaxón tí jnə Olivo. Ntá ch'ín Jesús k'uet'əuñhen ch'án iyó tí sín k'uájiko ch'án ² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehérá va ntá tsjúkuanará va ntihi. ³ A ntá tí jnkójín nkexro tsjanchankíhará nkekuénté tjasintankehérá va la ntá tsontáchrorá kixin “Ínchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xikaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuéntará.

Ihnkehya ch'án la ijnko kolócho ó tjejkjen ch'án,

mé ijnko kolóchóxjan, xjeen ijnko kolócho támá nkehe.”*

Mé xikaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uet'əoan ch'ín Jesús. ⁷ Ntá kjuíkəo sín kolócho la ko xjeen va la kuakítsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakítsje sín

* 21:5 Isaías 62.11; Zacarías 9.9

ka titsáte sín na kjuentoá sín ka tinkák'ikjínxin sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹Ntá iso sín tsítaón ntja la ko í so sín chréhe iton ch'án mé kjuankxín sín itsje sín kixin:

—Tjancheheni kjuasáyé tí nkexro k'uaxrjenixin tí rey David. Jína tí nkexro kjuixin kjuachaxiën ihñjé Ìnchéni. Tjancheheni kjuasáyé Dios —ichro sín itsje sín.

¹⁰Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuixin ch'án chjasin Nazaret estado Galilea —ichro sín.

Ch'ín Jesús kjuínchetjótá tí nñko

(Mr. 11.15-19; Lc. 19.45-48; Jn. 2.13-22)

¹²Á ntá ch'ín Jesús mé k'uixenhen ch'án tí nñko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixín sín chichaon la ko tí silla tjejókjen tí sín nchekji kontóá.

¹³La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntóna imé it'in nchia tsonixjanaxian sín.” Á ntá jahará tí nchia i tsíkjich'éñará itjueé xíchee† —mé xikaha ichro ch'ín Jesús.

¹⁴Ntaha nkaxenhen nñko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitöhe ch'án sín jína. ¹⁵Á ntá tí sín nchát'á tjeoan la ko tí sín maestro tjako tí ley mé k'uikon sín kaín tí kjuaxroan kjuich'e ch'án la ko kuínhin sín kixin iso chánjan mé itsje sín nkaxenhen nñko ntáchro sín kixin: “Chjéheni kjuasáyé tí nkexro k'uaxrjenixin rey David”, ichro sín. Ntá kuínhin tí sín a xikaha ntá kónínkaon sín ¹⁶la nixjehé sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xikihí chro:

Jahá kjuánjuan kjuachaxin kixin tí sín chánjan hyé la ko chánjan naxá tjejótakí mé tsoitsje sín‡

—mé xikaha ichro ch'ín Jesús.

¹⁷Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸Á ntá tí kóyaon nchítjen ntá kjan sín chjasin Jerusalén inaá la ikui sín ntja ntá ch'ín Jesús mé ik'uén ch'án kjinta. ¹⁹Ntá k'uikon ch'án itjen ijnko nta t'óna to higo chjino ntja. La ntá sákjuítsjehe ch'án tí nta, ntá k'uikon ch'án kixin jehó ka itsa tí nta, naxá k'ónahya to. Á ntá jehe ch'án mé nixjehé ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'ín Jesús mé k'uíkón sín kixin xíkaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkeuènté kixin tí nta t'óna to higo tuénxín xámá? —ichro sín.

²¹ Ntá kjuátèhe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xíkaha kónhen, la kjaxin chrónixjeherá tí jna i kixin: “Sátjixian ntíhi sátjíkjan kiá ntayaon”, la mé xíkaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin ch'óna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uixenhen ch'án tí nínko ntíha. Ntá tíó tjetjako ch'án ntá kóchjina iso tí sín nchat'a t'etöan la ko tí sín táda judío t'etöan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xíkaha ch'e la ko nkexro tí kjuanjón kjuachaxin? —mé xíkaha kjuanchankí sín.

²⁴ Ntá kjuátèhe ch'ín Jesús ntáchro ch'án kixin:

—Ntá kjaxian janhan tsjáchánkíhará ijnko nkehe síná tsjateherá ntá janhan tsötjónkará nkehe tí kjuachaxin chonta tjet'a tí xrá i. ²⁵ ¿Á ntá nkexro k'uetuēnhen ch'ín Juan kixin tsíkíte ch'án chojni? ¿Á Dios ní ó á chojni ó? —mé kjuanchankí ch'ín Jesús.

Ntá jehé sín itjo sín kichó sín kixin:

—Á ntá tí tsontáchroni kixin Dios tsík'etuenhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án. ²⁶ Á ntá tí tsontáchroni kixin chojni ó tsík'etuenhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itén Dios —ichro sín.

²⁷ Á ntá kjuátèhe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsöxrjankahya nkexro kjuanjón kjuachaxin kixin tjet'a tí xrá —ichro ch'án.

Ch'ín Jesús mé kjuíncheyóexin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni ch'óna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nontēeni”, ichro ch'án. ²⁹ Ntá kjuátèhe tí xjan kixin: “Náhi tjinkakonhyani”, ichro ch'án. Á ntá chr'éxin ntá k'uúixitoxin tí kjuenkayáxin ch'án la sákjuíkch'e ch'án tí xrá a. ³⁰ Á ntá tí it'é xjan a mé kjuínixjehe ch'án tí í jnko xjan la jnkokón k'uetuēnhen ch'án la kjuátèhe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexitéyá tí nkehe k'uetuēnhen it'é? —ichro ch'án.

Ntá kjuátèhe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxrá chaxín tjónkará kixin tí sín nchekjènkí la ko tí chojni chjin ch'iyehé nchónhya chojni ntoa la saoxín ts'ixenhen sín tí kjuachaxin t'etöan Dios la

ntá jahará la náhi. ³² Kíxin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjénki la ko tí chojni chjin ch'iyehé nchónhya chojni ntoa mé kuítekaon sín. A ntá jahará kjónté xíkaha k'uíkonrá la kjuítóxiénhyará tí tjenkayáxinrá la ko kuítekákonhyará —ichro ch'ín Jesús.

Ch'ín Jesús kjuíncheyóexin ch'án kíxin éxi chojni ch'e xra la jínahya asén sín (Mr. 12.1-12; Lc. 20.9-19)

³³ Ntá ch'ín Jesús ntáchro ch'án kíxin:

—Tsinhínrá ijnko nkehe sintayóaxian. Éxi ijnko ch'ín k'uénkaxin ch'án itsje ntanoa t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tóye kíxin ts'énya sín inté to uva. La ko kjuích'éna ch'án ijnko tjat'o noi kíxin ts'it'ótjen ch'án tsotsjehe ch'án nkuíxín.^S

'A ntá kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín. ³⁴ A ntá tí kjuixraká tí yaon k'óna nkehe ntá jehe ch'án mé ichr'án ch'án iso tí chojni ch'ehe ch'án xra kíxin tsjikjanchehe sín tí sín ch'e xra nontee ch'án kíxin tsjanjon sín tí nkehe tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A ntá tí inché nonte a xíchr'án ch'án iso chojni ch'ehe ch'án xra inaá, a ntá tí sín ch'e xra la kjaxin xíkahó kjuích'ehe sín tí sín kjuíji.

³⁷ 'A ntá xíkaha tsíkónhen ntá kjuenkayáxin ch'án ichr'án ch'án tí xjeen ch'án, la kjá chróchontehe sín kjuasáyé tí xjeen ch'án, ichro ch'án. ³⁸ A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kíxin: “Tí ch'ín i mé ts'áyehé ch'án kain nkehe. Ts'óyánni ch'án kíxin ntá tsitqekoni kain tí nkehe kuènte ch'án”, ichro sín. ³⁹ Ntá itsé sín tí xjeen ch'án ntá kuakitsjexín sín ch'án tí nonte ntaha ntá k'óyán sín ch'án —mé xíkaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntáchro ch'án kíxin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátehe sín kíxin:

—Mé tsjiji ch'án la tsikonóehya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntáchro ch'ín Jesús kíxin:

—¿Á nunca kjuínchekuáxinhyará tí xroon itén Dios tsikjin sín ósé? Mé ntáchro xíkíhi:

Tí xro náxrjónhya kuítqenta tí sín ch'éna tjat'o, a ntá mé jie k'óna tí xro tjetooan.

Mé xíkaha kjuích'e Inchéni Dios,

na ntá tíha mé ijnko nkehe kjuachrakon k'uíkonni.*

Mé xíkaha ichro itén Dios.

⁴³ Ntá ntáchro ch'ín Jesús kíxin:

—Tjonkará kíxin Dios tsakitsjahará tí kjuachaxin kuènte ch'án la ntá sinchek'áyehé ch'án tí sín ch'e xra jína. ⁴⁴ A ntá jnkojin nkexro tsjitsínka chrítaón tí xro i mé tsokuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xíkaha ichro ch'ín Jesús.

⁴⁵ Ntá tí sín nch'at'á tjeotan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntáchro ch'án kjuíncheyóexin ch'án kixin tí jehe sín xikaha tsonhen sín. ⁴⁶ La ntá tjinkaon sín chrókuinchejasóte sín ch'án kjánchó chrakonhen sín tí chojni kixin kaín sín ntáchro sín kixin chaxín tí nkehe nixja ch'ín Jesús la kuènte Dios.

22

Ch'ín Jesús kjuíncheyóexin éxi ijnko kia kótehe sín

¹ Ntá ch'ín Jesús mé kjuankixin nixja ch'án inaá la kjuíncheyóexin ch'án ntáchro ch'án kixin:

² —Tí kjuachasin kuènte Dios mé éxi yóhe ijnko ch'ín rey kjuasin ch'án ijnko kia kixin tsotehe xjeen ch'án. ³ K'uetuēnhen ch'án tí sín ch'ehe ch'án xra kixin tsjik'íyehé sín tí sín kjuéyá ch'án, kjánchó jehe sín mé tjinkakonhya sín tsochjina sín. ⁴ A ntá k'uetuēnhen ch'án inaá í so tí sín ch'ehe ch'án xra ntáchro ch'án kixin: “Chenka tí sín ó k'uíyaha kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanká la kaín nkehe la ó síchónhen. A ntá chróxrakoa sín tí síin kia”, mé xikaha k'uetoan ch'án. ⁵ A ntá tí sín tsik'íyehé ch'án mé ántosén sín. Ijnko sín la sákjuí nontee la í jnko la sákjuí ch'án í jnko xra chónca ch'án. ⁶ La í so tí sín a mé tsítsé sín tí sín tsik'etuēnhen tí ch'ín rey la k'óka tí sín a hasta ik'uén tí jehe sín. ⁷ Ntá tí ch'ín rey mé kónínkaon ch'án ntá k'uetuēnhen ch'án tí sín soldado kixin its'en tí sín kjuáya la ko tsoche tí chjasén sín. ⁸ Ntá nixjehe ch'án tí sín ch'ehe ch'án xra inaá ntáchro ch'án kixin: “Kaín nkehe la ó síchónhen kixin tí nkexro tsotehe la ntá tí sín k'uíyaha kuítekakonhya sín la kjuihya sín. ⁹ Méxra sátsjirá tí esquina tí ntja jié la t'ijyehé kaín tí sín tsoxelará kixin itsji sín tí kia”, ichro ch'án. ¹⁰ Ntá tí sín ch'ehe xra mé sákjuí sín la k'uíyehé sín kaín tí sín t'átsínka tí ntja ntiha, mé chojni jína la ko chojni jínahya hasta k'uíxikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsik'íyehé ch'án la ntá k'uíkon ch'án ijnko ch'ín ntiha chóntahya ka jína kuènte tí kia a. ¹² La ntá nixjehe ch'án, ntáchro ch'án kixin: “Amigo, ¿nkexrí k'uíxenhén kixin tsik'ítsahya kuènte kié chojni tsotehe?” ichro ch'án. Ntá tí ch'ín a kjuátēheya ch'án ninkehó. ¹³ A ntá tí ch'ín rey mé k'uíyehé ch'án tí sín ch'ehe ch'án xra la ntáchro ch'án kixin: “Sínchenteto toté la ko itja tí ch'ín a la ité ntója sitié la nta ntiha a mé tsotsjánka ch'án la sinetaón ch'án neno ch'án.”

¹⁴ Ntá ntáchro ch'ín Jesús kixin:

—Nchónhya sín k'uíyaha la séhya sín k'uítja —mé xikaha kjuako ch'án Jesús.

Ch'ín Jesús ntáchro ch'án kixin ó nchoxon tsjenkehe sín gobierno (Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxín sín tí ch'ín Jesús kixin ách'e ichrén jje tsjasín ch'án la ntá tsjanchia sín jje. ¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxín sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. ¹⁷ A ntá jaha chonka nkehe tjenkayáxian. ¿Á jína chrókjuenkēheni tí gobierno romano o náhi? —ichro sín kjuanchankí sín.

18 Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxínrání?

19 Tjáqonará tí chichaon tjenkèhérá sín méhe —mé xíkaha k'uətoan ch'ín Jesús.

Ntá kjuikohe sín ch'án tí chichaon a. 20 Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkání tí chichaon méhe la ko nkexro ihnjé chóna? —ichro ch'án.

21 Ntá kjuátehe sín kixin:

—Tí ch'ín t'ətoan mé tjenkání ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'ətoan tí nkehe kuènte ch'án la kjaxin tí nkehe kuènte Dios la chróchjehérá Dios —mé xíkaha chro ch'ín Jesús.

22 Ntá tí kuínhin sín xíkaha la chrakon sín la komá sín ch'án ntá sákjuú sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

23 Ntá tí yaon a la iso sín saduceo sákjuútsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuáchaxín sín ch'ín Jesús. Ntáchro sín kixin:

24 —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín sao tsík'en. 25 Ntá ntíhi k'uejó yato sín jnkokoá kichó sín. Ntá tí ch'ín sao kótehe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. 26 A ntá tí ch'ín yóxin ik'uén kjaxin la tí ch'ín níxin kuákja ch'án tjan la ntá xíkaha kónhen inaá. La kayatoé tí sín k'uéchóna sín tjan xíkaha kónhen sín kaín sín ik'uén sín. 27 A ntá kjuixixín ntá kjaxin tjan ik'uén tjan. 28 Ntá tió tsoxechón kaín xín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xíkaha kjuanchankíhi sín tí ch'ín Jesús.

29 Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. 30 A ntá tí chojni tsík'en tió tsoxechón la tsoteehya sín la ko tsoteehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajní. 31 A ntá tí kaín tí sín tsík'en tsoxechón, ¿á kjuínchekuáxinhyará nkehe ntáchro Dios? Jehe ch'án xíkíhi chro ch'án: 32 “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.” Méxra tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóchón —mé xíkaha ichro ch'ín Jesús.

33 Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjeoan

(Mr. 12.28-34)

34 Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuátehehya tí sín saduceo. 35 La ijnko tí sín maestro tjako tí ley mé tjinkaon ch'án chrókjuáchaxín ch'án tí ch'ín Jesús. Ntá kjuanchankí ch'án kixin:

* 22:32 Éxodo 3.6

³⁶ —Maestro, ¿nkehéhe tí nkehe imá tjeotan kuènte tí ley? —ichro ch'án.

³⁷ Ntá ntáchro ch'ín Jesús kíxin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”[†] ³⁸ Mé tíha mé tí ley imá tjeotan la ko saoxín k'ueṭoan Dios tíha. ³⁹ A ntá tí nkehe yóxin la tóyohé la mé ntáchro xíkíhi: “Chrótjuèhérá kíchuará éxi tjuéxinrá asánrá.”[‡] ⁴⁰ Tí iyó nkehe i la mé antsí tjeotan kuènte tí ley tsík'etōan Moisés la ko tí nkehe kjuako tí sín k'uechrónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjeó sín ⁴² la ntá ch'ín Jesús mé kjuanchankí ch'án ntáchro ch'án kíxin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kíxin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kíxin:

—¿Ntá nkexrí kíxin Nchakuen Dios chénkaxín ch'ín David kíxin David chróntáchro ch'án kíxin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kíxin:

“Tjak'e tjaná chjina ntiho tsétōan,

tsjixinjian kaín xín tí sín nínkakonhan la tsjachahya sín ts'etōan sín kíxin jahvá mé tsétōan.”[§]

Mé xíkaha chro itén Dios. ⁴⁵ 'A ntá ¿xá nkexrí kíxin Cristo chrók'óna xjeen David a ntá jehe ch'ín David kuíkítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátēhe sín ninkehó la desde tí yaon a chrakon sín la í nínkehó kjuanchankíehya sín ch'án.

23

Ch'ín Jesús tjanchia jie tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kíxin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés. ³ Méxra chrókjuinche xiteyéhérá kaín tí nkehe t'etōan sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kíxin jehe sín la ijnko nkehe ntáchro sín la ókjé nkehe ch'e sín. ⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijno dedo tja sín chrókjuinkítsa sín tí nkehe imá ye yamá chojni. ⁵ Ich'e sín kaín xín nkehe kíxin tsotsjehe chojni. Tóxrjínhín sín tsjak'enkání totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkání nkehe tjákini.

⁶ Tjinkaon sín tsochóna sín silla jína ts'ejókjen sín sine sín tió sátsji sín tí síin kia la ko xritjeýá sín tí silla antsí náxrjón chrók'uejóya sín nkaxenhen nínko.

⁷ La ko tjinkaon sín kíxin chojni chrókjuikosáyehe sín tsoxeta sín tí ntja la ko tjinkaon sín kíxin tsontáchro chojni kíxin maestro tí jehe sín.

8 'A ntá jahará la t̃t̃oéhyará ḱixin tsontáchro sín ḱixin maestro tí jahará ḱixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. 9 La ntá chróntáchrohyará ḱixin ninkexró mé it'árá ntíhi chjasintajni ḱixin jahará la chontará jnkokoá It'árá mé itjen nkaya nkajní. 10 La ko jehe sín chróntáchrohya sín ḱixin jefe tí jahará ḱixin jehó Cristo mé jefe. 11 Tí nkebro ant́s̃i tsjinkítsa iso chojni la jehe ch'án mé ant́s̃i t'et̃oan ch'án. 12 Ḱixin tí nkebro ntáchro ḱixin imá ijíe la mé imá tsont́s̃i. A ntá tí nkebro nchehnkehya la ant́s̃i tsojje.

13 'Nòará tí jahará maestro tjàkorá tí ley la ko tí jahará chojni fariseo. Jahará la jnkójínxónhya t̃jenkayáxinrá. Jahará la t'ikjéherá tí puerta ts'ixenxín chojni tí kjuachaxin kuènte Dios ḱixin t̃t̃oéhyará ts'ixenhen ókjé chojni. A ntá ní jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

14 'Nòará tí jahará maestro tjàkorá tí ley la ko chojni fariseo. Jnkójínxónhya t̃jenkayáxinrá. Jahará takitsjeherá nt̃oé tí chojni tsíkók'án la ntá isé nixjehérá Dios ḱixin ch'iyexínrá chojni ḱixin jína tí jahará. A ntá x̃ikaha kjuich'erá jahará la ant́s̃i tsjasótiará.

15 'Nòará tí jahará maestro tjàkorá tí ley la ko chojni fariseo. Jahará la jnkójínxónhya t̃jenkayáxinrá. Jahará sátjirá nonte la chrítaón ntayaon ḱixin tsjákohérá ijnko chojni tsinkáchónki x̃ikaha tí tinkachónkirá la ntá tío kjuachará kjuachroerá sín la ntá jehe sín ant́s̃i má tsjasótexín sín tí xrohi la kánhyó jahará.

16 'Nòará tí jahará ḱixin t̃et̃oanrá ḱjánchó ntakótánrá. Ntáchrorá ḱixin tí jnkójín chojni tsontáchro ḱixin sinchexiteyá sín nkehe la t'ákjenxín sín tí ñj̃nko la ntá t'ichjánxínhya sinchexiteyá sín. A ntá tí tsontáchro sín ḱixin sinchexiteyá sín nkehe la t'ákjenxín sín tí chica oro siín nkaxenhen ñj̃nko la ntá t'ichjánxín sinchexiteyá sín. 17 Imá lontjirá la ko ntakótánrá. ¿Á imá t̃jetoan tí chica oro ó á imá t̃jetoan tí ñj̃nko ḱixin tí ñj̃nko mé k̃ot̃juáxin tí chica oro? 18 K̃j̃axin ntáchrorá ḱixin: "Tí jnkójín chojni tsontáchro sín ḱixin sinchexiteyá sín nkehe la t'ákjenxín sín tí altar la ntá t'ichjánxínhya sinchexiteyá sín. A ntá tí tsontáchro sín ḱixin sinchexiteyá sín nkehe la t'ákjenxín sín tí nkehe t̃j̃ohehe sín Dios chrítaón tí altar la ntá t'ichjánxín sinchexiteyá sín tí nkehe tsintáchro sín." 19 Imá lontjirá la ko ntakótánrá. ¿Á imá t̃jetoan tí nkehe tsochjehérá Dios ó á imá t̃jetoan tí altar ḱixin tí altar mé t̃ot̃juáxin tí nkehe tsjánjonrá? 20 Ḱixin tí nkebro tsontáchro ḱixin sinchexiteyá nkehe la t'ákjenxín ch'án tí altar la jehya t'ákjenxín ch'án tí altar ó. Náhi. K̃j̃axin t'ákjenxín ch'án kaín tí nkehe siín chrítaón ntíha. 21 A ntá tí nkebro tsontáchro ḱixin sinchexiteyá ch'án nkehe la t'ákjenxín tí ñj̃nko la jehya t'ákjenxín ch'án ñj̃nko ó. Náhi. K̃j̃axin t'ákjenxín ch'án tí Dios itjen ntíha. 22 A ntá tí nkebro t'ákjenxín nkaya nkajní la ntá k̃j̃axin t'ákjenxín sín tí trono kuènte Dios la ko tí nkebro t̃j̃et'et̃oan ntíha.

23 'Nòará jahará maestro tjàkorá ley la ko jahará chojni fariseo. Jahará jnkójínxónhya t̃jenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anís la ko comino. Ḱjánchó tahará kuéntá tí nkehe imá t̃jetoan kuènte tí ley. Mé ntoá chrókjuenkayáxinrá la ko chrókjuikonóghérá kichuárá la ko chrókjuinkachónkirá Dios. Tíhi la ant́s̃i t̃jetoan chrókjuinchexiteyará la k̃j̃axin chrókjuitoéhyará chrokuich'erá tí í so nkehe. 24 Jahará la t̃et̃oanrá ḱjánchó ntakótánrá. Jahará la nchek'ankihirá

kjonté ijnko kochjisen intsí chóna tí nkehe its'irá, a ntá ijnko kocamello kjonté ijie va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkójínxónhya tjenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsikaón kjuachee la ko jahorá tjinkáonrá chróchontará itsjé nkehe. ²⁶ Jahará chojni fariseorá imá ntakótán jahará. Saoxín chrókjuinchetjóará tí nkehe nkaxenhen tí vaso la ko tí plato la ntá ó chrókótjóa tí chrítaón kjaxin.

²⁷ 'Nòará jahará maestro tjàkorá tí ley la ko chojni fariseorá. Jnkójínxónhya tjenkayáxinrá. Jahará la éxi yóhe ijnko tòye tsíxravá chojni, imá náxrjón tsjehe ntója, a ntá nkaxenhen mé tsikaón huéseó chojni tsik'en la ko kaín nkehe tjuáhya. ²⁸ Mé xíkaha tí jahará la tsjehe éxi chojni jína xíkaha, a ntá jnkójínxónhya tjenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkójínxónhya tjenkayáxinrá. Jahará la kjuich'énará tjat'o náxrjón chrítaón tí tòye tsíxravá tí sín k'uékjako itén Dios ósé la ko nchek'ítsará tjat'o chrítaón tòye kuente tí sín jína asén. ³⁰ La ntá ntáchrórá kixin tí chrók'uejorá tí k'uejó tí sín tsík'axrjeníxinrá la ntá chrókjuinkitsahyará chrók'ueén tí sín kjuako itén Dios. ³¹ Méxra xíkaha jahorá ntáchrórá kixin chaxín tsík'axrjeníxinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuich'e tí sín tsík'axrjeníxinrá.

³³ 'Jahará la tsík'axrjeníxinrá konche. ¿Ntá nkexrí chrókuaará kixin itsi tí tsjasótiará? ³⁴ Méxra janhan mé tsétuñhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhírá sín chjasin la chjasin. ³⁵ Méxra jahará la yamará tí jie kixin tí sín jína k'uitjixin ijnié senó. Méxra tsamará tí jie kixin ik'ueén ch'ín Abel, tí nkexro jína, la ko kaín tí í so sín hasta ik'ueén ch'ín Zacarías, xjeen Berequías, tí nkexro k'oyánxinrá chjino tí altar. ³⁶ Chaxín tjonkará kixin kaín tí jie a mé yamá tí chojni siín ijie.

Tsjánka ch'ín Jesús
(Lc. 13.34-35)

³⁷ Ntá ntáchró ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkitsará. Nchónhya veces tjínkavan chrókójnkotsérá la chrók'uáyakonhánrá éxi ijnko cochiká mé t'ayakonhen xjeen va chrínkí kanenee va mé xíkaha tjínkavan chrók'uáyakonhánrá tí jahará. Kjánchó jahará la tjinkákonhyará xíkaha. ³⁸ Ntá jie la Dios la tsítóhe tí jahará. ³⁹ Ntáxrjan kixin í ts'ikonhyará tí janhan inaá tsjixrakájia tí yaon tsontáchrórá kixin: “Imá jína tí nkexro kujixin kjuachaxién ihnié Ìnchéni!” —mé xíkaha ichro ch'ín Jesús.

24

Chrónka ch'ín Jesús kixin ts'itjáyan tí nínko
(Mr. 13.1-2; Lc. 21.5-6)

¹ Ntá ch'ín Jesús k'uaxrjexín ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin

ch'án chrótsjehe ch'án kixin náxrjón tsík'óna tí nínko a. ² A ntá ch'in Jesús mé kjuátehe ch'án kixin:

—Jahará ¿á tjeotsjehérá kaín tíha? Chaxín tjonkará kixin tsjixraká tí yaon ts'oyá kuenté nínko. Nijnko xro ts'ejókjehya kichó kixin kaín tíha la tsoxíka —ichro ch'án.

Tí nkehe tsonhen tió tsjixixín

(Mr. 13.3-23; Lc. 21.7-24; 17.22-24)

³ Ntá sákjuj sín chrítaón tí jna Olivo la ch'in Jesús kjuák'etjaxín ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoexínmi tió ts'inka tí jaha la ko nkexrí tsonoexínmi tí itsi tí tsjixixín chjasintajni? —ichro sín.

⁴ Kjuátehe ch'in Jesús kixin:

—Tóxakonhanrá títoéhyará kixin ninkexró chrókjuít'ayahará. ⁵ Nchónhya chojni itsi sich'iyaxín njina tsonáchro kixin: “Janhan mé tí Cristo” tsixro sín, la sich'iehe sín nchónhya chojni. ⁶ A ntá tió tsinhínrá tsonáchro chojni kixin ó síin kjuanínkaon la ko ts'ixín kjuachrakon kixin tsjanjonko kichó sín la kjónté xíkaha tsonhen la chrakonhyará. Ó jehí tsonhen tíha tí naxá ts'itjáyannya chjasintajni. ⁷ Ijnko nación tsjanjonko í jnko nación la tsjanjonxin sín tí xra ts'etqan sín. La ko itsjé chjasín na tsokjinta la ko tsoníhi chojni la ko ntihi la ntaha tsinkí nonte. ⁸ Kaín tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxréé kixin sinchekjasótiará sín la ntá ts'óyanrá sín. La ko kaín xin chojni síin chjasintajni tsonínkakonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsítqhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iehe sín nchónhya chojni. ¹² La ts'ixín nchónhya jie jínahya la ntá ts'ixín itsjé chojni tsotjuéhya sín kichó sín. ¹³ A ntá tí nkexro naxá tjejóntínkáchónki tí janhan hasta tí tsjixixín la mé tsaá. ¹⁴ La ko tí itán jína chrónka nkexrí tjen tí kjuachaxin kuente Dios la t'ichjánxin tsinhin sín kuente chjasintajni, la tió tsjixin tsinhin sín kuente chjasintajni la ntá ó ts'itjáyany chjasintajni.

¹⁵ 'Ch'in Daniel k'uéchronka itén Dios mé tsíkjin ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá.* Ntá jahará ts'íkonrá tíha. A ntá tí nkexro nchekuaáxin mé tsienxín nkehe tíha. ¹⁶ Ntá kaín tí sín tjejó estado Judea tsochrín sín jna sátsji sín. ¹⁷ A ntá tí sín tjejó chrítaón nchia ntqé sín la í xitjahya tsakitsje sín ninkehó. ¹⁸ Ntá tí tjejóch'e sín xra nontqé sín la kjá í tsokjanhya sín tsjikakja sín iké sín. ¹⁹ Ntá nòa tí chojni chjin tjejóyá sín la ko nòa tí sín nchekakí xjan tí yaon a. ²⁰ Chrókjuanchehérá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni. ²¹ Kixin tíha mé ijnko kjuachrakon imá ijie la desde tí xrankixixín chjasintajni la nunca xíkaha kónhen. ²² Ntá tí chrók'uetqanhyá Dios kixin tjoka ts'atsínka tíha ntá chrókuaáhya ninkexró. Ntá ts'etqan ch'án kixin tjoka ts'atsínka tí kjuachrakon jie kixin jehe ch'án mé imá tjeúhe ch'án tí sín tsíkjeýá ch'án.

²³ Ntá tí tsonáchro chojni kixin: “Tsjehé ntihi itjen Cristo”, o “Tsjehé ntiha itjen ch'án”, la ntá chrókuítekáuényhará sín. ²⁴ Kixin ntá itsi iso sín tsonáchro sín kixin Cristo tí jehe sín la ko kjaxín itsi í so sín ntoáhya tsjako la ko tsjasín

* 24:15 Daniel 9.27

sín kjuaxroan jié kixin tjinkaon sín chrókjuich'iyehé sín chojni kjónté tí sín tsíkjeýá Dios. ²⁵ Ó xrjanka senó nkehe tsonhen kixin tsonohará. ²⁶ Méxra tí chróntácho sín kixin: “Tsjeherá tí nteje ntiha tjen ch'án”, la ntá tsjihyará nó ntiha. O tí chróntácho sín kixin: “Tsjeherá ntihi tí cuarto mé tjen ch'án”, la chrókuítekákonhyará. ²⁷ Méxra éxi tsjonkixín la t'ikon chojni t'inkaséyanxín tí tjitoxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni. ²⁸ Mé éxi yóhé tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajní la kjaxin kaín nkehe siín nkaya nkajní la tsinkí. ³⁰ La ntá ts'ikon chojni kixin nkajní tsjixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjanka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enakjan ch'án tsikao tí kjuachaxin jié. ³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueýá Dios tsjixín kanóé lado chjasintajni.

³² Chrók'uitjará nkexrí sintayóaxian kuente ijnko nta to higo. Éxi yóhé tió chóna tahnte la ko ts'ixín kayoa la nta tsonoaxínrá kixin í séhya tsokjan ichrin. ³³ Mé xikaha tí ts'ikonrá ts'atsínka kaín tíha la ntá xikaha tsonoaxínrá kixin í séhya itsi Inchéni. ³⁴ Ntá tjonkará chaxín kixin kaín tíha senó tsonhen tí naxá ts'enhya tí chojni siín jie. ³⁵ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteýá tíha.

³⁶ A ntá tí yaon la ko tí hora tsoxiteýá tíha la kohya ninkexró nohe. Ni tí sín ángel tjejó nkaya nkajní noehya sín la ko ni tí Xjeen Dios noehya. Ó jehó tí It'é mé nohe.

³⁷ Éxi yóhé tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni. ³⁸ Tí naxá titjiéhya sín nta la kaín chojni la jina k'uejó sín la kjóne sín la ko ik'uí sín la ko sitótehe sín kjuixrakájia tí yaon k'uixenhen ch'ín Noé ntabárcō.† ³⁹ A ntá jehe sín mé kienxínhya sín hasta kuijia tí k'uániá chrin ntá ikui nta la k'uatjóá kaín sín. Mé xikaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitqhe. ⁴¹ La ko yaá chojni chjin mé tjejó't'o sín la ijnko la sátsji la í jnko la tsitqhe.

⁴² Chrók'uejotsjehérá kixin noahyará nkehora la ko nkesá ts'inka janhan. ⁴³ Chrókónohará tíhi: tí chrókónohe ijnko Inché nchia nkehora tie chrókjui ijnko nkexro tseé la ntá chrókjuak'echónhen tí Inché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jina chrók'uejorá kixin tí Xjeen Dios K'óna Chojni me titáya itsi.

Tí nkexro jina ch'e xra la tí nkexro ch'ehya xra jina

(Lc. 12.41-48)

⁴⁵ Tí nkexro chaxín ch'e xra jina la ko imá nohe la ntá tí lámoe ch'án ts'etuenhen kixin ts'ayakonhen ch'án tí sín siín ntqē ch'án la ko tsjanjon ch'án nkehe sine sín chintjé tí hora a. ⁴⁶ Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteýá ch'án tí xra k'uituenhen ch'án. ⁴⁷ Chaxín tí lamo la tsjanjon ch'án kaín tí xra chóna ch'án ts'etqan tí ch'ín a. ⁴⁸ A ntá ijnko

† 24:38 Génesis 6.5-8

chojni ch'e'hya xra jina la ntá tsjenkayáxin ch'án kixin kjá tjokahya tsokjan tí lámge ch'án ⁴⁹ la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikaø ch'án kaín tí sín sítókoan. ⁵⁰ Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'án la sinchekjasóte tí ch'ín kuitohehe xra kjuínchexiteyáhya la ts'etøan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntiha la tsotsjanka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuènte Dios mé éxí yóhe ite sín tjarisoá sátsji tí tsotehe chojni chuénko linterna tjíá aceite la sákjuíchónhen sín tí ch'ín tsikótehe. ² In'ó sín la tsikóyaxienhya sín la in'ó sín ó tsikóyaxínhin sín. ³ Tí sín tsikóyaxienhya na kjáxin la tsíkijjiko sin linterna kjánchó tsíkijjikohya sín aceite tsikja inaá. ⁴ A ntá tí sín tsikóyaxínhin la sátsíkjiko sín xro tjíá aceite la ko tí linterna kuènte sín. ⁵ A ntá tí ch'ín tsikótehe la tjokahya kui ch'án la ntá jehe sín mé tsíkíhi sín kotáchrín la tsík'ejóua sín kaín sín. ⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsikótehe na t'axrjerá ntója tsoxetará ch'án”, ichro ch'án. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín. ⁸ A ntá tí in'ó sín tsikóyaxienhya la nixjehe sín tí sín in'ó tsikóyaxínhin ntáchro sín kixin: “Chjehéni intsí aceite kuèntará kixin ó k'uànga aceite tjíá linternéni”, ichro sín. ⁹ A ntá tí sín tsikóyaxínhin mé ntáchro sín kixin: “Náhi, tí aceite tí xíkaha tsjanjonni intsí jahará la antsí jeheni la tsjachahya. Íchá jina sátsjk'ènará tí sítoxín ntiha”, ichro sín. ¹⁰ Ntá tí in'ó tí sín kóyaxienhya mé sákjuík'ena sín aceite la ntá ó kui tí ch'ín tsikótehe. Tí in'ó sín tjejóchónhen mé sákjuíko sín ch'án tí kia tsikótehe sín la ntá ó tuénxín k'uikjéhe tí puerta. ¹¹ Ntá chr'éxin ikui tí in'ó sín tjarisoá tsikóyaxienhya la t'ínka sín puerta ntáchro sín kixin: “Ó kuini takitjehé nchia.” ¹² A nta jehe ch'an kjuátehe ch'án ntáchro ch'án kixin: “Chaxín tí jahará la ní chonhyará”, ichro ch'án.

¹³ Ntá ntáchro ch'ín Jesús inaá kixin:

—Méxra xíkaha tí jahará chrók'uejótshéhérá kixin noahyará nkeyaon la nkehora itsí tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntáchro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ Ijnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tíó kjuixin kjuanjon ch'án la ntá sakjuí ch'án ikjín. ¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil. ¹⁷ Kjáxin tí nkexro k'uáyéhe iyó mil chichaon mé xíkjacha ch'án í jnko iyó mil. ¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'èna ch'án ijnko tòye kjuavá ch'án tí chichaon kuènte lámge ch'án.

¹⁹ A ntá nchónhya nánó k'uátsínka la ntá ikjan tí lámogé sín kíxín ntá tsjen-toáko sín ch'án cuenta. ²⁰ Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáchro ch'án kixín: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. ²¹ Ntá tí lamo mé ntáchro kixín: “Nchoxon tí xíkaha. Jaha la ijnko chojni jína ch'e xra. La ó kjuinchexiteyá jína. Kjónté jehya xra jíe la kjuinchexiteyá jína la ntá tsotjaha ijnko xra antsí jíe la tjak'e tsochéheni.” ²² Ntá chr'éxin ikui tí nkexro k'uáyéhe iyó mil la ntáchro ch'án kixín: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. ²³ La ntá tí lamo ntáchro kixín: “Nchoxon jaha mé ijnko nkexro jína ch'e xra la ó kjuinchexiteyá. Kjónté jehya xra jíe la kjuinchexiteyá jína la ntá tsotjaha í jnko xra antsí jíe. Tjak'e tsochéheni”, ichro ch'án. ²⁴ A ntá ikui tí ch'ín k'uáyéhe ijnko mil la ntáchro ch'án kixín: “Ó nóna kixín ijnko chojni imá jiehe tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuújak'emáni tí chichaon chrínkí nche. Tákjá chíchakqan tjinhin”, ichro ch'án. ²⁶ A ntá kjuátéhe tí lamo kixín: “Jaha ijnko chojni jínahya la ko séhe. Jaha la ó noha kixín chrótjaa tí nonte k'uénkahya la chrókuákjaa tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo. ²⁸ A ntá nixjéhe ch'án tí í so sín tjejó la ntáchro ch'án kixín: “Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixín tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsí chóna la ts'axrjehe. ³⁰ A ntá tí nkexro ch'ehya xra la tsétuénhén sátsji ch'án tí sitié ntója la ntá ntiha la tsotsjánka ch'án la ko sinetaón ch'án neno ch'án.”

Tsitogéxín ijíe chojni chjasintajni

³¹ A ntá tí tsi tí Xjeen Dios K'óna Chojni la tsíkao ch'án kjuachaxién jíe éxi ijnko Réy la ko tsíkao ch'án kaín xín tí sín ángel ntá ntaha tsjak'etjaxín ch'án tí trono ts'etoanxín tí kjuachaxién jíe. ³² Ntiha kaín xín tí chojni tsíkjixín nkuúxín nación tsoghjina tí tjen ch'án la jehe ch'án tsakitsjekjan ch'án ijnko la í jnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixin va la ko tí koténtsó la ókjé ts'ixin. ³³ Méxra ts'etoan ch'án kixín tí kolélo la ts'ixin nó tja ch'án chjina, a ntá tí koténtsó la nó tí tja ch'án kjon. ³⁴ Ntá tí Rey tsonixjéhe tí sín tjejó tja ch'án chjina tsontáchro kixín: “Xrákirá jahará tí tjen kjuachaxin kuénte T'aná kixín T'aná ó kjuincheyaonrá ch'án. Tí naxá kjuich'énahya Dios chjasintajni la xráxín kjuenkayáxín ch'án xíkaha tsonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uia, la k'uájia éxi ijnko chojni kjuixín ikjín la jahará kjuánjonrá nketí k'ok'ána. ³⁶ La ko k'uéchontahya kaná la jahará kjuánjonrá ika k'uítsá, la ko kónina la jahará kjuasántsjeherá tí janhan, la kjuak'échjina la ntá jahará kjuasántsjeherá tí janhan.” ³⁷ A ntá tí sín jína la tsjanchankí sín kixín: “Ínchéni, ¿nkesá k'uíkoni kixín ik'uén kjinta ntá kjuanjoni nkehe kjónte? ¿La nkesá k'uíkoni kixín ik'uén ntá la kjuanjoni nkehe ik'uia? ³⁸ ¿La ko nkesá k'uíkoni kixín ikjín kjuúxian ntá kjuanjoni nketí k'ok'ána? ¿La ko nkesá k'uíkoni kixín chontahya iká la kjuanjoni ika k'uítsá? ³⁹ ¿La nkesá k'uíkoni kixín kóniha o kjuak'échjina la ntá kjuújtsjeheni tí jaha?” mé xíkaha tsjanchankíhi sín ch'án. ⁴⁰ A ntá tí Rey tsontáchro kixín: “Tíó

kjuínkĩtsará ijnko kichó ni kjónté ijnko chojni nóè la mé yóhë kixin tí janhan chrókjuínkĩtsará.”

⁴¹ A ntá tí Rey t'etóan mé tsonixjehë tí sín tjejó nó tja ch'án kjon tsontácho kixin: “Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kain tí sín ángel kuènte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uia. ⁴³ K'uájia éxi ijnko nkexro kjuixín kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántsjehyará tí janhan.” ⁴⁴ Ntá tí jehe sín la tsjanchankí sín kixin: “Ínchéni, ¿nkesá k'uíkoni kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'échjina? ¿Mé nkesá k'uíkoni xíkaha la ntá kjuínkĩtsahyani tí jaha?” tsixro sín. ⁴⁵ La ntá tí Rey tsjatehe ch'án tsontácho ch'án kixin: “Tí xíkaha kain tíha kjuínkĩtsahyará ijnko chojni imá nóè la éxi xíkaha kjuínkĩtsahyará tí janhan.” ⁴⁶ A ntá tí sín jínahya xíkaha kjuich'e la mé sátsjixin sín ntíhi tsjasóte sín jnkochrín. A ntá tí sín jína la sátsji sín ts'áyehë sín kjuachón jnkochrín —mé xíkaha chrónka ch'ín Jesús.

26

Tí sín nínkakonhen ch'ín Jesús tjenkayáxin sín kixin nkexrí ts'óyán sín ch'án (Mr. 14.1-2; Lc. 22.1-2; Jn. 11.45-53)

¹ Ntá kjuixín chrónka ch'ín Jesús kain tíha, ntá nixjehë ch'án tí sín k'uájiko ch'án, ntácho ch'án kixin:

² —Jahará ó nohará kixin t'itjáyán iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etóan ntá tsjak'enkanı sín ch'án ijnko ntacruz —ichro ch'ín Jesús.

³ Ntá tí sín nchat'á t'etóan la ko tí sín maestro tjako tí ley la ko tí sín táda kuènte tí sín judío mé kójnkotsé sín tí ntásin kuènte tí nchia kjuák'e ch'ín Caifás tí ch'ín nchat'á t'etóan. ⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án. ⁵ A ntá ntácho sín kixin:

—Tí síin kia la chrótséhyani ch'án kixin imá tsónínkaon tí chojni —ichro sín.

Ijnko tjan kjuikao aceite xraxë kuikite tjan ikja ch'ín Jesús (Mr. 14.3-9; Jn. 12.1-8)

⁶ Ch'ín Jesús tjen chjasin Betania ntqë ch'ín Simón tí ch'ín k'uéchonta chinlepra. ⁷ Ntá xrínahya kóchjina ijnko tjan kjuikao tjan ijnko xro tsík'óna xro mármol mé kuikaón aceite xraxë náxrxón la imá tjete k'uíte. A ntá tí tjene ch'ín Jesús ntá tí tjan a mé kuikite aceite ikja ch'án. ⁸ A ntá tí sín k'uájiko ch'ín Jesús mé k'uíkon sín xíkaha ntá kónínkaon sín la ntácho sín kixin:

—¿Nkekuènté kóxénhen tí xroan a? ⁹ Íchá jína chrókóxiixin itsjé chichaon tí xroan ntá tí chichaon a chrókjuínkĩtsa tí sín nóè a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntácho ch'án kixin:

—¿Nkekuènté t'antaxínhínrá tí tjan i? Ó nchoxon ijnko nkehe jína kjuich'e tjan. ¹¹ Tí sín nóè la ó xráxin ts'ejókoará sín, a ntá janhan la jnkochrínnya ts'ejóni. ¹² Tí nkehe kjuich'e tjan mé kjuíncheka tjan aceite xraxë tí cuerpo kuèntana la mé xíkaha kjuakoxín tjan kixin xíkaha tsoxravána. ¹³ Ntá chaxín tjonkará kixin kuènté chjasintajni tíó tsjako sín tí tán jína tsaáxin sín ntá tsochrónka sín kixin xíkaha kjuich'e tjan ntá tsoxraxinkakonxín sín kixin nkehe tí kjuich'e tjan —ichro ch'ín Jesús.

*Ch'ín Judas kjuínchekji tí ch'ín Jesús**(Mr. 14.10-11; Lc. 22.3-6)*

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehe ch'án tí sín nchat'a t'et'əoan ¹⁵ la ntáchro ch'án kixin:

—¿Nkekjaín tsochjinará tsoxrjananka nketí tjen tí ch'ín Jesús? —mé xikaha chro tí ch'ín Judas.

Ntá tí sín nchat'a t'et'əoan kjuenkehe sín ch'án treinta chichaon plata. ¹⁶ Ntá tuénxin tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

*Kjuixixin kjóneko sín tí ch'ín Jesús**(Mr. 14.12-25; Lc. 22.7-23; Jn. 13.21-30; 1 Co. 11.23-26)*

¹⁷ Ntá ikui tí yaon xrankixixin kia sine sín niotja tsíjkikohya tí xroan t'ánkixin niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kixin:

—¿Inchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntoe ijnko ch'ín la nixjehérá ch'án tson táchrorá kixin: “Ntáchro Maestro kuénténi kixin í séhya naxa tsjak'e ch'án la ntá ijie ntəo ntihi tsoyaxixin kixin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxixin sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uejoko tí teyó sín k'uájiko ch'án kjóne sín.

²¹ La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkojínra tjejorá ntihi mé sinchekjirána —ichro ch'án.

²² Ntá kaín sín la kjuankixin kóxakonhen sín k'uává sín la ntá kjuankixin sín jnkojnko sín kjuanchankíhi sín tí ch'ín Jesús kixin:

—Inchéni, ¿á jeheni ní? —ichro sín.

²³ Ntá kjuátəhe ch'ín Jesús kixin:

—Tí nkexro tsochr'ánkíkan niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xikaha tsjasóte ch'án éxí nixja xroon itén Dios, a ntá nòa tí ch'ín sinchekji ch'án. Íchá jina chrókokjéhya ch'án —mé xikaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kixin:

—Maestro, ¿á janhan? —ichro ch'án.

Ntá ntáchro ch'ín Jesús kixin:

—Méxra xikaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'o ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kixin:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjía inté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kixin:

—Tíhi mé kaín rá it'irá ²⁸ kixin tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kixin ts'íjmáxin ijie sín. ²⁹ Tjonkará kixin ts'íhya janhan tí inté to uva inaá tsjixrakája

tí yaon ts'ayàjia kjuachaxin kuènte T'aná ntá xík'ini ìnté to uva ínaá —mé xíkaha ichro ch'in Jesús.

Ntá chrónka ch'in Jesús kixin ch'in Pedro sinchemá ch'an kixin chónhya ch'an tí ch'in Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuí sín tí jnā Olivo. ³¹ Ntá ntáchro ch'in Jesús kixin:

—Jahará tsitōnaráni kaín rá ijie tie kixin ntáchro tí xroon itén Dios kixin: “Its'en tí nkebro Pastor t'ayakonhen kolélo ntá kaín tí ko mé tsichroe va.”*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhéra —ichro ch'an.

³³ Ntá kjuátehe ch'in Pedro ntáchro ch'an kixin:

—Kjonté kaín sín tsitōha sín ntá janhan la náhi —ichro ch'an.

³⁴ Ntá ntáchro ch'in Jesús kixin:

—Chaxín tsōxrjanka kixin tí tie i naxā tsotsjehya kochintōa la ó sinchemána níya —ichro ch'an.

³⁵ Ntá ntáchro ch'in Pedro kixin:

—Kjonté koína its'én la sintamáhya tí jaha —ichro ch'an.

La ntá kaín tí sín k'uájiko ch'an na xíkaha ichro sín kaín sín.

Ch'in Jesús chrónóehē ch'an It'é ch'an tí tjen ch'an tí Huerto Getsemaní

(Mr. 14.32-42; Lc. 22.39-46)

³⁶ Ntá ch'in Jesús la ko tí sín k'uájiko ch'an mé kjuíji sín tí nonte ntiha mé nchek'in sín Getsemaní. Ntá jehe ch'an mé ntáchro ch'an kixin:

—Tjejorá ntiho ntá janhan sátsjia tsonixjahā T'aná —ichro ch'an.

³⁷ Ntá sákjuiko ch'an tí ch'in Pedro la ko tí iyó xjeen ch'in Zebedeo la kjuankixin kóxakonhen ch'an la ko k'uává ch'an. ³⁸ Ntá ntáche ch'an tí iy'á sín kixin:

—Imá t'ává asenná éxi its'én ntá ts'axrje asenná. Ntá jahará ntiho tsitōhará ts'ejotsjehekoárana —ichro ch'an.

³⁹ Ntá sákjuí ch'an antsí kjínxin ntá kjuák'exín toch'in ch'an k'uísén ch'an hasta caxín kja ch'an nonte ntá chrónóehē ch'an It'é ch'an tjen nkaya nkajní, ntáchro ch'an kixin:

—It'éni, tí tjinkávan chrókjuinchekaáni kixin chrók'uuihyani tí nkehe tsjá tjíá tí copa i. Kjánchó jehya éxi tjinkaonni jeheni. Náhi. Éxi tjinkávan jaha —ichro ch'an.

⁴⁰ Ntá ikjan ch'an tí kuítóhe sín la ó k'uíkon ch'an kixin tjejójua sín. Ntá nixjehē ch'an tí ch'in Pedro ntáchro ch'an kixin:

—Xá xitjahya chrók'uejótsehekoarána ijnko hora. ⁴¹ Titōhará tjejotsjehérá la nixjehérá Dios kixin tsjinkitsará ch'an kixin chrókjuachroehyará ch'in Tsochren. Asánrá tóxrjínhin kjánchó tí cuerpo chontará la imá ntá —mé xíkaha ichro ch'in Jesús.

⁴² Ntá sákjuí ch'an yóxin ínaá chrónóehē ch'an It'é ch'an, ntáchro ch'an kixin:

—Jaha It'éni tí xitjahya tsjakjían tí nkehe tsjasótexinni la ntá tjinkaonni éxi jaha tjinkávan —mé xíkaha ichro ch'an.

⁴³ Ntá ikjan ch'an la k'uíkon ch'an tjejójua tí sín k'uájiko ch'an ínaá kixin tjiehya sín kotáchrin. ⁴⁴ Ntá kuítóhe ch'an sín ínaá la níxin sáxíkji ch'an ntá ó xíkahó xínixja ch'an ínaá. ⁴⁵ Ntá kjan ch'an tí k'uéjō sín la ntáchro ch'an kixin:

* 26:31 Zacarías 13.7

—ǷÁ ntá jie, tjeochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án. ⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

Sákjuiko sín tí ch'ín Jesús tsjak'echjina ch'án ntqechiso
(Mr. 14.43-50; Lc. 22.47-53; Jn. 18.2-11)

⁴⁷ Ntá naxá tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. Á ntá jehe ch'án kuikao ch'án nchónhya chojni kjujiko sín ch'ica espada la ko inta. Na mé kjuachaxiën tí sín nchat'á t'etqan la ko tí sín táda kuente tí sín judío mé kui sín. ⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsakíha tuëen ch'án na mé tsonoaxínrá kixin jehe ch'án. Ntá itserá ch'án —mé xikaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchro ch'án kixin:

—ǷÁ jína tjen, Maestro? —ichro ch'án.

Ntá kjóneko ch'án kochíto. ⁵⁰ Ntá kjuátehe ch'ín Jesús, ntáchro ch'án kixin:

—Amigo, á ó k'uinka tí xřá tjínkávan s'ich'e?

Ntá xikaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án ch'ica espada kóchrínjin ch'án tatsjon ijnko tí sín ch'ehe tí nchat'á t'etqan xřá. ⁵² Ntá ntáchro ch'ín Jesús kixin:

—Chr'axenhén tjeq ch'ica espada méhe. Kaínxín tí sín tjà yaxín ch'ica espada la xikaha ts'enixín sín. ⁵³ ǷÁ noahyará kixin janhan jína chrókjuáncháha T'aná la ntá tuénxín chróchr'án ch'án teyó ejército sín ángel? ⁵⁴ Kjánchó tí xikaha chrókónhen la chróxitayáhya éxi nixja xroon itén Dios kixin itén Dios mé chrónka kixin t'ichjánxin ó jehí xikaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará ch'ica espada la ko inta kixin tsotserána éxi chrótsérá ijnko síchqe xikaha. Á ntá kaín yaon kjuak'é nkaxenhen nínko kjuákua žna ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xikaha ntá kaín tí sín k'uájiko ch'ín Jesús na mé kuítqhe sín ch'án, ntá sákjuí sín.

Ch'ín Jesús kóchjina ch'án tí síxřé t'etqan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuiko sín ch'án ntqech'ín Caifás, tí nchat'á t'etqan. Ntaha mé tsikójnkotsé kaín tí sín maestro tjako tí ley la ko tí sín t'etqan kuente nínko. ⁵⁸ Ntá ch'ín Pedro ikjin tinkáchréhe ch'án ntá kjuíji ch'án tí ntásin ntqech'ín nchat'á t'etqan la kjaxín k'uixenhen ch'án tí ntásin la kjuák'eko ch'án tí sín policia kuente nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etqan la ko tí sín táda la ko kaín tí sín t'etqan mé kjueyá sín nkexrí ts'eka sín jie tí ch'ín Jesús kixin jína chrók'óyan sín ch'án. ⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'iká ch'án. Ntá kjónté la kóchjina iyó testigo ntoáhya chrónka sín ⁶¹ la ntáchro sín kixin:

—Ó kuínhinni ntáchro ch'án kixin: “Janhan na ts'oxíka tí nínko kuente Dios la ntá iní yaon koá la ó tsjaké inaá”† —mé xikaha chro sín.

⁶² Ntá tí nchát'á t'etōan k'uínkatjen la kjuanchankíhi ch'án tí ch'in Jesús, ntáchro ch'án kixin:

—¿Nkekuènté tjátééhya ninkehó? ¿Á chaxín xíkaha tsíntáchrua éxí xíkaha ichro sín? —ichro ch'án.

⁶³ Ntá ch'in Jesús la táníkoá ch'án nixjahya ch'án. Ntá ntáchro tí nchát'á t'etōan kixin:

—Kjuachaxièn ihnié tí Dios tjechón t'akjénxian chronka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'in Jesús ntáchro ch'án kixin:

—Éxí tí ntáchrua jaha. Ntá kjaxin xrjanka kixin chr'èxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjuj mé tsixin ch'án nkaya nkajni —ichro ch'in Jesús.

⁶⁵ Ntá kuínhin tí nchát'á t'etōan la ntá imá kónínkaon ch'án ntá kótséhcje ch'án tí iké ch'án la ntáchro ch'án kixin:

—Tí ch'in a k'uántaxínhin ch'án Dios kixin xíkaha nixja ch'án. Méxra t'ichjánxinhya í so chojni tsochrónka. La ntá jahará la ó kuinhínrá kixin nkexrí nixja ch'án. ⁶⁶ ¿A ntá jahará la, ¿nkechorá? —mé ichro tí nchát'á a.

Ntá kjuátehe sín ntáchro sín kixin:

—Chóna ch'án jié la chrók'uen ch'án —ichro sín.

⁶⁷ Ntá iso sín la kuikite sín ntáte sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

*Ch'in Pedro kjuínchemá ch'án kixin chónhya ch'án tí ch'in Jesús
(Mr. 14.66-72; Lc. 22.56-62; Jn. 18.15-18, 25-27)*

⁶⁹ Ntá ch'in Pedro naxa tjetjaxin ch'án tí ntásin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xrikoa tí ch'in Jesús tsíkixin estado Galilea —ichro tjan.

⁷⁰ A ntá ch'in Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uíkon tí jehe ch'án la nixjéhe tjan kaín sín tjejontaxín, la ntáchro tjan kixin:

—Tí ch'in i la kjaxin k'uájiko ch'án tí ch'in Jesús tsíkixin chjasin Nazaret —ichro tjan.

⁷² Ntá ch'in Pedro kjuínchemá ch'án inaá, k'uákjenxin ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'èxin tí sín k'uéjontaxín kóchjinehe sín ch'in Pedro la ntáchro sín kixin:

—Chaxín jaha kjaxin jnkojín tí sín a kixin tjátsōanxími tí nixja jaha —ichro sín.

⁷⁴ Ntá k'uákjenxin ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrinahya itsje kochíntōa. ⁷⁵ Ntá ch'in Pedro mé xraxinkaon ch'án kixin nkexrí chrónka ch'in Jesús senó kixin: “Naxa tsotsjehya kochíntōa mé ó tsjixin sijnchemána níya kixin chonhyana.”[‡] Ntá xíkaha xraxinkaon ch'in

Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuanchenihi, la sákjuí ch'án.

27

Kjuikénhen sín ch'in Jesús tí ch'in Pilato
(Mr. 15.1; Lc. 23.1-2; Jn. 18.28-32)

¹ Ntá tí kóyaon k'uinkaséyan ntá kaín sín nchat'á t'etōan la ko tí sín t'etōan kuènte tí sín judío kjuenkayáxin sín nkexrí ts'óyán sín tí ch'in Jesús. ² Ntá tjechronteto ch'án sákjuiko sín ch'án tí tjen tí ch'in Poncio Pilato, tí ch'in gobernador romano.

Ik'uén ch'in Judas

³ Ntá tí ch'in Judas, tsíkjinčekji ch'in Jesús, mé k'uíkon ch'án kixin ts'óyán sín tí ch'in Jesús. La ntá xraxinkaon ch'án tí jié kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'etōan la ko tí sín táda. ⁴ La ntá ntáchro ch'án kixin:

—Ó kjuasinni jié kixin kjuínčekjini ijnko nkexro tjóá —ichro ch'án.

▲ ntá jehe sín kjuátēhe sín kixin:

—Ntá janhanna la nonahyana tíha. Tíha la ó jié kuènta —ichro sín.

⁵ Ntá ch'in Judas mé sákjuík'e tí chichaon nkaxenhen njnko ntá sákjuí ch'án kjuísik'á isin ch'án nta.

⁶ Ntá tí sín nchat'á t'etōan kjuenájín sín tí chichaon la ntáchro sín kixin:

—Tí chichaon la kóxiñin ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontee Tí Ch'in Ch'éna Nchésen kixin tsochónta sín nketi tsoxravá tí chojni tsíkjiñin ikjín. ⁸ Mé xíkaha kjuínček'in sín tí nonte mé Campo Kuènte Jni la hasta ijie la naxá xíkaha nček'in sín. ⁹ Mé xíkaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjon tí sín israelita kuènte tí ch'in a), ¹⁰ la k'uénaxín sín tí nonte kuènte tí ch'in ch'éna nchésen kixin xíkaha kjuínchexiteyá sín tí nkehe k'uētuañna Ìnchéni.”*

Ch'in Jesús kóchjina nkayakon tí gobernador Pilato
(Mr. 15.2-5; Lc. 23.3-5; Jn. 18.33-38)

¹¹ Na ntá ch'in Jesús sákjuiko sín ch'án nkayakon tí ch'in gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátēhe ch'in Jesús, ntáchro ch'án kixin:

—Éxí ntáchrúa jaha —ichro ch'án.

¹² Na ntá tí sín nchat'á t'etōan la ko tí sín táda t'etōan t'eka sín jié tí ch'in Jesús kjánchó la ch'in Jesús la ninkehó kjuátēheya.

¹³ ▲ ntá ch'in Pilato kjuanchankí ch'án kixin:

—¿Á kiénhya kaín tí jié t'eka sín tí jaha? —ichro ch'án.

¹⁴ Kjánchó ch'in Jesús la ninkehó kjuátēheya ch'án. Ntá tí ch'in gobernador la chrakon ch'án.

K'uetoan sín kixin its'en ch'in Jesús
(Mr. 15.6-20; Lc. 23.13-25; Jn. 18.38—19.16)

* 27:10 Zacarias 11.12-13

15 A ntá tí kié pascua mé kuèhnen tí ch'ín gobernador kixin jnkojnko nánó takitsjexín ch'án ntoechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. 16 Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. 17 Ntá itsjé chojni kójnkotsé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás ó á tí ch'ín Jesús nchek'in sín Cristo? —ichro ch'án.

18 Kixin tí ch'ín Pilato la ó nohe ch'án kixin kjuachjinoxínhin chóna tí sín kjuíkaán tí ch'ín Jesús.

19 Ntá jehe ch'án naḡa tjetjaxín ch'án tí nchekitoexín ch'án ijié chojni la ntá tí ichjién ch'án mé k'uetuēhnen tjan ijnko chojni tsjichénka ch'án kixin tsjiatehya ch'án tí nkexro jína kixin kóntó náxrjónhya k'uikónxín tjan kotáchríen tjan kixin tí jehe ch'án.

20 A ntá tí sín nchat'á t'etjoan la ko tí sín táda t'etjoan a mé nixjehe kaín tí chojni tsikóchjina kixin chrókjuanchia sín kixin chrókútohe ch'án tí ch'ín Barrabás sáchrókjui, a ntá ch'ín Jesús mé chrók'uen. 21 A ntá tí ch'ín gobernador mé nixjehe ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátēhe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

22 A ntá ch'ín Pilato mé kjuanchankí ch'án kixin:

—¿A ntá nkehe sjt'aha tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátēhe sín kixin:

—Tsjak'enkáni ch'án ntacruz! —ichro sín.

23 Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsí má itsen k'uixite sín, k'óyako sín, ntáchro sín kixin:

—Tsjak'enkáni ch'án ntacruz! —ichro sín.

24 Ntá ch'ín Pilato k'uikon ch'án kixin í kohya tsjitóxinhin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xrakao sín intá, la nkayakon kaín tí sín tsikójnkotsé ntaha k'ónti ch'án tja ch'án. La ntáchro ch'án kixin:

—Janhan tsámahya jje tí its'en tí nkexro í chónahya jje. Jahará xikaha tjinkáonrá tsonhen —ichro ch'án.

25 Ntá kaín sín kjuátēhe sín kixin:

—Jeheni la ko xjeenni mé yámáni tí jje tí its'en tí nkexro i —ichro sín.

26 Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'uetjoan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

27 A ntá tí sín soldado a mé sákjuiko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án. 28 Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. 29 La kjuak'enkáya sín kja ch'án ijnko corona tsikjich'éna sín ntach'i la ko kjuanjon sín ijnko nta vara kixin tjenkáya tja ch'án chjina. La ntá k'uéjóxin toch'in sín nkayakon ch'án la kjuanoá sín ch'án, ntáchro sín kixin:

—Jnkochríxín tsjak'é tsétuēnhén tí sín judío —ichro sín.

30 La ko kjaxin ntaté sín kuíkite sín nkayakon ch'án la ko kuákja sín tí nta tjexraá ch'án la t'ichjéxin sín kja ch'án. 31 Ntá kjuixín kjuanoá sín ch'án na ntá

kuakitsjehe sín ch'án tí ka kjátse tié ntá kjuínchek'ínkáyá sín tí iké ch'án xráxín. Ntá sákjuíko sín ch'án kixin tsjak'enkani sín ch'án ntacruz.

Kjuák'enkáni ch'ín Jesús ntacruz
(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuíxin ch'án chjasin Cirene, mé it'in ch'án Simón. Ntá k'uetuēnhen sín ch'án kixin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjexín Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuíxin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáchro kixin: “Nchónhya suerte kjuích'exín sín tí kaná.”[†] ³⁶ Ntá tí sín soldado ntaha k'uéjóna sín t'ayakonhen sín ch'án. ³⁷ Ntá kjuak'enkani sín tí ikja tí ntacruz ijnko ntachiso ntáchro kixin: “Ch'ín Jesús mé tí ch'ín Rey t'etuenhen tí sín judío.”

³⁸ Kjaxin yaá tí síchee k'uéjójáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkák'atsínka mé kjuanoá sín ch'án tinkátjía kja sín ⁴⁰ la ntáchro sín kixin:

—Jaha ntáchrua kixin chrók'oxíka tí njnko a ntá iní koá yaon la ó chrókjuíxin chrókjuích'éna inaá,‡ ichrua. Méxra ijie jahvá ncheakaá asán. Tí chaxín jaha Xjeen Dios la jahvá tjasinkajinxín tí ntacruz sínche —ichro sín.

⁴¹ La ntá kjaxin tí sín nchat'á t'etōan la ko tí sín maestro tjako tí ley la ko tí sín fariseo la ko tí sín k'uetōan kuēnte njnko kjuanoá sín ch'án, ikjo sín kíchó sín kixin:

⁴² —Jehe ch'án mé kjuíncheakaá ch'án ókjé chojni ntá jehe ch'án xitjahya sincheakaá asén ch'án. Kja tí chaxín jehe ch'án tí Rey kuēnte Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kixin Dios tjinkitsa tí jehe ch'án la ntá tsotsjeheni á chaxin tjinkaon Dios sincheakaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínjin sín ch'án.

Ik'uén ch'ín Jesús
(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uíxin tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjexín kixin: It'eni, It'eni, ¿nkekuèté kuitohéni?§ —mé xíkaha ichro ch'án.

⁴⁷ Ntá iso sín tjejontaxín kuínhin sín ntá ntáchro sín kixin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuínká ch'án sákjuíakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrin ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté tjtōhé ch'án. Tsotsjeheni á tsi ch'ín Elías sincheakaá tí jehe ch'án —ichro sín.

⁵⁰ Ntá ch'ín Jesús itsen k'uúiyato ch'án inaá, ntá kjuixin ik'uén ch'án. ⁵¹ Mé ntá tuénxín k'uúichje tí ka tjenkákuènxín nkaxenhen nínko. Mé k'uúichje tí ka k'óna yaá tí kjuankíxixín noi hasta nonte. La ko kuínki nonte la ko tí tjo la kjaxin xitjehe. ⁵² La ko ó xitjehe tí tòye tsíxravá chojni la ko ó xechón itsjé tí sín k'uékinkáchónki Dios. ⁵³ Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uúixenhen sín tí chjasin tjóá mé chjasin Jerusalén la ntaha itsjé chojni k'uikon kixin xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uúikon sín kuínki nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tjejótsjehe sín. Jehe sín k'uékinkáchréhe sín ch'ín Jesús tí kjuixín ch'án estado Galilea kixin mé ntiha kjuankíxixín sín k'uékjinkítsa sín ch'án. ⁵⁶ Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'ín José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuikjanchia ch'án tí cuérpoé tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkjich'éna ch'án. Ntá ijnko xro jíe k'uikjèxín ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuak'e tí tjan María Magdalena la ko í jnko tjan María tjejótxaxín sín ntoí chok'èxin tjen tòye.

Tí sín soldado k'uúyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchat'á t'etqan la ko tí sín fariseo sákjuítsjehe sín tí ch'ín Pilato ⁶³ la ntá ntáchro sín kixin:

—Ó xraxinkaonni kixin tió naxa kjuak'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án. ⁶⁴ Méxra tsétuènhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuènte ch'án la ntá chr'èxín tsochénsa sín chojni kixin ó xíxechón tí nkexro a, mé xíkaha sich'ia sín. La ntá tí xíkaha sich'e sín antsí má sich'ia sín que tí xrankíxixín —mé xíkaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jina tí tòye éxí tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxín tí tòye la kuítqhe sín tí sín soldado ntahó kixin ts'ayakonhen sín.

¹ Ntá ó k'uaánsinka tí yaon t'ok'éhe sín. Ntá chjino t'inkaséyan tí yaon xránkixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús. ² Ntá xrinahya kuínki nonte imá tjan kixin ijnko ángel kuénte Inchéni k'uínkajinxin nkaya nkajni la kjuíji ch'án tí tsixravá Jesús la kjuakjin ch'án tí xro a tjejkéxin tòye la ntá chrítaón tí xro a kjuák'ekjen ch'án. ³ Tí ángel la imá tjákiní tsjehe éxi ijnko xrohi la tí iké ch'án la imá tjóá tsjehe éxi chrinta. ⁴ Tí sín soldado mé k'uíkon sín xikaha la ntá síxranka sín chrakon sín la éxi tsík'en sín xikaha k'u'éjó sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nõna kixin xritjéyará tí nkexro Jesús mé tí nkexro tsíkjak'enkání ntacruz. ⁶ Kjánchó í kohya ch'án ntihi ó tsixechón ch'án inaá éxi chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sátjirá tjoka tjíchenkará tí sín k'uaájiko ch'án kixin: “Tí nkexro la ó tsixechón. Ó kuítónxin ch'án ntja sátsji ch'án estado Galilea. Ntiha ts'ikonrá ch'án”, mé xikaha tsochronkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsixravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. ⁹ Ntá xrinahya titáya k'uíkuén sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án. ¹⁰ La ntáchro ch'án kixin:

—Chrakonhyará sátjirá tjíchenkará tí sín kichó ni kixin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tíó sátsikji tí chojni chjin la nta iso tí sín soldado k'uaýakonhen tí tsixravá ch'ín Jesús mé sákjuí sín chjasin Jerusalén la chénka sín tí nchat'á t'etóan kaín tí nkehe tsikónhen tí k'u'éjó sín ntiha. ¹² Ntá tí sín nchat'a t'etóan kjuínixjehe sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chronkará kixin tí tie naxá tjejochrinrá ikui tí sín k'uék'ajiko tí nkexro Jesús, mé kueé sín cuerpo kuénte ch'án, ichrorá. ¹⁴ A ntá tí chróonohe tí ch'ín gobernador tíha la ntá jeheni tsonixjeheni ch'án kixin tsonínkakuanhyará ch'án —mé xikaha ichro tí sín nchat'á.

¹⁵ La ntá tí sín soldado k'uaýéhe sín tí chichaon la sákjuí sín la xikaha kjuích'e sín éxi k'uituenhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uetuenhen ch'án tí sín k'uék'ajiko ch'án tí xra sich'e sín (Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etóan ch'ín Jesús. ¹⁷ Ntá k'uíkon sín ch'ín Jesús la ntá kuínkáchónki sín ch'án kjónté iso sín naxá kjuenkayáxin á chaxín jehe ch'án ó nahí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajni la ko chjasintajni.

¹⁹ Méxra sátjirá kaín xín nación la tjácohérá chojni kixin tsitekaon sín tí janhan. Tíkítexínrá sín kjuachaxién ihnié It'eni la ko ihnié tí Xjeen la ko Nchakuén Dios. ²⁰ Tjácohérá sín kixin sinchexiteyá sín kaín xín nkehe kuétuqhanhá. Ijie la ó nohará kixin tsjak'é ts'ejokoará jnkochrín hasta tsjeje chjasintajni. Mé xikaha tsonhen. Amén —ichro ch'ín Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista
(Mt. 3.1-12; Lc. 3.1-9, 15-17; Jn. 1.19-28)

¹ Xikihí mé xrankíxixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsích'r'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuèntana tsitónxin ntja, kixin tsjasíyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntja tsixín Inchéni, taktijehérá ijnko ntja ntoí.”†

⁴ Tíha mé xitéyá ikui ch'ín Juan Bautista, mé xikaha kjuák'e ch'án nteje kuikite ch'án chojni. Kjuakohe ch'án chojni ntíha kixin chrókjuinkí sín tí nkehe tjenkayáxin sín chrókútohe sín tí ijje sín ntá chrókuite sín kixin xikaha mé chrókjuin ijje sín. ⁵ Itsjé chojni kuixín estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuikítexín sín ch'án ntarío Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxín nteje. ⁷ Mé kjuák'ekjakohe ch'án chojni ntáchro ch'án kixin:

—Iton tí janhan mé tsichréhe ijnko nkexro antsí má chóna kjuachaxín, a ntá janhan la kánhyó. Méxra chrókósuàna chrókjuasintanka tí correa tí tokaté ch'án. ⁸ Janhan mé intá ó kuikítexínrá. Ntá jehe ch'án mé tsikítexínrá ch'án tí Nchakuen Dios —ichro ch'ín Juan.

Ch'ín Juan kuikite ch'án tí ch'ín Jesús
(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexín ch'án chjasin Nazaret estado Galilea. Na ntá ch'ín Juan mé kuikítexín ch'án tí ntarío Jordán. ¹⁰ Tió k'uaxrjenkixin ch'ín Jesús tí intá, ntá xrinahya titàya k'uikuèn ch'án na ó xitjehe nkajní la ntá tí Nchakuen Dios éxí kontóá k'uínkajinxín ntíha ntá kjuák'e chrítaón kja ch'án.

¹¹ Ntá xrinahya kuínhin sín nixja Dios nkaya nkajní, ntáchro kixin:

—Janhan mé xjanna imá tjuaha tí jaha. Imá chàna kixin nchexitèyàna tí jaha —mé xikaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'án jie
(Mt. 4.1-11; Lc. 4.1-13)

¹² Ntá tí Nchakuen Dios mé sákjuiko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntíha mé k'uixin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankíxixín kjuako ch'án estado Galilea
(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntqechiso ntá ch'ín Jesús na mé sákjuí ch'án nó estado Galilea sákjuíkakohe ch'án tí sín ntíha tí tan jína kuènte Dios.

¹⁵ Ntá ntáchro ch'án kixin:

* 1:2 Malaquías 3.1 † 1:3 Isaías 40.3

—Ó kjuixraká tí yaon, la ó tsi tí kjuachaxin kuènte Dios ts'etqan ch'án. Chrókuítoghérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xíkaha kjuako ch'in Jesús.

Ch'in Jesús k'uíyehé noó tí sín itsé koche
(Mt. 4.18-22; Lc. 5.1-11)

¹⁶ Ch'in Jesús tjetji ch'án chrínta ntayaon Galilea ntá xrínahya k'uíkon ch'án tí ch'in Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínki ntá. ¹⁷ Ntá ntáchro tí ch'in Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxín kuítqhe sín tí nchísén k'uétséya sín koche ntá sákjuíko sín ch'án.

¹⁹ Ntá kjinhya kjuíji ch'in Jesús ntá k'uíkon ch'án tí yaá xjeen ch'in Zebedeo. Ijko mé it'in Jacobo. A ntá tí ijko la mé it'in Juan. Jehe sín la ko tí it'é sín tjejóxenhén sín tí ntabárcq tjejótonité sín tí nchísén tséya sín tí koche. ²⁰ Na ntá ch'in Jesús mé k'uíyehé tí jehe sín kixin kjaxin tsochréhe sín ch'án. A ntá tuénxín kuítqhe sín tí it'é sín ch'in Zebedeo kuítqeko ch'an tí ntabárcq la ko tí sín tjinkítsa ch'án ch'e xra. A ntá jehe sín sákjuíko sín ch'in Jesús.

Ijko chojni chóna ijko nchakuen tí jínahya
(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uíxenhén ch'in Jesús tí nínko Israel. Na ntá ntaha mé kjuankixin ch'án kjuako ch'án. ²² A ntá tí chojni síin ntiha mé chrakon sín kuínhin sín tí nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxí tí sín maestro tjako tí ley, ichro sín. ²³ Ntá tí nínko Israel chjasin ntiha itjen ijko chojni chóna ijko nchakuen tí jínahya k'uíyato ntáchro kixin:

²⁴ —¿Nkeuènté tjiaté tí jeheni kaín ní? Jaha Jesús kjuíxian Nazaret. ¿Á k'uinka kixin sinchek'it'íyanni? Janhan mé ó kjuátsqan tí jaha, la ko nòna kixin jaha tí nkexro tjóá kuènte Dios —mé xíkaha ichro tí nchakuen tí jínahya.

²⁵ Ntá ch'in Jesús mé k'uétuénhen tí nchakuen tí jínahya ntáchro ch'án kixin: —Tániá, t'axrjéxian tí jehe ch'án —mé xíkaha ichro ch'in Jesús.

²⁶ A ntá tí nchakuen tí jínahya mé kjuínchek'aniáte tí ch'in a la ko k'uíyatoxin tsen ntá k'uaxrjéxín tí ch'in a. ²⁷ A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe níxin? Jehe ch'án chóna kjuachaxin kixin t'etuenhen ch'án tí nchakuen tí jínahya la titekakonhen —mé xíkaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'in Jesús a.

Ch'in Jesús kjuínchekitqhe jína tí ich'ee tí ch'in Simón Pedro
(Mt. 8.14-15; Lc. 4.38-39)

²⁹ Ntá tí ch'in Jesús mé k'uaxrjéxín ch'án tí nínko, a ntá tuénxín sákjuíko ch'án ch'in Jacobo la ko ch'in Juan, sákjuí sín tqe ch'in Simón la ko ch'in Andrés. ³⁰ Ntá tí ich'ee ch'in Simón na tjetsínka tjan, níhi tjan kixin chóna tjan sóa. Ntá chénka sín tí ch'in Jesús. ³¹ Ntá kóchjina ch'án tí tjetsínka tjan ntá itsé ch'án tja tjan k'uínkatjen tjan. Ntá tuénxín kjuíinhin tjan tí sóa chóna tjan. Ntá kjuanjon tjan nkehe sine sín.

Ch'in Jesús kjuínchekitqhe jína nchónhya chojni níhi
(Mt. 8.16-17; Lc. 4.40-41)

³² A ntá tió kjuíataón yaon tió k'uúxin tie kuikõhe sín tí ch'in Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkotsé sín k'uúxintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhya clase chin la ko kuakitsje ch'án kaín tí nchakuen tí jínahya. Na í kjuanjonhya ch'án kjuachaxin kixin tsonixja tí nchakuen tí jínahya kixin ó kjuátsõan tíha nkexro tí jehe ch'án.

*Ch'in Jesús mé kjuako ch'án estado Galilea
(Lc. 4.42-44)*

³⁵ Ntá naxá sítie k'uàya ch'in Jesús k'uaxrjéxín ch'án tí chjasin a sákjuj ch'án nteje kixin ntiha níxjeéxín ch'án It'é ch'án tjen nkaya nkajní. ³⁶ Ntá ch'in Simón la ko tí sín xriko ch'án mé sákjuikjeyá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjeyá sín tí jaha —ichro sín.

³⁸ Ntá ntáchro ch'in Jesús kixin:

—Sátsjini ókjé chjasin chjinaxón kixin ntaha kjaxin tsjákoḥa sín tí tan jína, kixin xikaha mé tí k'uaxrjéxian chjasin ntiha.

³⁹ Ntá nkúxín estado Galilea sákjuí ch'án kuinkákjako ch'án jnkojnko njnko la ko kuakitsje ch'án tí nchakuen tí jínahya chóna sín.

*Ch'in Jesús kjuínchekitohe jína ijnko ch'in chóna chinlepra
(Mt. 8.1-4; Lc. 5.12-16)*

⁴⁰ Ntá kui ijnko ch'in chóna chinlepra kjuák'exín toch'in ch'án nkayakon ch'in Jesús ntá chrónóḥe ch'án ntáchro ch'án kixin:

—Tí tjinkávan jaha la jína chrókjuínchekitohéni jína —ichro ch'án.

⁴¹ Ntá ch'in Jesús na imá kuikonóḥe ch'án tí ch'in a na ntá kjuentoá tja ch'án kjuak'e tja ch'án chrítaón tí ch'in níhi a ntá ntáchro ch'án kixin:

—Méxra xikaha tjínkavan. Ntá jie sintakitõha jína —ichro ch'án.

⁴² A ntá xikaha ntáchro ch'án ntá tuénxín kjuin tí chinlepra ntá kuitõhe ch'án jína. ⁴³ Ntá k'uætuenhen ch'in Jesús tí ch'in a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákoḥé tí ch'in nchát'á kixin ó kjuinhan tí chinlepra la ko tjánjuan tí nkehe tsík'etõan ch'in Moisés[‡] kixin tsonoxén kaín xín chojni kixin ó kuitõha jína —ichro ch'án.

⁴⁵ A ntá tí ch'in tsíkitohe jína, a ntá sákjuí ch'án kjuankixin ch'án chénka ch'án kaín xín chojni kixin nkexri kuitõhe ch'án jína. Méxra xitjahya ts'ixenhen ch'in Jesús noxín njnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkúxín chjasin.

2

*Ch'in Jesús mé kjuínchekitohe jína ijnko chojni tsík'en toté
(Mt. 9.1-8; Lc. 5.17-26)*

¹ Ntá ó k'uátsínka iso yaon ntá ch'in Jesús mé xíkjan ch'án chjasin Capernaum. Ntá k'uúxikónohe chojni kixin ijnko nchia ntiha kjuák'e ch'án. ² Ntá tuénxín nchónhya chojni kóchjina ntá kjuachahya tí nchia k'uúixenhen sín la ko kjaxin kjuachahya tí ntója nchia chrók'uúxintankí sín. A ntá ch'in Jesús kjuako tí tan jína kuènte Dios. ³ Ntá kui noó sín tinkátsénkí sín ijnko ch'in tsík'en toté ch'án. ⁴ Kjánchó xitjahya kóchjina sín tí tjen ch'in Jesús kixin nchónhya chojni sín. La ntá k'ujit'õtjen sín tí chrítaón nchia a ntá k'óxrat'õ sín.

[‡] 1:44 Levítico 14.1-32

Na ntá ijnko hño kjuak'ete sín tí kania tjenkáya tí sñnníhi a ntá kjuinkajin sín ntoí tí tjen ch'ín Jesús a. ⁵ Tió k'uikon ch'ín Jesús tí nkehe kjuich'e sín ntá ó nohe ch'án kixin chaxin imá tinkáchónki sín tí jehe ch'án. Ntá nixjehe ch'án tí sñnníhi ntáche ch'án kixin:

—Xjeenni, ó kjuixin kjuinhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjeótjajin sín ntiha na ntá jehó sín mé kjo sín asén sín kixin: ⁷ “¿Nkekuènté xikaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chóna kjuachaxin tsjatsen ijie chojni”, mé xikaha ikjo sín asén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkekuènté kixin xikaha tjenkayáxinrá? ⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuinhan ch'án tí jie yámá ch'án, o á antsí xrahya chróntátjan ch'án kixin chrók'uinatjen ch'án chrókjuenájín ch'án kaníe ch'án ntá sáchrókjuí ch'án? ¹⁰ Méxra jie tsjákoqxian kixin tí Xjeen Dios K'óna Chojni mé ntihi chjasintajni chóna kjuachaxin tsjakjiinhan ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájian kaníaa na sátjia ntóa —ichro ch'án.

¹² A ntá tí sñnníhi na tuénxín k'uínkatjen ch'án kjuak'exín toté ch'án na kjuenájín ch'án kaníe ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín sín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uikonhyéni tí nkehe i —ichro sín.

*Ch'ín Jesús k'uíyehé ch'ín Leví
(Mt. 9.9-13; Lc. 5.27-32)*

¹³ A ntá chr'exín ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uikon ch'án tí ch'ín Leví xjeen ch'ín Alfeo tjetjajin ch'án tjenchekjènkj ch'án. Ntá ch'ín Jesús mé k'uíyehé ch'án, ntáchro ch'án kixin:

—Chrèhé tí janhan —ichro ch'án.

Ntá ch'ín Leví mé tuénxín k'uínkatjen ch'án chrèhe ch'án tí ch'ín Jesús.

¹⁵ A ntá ch'ín Jesús kjuak'e ch'án ntóa tí ch'ín Leví, la ntá kjuanjón sín nkehe sine ch'án la ko kjaxin k'uéjé nchónhya tí sín nchekjènkj la ko kjaxin í so chojni chóna jie. Mé kaín tí sín a mé tjeótjajin sín tjejóneko tí ch'ín Jesús la ko tí sín k'uájiko ch'án, kixin nchónhya chojni chrèhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uikon sín kixin ch'ín Jesús tjejóneko kaín tí sín nchekjènkj la ko tí í so sín chóna jie, a ntá ntáche sín tí sín k'uájiko ch'án kixin:

—¿Nkekuènté kixin tí maestro kuèntará neko ch'án la ko t'ikáo ch'án tí sín nchekjènkj la ko tí í so sín chóna jie? —ichro sín.

¹⁷ Na ntá ch'ín Jesús kuínhan ch'án nkehe tí tjo sín a. Ntá nixjehe ch'án tí sín a ntáchro ch'án kixin:

—Tí sín niehya t'ichjánxienhya sín nkexro sich'e xroan. Náhi. Jehó tí sín níhi mé t'ichjánxinhin sín nkexro sich'ehe sín xroan. Janhan na k'uinkahya ntihi kixin chrók'uíyaha chojni jina tjejó sín. Náhi. K'uinka kixin ts'íyaha chojni chóna jie —ichro ch'án.

*Tjanckankíhi sín tí ch'ín Jesús kixin á chrókjónehya sín tió tsonixjehe sín Dios
(Mt. 9.14-17; Lc. 5.33-39)*

18 Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xíkaha ts'áyéhe sín kjuaxróxin, ichro sín. A ntá kui iso chojni nixjehé sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jie, a ntá tí sín xrikoa la ine sín? —ichro sín.

19 Ntá kjuátehe ch'ín Jesús ntáchro ch'án kixin:

—¿Xá chrókjónehya tí chojni tsík'íyehé sín kóhjna ijnko kia tsotehe chojni tí naxa tjejóko sín tí nkexro tsotehe? Tí naxa tjen tí nkexro tsotehe la xitjahya kixin chrókjónehya sín. 20 A ntá itsi ijnko yaon itsi chojni sátsjiko sín tí ch'ín tsíkótehe, ntá tí yaon la chaxín sinehya sín.

21 Ninkexró chrókuak'eniéhe ijnko ka ó ntaxin it'ó ka nixin kixin ntá chrókjuixéhe tí ka nixin ntá antsí má chrók'uiuchje tí ka ntaxin a. 22 La ko kjaxin ninkexró chrókuikía xran vino nixin ijnko tjuaxran ó ntaxin; kixin tí xran vino nixin la chrókótséche tí tjuaxran ntaxin ntá chrók'uitjáyán tí xran la ko tí tjoa. Méxra tí xran vino nixin chrókuikía ijnko tjuaxran nixin —mé xíkaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigo ijnko yaon t'ok'éhe sín

(Mt. 12.1-8; Lc. 6.1-5)

23 Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uaútsínka sín ijnko nonte síin noatrigo. Na ntá tí sín k'uájiko ch'án kjuankixin sín ik'uín sín iso noatrigo. 24 Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuènté kixin tí sín xrikoa tjejóch'e sín xra ijie? Na mé kohya kjuachaxin tsónhen xra tí yaon t'ok'éheni —ichro sín.

25 Ntá kjuátehe ch'án ntáchro ch'án kixin:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? 26 A ntá jehe ch'án k'uíxennen ch'án ntóe Dios tió kjuák'e nchat'a Abiatar k'ueñoan, a ntá kjóne ch'án tí niqtja tsíkóyaon kjónté jehó tí sín nchat'a mé k'uechónta kjuachaxin sine sín la kjaxin chjéhe ch'án tí sín k'uájiko ch'án* —ichro ch'ín Jesús.

27 Kjaxin ntáchro ch'ín Jesús kixin:

—K'óna tí yaon ts'ok'éhe chojni kixin tí ch'jánxin sín, la jehya kixin chrókjuikosáyehe tí yaon a. 28 A ntá tí Xjeen Dios K'óna Chojni mé chóna kjuachaxin ts'etqan nkehe tsónhen tí yaon t'ok'éheni —ichro ch'án.

3

Ijnko chojni tsixámá tja

(Mt. 12.9-14; Lc. 6.6-11)

1 Ntá ch'ín Jesús k'uíxennen ch'án ijnko njnko Israel ínaá. Na mé ntiha tjen ijnko ch'ín tsixámá ijnko tja ch'án. 2 Na ntá kóhjna iso chojni tsáyehe sín ch'ín Jesús ts'íkon sín kixin á sinchekitóhe ch'án jína tí ch'ín tsixámá tja tí yaon t'ok'éhe sín kixin mé jína tsjanchia sín jie, ichro sín. 3 Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

4 A ntá kjuanchankíhi ch'ín Jesús tí sín síin ntiha kixin:

* 2:26 1 Samuel 21.1-6; Levítico 24.5-9

—¿Nkehe síin kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitoḥeni chojni jína ní o á chrók'óyánni chojni? —ichro ch'án.

A ntá jehe sín la tánkóá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóḥe sín chojni. Na ntá k'uetuenhen ch'án tí ch'ín a kixin:

—Tjéntóá tjá —ichro ch'án.

A ntá kjuéntóá ch'án tja ch'án la ó kuítóḥe tja ch'án jína. ⁶ Na ntá tí sín fariseo a k'uaxrjexín sín nínko sákjuí sín k'uíto sín tí sín kuènte ch'ín Herodes ntá kjuenkayáxinko kíchó sín kixin nkexrí chrók'óyán sín tí ch'ín Jesús.

Nchónhya chojni síin chrínta ntqyaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntqyaon a. A ntá nchónhya chojni kjuíjichréḥe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kuixín sín nó tóḥe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jié kjuasin ch'ín Jesús ntá kuichréḥe sín ch'án kixin chrók'uikon sín tíha kjaxin. ⁹ Ntá k'uetuenhen ch'án tí sín k'uájiko ch'án a kixin ntahó chrókjuak'echonhen sín ijnko ntabárcō. A ntá tí imá chrók'uixitja sín ch'án ntá chrók'uixenhen ch'án tí ntabárcō, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitoḥe ch'án jína, na ntá kaín xín tí sín níhi k'uixitja sín ch'án kixin tjínkaon sín chrókuákóxín sín ch'án. ¹¹ Kjaxin tí sín chónṭa nchakuen tí jínahya na mé tíó k'uikon sín tí ch'ín Jesús ntá k'uéjoxín sín toh'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án (Mt. 10.1-4; Lc. 6.12-16)

¹³ A ntá chr'éxín chriin ch'ín Jesús ijnko jna, a ntá ntiha k'uíyeḥe ch'án tí sín tjínkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitoḥe sín chojni níhi jína la ko tsakitsje sín nchakuen tí jínahya chónṭa chojni. ¹⁶ A ntá tí sín i mé tí teyó sín tsíkjeýá ch'án mé it'in sín xíkíhi: Simón na mé kjuínchek'in ch'án Pedro; ¹⁷ la ko Jacobo la ko tí kíchó ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuènte tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxín.

Ntáchro sín kixin ch'ín Jesús chónṭa kjuachaxin kuènte tí jínahya (Mt. 12.22-32; Lc. 11.14-23; 12.10)

Na ntá chr'éxín ch'ín Jesús la ko tí sín k'uájiko ch'án k'uixenhen sín ijnko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxá kjéhya ch'ín Jesús ntá ikuí sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako tí ley kuixín sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehē ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etōan ijnko nación tjanjōnko kichó la tsjachahya ts'etōan. ²⁵ La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín. ²⁶ A ntá tí chaxin ch'ín Tsochren jnkokónhya tjenkayáxin tjanjōnko kichó la ntá ts'itjáyān kjuachaxin kuēnte.

²⁷ 'Ninkexró tsjacha ts'ixenhen ntōe ijnko chojni jiehe kixin ts'axrjehe tí nkehe chóna ch'án. Náhi. T'ichjánxin saoxín sinchenteto ch'án tí ch'ín jiehe kixin jína tseéhe ch'án nkehe chóna tí ch'ín a.

²⁸ 'Ijnko nkehe chaxin tsotjōnkará kixin tió tsoxraxinkaon ijnko chojni tí jie chóna la ko tsochronóehē Dios la ntá tsjakjīnhin ch'án kaín tí jie la ko kaín tí nkehe jínahya tsíntáchro sín. ²⁹ A ntá tí nkexro ts'ántaxínjin tí Nchakuen Dios na mé xitjahya tsjīn tí jie na mé jnkochrixín tsochóna sín tí jie a —ichro ch'án.

³⁰ Mé xíkaha ichro ch'án kixin tí sín a tsíntáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'ín Jesús

(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uetuenhen sín ijnko chojni tsjik'íyehē ch'án. ³² A ntá tí sín tjejótxaxin tí tjen ch'ín Jesús ntiha chénka sín ch'án kixin:

—Íná la ko kichúa tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxaxin tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxi ijnko chojni t'enka nonte

(Mt. 13.1-9; Lc. 8.4-8)

¹ Ch'ín Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntábárcō tjenkátaón ntá k'uí't'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsíkójnkotsé mé kuítóhe sín chrínta ntayaon k'uejókinhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontee. ⁴ Mé xíkaha sákjuík'enka ch'án iso tí noatrigo a. Ntá iso noa la tsík'ánótjen ntja ntá kui koxroxē k'uúnkā va tí noa. ⁵ A ntá iso noa na mé k'uí'tji chrík'á xrō tí kohya itsjé nche ntá tjoka k'uayan kixin tjínhya chóna nche. ⁶ A ntá tió kjuítōn yaon la ntá tí ka la chján; la ko chónahya nuèe a ntá xámá. ⁷ A ntá í so noa kjuítsínkak'á tí siín kach'í la ntá tí kach'í k'uánkí la ntá tí noa í k'ónahya kixin sítja tí kach'í. ⁸ A ntá iso tí noa k'uí'tji nche jína la ntá k'uayan la ko k'uánkí nteto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

*Ch'in Jesús chronkaxín nkexrí t'axrjexín tí nkehe ntáchro ch'án
(Mt. 13.10-17; Lc. 8.9-10)*

¹⁰ A ntá chr'éxin, tió kuítóhe ch'in Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kíxin nkexrí t'axrjexín tí nkehe kjuíncheyóexin ch'án. ¹¹ Ntá ntáchro ch'án kíxin:

—A ntá jahará la Dios mé sintanohará tí nkehe tiénxínha chojni kuénte tí kjuachaxin kuénte Dios, a ntá tí sín titekakonhya la ó kjuíntayóaxuán kaín nkehe kuínhin sín. ¹² Kíxin kjónté ts'ikon sín la éxi k'uíkonhya sín, la ko kjónté tsinhin sín la tsienxínha sín kíxin ntá chrók'uixitoxínha tí tjenkayáxin sín a la ko chrókjuinhinha tí ijje sín* —ichro ch'án.

*Ch'in Jesús chrónkaxín nkexrí t'axrjexín tí nkexro sákjuík'enka
(Mt. 13.18-23; Lc. 8.11-15)*

¹³ Ntá ntáche ch'án sín kíxin:

—¿A kíénxinyará jahará nkexrí t'axrjexín tí nkehe kjuíntayóaxian ní? ¿A ntá nkexrí chrókiénxínrá tí í so nkehe naxa sintayóaxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuík'jako itén Dios. ¹⁵ A ntá iso chojni la éxi tí tje kjuítsínka ntja; kíxin kuínhin sín itén Dios, ntá chr'éxin ó kui ch'in Tsochren kjuínchek'itjáyan ch'án tí tan jina kuínhin sín. ¹⁶ A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuítekaon sín. ¹⁷ Kjánchó nínkahya chóna nuè, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kíxin tí itén Dios kuítekaon sín ntá tsítóhe sín tí tinkáchonki sín Dios. ¹⁸ A ntá í so chojni la éxi yóhe tí tje k'uínka chrík'á kach'í na mé kuínhin sín itén Dios ¹⁹ kjánchó tóxakonhen sín tí nkehe siín chjasintajni la ko tí nkehe tjete tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xikaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuinkáchonki sín la ntá xikaha jina ch'ehe sín Dios xra. La iso sín la éxi yóhe tí tje k'uínka tí nonte jina k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xikaha ichro ch'in Jesús.

*Ch'in Jesús mé kjuíncheyóexin éxi ijnko xrohi tjeche
(Lc. 8.16-18)*

²¹ Kjaxin ntáchro ch'in Jesús kíxin:

—¿A chrókujkaonni xrohi tjeche chrókjuak'emá chrínki ntacajón o chrínki cama? Kjá náhi. Tí xrohi la noi chrókjuak'e ts'inkaséyanxín. ²² Mé xikaha kaín tí nkehe tjejomá jie tsonoxín chr'éxin la ko kaín tí nkehe ninkexró noehya jie la tsonoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kíxin:

—Chrókjuenkayáxinrá jina tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá. ²⁵ A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'in Jesús mé kjuíncheyóexin ch'án éxi ijnko tje ts'ayan ts'ánki

* 4:12 Isaías 6.9-10

²⁶ Kǵaxin ntáchro ch'ín Jesús kixin:

—Tí kjuachaxin t'etǵan Dios tóyóǵe ijnko chojni sátsjik'enka nonte. ²⁷ Ntá sákjuik'ajua ch'án tí tie la ko k'uàya ch'án tí nchítjen. A ntá xikahó k'uátsinka iso yaon la ko iso tie, a ntá tí tje la k'uayan la k'uánkí. A ntá tí nkexro k'uenka la noehya ch'án nkexrí kónhen tíha. ²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuíntaa, a ntá chr'éxin icha tí noa tsjinjin; ²⁹ a ntá tío tsícha tí noa, a ntá tsakjinjin sín tí noa kixin ó kjuixraká tí yaon tsotjá sín.

Ch'ín Jesús kjuíncheyóexin ch'án éxí ijnko tje it'in mostaza

(Mt. 13.31-32; Lc. 13.18-19)

³⁰ Kǵaxin ntáchro ch'ín Jesús kixin:

—ǵNkehe chrókóyóǵe tí kjuachaxin t'etǵan Dios, nkehe chrókóyóexin tíha? ³¹ Mé éxí yóǵe tí tje it'in mostaza tsík'inka nonte. Tíha mé ijnko tje imá ntsí, a ntá tí í so tje síin chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kǵaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ok'éhe va chrínkí tí ts'van chaon tí nta.

Nkehe tí xra kjuích'e tí nkehe kjuíncheyóexin ch'ín Jesús

(Mt. 13.34-35)

³³ Mé xikaha ch'ín Jesús kjuakǵǵe ch'án tí jehe sín, kjuíncheyóexin ch'án nchónhya nkehe éxí tí nkehe a kixin chrókjuacha chrókiénxín sín tíha. ³⁴ Kaínxín nkehe kjuakǵǵe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjéxín kaín tí nkehe kjuíncheyóexin ch'án.

Ch'ín Jesús k'uetuénhen ch'án tí xríntǵ la ko tí ntǵ síchrica kixin ts'ixita

(Mt. 8.23-27; Lc. 8.22-25)

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntǵyaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naǵa tjenkáya ch'án tí ntabárcǵ la ko kǵaxin í so ntabárcǵ sákjuí koí. ³⁷ Ntá xrinahya tjiǵan chjéhe xríntǵ la ntá síchrica ntǵ t'ixenhen tí ntabárcǵ, ó mero tsokáón ntǵ tí ntabárcǵ. ³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcǵ a tjejkón ch'án ijnko ka. Na ntá kjuínchekjǵya sín ch'án ntáchro sín kixin:

—ǵMaestro! ǵÁ ntǵsán kixin ts'itǵáyanni, ts'aniánkíni ntǵ ní? —ichro sín.

³⁹ A ntá ch'ín Jesús k'uàya ch'án, k'uetuénhen ch'án tí xríntǵ la ko tí ntǵ kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xríntǵ la ko tí ntǵ k'uáxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—ǵNkekuénté kixin imá chrakonrá? ǵÁ naǵa tinkachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—ǵXá nkexro tíhi? Kjónté xríntǵ la ko ntǵyaon la mé kjuínchexiteyéhe ch'án —ichro sín.

5

*Ijnko chojni chóna nchónhya nchakuen tí jínahya nonte Gadara
(Mt. 8.28-34; Lc. 8.26-39)*

¹ Ntá tió k'uátòye sín tí ntayaon, a ntá kjuíji sín tí nonte Gadara. ² Ntá k'uínkajinxin ch'ín Jesús tí ntabáro a. Ntá xrínghya xeta ch'án injko ch'ín kujxin nó tsíkijxravá chojni mé chóna ch'án injko nchakuen tí jínahya. ³ Tí ch'ín a mé kjuák'e ch'án tí tsíkijxravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchrítton ch'án kjuínchekuen ch'án tí cadena. Kohya ninkexró tjacha ts'etuenhen tí jehe ch'án. ⁵ K'uék'aji ch'án nchakotjin la ko tie t'iyato ch'án nó jna la ko tí tsíkijxravá chojni la ko chjéhe asén ch'án xro. ⁶ Na ntá k'uíkon ch'án kixin kui ch'ín Jesús kjónté ikjín la kuínká ch'án kjuíji ch'án kjuák'exín toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuénté tjiaté jaha tí jeheni, jaha Jesús Xjeen Dios tjen nkaya nkajni? Dios nchenoheni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsintáchro ch'ín Jesús kixin:
—Jaha nchakuen tí jínahya, títòhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:
—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:
—Legión mé it'inni kixin nchónhyani —ichro ch'án.

¹⁰ Ntá imá chrónóhe ch'án tí ch'ín Jesús kixin tsochr'ánhya ch'án ókjé tí nchakuen tí jínahya. ¹¹ Na ntá siín nchónhya cochíno xrine va chjinxón tí jna ntiha. ¹² A ntá chrónòà tí nchakuen tí jínahya ntáchro kixin:

—Tétuénhenni sátsjini tí siín tí cochíno, títòhé ts'ixenhenni tí jehe va —ichro tí nchakuen tí jínahya a.

¹³ Ntá ch'ín Jesús mé kjuanjón ch'án kjuachaxin. Ntá kaín xín tí nchakuen tí jínahya a mé k'uaxrxjén tí ch'ín a sákjuj kjuik'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxin va ntiha kjuítsinkayá va tsáka ntá kjuítsinkankí va ntayaon ntá kjuínhin va nta.

¹⁴ Na ntá tí chojni t'ayakonhen tí cochíno a na mé kuínká sín kixin chrakon sín na ntá sákjuj chrónka sín chjasén sín la ko nontee chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchóna tí nchónhya nchakuen tí jínahya senó la ójina tjen ch'án tjetjaxin ch'án tjenkáya ch'án iké ch'án, na ntá chrakon sín. ¹⁶ A ntá tí sín tsík'íkon mé chrónka sín nkexrí k'uék'aji tí ch'ín k'uéchóna tí nchakuen tí jínahya la ko nkexrí kónhen tí cochíno a. ¹⁷ Ntá kjuankíxin sín chrónóhe sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabáro na ntá tí ch'ín k'uéchóna nchakuen tí jínahya na mé chrónòà ch'án kixin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjónhya ch'án kjuachaxin sátsjiko sín ch'án. Náhí. K'uetóan ch'án kixin:

—Sátjia ntóa tjičenka tí sín naxa kjéhya tí jaha kixin nkexrí kaín tí kjuaxroan jíé kjuasin Dios kjuínchekitòha jina kuíkonóaha ch'án tí jaha —ichro ch'án.

²⁰ Na ntá tí ch'ín a sákjuj ch'án kjuankíxin chrónka ch'án kaín tí chjasin kuénte Decápolis kixin nkexrí kaín tí nkehe kjuích'e ch'ín Jesús kjuínchekitòhe ch'án jina. A ntá kaín tí sín kuínhin na chrakon sín.

*Tí xjeen ch'in Jairo la ko tí tjan kuákóxin iké ch'in Jesús
(Mt. 9.18-26; Lc. 8.40-56)*

²¹ Ntá tió xíkjankao ch'in Jesús tí ntabárcq tohe tí ntayaon inaá ntá kóchjina nchónhya chojni ntá ntaó chrínta nta kuitóhe ch'án inaá. ²² Na ntá ikui ijnko ch'in t'etqan kuènta njnko mé it'in ch'án Jairo. A ntá tió k'uikon ch'án kixin itjen ch'in Jesús ntá kjuák'exín toch'in ch'án chrínkí toté ch'in Jesús a ²³ imá chrónóhe ch'án kixin:

—Tí ijnko xjanna chjin ó tjet'en xjan. Xrjanógha chrókjuini chrókjuak'éttja itjá chrítaón kja xjan ntá chrókuitóhe xjan jina —ichro ch'án.

²⁴ Ntá ch'in Jesús sákjuiko tí ch'in a. Na nchónhya chojni chréhe sín tinkák'ixitja sín ch'án inaá. ²⁵ A ntá kjaxin tjenákjan sín ijnko chojni chjin níhi tjan, ó chóna teyó nánó sítji tjan jni. ²⁶ Imá tjote tjan kixin nchónhya chojni kjuanjon xroan kónhen tjan na ó kjuixin kjuéhe tjan kaín xín nkehe k'uéchóna tjan. Ó jehí titóhehya tjan jina la íchá ntsi tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'in Jesús ntá kui tjan kjuák'enkákjan tí chojni kóchjina nóton ch'in Jesús ntá kuákóxin tjan tí ké ch'án, ²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuitóhe tjan jina, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuitóhe tjan jina ti chin k'uéchóna tjan. ³⁰ Ntá ch'in Jesús na ó kónohe ch'án kixin kjuachaxién ch'án mé kuitóexín ijnko chojni jina ntá kuinkátjía ch'án kjuanchankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

³¹ Ntá kjuátehe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankía kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuixín kixin tsonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxranka tjan ó nohe tjan kixin ó kuitóhe tjan jina ntá xrakoa tjan kjuák'exín toch'in tjan nkayakon ch'in Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'in Jesús kixin:

—Xjeenni, kaín asán kuinkachónkia tí janhan ntá kuitógha jina. Ijie la kjuaxróxin sátsjia ntqá la ó kuitógha jina a —ichro ch'án.

³⁵ Na ntá naxa tjenixja ch'án ntá ó kui chojni kuixín sín ntqé tí ch'in t'etqan tí njnko. Ntá chénka sín ch'án kixin:

—Xjaan na ó kjuixin k'uén. ¿Nkekuènté naxa chjehé xra tí Maestro a? —ichro sín.

³⁶ Ntá ch'in Jesús na ántosén ch'án tí chrónka sín ntá nixjehé ch'án tí ch'in t'etqan tí njnko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'in Pedro la ko ch'in Jacobo la ko ch'in Juan mé kíchó ch'in Jacobo, sátsji sín. ³⁸ Na ntá tió kjuíji sín tí ntqé tí ch'in t'etqan tí njnko na k'uikon sín kixin imá sítjité sín tsjankámá sín tí xjan a. ³⁹ Ntá k'uixenhen ch'in Jesús nchia kjuanchankí ch'án kixin:

—¿Nkekuènté ánta tjasitérá tsjankámárá tí xjan a? Tí xjan na tsík'enhya xjan na tjejua xjan —ichro ch'án.

⁴⁰ A ntá kjuanoá sín ch'án. Ntá k'uetoqan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uixenko

sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuñhan kixin t'aya.

⁴² A ntá tí xjan a ó chóna tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uikon sín xikaha.

⁴³ Ntá fuerte k'uetōan ch'ín Jesús kixin chróchenkaha sín ninkexró. La kjaxin k'uetōan ch'án kixin tsjanjon sín nkehe sine tjan.

6

Ch'ín Jesús kjuák'e ch'án chjasin Nazaret

(Mt. 13.53-58; Lc. 4.16-30)

¹ A ntá chr'éxin k'uaxrjexín ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkixin ch'án. ² Na ntá tió kui tí yaon t'ok'éhe sín ntá kjuankixin ch'án kjuakoxin ch'án tí ninko ntiha. Na ntá nchónha chojni kuínhin sín ntá chrakon sín ntáchro sín kixin:

—¿Nketí tsíxraokhe tí ch'ín i kaín tíhi? ¿Nketí kuixín tí kjuaxrexinkaon chóna ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxra tahya sín kuentá nkerí ch'e ch'án. ⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasin ch'án la ko kaín tí sín kjéhya ch'án la ko tí sín ntōe ch'án na mé tjikosáyeheya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitōhe ch'án sín jína. ⁶ Ntá chrakon ch'án kixin xikaha kuitekakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

Ch'ín Jesús mé ichr'án tí teyó sín kixin sátsji sín tsjikjako sín itén Dios

(Mt. 10.5-15; Lc. 9.1-6)

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankixin k'uetuñhen ch'án kixin yóyo yóyo sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni. ⁸ La ko k'uetōan ch'án kixin ninkehó tsjikohya sín kuènte ntia. Jehó tí nta tjixin sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tōkatē ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kixin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitōhará. A ntá tsjixinjian tí xra ntá sátsjixinrá ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókuákohérá sín na ntá t'axrjéxinrá tí chjasin a ntá ts'oxénjinrá tí nche chóna tōtárá kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitōexín ijje chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakōhe sín tí chojni a kixin mé chrókjuitōxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuítōhe sín jína.

Ik'uén ch'in Juan Bautista
(Mt. 14.1-12; Lc. 9.7-9)

¹⁴ Na ntá tí ch'in rey Herodes mé kuínhin ch'án nkehe tí kjuaxroan kjuasin ch'in Jesús. Na ntáchro ch'in Herodes kixin:

—Kjá tí ch'in Juan Bautista mé ó tsíxechón ch'án inaá kixin xikaha tí kjuachaxin chóna tí ch'in a —ichro ch'in Herodes a.

¹⁵ A ntá iso sín ntáchro sín kixin:

—Kjá ch'in Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'in Herodes tíha ntá ntáchro ch'án kixin:

—Kjá ó jehe tí ch'in Juan tí kuétōan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'in Herodes mé tsík'etōan ch'án kixin tsontetoxín tí ch'in Juan cadena tsjak'echjina ch'án kixin xikaha tsíkjanhia tí tjan Herodías. A ntá tí tjan Herodías k'uéchjién tí ch'in Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. ¹⁸ A ntá tí ch'in Juan tsintáche ch'án tí ch'in Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'in Juan ntá chrók'óyán tjan ch'án, kjánchó xitjahya ²⁰ kixin tí ch'in Herodes mé chrakonhen ch'án tí ch'in Juan kixin ó nohe ch'án kixin tí ch'in a mé ijnko nkexro jína la ko tjóá asén la méxra kuitōehya ch'án kixin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'in Juan. ²¹ A ntá tí tjan Herodías mé kjuacha tjan tí yaon kia tsikjitoxinhin nánó tí ch'in Herodes a kixin tsík'íyehé ch'án tí síxreé la ko tí sín k'uetuēnhen tí sín soldado la ko tí sín t'etōan estado Galilea kixin itsi sín ntōe ch'án kixin síin kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'in Herodes la ko kaín tí sín tjejóneko ch'án ntiha. Na ntá tí ch'in rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanhia tjan kjónté jnkosiné tí chjasin t'etōan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'in Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itjia tjanhia tí kja tí ch'in Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjan tí ch'in rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'in Juan Bautista tsochjehéni —ichro tjan.

²⁶ Na ntá tí ch'in rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehé ch'án, la ntá xitjahya tsontáchro ch'án “Náhi” tí nkehe kjuanchia tjan. ²⁷ Na ntá tuénxín k'uetuēnhen ch'án ijnko ch'in soldado kixin tsjikao ch'án tí kja ch'in Juan a.

²⁸ Ntá tí ch'in soldado mé sákjuí ntōechiso, ntá kóchrínjin ch'án ikja tí ch'in

Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan iné tjan.

²⁹ Na ntá kuínhin kaín tí sín k'u'ék'ajiko ch'ín Juan kíxin xíkaha tsíkónhen. Na ntá sákjuikakja sín tí cuérpoe ch'án ntá kjuikáo sín ntá sákjuikjává sín.

Ch'ín Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'u'ájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuích'e sín na ko nkexrí kjuako sín. ³¹ A ntá ntáchro ch'ín Jesús kíxin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xíkaha ntáchro ch'án kíxin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'u'ájiko ch'án jehó sín k'uit'ótjen sín ijnko ntabárcó sákjuí sín ijnko nonte jehó tjen. ³³ Na ntá itsjé chojni k'uikón sín kíxin sákjuí sín la ko kjuátsóan sín kíxin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajinxín ch'án tí ntabárcó, a ntá k'uikón ch'án kíxin nchónhya chojni síin ntiha ntá kuikonóehe ch'án tí jehe sín na mé éxi yóhe kolélo tjejó sín chóntahya va nkexro ts'ayakonhen va. Ntá kjuankíxin ch'án kjuakóhe ch'án sín nchónhya nkehe a. ³⁵ Na ntá ó kóntó na ntá tí sín k'u'ájiko ch'ín Jesús a mé kóchjina sín tí tjen ch'án ntáchro sín kíxin:

—Ntá ó kóntó la kohya ninkexró tjejó ntihi ³⁶ na ntá jaha chrókuióhé sín kíxin sátsji sín tí chjasin chjinaxón a tsjik'ena sín nkehe kíxin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kíxin:

—Chjehé sín nkehe sine sín —ichro ch'án.

Ntá kjuátehe sín ntáchro sín kíxin:

—¿Á tsjik'enani iyó ciento denario niotja tsochjéheni sin sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kíxin:

—¿Nkekjaín niotja chontará? Sátjitsjehérá —ichro ch'án.

Ntá sákjuitsjehe sín na ntá chrónka sín kíxin:

—In'ó niotja la ko yaá koche mé síin —ichro sín.

³⁹ Na ntá k'uetóan ch'án kíxin kaín xín sín chrók'uixtjaxín sín tí chrítaón tí ka yoa a. ⁴⁰ Na ntá xíkaha kójnkojié sín ciento sín la ko cincuenta sín k'uixtjaxín sín. ⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá kontá ch'án nkajní ntá kjuanchia ch'án kjuasáyé Dios. Na ntá kóchrít'ó ch'án tot'ó tí niotja a ntá chjéhe ch'án tí sín k'u'ájiko ch'án kíxin ts'óxikayéhe sín sine tí sín síin a la ko kjaxin kóchrít'ó ch'án tí yaá koche ntá k'óxikayéhe sín kíxin sine sín kaín sín. ⁴² Ntá kaín xín sín kjóne sín kókjehe sín. ⁴³ A ntá kjuixin kjóne sín ntá tí sín k'u'ájiko ch'ín Jesús na mé kjuínchekaón sín teyó ntaxra tot'ó tí niotja la ko tí koche tsíxehe. ⁴⁴ A ntá tí sín kjóne na mé in'ó mil chojni ntoá.

Ch'ín Jesús mé tjitaón ntayaon
(Mt. 14.22-27; Jn. 6.16-21)

⁴⁵ A ntá tuénxín k'uetuénhen ch'ín Jesús tí sín k'u'ájiko ch'án kíxin ts'it'ótjen sín tí ntabárcó a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehe ch'án kaín tí

sín siín a. ⁴⁶ Kjuixin nixjehe ch'án sín na ntá jehe ch'án chr'in ch'án ijnko jnā tsonixjeexin ch'án Dios. ⁴⁷ A ntá tió k'uixin tie ntá tí ntabárcō na mé ó kjuíji jnkōsiné ntayaon, a ntá jehe ch'án jehó ch'án kjuíji ch'án chr'inta ntayaon. ⁴⁸ Ntá kotohe ch'án k'uikon ch'án kixin imá xrā tjiko sín tí ntabárcō a kixin tí xr'into imá ch'jehe. Nantóye a mé sákjuichréhe ch'án sín. Totó ch'án mé sákjuítōnxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjuí ch'án. ⁴⁹ A ntá tí k'uikon sín kjuítaon ch'án ntā, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uikon sín ch'án la chrakon sín. Na ntá jehe ch'án mé tuénxín nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcō tí tjejó sín, a ntá tí xr'into la ó k'uixratá. Ntá imá chrakon sín kixin xikaha kónhen ⁵² kixin kiexínhya sín tí kjuaxroan kjuich'e ch'án kuente tí niotja kixin naxā kénhya asén sín kuinkáchónki sín ch'án.

*Ch'in Jesús mé kjuínchekitōhe jina tí chojni níhi tí nonte Genesaret
(Mt. 14.34-36)*

⁵³ Ntá tió k'uátóye sín tí ntayaon ntá kjuíji sín tí nonte Genesaret ntá kjuak'echroé sín tí ntabárcō a tí chr'inta ntā. ⁵⁴ Na ntá tió k'uinkajinxin sín tí ntabárcō, a ntá tí sín siín ntíha tjoka kjuátsoan sín tí ch'in Jesús. ⁵⁵ Ntá sákjuí sín nkuixin chjinaxón ntíha kjuankixin sín kuikao sín tí s'inníhi tinkátsénki sín kuikao sín tí tjen ch'in Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí s'inníhi a chr'inta ntā. Na ntá chrónóhehe sín tí ch'in Jesús kixin kjónté chr'inta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jina.

7

*Tí nkehe nchekjita asén chojni
(Mt. 15.1-20)*

¹ A ntá iso sín fariseo la ko iso tí sín tjako tí ley kuixin sín chjasin Jerusalén ntá kóchjinehe sín tí ch'in Jesús. ² Tí sín a, tió k'uikon sín kixin iso tí sín k'uájiko ch'in Jesús mé k'óntihya sín tja sín na kjónté ine sín mé t'axrxéjin kixin kjuínchexiteyáhya sín tí ley, ntá kjonta tí sín a. ³ (Mé xikaha kjuich'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'ontó itja sín ntá sine sín. ⁴ Na ko tí tsokjanxin sín ntasin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjonemá sín tí vaso t'iyá sín nkehe la ko tí nchésen la ko tí ch'ijányan nkehe ne sín la ko tí kámé sín nchetjóá sín.) ⁵ Méxrā tí sín fariseo la ko tí sín maestro tjako tí ley a na mé kjuanchankíhi sín tí ch'in Jesús kixin:

—¿Nkeuénté kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjó ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátēhe ch'in Jesús ntáchro ch'án kixin:

—Ntoá tsíchrónka ch'in Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xíkíhi tsíkjin ch'án ntáchro ch'án kixin: Tí chojni tí chjasin í ir'va ó xraxinkakonxín sín tí janhan, a ntá tí asén sín ikjín kuítóhe sín tí janhan

⁷ Méxrā ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etɔan chojni ó.*

Mé xikaha ichro itén Dios. ⁸ Ntá jahará kuítóherá tí nkehe tsík'etɔan Dios ntá chréhérá tí nkehe ch'e chojni, a la mé tjonemará nchésen, la ko tí vaso t'íará nkehe, la ko kjaxin í so nkehe yóhɛ tinkachónkirá —ichro ch'án.

⁹ Kjaxin ntácho ch'án kixin:

—Jahará chréhérá tí nkehe k'uékjich'e chojni ntá xikaha títóherá ntáha tí nkehe tsík'etɔan Dios. ¹⁰ Tsintácho ch'in Moisés kixin: “Tsochonteherá kjuasáyé it'árá la ko inará”, la ko “A ntá tí nkexro t'ántaxínhin it'é o iné la chrók'óyán sín.”† ¹¹ A ntá jahará ntáchrórá kixin ó nchoxon kixin ijnko nkexro tsochénka it'é la ko iné kixin: “It'éni, Inéni, chrokjuahya tsjinkitsani tí jaha kixin kaín tí nkehe chóntani mé k'óna Corbán” (mé t'axrjexín kixin kaín tí chichaon k'uáyéhe Dios). ¹² A ntá xikaha jnkójín nkexro tsonotácho ch'án tíhi ntá jahará tsonotáchrórá kixin í t'ichjánxinhya tsjinkitsa ch'án tí it'é ch'án la ko tí iné ch'án. ¹³ A ntá tí xikaha la títóherá tí nkehe tsík'etɔan Dios éxí sinkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhɛ tíha —ichro ch'in Jesús.

¹⁴ Na ntá k'uíyehɛ ch'in Jesús tí chojni inaá ntácho ch'án kixin:

—Tinhínra kaín rá tí nkehe ntáxrjan la ko tiénxinrá. ¹⁵ Tí nkehe ine chojni la jehya jie tíha. Tí nkehe t'axrjenixin asén chojni mé jie tíha. ¹⁶ Tí tjinkáonrá chrókuinhínra la chrókuinhínra —ichro ch'án.

¹⁷ A ntá tió kuítóhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntácho ch'in Jesús kixin:

—¿Á kjaxinrá tiénxinhyará? ¿Á noahyará kixin tí nkehe ineni na jehya jie ¹⁹ kixin jehya asénni sátsji? Tí nkehe ineni na sátsji nkaya tseeni na ko xik'axrje inaá —ichro ch'án.

Mé t'axrjexín kixin tí nkehe sineni la jehya jie.

²⁰ Ntá ntácho ch'in Jesús kixin:

—A ntá tí nkehe t'axrjenixin chojni na mé jie táha. ²¹ Nkaya asánra mé t'axrjenixin tí jínahya tjenkayáxinrá, la ko tí tjachehe kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá ²² la ko tí chrókuđerá, la ko tí tjaké asánra tí nkehe chóna ókjé sín, la ko tí jínahya ch'ehérá kichuárá, la ko tí kjuach'ia xríkoará la ko tí jínahya tjenkayáxinrá, la ko tí chjínqínhanrá, la ko tí ch'énará kjuach'ia, la ko tí kjuahnke chontará, na ko tí chontahyará kjuaxrexinkaon jina. ²³ Kaín tí nkehe jínahya a mé t'axrjenixin chojni, la mé tjasixín sín jie.

Jjnko tjan tsíkjin kjin mé kuítekaon tjan tí ch'in Jesús

(Mt. 15.21-28)

²⁴ Ntá ch'in Jesús mé sákjuixin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakonhya ch'án kixin chróónohe chojni kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko iné ijnko tjan tjarisoá chóna ijnko nchakuen tí jínahya mé kuínhin nkehe tí xrá ch'e ch'in Jesús kixin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'in Jesús. ²⁶ Na mé jehe tjan tsíkjin kjin, na mé tsíkjin tjan nó nación Sirofénicia. Na ntá jehe tjan a mé kui tjan chrónóhɛ tjan tí ch'in Jesús kixin chrókuakitsje ch'án tí nchakuen tí jínahya chóna xjeen tjan.

* 7:7 Isaías 29.13 † 7:10 Éxodo 20.12; 21.17

²⁷ Ntá ntáchro ch'in Jesús kjuátehe ch'án kixin:

—Títóhé senó chrókjóne tí xjan. Jehya tí jína chrókuakítsjahá xjan tí niotja ntá chrótjahá konjá chrókjóne va —ichro ch'án.

²⁸ Ntá jehe tjan kjuátehe tjan ntáchro tjan kixin:

—Chaxín xíkaha, Ìnchéni. Kjánchó kjónté tí konjá tjejoyánkí mesa ine tí tot'ò niotja tóxènjín tí chánjan —ichro tjan.

²⁹ Na ntá ntáchro ch'in Jesús kixin:

—Táha la chaxín ntoá ntáchrúa. Sátjia kixin tí nchákuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntøe tjan, na ntá k'uúikon tjan kixin tí xjeen tjan na mé ó ntoá tjetsínkaták'á xjan tí cama kixin ó tsík'axrje tí nchákuen tí jínahya a.

Ch'in Jesús mé kjuínchekitøhe jína ijnko ch'in tienhya la ko nixjahya

³¹ Ntá ch'in Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea. ³² Ntá kuíkao sín ijnko ch'in tienhya na ko ntoáhya nixja ch'án. Ntá chrónøhehe sín tí ch'in Jesús a kixin tsjak'etja tja ch'án chrítaón kja tí ch'in a kixin tsitøhe ch'án jína. ³³ Na ntá ch'in Jesús k'uaxrjentako ch'án tí ch'in tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhén ch'in Jesús tatsjon tí ch'in tienhya. La ko kjaxin tí dedo tja ch'án mé kuíkite ch'án ntatø ch'án ntá kjuínchekákóxín ch'án nejen tí ch'in nixjahya a. ³⁴ Ntá konta ch'án nkajní k'uáváxin ch'án na ntá nixjehe ch'án tí ch'in tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitjehe!

³⁵ Na ntá tuénxín xítjehe tatsjon tí ch'in tienhya ntá kuínhin ch'án la ko kuitøhe jína tí nejen ch'án, ntá jína nixja ch'án. ³⁶ Ntá ch'in Jesús k'uetøan ch'án kixin ninkexró tsochenkahya sín. Ntá kjónté imá k'uetøan ch'án ntá ántosén sín kjónté íchá xrichronka sín. ³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

Ch'in Jesús mé kjuanjon nkehe kjóne noó mil chojni (Mt. 15.32-39)

¹ A ntá ijnko yaon nchónhya chojni k'uixikóchjina inaá. A ntá chóntahya sín nkehe sine sín. Na ntá ch'in Jesús mé k'uíyøhe ch'án tí sín k'uájiko ch'án, a ntá ntáchro ch'án kixin:

² —Imá tikonóghá kaín tí sín i kixin ó ní yaon tjékian sín ntihi ntá chóntahya sín nkehe sine sín. ³ Ntá chrókuétuanyhya sín sáchrókjui sín ntøe sín tí naxá nehya sín kixin ntjá ó chrókótienxin sín kixin iso sín la imá kjín tsíkjiixin sín —ichro ch'in Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'in Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uɛtuɛnhen ch'án kaín xín sín kixin ts'ixitjaxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'o ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxikayehe sín tsakja kaín xín tí sín siín a. ⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uɛtoan ch'án ts'óxikayehe sín kjaxin. ⁸ Na mé kaín xín sín kjóne sín na kókjehe sín. Ntá chr'éxin naxa kjuincheaon sín yato ntaxra tí tot'o tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé nixjehe ch'án sín sákjuí sín ¹⁰ ntá tuénxin jehe ch'án la ko tí sín k'uájiko ch'án na mé k'uit'ótjen sín tí ntabáro a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jié
(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jié kuente nkaya nkajni kixin tjinkaon sín chrókjuachaxin sín ch'án. ¹² A ntá ch'ín Jesús na mé k'uáváxin ch'án ikjin kjanxin asén ch'án ntá ntáchro ch'án kixin:

—¿Nkekuénté kixin tí chojni i na mé tjanchia sín ijnko kjuaxroan jié? Ijie la ninkehó kjuaxroan tsjákoxinhya —ichro ch'án.

¹³ Na ntá kuitóhe ch'án tí sín a, ntá xík'it'ótjen ch'án tí ntabáro ntá sákjuí ch'án í jnko tóhe ntayaoon inaá.

Tí xroan nchek'ánki tí niotjé tí sín fariseo
(Mt. 16.5-12)

¹⁴ Ntá k'uitjáyenhen sín tsíkjikohya sín nkehe sine sín. Jehó jnkokoá niotja chóna sín nkaxenhen tí ntabáro a. ¹⁵ Ntá ch'ín Jesús k'uɛtuɛnhen ch'án tí jehe sín kixin:

—Chrókóxakonhanrá kixin tí xroan nchek'ánki niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xíkaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkekuénté tjórá kixin chontahyará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'va tí n'ó niotja kjóne in'ó mil chojni na ¿nkekjaín ntaxra tí tot'o niotja naxa kjuenájinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'va tí yato niotja kjóne noó mil chojni na ¿nkekjaín ntaxra tí tot'o niotja kjuenájinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jina ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóhehe sín tí ch'ín Jesús kixin chrókjuinchekitóhe ch'án

jína tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxí nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuítóhe ch'án jína la jína t'ikon ch'án kaín nkehe. ²⁶ Na ntá ch'ín Jesús mé k'uetuhenen ch'án tí ch'ín k'uék'ikonhya kixin sátsji ch'án ntqé ch'án ntáchro ch'án kixin:

—Chrók'uixenhya chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuatqéhe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uetqan ch'ín Jesús kixin tsochenkahya sín ninkexró.

Ch'ín Jesús chrónka ch'án kixin ts'en ch'án

(Mt. 16.21-28; Lc. 9.22-27)

³¹ Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuénte nínko la ko tí sín t'etqan kuénte tí sín nchat'á la ko tí sín maestro tjako tí ley. A ntá tí sín a mé ts'óyan sín ch'án. Kjánchó tí nixin yaon na ó tsoxechón ch'án inaá. ³² Kaín tihá mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntáchro ch'án kixin:

—¡Sátjia ntáha, Satanás! Jaha la tjenkayáxinhya éxí tjenkayáxin Dios. Náhi. Jaha tjenkayáxin éxí tjenkayáxin chojni ó —ichro ch'án.

³⁴ Ntá ch'ín Jesús mé k'uíyehé ch'án tí sín k'uájiko ch'án la ko tí sín tsíkóchjina a. Ntá ntáchro ch'án kixin:

—Tí jnkójnra tjináonra tsochréhéra tí janhan na t'ichjánxin tsjtohéra kaín tí nkehe tjaké asanra na ntá tsamará tí ntacruz kuéntará, a ntá tsochréhéra tí janhan. ³⁵ A ntá tí nkexro tjinkaon jehó sinchekaá asén mé ts'itjayan. A ntá tí nkexro sinche'itjayanxin asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjua cha ijnko chojni chróchónka kaín nkehe síin chjasintajni, a ntá kjuachón chrókjuechek'itjayan? ³⁷ ¿Nkehe chrókjuek'itjayan chojni kixin chróchónka tí kjuachón? ³⁸ A ntá jnkójn nkexro tsoxuéhe kixin tinkáchónki tí janhan la ko

tí tan kuèntana nkayakon tí chojni jínahya chón̄ta jie la kjaxin tí Xjeen Dios K'óna Chojni tsosuehe ch'án tsonáchro ch'án kixin chóxin ch'án tí jehe sín tió tsokjan ch'án tsikao ch'án tí kjuachaxin jie kuènte It'é la ko tsikao tí sín ángel.

9

¹ Na ko kjaxin chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjjará itsi tí kjuachaxin ts'etqan Dios —ichro ch'án.

Ch'ín Jesús mé k'uixitoxin nkexrí tsjehe ch'án
(Mt. 17.1-13; Lc. 9.28-36)

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuí sín jehó sín ijnko jna noi. Ntá ntiha mé xrinahya k'uixitoxin ókij nkexrí tsjehe ch'án k'uikon tí jehe sín. ³ A ntá iké ch'án tsík'óna imá tjákiní la ko imá tjóá éxí chrinta tsjehe, a ntá ntihi chjasintajni kohya ninkexró chrókjuen tí ka chrókuitohe imá tjóá xikaha. ⁴ Na ntá titáya k'uikuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jína kixin tjejóni ntihi. Chrókjuich'énani iní nchia la mé ijnko kuèntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrinahya ikui ijnko tjuí kjuák'etja chrítaón kaín xín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáchro kixin:

—Tí nkexro i mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxin sín tí jna ntá k'uetoan ch'ín Jesús kixin tsochenkahya sín ninkexró tí nkehe k'uikon sín hasta tsoxechónjan tí Xjeen Dios K'óna Chojni. ¹⁰ Ntá ninkexró chenkahya sín tí nkehe k'uikon sín. Na ntá jehó sín mé tjejótjo sín kixin nkehe t'axrxjén tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntáchro sín kixin:

—¿Nkekuènte kixin ntáchro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntáchro ch'ín Jesús kixin:

—Chaxín saoxín itsi ch'ín Elías la ntá tsjasiyóxin ch'án kaín xín nkehe. ¿A ntá nkehe ntáchro xroon itén Dios kixin nkehe tsonhen tí Xjeen Dios K'óna Chojni? Na mé ntáchro kixin t'ichjánxin tsjasóte la ko tsotjinkakonhya sín.

¹³ Kjánchó ó xrxjanka kixin chaxín ó tsíki ch'ín Elías, ntá kjuínchekjasóte sín ch'án éxí kóxrjínhin sín éxí nixja tí xroon itén Dios kixin xikaha tsonhen —mé xikaha chrónka ch'ín Jesús.

Ch'ín Jesús mé kjuínchekitohe jína ijnko xjan chón̄ta ijnko nchakuen tí jínahya
(Mt. 17.14-21; Lc. 9.37-43)

¹⁴ A ntá tió ikjan sín tí kuitohe tí í so sín k'uájiko ch'án ntá k'uikon sín kixin nchónhya chojni tsik'antatjen tí jehe sín. Kjaxin ntaha siín tí sín tjako tí ley ikjo tí jehe sín. ¹⁵ A ntá tuénxín tió k'uikon sín tí ch'ín Jesús na ntá kaín sín kóchéhe sín tinká sín sákjuíchréhe sín ch'án, tsonixjehe sín ch'án. ¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan. ¹⁸ Kjóté nkeri tjen xjan la tí nchakuen tí jínahya mé tjáka xjan nonte, ntá ntálóxrjo sítixin ir'va xjan na netaón xjan neno xjan na méxra tjiheya xjan. Ntá xrjanóhahá tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xráqorá ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uúkon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntálóxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xíkaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsi xjan. ²² A ntá jnkoyaxón tí nchakuen tí jínahya a mé tjákáte xjan xrohí la ko tjákánkí xjan ñntá kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóehéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuénté tjanchankina kixin á tsjácha? Tí tsitekávan la kaín nkehe la jina tsonhen, kixin tí nkexro tsitekaon Dios la jina tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uúkon ch'ín Jesús kixin itsjé chojni kóchjina. Ntá nixjehé ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekiénhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya ínaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a ínaá, ntá k'uaxrjéxín ntiha. Na éxí tsík'en xjan xíkaha tsjehe xjan. Ntá itsjé sín ntáchro sín kixin ó tsíkixín tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uúixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuénté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxin kixin nchónhya tsochronóehérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuúxin sín ntiha ntá k'uúatsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonhe sín ³¹ kixin tinkákjakohe ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yāon nixin na ó tsoxechón ch'án inaá —ichro ch'án.

³² Ntá jehe sín mé kíenxínhya sín nkehe tí ntáchro ch'án la chrakon sín chrókjuanchankíhi sín ch'án nkexri t'axrjexín tíha.

¿Nkexo tí imá tjeotan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kíchuárá tí kuini ntja? —ichro ch'án.

³⁴ Ntá jehe sín la tánikoá sín kixin tí ntja kui sín tinkákjo kíchó sín kixin nkexo tí imá ts'etōan. ³⁵ Ntá ch'ín Jesús mé kjuák'etjaxin ch'án ntá k'uíyēhe ch'án tí teyó sín k'uájiko ch'án, a ntá ntáche ch'án sín kixin:

—Tí jnkojínrá tjinkáonrá chrókuétōanrá má ntá t'ichjánxin kixin tsjixixín tsochréhérá kaín sín, ts'ítuanhanrá la ko tsjínkĩtsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojín nkexo chrók'uáyēhe ijnko chánjan kixin tinkáchónki sín tí janhan la mé xikaha chrók'uáyēhe sín tí janhan la ko kjaxin éxí chrók'uáyēhe sín tí nkexo ichr'ánna —ichro ch'án.

Tí nkexo nínkakuenhyani tí jeheni la tjinkĩtsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkoni ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uētūēnhenni ch'án kixin xikaha chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté tjtōhé ch'án kixin nínkexró tjasixín kjuaxroan kjuachaxin njina la tuénxín chrókjuacha chrók'uántaxina sín. ⁴⁰ Tí nkexo nínkakuenhyani la mé tjinkĩtsa tí jeheni. ⁴¹ A ntá jnkojín nkexo tsotjáhará kjónté ijnko vaso ìnta tsjanjonxín sín njina kixin jahará la tinkáchónkirá Cristo, ntáxrjan kixin chaxín ts'áyēhe sín nkehe.

Tí chojni tjasin jje mé tsjasóte sín

(Mt. 18.6-9; Lc. 17.1-2)

⁴² A ntá jnkojín nkexo chrókjuachroe ijnko xjan kixin chrókjuasin xjan jie tío tinkáchónki xjan tí janhan la íchá jina chrókjuincheteyá sín ch'án ijnko xro jie tsík'óna xrochre la chrókjuikákánki sín ch'án ntayāon. ⁴³ A ntá tí itjá tjasixián jje na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuíxian tí síin xrohi xitjahya ts'anka, ⁴⁴ tí síin kosjntō t'enhya la ko síche xrohi ts'ankahya. ⁴⁵ A ntá kjaxin tí totá tjasixián jje na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuíxian tí síin xrohi xitjahya ts'anka, ⁴⁶ tí síin kosjntō t'enhya la ko síche xrohi ts'ankahya. ⁴⁷ A ntá tí ikuan tjasixián jje na íchá jina chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yóí kuan la tíha mé sáchrókjuíxian tí síche xrohi ⁴⁸ tí síin kosjntō t'enhya la ko síin xrohi ts'ankahya.

⁴⁹ A ntá kain nkexro t'ichjánxin tsjasóte. A ntá kain nkehe ts'áyéhe Dios chóna xíjnta. ⁵⁰ Tí xíjnta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxí xíjnta kixin kjuaxróxin chrók'uejokoará kichuára —ichro ch'án.

10

Tjako ch'in Jesús kixin chrókjuákehya kichó sín

(Mt. 19.1-12; Lc. 16.18)

¹ Na ntá ch'in Jesús mé k'uaxrxéxin ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuakóhe ch'án tí jehe sín kixin xíkaha kuèhen ch'án.

² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuacháxin sín ch'án. Ntáchro sín kixin:

—¿Á síin kjuachaxin tsjákehé chojni ntoá ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuñhanrá tí ch'in Moisés? —ichro ch'án.

⁴ Ntá ntáchro sín kixin:

—Ch'in Moisés kjuañon ch'án kjuachaxin kixin ts'óna ijnko xroon tsakja tí ichjién kixin ts'itjiéxin kichó sín —ichro sín.

⁵ Ntá ch'in Jesús ntáchro ch'án kixin:

—Ntá jahará icha asánrá titekákonhyará ntá k'uetuñ ch'án ts'óna tí xroon a.

⁶ Kjánchó tí xrankíxixín tió kjuích'éna Dios kain xín nkehe la kjuích'éna ch'án ijnko chojni ntoá la ko ijnko chojni chjin. ⁷ Méxra tí chojni ntoá tsítóhe ch'án tí it'é ch'án la ko iné ch'án kixin tsakja ch'án ichjién ch'án ⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá. ⁹ Na mé xíkaha tí kjuachaxin kuènte Dios kójnkojiéxin sín ntá jehe sín chrók'uitjehya kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjiíhi kichó sín. ¹¹ Na ntá ntáchro ch'in Jesús kixin:

—Tí jnkojin nkexro tsjákehé ichjién ntá tsakja ch'án í jnko chjin na mé xíkaha tsjáchehe ch'án tí tjan tsíkótehe ch'án saoxín. ¹² La ko kjaxín tí chojni chjin tsíkjákehé xii tsakja tjan í jnko chojni ntoá na mé xíkaha kjaxín tjan tjan tjan jie —ichro ch'án.

Ch'in Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'in Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkao xjan. ¹⁴ Ntá k'uíkon ch'in Jesús ntá kóninkaon ch'án ntáchro ch'án kixin:

—Nté títóhérá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhe éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etóan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'in ntasoá rico nixjehé ch'án tí ch'in Jesús

(Mt. 19.16-30; Lc. 18.18-30)

¹⁷ A ntá tió sákjuí ch'in Jesús inaá ntá xrakoa ijnko ch'án tinká ch'án kjuák'exín toch'in ch'án nkayakon tí ch'in Jesús kjuanchankí ch'án kixin:

* 10:6 Génesis 1.27; 5.2 † 10:8 Génesis 2.24

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrixin? —ichro ch'án.

18 Ntá ntáche ch'ín Jesús tí jehe ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro mé jína la tíha mé Dios. 19 Ntá jaha ó noha kixin nkexrí k'uetōan Dios kixin: “Chrókjuacheéhya kichuá la chrók'oyánhya chojni la chrókueghya la chrókjótahya kichuá la chrókjuich'iahya la ko chróchontehé kjuasáya it'á la ko iná”[‡] —ichro ch'án.

20 A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

21 Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxá t'itjáyana jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sìnchekjixián tí nkehe chonta la mé nchekitōnhén tí chojni nòa, a ntá tí nkehe tjete tsochonta nkaya nkajní. A ntá tíó tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

22 Ntá tíó kuínhin ch'án xikaha ntá k'uává ch'án sákjuí ch'án, kixin imá tsjé nkehe chonta ch'án.

23 Ntá ch'ín Jesús komá ch'án tí sín siín ntiha ntáche ch'án tí sín siín k'uájiko ch'án kixin:

—Imá xrā ijnko chojni chóna imá tsjé nkehe ts'ixenhen sín tí tjen Dios t'etōan —ichro ch'án.

24 Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjeconhen tí nkehe chóna sín na imá xrā ts'ixenhen sín tí tjen Dios t'etōan. 25 Antsí xrahya chrók'uaítsinka ijnko kocamello ijnko tjar'in ntachica tjejrja. A ntá antsí má xrā ijnko ch'ín chóna itsjé nkehe chrók'uixenhen ch'án tí tjen Dios t'etōan —ichro ch'án.

26 Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkexro chrókjuacha chrókuaá? —ichro sín.

27 Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

28 Ntá ch'ín Pedro ntáchro ch'án kixin:

—Inchéni, kaín ni mé kuítōheni kaín nkehe chóntani ntá chréhēni tí jaha —ichro ch'án.

29 Ntá kjuátehe ch'ín Jesús ntáchro ch'ín kixin:

—Chaxín ntáxrjan kixin jnkójín nkexro tsítōhe ntōe sín la o tí kichó ntoa o tí kichó chjin la o it'é o iné sín o ichjién sín o xjeen sín o nōntēe kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón³⁰ na mé ntihi chjasintajni tsochóna sín ciento veces nchónhya ntōe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nōntēe sín xikaha ts'ikon sín itsjé nōntē. Kjóntē tsjasóte sín ntihi chjasintajni ntá chr'éxin tsochóna sín tí kjuachón jnkochrixin. 31 A ntá itsjé tí sín t'etōan ijie mé tsjixixín tsochrēhe sín. A ntá itsjé tí sín t'ítuenhen ijie, na mé tí sín a mé ts'etōan sín tí ntiha.

[‡] 10:19 Éxodo 20.12-16; Deuteronomío 5.16-20

Níxin chronka ch'in Jesús kixin its'en ch'an

(Mt. 20.17-19; Lc. 18.31-34)

³² Ntá tjejóti sín chr'in sín tí ntja sátsji chjasin Jerusalén. Ntá ch'in Jesús mé tjetaón ch'an ntja ntá tí sín k'uájiko ch'an mé tóxakonhen sín chrakon sín chréhe sín. Ntá k'uíyehé ch'an jehó tí teyó sín inaá ntá kjuankixin ch'an chénka ch'an sín nkexrí tí nkehe tsonhen ch'an. ³³ Ntá ntáchro ch'an kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'an tsjikénhen sín tí sín nchat'á t'etóan la ko tí sín tjako tí ley. Ntá ts'etóan sín kixin its'en ch'an. Ntá sinchek'áyéhé sín ch'an tí sín jehya judío. ³⁴ Ntá jehe sín la tsjanoá sín tí jehe ch'an la ko ntaté sín tsikite sín ch'an la ko tsjate sín ch'an ntá ts'óyán sín ch'an. Kjánchó tí yaon níxin mé tsoxechón ch'an inaá —mé xikaha ichro ch'in Jesús.

Ch'in Jacobo la ko ch'in Juan tjanchia sín nkehe

(Mt. 20.20-28)

³⁵ A ntá tí ch'in Jacobo la ko ch'in Juan mé xjeen ch'in Zebedeo mé kóchjinehe sín tí ch'in Jesús ntá ntáchro sín kixin:

—Maestro, tjanchahani ijnko xrá —ichro sín.

³⁶ Ntá kjuanchankí ch'in Jesús ntáchro ch'an kixin:

—¿Nkehe tí xrá tjinkáonrá chrókjuít'ahará? —ichro ch'an.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'in Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'an.

³⁹ Ntá jehe sín kjuátéhe sín ntáchro sín kixin:

—Kja tsjachani —ichro sín.

Ntá ntáche ch'in Jesús tí jehe sín kixin:

—Chaxín its'irá éxi tí nkehe tsjá its'ia la ko tsikiterá éxi tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsikónoxín —ichro ch'an.

⁴¹ A ntá tió kuínhin tí ite sín xikaha tsintáchro tí sín a ntá kjuankixin kóninkakonhen sín tí ch'in Jacobo la ko tí ch'in Juan. ⁴² Ntá k'uíyehé ch'in Jesús kaín tí jehe sín ntá ntáche ch'an sín kixin:

—Ó nohará kixin tí sín t'etóan chjasintajni la imá t'etuñhen sín kaín chojni la ko tí sín imá tjetaon mé imá nchehnkehe asén sín kixin ihyé sín ts'etóan sín. ⁴³ Kjánchó jahará la xikahya chrókjuich'erá. Náhí. Tí jnkójnraá tjinkáonrá chrókuétoanrá la chrókjuínkítasará tí í so sín. ⁴⁴ A ntá tió jnkójnraá antsí chrókuétoanrá mé t'ichjánxin senó chrókjuáoxinrá chrókjuich'eherá kichuárá xrá. ⁴⁵ Kixin tí Xjeen Dios K'óna Chojni mé kuíhya ch'an kixin chojni chrókjuich'ehe ch'an xrá. Náhí. Ikuí ch'an kixin sich'ehe ch'an sín xrá la ko ts'enyákonhen nchónhya chojni kixin tsaáxin sín ch'an —ichro ch'an.

Ch'in Bartimeo k'uék'ikonhya ch'an ntá ch'in Jesús kjuinchekitöhe ch'an jina

(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'in Jesús la ko tí sín k'uájiko ch'an la ko nchónhya chojni k'uaxrxjén sín tí chjasin ntíha. Ntá ntíha tjen ijnko ch'in t'ikonhya mé it'in ch'an Bartimeo ntá it'é ch'an mé it'in Timeo. Tjetjaxin

ch'án chrínta ntja tjančhak'á ch'án. ⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankixin t'èya ch'án ntáchro ch'án kixin:

—Jaha Jesús, tsík'axrjenixian ch'ín David tikonóhénéni —ichro ch'án.

⁴⁸ Ntá nchónhya sín k'uetuēnhen sín ch'án kixin tsotáni ch'án. Ntá íchá antsi má tsen t'èya ch'án ntáchro ch'án kixin:

—Jaha, tsík'axrjenixian ch'ín David tikonóhénéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uetōan ch'án kixin:

—T'iyēhérá tí ch'ín a —ichro ch'án.

Ntá k'uíyēhé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús. ⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátēhe tí ch'ín t'ikonhya ntáchro ch'án kixin:

—Maestro, tjinkaonni kixin chrók'uikonní —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jína sátsjia. Ó kuítóha jína kixin kuítekávan tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uixenhen ch'án chjasin Jerusalén (Mt. 21.1-11; Lc. 19.28-40; Jn. 12.12-19)

¹ Ntá tió kjuíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsi chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehérá va ntá tsjikoaná va ntihi. ³ A ntá tí jnkojín chojni tsjančankíhará sín kixin nkekuénté xikaha ch'erá ntá tsontáchorá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehe sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuénté xikaha ch'erá tjasintankehérá tí kolócho a? —mé chro sín.

⁶ Ntá kjuátēxín sín éxi k'uetōan ch'ín Jesús. Ntá kjuanjón sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínčekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxín sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráko sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchro sín kixin:

—Tsjancheheni kjuasáyé Dios. Jína tí nkexro kjuixín kjuachaxin ihnié Inchéni. ¹⁰ Jína tí kjuachaxién Dios itsi mé ts'etuēnhen tí nkexro k'uaxrjenixín it'eni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'in Jesús chjasin Jerusalén la ko kjaxin k'uixenhen ch'an tí nínko jíe tsjehe ch'an nkuixín tí nkaxenhen. Ntá ó kóntó ntá ch'in Jesús sákujuiko ch'an tí tyeó sín k'uájiko ch'an sákujuí sín chjasin Betania.

Ch'in Jesús kónínkakonhen ch'an ijnko nta t'óna to higo tsík'ónahya to (Mt. 21.18-19)

¹² A ntá tí kóyaon ntá kjanxin sín chjasin Betania ntá ch'in Jesús mé k'uén ch'an kjinta. ¹³ Ntá k'uikon ch'an kjin itjen ijnko nta t'óna to higo itsá kayoa. Ntá sákujuítsjehe ch'an tí nta kixin ákué tsahya to. Ntá k'uikon ch'an kixin jehó ka itsa tí nta a kixin jehya tí yaon ts'óna to. ¹⁴ Ntá nixjehe ch'in Jesús tí nta t'óna to higo k'uetuenhen ch'an tí nta kixin:

—Í ninkexró sinehya tí to ts'óna tí jaha inaá —ichro ch'an.

A ntá tí sín k'uájiko ch'an mé kuínhin sín xikaha.

Ch'in Jesús kjuínchetjóá ch'an nínko (Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'in Jesús nkaxenhen nínko a. Ntá kjuankíxin ch'an k'uinkité ch'an tí sín nchekjixín nkehe ntiha la ko tí sín t'ena nkehe ntiha. A ntá kótéka ch'an tí mesa tjinkítóixín sín chichaon la ko tí silla tjejókjén tí sín nchekji kontóá ¹⁶ la ko kjuanjonhya ch'an kjuachaxin kixin tsamá sín nkehe ts'ajixenhen sín nínko. ¹⁷ Ntá kjuakohe ch'an sín ntáchro ch'an kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuixín nación”, a ntá jahará tsík'jich'énará itjueé xíchee* —ichro ch'an.

¹⁸ Ntá tí sín nchat'á t'etóan la ko tí sín maestro tjako tí ley na mé kuínhin sín tíha, ntá kjueyá sín nkexi chrók'oyán sín ch'an, kjánchó chrakon sín kixin kóxrjínjin tí chojni tí nkehe kjuako ch'an. ¹⁹ Kjánchó ntá ó kóntó ntá k'uaxrjexín ch'an tí chjasin a sákujuí ch'an.

Ó tsixámá tí nta t'óna to higo (Mt. 21.20-22)

²⁰ A ntá tí nchtjen k'uátsínka sín tí tjen tí nta t'óna to higo ntá k'uikon sín kixin ó tsixámáxin nuée tí nta. ²¹ A ntá ch'in Pedro xráxinkaon ch'an ntáche ch'an tí ch'in Jesús kixin:

—Maestro, tsjehé tí nta t'óna to higo kónínkakonhén jna na ó tsixámá nta —ichro ch'an.

²² Ntá kjuátehe ch'in Jesús ntáchro ch'an kixin:

—Tinkachónkirá Dios. ²³ Chaxín ntáxrjan kixin jnkojínrá chróntácherá tí jna i kixin: “Sátjixián ntihi tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrorá, ntá xikaha chaxin tsonhen. ²⁴ Mé xikaha ntáxrjan kixin kaín tí nkehe tsjancheherá Dios tí tsitékáonrá kixin chaxín ts'ayéherá ntá xikaha tsonhen tsóxiteyá. ²⁵ A ntá tíó tjejonixjehérá Dios ntá jnkojín nkexro naxá ninkákonhénrá, la chrók'uitjáyahanhárá tíha kixin It'ará tjen nkaya nkajní kjaxin chrókjuinçek'itjáyán ch'an tí jíe chontará. ²⁶ A ntá tí sínček'itjáyánhyará tí jíe chojni ntá It'ará tjen nkaya nkajní la kjaxin sínček'itjáyánhya ch'an tí jíe chontará.

Tjančankíhi sín tí ch'in Jesús nkehe tí kjuachaxin chóna ch'an (Mt. 21.23-27; Lc. 20.1-8)

* 11:17 Isaías 56.7; Jeremías 7.11

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen nínko ntá kóchjina tí sín nchat'á t'etōan la ko tí sín tjako tí ley la ko tí sín táda t'etōan nínko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

²⁹ Ntá kjuátehe ch'ín Jesús ntáchro ch'án kixin:

—Ntá kjaxin janhan tsjánchánkíhára ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xíkaha it'a. ³⁰ ¿A ntá nkexro k'uetuēnhen ch'ín Juan kixin tsíkite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin Jehó sín tjo sín kichó sín kixin:

—Tí tsontáchroni kixin Dios tsík'etuēnhen tí ch'ín Juan ntá tsjanchankí tí ch'ín a kixin nkekuenté kuítekakuehnyan ch'án. ³² ¿Á chróntáchroni kixin chojni ó tsík'etuēnhen ch'án? —ichro sín.

Kjánchó chrakōnhen sín tí chojni chjasin kixin kaín sín kuítekaon sín kixin ch'ín Juan mé k'ueñixa ch'án itén Dios. ³³ Ntá ntáche sín tí ch'ín Jesús kixin:

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsōrxrjankahya nkexro kjuanjon kjuachaxin kixin xíkaha t'a —ichro ch'án.

12

*Ch'ín Jesús mé kjuíncheyóexin ch'án éxi chojni ch'ehya xra jína
(Mt. 21.33-46; Lc. 20.9-19)*

¹ Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uēnkaxin ch'án itsjé ntanòda t'óna to uva nontēe ch'án la ko kjuich'ēna ch'án corral la ko kjuich'ēna ch'án ijnko tòye ts'énya sín to uva. A ntá kjuich'ēna ch'án ijnko tjat'o noi kixin ts'it'ótjen ch'án tsokotohe ch'án.

'A ntá kjuínchekjen ch'án tí nonte iso chojni ch'e xra. Ntá sákjuí ch'án kjin.

² Ntá tí kjuixraká tí yaon ts'óna to ntá k'uetuēnhen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkōsiné tí to tsakja ch'án. ³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéha sín ch'án ntá sákjuí ch'án. ⁴ A ntá tí inché tí nonte mé xíchr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxínhin sín ch'án. ⁵ Ntá tí inché tí nonte á xíchr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyán sín ch'án. Ntá chr'éxin tí inché mé xíchr'án ch'án í so nkexro ch'ehe ch'án xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'án chóna ch'án jnkokoáxon xjeen ch'án na imá tjuēhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: “Tsochóntehe sín kjuasáyé tí xjanna”, ichro ch'án. ⁷ A ntá tí sín ch'e xra a tjo sín kichó sín kixin: “Tí ch'ín i mé ts'áyéhe kaín nkehe síin ntihi. A ntá jie ts'óyánni ch'án, a ntá jeheni ts'áyéheni kaín tí nkehe a”, ichro sín. ⁸ Ntá xíkaha itsé sín ch'án k'óyán sín ch'án ntá kuakitsjexín sín ntōe ch'án tí nontēe ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí inché tí nonte a? Chrókui ch'án chrók'óyán ch'án tí sín ch'e xra, a ntá chróchjéhe ch'án ókjé chojni.*

* 12:9 Isaías 5.1-7

10 '¿Á kjuinchekuáxinhyará jahará tí xroon itén Dios? Ntáchro xikihí: Tí xro náxrjónhya kuítōenta tí sín ch'éna tjat'o, mé jie k'óna tí xro tjetōan.

11 Mé xikaha kjuich'é Inchéni Dios,

na ntá tíha mé ijnko nkehe kjuachrakon k'uikōnni† —ichro ch'ín Jesús.

12 Ntá chrótsé sín tí ch'ín Jesús chrókjuak'echjina sín ch'án kixin kienxín sín kixin kaín tí ntáchro ch'án la jehe ch'án k'uántaxínhín tí jehe sín. Kjánchó chrakon sín kixin nchónhya chojni kóchjina ntá kuítōe sín ch'án ntá sákjuí sín.

¿Á jina chrókjuenkehe sín gobierno?

(Mt. 22.15-22; Lc. 20.20-26)

13 A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankihi sín ch'án iso nkehe kixin tí ntoáhya chrókjuatēhe ch'án ntá jina chrók'ueka sín ch'án jie. 14 Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chrōnka la chaxín tíha la ko jehya nkexrí tsjehe chojni tjenkayáxixián kixin á jina sín, la ko ntoá tjákua ntje Dios. ¿Á jina chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhí? —ichro sín.

15 Ntá ch'ín Jesús kjuátsōan ch'án kixin jehya jina tjenkayáxin sín ntáchro ch'án kixin:

—Jehya jina kixin tjáchaxínrání. Xrákōará ijnko tí chichaon tjanchia sín tsotsjáha —ichro ch'án.

16 Ntá xrákōo sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrjexín tjenkání tí chichaon i la ko nkexro ihnjé chóna? —ichro ch'án.

Ntá jehe sín kjuatēhe sín kixin:

—Tí ch'ín t'etōan mé tjenkání ch'án —ichro sín.

17 Ntá kjuatēhe ch'ín Jesús ntáchro ch'án kixin:

—Chróchjehérá tí ch'ín gobierno t'etōan tí nkehe kuènte ch'án; a ntá tí nkehe kuènte Dios la chróchjehérá Dios —ichro ch'án.

Ntá chrakon sín kixin xikaha kjuatēhe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

18 A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxín sín tí ch'ín Jesús ntáchro sín kixin:

19 —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókjuakja tí tjan k'án a ntá tí xjeen sín mé ts'óna éxí xjeen tí nkexro tsík'en.‡ 20 Kjánchó k'uéjō yato sín jnkokoá kichó sín. Ntá tí ch'ín saō mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. 21 Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen inaá. 22 Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuich'énahya sín kaín sín. Ntá kjuixixín ntá k'uén tjan kjaxin tjan. 23 Ntá tió tsoxechón kaín xín chojni la, ¿Ntá nkexro ts'óna xii tjan kixin kayatoé sín tsíkōtēhe tjan? —ichro sín.

24 Ntá kjuátēhe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. 25 A ntá tió tsoxechón tí chojni tsik'en la tsotēheya sín la ko tsjanjonhya sín xjeen sín kixin tsotēhe sín kixin tí sín tsik'en la éxi sín ángel ts'ejó sín nkaya nkajni. 26 A ntá tí tsoxechón tí sín tsik'en, zá kjuinchekuáxinhyará tí xroon tsikjin ch'ín Moisés chrónka nkexrí k'uénixjēxín Dios ijnko nta yoa tjeche ntáchro ch'án xikihi: “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob?”§ 27 Méxra tí Dios i la jehya tinkáchónki tí sín tsik'en. Náhí. Jehe ch'án mé Dios tinkáchónki tí sín tjejóhón. Ntá jahará la imá tiénxinhyará kixin xikaha ichrorá tjanchankirá —ichro ch'án.

Tí nkehe antsí imá tjeoan tsik'etoan Dios

(Mt. 22.34-40)

28 Ntá kui ijnko ch'ín tjako tí ley kjuák'ekinhin ch'án nkexrí kjuachaxin sín ch'ín Jesús. Ntá kuínhin ch'án kixin imá jina kjuátēhe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjeoan tsik'etoan Dios? —ichro ch'án.

29 Ntá kjuátēhe ch'ín Jesús ntáchro ch'án kixin:

—Tí nkehe antsí tjeoan tsik'etoan Dios mé tíhi: “Tinhínrá kaín rá chojni Israel kixin Ìnchéni Dios la mé jnkokoá la kohya í jnko nkexro. 30 Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótjuèxínrá.”* Mé xikaha tí nkehe antsí tjeoan tsik'etoan Dios. 31 A ntá tí nkehe yóxin tsik'etoan Dios la mé tóyóhe na mé ntáchro xikihi: “Chrótjuèhérá kichuára éxi tjuèxínrá asánrá,”† la kohya í jnko nkehe antsí má tjeoan tsik'etoan ch'án —ichro ch'ín Jesús.

32 A ntá kjuátēhe tí ch'ín tjako njnko a ntáchro ch'án kixin:

—Ntoá ntáchrua tíha, Maestro kixin chaxín itjen jnkokoáxón Dios la ko kohya í jnko Dios.‡ 33 Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxinni Dios la ko chrótjuèheni kichó ni éxi tjuèxinni asénni.§ Tíha mé antsí má sínkí. A ntá kaín tí ko chrók'óyánni chrókjuanjonni chróchjánxin chrítaón altar la kánhyó tjeoan tíha —ichro ch'án.

34 A ntá tió k'uúkon ch'ín Jesús kixin jina kjuenkayáxin ch'án kjuátēhe ch'án ntá ntáchro ch'án kixin:

—Jaha la kijnhya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexro kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

35 Ntá ch'ín Jesús kjuák'ekjako ch'án tí njnko jié. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjenixin tí ch'ín David? 36 A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntiho tsétoan,

tsjixinjian kaín xín tí sín nínkakonhan la tsjachahya sín ts'etoan sín kixin jahvá mé tsétoan”*

§ 12:26 Éxodo 3.6 * 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio

4.35 § 12:33 Oseas 6.6 * 12:36 Salmo 110.1

³⁷ ¿Xá nkexrí kixin Cristo chrók'óna xjeen ch'in David kixin jehe ch'in David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókínhin sín kóxrjínhin sín tí nkehe kjuako ch'án.

Ch'in Jesús chrónka nkexrí ch'e tí sín tjako tí ley
(Mt. 23.1-36; Lc. 11.37-54; 20.45-47)

³⁸ Ntá ch'in Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín. ³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen njnko. La ko kjaxin tió sátsji sín tí sine sín xritjeyá sín tí nta antsí náxrjón ts'ejókjen sín sine sín. ⁴⁰ La ko takitsje sín ntøe chojni k'án. La ko ch'iyexín sín chojni kixin isé nixjehé sín Dios kixin chrókuinhin chojni chróntáchro sín kixin imá jina tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án
(Lc. 21.1-4)

⁴¹ A ntá jnkonaá mé ch'in Jesús tjetjaxin ch'án nkaxenhen njnko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhén sín chichaon tí ntacajón. La ko kjaxin nchónhya tí sín rico chr'áxenhén sín nchónhya chichaon tí ntacajón a. ⁴² Ntá kjaxin ntiha mé kjuí ijnko tjan k'án nòa tjan ntá chr'áxenhén tjan tí ntacajón yaá chichaon kánhyó tje te sinkí. ⁴³ Ntá ch'in Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan antsí tje te k'uikon Dios tí chichaon chr'áxenhén tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchónta tjan chrók'uíte nkehe chrókjóné tjan —ichro ch'án.

13

Ch'in Jesús chrónka kixin tsóxika njnko
(Mt. 24.1-2; Lc. 21.5-6)

¹ A ntá tió k'uaxrxjén ch'in Jesús tí njnko jíé ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'in Jesús ntáchro ch'án kixin:

—¿Á tsjehé jaha tí nchia jíé tsík'óna ní? Tsjixraká tí yaon la í ninkehó xro ts'ejókjénhya kichó, la kaín tíha la tsóxika —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jnā Olivo chók'èxin tjen tí njnko a. Ntiha kjuák'etjaxin ch'in Jesús. Ntá ntiha ch'in Pedro, la ko ch'in Jacobo, la ko ch'in Juan, la ko ch'in Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsøchronka nkesá tsonhen tíha la ko nkexrí tsønoexinni nkesá tsøxiteyá kaín tíha —ichro sín.

⁵ Ntá ch'in Jesús kjuátehe ch'án ntáchro ch'án kixin:

—Tóxakonhanrá tjtøéhyará kixin ninkexró chrókjuit'ayahyará. ⁶ Nchónhya chojni tsi tsontáchro sín kixin jehe sín mé Cristo. Ntá xíkaha sich'iyehé sín nchónhya chojni.

⁷ A ntá tió tsinhínra kixin tjanjonko kichó sín la t'óyan kichó sín la chrakonhyará tókakuanhyará ó jehi tsonhen tíha. Kjonté xikaha naxa tsjegehya chjasintajni. ⁸ Ijnko nación tsjanjonko í jnko nación. La ntiha la ntaha la tsinki nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tókakuanhará jahará kixin mé tsjikaánra sín nkayakon tí sín t'etoan ntá tí nkaxenhen njnko ntiha mé tsjatiaxínra sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí naxa ts'itjáyanyha chjasintajni la mé t'ichjánxin tsinhin chojni kaín xín nación tí tan jína tsaáxin sín. ¹¹ Tió sátsjikoará sín tsjikaánra sín tí tjejó tí sín t'etoan, la tókakuanhyará nkehe tsjateherá la ko nkehe tsjenkayáxinra. Náhi. Chronkará tí nkehe kujanjon Dios tsontáchrórá tí hora a, kixin jahyará tsonixjará. Náhi. Nchakuen Dios mé tsonixja. ¹² Iso chojni kjonté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakohen sín tí it'é la ko iné la tsjikaán sín kixin its'en. ¹³ Kaínxin chojni chjasintajni tsonínkakohenhá sín kixin tinkachónkirá tí janhan. A ntá tí sín tsítøehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxi tsintáχρο profeta Daniel* —ntá tí chojni sinchekuáxin tí xroon í mé chrókuienxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrin sín jna tsjík'ejómá sín. ¹⁵ A ntá tí sín tjejó chrítaón nchia la í chrók'uínkajinyha sín, chrók'uixenyha sín nkaxenhen nchia chrókukitsje sín ichrén nkehe chóna sín. ¹⁶ Ntá tí sín tjejó nontee sín la í chrókjanhya sín naxa chrókjuikakja sín iké sín. ¹⁷ Ntá nõa tí chojni chjin ts'ejóyá tí yaon a la ko tí sín tjejónchekakí xjeen. ¹⁸ Chrókjuanchehérá Dios kixin jehya nchakuen kin chrókónhen tíha. ¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènyha xikaha desde tí kjuankixixín Dios kjuíuch'èna ch'án chjasintajni la ko kjá xikahya tsonhen chr'éxin ínaá. ²⁰ A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kujikonøehé ch'án tí sín tsíkjeýá ch'án ntá k'uetøan ch'án kixin tjoka ts'atsínka tí kjuachrakon a.

²¹ A ntá jnkojín nkexro tsontáχρο kixin: “Tsjehé, ntihi tjen tí Cristo”, o tsontáχρο sín kixin: “Tsjehé, ntiha tjen ch'án”, la títekakuènyhará sín. ²² Na mé itsi iso sín tsontáχρο sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíé tjínkaon sín chrókjuich'iyexín sín chojni, kjonté tí sín tsíkjeýá Dios. ²³ A ntá jahará chrokóxakonhanrá kaín tíha. Tjéjtonkará senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi. ²⁵ A ntá tí konotsé la ts'anótjenxin nkajni la ko tí kjuachaxin sín nkaya nkajni la kjaxin tsinki. ²⁶ Ntá ts'ikon sín tí Xjeen Dios K'óna Chojni itsi chrikjan tjuj tsjiko tí kjuachaxin jíé. ²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjeýá ch'án.

* 13:14 Daniel 9.27; 11.31; 12.11

²⁸ 'Chrókiénxinrá tí nkehe sintayóaxian. Éxi yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹ mé xikaha tió ts'ikonrá xikaha tsonhen kaín tíha ntá tsoñoaxínrá kixin ó kuichjina tí tsjeje chjasintajni. ³⁰ Chaxín ntáxrjan kixin kaín tíha tsonhen tí naḡa t'enhya tí chojni síin chjasintajni. ³¹ A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³² A ntá tí yaon la tí hora tsoxiteyá tíha la ninkexo noehya. Kjaxin noehya tí sín ángel tjejó nkaya nkajní la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³ Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha. ³⁴ Éxi yóhe ijnko chojni sátsji kjin, a ntá tí naḡa sátxixínhya ch'án ntøe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntøe ch'án, la jnkojnko sín ts'áyéhe sín jnkojnko xra kuente sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia. ³⁵ Méxra jahará chrók'uejotsjehérá kixin noahyará nkesá tsokjan tí inché tí nchia a, á ijnko tsontanonte o á ijnko k'áxrótjen o á ijnko tjetøe tsje cochíká o á ijnko ts'inkaséyan. ³⁶ Ntá xrináhya tsi ch'án ts'itjaxín ch'án kixin tjejochrinrá. ³⁷ Mé xikaha tjonkará la ko xikaha ntátjan kaín chojni kixin chrók'uejotsjehe sín —ichro ch'án.

14

*Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)*

¹ Naḡa t'itjáyan iyó yaon ntá tsjanin sín tí kia pascua, la ko sine sín tí niotja tsíkikohya tí xroaḡ nchek'ánki niotja.

Ntá tí sín ncha'tá t'etøan la ko tí sín maestro tjako tí ley mé kjueyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án.

² Ntá ntáchro sín kixin:

—Kjánchó jehya yaon kia chrókónhen tíha kixin chrók'uitéhya chojni chrókóninkaon sín —ichro sín.

*Ijnko tjan kuikítexín aceite náxrjón xraxé ikja ch'ín Jesús
(Mt. 26.6-13; Jn. 12.1-8)*

³ A ntá ch'ín Jesús kjuák'e ch'án chjanin Betania ntøe ch'ín Simón, tí ch'ín k'uéchonta chinlepra. A ntá tí tjene ch'ín Jesús ntá xrináhya ikui ijnko tjan kuikao tjan ijnko xro mé tjía tí aceite xraxé itsjo nardo, imá tjetø tsík'ite. Ntá tí tjan a mé kuakitjehø tjan tí xro a ntá kuikite tjan kja ch'ín Jesús tí aceite a.

⁴ A ntá iso tí sín tjejó ntiha kónínkakohenhén sín tjan ntáchro sín kixin:

—¿Nkekuente kjuínchexénhen tjan tí aceite náxrjón xraxé? ⁵ Íchá jína chrókóxiḡin iní ciento chichaon denario tí aceite a ntá tí chichaon a mé chrókuitønhén tí chojni nòa —mé xikaha ichro sín k'uántaxínḡin sín tjan.

⁶ Ntá ntáchro ch'ín Jesús kixin:

—Nté tjtøhérá tjan; ¿nkekuente t'antaxínḡinrá tjan? Ó nchoxon tí nkehe kjuích'ena tjan. ⁷ A ntá tí chojni nòa la ó xráxín ts'ejókoará sín la jína tsjínkítara sín jnkojín yaon. Ntá janhan la jnkochríxínhya ts'ejóni. ⁸ Ntá jehø tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroaḡ cuerpo kuentana kixin tsoxravána. ⁹ Chaxín ntáxrjan kixin tí tsjako sín tí tan jína tsaáxin chojni nkuixín chjasintajni ntá tsochronka sín kixin

xikaha kjuích'e tí jehe tjan, a ntá xikaha tsoxraxinkakonxín sín tjan kixin xikaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús
(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuitsjehe ch'án tí sín ncha'tá t'etoan kixin tsochrónka ch'án nkexri tsotsé sín tí ch'ín Jesús. ¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankíxin ch'án kjuéyá ch'án nkexrí tsochrónka ch'án kixin tsotsé sín tí ch'ín Jesús.

Kjónoko sín tí ch'ín Jesús
(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxín kia sine sín niotja tsíkjikohya tí xroan nchek'ánki nio tió ts'óyan sín tí kolélo kuente kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyaxíxinni kixin sineni kuente tí kia pascua? —ichro sín.

¹³ Ntá k'uetuēnhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjiá ntá. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí inché nchia, tsontáchrórá kixin: “K'uetōan tí Maestro kixin: ¿Nketí tjen tí cuarto sinexínko ch'án tí sín xriko ch'án tí kia pascua a?”, xikaha mé tsixrorá. ¹⁵ Ntá tsjakohará ch'án ijnko cuarto jíé, yóxin piso mé chónka kaín nkehe t'ichjánxin. Mé ntaha mé sincheyaxíxinrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xikaha k'uitja sín. Ntá tí cuarto a mé kjuíncheyaxíxin sín tí nkehe sine sín kuente tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha. ¹⁸ Ntá k'uéjé sín, a ntá tió tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankíxin k'uává sín. Ntá kjuankíxin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátēhe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjenekian jnkokoá plato ntihi. ²¹ Chaxín tí Xjeen Dios K'óna Chojni mé tsonhen éxí nixja xroon itén Dios. Kjánchó nóa tí ch'ín sinchekji ch'án. Íchá jína tí ch'ín a la chrókokjéhya ch'án —mé xikaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ō ch'án tí niotja ntá kjuanjon ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuentāna —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. ²⁴ Ntá ntáchro ch'án kixin:

—Tíhi mé jnina mé chrónkaxín kixin chaxín tsoxiteyá tí nkehe nixin tsonhen na mé ts'itjí kixin tsaáxin nchónhya chojni. ²⁵ Chaxín ntáxrjan kixin ts'íhya

janhan tí ínté to uva ínaá tí naxa tsjixrakáhya tí yaon itsi kjuachaxin kuénte Dios, a ntá tí yaon a xik'ía ínté to uva nixin —mé xikaha ichro ch'in Jesús.

Ntá ch'in Jesús chrónka ch'án kixin ch'in Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuénte Dios ntá sákjuí sín tí jna Olivo.

²⁷ Ntá ch'in Jesús ntáchro ch'án kixin:

—Ijie tie kaín rá tsochraconrá ntá tsitonará. Ntá tsoxiteyá éxí ntáchro xroon iten Dios kixin: “Ts'óyan sín tí nkexro t'ayakonhen tí kolélo ntá tsokohya nkexro ts'ayakonhen va, a ntá nsjichroe va.”* ²⁸ A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

²⁹ Ntá ntáchro ch'in Pedro kixin:

—Kjonté kaín sín tsítóha sín ntá janhan la náhi —ichro ch'án.

³⁰ Ntá ntáchro ch'in Jesús kixin:

—Chaxín ntáxrjan kixin ijie tie tí naxa tsjehya kochíntoa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'in Pedro ntáchro ch'án kixin:

—Kjonté koína its'én la sjintamáhya tí jaha —ichro ch'án.

La ko xikaha ntáchro sín kaín sín.

Ch'in Jesús nixjeexín ch'án Dios tí Huerto Getsemaní

(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uętuęnhen ch'in Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

³³ Ntá sákjuiko ch'án tí ch'in Pedro la ko tí ch'in Jacobo la ko tí ch'in Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejt-jehérá —ichro ch'án.

³⁵ Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóęhe ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kixin:

—It'éni jaha. Jaha mé chonta kaín xín kjuachaxin na ntá chrónóęhani tsjakjínhinni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhi. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuitęhe la tjejójua sín. Ntá ntáche ch'án tí ch'in Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

³⁸ Ijie la tjejotsjehérá la ko chrónóęhérá Dios kixin tíętehya ch'án tí jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérpora la tsjachahya —ichro ch'án.

³⁹ Ntá sákjuí ch'án ínaá chrónóęhe ch'án Dios. Ntá ó jehe xikahó xínixja ch'án. ⁴⁰ Ntá ikjan ch'án la ó tjejójua sín ínaá kixin kjuíhi sín kotáchrin. Ntá í noehya sín nkexrí chrókjuátehe sín. ⁴¹ Ntá níxin sáxíkji ch'án ntá kjan ch'án ntá ntáchro ch'án kixin:

* 14:27 Zacarías 13.7

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhe tí sín chóna jie sinchekjasóte sín ch'án. ⁴² Ntá t'áyará sátsjini kixin ó kjuí tí nkexro sinchekjina.

Sákjuiko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³ Naxá tjenixja ch'ín Jesús ntá xrínghya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín chica espada la ko inta. Na mé kjuachaxién tí sín nchat'á t'etóan la ko tí sín maestro tjako tí ley la ko tí sín táda t'etóan nínko mé kjuíxin sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochító mé jehé túa la itsérá ch'án sáttjikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochító. ⁴⁶ A ntá tí sín kjuíji mé tsé sín tí ch'ín Jesús, sákjuiko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án tatsjon tí ch'ín ch'ehe tí nchat'á t'etóan xra. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuénté kixin éxí chrótsérá xíchee mé xíkaha k'uinkakoará chica espada la ko inta kixin tsotseráni? ⁴⁹ Kaín yaon kjuak'é nkaxenhen nínko kjuákohará, ¿ntá nkekuénté tsehyaráni? Kjánchó t'ichjánxin xíkaha tsónnen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuitóhe sín ch'án jehó ch'án ntá sákjuí sín.

Ijnko ch'ín ntasoá sákjuíxin ch'án ntiha

⁵¹ A ntá ijnko ch'ín ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsitsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etóan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuiko sín tí ch'ín Jesús tí ntóe tí nchat'á imá t'etóan. Ntaha mé tsikójnksoté kaín tí sín nchat'á t'etóan la ko tí sín táda t'etóan nínko la ko tí sín maestro tjako tí ley. ⁵⁴ Ntá ch'ín Pedro la ikjín tjechréhe ch'án ntá kjuíji ch'án tí ntásin ntóe tí nchat'á imá t'etóan a. Ntaha síche xrohi. A ntá ntiha tjejótxaxin tí sín policia tjejóchjixrohe sín, ntá kjaxin ch'án ntahó kuitóhe ch'án tjechjixrohe ch'án.

⁵⁵ Ntá tí sín t'etóenhen tí sín nchat'á la ko kaín tí sín t'etóan kjueyá sín chojni kixin tsochrónka sín nkehe tí jie chóna ch'ín Jesús kixin jina chrók'óyán sín ch'án. Kjánchó ninkexró k'uitjahya sín tsjinkítsa tsochrónka. ⁵⁶ Kjánchó itsje sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxika ch'án tí nínko tsíkijich'éanaxin chojni tja ntá iní yaon koá la ó tsjak'e ch'án íjnko nínko jehya chojni sich'éna† —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'ín t'etuenhen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjetehya jaha? ¿Á chaxín tí jie t'eka sín tí jaha? —ichro ch'án.

⁶¹ Ntá ch'ín Jesús táni ch'án la ninkehó tjetehya ch'án. Ntá xíkjanchankí tí nchat'á t'etöan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjixin ch'án tí tja chjina kjuachaxin kuente Dios la ko itjuj mé ts'inkajinxín ch'án nkaya nkajni —ichro ch'án.

⁶³ A ntá tí nchat'á t'etöan kótséchje ch'án tí iké ch'án kjuakoxín ch'án kixin imá nínkaon ch'án ntáchro ch'án kixin:

—T'ichjánxínhya í so chojni tsochrónka nkehe. ⁶⁴ Jahará ó kuínhínra kixin k'uántaxínhi ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuíkite sín ch'án ntate sín. Na iso sín na k'uúkjehé sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuente nínko chjéhe sín nkayakon ch'án.

*Ch'ín Pedro kjuínchemá ch'án kixin chónhya ch'án tí ch'ín Jesús
(Mt. 26.69-75; Lc. 22.56-62; Jn. 18.15-18, 25-27)*

⁶⁶ Ntá tí ntasin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etöan. ⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrjexín ch'án ntiha sákjui ch'án ntója. Ntá xríñahya itsje ijnko kochíntöa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín sintaxín ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjöntaxín ntáche sín tí ch'ín Pedro kixin:

—Chaxín kjaxian jaha tsíkjixian estado Galilea kixin tjatsöanxínni kixin nixja jaha éxi nixja tí jehe sín —ichro sín.

⁷¹ Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntöa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: “Naxa tsotsjehya kochíntöa yáya mé ó tsjixin sjnchemána níya kixin chonhyana.”[‡] Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuich'e ch'án kjuínchemá ch'án tí ch'ín Jesús.

[‡] 14:72 Marcos 14.30

15

*Ch'in Jesús nkayakon tí ch'in Pilato
(Mt. 27.1-2, 11-14; Lc. 23.1-5; Jn. 18.28-38)*

¹ A ntá ó k'uínkaséyan ntá tí sín nchat'á t'et'otan kójnkotséko sín tí sín táda la ko tí sín tjako tí ley la ko kaín tí sín t'et'otan kuènte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'in Jesús ntá kjuikaán sín ch'án tí tjen tí ch'in Pilato. ² Ntá tí ch'in Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'in Jesús ntáchro ch'án kixin:

—Kjaxian jaha ntáchrua —ichro ch'án.

³ A ntá tí sín nchat'á t'et'otan mé k'ueka sín ch'án nchónhya jje. ⁴ Ntá ch'in Pilato xikjanchankí ch'án inaá ntáchro ch'án kixin:

—¿Jaha, nkekuènté t'et'ehya ninkehó? Tsjehé kixin nchónhya jje t'eka sín tí jaha —ichro ch'án.

⁵ A ntá ch'in Jesús la ninkehó kjuáteheya ch'án. Ntá ch'in Pilato la í noehya ch'án nkehe tsjenkayáxin ch'án.

*K'uáyéhe ch'in Jesús kixin sinchekjasóte sín ch'án ntá its'en ch'án
(Mt. 27.15-31; Lc. 23.13-25; Jn. 18.38—19.16)*

⁶ A ntá ch'in Pilato mé kuènen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxí tjinkaon tsjanchia tí sín tsikójnkotsé tí kia a. ⁷ A ntá ntiha tjechjina ijnko ch'in mé it'in Barrabás, la ko í so sín kuitekakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankixin sín kjuanchehe sín tí ch'in Pilato kixin chrókjuich'e ch'án éxí kaín nánó xikaha. ⁹ Ntá kjuátehe ch'in Pilato kixin:

—¿Á tjinkaónrá tsjtoha sátsji tí ch'in Rey t'et'uenhen tí sín judío? —ichro ch'án.

¹⁰ Mé xikaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'et'otan, a ntá tsé sín tí ch'in Jesús kjuikénhen sín ch'án. ¹¹ A ntá tí sín nchat'á t'et'otan a mé kjuínchekóninkaon sín kaín tí chojni síin, ntáche sín kixin íchá jina chrókjuanchia sín kixin chrók'uatjanta ch'án tí ch'in Barrabás. ¹² Ntá ch'in Pilato kjuanchankí ch'án ntáchro ch'án kixin:

—A ntá tí ch'in tikítexínrá kixin ch'in Rey t'et'uenhen tí sín judío la ¿nkehe tjinkaónrá sjt'aha ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín kixin:

—¡Tjakénkana ch'án ntacruz!

¹⁴ Ntá ch'in Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuich'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkana ch'án ntacruz! —ichro sín.

¹⁵ Ntá ch'in Pilato mé tjinkaon ch'án sinchexiteyá ch'án tí nkehe kjuanchia tí sín k'uixité ntá kuitóhe ch'án kixin sátsji tí ch'in Barrabás. Ntá k'uet'otan ch'án kixin tsjate sín tí ch'in Jesús. Ntá kjuixin ntá kjuanjon ch'án kjuachaxin kixin tí sín soldado sátsjiko sín ch'án tsjak'enkana sín ch'án ntacruz.

¹⁶ Ntá tí sín soldado a mé sákjuíko sín ch'án tí ntasin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá

kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsik'óna ntach'í. ¹⁸ Ntá kjuankíxin k'uúixité sín ntáchro sín kíxin:

—Jnkochrixín tsjak'e tséuñhén tí sín judío —ichro sín.

¹⁹ Na ntá ntavara chjéhe sín ikja ch'án na ko ntaté sín kuikite sín ch'án. K'uéjóxín toh'in sín nkayakon ch'án kjuich'eyáxixín sín éxí imá chrókjuosáyehe sín ch'án. ²⁰ Ntá tió kjuixín xíkaha kjuich'ehé sín ch'án kjuanoá sín ch'án ntá kuakitsjehe sín ch'án tí ka kjátse tié tsikjinchek'inkáya sín ch'án ntá kjuínchek'inkáya sín ch'án iké ch'án xráxín ínaá. Ntá kuakitsjexín sín ch'án ntiha sákjuiko sín ch'án kíxin ntá tsjak'enkanı sín ch'án ntacruz.

Ntá kjuak'enkanı sín ch'in Jesús ntacruz
(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'in tsíkjin chjasín Cirene, mé it'in ch'án Simón, mé xjeen ch'án mé tí ch'in Alejandro la ko tí ch'in Rufo, mé tsíkjin ch'án nontee ch'án, ntá k'uátsínka ch'án ntiha. Ntá tí sín soldado a mé k'uetuñhén sín ch'án kíxin tsochréhe ch'án tsamá ch'án tí ntacruz tsjak'enkáni sín ch'án Jesús.

²² A ntá sákjuiko sín tí ch'in Jesús ijnko tjo it'in Gólgota, na mé nkívee sín t'axrxjén kíxin Tjo Calavera. ²³ Ntá ntiha chjéhe sín ch'án xranvino tsik'ixínkíjxín xroñ mirra chrók'ui ch'án, kjánchó k'uihya ch'án. ²⁴ Ntá tí sín soldado kjuak'enkanı sín ch'án tí ntacruz a. Kjuixín ntá kjuich'exín sín suerte tí ké ch'án kíxin tsonhe sín nkexéhe tí ka sátsjiko sín jnkojnko sín.

²⁵ A ntá ó las nueve nchítje tí kjuak'enkanı sín ch'án tí ntacruz a. ²⁶ Ntá ikja tí ntacruz kjuak'enkanı sín ijnko ntachiso ntsí tsikjin sín nixja nkekuente kjuínchekjasóte sín ch'án na mé ntáchro kíxin: “Jehe ch'án mé Rey kuente tí sín judío”. ²⁷ Na ko kjaxín k'uéjójáni sín ntacruz yaá tí síchee la ijnko la nánko chjina la í jnko la nó kjon tí tjen ch'in Jesús. ²⁸ Na mé xíkaha xiteyá éxí nixja xroon itén Dios ntáchro kíxin: “Éxí yóhe ijnko chojni kjuasin jje mé k'uíkon sín ch'án”*.

²⁹ Ntá tí sín k'uátsínka ntiha mé kjuanoá sín ch'án la ko k'uántaxínhín sín ch'án tinkátjía kja sín ntáchro sín kíxin:

—Kjá na ntáchrua kíxin chrók'oxíka tí ñínko, a ntá iní yaon koá la ó chrókjuixín chrókjuich'éna ínaá,† ichrua. ³⁰ Nchekaá asán jahvá tjasínkajínxián tí ntacruz méhe —ichro sín.

³¹ Ntá tí sín nchát'á t'etqan la ko tí sín tjako tí ley mé kjuanoá sín ch'án ikjo sín kíchó sín kíxin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án. ³² A ntá chaxín jehe ch'án tí Cristo tí Rey kuente tí nación Israel ntá chrók'ui konni kíxin jehó ch'án chrókjuinkajínxín ch'án asén ch'án tí ntacruz ntá kjaxín chrókuitekaonni ch'án —ichro sín.

Kjónté tí yaá sín kjaxín tjejóyáni ntacruz mé k'uántaxínhín sín ch'án.

Ntá k'uén ch'in Jesús
(Mt. 27.45-56; Lc. 23.44-49; Jn. 19.28-30)

³³ A ntá tió kui chonkíxin mé k'uúixín tie kuenté chjasintajni, kóxrjenhen tí sítié hasta las tres kónjín ³⁴ ntá tí hora a mé itsen k'uèya ch'in Jesús ntáchro ch'án kíxin:

—Eloi, Eloi, ¿lama sabactani? —tí nkívee sín mé t'axrxjén kíxin: It'éni, It'éni, ¿nkekuenté kujtohéni?‡ mé xíkaha ichro ch'án.

³⁵ Ntá iso sín síin ntiha kuínhín sín, ntá ntáchro sín kíxin:

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

—Tinhínrá kixin t'íyehē ch'án tí ch'ín Elías tí ch'ín k'u'échrónka itén Dios ósé —ichro sín.

³⁶ Ntá ijnko tí jehe sín síin ntiha kuinká ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kjinjin ntá kjuínchekjina ch'án tí tjen ir'va ch'ín Jesús chrók'ui ch'án tí vino náxrjónhya. Ntáchro tí ch'ín a kixin:

—Tsítóheni tsotsjeheni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixin k'uén ch'án. ³⁸ A ntá tí ka tjenkákuènxín nkaxenhen njnko mé yaá k'óna k'uichje kjuankíxixín noi la hasta nonte k'uichje. ³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixin xíkaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé. ⁴¹ A ntá tí chojni chjin í mé kuinkáchréhē sín tí ch'ín Jesús ntá kjuíkəo sín ch'án kixin k'uékjinkitsa sín ch'án tí k'uékjak'e ch'án estado Galilea la ko kjaxin í so chojni chjin inaá chréhē sín ch'án sákjuiko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankíxixín tí yaon t'ok'éhe sín, ⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etəoan ch'án tí xra kuente tí síxreé. Kjaxin jehe ch'án tjechónhen ch'án itsi tí kjuachaxin kuente Dios. Chrakonhya ch'án sákjuí ch'án ntəe ch'ín Pilato kjuíkjanhia ch'án tí cuerpo kuente ch'ín Jesús. ⁴⁴ Ntá ch'ín Pilato chrakon ch'án kixin ó tsíkjin tsík'en ch'ín Jesús, ntá k'uíyehē ch'án tí ch'ín capitán a kjuanchankíhi ch'án kixin á chaxín xíkaha kónhen. ⁴⁵ Ntá chrónka tí ch'ín capitán kixin chaxín ó kjuixin k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixin tsjikakja ch'ín José tí cuerpo kuente ch'ín Jesús. ⁴⁶ Ntá ch'ín José mé k'uəna ch'án ijnko ka sábana náxrjón. Ntá kjuinkajin ch'án tí cuerpo kuente ch'ín Jesús, a ntá jehe tí ka a mé kjuínchek'isímá ch'án tí cuerpo kuente ch'án. Ntá kjuak'enkaya ch'án ijnko tőye tsíxrayá itjo. Ntá ijnko xro jé mé k'uíkjəxin ch'án tí ntója tí tőye. ⁴⁷ A ntá tí tjan María Magdalena la ko tí tjan María iné ch'ín José mé k'uikon sín nketí xrává ch'án.

16

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'ín Jacobo la ko tí tjan Salomé mé k'uəna sín xroən xraxé sátsjiko sín sincheka sín tí cuerpo kuente ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tőye tsíxravá ch'án, na mé ó kjuítəon yaon.

³ A ntá jehe sín mé tinkákjo kichó sín kixin:

—¿Xá nkexro tí chrókuakjinhinni tí xro tjejkjəxin tí tőye? —ichro sín.

⁴ **A** ntá xríngahya k'uikon sín kixin ó tsíkjin tsíkjin tí xro jíe tjejkèxin tí tòye kixin í tjenhya éxí k'uékjak'e senó. ⁵ Ntá kjuíjín sín ikon tí tòye ntá k'uikon sín kixin tjetjaxín ijnko ch'ín ntasoá tí tja sín chjina tjenkaya ch'án ka kjinjin tjóá ntá imá chrakon sín k'uikon sín. ⁶ Ntá ntáchro ch'án kixin:

—Chrakonhyará. Ó nóna kixin xritjéyará jahará tí ch'ín Jesús tsíkjin chjasín Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án. ⁷ Ntá sájtjirá tjíchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchronka ch'án —mé xíkaha chrónka tí ntasoá a.

⁸ Ntá tí chojni chjin a mé sákjuíxin sín tí tsíxravá tí ch'ín Jesús imá síxranka sín chrakon sín. Ntá naxá chenkahya sín ninkexró kixin chrakon sín.

*Ch'ín Jesús titàya xeta tí tjan María Magdalena
(Jn. 20.11-18)*

⁹ Tió tsíkjin tsíxechón ch'ín Jesús nchítjen tí yaon xrankíxixín semana ntá titàya xeta ch'án saxín tí tjan María Magdalena na mé jehe tjan tsíkakitsjexín ch'án yato nchakuen tí jínahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ **A** ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

*Iyó sín k'uék'ajiko ch'ín Jesús titàya k'uikuén sín tí jehe ch'án
(Lc. 24.13-35)*

¹² **A** ntá chr'éxin ntá iyó tí sín a titàya k'uikuén sín tí ch'ín Jesús, ókjé nkexri tsjehe ch'án. Tí sín a mé tjejótti sín ntíja sátsji sín ijnko nonte. ¹³ **A** ntá jehe sín sákjuíchenka sín tí sín í so a; la kjónté xíkaha la kuítekakonhya sín.*

*Ch'ín Jesús k'uetuenhen ch'án tí sín k'uék'ajiko ch'án tí xra sich'e sín
(Mt. 28.16-20; Lc. 24.36-49; Jn. 20.19-23)*

¹⁴ **A** ntá tió kjuixixín la titàya k'uikon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuénté icha asén sín tsíkitekakuenhya sín tí sín tsík'ikon kixin tsíxechón ch'án. ¹⁵ Ntá ntáche ch'án sín kixin:

—Sájtjirá kuenté chjasintajni tjákoherá kaín xín chojni tí tan jína tsaáxin sín. ¹⁶ Tí nkexro tsiteka na tsíkite la mé tsaá. **A** ntá tí nkexro tsitekakonhya na mé tsjasóte. ¹⁷ Ntá tí sín tsínkáchónki tí janhan mé tsjasín sín kjuaxroan kixin kjuachaxín nina tsakitsjexín sín tí nchakuen tí jínahya chóna chojni la ko tsonixa sín ókjé nkiva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxín ts'ejotja tja sín chojni níhi la tsitóhe sín jína.

*Ch'ín Jesús chrín ch'án nkaya nkajní
(Lc. 24.50-53)*

¹⁹ Ntá ó kjuixín nixjehe Ìnchéni Jesús tí jehe sín ntá sákjuí ch'án nkaya nkajní. **A** ntá ntiha kjuák'etjaxín ch'án tí tja chjina Dios. ²⁰ **A** ntá jehe sín sákjuí sín nkuíxín sákjuíjako sín tí tan jína tsaáxin chojni. **A** ntá jehe Ìnchéni mé kjuínkítsa ch'án tí sín a la ko kjuachaxién ch'án mé kjuasixín sín kjuaxroan kixin tíha mé tsonoxín tí sín tjejóttihin kixin chaxín nkehe kuénte Dios kjuako sín. Amén.

* **16:13** Lucas 24.13-35

Tí tan jína chrónka ch'ín Lucas

Tíhi mé xránkixín tí xroon i

¹ Nchónhya chojni tjínkaon chrókjin sín ntoá kaín xín nkehe nkexrí kónhen k'uátsínka Inchéni tí k'uéjóni. ² Éxí kjuakoheni tí sín tsík'ikonxín kon sín tí xránkixín nkehe k'uátsínka ch'án la ntá k'uáyéhe sín tí xra sákuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xránkixín. Ntá nóna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha ⁴ kixin ntá jaha tsoñoa jína tí nkehe chaxín tsíkjakoha sín.

Jjngo ángel mé chrónka kixin tsokjihi Juan Bautista

⁵ A ntá tí ch'ín rey Herodes k'uetóan ch'án tí estado Judea la ko ntiha kjuák'e ijnko nchat'á mé it'ín Zacarías. Jehe ch'án mé kuente tí sín tsík'axrjeníxín tí ch'ín Abías.* A ntá ichjién ch'án mé it'ín Elisabet. Jehe tjan mé tsík'axrjeníxín tjan tí nchat'á Aarón. ⁶ Yóí sín na mé jína sín kixin éxí tjínkaon Dios la mé kjuínchexiteyéhe sín kaín nkehe k'uetóan ch'án. Méxra ninkexró chrók'uekahya jje tí jehe sín. ⁷ A ntá jehe sín chóntahya sín xjeen sín kixin ó jehí tsíkítóenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yaon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuente Dios. ⁹ A ntá xikaha kuénhen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuente njnko tsjak'e ch'án chjincó chrítaón tí altar kuente Dios. ¹⁰ Ntá kjuák'e ch'án ntiha kjuák'e ch'án tí chjincó la nachrohe kaín tí chojni k'uéjó sín ntója nixjehe sín Dios. ¹¹ Ntá xringahya k'uúkon ch'ín Zacarías ijnko ángel kuente Dios tjexín toté ch'án nánko chjina tí altar tjak'exín sín chjincó. ¹² A ntá tió k'uúkon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sinchek'ian xjan Juan. ¹⁴ Jaha la tsocháha má la ko itsjé chojni tsochéhe sín kixin tsokjihi xjan ¹⁵ kixin imá tjetóan tsjak'e tí xjaan éxí tóxrjnhin Dios. Ninkehó xran vino la ko ninkehó í jnko xran ts'ihya ch'án. Tsochóna ch'án kjuachaxin kuente Nchakuen Dios kjónté naxa tokjéhya ch'án. ¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Inché sín Dios. ¹⁷ Jehe ch'ín Juan tsítaon ch'án ntia tsixín Inchéni. Éxí k'uékjako ch'ín Elías ósé mé tsjak ch'án la ko tsochóna ch'án kjuachaxin éxí k'uéchóna ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Inchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—¿Nkexrí chrókónna kixin chaxín chrókónhen tíhi? Janhan la ó tádana la ko tí hjin chonta la kjaxin ó nána tjan —ichro ch'án.

* 1:5 1 Crónicas 24.10

¹⁹ Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'ahá xrá Dios. A ntá jehe ch'án mé k'uetuanna k'uinka tsonixjaha tsoxrjanka tí nkehe jina tsonhen. ²⁰ A ntá jie kuitekákonhya tí nkehe xrjanka a ntá tsonósian jaha xitjahya tsonixja jaha tsoxitjaja tí yaon tsokjhi tí xjaan. Mé xikaha tsoxiteyá kaín tíha —ichro ch'án.

²¹ A ntá tí í so sín ntiha k'uéjóchónhen sín ntója nínko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen nínko. ²² Ntá tió k'uaxrjéxín ch'ín Zacarías tí nkaxenhen nínko la í xitjahya nixja ch'án. Ntá kónohe sín kixin ichrén kjuaxroan kuente Dios tsík'íkon ch'án tí nkaxenhen nínko. Ntá itja ch'án ó tjákojín ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xrá nínko ntá sákjuí ch'án ntøe ch'án. ²⁴ A ntá chr'éxín ntá kjuák'eyá tí ichjién ch'án Elisabet. Ntá ntøe tjan ó kuitøe tjan in'ó nitjó kjuenkayáxin tjan kixin: ²⁵ “Mé xikaha ijnko kjuaxroan kjuanjon Inchéni kixin chrók'uántaxiénhyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjhi Jesús

²⁶ A ntá k'uatínsínka injon nitjó ntá Dios k'uetuenhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret, ²⁷ sátsji nixjehe ch'án ijnko tjan tjarisoá naxa kuákjahya tjan chojni ntoa mé it'in tjan María. Jehe tjan mé tsíkatehe tjan kixin tsøtehe tjan injnko ch'ín mé it'in José, mé tsík'axrjeníxin ch'án tí ch'ín rey David. ²⁸ A ntá tí ch'ín ángel k'uíxenhen tí tjen tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Inchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxin tjan kixin nkekuente xikaha nixjehéni ch'án, ichro tjan. ³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha. ³¹ A ntá jie la tsjak'éyá jaha, tsochonta injnko xjan ntoa la ko sijnchek'ian xjan Jesús. ³² Imá ts'etøan ch'án la ko its'in ch'án Xjeen Dios nkaya nkajní. Inchéni Dios mé tsjanjon ch'án kjuachaxin ts'etøan ch'án éxí injnko rey éxí k'uetøan ch'ín David, tí nkexro ts'axrjeníxin ch'án. ³³ Jnkochrínín tsjak'e ch'án ts'etueñhen ch'án tí sín nación Israel, la mé tsejehya tí kjuachaxin ts'etøan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuente kixin xikaha chrókónhen kixin janhan la naxa chontahya chojni ntoa? —ichro tjan.

³⁵ Ntá kjuátehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxí injnko tjuí la ko tí kjuachaxin kuente Dios mé tsjak'etja tí jaha, a ntá ts'óna tí xjan. Mé xikaha tí xjan tsokjhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchóntahya tjan xjan, a ntá jie la ó injon nitjó tjeýá tjan. ³⁷ Kixin tí kjuachaxién Dios la tsjacha tsonhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'ahá Ìnchéni Dios xra. Ó nchoxon tí nkehe k'uetōan ch'án sintaxiteyáha ch'án éxí chronka jaha —ichro tjan.

Ḃ ntá kjuixin chrónka tí ch'in ángel ntá sákjuí ch'án.

Tjan María sákjuitsjehe tí tjan Elisabet

³⁹ Ḃ ntá ijnko yaon tí tjan María tjan sákjuí tjan ijnko chjasin tjan tí jna estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntōe ch'in Zacarías la ntá nixjehe tjan tí tjan Elisabet. ⁴¹ Ḃ ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhe tjan kjuachaxién Nchakuen Dios ⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaoan ch'án tí xjaan. ⁴³ Xá nkexo tí janhan kixin kjuínixjana iné Ìnchéni? ⁴⁴ Tió kujnhan nixjana ntá tí xjan la chrika xjan nkaya tseña kixin chéhe xjan kjuíha. ⁴⁵ Ntá jaha la cháha kixin kuítekáván kixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nõe ch'exón xra kuente ch'án.

Ḃ ntá ijie la ko jnkochríxín tsontáchro chojni kixin náxrjón tjèn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixínna ch'án ijnko kjuaxroan jie;

imá tjóá tí ihnjé ch'án.

⁵⁰ Jnkochríxín tsikonóhe ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jie;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etōan,

Ḃ ntá tí sín nõa k'uék'etuannya senó la mé jie chjéhe ch'án kjuachaxin ts'etōan sín.

⁵³ Ḃ ntá tí sín t'enxín kjinta la kjuanjon ch'án kaín nkehe tsicháxinhin sín, Ḃ ntá tí sín rico xráxín jehó tja sín sákjuí sín.

⁵⁴ Kjuínkítsa ch'án tí sín nación Israel kixin tjejóh'ehe sín ch'án xra;

k'uitjáyenhya ch'án tí jehe sín kujikonóhe ch'án sín,

⁵⁵ éxí k'uéchenka ch'án tí sín k'uaxrjeníxinni k'uéjé sín ósé,

na mé tí ch'in Abraham la ko kaín tí sín naxa ts'axrjeníxin ch'án —mé xíkaha ichro tjan María.

⁵⁶ Ḃ ntá tjan María kuítóeko tjan tí tjan Elisabet iní nitjó la ntá chr'éxin xíkjan tjan ntōe tjan.

Kokjíhi ch'in Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, Ḃ ntá kjuínchekokjíhi tjan ijnko xjan ntoa. ⁵⁸ Ḃ ntá tí sín chjinaxón ntōe la ko tí sín kjéhya tjan mé kjuíjitsjehe sín kixin tsōchéheko sín tjan kixin kuínhin sín kixin Dios imá tsíkikonóhe tí jehe tjan. ⁵⁹ Ntá tí yaon jnixin ikui sín sincheka sín xjan tí xroye kuente tí sín judío. Ntá chrókjuinçek'in sín xjan Zacarías éxí it'in it'é. ⁶⁰ Kjánchó ntáchro iné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuènte kixin xikaha chrók'uin xjan? Kohya nkexro naxa kjéhya xikaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uin tí xjan. ⁶³ A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnjé xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ A ntá xrínahya ch'ín Zacarías kjuankíxin ch'án nixja ch'án ínaá kjuanchehe ch'án Dios kjuasáya. ⁶⁵ A ntá kaín tí sín chjinaxón ntoe sín mé chrakon sín. La ntá nkuíxín tí jna kuènte estado Judea mé kjo sín kichó sín chrónka sín kixin xikaha tsíkónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xra tsíkítónhen tí xjan í? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé antsí k'uáyéhe ch'án kjuachaxin kuènte Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jína Ìnchéni, na mé tí Dios kuènte tí naciòn Israel, kixin ikui ch'án tí tjejóni kjuínchekaá ch'án naciòn kuènténi.

⁶⁹ La ko kjuanjon ch'án ijnko nkexro t'etóan sinchekaáni ch'án na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xra.

⁷⁰ Éxí k'uéchronkaxín tí sín kjueyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakhenni,

⁷² tsikonóehé ch'án tí sín k'uaxrjeníxinni ósé, ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'ehe ni tí sín nínkakhenni kixin jína sich'ehe ni ch'án xra tsochrakonhyani,

⁷⁵ la ntá jína ts'ejóni sinchetjóáni ch'án kaín yaon tí naxa tjejóchónni.

⁷⁶ A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkajní.

Jaha tsítónxian ntía tsixín Ìnchéni la ko jaha tsjásiyóxian ntía tsixín ch'án.

⁷⁷ Jaha tsjáohé tí chojni chjasintajni nkexrí tsjin tí jie chóna sín, ntá tsaá sín.

⁷⁸ A ntá Dios mé tjeùeheni ch'án la ko kuíkonóeheni ch'án, kixin nkajní kujxin ijnko xrohi nixin ts'inkaséyanxín tí yaon nixin.

⁷⁹ Tíha mé tsíkjo tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxínni tí ntía tsjanjon kjuaxróxin.

Na mé kaín tíhi chrónka tí ch'ín Zacarías.

⁸⁰ A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonhe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankíxin kjuakohé ch'án tí chojni naciòn Israel.

2

¹ A ntá tí yaon a na mé tí ch'ín imá t'etōan mé it'in Augusto César na mé k'uetōan ch'án kixin ts'inixín ihnié kaín xín chojni síin tí chjasin t'etōan ch'án kixin tsoñohe ch'án nkekjaín chojni síin. ² Tí xrankixixín k'uínixín ihnié sín tió Cirenio mé k'uegobnador k'uetōan estado Siria. ³ Kaínxín chojni t'ichjánxín sátsji sín chjasén sín kixin ntaha ts'inixín ihnié sín. ⁴ Mé xíkaha ch'ín José kjaxin k'uaxrjéxín ch'án tí chjasin Nazaret estado Galilea ntá sákjuí ch'án tí estado Judea na mé sákjuí ch'án chjasin Belén tí tsíkokjéxín tí ch'ín rey David kixin jehe ch'ín José mé tsík'axrjeníxín ch'án tí ch'ín David. ⁵ Sákjuí ch'án chjasin Belén sákjuíko ch'án tí tjan María kixin ntíha ts'inixínko ihnié ch'án tjan kixin jehe tjan tsíkjatehe kixin tsothehe ch'án. A ntá jehe tjan na mé ó tjejá tjan. ⁶ A ntá xíkaha kónhen nachrohe k'uejó sín chjasin Belén, ntá kjuixraká tí yaon tsokjíhi xjeen tjan María. ⁷ A ntá ntíha kokjéxín tí xjeen tjan saó. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'exín sín mé kjónté ntíha k'uejó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titōhe sín tí tie a kixin t'ayakonhen sín kolélo. ⁹ A ntá titàya k'uikuèn sín ijnko ángel kuènte Dios la ko nkuúxín tí tjejó sín la k'uínkaséyan kixin tí kjuachaxin jíe kuènte Dios kúikao ch'án. Ntá jehe sín la imá chracon sín. ¹⁰ A ntá tí ch'ín ángel ntáchro kixin:

—Chraconhyará jahará. Ijie k'uinka tsotjonkará nkehe jina nixín kixin tsochéhe kaín xín chojni ¹¹ kixin ijie tí chjasén ch'ín David kokjéxín tí nkexro tsaáxínrá jahará na mé Ìnchéni Cristo tíha. ¹² Ntá tsoñoaxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uikuèn sín kixin nchónhya sín ángel kúixín nkaya nkajní tjejóko tí ch'ín ángel tjejótsje sín tjanchehe sín Dios kjuasáya, ntáchro sín kixin: ¹⁴ Kjuasáyé Dios tjan nkaya nkajní kixin imá chónka ch'án kjuachaxin. Ntá chjasintajni ts'ixín kjuaxróxin tí tjejó tí sín sinchexiteyéhe ch'án. Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uetōan kui tí nkexro kjuínchenoheni —ichro sín.

¹⁶ Ntá tjan sákjuí sín ntíha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kixin nkexrí tjan tí xjan a. ¹⁸ Ntá chracon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntíha kuínkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxí tsíchrónka tí ángel.

Sákjuíko sín tí xjan Jesús tí nínko Jerusalén

²¹ A ntá tió xétja tí ijní yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsíntáchro tí ch'ín ángel chénka tí tjan María tí naxa kjuák'eyáhya tjan.

22 **A** ntá tió kuitq̄he tjan María jína éxí chrónka ley kuènte Moisés * ntá sákjuiko sín tí xjan tí chjasin Jerusalén kixin tsochjéhe sín Dios kjuasáya. 23 Éxí ntáchro tí xroon ley kuènté Ìnchéni Dios kixin: “**A** ntá kaín xjan ntoa tsokjihi saoxín la mé tsochjéhe sín Dios tí xjan a sich'ehe xjan x̄ra Dios.”† 24 Ntá x̄ikaha sákjuj sín kixin ntaha tsjanjon sín iko ts'énxín ntiha tsochjéxín sín Dios kjuasáyé éxí t'etq̄an tí ley kuènte ch'án na mé yaá kontóá najni o yaá kontóá nteje chrókjuanjon sín.

25 **A** ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochr̄ixín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nacióñ Israel. Tí Nchakuen Dios tjeko tí ch'in Simeón 26 tsikjinchenohe ch'án kixin naq̄a ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios. 27 **A** ntá tí Nchakuen Dios kjuínchexraxinkaon tí ch'in a kixin sátsj̄i ch'án n̄jnko. **A** ntá tió kui tí iné la ko it'é xjan Jesús k'uixenko sín xjan nkaxenhen n̄jnko kixin sinchexiteyéhe sín tí nkehe t'etq̄an tí ley 28 ntá ch'in Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

29 Ijie jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsintáchrua

30 kixin ó k'uikoxin kuan tí nkexro tsaáximni,

31 mé x̄ikaha kjujch'e kixin ts'ikon kaín xín chojni.

32 Jehe ch'án mé tí xrohi ts'inkaséyanxín nt̄je tí sín jehya kuènte Israel, la ko jehe ch'án tsjikósayehe ch'án tí chjasín kuéntá Israel, mé ichro ch'in Simeón.

33 Ntá ch'in José la ko tí iné ch'in Jesús la chrakon sín kixin x̄ikaha kuínhin sín ntáchro ch'in Simeón kixin nkexr̄í t̄jen tí xjan. 34 Ntá ch'in Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsikj̄ao itsjé x̄ra la itsjé tí sín Israel tsitekakuenhya sín xjan la tsitq̄he sín la ko itsjé sín tsitekaon sín ants̄i tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. 35 Mé x̄ikaha tsonoxín nkexr̄í t̄jenkayáxin jnkojnko asén chojni. Kjánchó kaín tíha tsoyóh̄e éxí ijnko chica espada chróchr'áte asán na mé tsoxakonhan la ko ts'avá má —ichro ch'án nixjeh̄e ch'án tí tjan María.

36 Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsik'axrjenixin ch'án tí ch'in Aser. Jehe tjan la ó nána tjan. Tí naq̄a k'uétjarisoá tjan la kótq̄he tjan. Ntá yatokoá nánó kjuák'eko tí xii tjan 37 ntá jie ochenta y cuatro nánó tsikók'án tjan. Kuitq̄ehya tjan tí x̄ra kuènte n̄jnko la mé ntahó t̄jen tjan ch'ehe tjan Ìnchéni Dios x̄ra nchakotjin la ko tie la jnkoyaxón nehya tjan kixin jína tsonixjeh̄e tjan Dios. 38 Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexr̄í t̄jen tí xjan Jesús nixjeh̄e tjan kaín tí sín t̄jejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

39 Na ntá tió kjuixin kjuínchexiteyá sín kaín nkehe t'etq̄an tí ley kuènte Dios ntá kjan sín estado Galilea na mé chjasén sín chaxín Nazaret. 40 **A** ntá tí xjan a mé k'uánkí xjan la ko tsanq̄a xjan la ko imá kónohe xjan kixin Dios imá tjink̄itsa t̄jencheyaon xjan.

* 2:22 Levítico 12.1-8 † 2:23 Éxodo 13.2,12

Tí xjan Jesús kjuák'e xjan tí n̄nko Jerusalén

⁴¹ Tí it'è la ko iné tí xjan Jesús xráxín k'uék̄ji sín kaín nánó tí chjasin Jerusalén kixin tí kia pascua. ⁴² A ntá tió xetjehe ch'in Jesús tí teyó nánó, ntá sákjui sín kaín sín tí chjasin Jerusalén kixin xikaha kuèhnen sín kixin tí kia a. ⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsíktohe xjan Jerusalén ntahó, kjánchó iné xjan la ko ch'in José xraxinkakonhya sín kixin kohya tí xjan. ⁴⁴ Jehé sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntia tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen n̄nko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. ⁴⁷ Ntá kaín tí sín tjejótaxin tjejótinhin sín mé chrakon sín kixin xikaha imá nohe xjan la ko xikaha tjetjehe xjan kaín nkehe tjanchankíhi sín xjan. ⁴⁸ Ntá tió k'uúkon iné la ko it'è la chrakon sín. Ntá ntáchro iné kixin:

—Xjeenni, ¿nkekuènte xikaha kjuich'e? It'á la ko janhan imá kóxakönhenni kjueyáni tí jaha —ichro tjan.

⁴⁹ Ntá ntáchro ch'in Jesús kixin:

—¿Nkekuènte tjéyá tí jeheni? ¿Á noahya jaha kixin tóxakönhenni kixin tí xra kuènte It'èni? —ichro ch'án.

⁵⁰ Kjánchó kienxínhya sín nkexri t'axrjéxín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naḡa kuítekakonhen xjan tí jehe sín. A ntá tí iné la ntá asén tjan xráxín ó nohe kixin xikaha kónhen. ⁵² La ko naḡa k'uánkí xjan koxeto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexri kjuínchexitéyá xjan la ko kjaxin kaín chojni kóxrjínhin sín kixin jina tjan xjan.

3

Ch'in Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etjan ch'in Tiberio tí xra gobierno, la ko tí ch'in Poncio Pilato k'uégobrador tí estado Judea, la ko tí ch'in Herodes k'uégobrador tí estado Galilea, la ko tí kichó ch'án Felipe mé k'uégobrador estado Iturea la ko estado Traconite, la ko ch'in Lisaniás k'uégobrador tí estado Abilinia. ² A ntá ch'in Anás la ko ch'in Caifás k'uéchénta sín xra nchat'á t'etjan. A ntá Dios mé kjuanjon kjuachaxin k'uáyéhe ch'in Juan itjen ch'án nteje tsochrónka ch'án itén Dios. Ntá jehe ch'án it'è ch'án Zacarías. ³ Ch'in Juan k'uátsínka ch'án kaín tí chjasin chjino tí ntario Jordán kjuakohe ch'án chojni ntiha kixin chrókjuinkí sín tí nkehe tjenkayáxin sín chrókuíttohe sín tí ijié sín ntá chrókuikite sín kixin xikaha mé chrókjuin ijié sín. ⁴ Mé xikaha kónhen éxi k'uéchronka la ko tsíkjin ch'in Isaías, mé tí nkexro k'uéchronka itén Dios óse kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Inchéni
Takítjehérá ijnko ntia ntoí.

⁵ Kaínxín tsaka mé tsoyóxin,

la ko kaín xín jnā la ko kaín xín itjo tsitōhe yóxin,

la ko tí ntja tsíxrèya mé tsoxrentoá,
la ko kaín tí ntja yóxinhya la mé tsoyóxin;

⁶ Xíkaha mé kaín xín chojni chjasintajni mé ts'ikon sín kixin Dios mé chrókuaáxin sín.*
Mé xíkaha ichro itén Dios.

⁷ A ntá tió kjuíji chojni ntiha kixin ch'ín Juan chrókuiqite ch'án sín ntá ntáche ch'án ti jehé sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkojína chrókjuákoxinrá kixin chaxín kjuitoxinhínrá tí nkehe tjenkayáxinrá. Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóna yaá camisa la chrókjuincheqitonhen tí nkexro chóntahya. La ko tí nkexro chóna nkehe sine chróchjéhe sín tí nkexro chóntahya nkehe sine —ichro ch'án.

¹² Kjaxin ikui iso tí sín nchekjènkj kixin chrókuiqite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'ín Juan kixin:

—Jehó éxi tí tsík'ítuanhanrá chrókjuincheqjènkjirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chichakqen sín la ko ninkexró sich'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uejóchónhen sín tóxakonhen asén sín tjinkaon sín tsoñohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé intá tikjexián chojni. A ntá tí nkexro itsi chr'éxin mé tsikjexiánrá tí Nchakuen Dios la ko xrohi. Antsi t'etqan ch'án a ntá janhan la kánhyó. Méxra chrókósuána chrókjuasintankaha ch'án tí correa tí tokaté ch'án. ¹⁷ Jehé ch'án la ó tjexaa ch'án pala sinchetjuáxin ch'án noatrigó kixin tí ntachjiji trigo la ókjé tsjejo ch'án a ntá tí noatrigó la tsjenájín ch'án la ts'enkächjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xíkaha ichro ch'ín Juan.

¹⁸ Mé xíkaha chronkaxín ch'án la ko itsjé í so nkehe kjuínchexraxinkaon ch'án chojni mé xíkaha kjuakqoxín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjich'e ch'án. ²⁰ Kjánchó ch'ín Herodes ántosén ch'án kjónté kuínhin ch'án la

* 3:6 3.4-6 Isaías 40.3-5

kjuínchek'ánkí ch'án tí ijíe ch'án ínaá kíxín kjuak'echjina ch'án tí ch'ín Juan tí ntóechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxá kuènhya tíha naxá kjuák'e ch'ín Juan kuikite ch'án chojni ntá kjaxín ch'ín Jesús mé kuikite ch'án. A ntá tjenixjehe ch'án Dios ntá xitjehe nkajní ²² ntá k'uínkajín Nchakuen Dios éxí ijnko kontóá tsjehe la kjuák'e chrítaón kja ch'án. Ntá xrínahya kuínhin sín itén nkexro nkaya nkajní ntáchro kíxín:

—Jaha mé xjanna la tjuaha tí jaha. Imá chàna kíxín nchexiteyána tí jaha.

Tí sín tsík'axrjeníxín ch'ín Jesucristo

(Mt. 1.1-17)

²³ Ch'ín Jesús k'uéchónta ch'án chjino treinta nánó tíó kjuankíxín kjuako ch'án. Ntá kjuenkayáxín sín kíxín it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isai, a ntá it'é tí ch'ín Isai na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'é tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lamec na mé ch'ín Matusalén, a ntá it'é

tí ch'in Matusalén na mé ch'in Enoc, a ntá it'é tí ch'in Enoc na mé ch'in Jared, a ntá it'é tí ch'in Jared na mé ch'in Mahalaleel, a ntá it'é tí ch'in Mahalaleel na mé ch'in Cainán, ³⁸ a ntá it'é tí ch'in Cainán na mé ch'in Enós, a ntá it'é tí ch'in Enós na mé ch'in Set, a ntá it'é tí ch'in Set na mé ch'in Adán, a ntá Dios mé xjeen ch'in Adán.

4

Ch'in Tsochren chrókjuachroe tí ch'in Jesús

(Mt. 4.1-11; Mr. 1.12-13)

¹ A ntá ch'in Jesús imá chóna ch'án kjuachaxiën Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'in Tsochren tjinkaon chrókjuachroe tí jehe ch'án. Kjóneha ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta. ³ Ntá ntáchro tí ch'in Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'in Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'in Tsochren tí ch'in Jesús ijno jna imá noi ntá kjuako tí Jínaha kaín tí nación síin chjasintajni. ⁶ Ntá ntáchro tí ch'in Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjikosáyana tí janhan ntá kaín tí nkehe la ts'óna kuéntá —ichro ch'án.

⁸ Ntá kjuátehe ch'in Jesús ntáchro ch'án kixin:

—Sátja Satanás, kixin xroon itén Dios ntáchro kixin “Chrókjuíkosáyehé Ìnchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'in Tsochren mé sákjuiko ch'in Jesús tí chjasin Jerusalén la sákjuiko ch'án tí chrítaón tí kja nínko, a ntá ntáchro ch'án kixin:

—Tí chaxín Xjeen Dios jaha la títóhé t'anótjenxian tí noi ntihi ¹⁰ kixin ntáchro xroon itén Dios kixin:

Dios mé ts'etuennenhén tí sín ángel kuénte ch'án kixin ts'ayakonhan sín.[‡]

¹¹ Tsotsé sín itjá

kixin tsotéhya totá ts'itja xro tí ts'anótjen§

—mé xikaha ichro ch'in Tsochren.

¹² Ntá kjuátehe ch'in Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroan kjuachaxin kuénte Ìnchéni Dios”^{*} —ichro ch'in Jesús.

¹³ Mé xikaha tió kjuachahya tí ch'in Tsochren kaín nkehe chrók'uetuennenhén tí ch'in Jesús ntá k'uaxrjenta ch'án iso yaon.

Ch'in Jesús kjuankixin ch'án tí xra kuénte ch'án estado Galilea

(Mt. 4.12-17; Mr. 1.14-15)

¹⁴ Ntá ch'in Jesús xikjan ch'án estado Galilea inaá na imá chóna ch'án kjuachaxin kuénte Nchakuen Dios. Ntá tjejóto sín nkuíxín ntiha kixin nkexro tí jehe ch'án. ¹⁵ Kjuakoxin ch'án tí nínkqe sín kaín chjasin la ko kaín xín chojni kjuanchia sín kjuasáya kixin kórxjinhin sín tí kjuako ch'án.

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12

* 4:12 Deuteronomio 6.16

Ch'in Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'in Jesús sákjuí ch'án chjasin Nazaret na mé tí chjasin tsík'ánkíxin ch'án. Ntá tí yaon t'ok'éhe sín mé k'uíxnenhen ch'án ijnko nínko Israel kíxin xíkaha kuènhen ch'án. Ntá kjuák'exín toté ch'án kíxin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuènte tí profeta Isaías. Ntá kuakitjehé ch'án tí xroon ntá k'uitja ch'án nketí nixja xíkíhi:

¹⁸ Tí Nchakuen It'eni Dios tjetjinkítsana má, kíxin kjueyána ch'án kíxin tsoxrjanka tí tan jína kuènte Dios tsjakohá tí sín nòa. K'uètuanna ch'án kíxin sintakítóhà jína tí sín t'avá asén kíxin chóntahya sín nkerí tsaáxin sín,

la ko tsjakohá tí sín tjejóhjjina kíxin nkexrí tsaá sín,

la ko sintak'ikuán tí sín t'ikonhya,

la ko sintakaá kaín tí sín tjejótjasóte kohya nkehe tsaáxin sín,

¹⁹ la ko tsoxrjanka kíxin ó kjuixraká tí yaon kíxin tí nkexro tsitekaon la tsaá sín.†

²⁰ A ntá ch'in Jesús kjuixin kjuínchekuáxin ch'án tí xroon, a ntá chjéhe ch'án tí ch'in tjinkítsa tí xra nínko ntá kjuák'etjaxín ch'án. Ntá kaín tí sín tsíkójnko tsé ntiha nínko naxá tjejókomá sín tí jehe ch'án. ²¹ Ntá kjuankíxin chronkaxín ch'án ntáchro ch'án kíxin:

—Ntá ijie la ó xiteyá tí nkehe kjuíntakuáxian tí xroon itén Dios kuínhínra —ichro ch'án.

²² Ntá kaín sín kóxrjínjin sín tí kjuako ch'in Jesús la ko chrakon sín kíxin náxrjón tí nkehe nixja ch'án. Ntá kjuanchankíhi sín kíchó sín ntáchro sín kíxin:

—¿A jehya xjeen ch'in José tíhi? —ichro sín.

²³ Ntá kjuátéhe ch'in Jesús ntáchro ch'án kíxin:

—Kjá tsontáchrórá kíxin janhan ijnko chojni ch'e xroan chrókuíntakítóhà jína asenná senó, la ko tsontáchrórá kíxin tí nkehe kuínhínra kjuít'a tí chjasin Capernaum xíkaha chrókuí't'a ntihi chjasenná, tsixrorá —ichro ch'án.

²⁴ Naxá tjenixja ch'án ntáchro ch'án kíxin:

—Ijnko nkehe chaxín tsotjonkará kíxin tí sín chjasén ijnko nkexro chrónka itén Dios la mé xráxin chóntehya sín kjuasáyé tí nkexro a. ²⁵ Chaxín ntáxrjan kíxin k'uéjé itsjé chojni chjin tsíkók'án tí nación Israel tió kjuák'e ch'in Elías tí nkexro k'uéchrónka itén Dios la ntá í k'uániáhya chrin iní nánó ko t'ó la ko imá kókjinta nkuíxin chjasin ntiha. ²⁶ Kjánchó Dios la k'uètuenhya ch'in Elías sáchrókjuitsjehe ch'án nijnko chojni chjin tsíkók'án tí nación Israel. Náhi. Dios k'uètuenhén ch'án kíxin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón.‡ ²⁷ Kjaxin nación Israel k'uéjé nchónhya chojni chóntha chinlepra tió kjuák'e ch'in Eliseo chrónka ch'án itén Dios, kjánchó nijnko sín kuitóehya sín jína la mé jehó ch'in Naamán kjuixín ch'án nación Siria mé kuitóhe ch'án jína§ —mé xíkaha ichro ch'án.

²⁸ A ntá tió kuínhin sín xíkaha ntáchro ch'in Jesús la ntá kaín tí chojni k'uéjóxnenhen nínko la mé imá kónínkaon sín. ²⁹ K'uínkatjen sín itsé sín ch'án sákjuíko sín ch'án tí ikon chjasin la sákjuíko sín ch'án chrítaón tí tjo tí tjen tí chjasin a chrókjuinchek'anótjenxin sín ch'án tí tjo a. ³⁰ A ntá ch'in Jesús k'uátsínka jnkosiné tí siín tí jehe sín la sákjuí ch'án.

Ijnko chojni chón̄ta injnko nch̄akuen tí jínahya

(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé injnko chjasin estado Galilea, na ntá ntaha kjuankíxín ch'án kjuakoh̄e ch'án chojni tí yaon t'ók'êhe sín. ³² Chrakon sín kxín nkexrí kjuako ch'án kíxín kjuakox̄ín ch'án kíxín chón̄ta ch'án kjuachaxín.

³³ A ntá nkaxenhen n̄jnko kjuák'e injnko ch'ín chón̄ta injnko nch̄akuen tí jínahya k'óyako x̄ín itén tí ch'ín a, ntáchro kíxín:

³⁴ —Títōhéni; ¿nkekuènte t̄jaté tí jeheni kaín ni, jaha Jesús kjuíxian chjasin Nazaret? ¿Á k'uinka kíxín sínchek'itjáyanni? Ó t̄játsoan tí jaha la ko n̄ona kíxín jaha mé tí nkexro t̄jóá kuènte Dios —ichro tí nch̄akuen tí jínahya.

³⁵ Ntá ch'ín Jesús j̄ehe k'uētuenhen tí nch̄akuen tí jínahya ntáchro ch'án kíxín:

—Táníá. T'axrjéxian tí ch'ín a —ichro ch'án.

A ntá tí nch̄akuen tí jínahya kjuáka tí ch'ín a kjuítsínka ch'án nonte jnkosiné tí síin sín la k'uaxrje tí nch̄akuen tí jínahya la kohya ninkehó kónhen tí ch'ín kjuítsínka. ³⁶ A ntá kaín sín chrakon sín itjo sín kichó sín kíxín:

—¿Xá nkexrí kíxín x̄ikaha nixja tí ch'ín i? Jhehe ch'án chón̄ta kjuachaxín kíxín k'uētuenhen ch'án tí nch̄akuen tí jínahya k'uaxrjéxín tí nkexro i —ichro sín.

³⁷ A ntá nkuíxín ntiha ikjo sín kichó sín kíxín nkerí kjuaxroan kjuíche' e ch'ín Jesús.

Ch'ín Jesús kjuínchekitohe jína tí tjan ich'ee ch'ín Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjéxín ch'án tí n̄jnko la ntá k'uíxenhen ch'án ntōe ch'ín Simón. A ntá tí tjan ich'ee ch'ín Simón mé níhi tjan chón̄ta tjan injnko sóa j̄ié ntá chronóeh̄e sín ch'án kíxín chrókjuínchekitohe ch'án tjan jína. ³⁹ Ntá k'uísén ch'ín Jesús tí tjan tjan ntá k'uētuenhen ch'án tí sóa a ntá kjuíin. Ntá tuénxín k'uàya tjan la ntá kjuanjon tjan nkehe sine sín.

Ch'ín Jesús kjuínchekitohe ch'án jína itsjé chojni níhi

(Mt. 8.16-17; Mr. 1.32-34)

⁴⁰ A ntá kuétaón̄ yaon ntá kaín tí sín chón̄ta sín sinn̄íhi chón̄ta sín nchón̄hya clase chin mé kuikao sín tí tjan ch'ín Jesús. Ntá kjuak'etja tja ch'án jnkoinko tí jhehe sín a ntá x̄ikaha kuítóhe sín jína. ⁴¹ La ko nchón̄hya chojni níhi chón̄ta nch̄akuen tí jínahya la mé k'uaxrje tí nch̄akuen tí jínahya la k'óyako la ko ntáchro kíxín:

—Jaha mé Xjeen Dios —mé ichro tí nch̄akuen tí jínahya.

Kjánchó ch'ín Jesús k'uētuenhen ch'án tí nch̄akuen tí jínahya la kjuanjonhya ch'án kjuachaxín kíxín tsonixja kíxín ó nohe tí nch̄akuen tí jínahya kíxín jhehe ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuík̄jeyá sín ch'án la k'uitja sín tí tjan ch'án. Tjinkaon sín chrókjuínchexrjenhen sín ch'án kíxín sáchrókjuíhya ch'án ókjé. ⁴³ Kjánchó kjuátehe ch'ín Jesús ntáchro ch'án kíxín:

—T'ichjánxín kíxín sátsjia kaín chjasin ókjé ts̄oxrjanka tí tan jína kuènte Dios kíxín nkexrí tí kjuachaxín t'et̄oan Dios, kíxín xr̄á ó mé k'uinka —ichro ch'án.

⁴⁴ A ntá x̄ikaha k'uájikjako ch'ín Jesús kaín tí n̄jnko Israel tí estado Galilea.

5

*Kjuaxroan itsé sín koche**(Mt. 4.18-22; Mr. 1.16-20)*

¹ Ntá ijnko yaon kjuák'e ch'in Jesús chrínta ntayaon Genesaret ntá kóchjina nchónhya chojni na mé k'uixitja kíchó sín kixin tjínkaon sín chrókuinhin sín itén Dios. ² Ntá k'uikon ch'in Jesús kixin tjejó iyó ntabárcɔ jehó chjino chrínta ntayaon. A ntá tí sín itsé koche mé tsík'axrjexín sín ntiha la k'uéjɔ sín tjeotá sín la ko tjejótjonemá sín tí nchísén tséya sín koche. ³ Ntá ch'in Jesús k'uit'ótjen ch'án ijnko tí ntabárcɔ ntiha na mé ntabárcɔ kuènte ch'in Simón na ntá chronóehɛ ch'án tí ch'in Simón kixin sátsjiko ch'án ntabárcɔ ijnko chrínta ntá kjínhya. Ntá ntahó kjuák'enkáya ch'in Jesús tí nta kjuák'etjaxin ch'án kjuakohe ch'án nchónhya chojni síin chrínta ntá. ⁴ A ntá tió kjuixin nixja ch'án ntá ntáche ch'án tí ch'in Simón kixin:

—Tjíkɔa ntabárcɔ tí tjíá ntá njnka ntá iterá tí nchísén tseyará koche —ichro ch'án.

⁵ Ntá kjuátehe ch'in Simón ntáchro ch'án kixin:

—Maestro, kjuich'eni xɔa kuenté tie la tséhyani ninkehó koche. Kjánchó tí jaha xikaha kuétuɛnhénni la mé tsochr'ánni tí nchísén inaá —ichro ch'án.

⁶ Na ntá xikaha kjuich'e sín la ntá nchónhya koche tsísé tí nchísén la ntá tí nchísén kjuankixin tinkák'ichje. ⁷ Ntá k'uèyaxin sín tja sín kixin chrórxakoa tí sín ch'eko sín xɔa tjejóxenhén tí í jnko ntabárcɔ kixin tsjinkitsa sín. Ntá xráko sín ntabárcɔ kuènte sín ntá kjuínchekaón sín yóí tí ntabárcɔ ntá chrókjuachahya tí ntabárcɔ na tjínkaon chrók'uániánkí ntá. ⁸ Ntá xikaha k'uikon ch'in Simón Pedro ntá kjuák'exín toch'in ch'án nkayakon ch'in Jesús ntá ntáchro ch'án kixin:

—Tjtohéni Inchéni kixin jeheni ijnko chojni chóna jie —ichro ch'án.

⁹ Mé xikaha ichro ch'in Simón kixin chrakon ch'án la ko kjaxin chrakon tí í so sín tjejóko ch'án kixin xikaha kónhen xrenájín nchónhya koche. ¹⁰ La ko ch'in Jacobo la ko ch'in Juan, xjeen ch'in Zebedeo, na mé jnkokqá ch'eko sín xɔa ch'in Simón, la kjaxin chrakon sín. Kjánchó ntáche ch'in Jesús tí ch'in Simón kixin:

—Chrakonhya. Senó la koche k'uétse la nta jie la náhi la mé chojni tsjéya —ichro ch'án.

¹¹ Ntá tió kjujiko sín tí ntabárcɔ tí chrínta ntá la kuítóhe sín kaín nkehe kuènte sín ntá chréhe sín sákjuíko sín tí ch'in Jesús.

*Ch'in Jesús kjuínchekitohe ch'án jína ijnko chojni chóna chinlepra**(Mt. 8.1-4; Mr. 1.40-45)*

¹² Kjuák'e ch'in Jesús ijnko tí chjasin, ntá kui ijnko chojni níhi chóna chinlepra. A ntá tió k'uikon ch'án tí ch'in Jesús ntá kjuák'exín toch'in ch'án chronóehɛ ch'án jnkójjina ntáchro ch'án kixin:

—Inchéni, tí tjínkávan jaha la jína chrókjuínchekitohéni jína —ichro ch'án.

¹³ Ntá ch'in Jesús kjuéntó tja ch'án ntá kjuak'etja tja ch'án chrítaón tí sjnníhi ntáchro ch'án kixin:

—Méxɔa xikaha tjínkávan. Ntá jie sjntakitohɔa jína —ichro ch'án.

Ntá xikaha ichro ch'án ntá tí chinlepra tuénxín kjuinhin tí sjnníhi. ¹⁴ A ntá k'uétuɛnhen ch'in Jesús tí ch'in a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etqan ch'in Moisés ts'áyéhe Dios* kixin ntá tsonoexín kaín xín chojni kixin ó kuítqha jína —ichro ch'án.

¹⁵ Kjánchó qantsí k'uixikónohe sín nkexrí tí kjuaxroan kjuasin ch'in Jesús, ntá nchónhya chojni k'uixikóhchinehe sín ch'án kixin tsinhin sín nkehe tsjako ch'án, la ko tsítqexín sín jína tí chín chóna sín. ¹⁶ Kjánchó ch'in Jesús la k'uaxrjenta ch'án tí kohya chojni la ntaha nixjeexín ch'án Dios.

Ch'in Jesús kjuínchekitohe ch'án jína ijnko ch'in tsík'en tote
(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'in Jesús na ntá ntaha k'uéjótjaxín iso sín fariseo la ko iso tí sín tjako tí ley, tsíkjiñín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuente Dios kjuakoxín ch'án kixin sinchekitohe ch'án chojni jína. ¹⁸ Ntá kui iso chojni tinkátsénki sín ijnko ch'in tsík'en tote tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'in Jesús tjetjako ch'án. ¹⁹ Kjánchó xitjahya tsixenhen sín kixin nchónhya chojni síxenhen nchia. Ntá k'uit'ótjen sín tí chrítaón nchia, ntá kjuakjin sín iso teja la ko tí nta sit'ó ntá ntaha kjuinkajjín sín tí ch'in níhi tjenkáya kania ntoí tí tjen ch'in Jesús. ²⁰ Na ntá tió k'uíkon ch'in Jesús kixin imá tinkáchónki sín ch'án ntá nixjehe ch'án tí ch'in níhi, ntáchro ch'án kixin:

—Jaha, ó kjuixín kjuínhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “¿Xá nkexro tíhi ch'ia ch'án ncheyóhe ch'án asén ch'án Dios? Ninkexró xitjahya tsjakjin ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'in Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkeuente kixin xikaha tjenkayáxinrá? ²³ ¿Nkehe qantsí xrahya chróntátjan ch'án? ¿Á qantsí xrahya chróntátjan ch'án kixin ó kjuixín kjuínhin ch'án tí ijie yamá ch'án, ó á qantsí xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjákoxián kixin tí Xjeen Dios K'óna Chojni mé chóna kjuachaxin ntíhi chjasintajni tsjakjinínhin ijie chojni —ichro ch'án.

Ntá k'uétuenhen ch'án tí ch'in tsík'en tote ntáchro ch'án kixin:

—Jaha tétuanhan t'ínkatjen tjatsíyan kaniqa la sátjia ntqa —ichro ch'án.

²⁵ Ntá tuénxín k'uínkatjen tí ch'in tsík'en tote nkayakon kaín tí sín siín a la kuákja ch'án kaniqe ch'án k'uékjak'etak'á ch'án ntá sákjuí ch'án ntqex ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonni qantsí má kjuaxroan jie —ichro sín.

Ch'in Jesús k'uíyehé ch'án tí ch'in Levi
(Mt. 9.9-13; Mr. 2.13-17)

²⁷ Ntá chr'éxín ntá ch'in Jesús k'uaxrjexín ch'án nchia ntá k'uíkon ch'án ijnko ch'in nchekjènkí mé it'in ch'án Levi tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

²⁸ Ntá ch'in Levi mé tuénxín k'uínkatjen ch'án la ntá kuítqhe ch'án kaín xín nkehe ntá chr'éhe ch'án tí ch'in Jesús.

* 5:14 Levítico 14.4-8

²⁹ Ntá chr'éxin ch'ín Levi chóna ch'án ijnko kia jíe ntøe ch'án kjuikosáyehe ch'án tí ch'ín Jesús. Kjaxin k'uéjé itsjé tí sín nchekjènki la ko itsjé í so chojni chóna jie k'uéjótjaxínko sín tí ch'ín Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankíxin sín tjonta sín tí sín k'uájiko ch'ín Jesús ntáchro sín kíxin:

—¿Nkekuènte ntekoará la ko t'ikoará tí sín nchekjènki la ko tí sín chóna jie? —ichro sín.

³¹ A ntá kjuátøe ch'ín Jesús ntáchro ch'án kíxin:

—Tí chojni níehya t'ichjánxienhya sín nkeexo sich'e xroa. Náhí. Jehó tí sín níhi mé t'ichjánxinhin sín nkeexo sich'ehe sín xroa. ³² Janhan la k'uinkahya ntihi kíxin chrók'uíyaha tí sín jína tjejó. Náhí. Janhan k'uinka kíxin ts'yíyaha tí sín chóna jie kíxin chrókuítøe sín tí ijje sín ntá chrókuinkí sín tí tjenkayáxin sín —ichro ch'án.

Tjanchankíhi sín tí ch'ín Jesús kíxin á chrókjónehya sín tió tsonixjehøe sín Dios (Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús kíxin:

—¿Nkekuènte kíxin tí sín k'uék'ajiko ch'ín Juan jnkoyaxón nehya sín na nixjehøe sín Dios, la ko kjaxin xikaha ch'e tí sín xriko tí sín fariseo, a ntá tí sín xriko la ine sín la ko it'í sín? —ichro sín.

³⁴ Ntá kjuátøe ch'ín Jesús kíxin:

—¿Xá chrókuachará chrókuétuøhenhá kaín tí sín tsík'íyehøe sín tsikóchjina tí tjejó tí sín tsikótøe kíxin chrókjónehya sín tí naaxa tjejóko sín tí ch'ín tsikótøe?

³⁵ Kjánchó tsjixraká tí yaon itsi chojni tsotsé sín tí ch'ín tsikótøe sátsjiko sín ch'án. Ntá tí sín tsikóchjina la ts'ává sín la í sinehya sín —ichro ch'án.

³⁶ Kjaxin kjuíncheyóexin ch'án ntáchro ch'án kíxin:

—Nínkexró chrókuaté ijnko camisa nixin ntá chrókuak'eniøe ijnko camisa ntaxin kíxin xikaha chrókuich'e sín ntá chrók'uitjáyán tí camisa nixin la ko kjaxin tí t'ø ka k'uaxrjexín tí camisa nixin tsoyóøehya tí camisa ntaxin. ³⁷ Kjaxin chrókuíkiyahará xranvino nixin ijnko tjuaxran ntaxin kíxin tí xikaha chrókuich'erá la chrók'uichje tí tjuaxran ntaxin ntá chrók'uitjáyán tí xran la ko chrók'uitjáyán tí tjuaxran. ³⁸ A ntá tí xranvino nixin chrókuikia ijnko tjuaxran nixin kíxin yóí la chrók'uitjáyannya. ³⁹ La ko kjaxin nínkexró tió tsík'í tí xran ntaxin naaxa chrókóxrjinhin chrók'ui xran nixin. Náhí. Tsontáchro ch'án kíxin íchá jína tí xran ntaxin, tsixro ch'án —mé xikaha ichro ch'ín Jesús.

6

Tí sín k'uájiko ch'ín Jesús mé k'uín sín iso noatrigø ijnko yaon t'øk'éhe tí sín israelita

(Mt. 12.1-8; Mr. 2.23-28)

¹ Ijnko yaon t'øk'éhe sín la ch'ín Jesús k'uátsínka ch'án iso nonte t'óna noatrigø. Na ntá tí sín k'uájiko ch'án mé ik'uín sín iso noatrigø la kjuankíxin sín nkaya tja sín ó k'óntajinyá sín tí noa ntá kjóne sín. ² Ntá iso tí sín fariseo kjuanchankí sín kíxin:

—¿Nkekuènte kíxin tjejoch'erá xra jie? La mé kohya kjuachaxin tsonhen xra tí yaon t'øk'éheni —ichro sín.

³ Ntá kjuátøe ch'ín Jesús kíxin:

—¿Jahará á kjuínchekuáxinhyará tí xroon chrónka nkehe kjuich'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án

mé k'uixenhen ch'án ntøe Dios la kjóne ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó siín kjuachaxin sine tí sín nchat'a* —ichro ch'ín Jesús.

⁵ Kjaxin ntáchro ch'án kixin:

—A ntá tí Xjeen Dios K'óna Chojni mé chóna kjuachaxin ts'etqan nkexri tsonhen tí yaon t'ok'éheni —ichro ch'án.

Ch'ín Jesús kjuínchekitohe jína ijnko ch'ín tsixámá tja

(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'ín Jesús ijnko njnko Israel la ntá kjuankixin kjuako ch'án. A ntá ntaha kjuák'e ijnko ch'ín tsixámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitohe ch'án chojni jína tí yaon t'ok'éhe sín kixin ntá chrók'ueka sín ch'án jje. ⁸ Kjánchó jehe ch'án ó nohe ch'án nkehe tjenkayáxin asén sín ntá nixjehe ch'án tí ch'ín tsixámá tja ntáchro ch'án kixin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tøte ch'án. ⁹ Ntá nixjehe ch'ín Jesús tí í so sín ntáchro ch'án kixin:

—Tsjánchánkíhára ijnko xra. Tí yaon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿á chrókjuinchekitøheni chojni jína ní o á chrók'óyanni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín niha ntá nixjehe ch'án tí ch'ín níhi ntáchro ch'án kixin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuítóhe tja ch'án jína. ¹¹ Kjánchó tí sín fariseo tjejó mé kóninkaon sín mé ntá kjo sín kichó sín kixin tjinkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jna kixin ntaha tsonixjeexín ch'án Dios la ntá ntahó kjuák'e ch'án kuenté tie tjenixjehe ch'án Dios. ¹³ A ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. ¹⁴ A ntá tí sín í mé xikihi it'in sín. Na mé ch'ín Simón la ntá ch'ín Jesús kjuínchek'in ihnjé ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakøhe ch'an nchónhya chojni

(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxín sín tí jna ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixín nkuixín estado Judea la ko chjasin Jerusalén la ko tí chrinta ntayaon tí siín tí chjasin Tiro la ko tí chjasin Sidón. Ó kjui sín kixin tsinhin sín tí nkehe tsjako ch'ín Jesús la ko tsitøhe sín jína. ¹⁸ A ntá tí sín kjuaxróxinhya k'uéjó k'uéchóna sín nchakuen jínahya na mé kuítóhe sín jína kjaxin. ¹⁹ Kaín chojni

* 6:4 6.3-4 1 Samuel 21.6; Levítico 24.5-9

tjinkaon chrókuákóxin sín tí ch'ín Jesús kixin kjuínchekit_ohe ch'án jína kaín xín chojni kixin jehe ch'án chón_ota ch'án kjuachaxin jié.

Tí kjuachéhe la ko tí kjuaxróxinhya
(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nòará kixin chontará kjuachaxi_oén Dios.

²¹ 'Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjankará ijie kixin chr'éxin tsjanorá.

²² 'Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjenxin sín ihníárá éxi ijnko nkehe jínahya kixin tinkachónkirá tí Xjeen Dios K'óna Chojni. ²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuènte nkaya nkajní. A ntá xíkaha tí t'áchríi tí sín jínahya ch'e la mé ósé kjuate sín tí sín k'uéchronka itén Dios.

²⁴ 'A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ 'A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

²⁶ 'Kjuaxróxinhya ts'ejorá tió kaín chojni tsjikosáyahará sín kixin xíkaha tí t'áchríi sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakonhenni
(Mt. 5.38-48; 7.12)

²⁷ 'A ntá jahará tjejotinhínrá mé tjéxrjanka kixin chrótjuèhérá tí sín nínkakonhanrá la ko jína chrókjuínkítsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kixin tsjinkítsa ch'án tí sín chónkíhará sín. ²⁹ Tí chjéhe ijnko nkexro ijnko tuáanrá chrókjóka tí í jnko nánko kixin chróchjéhe sín tíha kjaxin. La ko tí siín ijnko nkexro tjinkaon sín tsakítsjaha sín tí chamara tjín t'inkayate na mé títóhé kixin kjaxin sátsjiko sín camisá kjaxin. ³⁰ Tí jnkojín nkexro tjanchaha nkehe chonta la chjehé sín. A ntá tí tsakja sín nkehe kuèntá la tjanchehya sín kixin náxa ts'ókjanhan sín. ³¹ Méxra chrókjuikosáyehérá kíchuárá éxi yóhe nkexrí tjinkáonrá chrókjuikosáyahará tí jehe sín kjaxin.

³² 'Tí jehó tjuèhérá tí nkexro tjuàhará la tí xíkaha la kohya ninkehó tsjachahyará. Kjónté tí sín jínahya tjasin jie la xíkaha ch'e sín. ³³ A ntá tí tjíkosáyehérá jehó tí sín tjíkosáyahará la kohya ninkehó tsjachahyará xíkaha. Kjónté tí sín jínahya tjasin jie mé kjaxin xíkaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xíkaha kohya ninkehó tsjachahyará. Kjónté tí sín jínahya tjasin jie xíkaha ch'e sín nchekjen kichó sín chichaon la ko chónhen sín kixin tsokjan tí chíchakoen sín inaá. ³⁵ Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuínchekjenrá sín chichaon la chróchoénhará kixin chrókjan tí chíchakóanrá inaá. Mé xíkaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. ³⁶ Chrókjuikonógehérá kíchuárá éxi yóhe It'ará nkaya nkajní tikonógehé ch'án chojni.

Chrók'úántaxénhyani kíchó ni

(Mt. 7.1-5)

³⁷ 'Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuanhyará kixin chrókjuasóte í jnko chojni kixin Dios kjaxin chrókjuincheckjasótiahayará ch'án tí jahará. Chrók'uitjáyanhanrá ichrén jie kjuasinhanrá í jnko chojni kixin ntá Dios chrókjuincheck'itjáyanhanrá ch'án tí jie kjuásinrá. ³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jina kjaxin, tjetóxin ijnko medida jina chrókjuanjon ch'án, icha tsík'enká ch'án kixin tsík'ótsjéyehe ch'án tí nkehe tsíkjachroyá ch'án tjetóxin tsjanjon ch'án. Dios tsotjáhará xikaha yóhe éxi tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—¿Xá á chrókójina ijnko chojni t'ikonhya chrókjuiko í jnko chojni t'ikonhya? Tí xikaha la yó sín chrók'uanótjenyá sín ichrén tóye. ⁴⁰ Ijnko nkexro xrakohe la noehya éxi tí nkexro tjako. Kjánchó tió tsjixin tsoxrakohe ch'án ntá tsonohe ch'án éxi nohe tí nkexro kjuakohe ch'án.

⁴¹ ¿A ntá nkekuénté tsjehé tí chjíninó ntsí tjenkánki ikon tí kichuá, tí naxa ántosán tí nta jie tjenkánki ikuan? ⁴² ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhi ch'án tí chjíninó ntsí tjenkánki ikon ch'án tí naxa ántosán tí nta jie tjenkánki ikuan? Jaha la ntoáhya tjenkayáxian ch'ía jaha. Senó chrókuakitsjenkiá tí nta jie tjenkánki ikuan kixin ntá chrók'uikuan chrókuakitsjenkiá chjíninó ntsí tjenkánki ikon tí kichuá.

Tí nta mé tjatsoanxínni tí to tsík'óna

(Mt. 7.17-20; 12.34-35)

⁴³ 'Kohya nta jina chrók'óna to jínahya, la ko kjaxin kohya nta jínahya chrók'óna to jina. ⁴⁴ Jnkojnko tí nta mé tjatsoanxínni tí to t'óna. Tí ntach'í xitjahya tsjakjinjinni to higo la ko xitjahya ts'inni to uva. ⁴⁵ Ijnko chojni jina la jina nixja ch'án kixin jina asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxian asén mé xikaha nixja ir'va.

Ch'ín Jesús kjuíncheyóexin éxi yaá nkexro kjuích'éna nchia

(Mt. 7.24-27)

⁴⁶ ¿Nkekuénté ntáchrórá kixin janhan lnchárá, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tóye nínka kixin ntá sich'éna ch'án nchia chrítaón tí tjo a. A ntá tió k'uánkí tí ntario la ikui tí ntá k'uúntate tí nchia, kjónté xikaha la k'uátjoákohya la ní kuínkíhya tí nchia a kixin jina tsík'óna chrítaón tjo tjekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínki. A ntá tió k'uánkí tí ntario la ikui tí ntá k'uúntate tí nchia la ntá k'uátjoáko ntá tí nchia la ntá kuenté tí nchia la k'uítjáyan —mé ichro ch'ín Jesús.

7

Ch'ín Jesús kjuínchekitóhe jina ijnko ch'ín ch'ehe ijnko soldado romano xra

(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko

nkexro ch'ehe ch'án xrā imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijtsjehe sín tí ch'ín Jesús tsochronóhe sín ch'án kixin chrókjuiji ch'án chrókjuinchekitóhe ch'án jína tí ch'ín ch'ehe ch'án xrā. ⁴ Ntá kjuíji sín kóhchinehe sín tí ch'ín Jesús kjuankixin chrónóhe sín ch'án ntáchro sín kixin:

—Imá jína tí ch'ín capitán la mé tjinkaon ch'án chrókjuinkítsa ch'án ⁵ kixin tjuèhe ch'án tí nació kuènteni la ko jehe ch'án kjuínkítsa ch'án la ko k'uetóan kixin ts'óna ijnko njnko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuèhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xrā kixin jehe ch'án la jehya chojni jína la ko chrókósuèhe kixin chrók'uíxènhén ntóe ch'án. ⁷ Mé xíkaha chrókósuèhe ch'án chrókjuiji ch'án chrókjueya ch'án tí jaha. Méxrā tí kjuachaxin chrónixja ó chrókuitóexín jína tí ch'ín ch'ehe ch'án xrā. ⁸ Kixin jehe ch'án kjaxin t'ítuèhen ch'án la ko kjaxin chóna ch'án soldado t'etuèhen ch'án inaá. Tió t'etuèhen ch'án ijnko sín kixin sátsji la mé sátsji la ko tió t'etuèhen ch'án í jnko sín kixin xráko la mé xráko la ko tió t'etuèhen ch'án í jnko sín kixin sich'e ijnko xrā la mé nchexitéyá ch'án —mé xíkaha ichro tí sín kui.

⁹ Ntá ó kuínhin ch'ín Jesús xíkaha ntá chakon ch'án kixin xíkaha tjenkayáxin tí ch'ín a, a ntá nkátjá ch'án komá ch'án tí chojni chréhe ntáchro ch'án kixin:

—Ntáxrjan kixin naxa k'uitjahya nijnko nkexro israelita xíkaha tinkáchónki éxi tí ch'ín í —ichro ch'án.

¹⁰ A ntá ó kjan nchia tí sín tsík'ítuèhen la ó k'uíkon sín kixin ó tsíkítóhe jína tí ch'ín níhi.

Ch'ín Jesús kjuínchexéchón tí xjeen ijnko tjan k'án chjasin Naín

¹¹ Ntá chr'éxin ntá sákjui ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokóá xjeen ijnko tjan k'án. Itsjé chojni chjasin ntíha sákjuíkotoxin sín tjan. ¹³ Ntá tió k'uíkon Ìnchéni tí tjan a ntá kuíkonóhe ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóhchinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uejóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuanhan t'áya —ichro ch'án.

¹⁵ Ntá tí ch'ín tsík'en tuénxin kjuák'etjaxin ch'án la ko kjuankixin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuíko. ¹⁶ A ntá tió k'uíkon sín xíkaha kónhen la kaín sín imá chakon sín la ko kjuankixin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etóan chrónka itén Dios ts'ejókoni —ichro sín.

Kjaxin ntáchro sín kixin:

—Ó kui Dios tsjinkítsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

*Tí sín ichr'án ch'ín Juan Bautista
(Mt. 11.2-19)*

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyehé ch'án iyó tí sín k'uájiko ch'án ¹⁹ k'uetoñhen ch'án sín sátsjitsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ó á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uetoan ch'án kuini tsikjanchankíhani kixin á jaha tí nkexro tsi ní ó á tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitqhe ch'án itsjé chojni jina la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'íkon ch'án itsjé chojni t'íkonhya.

²² A ntá kjuátqhe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'íkon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuitqhe sín jina, la ko tí sín kíenhya la ntá jie la ó tinnin sín, la ko tí chojni tsík'en la ó síxechón sín jie, la ko tí sín nòa síxakqhe sín tí tan jina tsaáxin sín. ²³ Ntá náxrjón tjen tí nkexro kohya nkehe t'ínkákonhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankíxin nixjehé ch'ín Jesús tí sín k'uéjé ntiha kixin nkexrí tjen ch'ín Juan ntáchro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xríntq? ²⁵ Tí náhi, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jina? Jahará ó nohará kixin chojni tsík'itsa jina la ko chóna kaín nkehe náxrjón la mé ntqey tjejó sín. ²⁶ ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xrjanka kixin chaxín chaxín xikaha jehe ch'án na mé ántsi t'etqan ch'án la ntá tí sín k'uéchrónka itén Dios ósé la kánhyó. ²⁷ Ch'ín Juan mé tí nkexro kui éxí chrónka tí xroon itén Dios ósé ntáchro kixin: Janhan mé tsochr'an ijnko nkexro tsochrónka itan kuéntana tsitónxin ntja, kixin tsjasiyóxin ch'án ntja kuénta.*

Mé xikaha chrónka tí xroon itén Dios. ²⁸ Ntá ijnko nkehe chaxín tsotjonkará kixin kaín tí nkexro k'uéjé senó k'uéchrónka itén Dios la kánhyó tjetqan sín la ántsi tjetqan tí ch'ín Juan Bautista. Kjánchó ijnko nkexro kjónté tjetuanhya la tí ts'áyehé sín tí kjuachaxién Dios nkaya nkajní la ántsi tjetqan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkj tsíkikite ch'ín Juan la ó kjuátsoan sín kixin Dios la jina ch'án. ³⁰ Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókuinkitsa tí jehe sín. ³¹ Ntá ntáchro Ínchéni kixin:

—¿Nkexrí chrókuíntayóaxian tí chojni tjejó jie? ¿Nkehe chrókóyóhe sín? ³² Tóyóhe sín tí chánjan tjejótjaxín sín tí ntasin tsítan sín la t'íyehé kichó sín ntáchro sín kixin: “Kjuínchentáchroni flauta la tēhyará la ko tsjeni isón kuénte chojni tsík'en la tsjankahyará.” ³³ Kixin ó kui ch'ín Juan Bautista la kjónehya ch'án niotjā la ko k'uihya ch'án vino la ntá jahará ntáchrórá kixin

* 7:27 Malaquías 3.1

ijnko nchakuen tí jínahya chóna ch'án. ³⁴ A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntáchrórá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkj. ³⁵ A ntá tí xjeen Dios mé tjakoxin sín kaín tí nkehe tjínkaon Dios.

Ch'in Jesús mé kjuák'e ch'án ntøe ijnko ch'in fariseo it'in Simón

³⁶ Ijnko ch'in fariseo mé chronøehø ch'án tí ch'in Jesús kixin tsjiji ch'án ntøe ch'án sineko sín ch'án. Ntá sákjui ch'án ntøe tí ch'in a, a ntá ntíha kjuák'etjaxin ch'án tí tjen mesa. ³⁷ A ntá itjen ijnko tjan nchónhya jie chóna tjan. Itjen tjan tí chjasin ntíha la ntá kónohe tjan kixin tsikjiji ch'in Jesús ntøe tí ch'in fariseo la ko ntaha sineko sín ch'án. Ntá kui tjan ntíha kujkao tjan ijnko xro tje te tsíkaón aceite xraxé náxrjón. ³⁸ Ntá tsjánka tjan kóchjina tjan toté ch'in Jesús ntá ntakon tjan kjuátanxín toté ch'án la ko kaxíhi tjan kjuínchexámáxin tjan toté ch'án la ko kjóneko kochito toté ch'án la ko kjuíncheka tjan toté ch'án tí aceite xraxé náxrjón. ³⁹ A ntá tió k'uúikon tí ch'in fariseo tsik'íyehø tí ch'in Jesús ntá kjo ch'án asén ch'án kixin: “Tí chrókóchaxín tí nkexro í ijnko ch'in chrónka itén Dios ntá chrókónohe ch'án kixin nkexrí xéhe tí tjan tjetákoxin ch'án kixin ijnko tjan jínahya tíha”, ichro ch'án. ⁴⁰ Ntá ch'in Jesús ntáche ch'án tí ch'in fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'in fariseo ntáchrø ch'án kixin:

—Chronka, Maestro —ichro ch'án.

⁴¹ Ntá ntáchrø ch'in Jesús kixin:

—K'uéjý yaá chojni ntoa síkéhe sín chichaon ijnko ch'in nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'in síkéhe sín ntá kuikonøehø ch'án sín ntá k'óxika ch'án tí cuenta síká yóí sín. A ntá jie chrónka jaha kixin nkexro tí yóí sín antsí chrótjuèhe tí nkexro kuikonøehø ch'án —ichro ch'in Jesús.

⁴³ Ntá kjuátehe tí ch'in Simón ntáchrø ch'án kixin:

—Janhan ntáxrjan tí nkexro kuikonøehø má —ichro ch'án.

Ntá ntáchrø ch'in Jesús kixin:

—Ntoá tjenkayáxian —ichro ch'án.

⁴⁴ Ntá ch'in Jesús komá ch'án tí tjan a ntá ntáche ch'án tí ch'in Simón kixin:

—¿Á t'íkuan tí tjan a ní? Janhan na mé k'uúixanhan ntøa la ntá jaha la kjuánjonhya ntá chrók'ontia totená. Kjánchó jehe tjan tí ntakon tjan kjuínchek'óntixín tjan totená la ko kaxíhi tjan kjuínchexámáxin tjan. ⁴⁵ A ntá jaha la kjóntekoahyana kochíto. Kjánchó jehe tjan naxa kuítøehya tjan neko kochíto totená. ⁴⁶ Jaha la kuíkítexinhya aceite kja. A ntá jehe tjan kuíkíte tjan aceite xraxé náxrjón totená. ⁴⁷ Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin íntsíkoá jie la mé xíkaha íntsíkoá tjakoxin kixin tjuana sín —ichro ch'án.

⁴⁸ Ntá nixjehe ch'án tí tjan a ntáchrø ch'án kixin:

—Ó kjuínhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxin sín tí tjen ch'án mé kjuankixin kjo sín kíchó sín ntáchrø sín kixin:

—¿Xá nkexro tíhi kixin tjakjínhin ch'án íjje chojni?

⁵⁰ A ntá ch'in Jesús ntáche ch'án tí tjan a kixin:

—Ó kuaá jaha kixin kuítekáván tí janhan. A ntá jie kjuaxróxin sátsjia ntqa —ichro ch'án.

8

Iso chojni chjin kjuínkítsa tí xrá kjuích'e ch'in Jesús

¹ A ntá chr'éxin ntá ch'in Jesús k'uáji ch'án itsjé chjasin hyé la ko chjasin ntsintsí kjuako ch'án la ko chrónka ch'án tí tan jina kixin nkexrí tí kjuachaxin t'etqan Dios. A ntá tí teyó sín mé k'uájiko ch'án. ² Kjaxin chréhe iso chojni chjin tsíkjinchekitohe ch'án jina tsíkakitsje ch'án tí nchakuen tí jínahya k'uéchónta sín la ko tsíkjatsen ch'án tí ch'in k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, ³ la ko í jnko tjan it'in tjan Juana ne mé xì mé it'in ch'án Chuzá. Jehé ch'án mé ch'ehe ch'án xrá tí ch'in Herodes t'etqan ch'án, la ko í jnko tjan mé it'in tjan Susana, la ko itsjé í so sín k'uéjé sín. A ntá kaín sín kjuanjón sín tí nkehe k'uéchónta sín kjuínkítsa sín tí ch'in Jesús la ko tí sín k'uájiko ch'án.

Ch'in Jesús kjuíncheyóexin ch'án éxi ijnko ch'in k'uénkq nonte (Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'in Jesús, k'uaxrjexín sín kaín tí chjasin ntiha. A ntá ch'in Jesús kjuíncheyóexin ch'án ntáchro ch'án kixin:

⁵ —Éxi ijnko ch'in sákjuík'enkq noatrigo nontee ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntja ntá nkaxénjin chojni tí noa a la ko kjaxin tí koxroxé k'uínka va. ⁶ A ntá í so la k'uítji chrík'á xró ntá k'uayan la xámá kixin kánhyó siín tjo. ⁷ A ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsíkjate tí kach'í. ⁸ A ntá í so la mé tsík'itjí nche jina. A ntá tió k'uánkí la k'óna jina la mé jnkojnko noatje k'óna ciento neno noa —mé xíkaha ichro ch'án.

Na ntá kjuixin kjuako ch'in Jesús kaín tíha ntá itsen ntáchro ch'án kixin:
—Tí tjínkáonrá chrókuinhínrá la tindhínrá —ichro ch'án.

Ch'in Jesús chronkaxín nkekuénte kjuíncheyóexin ch'án (Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án. ¹⁰ Ntá ntáchro ch'án kixin:

—Dios mé tsjínkítsa kixin tsonohará tí nkehe noehya í so chojni nkexrí t'etqan Dios. Kjánchó tí í so sín tjáqoha sín kjuíntayóaxoán kixin ntá k'uíkon sín la kjónté tsjatsqanhya sín la ko kuínhin sín na kjónté naxqá tienxínhya sín.

Ch'in Jesús chronkaxín nkexrí t'axrjexín tí ch'in k'uénkq nonte (Mt. 13.18-23; Mr. 4.13-20)

¹¹ Ntá tsqxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² A ntá tí noa k'uanótjen chrínta ntja la mé tóyóhe tí sín kuínhin tí tan a. A ntá ó kui ch'in Tsochren ntá kjuínchek'itjáyán ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín. ¹³ A ntá tí noa kjuítsínkák'á xró la éxi yóhe tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítóhe sín tí itén Dios kuínhin sín kixin naxqá nínkahya chóna nuée. ¹⁴ A ntá tí noa kjuítsínkák'á kach'í na mé éxi yóhe ijnko chojni kuínhin tí tan jina kjánchó tjitoxiénhya ntje sín kixin tóxakonhen sín tí xrá chóna sín la ko

tjinkaon sín tsochón̄ta sín itsjé nkehe la ko kaín tí nkehe tóxrjín̄h̄n̄ sín mé t'inkákonh̄en kixin x̄ikaha la xitjahya sich'ehe sín x̄ra Dios. ¹⁵ A ntá tí noa k'uínka nonte jina na mé éxí yóh̄é tí chojni kuín̄h̄n̄ tí itén Dios a ntá kaín asén sín kuítekaon sín la ntá kuítóehya sín tí tan, a ntá x̄ikaha la jina ch'ehe sín Dios x̄ra.

Ch'ín Jesús mé kjuíncheyóexin éxí ijnko xrohi tjeche
(Mr. 4.21-25)

¹⁶ Nijnko nkexro chrókjuinchek'ákjen xrohi chrókjuak'emā nkaxenhen chí o chrókjuak'emā chrínkí cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxín sín tí t'inkaséyan. ¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxíxin tí xrohi a. ¹⁸ A ntá chrókuinhínrā jina kixin tí tjen ijnko nkexro chón̄ta nkehe la mé ts'áyéhe ch'án má. A ntá tí nkexro chón̄tahya nkehe la mé ts'axrjehe ch'án kjónté tí nkehe ntsí tón̄hen ch'án kixin chón̄ta ch'án.

Tí iné la ko tí kichó ch'ín Jesús
(Mt. 12.46-50; Mr. 3.31-35)

¹⁹ A ntá kjuíji iné la ko kichó ch'ín Jesús tí tjen ch'án. Ntá xitjahya tsochjinehe sín ch'án kixin nchón̄hya chojni síin. ²⁰ A ntá ijnko sín ntiha tsíkjichenka ch'ín Jesús kixin:

—Iná la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuátéhe ch'án ntáchro ch'án kixin:

—Tí sín tinh̄n̄ itén Dios la ko titekaon sín na mé t'íkuān tí jehe sín éxí nanā la ko kichinā —ichro ch'án.

Ch'ín Jesús k'uetuēnhen tí xr̄nto la ko tí ntq kixin ts'ixita
(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabárc̄o la koí tí sín k'uájiko ch'án. Ntá ntáchro ch'án kixin:

—Sátsjini tóh̄e ntayaon —ichro ch'án.

Ntá sákjuí sín. ²³ Ntá nachrohe tjejó't'atòye sín a ntá ch'ín Jesús mé kjuák'ejua ch'án. A ntá xrín̄ahya tjan̄ chjéhe xr̄nto chrítaón̄ ntā ntá xránkixín sítikia ntā tí ntabárc̄o ntá chrakon sín kixin ts'aniankí ntā tí ntabárc̄o. ²⁴ Ntá kjuínchekjayehe sín tí ch'ín Jesús, ntáchro sín kixin:

—Maestro, Maestro. Tjejó't'aniankíni ntā —ichro sín.

Ntá ch'ín Jesús k'uàya ch'án ntá k'uetuēnhen ch'án tí xr̄nto la ko tí ntq kixin ts'ixita, a ntá náxrjón̄ k'uixita tí ntq la ko tí xr̄nto. ²⁵ Ntá ntáche ch'án tí sín k'uájiko ch'án kixin:

—¿Á naxā tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'etuēnhen ch'án xr̄nto la ko tí ntq la titekakonhen ch'án?

Ijnko ch'ín nonte Gadara chón̄ta nchakuen tí jínahya
(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóh̄e ntayaon ntóí chók'èxin estado Galilea. ²⁷ Ntá k'uínkajinxín ch'ín Jesús tí ntabárc̄o ntá kóchjina ijnko ch'ín chjasin ntiha. Ntá ó má sé chón̄ta ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntq̄e ch'án k'uékjak'e ch'án na mé tjen

ch'án tí panteón. ²⁸ Tió k'uíkon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkekuènte tjiaté tí jehení, jaha Jesús Xjeen Dios itjen nkaya nkajní? Chronóghani nchekjasótehyani —ichro ch'án.

²⁹ Xikaha ntáchro ch'án kixin ch'ín Jesús tsík'etuenhen tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'etuenhen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsikóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsikóntetoxín ch'án kixin nchakuen tí jínahya tjinkaon sáchrókjuiko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátèhe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóntha ch'án. ³¹ A ntá kaín tí nchakuen tí jínahya chronóèhe tí ch'ín Jesús kixin chrók'uetqanhya ch'án kixin chrókjuitsínkayá tí tòye nínka. ³² A ntá ntiha tí jnà síin nchónhya cochíno xrine va. A ntá tí nchakuen tí jínahya chronóèhe tí ch'ín Jesús kixin chrókjuanjon ch'án kjuachaxin chrók'uixenhen tí cochíno a. A ntá kjuanjon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsaka k'uánótjenkí va ntá kjuínhin va ntá.

³⁴ A ntá tí sín sít'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexin sín chjasin sákjuitsjehe sín nkehe tí tsikónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjaxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jina tjen ch'án, a ntá chrakon sín tí k'uíkon sín xikaha. ³⁶ A ntá tí jehe sín tsík'ikon sín kixin xikaha kónhen la chrónka sín kixin nkexrí kuítóhe jina tí ch'ín k'uéchóntha tí nchakuen tí jínahya.

³⁷ A ntá kaín tí chojni chjasin Gadara kjuankixin chronóèhe sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'ujit'ótjen ch'án tí ntabárcq sákjuixin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóèhe ch'án tí ch'ín Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uétuenhen ch'án kixin tsitòhe ch'án ntáchro ch'án kixin:

³⁹ —Titoha satjia ntqo la ko chronka nkexrí tí kjuachaxin jíé kuènte Dios kuítóaxián jina jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jíé kjuích'e ch'ín Jesús kjuínchekitòhe ch'án jina.

*Tí xjeen ch'ín Jairo la ko tí tjan kuákóxin iké ch'ín Jesús
(Mt. 9.18-26; Mr. 5.21-43)*

⁴⁰ Tió ch'ín Jesús kjan ch'án tí í jnko chrínta ntá ntá nchónhya chojni síin ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui ijnko ch'ín it'ín Jairo na mé ijnko ch'ín 'etqan kuènte nínko. A ntá kjuák'exín toch'in ch'án toté tí ch'ín Jesús chronóèhe ch'án kixin sáchrókjuí ch'ín Jesús ntqo ch'án ⁴² kixin chóntha ch'án jnkokoáxón xjeen ch'án chjin chóntha teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uixítja kichó sín.

43 Ntá síin sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titogehya tjan jína. A ntá kaín nkehe k'uéchóna tjan kjuenkehe tjan tí sín ch'e xroan la ko nijnko sín kjuachahya sín kjuínchekitoghe sín tjan jína. 44 A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jni la í kjuíhya tjan.

45 Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin ninkexró, ichro sín. A ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni síin la ko tótéka sín la ntáhi ntáha, ¿ntá nkekuènte kixin naxa tjan chankiá kixin nkexro tí kuákóxian? —ichro sín.

46 Kjánchó ntáchro ch'ín Jesús kixin:

—Jnkojín nkexro kuákóxinna kixin kónona kixin kjuachaxin kuèntaná kuítogexín ijnko chojni jína —ichro ch'án.

47 A ntá tió k'uúkon tjan kixin ó kónoxín ntá kóchjina tjan chrakon tjan kjuák'exín tjan toch'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxin tjan iké ch'án la ko nkexrí kuítogexín tjan jína xikaha.

48 Ntá ntáchro ch'án kixin:

—Jaha, xjeenni, ó kuítogha jína kixin kuítekávan tí janhan. Kjuaxróxin sátjia —ichro ch'án.

49 Naxa tjejótjo sín ntiha ntá xrínahya ikui ijnko nkexro kjuixín ntogé tí ch'ín t'etogán kuènte njnko, a ntá chénka ch'án tí ch'ín t'etogán kixin:

—Xjaan na mé ó kjuixín k'uén. Áxri í chjeéhya xra tí maestro —ichro ch'án.

50 A ntá tió kuínhin ch'ín Jesús la kjuátehe ch'án ntáchro ch'án kixin:

—Chrakonhya. Titekávan tí janhan la tsitoghe xjaan jína —ichro ch'án. A ntá sákjuí sín.

51 A ntá tí kjuíjik'ixenhen sín nchia ntá kuítogehya ch'ín Jesús kixin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjin chrók'uixenhen sín tí tjen tí xjan a. 52 Kaín tí sín tjejó ntaha tsjánkama sín tí xjan a. Kjánchó jehe ch'án ntáchro ch'án kixin:

—Tsjankahyará. Tí xjan la tsík'enhya la tjejua xjan —ichro ch'án.

53 Ntá tjanoá sín ch'án kixin jehe sín la ó nohe sín kixin tsík'en xjan. 54 A ntá jehe ch'án itsé ch'án tja xjan ntá itsen k'uíyeghe ch'án tí xjan ntáchro ch'án kixin:

—Tjarisoá, t'aya —ichro ch'án.

55 Ntá kjan asén tjan ntá tuénxín k'uúkatjen tjan. Ntá k'uetogán ch'ín Jesús kixin tsjanjon sín nkehe sine tjan. 56 Ntá it'é la ko iné xjan la chrakon sín. A ntá ch'ín Jesús k'uetuénhen ch'án sín kixin ninkexró chróchenkahya sín kixin xikaha kónhen.

9

*Ch'ín Jesús ichr'án ch'án tí teyó sín
(Mt. 10.5-15; Mr. 6.7-13)*

1 Ntá ch'ín Jesús k'uetogán kixin tsoghjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitoghe sín chojni jína. 2 Ntá k'uetogán ch'án kixin sátsjikjako sín nkexrí

tí kjuachaxin t'et̄oan Dios la ko sinchekitohe sín chojni jína. ³ La ko k'ūet̄oan ch'án kixin:

—Ninkehó nkehe sátsjikohyará nt̄ia sátsjirá, ni tí nta t̄jxinrá la náhí, ni bolsa la náhí, ni niot̄ja, ni chichaon, la ko tsjikoará jehó tí ka t̄jéoyará ó. ⁴ A ntá tí tsjasánrá ijnko nchia tsjanjon sín kjuachaxin la ntahó tsitohará la tsjixixín tí xra ntá sátsjixinrá nt̄iha. ⁵ A ntá tí tsjasánrá ijnko chjasin la ntá tsjanjonhya sín kjuachaxin tsjakorá ntá t'axrjéxinrá tí chjasén sín nt̄iha tsotsénkará tí nche chón̄ta totárá tsjakoxinrá x̄ikaha kixin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuichronka sín tí tan jína tsaáxin chojni la ko kjuínchekitohe sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ A ntá tí ch'ín Herodes t'et̄oan kuínhin ch'án kaín tí xra t̄jeh'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. ⁸ A ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín. ⁹ Kjánchó ntáchro ch'ín Herodes kixin:

—Janhan mé kuét̄oan kóchrínjin sín kja ch'ín Juan. ¿Á chrókóchaxin jehe ch'án kixin nchónhya kjuaxroan kuínhan tí t̄jeh'e ch'án? —ichro ch'án. A ntá k̄jaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuích'e sín. Ntá k'uaxrjentako sín ch'án tí kohya ninkexró chjinaxón chjasin Betsaida. ¹¹ Ntá tió k'uíxikónohe chojni kixin ntaha t̄jen ch'ín Jesús ntá sákjuíchr̄eh̄e sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexrí t̄jen tí kjuachaxin t'et̄oan Dios la ko kjuínchekitohe ch'án chojni jína.

¹² A ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje t̄jéjóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuát̄eh̄e sín ntáchro sín kixin:

—Chóntahyani itsjé nkehe; jehó in'ó niot̄ja la ko yaá koche chóntani. ¿Á t̄jnkávan sátsjik'énani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni nto. A ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkojé sín ts'ixit̄jaxin sín jnkojnko cincuenta sín —ichro ch'án.

¹⁵ A ntá x̄ikaha kjuích'e sín k'ūet̄oan sín, a ntá k'uíxit̄jaxin sín kaín sín. ¹⁶ A ntá ch'ín Jesús kuákja ch'án tí n'ó niot̄ja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'ó ch'án tí niot̄ja la ko tí koche la chjéhe ch'án tí sín xriko ch'án. A ntá jehe sín k'óxikeyehe sín chjéhe sín kaín tí chojni siín. ¹⁷ A ntá kaín sín kjóne sín

la kókjehe sín. **A** ntá chr'éxín kjuenájin sín kaín tí nkehe síxehe mé teyó ntaxra kjuínchekaón sín.

Ch'in Pedro mé chrónka kixin ch'in Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'in Jesús k'uaxrjenta ch'an tjenixjehe ch'an Dios. Ntá tjejóko ch'an tí sín xriko ch'an ntá kjuanchankíhi ch'an tí jehe sín kixin:

—¿Nkehe ichro tí chojni kixin nkexro tí janhan? —ichro ch'an.

¹⁹ **A** ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. **A** ntá í so sín ntáchro sín kixin jaha la tí ch'in Elías. **A** ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ **A** ntá kjuanchankíhi ch'in Jesús tí jehe sín kixin:

—**A** ntá jahará, ¿nkechorá, nkexro tí janhan? —ichro ch'an.

Ntá ntáchro ch'in Pedro kixin:

—Jaha tí Cristo ichr'an Dios —ichro ch'an.

Ch'in Jesús chrónka kixin its'en ch'an
(Mt. 16.20-28; Mr. 8.30-9.1)

²¹ Ntá ch'in Jesús k'uetuhenen ch'an sín kixin ninkexró tsochenkahya sín kixin nkexro tí jehe ch'an. ²² Ntá chénka ch'an sín kixin:

—Tí Xjeen Dios K'óna Chojni t'ichjánxín tsjasóte nchónhya nkehe tsonhen la ko tsitekakuenhya tí sín t'etqan kuènte nínko la ko tí sín t'etqan kuènte tí sín nchát'á la ko tí sín maestro tjako tí ley. Ts'óyán sín tí jehe ch'an, kjánchó tí nixin yaon na ó tsoxechón ch'an ínaa —ichro ch'an.

²³ Ntá chr'éxín chénka ch'an kaín sín kixin:

—Tí chaxín tsochréherá tí janhan na t'ichjánxín tsjtohérá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréherá tí janhan. ²⁴ Tí nkexro tjinkaon jehó sinchekaá asén mé ts'itjayan. **A** ntá tí nkexro sinchek'itjayanxín asén kixin tinkáchónki tí janhan la tsaá.

²⁵ **A** ntá nkehe tsonhen tí chrókjuacha ijnko chojni chróchónka kaín nkehe síin chjasintajni a ntá kjuachón chrókjuinchek'itjayan ch'an? ²⁶ **A** ntá jnkojin chojni chrókósuehe kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsosuehe chróntáchro ch'an kixin chóxin ch'an tí jehe sín tió tsi ch'an éxi ijnko rey tsíkao ch'an tí kjuachaxin kuènte It'é ch'an la ko tí sín ángel jína. ²⁷ Tíhi mé ntoá xrjanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'etqan tí kjuachaxin kuènte ch'an.

K'uixitóxin nkexrí tsjehe ch'in Jesús
(Mt. 17.1-8; Mr. 9.2-8)

²⁸ **A** ntá k'uátsínka ijní yaon tí tsíchronka ch'an tíhi ntá sákjuiko ch'an ch'in Pedro la ko ch'in Juan la ko ch'in Jacobo la chr'in sín ijnko jna kixin tsonixjehe ch'an Dios. ²⁹ Ntá ch'in Jesús tjenixjehe ch'an Dios ntá k'uixitóxin nkexrí tsjehe ch'an la ko tí iké ch'an la tjóá la ko tjákini tsjehe. ³⁰ Ntá xrínahya k'uikon sín yaá chojni tjejótjo sín tí jehe ch'an na mé jehe sín la tí ch'in Moisés la ko tí ch'in Elías. ³¹ Imá t'inkáséyan jnkontatjen tí tjejó sín tjejótjo sín tí ch'in Jesús kixin nkexrí its'en ch'an la ko nkexrí tsjasótéxín ch'an tí chjasin Jerusalén. ³² **A** ntá ch'in Pedro la ko tí sín tjejóko ch'an la imá kuihi sín kotáchrin; kjónté la k'uéjótjehe sín k'uikon sín tí kjuachaxin kuènte ch'in Jesús la ko k'uikon sín tí yóí chojni ntoá tjejóko sín ch'an. ³³ **A** ntá tió sátsji tí yóí sín tjejóko ch'in Jesús ntá ch'in Pedro ntáche ch'an tí ch'in Jesús kixin:

—Maestro, jína kixin tjejóni ntihi. Chrókuich'énani iní nchia la mé ijnko kuéntá la ijnko kuénte ch'in Moisés la ko ijnko kuénte ch'in Elías —ichro ch'án.

Kjánchó ch'in Pedro í noehya ch'án nkehe chróntácho ch'án kixin chrakon ch'án. ³⁴ A ntá naxá tjenixja ch'án ikui ijnko tjuj kjuák'etja tí jna tjejó sín. Ntá chrakon sín tjejó sín chrínki tí tjuj. ³⁵ Ntá xrinahya kuínhin sín chríkjan tí tjuj itén nkexro ntácho kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uíkon sín kixin jeho ch'in Jesús tjen. A ntá tí jehé sín la tání sín kixin xikaha k'uíkon sín tí yaon a la ninkexró chenkahya sín tí nkehe k'uíkon sín.

Ch'in Jesús kjuínchekitohe jína ijnko chánjan chóna nchakuen tí jínahya

(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxin sín jna la ntá nchónhya chojni sákjuixinhin sín ntja ch'in Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntácho ch'án kixin:

—Maestro, chronóahani kixin chrótsjehé tí xjeenni kixin jnkokoaxón ó chóntani a ntá níhi xjan. ³⁹ Chóna xjan nchakuen tí jínahya la ntá nchek'íyato xjan la ko nchek'aniáte xjan nchexrànka xjan kixin tjetéhe xjan la ko ntáloxro sítjixin ir'va xjan la ko ncheníhi xjan, na mé chrohya tsjínhin xjan. ⁴⁰ A ntá chronóeheni tí sín xriko chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'in Jesús ntácho ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjínkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'in Jesús jiehe k'uetuénhen tí nchakuen tí jínahya kixin ts'axrjexin xjan. Ntá k'uaxrje tí nchakuen tí jínahya ntá kuitóhe xjan jína. A ntá ch'in Jesús kjuínchek'áyéhe tí it'é xjan. ⁴³ A ntá káin sín chrakon sín kixin k'uíkon sín tí kjuachaxin jie kuénte Dios.

Ch'in Jesús chrónka ch'án inaá kixin its'en ch'án

(Mt. 17.22-23; Mr. 9.30-32)

Naxá chrakon sín káin sín kixin tí kjuaxroan kjuích'e ch'in Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehé sín kienxínhya sín tí nkehe ntácho ch'án kixin naxá kjuanjonhya Dios kjuachaxin kixin chrókuienxin sín, ntá chrakon sín na kjuanchankíehya sín ch'án kixin nkexrí t'axrjexin tí nkehe ntácho ch'án.

Nkexro tí imá tjeotan ts'etoan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'in Jesús kjuankíxin sín itjo sín kíchó sín kixin nkexro tí jehé sín antsí má tjeotan ts'etoan. ⁴⁷ Kjánchó ch'in Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan í kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí

janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro antsí chrókjuinchehnkehya la mé antsí chrók'uáyéhe kjuachaxin chrók'uetōan.

Tí nkexro nínkakuenhya tí jeheni la mé tóxrjínhín ch'án tí xrā ch'eni
(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uikonni ijnko nkexro kjuachaxin ihniá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikoxyani ch'án.

⁵⁰ Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhín tí xrā ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén. ⁵² Ich'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uikon sín kixin ó xrā ó sátsji ch'án chjasin Jerusalén. ⁵⁴ A ntá tió k'uikon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Ínchéni, ¿á tjínkávan kixin chrókjuanchiani xrohi chrók'uinkajinxín nkaya nkajní chrókjuinchek'itjáyán tí jehe sín éxi kjuanchia tí ch'ín Elías? —ichro sín.

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará. ⁵⁶ Kixin tí Xjeen Dios K'óna Chojni kuíhya ch'án kixin chrókjuinchek'itjáyán ch'án chojni. Náhí. Xrā ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjínkaon chróchréhe sín tí ch'ín Jesús
(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

—Ínchéni, tjínkaonni chróchréheni tí jaha nketí tjínkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kixin:

—Tí koxróna chóna va itjuéé va la ko tí koxroxé chóna va kaké va. A ntá tí Xjeen Dios K'óna Chojni chóntahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chréné tí janhan —ichro ch'án.

Kjánchó kjuátehe ch'án kixin:

—Ínchéni, tjtóhéni senó sátsjikjaváni it'éni —ichro ch'án.

⁶⁰ Ntá kjuátehe ch'ín Jesús ntáchro ch'án kixin:

—Tjtóhé kixin tí chojni tsik'en la jnkokón sín tsik'en tsjavá kichó sín. A ntá jaha la sátsjikjákua nkexrí tjen tí kjuachaxin t'etōan Dios —ichro ch'án.

⁶¹ Ntá ntáchro í jnko nkexro kixin:

— Ìnchéni, tjinkaonni tsochréheni tí jaha. Jehí títóhē tsjinixjehēni tí sín síin ntoeni — ichro ch'án.

⁶² Kjánchó ntáchro ch'ín Jesús kixin:

— Tí nkexro kjuankixin tsotsé ch'án arado ntá chrókjan chrókotónhen nóton mé xíkaha xitjahya sich'ehe ch'án Dios xra.

10

Ch'ín Jesús k'uetuēnhen setenta chojni sátsjikako sín

¹ Ntá chr'éxin Ìnchéni kjueyá ch'án í jnko setenta chojni ntá k'uetuēnhen ch'án sín sátsji sín yóyó sín sátsji sín tsítónxin sín ntia tí kaín chjasin na ko nkúixín tjinkaon ch'án sáchrókjui ch'án. ² Ntá ntáchro ch'án kixin:

— Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuanchehérá tí Ìnché nonte kixin chróchr'án ch'án itsjé chojni chrókjuich'e xra. ³ Sátjirá jahará. Xráxinkáonrá kixin tétuānhanrá sátsjirá éxí kolélo ts'ejóyákanrá chríkjan tí kolobo. ⁴ Tsjikoahyará kabólsa la ko tjoa t'inka chichaon la ko tokate tjikoahyará la ko tí nixjehérá chojni tí ntia títóehyará kixin chrókjuintaxrjanhanrá sín. ⁵ A ntá tíó ts'ixēnhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhi, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntiha chrókjuanjon sín kjuachaxin chrókuítóhará, ntaha mé tsjanjon sín nkehe chóna sín sinterá la ko its'irá, kixin tí nkexro ch'e xra la síin kjuachaxin tsoxenkehe. Tsjihará í jnko nchia la ko í jnko nchia. ⁸ A ntá tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín. ⁹ Nchekítóhérá chojni níhi jina. Ntá chenkará sín kixin tí kjuachaxin t'etoan Dios la kijnhya tjen tí tjejó sín, ichrorá. ¹⁰ A ntá tíó tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntōe sín sátjirá tí ntia chjasin ntiha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókoñohe sín kixin tí kjuachaxin t'etoan Dios la kijnhya tjen tí tjejó sín, ichrorá. ¹² Ntáxrjan kixin tí yaon tsjéjexín chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma* la kénhyó — ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxí k'uikonrá jahará, ntá chrókójehe sín la tjoka chrókjuítóxinhin ntie sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuákoxin sín kixin t'ává sín. ¹⁴ A ntá tí yaon tsitōexín ijje chojni a ntá jahará antsí tsjasótiará, a ntá tí sín kuēnte chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjirá nkaya nkajni, ichrorá. Chaxínhya. Jahará la tsjasinkajinrá sátsjirá tí tsjasótéxin tí sín tsík'en.

¹⁶ Tí nkexro tinhin tí nkehe ntáchrórá la mé xíkaha tinhin tí nkehe ntáxrjan la ko tí sín titekakonhya sín tí jahará na mé xíkaha titekakonnya sín tí

* **10:12** Génesis 19.24–28

janhan. **A** ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ **A** ntá ó kjan tí sín setenta sátsíkji la imá chéhe sín ntáchro sín kixin:

—Ínchéni, kjónté tí nchakuen tí jínahya titekakonhenni tió t'ákjenxinni ihniá —ichro sín.

¹⁸ Ntá ntáchro ch'ín Jesús kixin:

—Kja chaxín k'uikuán kixin ch'ín Tsochren k'uánótjenxin nkajni éxi ijnko kjónkixin xikaha kónhen.† ¹⁹ Ó tjahára kjuachaxin kixin kjónté konche la ko konchiá tsinkátjará la ko tsjachahya ninkehó tí kjuachaxin kuente tí ch'ín Tsochren kixin ninkehó tsoanhyará. ²⁰ Kjánchó jehya tíha chróköcháxínrá kixin tí nchakuen tí jínahya kuitekakonhanrá. Náhi. Chróköcháxínrá kixin ihniárá ó ts'inixín nkaya nkajni —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ **A** ntá tuénxín tí Nchakuen Dios kjuínchechéhe tí ch'ín Jesús ntá ntáchro ch'án kixin:

—Tjáncháha kjuasáya It'éni Inché nkaya nkajni la ko chjasintajni kixin kjuánjonhya kjuachaxin chrók'uitja tí sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'éni, jaha kóxrjínhan kixin xikaha tsonhen.

²² T'aná mé chjina kaín xín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsikjeyá ch'án kixin tjinkaon ch'án tsonohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxi k'uíkonrá. ²⁴ Ntáxrjan kixin nchónhya tí sín k'u'échronka itén Dios ósé la ko nchonhya tí sín rey k'uétjinkaon sín chrók'uikon sín éxi t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejotinhínrá jie, kjánchó í kíenhya sín —ichro ch'án.

Ch'ín Jesús kjuíncheyóexin éxi ijnko samaritano jina

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsoñoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

²⁶ Ntá kjuátjehe ch'ín Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ **A** ntá tí maestro tjako tí ley mé kjuátjehe ch'án ntáchro ch'án kixin:

—Chrótjuèheni Inchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxi tjuéxinni asénni‡ —ichro ch'án.

²⁸ Ntá ntáchro ch'ín Jesús kixin:

—Jina kjuátjehe. **A** ntá tí jaha xikaha sich'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án inaá kixin:

† 10:18 Isaías 14.12 ‡ 10:27 Deuteronomio 6.5; Levítico 19.18

—¿Xá nkexro tí kichó ni chrótuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchro ch'án kixin:

—Ijnko chojni k'uínkajinxin nó ntja kjuixin chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrinahya k'uátsínka ijnko nchat'á tí ntja ntiha ntá k'uíkon ch'án xikaha ntá ántosén ch'án k'uátsínké ch'án. ³² A ntá kjaxin ijnko ch'ín levita k'uátsínka chjinaxón ntiha. Ntá k'uíkon ch'án xikaha ntá ántosén ch'án k'uátsínké ch'án kjaxin. ³³ A ntá ijnko ch'ín kjuixin estado Samaria k'uátsínka tí ntja ntiha ntá k'uíkon ch'án xikaha tjetsínka tí nkexro ntá kuíkonóhe ch'án. ³⁴ Ntá kóchjinehe ch'án tí nkexro tsíkóníhi ntá kjuich'ehe ch'án xroan tí síchrit'o chjéhe ch'án aceite la ko vino la ko kjuínchentetoxín ch'án ka. Ntá kjuixin ntá kjuínchekiták'á ch'án tí kolóchge ch'án. Ntá sákjuiko ch'án ijnko nchia t'ok'èxín chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí inché tí nchia ntáchro ch'án kixin: “T'ayakonhén tí nkexro i, a ntá ántsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án. ³⁶ A ntá tí iní nkexro k'uátsínka ntja la, ¿nkexro tjuéhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

—Tí nkexro kuíkonóhe tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xikaha chrókuich'e —ichro ch'án.

Ch'ín Jesús sákjuí ch'án ntøe tjan Marta la ko tjan María

³⁸ Naxa tjeti ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntøe tjan ntiha. ³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínki toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ínchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'ínkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe ántsí jina la ko ninkexró tsakitsjehya tjan tíha —ichro ch'án.

11

Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'ín Jesús tjenixjehé ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Ínchéni, tjákohéni nkexrí tsonixjeheni Dios kixin xikaha ch'ín Juan kjuakóhe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:

It'eni tjen nkaya nkajní, jaha imá tjóá.

Chrókui tí kjuachaxin kuèntá.

Chrókjuich'e tí nkehe tóxrjínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxinhinni jnkojnko yaon.

⁴ T'óxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'ehehi chojni.

Títóéhyani jeheni xraha chrókjuasinni jie. Nchekaáni kaín tí nkehe jínahya chrókóhenni

—mé xíkaha ichro ch'ín Jesús.

⁵ Kjaxin ntáchro ch'án kixin:

—A ntá jnkojínrá chróchontará ijnko chojni choxian, a ntá sáchrókjuia ntōe ch'án k'áxórtjen chróntáche ch'án kixin: “Amigo, nchekjenni iy'á niotja ⁶ kixin nantá ó kui ijnko chojni chóxinni kuixin ch'án kjin kjuíji ch'án ntōeni ntá chóntahyani ninkehó tsochjéheni ch'án.” ⁷ A ntá tí chrókjuatehe tí nkexro choxian tjen nkaxenhen chróntáchro kixin: “Chjeéhyani xra. Tí ntója ntōeni méhe t'íkjéhe. A ntá xjeenni tjejót'ok'èkoni xjan. Ntá xitjahya ts'áyani tsotjáhani nkehe”, ichro ch'án. ⁸ Ntáxrjan kixin kjónté chrók'uàyahya ch'án chrótjáhya ch'án nkehe kjónté chóxian ch'án, kjá ts'áya ch'án tsotjáha ch'án kaín nkehe t'ichjánxínhan kixin tjinkakonhya ch'án kixin naxa chrókjuak'é chrók'uèya jaha. ⁹ Mé xíkaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjéhe. ¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjéhe.

¹¹ '¿Xá jnkojínrá chontará xjaanrá chrókjuanchahará xjan niotja la ¿á chrókjuánjonrá ijnko xro? Q chrókjuanchahará xjan koche la ¿a chróchjehérá ijnko konche? ¹² Q chrókjuanchahará xjan koja la ¿á chrókjuánjonrá ijnko konchjá? ¹³ A ntá jahará kjónté jínahyará la ó nohará nkehe jina tsochjehérá xjaanrá, la mé ántsí chrókónohará kixin It'eni tjen nkaya nkajní tsotjáhará Nchakuen ch'án tí jnkojínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús chóna kjuachaxin tí Jínahya
(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsik'axrje tí nchakuen tí jínahya a ntá tí ch'ín xitjahya nixja la jina nixja ch'án. Ntá kaín chojni chrakon sín kixin xíkaha tsíkjich'e ch'án. ¹⁵ A ntá jnkojín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxièn tí ch'ín Beelzebú mé tí ch'ín Tsochren, na mé jehe ch'án mé t'etuenhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuènte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkojín gobierno jnkokónhya tjenkayáxin sín ntá tjanjonko kichó sín na mé ts'itjáyan tí kjuachaxin ts'etōanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexri chróchóna ch'án kjuachaxin naxa chrók'uetojan ch'án tí chrók'uaxrje tí jínahya? A ntá jahará ntáchrorá kixin janhan takítsjé nchakuen tí jínahya kixin tí kjuachaxièn ch'ín Tsochren chonta janhan, ichrorá. ¹⁹ A ntá tí xíkaha la, ¿ntá nkexro chjéhe

kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehé sín mé tjako^xin sín kixin jahará ntoáhya tjenkayáxinrá. ²⁰ A ntá tí kjuachaxi^{én} Dios mé takítsjéxian tí nchakuen tí jínahya na mé chró^{ón}oaxinrá kixin tí kjuachaxi^{én} Dios t'et^oan ch'án mé ó kui tí tjejórá.

²¹ A ntá ijnko chojni jjehe yamá chica t'ayakonhen ch'án nt^oe ch'án kixin tí nkehe chón^ta ch'án ts'ítjáyanyha. ²² A ntá itsi ijnko nkexro antsi má tsehe, a ntá tsjanjonko ch'án tí inché nchia, a ntá tsjacha tsakitsjehe tí inché nchia kaín tí chica yamá ch'án kixin imá jje^exín ch'án. A ntá tí ch'in antsi tsehe mé tsakja ch'án kaín nkehe síin ntiha. ²³ Tí nkexro titekakonhya tí janhan mé níⁿkakonna ch'án. A ntá tí nkexro tjinkítsahya tí janhan mé t'inkákonhen tí xra t'a —ichro ch'án.

Ijnko tí nchakuen tí jínahya mé tsokjan inaá

(Mt. 12.43-45)

²⁴ A ntá ijnko nchakuen tí jínahya tsík'axrjéxín ijnko chojni na mé ixri tí nonte xamá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan nt^ona k'uaxrjéxian.” ²⁵ A ntá tió kjan la éxi ijnko chojni tsík'ánjón nt^oe la náxrjón tsjehe tí nkaxenhen nchia. A ntá k'uíkon tí jínahya xikaha tjen nchia ²⁶ a ntá sá^kjuikakjín yato nchakuen tí jínahya antsi má jínahya. A ntá antsi má jínahya kónhen tí ch'in a, a ntá tí senó la kénhyó. Mé xikaha ts^onhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'in Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntá^{ch}ro tjan kixin:

—Chéhe tí nkexro k'uaxrjenixín tí jaha kjuíntak'ánkiá —ichro tjan.

²⁸ Ntá jehe ch'án kjuát^ehe ch'án ntá^{ch}ro ch'án kixin:

—Antsi chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón

(Mt. 12.38-42; Mr. 8.12)

²⁹ Ntá nchónhya chojni sí^tójn^otsé sín tí tjen ch'in Jesús ntá jehe ch'án kjuankixin nixja ch'án ntá^{ch}ro ch'án kixin:

—A ntá tí chojni síin jie la jínahya sín, a ntá tjanchia sín kixin chró^ón^ojasian ijnko kjuaxroan náxrjón. Kjánchó tsjako^xinhyha í jnko kjuaxroan la jehó tí nkehe tsíkónhen ch'in Jonás. ³⁰ Ntá éxi yóhe kónhen ch'in Jonás kónoexín tí sín chjasin Nínive mé xikaha ts^onhen tí Xjeen Dios K'óna Chojni la ts'íkon tí chojni síin jie. ³¹ A ntá tí yaon tsit^oexín ijje chojni tjejó jie la mé tí tjan reina k'uet^oan kjuixín nó Sur mé ts'inkatjen tjan tsjanchia tjan jje kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'in Salomón.* A ntá jie itjén janhan antsi chonta kjuachaxin, a ntá ch'in Salomón la kénhyó. ³² La ko tí sín chjasin Nínive kjaxin ts'inkatjen sín tió tsit^oexín ijje chojni la tsjanchia sín jje kixin tí sín tjejó jie la ko tsontá^{ch}ro sín kixin chró^ón^ojasóte tí chojni tjejó jie kixin tió kuínhin tí sín Nínive chrónka ch'in Jonás itén Dios la kjuít^oxínhin sín ntje sín. A ntá jie itjén janhan antsi má chonta kjuachaxin, a ntá ch'in Jonás la kénhyó.

Xrohi t'inkaséyanxín cuerpo kuènte chojni

(Mt. 5.15; 6.22-23)

* 11:31 1 Reyes 10.1-10

³³ 'Nijnko chojni chrokjuinchek'ákjen ijnko xrohi chrókjuak'ema ch'án la ko chrókjuak'eħya ch'án chrínki ijnko ntacajón. Náhi. Noi chrókjuak'e xrohi chrókjuak'enkaya candelero kixin ts'ikonxín chojni tí t'inkaséyan.† ³⁴ Tí ikonrá mé éxi yóħe ijnko xrohi t'inkaséyanxín tí cuerpo kuéntará. A ntá tí chontará ikonrá jına la ntá kuenté cuerpo kuéntará chónța xrohi. A ntá tí chontará ikonrá jınahya la ntá kuenté cuerpo kuéntará la sitié tjen. ³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéħya tí tjejorá. ³⁶ A ntá tí kuenté tí cuerpo kuéntará chróchónța xrohi la ko nit'o chrók'uixitiéħya la ntá kuenté la chrók'uikonrá jına la éxi ijnko lámpara kuenté ch'e xřa jına.

Ch'ín Jesús chrónka kixin ntoáħya tjako tí sín fariseo la ko tí sín tjako ley (Mt. 23.1-36; Mr. 12.38-40; Lc. 20.45-47)

³⁷ A ntá tío kjuixin nixja ch'ín Jesús ntá ijnko ch'ín fariseo chrónóħe ch'án tí ch'ín Jesús kixin sátsjiko ch'án ntqe ch'án sineko ch'án. Ntá tío kjuíji sín ntiħa la k'uixenhen sín nchia ntá kjuák'etjaxín ch'ín Jesús chjino tjen tí mesa a. ³⁸ A ntá tí ch'ín fariseo chrakon ch'án k'uikon ch'án kixin ch'ín Jesús k'óntihya ch'án tja ch'án senó tí sine ch'án éxi tinkáchónki tí jeħe sín. ³⁹ Kjánchó Īnchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsikaón kjuachee la ko kjuachjinoxínhin. ⁴⁰ Jahará lontirá. ¿A noahyará kixin tí nkexro kjuich'éna tí ntója la koí tí nkaxenhen kjuich'éna ch'án? ⁴¹ Tí chrókjuinchekĩtonhénrá chojni nõa kaín asánrá tí nkeħe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkeħe sineni. A ntá tahyará kuentá tí nkeħe ntoá la ko nkexrí chrótjuèhérá Dios la ko nkexrí chrótjuèhérá kíchuárá. Jına chróchjehérá Dios nkeħe la ko chrók'uitjáyanyhará tí chrókjuínkĩtsará kíchuárá.

⁴³ 'Nòará jahará fariseorá. Tjinkáonrá ts'ejokjenrá tí silla náxřon nkaxenhen njnko la ko tjinkáonrá kixin jnkójına tsonixjahará sín tío tsoxétará sín ntasin.

⁴⁴ 'Nòará jahará maestro tjàkorá tí ley la ko jahará fariseorá. Ntoáħya tjenkayáxinrá ch'iará. Jahará éxi yóħe tóye tsixravá chojni tsík'en t'ikonhya chojni la t'atsínka sín nátaón la noehya sín kixin tsixravá chojni ntiħa.

⁴⁵ A ntá kjuátēħe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhinni ní? —ichro sín.

⁴⁶ A ntá ntáchro ch'ín Jesús kixin:

—Kjaxín nõará tí jahará tjàkorá tí ley. Tétuēnhénrá chojni tsamá sín ijnko nkeħe imá ye chrókjuachahya chojni chrókuamá. A ntá jahará njnko dedo tjará chrókjuínkĩtsará tí nkeħe imá ye yámá sín.

⁴⁷ 'Nòará tí jahará. Ch'énará tjt'oe tí sín k'uéchrónka itén Dios ósé tsík'óyán tí sín k'uaxřenixinrá. ⁴⁸ Xikaha jahará tjákoxinrá kixin ó nchoxon tí nkeħe kjuich'e tí sín k'uaxřenixinrá ósé kixin jeħe sín k'óyán sín tí nkexro k'uéchrónka itén Dios ósé. A ntá jahará ch'énará tjt'o tí tsixravá sín.

⁴⁹ 'Mé xikaha Dios chónța kjuaxřexinkaon imá jına ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkójín tí jeħe sín la ko tsochónkĩħi tí í so sín, ichro ch'án. ⁵⁰ A ntá Dios mé tsjanchia jje tí chojni siín jie kixin k'uitji

† 11:33 Lucas 8.16

ijnjé kaín tí sín k'u'échronka itén ch'án ósé desde tí xrankíxin k'óna chjasintajni ⁵¹ la mé xrankíxixín k'úitji ijnje ch'ín Abel la mé kjuixixín k'óyán sín ch'ín Zacarías k'óyáxin sín ch'án jnkosiné tí tjen tí altar la ko tí nínko. Ntá Dios sinchekjasóte ch'án tí sín siín jie kixin xikaha ik'uén kaín tí sín a.

⁵² N'óará jahará maestro tjàkorá tí ley. Jahará tjinkákonhyará kixin í so chojni tsonohe sín tí nkehe chaxín la ni jahará tjinkákonhyará sinchexiteyará la ko tí t'otéhyará kixin í so chojni chrókjuinchexiteyá sín —ichro ch'án.

⁵³ A ntá kjuixín nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankíxin sín kjuanchankíhi sín ch'án nchónhya nkehe ⁵⁴ chrókjuachaxín sín ch'án kixin ách'e ntoáhya chrókjuat'he ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

¹ A ntá nchónhya míl chojni kójnkotsé sín ntá tinkák'íntate kichó sín. Ntá ch'ín Jusés saoxín kjuankíxin chénka ch'án tí sín k'uájiko ch'án ntáchro ch'án kixin:

—Chrókuítékákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánkí niotja tí nkehe tjako sín. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sín chrítaón nchia tsinhin kaín xín chojni.

Nkexo tí chróchrakonhenni

(Mt. 10.26-31)

⁴ Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuich'e sín. ⁵ Kjánchó tjonkará kixin nkexo chróchrakonhénrá. Chróchrakonhénrá Dios mé tí nkexo tsakitsje kjuachón ntá chóna kjuachaxín tsochr'án chojni tí siín xrohi tsjasótéxin sín. Tí nkexo a mé chróchrakonhénrá ch'án má.

⁶ 'Á chrókoxixínhya in'ó koxroxé yaá chichaon ntsíntsi? Kjánchó Dios la ts'itjáyenhya ch'án nijnko tí jehe va. ⁷ Kjónté tí kaxihj chóna ikjárá la nohe ch'án nkekjain ka chontará. Méxra chrakonhyará tí jahará kixin antsí má tjete sínkí tí jahará. A ntá kjónté nchónhya koxroxé la kánhyó sínkí tíha.

Chróchrónkani kixin tinkáchónkini Inchéni Jesucristo nkayakon chojni

(Mt. 10.32-33; 12.32; 10.19-20)

⁸ Ntáxrjan kaín tíhi kixin tí nkexo tsochrónka kixin tinkáchónkina sín nkayakon chojni la kjaxín tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuénte Dios. ⁹ A ntá tí sín sinchemá sín kixin chónhyana sín nkayakon chojni la ntá kjaxian janhan sintamá kixin chonhya tí jehe sín nkayakon tí sín ángel kuénte Dios.

¹⁰ A ntá jnkójin nkexo ts'ántaxínhin sín tí Xjeen Dios K'óna Chojni naxa jina ts'itjáyán tí jie k'uántaxínhin sín. A ntá tí nkexo ts'ántaxínhin tí Nchakuen Dios la xitjahya tsjiin tí jie tí xikaha tsixro sín.

¹¹ Tíó tsjikoará sín nkaxenhen nínko Israel la ko tí tjejó tí sín t'et'ean la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kixin tíó tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochónta chojni itsjé nkehe

¹³ Ijnko nkexro tjenkákjan tí sin tsíkójkotsé ntáche ch'án tí ch'ín Jesús kixin: —Maestro, ntáche tí kichó ni a kixin tsjanjon ch'án tí nkehe tónhenni tocar tsíkítghe it'éni tsakjani —ichro ch'án.

¹⁴ Ntá kjuátghe ch'ín Jesús ntáchro ch'án kixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrxjon chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkächjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'ínkachjinayá noa chonta ntá sít'ána ijnko antsí jie ts'ínkachjinayá kaín nkehe k'ónana jie chonta. ¹⁹ Ntá tsontátjan asenna kixin: Asenni, nchónhya nkehe chonta jaha tsíchjina tsjacha nchónhya nánó. Ntá jie t'ók'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xíkaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿já nkexro kuènte tíha?” ichro ch'án. ²¹ Mé xíkaha tsonhen tí nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajni —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uitsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuéntará, a ntá kánhyó sínkí tí ka chrók'uitsará. ²⁴ Xráxinkáonrá nkexrí síin tí kontálo. T'enkahya va la ko tjáhya va la ko chóntahya va nketí ts'ínkächjinayá va tí noa. Kjánchó Dios la tjanjon nkehe sine va. A ntá jahará la antsí tjetooan, a ntá tí ko xritjaka la kénhyó. ²⁵ ¿Á tjejó jnkojínrá tjenkayáxinrá kixin tí chrókóxakuanhyará má ntá naxa chrók'uankirá it'ó metro nteoxinrá inaá? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe síin?

²⁷ Xráxinkáonrá nkexrí sít'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrxjon k'uék'inkáya ch'án naxa kjuíncheyóehya ch'án kixin antsí náxrxjon tí tsjo a. ²⁸ A ntá xíkaha Dios mé nchek'itsa ch'án kaín kayoa kjónté ijie síchón la ntóye tsoche, la mé xíkaha tsjanjon ch'án tí nkehe chrok'uitsará jahará. ¿Ntá nkekuènte kixin naxa titekáonhyará ch'án? ²⁹ ¿Ntá nkekuènte ixrírá tóxakonhanrá xritjeyará nkehe sinterá la ko nkehe its'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete síin nkaya nkajni

(Mt. 6.19-21)

³² 'Chrakonhyará jahará kolélo kuéntana. Kjónté tsjéhyará la It'ará tóxrjínhín ch'án tsotjáhará ch'án tí kjuachaxin kuénte ch'án. ³³ Nchekjirá kaín nkehe chontará la ntá chjeherá tí chichaon tí sín chóntahya. A ntá xíkaha sich'erá la tí tjoq t'inka chíchakóanrá tsontaxinhya kixin tí nkehe tjete siín nkaya nkajní tsjejhya la ko ntaha kohya xíchee la ko ts'ínhya kué la ko ts'itjáyanhya. ³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochonhénrá la ko tsjak'ekoará xrohi tjeche. ³⁶ Listo chrók'uejorá éxí chojni ch'e xra tjejóchónhen sín tsokjanxin tí lámge sín tí tsíkótehe chojni kixin tió tsi ch'án la ts'èya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xra tió chrókjan tí lámge sín chrók'uikon ch'án kixin naxa tjejótsehe sín. Ntá chaxín ntáxrjan kixin tí ch'ín lamo ts'etóan ch'án kixin ts'ejótjaxín sín tí tjen mesa ntíha ntá tsjanjon ch'án nkehe sine sín. ³⁸ Kjónté chrókui ch'án k'áxrótjen o chrókui ch'án nantóye mé xíkaha chrók'uikon ch'án kixin tjejótsehe sín la náxrjón tí sín ch'ehe ch'án xra. ³⁹ Chrókónohará tíhi kixin tí chrókónohe tí inché nchia nke hora chrókui tí xíchee ntá chrókjuak'etsjehe ch'án chrókuítóehya ch'án chrók'uixenhen xíchee tí ntqe ch'án chrókué. ⁴⁰ Ntá jahará kjaxinrá xíkaha chrók'uejotsjehérá kixin titàya tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína

(Mt. 24.45-51)

⁴¹ A ntá ch'ín Pedro kjuanchankí ch'án kixin:

—Ínchéni, ¿á jehóni kaín ni kjuíncheyóéxian nkehe ntáchrua o kaín chojni? —ichro ch'án.

⁴² Ntá ntáchro Ínchéni kixin:

—¿Nkexro tí t'etóan tí xra jína, a ntá tí lámge ts'etueñhen kixin ts'ayakonhen ch'án tí chojni siín tí nchia ntíha kixin tsjanjon ch'án nkehe sine sín xintii tí hora a? ⁴³ Náxrjón tjen tí nkexro a tió tsi tí lámge ts'ikon ch'án kixin naxa tjech'e tí xra. ⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etóan tí ch'ín a. ⁴⁵ A ntá tí ch'ín t'etóan sítónhen xra tsjenkayáxin kixin tjokahya tsokjan tí lámge ch'án, a ntá tsjan kixin ch'án tsónínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoa ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámge ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámge ch'án ntá ch'e ch'án nkehe chrókjuasótexin ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsje xra ts'áyéhe ch'án sich'e ch'án; la ko antsí tsje xra tsoxranchehe tí nkexro k'uáyéhe itsje nkehe.

Jnkokoáhya tsjenkayáxin chojni kixin ó kui Ínchéni Jesús

(Mt. 10.34-36)

⁴⁹ Janhan k'uinka kixin sintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya

tsõna tsjasõtena. Tõxakonna tsoxiteyájia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha. ⁵² Kixin ijie xrankixixín in'ó chojni naxa kjéhya jnkokoáhya tsjenkayáxin sín. Tí iní tsonínkakõnhen tí yaá. Tí yaá tsonínkakõnhen tí iní. ⁵³ A ntá tí it'é tsonínkakõnhen tí xjeen ntoa, la ko tí xjeen ntoa tsonínkakõnhen tí it'é. A ntá tí iné tsonínkakõnhen tí xjeen chjin, la ko tí xjeen chjin tsonínkakõnhen tí iné. Tí ich'ee tsonínkakõnhen tí tikíntee la ko tí tikíntee tsonínkakõnhen tí ich'ee tjan.

Tí nkehe chronkaxín nkehe tsonhen

(Mt. 16.1-4; Mr. 8.11-13)

⁵⁴ Ch'in Jesús kjaxin ntáche ch'án tí chojni siín kixin:

—A ntá ts'ikonrá ts'áya tjuí tí tjiatõxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin. ⁵⁵ A ntá tí chjéhe xrinto nó sur ntá ntáchrórá kixin tsosóa, a ntá xikaha chaxín tsosóa. ⁵⁶ Jahará nóáhya tjenkayáxinrá. Ó nohará tjenkayáxinrá nkexrí tsonhen nkajni la ko chjasintajni. ¿Ntá nkexrí naxa tíenxinhyará nkehe sítõnhen tí tjejorá jie?

Chrókõxakõnhenni kjuaxróxin chrók'uejõkoni tí sín nínkakõnhenni

(Mt. 5.25-26)

⁵⁷ ¿Nkekuente tjeyáhyará jahará nkehe tí jina? ⁵⁸ Tí jnkojín nkexro tsjanchia jie sájtikoará ch'án nkayakon tí sín t'etõan na tí ntia ó chrónkakjórá ch'án kixin tsoyõxin ts'ixinhya kjuanínkaon kixin sátsjikoahyará nkayakon tí ch'in juez, kixin tí ch'in juez chrók'uetõan ch'án kixin sátsjikoará tí sín comandante. A ntá tí ch'in comandante chróchr'áxanhanrá ch'án ntõechiso. ⁵⁹ Ntáxrjan kjá ní chrók'uauxrjéxinhyará ntiha tsjenkajiará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejõ iso sín chénka sín tí ch'in Jesús kixin nkexrí kjuích'e ch'in Pilato k'uetõan its'en iso chojni tsíkixín estado Galilea k'uitji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios. ² A ntá kjuátehe ch'in Jesús ntáchro ch'án kixin:

—¿Á tjenkayáxinrá kixin xikaha kónhen tí sín tsíkixín estado Galilea kixin antsí jie jie chõnta sín, a ntá tí í so sín chjasén sín la á náhi ní? ³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá kixin antsí má k'uéchõnta jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní? ⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjáyanrá kjaxin.

Ch'in Jesús kjuíncheyõexin ch'án éxi jnko nta to higo t'ónahya to

⁶ A ntá ch'in Jesús kjuíncheyõexin ch'án ntáchro ch'án kixin:

—Jnko chojni chõnta jnko nta to higo nõntee ch'án. Ntá sákjuítsjehe ch'án á k'õna to. A ntá náhi k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrinjian tí nta kixin tsoxéhe tí nonte a.” ⁸ A ntá tí ch'in t'ayakonhen nonte kjuátehe ch'án ntáchro ch'án kixin: “Áxri, títõhé ijie nánó kixin sántantá nche la ko tsjiko nchekátjehe. ⁹ A ntá tí xikaha ách'e ts'õna to. A ntá tí náhi na ntá ts'ochrinjian chr'éxin.”

Ch'in Jesús kjuínchekitohe jina ijnko tjan nîhi tí yaon t'ok'éhe chojni

¹⁰ Ch'in Jesús kjuák'e ch'án ijnko nînko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'in Jesús k'uikon ch'án kixin xikaha tjen tjan ntá k'uíyehé ch'án tjan ntáchro ch'án kixin:

—Naná, ó kjuínhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'in t'etōan kuènte nînko kónínkaon ch'án kixin ch'in Jesús kjuínchekitohe jina ijnko chojni ijnko yaon t'ok'éhe sín, ntá ntáche ch'án tí chojni a kixin:

—Sín injon yaon mé chrókónhen xra chrók'uinkará chrókuitōhará jina na jehya tí yaon t'ok'éheni chrókónhen tíha —ichro ch'án.

¹⁵ A ntá Ínchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasintānkeehyará tí koxintāará la o tí kolóchoará chrókjuikoará va ntá tí yaon t'ok'éheni ní? ¹⁶ A ntá tí tjan mé tsík'axrjenixin tí ch'in Abraham na mé ó chóna dieciocho nánó tsíkjinchenteto ch'in Tsochren tí jehe tjan, ¿á jehya jina kjaxin chrókjuasintānkā tí nkehe tsíkóntetoxin tjan tí yaon t'ok'éheni? —ichro ch'án.

¹⁷ Ntá xikaha ichro ch'in Jesús la ntá kaín tí sín kónínkakohen ch'án la kósuèhé sín. A ntá kaín tí chojni sín ntaha chéhé sín k'uikon sín kaín tí kjuaxroan jíé kjuakoxin tí jehe ch'án.

Kjuíncheyóexin ch'in Jesús éxi ijnko tje ntsí kuènte nta mostaza
(Mt. 13.31-32; Mr. 4.30-32)

¹⁸ Ntá ntáchro ch'in Jesús kixin:

—¿Nkehe tóyóexin tí t'etōan Dios tí kjuachaxin kuènte ch'án la ko nkehe jina chrókjuintayóaxian? ¹⁹ Éxi yóhe ijnko tje kuènte nta mostaza k'uenkā ijnko chojni nontee ch'án. A ntá tíó k'uánkí kóyóhé éxi ijnko nta jíé. A ntá tí koxroxé xritjaká mé kui va kjuích'éna va kaké va chrík'á tí chaon tí nta.

Ch'in Jesús kjuíncheyóexin éxi tí xroan t'ánkixin niotja
(Mt. 13.33)

²⁰ Ntá ntáchro ch'in Jesús ínaá kixin:

—¿Nkehe chrokjuintayóaxian tí t'etōan Dios tí kjuachaxin kuènte ch'án? ²¹ Éxi yóhé tí xroan nchek'ánkí niotja kjuinkíkjanxin ijnko chojni chjin iní medida harina. A ntá tí ch'o la k'uánkí.

Tí puerta tekahya
(Mt. 7.13-14, 21-23)

²² K'uátsínka ch'in Jesús kaín chjasin hyé la ko kaín chjasin ntsínsí nkákjako ch'án tí tan jina kixin jehe ch'án ó sátsji ch'án chjasin Jerusalén. ²³ A ntá ijnko nkexro kjuanchankí ch'án kixin:

—Ínchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixēnxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí ínché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchorá kixin: “Tadá, takítjéhe nchia”, tsixrorá. Kjánchó jehe ch'án tsjatehe ch'án tsontáchro ch'án kixin: “Nonahya nketí k'uinkaxínrá

jahará”, tsixro ch'án. ²⁶ A ntá tsjankíxinrá tsontáchrórá kixin: “Kjóneni la ko k'uíni jnkokoá la ko jaha kjuákoḡian tí ntasjinni”, tsixrorá. ²⁷ A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tjtoherá tí janhan sájtirá ókjé kain tí jahará jínahya kjujch'erá.” ²⁸ Ntaha tsotsjankará la ko sintetaónrá nénorá tió ts'ikonrá kixin ch'in Abraham la ko ch'in Isaac la ko ch'in Jacob la ko kain tí sín k'uéchronkaxin itén Dios mé tjejó sín tí tjen Dios t'etóan ch'án, a ntá jahará la ts'axrjéxinrá ntója ntiha. ²⁹ Tsjixin chojni nó tjitoḡin yaon la ko nó tjiátóxin yaon la ko nó norte la ko nó sur ntá ts'ejótjaxin sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'in Jesús
(Mt. 23.37-39)

³¹ A ntá tí yaon a ikui iso sín fariseo ntáche sín tí ch'in Jesús kixin:

—Sátjixian ntihi kixin ch'in Herodes tjinkaon chrók'oyán ch'án tí jaha —ichro sín.

³² A ntá jehe ch'án kjuátehe ch'án ntáchró ch'án kixin:

—Sátjirá chenkará tí ch'in jínahya ch'ia kixin: “Ijie la ko ntóye tsakítsje nchakuen tí jínahya la ko sintakitohá chojni níhi jína la ntá tí níxin yaon a ntá tsjixinna tí xrá kuéntana,” tsixrorá. ³³ Kjánchó t'ichjánxin kixin naḡa sájtjya tí jie yaon la ko ntóye la ko tí yaon chr'éxin kixin t'ichjánxin kixin ijnko nkexro chrónka itén Dios chrók'uenxin ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítará. Imá itsjé veces tjínkavan chrókójnkotsérá la chrók'uáyakonhanrá éxi ijnko cochíká mé t'ayakonhen xjeen va chrínki kanenee va mé xikaha tjínkavan chrók'uáyakonhanrá tí jahará. Kjánchó jahará la tjínkákonhyará xikaha. ³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixin kjuachaxin ihnjé Inchéni Dios.”

14

Ch'in Jesús kjuínchekitohé jína ijnko nkexro tsík'atjoyé kuenté

¹ A ntá tí yaon t'ok'éhe sín sákjuí ch'in Jesús ntóe ijnko ch'in fariseo t'etóan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án. ² A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. ³ A ntá ch'in Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A sín kjuachaxin sinchekitoheni jína ijnko chojni níhi tí yaon t'ok'éheni o náhi? —ichro ch'án.

⁴ A ntá jehe sín la tání sín. A ntá ch'in Jesús sákjuíko ch'án tí ch'in níhi la kjuínchekitohé ch'án jína la k'uétuēnhen ch'án kixin sátsji ch'án. ⁵ A ntá ntáche ch'án tí sín fariseo kixin:

—Jnkojín tí jahará chontará kolóchoará o koxintaará chrókjuítsinkáya va tóye ¿á senóhya chrókuakítsjetaónrá va tóye kjónté yaon t'ok'éheni ní? —ichro ch'án.

⁶ A ntá jehe sín ninkehó kjuáteheya sín kixin xikaha ichro ch'án.

Tí sín tsík'iyehé sín sátsji sín kia tsíkótehe chojni

7 Ntá k'uikon ch'ín Jesús kixin tí sín tsikóhchina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

8 —Tió jnkojín nkexro ts'iyaha sín kixin tsjasán ijnko kia tsotehe chojni la t'jéyáha tí nta silla kuente tí sín t'etóan kixin ách'e tsi jnkojín nkexro antsi t'etóan ⁹ a ntá tí nkexro k'uíyahará yóirá itsi ch'án tsjanchahará ch'án kixin t'ínkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuáha sátsjia tsjak'etjaxian tí silla kjuixixín. ¹⁰ Íchá jína tió t'iyaha sín chrók'juak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jína tjoni la t'atsínka tjak'etjaxian tí silla antsi náxrjón”, kixin ntaha tsjikosáyaha sín nkayakon kaín tí sín ts'ejótjaxinkoa sín ntiha. ¹¹ Kixin tí nkexro sinchehnkehe asén kixin imá chrók'uetóan ch'án la mé chr'éxin Dios tsjanjonhya kjuachaxin kixin ts'etóan ch'án. A ntá tí nkexro k'uék'etóanhya la mé chr'éxin Dios tsjanjon kjuachaxin kixin antsi ts'etóan ch'án.

¹² Kjaxin ntáche ch'án tí nkexro tsík'iyehé ch'án kixin:

—Tió tsjásian kia it'ó yaon la o tsonjin la t'iyéehya tí sín choxian la ko tí sín kichúa la ko tí sín naxá kjéhya la ko tí sín rico chjino ntóa, kixin jehe sín la chr'éxin ts'iyaha sín inaá la xikahó la ó kjuixin kjan tí k'uíyehé sín. ¹³ Íchá jína chrók'uíyehé tí sín nóa la ko tí sín tsixénká toté sín la ko tí sín xitjahya tji la ko tí sín t'íkonhya. ¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

¹⁵ A ntá kuínhin ijnko tí sín t'ejótjaxin sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niótja tí tjen Dios t'etóan ch'án —ichro ch'án.

¹⁶ Ntá ntáchro ch'ín Jesús kixin:

—Ijnko chojni kjuasin ijnko kia jié ijnko kónjín la k'uíyehé ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uetuénhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehé ch'án kixin chrókóhchina sín kixin ó t'ejóchónhen kaín nkehe sine sín. ¹⁸ Ntá kaín sín kjuankixin sín chrónòa sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kixin: “Na ntá k'uenani ijnko nontéeni la t'ichjánxin tsjitsjeheni la xitjahya tsjjini tí t'iyeheni ch'án, ntá chénka ch'án kixin chrókóninkakuenhyani ch'án”, ichro ch'án. ¹⁹ A ntá í jnko ch'ín ntáchro ch'án kixin: “Na ntá k'uenani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókóninkakuenhyani ch'án”, ichro ch'án. ²⁰ A ntá í jnko ch'ín ntáchro kixin: “Na ntá kóteheni, méxra xitjahya tsjjini”, ichro ch'án. ²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátsjia kaín ntja chjasin í la tsjikoa ntihi tí sín nóa la ko tí sín tsixénká toté sín la ko tí sín xitjahya tji la ko tí sín t'íkonhya”, ichro ch'án. ²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuénhéni la kjónté naxa xranka chrókui chojni”, ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátsjia kaín ntja jié la ko kaín ntja ntsí la tétuénhén chojni siín chrókui sín chrók'uíxixenhen nchia

ntona naxa xranka. ²⁴ Kixin ntáxrjan kixin nijnko tí sín k'uíyaha senó chrókui sín chrókjone sín tí nkehe chrótjaha sín", ichro ch'án.

Ixa tsochréheni Cristo

²⁵ Nchónhya chojni nkáchréhe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

²⁶ —A ntá jnkojín chojni tsotjinkaon tsochréhe tí janhan la antsí má tjeoan chrótuana sín la kjónté kénhyó chrótuéhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótuéhe asén sín. A ntá náhi la xitjahya ts'óna discípulo kuéntana jehe sín. ²⁷ Tí nkexro tsamáhya tí ntacruz kuènte sín tsochréhya sín tí janhan la xitjahya ts'óna discípulo kuéntana. ²⁸ A ntá jnkojín tí jahará chrókjuich'énará ijnko tjat'o nteto, zá senóhya chrókjuenkayáxinrá kixin nkejaín chichaon ts'ichjánxin ts'ixenhen chrótsjehérá á nchoxon chrókjuixixin chrók'ónaxín tí tjat'o a? ²⁹ A ntá tió tsjankáxinrá sich'énará tí tjat'o ntá chr'éxin xitjahya tsjixin sich'énará, ntá kain chojni ts'ikon sín tsjanoará sín ³⁰ tsontáchro sín kixin jaha kjuankíxian kjuich'éna, a ntá jie xitjahya sijnchekjixian ts'óna, tsixro sín. ³¹ A ntá jnkojín tí ch'ín rey t'etean tsjanjonko í jnko rey t'etean kjaxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuachaxin ch'án tí kán mil soldado chóna tí í jnko ch'ín t'etean. ³² A ntá tí chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjen ch'án la íchá jina chróchr'án ch'án ijnko nkexro tsochronóhe ch'án kixin chrók'uixinhya kjuanínkaon. ³³ Mé xikaha jnkojín tí jahará tí tsítóehyará kain nkehe ntoáhya tjenkayáxinrá xitjahya ts'óna discípulo kuéntana.

Tí xijnta tsik'ánkéhé tí jní

(Mt. 5.13; Mr. 9.50)

³⁴ A ntá jina tí xijnta, kjánchó tí chrók'uánkéhé tí jní la ntá xitjahya chrókójní inaá. ³⁵ Ntá tí xikaha la ní tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kain tíhi —ichro ch'ín Jesús.

15

Kjuíncheyóexin ch'ín Jesús éxi ijnko kolélo tsik'itjáyán

(Mt. 18.10-14)

¹ Kain tí sín nchekjènkí la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín í la kjónté tí sín chóna nchónhya jie la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án kixin:

⁴ —A ntá jnkojín tí jahará, tí chontará ijnko ciento kolélo ntá chrók'uitjáyán ijnko va, zá chrókuitóehyará tí noventa y nueve va tí nteje ó, a ntá á chrókjuikjéyáhyará tí ko tsik'itjáyán hasta chrók'uitjájíará va ní? ⁵ A ntá tí ts'itjára va ntá tsamárá va tsócháhará. ⁶ Ntá tió tsokjanrá ntóará ntá ts'iyehérá kain tí sín choxinrá tjórá jina la ko tí sín chjinaxón ntóará ntá tsontácherá sín kixin: “Tsóchéheni ts'ejóni jie kixin ó k'uitjá tí kolélo tsik'itjáyán.” ⁷ Na mé kjaxin xikaha tsotjonkará kixin antsí tsóchéhe kain tí sín siín nkaya nkajní tió ijnko chojni tsítóhe kain tí jie tsikjenkayáxin ch'án.

Ntá kánhyó tsotchèxin tí sín nkaya nkajní kixin tí noventa y nueve chojni jína t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxí chichaon k'uitjáyán

⁸ A ntá ijnko chojni chjin chóna ite chichaon, a ntá tí chrókjuinche'itjáyán tjan ijnko tí chichaon a la, zá chrókjuinche'ákjenhya tjan xrohi kixin chrókjueyáxin tjan la ko chrok'uánjón tjan tí nchia kixin chròtsjehe tjan jína hasta chrók'uitjajia tjan? ⁹ A ntá tíó chrók'uitja tjan la ts'iyehé tjan kain tí chojni chjin jína tjo tjan la ko tí sín chjinaxón ntøe tjan la ntá tsontáche tjan sín kixin: "Tsochéheni ts'ejóni kixin ó k'uitjani tí chichaon kjuínche'itjáyanni." ¹⁰ Ntá kjaxin xikaha tsotjonkará kixin imá tsochéhe kain tí sín ángel kuente Dios tíó ijnko chojni tsítóhe kain tí jie tsikjenkayáxin ch'án.

Ch'in Jesús kjuíncheyóexin ch'án éxí ijnko ch'in kuicháxinhin chichaon

¹¹ Kjaxin ntáchro ch'in Jesús kixin:

—Ijnko nkexro chóna yaá xjeen ch'án. ¹² A ntá tí ch'in tsoyo ntáche ch'án tí it'é ch'án kixin: "It'eni, chjehéni kain nkehe chróchjehéni." A ntá tí it'é sín k'óchrít'ohe ch'án tí nkehe chóna ch'án. A ntá tí ch'in tsoyo k'uáyéhe tí nkehe kuente ch'án. ¹³ A ntá kánhyó tsjé yaon chr'éxin tí xjeen ch'án tsoyo kjuínche'kji ch'án kain nkehe tsik'áyéhe ch'án, ntá sákjuiko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kain chichaon chóna ch'án kixin jehya tí jína kjuich'e ch'án. ¹⁴ A ntá tíó kjuixin kjuèhe ch'án tí chichaon kuicháxinhin ch'án ntá xrináhya kókjinta tí chjasin ntiha ntá kohya nkehe sine kain sín. A ntá jehe ch'án kjuankixin ch'án t'énxín ch'án kjinta. ¹⁵ Ntá jehe ch'án sákjuikjeyá ch'án xrá sich'e ch'án. Ntá chjasin ntaha tjen ijnko ch'in kjuanchehe ch'án xrá. Ntá tí ch'in a kjuanjon ch'án xrá ntá k'uétøan ch'án kixin sátsji ch'án nontøe ch'án kixin ntiha ts'ayakonhen ch'án cochíno. ¹⁶ A ntá jehe ch'án t'énxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninke'xó tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: "Nchónhya chojni siín ntøe t'aná ch'e sín xrá la chóna sín nkehe sine sín. Ntá janhan tjet'énxian kjinta ntihi. ¹⁸ Ntá jie tsokjan tí tjen t'aná la ntá tsontáxrjan kixin: It'eni, kjuasinni jie kuítekakuenhya It'eni nkaya nkajní la ko kjuasinhanni jie kuítekakuanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'énani éxí ijnko chojni t'aha xrá", mé xikaha kjuenkayáxin ch'án tsontáchro ch'án. ²⁰ Ntá kuákja ch'án ntja xrakoa ch'án tí ntøe it'é ch'án.

A ntá kjónté naxá kjín kui ch'án a ntá tí it'é ch'án la ó tsík'ikon ntá kuikonóehé ch'án tí xjeen ch'án. Ntá kuinká ch'án la kjuixinhin ch'án ntja la kjóa ch'án la ko kjóneko ch'án kochító. ²¹ Na ntá ntáchro tí xjeen kixin: "It'eni kjuasinni jie kuítekakuenhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kixin xjaan tí jeheni", ichro ch'án. ²² A ntá tí it'é ch'án k'uíyehé ch'án tí sín ch'ehe ch'án xrá ntáchro ch'án kixin: "Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'aninko la ko nchekjankará ch'án totjøa. ²³ La ko tjicakjínrá koxintáxjan tsanká la t'oyánrá va kixin sinekoni ch'án tsjasinhinni ch'án kia. ²⁴ Kixin tí xjanna i la éxí ó tsík'en ch'án xikaha ntá jie la éxí ó xechón ch'án la tsík'itjáyán ch'án la ntá jie la ó kónoxín ch'án inaá", ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án saø la nonte tjech'e ch'án xrá. A ntá tíó kjan ch'án kui ch'án chjinaxón nchia ntá kuínhin ch'án siín són la ko ité sín. ²⁶ Ntá k'uíyehé

ch'án ijnko ch'ín ch'e xrā ntá kjuanchankíhi ch'án kixin nkekuènte xikaha sítónhen. ²⁷ A ntá tí ch'ín a ntáchro ch'án kixin: “Kíchuá la ó tsíkjan. A ntá it'á la k'uetōan k'uén koxintáxjan tsankā kixin jina xíkjan ch'án”, ichro ch'án. ²⁸ A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrxéxin nchia chronóhe ch'án kixin chrók'uixenhen nchia. ²⁹ Kjánchó jehe ch'án kjuátehe ch'án ntáche ch'án it'é ch'án kixin: “Nchónhya nánó t'ahani xrā, la xráxin kuítekakonhanni kaín nkehe kuétōan la kjuánjonhya nijnko kotèntso chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxin ch'án chojni chjin. A ntá jie ikjan ch'án la naxā t'oyán koxintáxjan tsanka”, ichro ch'án. ³¹ A ntá ntáchro tí it'é ch'án kixin: “Xjeenni jaha, xráxin tjejóko kichó ni ntihi. Kaínxin nkehe kuèntana la kuènta jaha kjaxin. ¿Nkekuènte ninkávan? ³² A ntá jie la t'ichjánxin tsjasinhinni kichuá kia tsochéheñi kixin éxí tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án inaá.”

16

Ch'ín Jesús kjuíncheyóexin ch'án éxí tí ch'ín k'uáyéhe xrā la ntá kjuích'ehya xrā jina

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etōan tsonhen xrā. Ntá kui ijnko nkexro chénka tí lamó kixin: “Tí nkexro t'etōan nchexénhen ch'án tí nkehe chonta”, ichro ch'án. ² A ntá tí ch'ín lamó k'uíyehé ch'án tí ch'ín ch'ehe ch'án xrā ntáche ch'án kixin: “¿Á chaxín xikaha ch'e kixin xikaha ichro sín? A ntá jie tsjánjuan jaha kuéntá tí xrā kjuích'e kixin ijie í sích'ehya xrā tsétoan ntihi”, ichro ch'án. ³ A ntá tí ch'ín t'etōan tónhen xrā kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xrā sít'a? La ko janhan la chontahya fuérza sít'a xrā nontee chojni la ko tósuàna kixin chrók'uájia chrókjuánchák'á nkehe.

⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntōe sín tí í tsochontahya xrā sít'a”, ichro tí ch'ín t'etōan. ⁵ Ntá k'uíyehé ch'án jnkojnko jnkojnko tí sín síkéhe tí lámōe ch'án. A ntá tí ch'ín sao kui ntá tí ch'ín t'etōan mé kjuanchankíhi ch'án kixin: “¿Nkekjaín tjasikéhe lámōeni?” ichro ch'án. ⁶ A ntá jehe ch'án kjuátehe ch'án ntáchro ch'án kixin: “Síkáni ijnko ciento ntabarril aceite”, ichro ch'án. A ntá tí ch'ín t'etōan ntáchro ch'án kixin: “Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián”, ichro ch'án. ⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjásiká?” ichro ch'án. Ntá ntáchro ch'án kixin: “Ijnko ciento medida noatrigó síkani”, ichro ch'án. A ntá ntáchro tí ch'ín t'etōan kixin: “Tí xikaha la ntihi tjen tí xroon tsjénkaxian. A ntá jie la ch'éna ochenta ó”, ichro ch'án. ⁸ A ntá tí ch'ín lamó kjuátsoan ch'án kixin kjónté jehya xrā jina kjuích'e tí ch'ín t'etōan kjuích'ehe ch'án xrā la kjánchó tí kjuích'ia ch'án la antsí nohe ch'án kjuích'ia ch'án. Méxrā tí sín chjasintajni antsí nohe sín ch'iyehe kichó sín, a ntá tí sín ixrí tí t'inkaséyan la xikahya chrókjuenkayáxin sín chrókjuích'ia sín, chrókjuenkayáxin sín tí jina.

⁹ Janhan la tétuñhanrá kixin chrókuicháxinhanrá tí chichaon síin chjasintajni kjónté tjuáhya kixin tsjínktsará chojni kixin ntá itsjórá sín jina. A ntá tió tsjeje kaín chichaon ntá jehe sín ts'ejóchónhen sín nkaya nkajni ts'áyáhará sín jnkochríxin.

10 'Tí nkexro k'uáyakonhen tí nkehe chón̄ta kjónté tsjéhya la kjaxin chrókjuacha chrók'uáyakonhen itsjé nkehe chróchón̄ta. A ntá tí nkexro kjuachahya k'uáyakonhen tí nkehe tsjéhya chón̄ta la kjaxin chrókjuachahya chrók'uáyakonhen tí tsjé nkehe chróchón̄ta ch'án. 11 Mé xikaha tí xitjahya t'ayakonhénrā tí chichaon kuènte chjasintajni ntihó, çntá nkexri chrók'uayéhérā nkehe tjete chaxin kuènte nkaya nkajni? 12 Mé xikaha tí kjuachahyarā k'uáyakonhénrā tí chichaon kuènte ókjé nkexro, çntá nkexro chrótjāharā jaharā tí nkehe chaxin tjete chrók'uáyakonhénrā?

13 'Nijnko nkexro xitjahya sich'ehe yaá lamó xrā kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xrā Dios tí tjinkaon sín tsochón̄ta sín itsjé chichaon —ichro ch'án.

14 A ntá tí sín fariseo imá kóxrjính̄in sín chichaon, ntá kuính̄in sín kaín tíha nkerí ichro ch'in Jesús, ntá kjuanoá sín ch'án. 15 Na ntá ch'in Jesús ntáche ch'án sín kixin:

—A ntá jaharā tjinkaonrā chrók'uejóx̄inrā jina nkayakon chojni. A ntá Dios la chóxin ch'án asánrā. A ntá tí nkehe imá tóxrjính̄in ch'e chojni la Dios la tóxrjénhya ch'án.

Tí ley la ko tí t'etqan Dios tí kjuachaxin kuènte ch'án

16 'Naxā kjuakohya ch'in Juan la k'uékjako sín tí ley kuènte ch'in Moisés la ko tí nkehe k'uékjin tí sín k'uéchronka itén Dios ósé. A ntá kui ch'in Juan la chrónka ch'án tí tan jina nkexri ts'etqan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etqan ch'án.

17 'Antsi xrahya chrók'uitjāyan tí nkehe siín nkajni la ko chjasintajni. A ntá xitjahya kixin chróxiteyáhya kjónté ijnko nkehe ntsi t'etqan tí ley.

Ch'in Jesús tjako ch'án kixin chrókjuákēhya kichó chojni

(Mt. 19.1-12; Mr. 10.1-12)

18 'A ntá ijnko chojni tsjakehe ichjién la ntá tsakja ch'án í jnko chojni chjin la ijje tíha. A ntá tí ch'in tsakja ijnko tjan tsikítsinkehe la kjaxin ijje tíha.

Tí ch'in rico la ko tí ch'in Lázaro

19 'Ntá kjuák'e ijnko ch'án imá rico ch'án la ko k'uitsá ch'án ka imá tjete náxrjón kjátse tié la ko kaín yāon kjuasin ch'án kia. 20 A ntá ntója ntq̄e ch'án kjuák'etjāxin ijnko ch'án nõa mé it'in ch'án Lázaro tjanchak'á ch'án la ko nihi ch'án tsichr'enka kuènté ntq̄e ch'án. 21 A ntá tí ch'in nõa la imá kjuak'e asén ch'án chrókjónē ch'án la ko chrókókjeexin ch'án tí nkehe tot'q̄ tsjix̄enjinkixin mesa kuènte tí ch'in rico. A ntá tí konjā la kjuamā va tí tsoá chón̄ta ch'án. 22 A ntá ijnko yaon mé ik'uén tí ch'in nõa. A ntá tí sín ángel mé sákjuiko ch'án tí náxrjón tjen ch'in Abraham. La ko kjaxin ik'uén tí ch'in k'uéríko la sákjuikjavá sín ch'án. 23 Ntá tjen ch'án tí sátsji tí sín tsík'len tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'in Abraham tjeko ch'án tí ch'in Lázaro. 24 Ntá k'uèya tí ch'in k'uéchón̄ta tsjé nkehe ntáchro ch'án kixin: "It'eni Abraham, tikonóana tétuēnhén tí ch'in Lázaro kixin sinchekjataxin ch'án kóhe dedo tja ch'án intā ntá tsi ch'án tsjak'etak'á ch'án nejen kixin tsoxruehe kixin tjinhya sóa tí xrohi siín ntihí", ichro ch'án. 25 Kjānchó ntáchro ch'in Abraham kixin: "Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'in Lázaro mé k'uayéhe ch'án nkehe náxrjónhya. A ntá jie ntihí kjuaxróxin tjen ch'án, a ntá jaha tjetjasótia méhe. 26 A ntá kjaxin

jnkosiné tjen tsaka imá jié xitjahya ts'átòye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átòye sín itsji sín ntihi", mé ichro ch'in Abraham. ²⁷ A ntá tí ch'in k'uéríko mé ntáchro ch'an kixin: "Ntá xrjanóaha jaha It'éni Abraham kixin tétuénhén tí ch'in Lázaro sátsji ch'an ntòe t'aná ²⁸ kixin ntaha kúitohe in'ó tí sín kichiná, ntá chróchenka ch'an sín kixin chrókuihya sín ntihi chrókjuasótehya sín kixin imá náxrjónhya ntihi", mé ichro ch'an. ²⁹ Kjánchó kjuátéhe ch'in Abraham ntáchro ch'an kixin: "Ó chóna sín tí nkehe tsikjin ch'in Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a", ichro ch'an. ³⁰ Ntá ntáchro tí ch'in a inaá kixin: "Náhi, It'éni Abraham. Chrókójina sáchrókjuitsjehe ijnko chojni tsik'en ntá chrókuitekaon sín chrókútohe sín ijje sín", ichro ch'an. ³¹ Ntá ntáchro ch'in Abraham kixin: "Tí tsitekakonhya sín tí nkehe tsintáchro ch'in Moisés la ko tí nkehe tsintáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijnko chojni tsik'en chrókjuichronka inaá", ichro ch'an.

17

Tí kjuaxikaon naxa tjasin chojni jie (Mt. 18.6-7, 21-22; Mr. 9.42)

¹ Ch'in Jesús ntáche ch'an tí sín k'uájiko ch'an kixin:

—Xrácín siín nkehe tsjasixín chojni jie. Kjánchó nòa tí nkexro tjasin tí nkehe tsjasixín chojni jie. ² Íchá jina chrókjuincheteyá sín ch'an ijnko xro tsik'óna xroché chrókjuikákánki sín ntayaon kixin tjasin ch'an tí nkehe tsjasixín jie ijnko chánjan naxa noehya. ³ Tóxakonhanrá kixin xikahya chrókjuásinrá nkehe.

'A ntá tí kichuárá chrókjuasinhanrá ch'an ichrén jie chrónixjehérá ch'an chróchenkará ch'an kixin jehya jina tí xikaha kjuít'ahará ch'an. A ntá tí chrókuitekaon ch'an chrókjuitoxinhin ch'an tí tjenkayáxin ch'an, ntá chrók'uitjáyánhanrá tí nkehe kjuít'ahará ch'an. ⁴ Kjónté chrókjuasinhanrá ch'an jie yato veces jnkokoá yaon la ko yato veces chróntáchro ch'an kixin í xikahya tsjasin ch'an jie inaá, la t'ichjánxin ts'itjáyánhanrá tí nkehe kjuít'ahará ch'an tí xikaha ntáchro ch'an.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'an kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáchro ch'an kixin:

—Kjónté intsí chrókuinkáchónkirá tí janhan éxi jiéxin ijnko tje ntsí kuènte nta mostaza la jina chrókuétuénhénrá tí nta sicómoro kixin chrók'uaxrjenkixin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexrí chrókjuinchexiteyá tí nkexro ch'e xra

⁷ Jnkójín tí jahará tí chróchontará ijnko nkexro t'ahará xra, a ntá tí chrókjanxin ch'an nòntaará kjuínchenta ch'an nche o k'uàyakonhen ch'an tí ko kuèntará, zá chróntácherá ch'an kixin senó chrókjuak'e ch'an chrókjóné ch'an?

⁸ Kjá náhi. Kjá chrókuétuénhénrá ch'an kixin senó chrókjuinchexján ch'an tí nkehe sinte la ko chrókóyaxínhin ch'an kixin tsjanjon ch'an nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'an sine ch'an la ko its'i ch'an. ⁹ Já chrókjuanchehérá ch'an kjuasáya kixin kjuínchexiteyá ch'an tí nkehe kuétuénhénrá ch'an? Kjá náhi. ¹⁰ Mé kjaxin xikaha tí jahará

tió chrókjuxin kaín tí xṛá k'uətuəñhanrá Dios chróntáchróhyará kíxin jína kjuich'erá xṛá kíxin ó jehó tí nkehe k'uítuanhanrá kjuinchexiteyará, tsixrorá.

Ch'ín Jesús kjuínchekitohe ch'án jína ite chojni chóna chinlepra

¹¹ Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. ¹² Ntá kjuíji ch'án ijnko chjasin ntsí ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín ¹³ ntá itsen k'uúyehé sín ch'án ntáchro sín kíxin:

—Jesús, Maestro, tikonóhéni kaín ni —ichro sín.

¹⁴ Ntá k'uikon ch'ín Jesús tí jehe sín ikjín tjejó sín ntáche ch'án sín kíxin:

—Sátsjirá tjakohérá tí sín nchát'á kíxin ó kuitóhará jína, ichrorá.

Nachrohe sákjuí sín tinkákitohe sín jína. ¹⁵ Ntá ijnko tí jehe sín tió kónohe ch'án kíxin kuitóhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶ Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kíxin kjuanchia ch'án kjuasáya. A ntá tí ch'ín a mé tsíkji xín ch'án estado Samaria. ¹⁷ A ntá ch'ín Jesús ntáchro ch'án kíxin:

—¿Xá jehya ite chojni kuitóhe jína? ¿Xá kjá tí sín ina? ¹⁸ ¿Á jehó tí ch'ín i kjónté ikjín tsíkji xín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹ A ntá ntáche ch'án tí ch'ín a kíxin:

—T'ínkatjen sátsja. Kíxin tí kuitékávan Dios la kuitóha jína —ichro ch'án.

Itsi tí kjuachaxién Dios

(Mt. 24.23-28, 36-41)

²⁰ A ntá tí sín fariseo kjuanchankíhi sín tí ch'ín Jesús kíxin nkesá tsi tí kjuachaxin kuénte Dios. A ntá jehe ch'án kjuátéhe ch'án ntáchro ch'án kíxin:

—A ntá tí tsi kjuachaxin kuénte Dios la me tíha ijnko nkehe xitjahya ts'ikon chojni. ²¹ Xitjahya tsontáchrórá kíxin: “Ntíhi tjen,” o “Ntíha tjen”; kíxin tí kjuachaxin kuénte Dios itjen jnkosiné tí tjejorá —ichro ch'án.

²² Ntá ntáche ch'án tí sín k'uájiko ch'án kíxin:

—A ntá itsi tí yaon tsotjínkáonrá jnkójin yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³ Tsontáchro sín kíxin ntíhi tjen ch'án, o ntíha tjen ch'án. Kjánchó sáchrókjuihyará la ko chróchréhyará sín. ²⁴ Kíxin éxi ts'ikonrá tsjonkíxín ts'inkaséyanxín kuénté nkajní mé xíkaha tsonhen tió itsi tí Xjeen Dios K'óna Chojni. ²⁵ T'ichjánxín senó tsjasóte ch'án nchónhya la ko tí sín siín jie tsitekakuenhya sín ch'án. ²⁶ Éxi kónhen tí yaon kjuák'e ch'ín Noé mé xíkaha tsonhen tió tsokjan tí Xjeen Dios K'óna Chojni. ²⁷ K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uíxenhén ch'ín Noé tí ntabárcó ntá k'uániá chrin, a ntá tí sín kuitóhe ntója la kaín sín k'uitjáyan sín. ²⁸ Mé kjaxin xíkaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchejji sín nkehe la ko k'uék'enka sín nontje sín la ko k'uékjich'ena sín nchia. ²⁹ A ntá tí yaon k'uaxrjéxín ch'ín Lot tí chjasin Sodoma, na mé nkajní kuixín xrohi la ko azufre, na mé tíha k'uénxín kaín xín tí sín ntíha.† ³⁰ Mé xíkaha tsonhen tí yaon itsi tí Xjeen Dios K'óna Chojni.

³¹ A ntá tí yaon i tí tjejó jnkójin nkexro chrítaón nchia tjejót'ok'éhe sín, a ntá ichrén nkehe chóna sín kuitóhe sín nkaxenhén nchia la í chrók'uinkajinhya sín chrókuaksje sín tí nkehe chóna sín, tjoka sáchrókjui sín ókjé. Kjaxin xíkaha

* 17:27 17.26-27 Génesis 6.5-7.24 † 17:29 17.28-29 Génesis 18.20-19.25

jnkojin chojni tjejó sín nontee sín la í chrókjanhya sín ntqe sín. ³² Xráxinkáonrá nkehe kónhen ichjién ch'ín Lot.† ³³ Tí nkexro tjinkaon kixin kohya nkehe chrókónhen na mé ts'itjáyan. A ntá tí nkexro chrókjuinçek'itjáyanxín asén kixin chróchronka itén Dios la mé tsaá. ³⁴ A ntá tsontáxrjan kixin tí tie a jnkokoá ts'ejójuá yaá chojni la ijnko la sátsji la ko tí í jnko la tsitohe. ³⁵ Yaá chojni chjin its'o sín jnkokoá, la ijnko la sátsji la ko ijnko la tsitohe. ³⁶ Yaá chojni ts'ejóche sín xrá nonte, la ijnko la sátsji a ntá ijnko la tsitohe —ichro ch'án.

³⁷ Ntá kuínhin sín tíha ntá kjuanchankíhi sín ch'án kixin:

—¿Xá nketí tsonhen tíha, Ìnchéni? —ichro sín.

A ntá jehe ch'án kjuátehe ch'án ntáchro ch'án kixin:

—Tí tjen tí cuerpo kuénte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxi ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakoxin ch'án kixin jnkochrínin chrónixjehe chojni Dios la ko chrókóxrjéhya sín. ² Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. ³ Kjaxin chjasin ntiha kjuák'e ijnko tjan k'án, jnkoyaxón sákjuitsjehe tjan tí ch'ín juez kjuanchia tjan jie ntáchro tjan kixin chrókuitqexín kixin ijnko chojni nínkakonhen tjan ntiha. ⁴ Nchónhya veces tjitsjehe tjan tí ch'ín juez la chrohya ch'án chrókjuinçekitqexín ch'án. Ntá chr'éxin kjuenkayáxin ch'án ntáchro ch'án kixin: “Kjonté í tsjikosáyàhya Dios la ko ninkexró tsjikosáyàhya ⁵ a ntá tí tjan k'án jnkoyaxón tjanchia tjan jie, la tsjikítsa tjan tsitoexín tí jie tjanchia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

⁶ Ntá ntáchro Ìnchéni kixin:

—Mé xíkaha ichro tí ch'ín juez jínahya. ⁷ ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? ⁸ Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxa chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxi ijnko ch'ín fariseo la ko ijnko ch'ín nchekjènkj

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhi, ichro sín. Ntá ntáchro ch'án kixin:

¹⁰ —Iyó sín ntoa sákjuj nkaxenhen njnko kixin tsonixjehe sín Dios. Ijnko la fariseo la ko ijnko la ch'ín nchekjènkj. ¹¹ A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'eni Dios, kjuasáya tjàhá kixin jeheni la chóntahyani jie éxi tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxi tí ch'ín nchekjènkj tjinhin. ¹² Jeheni la nehyani iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án. ¹³ A ntá tí ch'ín nchekjènkj la imá kjín kuitqhe ch'án kóxakonhen ch'án chrókonta ch'án nkajni la mé chjéhe ch'án ntakuin ch'án ntáchro ch'án kixin: “It'eni Dios tikonóehéni tí jeheni kixin nchónhya jie chóntani”, ichro ch'án. ¹⁴ Tjonkará kixin tí ch'ín nchekjènkj tió kjan ch'án ntqé ch'án la Dios kuíkonóehé tí jehe ch'án la kjuínhin ch'án tí jie

chónṭa ch'án, a ntá tí ch'ín fariseo la náhí. Kíxín kaín chojni nchehnkehe asén kíxín imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaon ch'án chánjan

(Mt. 19.13-15; Mr. 10.13-16)

¹⁵ Kjaxín kjuíkəo sín chánjan ntsíntsí tí tjen ch'ín Jesús kíxín chrókjuíncheyaon ch'án xjan. Kjánchó tió k'uíkəon tí sín k'uájiko ch'án la í kjuanjəonhya sín kjuachaxín kíxín tsochjinako sín xjan. ¹⁶ A ntá ch'ín Jesús k'uíyehə ch'án sín ntáchro ch'án kíxín:

—Títóhéréá chánjan méhə xrakoa tí tjen janhan la t'ínkakuènhyará xjan kíxín tí sín kuènte kjuachaxín kuènte Dios la mé tóyohə tí jehe xjan. ¹⁷ Ntá chaxín ntáxrjan kíxín tí nkexro ts'ónahya éxí ijnko chánjan xitjahya ts'ejó sín tí ts'ətoan Dios tí kjuachaxín kuènte ch'án.

Ijnko ch'ín ntasoá ríco kjuínixjehə ch'án tí ch'ín Jesús

(Mt. 19.16-30; Mr. 10.17-31)

¹⁸ Ijnko ch'ín t'ətoan kuènte njnko kjuanchankíhi ch'án tí ch'ín Jesús kíxín: —Jaha la ijnko maestro jína la, ¿nkehe naxə t'itjáyən chrókjuich'eni kíxín chróchóntani kjuachón jnkochríchín? —ichro ch'án.

¹⁹ Ntá kjuátehe ch'ín Jesús ntáchro ch'án kíxín:

—¿Nkekuènte ntáchrúa kíxín jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'ueətoan Dios kíxín chrókjuacheéhya kíchuará, la ko chrók'oyánhya chojni, la ko chrókueəhya, la ko chróntáchrohya nínehó nkehe chaxínhya kuènte ókjé chojni, la ko chrókjuikosáyehé it'á la ko iná —ichro ch'án.

²¹ A ntá jehe ch'án kjuátehe ch'án ntáchro ch'án kíxín:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kíxín:

—A ntá jnkokoá nkehe naxə t'itjáyən chrókjuich'e, chrókjuínchekjia kaín nkehe chonta la chróchjehé tí chichaon tí sín nòə. A ntá tí nkehe tjeṭe la tsochonta nkaya nkajní. A ntá tió tsjixín sinchekjətonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kíxín imá itsjé nkehe chónṭa ch'án. ²⁴ Tió k'uíkəon ch'ín Jesús kíxín kóxakonhen tí ch'ín a la ntá ntáchro ch'án kíxín:

—Imá xra kíxín tí chojni chónṭa itsjé nkehe chrók'uixenhen sín tí tjen Dios t'ətoan. ²⁵ Antsí xrahya chrók'uatśinka ijnko kocamello ijnko tjar'i ntachica tjejrja, a ntá antsí má xra kíxín ijnko chojni chónṭa itsjé nkehe chrókjuak'e tí t'ətoan Dios —ichro ch'án.

²⁶ A ntá kuínhin sín kíxín xíkaha ntáchro ch'án ntá ntáchro sín kíxín:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kíxín:

—Tí nkehe tsjachahya chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kíxín:

—Ínchéni, jeheni la ó kuítóhəni kaín nkehe chónṭani kíxín tsochréhəni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kíxín:

—Ntá chaxín tsotjonkará kíxín jnkójínrá chrókjuítóhéréá ntəə, la o chrókjuítóhéréá it'á la ko iná, la o chrókjuítóhéréá kíchuará, la o chrókjuítóhéréá

ichjiánrá, la o chrókui^ohé^érá xjaanrá kixin chrókjuich'erá xra kuènte Dios
 30 la antsí nkehe ts'ayéhé^érá ntihi chjasintajni la ko tí chr'éxⁱn la ts'ayéhé^érá
 kjuachón jnkochrín —ichro ch'án.

Ch'in Jesús chrónka ch'án inaá kixin its'en ch'án
 (Mt. 20.17-19; Mr. 10.32-34)

31 Ntá ch'in Jesús k'uiyeh^e ch'án jehó tí teyo sín k'uájiko ch'án ntá chrónka
 ch'án kixin:

—Ijie sátsjini Jerusalén. A ntá ntaha tsoxiteyá kaín tí nkehe tsíkjin tí sín
 tsíchronka itén Dios ósé nkexrí tsonhen tí Xjeen Dios K'óna Chojni. 32 Tsjikaán
 sín ch'án tí tjejó tí sín jehya judío la ko tsjanoá sín ch'án la ko ts'ántaxínhⁱn
 sín ch'án la ko ntáte sín tsíkíte sín ch'án. 33 Tsjate sín ch'án, a ntá chr'éxⁱn la
 ts'óyán sín ch'án. A ntá nixin yaon tsoxechón ch'án —ichro ch'án.

34 A ntá jehé sín la ninkehó kienxínhya sín tí nkehe nixja ch'án kixin tíha
 ijnko nkehe naxa tsjachahya sín chrókiénxín sín.

Ch'in Jesús kjuínchekitohe ch'án jina ijnko chojni t'ikonhya chjasin Jericó
 (Mt. 20.29-34; Mr. 10.46-52)

35 A ntá ch'in Jesús tió chjina chrók'uixenhen ch'án chjasin Jericó ntá ntiha
 chrínta ntja tjetjaxín ijnko ch'in t'ikonhya tjanchak'á ch'án. 36 Ntá xrínahya
 kuínhin tí ch'in t'ikonhya kixin sít'atsínka nchónhya chojni, ntá kjuanchankí
 ch'án kixin:

—¿Xa nkerí sítónhen? —ichro ch'án.

37 Ntá chénka sín ch'án kixin ch'in Jesús tsíkjin chjasin Nazaret ts'atsínka
 ch'án ntiha.

38 Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'in David, tikonóehéni —ichro ch'án.

39 A ntá tí sín tsítaón ntja la k'uetuénhen sín ch'án kixin tsotáni ch'án.
 Kjánchó jehé ch'án antsí tsen k'uèya ch'án ntáchro ch'án kixin:

—Jaha tsík'axrjeníxian ch'in David, tikonóehéni —ichro ch'án.

40 A ntá ch'in Jesús ntá ntahó kjuák'echónhen ch'án ntá k'uetqan ch'án kixin
 tsjikakjín sín tí ch'in a. Ntá tió kuikao sín ch'án tí chjinaxón tjen ch'in Jesús
 ntá kjuanchankí ch'in Jesús kixin:

41 —¿Nkehe tjinkávan sít'aha? —ichro ch'án.

Ntá kjuátehe tí ch'in t'ikonhya ntáchro ch'án kixin:

—Jaha Ínchéni, tjinkaonni chrókjuínchek'ikuanni —ichro ch'án.

42 Ntá ntáchro ch'in Jesús kixin:

—Ó ts'ikuan. Ó kuítqha jina kixin kuítekávan tí janhan —ichro ch'án.

43 Ntá tuénxín k'uúkon tí ch'in k'uék'ikonhya, a ntá jehé ch'án chréhe ch'án
 tí ch'in Jesús la ko kjuanchehe ch'án kjuasáyé Dios. La ko kaín tí sín k'uúkon
 kixin xikaha kónhen kjuanchehe sín kjuasáyé Dios.

19

Ch'in Jesús la ko ch'in Zaqueo

1 A ntá ch'in Jesús k'uixenhen ch'án chjasin Jericó la ntá k'uátsínka ch'án tí
 chjasin a. 2 A ntá ntiha tjen ijnko chojni ríco it'in ch'án Zaqueo, t'etuénhen
 ch'án tí sín nchekjènki. 3 Tjinkaon ch'án chrókjuatsqan ch'án nkexro tí ch'in
 Jesús, kjánchó nchónhya chojni siín la xitjahya t'ikon ch'án kixin intsí ch'án.

4 Ntá kuinká ch'án kuítaón ch'án ntja kixin tjinkaon ch'án chrók'uikon ch'án.

Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uatsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajían kixin ntõa ntaó tsitõna jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kain sín k'uikon sín xíkaha ntá kjuankixin sín tjonta sín tí ch'ín Jesús, ntáchro sín kixin ntõe ijnko chojni chõnta nchónhya jie tsitõhe ch'án. ⁸ Ntá ch'ín Zaqueo kjuák'exín toté ch'án ntáche ch'án Inchéni kixin:

—Jaha Inchéni, chrókónoha kixin tsjánjuan jnkõsiné tí nkehe chonta sintakõtõnhan tí sín nõa. A ntá tí jnkõjin nkexro kjuít'áyahá kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjenixin ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chõnta jie.

Ch'ín Jesús kjuíncheyóexin ch'án éxí ite chichaon imá tjete sinki

¹¹ A ntá tí chojni siín ntiha nachrohe tjejótinhin sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuente Dios la ách'e ó tuénxín tsi, ichro sín. ¹² A ntá ntáchro ch'án kixin:

—Itjen ijnko nkexro tsík'axrjenixin ijnko nkexro imá k'uék'etõan. Ntá sákjuí ch'án ókjé naciõn kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tió chjina sátsji ch'án ntá k'uíyehé ch'án ite tí sín ch'ehe ch'án xrá ntá chjéhe ch'án jnkõjno kí jehe sín jnkõjno chichaon imá tjete sinki. Ntá k'uétõan ch'án kixin: “Tsjanxínrá ch'ekoará xrá tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakõnhen sín ch'án, ntá ichr'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuenhen sín. ¹⁵ Kjónté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uétõan ch'án xrakoa tí sín ch'ehe ch'án xrá, na mé tí sín tsík'áyéhe tí chichaon, kixin tsonõhe ch'án nkehe tí xrá kjuích'eko sín tí chichaon k'uáyéhe sín. ¹⁶ A ntá tí ch'ín xrankixín kóchjina la ntáchro ch'án kixin: “Tí chichakõan la kjuachani ite chichaon inaá”, ichro ch'án. ¹⁷ A ntá kjuátehe tí ch'ín rey kixin: “Ó nchõxon tí xíkaha jaha la ijnko chojni jina ch'e xrá. Jina kjuích'e xrá kjónté jehya xrá jie ntá tsjánjuan kjuachaxin tsétõan ite chjasin”, ichro ch'án. ¹⁸ A ntá kóchjina tí ch'ín í jnko a inaá ntáchro ch'án kixin: “Tí chichakõan la kjuachani in'ó chichaon inaá”, ichro ch'án. ¹⁹ A ntá xíkaha inaá kjuátehe tí ch'ín rey kixin: “Tsjánjuan kjuachaxin tsétõan in'ó chjasin”, ichro ch'án. ²⁰ A ntá kóchjina tí ch'ín níxin ntáchro ch'án kixin: “Tí chichakõan la tjinhin. K'uánkintani panítóeni ²¹ kixin chrakonhanni kixin jaha la jiaha la tjinkávan tsákjá tí nkehe jehya jaha kjuaké la ko tsõtja tí nkehe jehya jaha kuénkaxian”, ichro ch'án. ²² A ntá tí rey ntáchro ch'án kixin: “Jehya chojni jina ch'e xrá jaha. Tí nkehe ntáchrua tsjáncháxian jie. Jaha la ó noha kixin jiëna janhan tsákjaá tí nkehe kjuakéhya, ichrua, la ko tsõtja tí nkehe kuénkayha. ²³ Ntá nkeuente kixin chr'anhya tí chichaon ijnko banco chrókjuich'exin xrá? A ntá tió kjan ntõna la antsí tsjé chichaon chrók'uayáha tí chrókjuacha kichó chica”, ichro ch'án. ²⁴ A ntá ntáche ch'án tí sín siín ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'ín chõnta ite chichaon”, ichro ch'án.

25 **A** ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín. 26 **A** ntá tí ch'ín rey kjuátehe ch'án ntáchro ch'án kixin: “Kjonté jnkojín nkexro itsjé chóna la ts'áyéhe má. **A** ntá tí nkexro chónahya la kjonté tí ntsi chóna ch'án la ts'axrjehe ch'án. 27 **A** ntá tí sín nínkakonna sín tjinkakonhya sín kixin ts'ónana rey la xrákoar sín ntihi ts'íkoxín kuān ts'ochrínjinrá kja sín.”

Ch'ín Jesús k'uixenhen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

28 Tió kjuixin ntáchro ch'ín Jesús tíhi ntá chrìn ch'án sátsji ch'án chjasin Jerusalén. 29 **A** ntá ó kjuíji chjinaxón tí chjasin Betfagé la ko chjasin Betania chjinaxón tí jnā nchek'in sín Olivo, ntá k'uetuēnhen ch'án iyó tí sín k'uájiko ch'án 30 ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxā ninkexró tjták'áhya va. Tjasintānkehérá va la tsjikuanará va ntihi. 31 **A** ntá tí jnkojín nkexro tsjančankíhará nkekuènte tjasintānkehérá va la ntácherá sín kixin: “Inchéni ts'ichjánxinhin va”, tsixrorá.

32 **A** ntá tí sín k'uítuēnhen sákjuí sín k'uitja sín éxi ntáchro ch'án. 33 **A** ntá tió tjejójtjasintānkehe sín va la ntá tí sín inché va kjuanchankíhi sín kixin:

—¿Nkekuènte tjasintānkehérá tí kolócho? —ichro sín.

34 **A** ntá jehe sín kjuátehe sín kixin:

—Inchéni ts'ichjánxinhin va —ichro sín.

35 Ntá sákjuikohe sín va tí ch'ín Jesús, la ntá tí iké sín kjuinčekamá sín va, ntá kjuíták'á ch'ín Jesús tí kolócho a. 36 **A** ntá tinkákji tí kolócho tjejkjen ch'án la tinkák'ikjínxin sín tí iké sín ntja kixin nátaón tí ka ts'atsínka tí kolocho tjejkjen ch'án. 37 Ntá tió kjuíjichjina sín tí chjinaxón tí t'inkajínxin chojni tí jnā Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uikónxin kon sín. 38 Ntá ntáchro sín kixin:

—Jína tí nkexro Rey kjuixín kjuachaxin ihnjé Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

39 **A** ntá iso tí sín fariseo tjejóyákjan sín í so chojni tjejónehexroan sín ntiha ntáchro sín kixin:

—Maestro, tétuēnhén tí sín chréhe tí jaha kixin tsotáni sín —ichro sín.

40 **A** ntá ch'ín Jesús kjuátehe ch'án ntáche ch'án sín kixin:

—**A** ntá tí sín i tsotáni sín la ixrō tsotsje —ichro ch'án.

41 **A** ntá tió kjuíjichjina ch'án chjasin Jerusalén ntá k'uikon ch'án tí chjasin la ntá tsjánka ch'án kixin kuítekakonhya sín 42 ntáchro ch'án kixin:

—Chrókuiéxinrá la ko chrókónohará nkexrí chrók'uayèxinrá tí kjuaxróxin, kjánchó jahará kuítekakonhyará. **A** ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie. 43 **A** ntá tsi iso yaon jínahya itsi tí sín nínkakonhanrá la sich'éna sín ijnko tjt'ō ts'ántatjen tí chjasin tjejórá ntihi ts'inkákonhen kixin xitjahya ts'axrjéxinrá chjasin ntihi kixin nkuíxín ts'ejó sín ts'inkákonhanrá sín 44 ntá ts'óxíka sín kaín tí tjt'ō síin ntihi la ko ts'óyán sín kaín tí chojni síin la ko tsítqehya sín kixin ninkehó xrō naxā ts'ejójkjen kichó, kixin jahará kjuátsqanhyará kixin kuitsjehe Dios tí chjasin tjejórá ntihi.

Ch'ín Jesús kjuinčetjóá ch'án nkaxenhen nínko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uixenhen ch'án tí n̄nko jié, a ntá kjuankíxin ch'án kuakítsje ch'án tí sín nchekji nkehe la ko tí sín t'ena nkehe ntiha. ⁴⁶ Ntá ntáchro ch'án ḱixin:

—A ntá ntáchro xroon itén Dios chrónka ḱixin: “Tí ntóna i mé it'in nchia tsonixjanaxián chojni”,* ichro. A ntá jahará tí nchia i tsíkjich'énará itjuéé xíchee —ichro ch'án.

⁴⁷ A ntá tí n̄nko ntiha kjuák'e ch'ín Jesús kjuako ch'án kaín yaon. A ntá tí sín nchat'á t'etōan la ko tí maestro tjako tí ley la ko kjaxin tí sín t'etōan tí chjasin ntiha kjueyá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án ḱixin kaín chojni tjejótinhin tí nkehe tjechronka ch'án.

20

Tí kjuachaxin chóna ch'ín Jesús
(Mt. 21.23-27; Mr. 11.27-33)

¹ A ntá ijnko yaon kjuák'e ch'ín Jesús tí n̄nko ntiha kjuakohe ch'án chojni tí tan jína tsaáxin sín. A ntá kjui tí sín nchat'á t'etōan la ko tí sín maestro tjako tí ley la ko kjaxin tí sín t'etōan kuénte n̄nko. ² Ntá kjuanchankíhi sín ch'án ḱixin:

—Chronka nkehe tí kjuachaxin chonta ḱixin xíkaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án ḱixin:

—Kjaxin janhan tsjáanchánkíhará ijnko nkehe siná nkexrí tsjatēherá. ⁴ ¿A ntá nkexro k'uetuēnhen tí ch'ín Juan ḱixin tsíkíte ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kíchó sín ntáchro sín ḱixin:

—¿Nkehe chrókjuáteheni? A ntá tí tsontáchroni ḱixin Dios tsíchr'án tí ch'ín Juan la ntá tsjancká ch'án ḱixin nkekuénte kuítékakuenhyani ch'án. ⁶ A ntá tí tsontáchroni ḱixin chojni ó k'uetuēnhen sín ch'án la ntá kaín chojni tsonínkaon sín la ixrō ts'óyánxinni sín ḱixin tjenkayáxin sín ḱixin ch'ín Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín ḱixin noehya sín nkexro tsíchr'án tí ch'ín Juan. ⁸ Ntá ntáchro ch'ín Jesús ḱixin:

—Kjaxin janhan tsōxrjankahya nkexro kjuanjon kjuachaxin jtét'a tíhi —ichro ch'án.

Ch'ín Jesús kjuíncheyóexin ch'án éxi tí sín ch'e'hya xrā jína
(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehē ch'án chojni kjuíncheyóexin ch'án ntáchro ch'án ḱixin:

—Kjuák'e ijnko chojni k'uēnkaxin ch'án nta to uva tí n̄ntēē ch'án, a ntá chr'éxin kjuínchekjen ch'án tí iso tí sín ch'e xrā. A ntá kjuixin ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetuēnhen ch'án ijnko nkexro ch'ehe ch'án xrā ḱixin tsjikjanchehe ch'án tí sín ch'e xrā n̄ntēē ch'án ḱixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. ¹¹ A ntá tí ch'ín n̄ntēē ichr'án ch'án í jnko nkexro ch'ehe ch'án xrā. A ntá kjaxin k'uántaxínhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá. ¹² A ntá tí ch'ín n̄ntēē ichr'án ch'án í jnko nkexro. A ntá tí sín ch'e xrā kjaxin xíkahó tsíkjich'ehe sín inaá, tsík'inkité sín ch'án.

* 19:46 Isaías 56.7

13 Ntá tí ch'ín nontee ntáchro ch'án kixin: “¿Nkexrí chrókjuít'a jie? Tsochr'an tí xjanna imá tjuahá. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. 14 A ntá kjónté kui ch'án la k'uúikon tí sín ch'e xra ntá chénka sín kichó sín kixin: “Tí ch'ín i mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitöekoni kaín tí nkehe a,” ichro sín. 15 A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xikaha kónhen tí xjeen ch'án? 16 Chrókui ch'án chrókjuinçek'itjáyan ch'án tí sín ch'e xra kixin xikaha kjuích'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

17 A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrxjén tí nkehe ntáchro xroon itén Dios ntáchro xikihi?:

Tí xro nárxjónhya kuitöenta tí sín ch'éna tjat'o, a ntá mé jie k'óna tí xro tjetoo.*

18 A ntá jnkójn chojni tsjitsínka chrítaón tí xro i tsökuen ch'án. A ntá ts'ánótjen tí xro i tsoxratja ijnko chojni la tsökuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

19 A ntá tí nchat'á t'etoan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni síin. 20 Ntá k'uuetuenhen sín chojni tsotsáyehe sín ch'án, éxi chojni chóna kjuasáyé ch'án chrókjo sín ch'án jnkójna kixin ách'e ihrén nkehe ntoáhya tsonixja ch'án. A ntá jína tsjanxaxín sín jie tsjikaán sín ch'án tí tjen tí ch'ín gobernador. 21 Mé xikaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrua la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. 22 A ntá jie la chronka, ¿á jína chrókjuenkeheni tí gobierno romano o náhi? —ichro sín.

23 A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkeuènte chrokjuachaxínráni? 24 Tjákonará ijnko tí chichaon méhe. ¿Nkexro tí tsík'axrxjén tjenkání tí chichaon i la ko nkexro ihnjé chóna méhe? —ichro ch'án.

Ntá kjuátehe sín kixin:

—Tí ch'ín t'etoan mé tjenkání ch'án —ichro sín.

25 Ntá ntáchro ch'án kixin:

—Chróchjehérá tí ch'ín gobierno t'etoan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

26 A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

* 20:17 Salmo 118.22

²⁷ A ntá chr'èxin iso tí sín saduceo sákjuítsejehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsotohe ichjién, tí chóntahya sín xjeen, la t'ichjánxin kixin kichó tí ch'ín tsík'en tsótehe tí tjan k'án kixin tsochóna sín xjeen sín éxi xjeen tí ch'ín sao tsík'en ts'ikon sín.† ²⁹ A ntá k'uejó sín yato sín jnkokoá kichó sín. A ntá tí ch'ín sao la kótehe ch'án. Ntá k'uén ch'án la chóntahya ch'án ninkehó xjeen ch'án. ³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chóntahya sín xjeen sín. ³¹ A ntá tí ch'ín nixin xikótehe jehe tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chóntahya sín. ³² A ntá kjuixixín kjaxin jehe tjan ik'uén tjan. ³³ A ntá tió tsoxechón chojni tsík'en, ¿ntá nkexro tí jehe sín ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuáttehe ch'án ntáchro ch'án kixin:

—Ntíhi chjasintajni tí chojni ntoa la ko ti chojni chjin tótehe sín takja kichó sín. ³⁵ A ntá tí sín kuitekaon sín tí janhan ntá tsjacha sín tsoxechón sín inaá la í tsoteehya sín la koí tsoteehya tí xjeen sín. ³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. ³⁷ Kjaxin ch'ín Moisés tió chrónka ch'án kuente tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.‡ ³⁸ Tí Dios í la jehya tinkáchónki tí sín tsík'en. Náhí. Tí Dios í la tinkáchónki tí sín tjejóchón, la Dios la t'íkon ch'án kixin kaín chojni la síchón —ichro ch'án.

³⁹ A ntá iso tí sín tjako tí ley la ntáchro sín kixin:

—Jína kjuákua la ko jína ntáchrúa, Maestro— ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrjenixin tí ch'ín David? ⁴² A ntá ch'ín David ikjin ch'án tí libro Salmos la ntáchro ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétoan

⁴³ tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétoan.”§

⁴⁴ ¿Xá nkexrí kixin Cristo chrók'óna it'é David, kixin jehe David kjuikítexín ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

⁴⁵ Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjinhin sín chrók'uínkáya sín ka kjínjin la ko tjínkaon sín kixin kaín chojni chrókjuikosáyehe sín tsoxeta sín ntsin la ko tjejá sín silla antsí náxrjón

chrók'uejóyá sín nkaxenhen n̄nko la ko tjejá sín ḱixin j́ina chrók'uejó sín tí sátsji sín kia, ⁴⁷ la ko kjaxin takitsjehe sín n̄toe tí chojni chjin k'án. A ntá kjuixin kjuich'iyehé sín chojni ntá náxrjón nixjehe sín Dios. A ntá jehe sín antsí má sinchekjasóte sín Dios ḱixin x̄ikaha kjuich'ia sín.

21

Tí chichaon kjuanjon ijnko tjan k'án nòà
(Mr. 12.41-44)

¹ A ntá tí nkaxenhen n̄nko ch'ín Jesús k'u'ikon ch'án ḱixin tí sín ricó kjuikao sín chichaon chr'áxenhen sín tí n̄taçajón tjetóxroyéya chichaon. ² A ntá kjaxin k'u'ikon ch'án ikjui ijnko tjan k'án nòà la ntá jehe tjan chr'áxenhen tjan yaá chichaon n̄tsíntí. ³ Ntá ntáçro ch'ín Jesús ḱixin:

—La chaxín ntáxrjan ḱixin tí tjan k'án i nòà tjan kjánchó antsí tjeje sínkí tí chichaon kjuanjon tjan ḱixin kaín asén tjan kjuanjon tjan, a ntá tí sín kjuanjon nchónhya la náhí. ⁴ Ḱixin kaín tí chichaon kjuanjon sín la chichaon síxéhe sín. A ntá jehe tjan kjónté nòà tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáçro ch'án ḱixin tí n̄nko ts'itj́ayan
(Mt. 24.1-2; Mr. 13.1-2)

⁵ Iso sín tjejóto sín ḱixin nkexrí tsjehe n̄nko tsík'óna x̄ro náxrjón la ko í so nkehe tsikjanjon chojni éxi ijnko nkehe chjéhe sín Dios. A ntá ch'ín Jesús ntáçro ch'án ḱixin:

⁶ —A ntá tsi ijnko yaon tí n̄nko tjejokomará n̄tíhi la tsoxíka. A ntá tsokehya ninkehó x̄ro ts'ejóksen kíchó inaá —ichro ch'án.

Tí nkehe tsonhen tí naxa ts'itj́anyha chjasintajni
(Mt. 24.3-28; Mr. 13.3-23)

⁷ Ntá kjuanchankíhi sín ch'án ḱixin:

—Maestro, ¿nkesá tsonhen tíha? ¿Nkexrí tsonhen tí tsonoexínni tí nkehe tsonhen? —ichro sín.

⁸ Ntá ntáçro ch'ín Jesús ḱixin:

—Chrókóxakonhanrá t̄t̄oéhyará sit'áyahará chojni. Nchónhya chojni tsi tsontáçro sín ḱixin jehe sín tí Cristo, tsixro sín, la ko tsontáçro sín ḱixin: “Ijie mé tsoxiteyá tsonhen.” Kjónté x̄ikaha tsontáçro sín la chrókuítekákuenhyará tí jehe sín. ⁹ A ntá tío tsinhínrá tsontáçro chojni ḱixin ó sínn kjuánkaon tjanjonko kíchó sín, kjónté x̄ikaha naxa chróçhrakonhyará ḱixin kaín tíha t'ichjánxin ts'atsínka senó tí naxa tsjixixínhya ts'itj́ayan chjasintajni —ichro ch'án.

¹⁰ Naxa tjeçhrónka ch'án ntáçro ch'án ḱixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin. ¹¹ Kjaxin imá tjan tsínki nonte la ko tsokjinta la ko tsoníhi chojni nchónhya chjasin, a ntá nkajní nchónhya kjuachrakon jie ts'ixin ts'ikon chojni.

¹² Naxa ts'atsínkahya tíha la tsonínkakonhanrá sín tsotsérá sín sátsjikoará sín tí n̄nko tsjanchia sín jie la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador ḱixin tinkachónkirá n̄ina. ¹³ A ntá tí yaon x̄ikaha tsonhen la ts'ixin kjuachaxin ḱixin tsoçhronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ ḱixin janhan la tsjánjuan kjuaxrexinkaon j́ina tsonixjará ḱixin nijnko tí sín nínkakonhanrá xitjahya tsontáçro sín ḱixin ntoáhya tí nkehe tsjateherá.

16 Kíxin kjónté it'ará la ko kichuára la ko tí sín kjéhyará la ko tí sín tjórá jina mé sintakjirá sín. Jehé sín ts'óyán sín jnkojínrá. 17 Kaín chojni chjasintajni tsoñínkakonhanrá sín kixin tinkachónkirá ñina. 18 Kjánchó xikaha la ñinjo kaxihí chóna kjará ts'itjáyanya. 19 Tí ts'itoéhyará tinkachónkirá tí janhan la tsochontará kjuachón jnkochrín.

20 A ntá tió ts'ikonrá kixin kuente chjasin Jerusalén tsík'ántatjen sín soldado ntá tsoñoaxínrá kixin í séhya ts'itjáyan tí chjasin a. 21 A ntá tí sín tjejó sín Judea la t'ichjánxín sátsjixín sín ntiha sátsji sín jna. A ntá tí sín siín chjasin Jerusalén kjaxin t'ichjánxín sátsjixín sín ntiha la ko tí sín tjejó sín ñontee sín la í xitjahya tsokjan sín chjasin. 22 Kíxin tí yaon ts'ixin tsjasóte chojni tsoxiteyá tsoñhen kaín nkehe ñixja xroon itén Dios. 23 Nòa tí chojni chjin tjejóyá tí yaon a la ko tí sín chóna xjanhnté ñaxá nchekakí sín. Kíxin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. 24 Jnkojínrá ts'énxínrá tí siín kjuanínkaon ntiha la ko jnkojínrá tsoťsérá sín sátsjikoará sín sinchekjasótiará kaín tí í so nacióñ. A ntá tí sín jehya judío tsjixín ókjé nacióñ tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsoñhen. A ntá chr'éxin tsoñtácho ch'án kixin: “La í kohya nkehe tsoñhen.”

A ntá tió itsi tí Xjeen Dios K'óna Chojni
(Mt. 24.29-35, 42-44; Mr. 13.24-37)

25 A ntá tsoñoaxínrá nkexrí tsoñhen tí yaon la ko nkexrí tsoñhen nitjó la ko nkexrí tsoñhen konotsé. A ntá chjasintajni tsokohya kjuaxróxin kaín nacióñ la ko tsochrakon chojni kixin imá tsojña ntayaoñ. 26 A ntá chojni la tsoñhín sín kixin tsochrakon sín tsjenkayáxin sín nkehe tsoñhen chjasintajni kixin kaín tí nkehe sínkáni nkajní la tsinkí. 27 Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuj tsíkao ch'án tí kjuachaxin jié kuente nkaya nkajní. 28 A ntá tió tsoxrankixin tsoñhen kaín tíha chrókóchahará chrókjuaya kjará ntá chróntáchorá kixin kijnhya tjen tí nkexro tsaáxinrá —ichro ch'án.

29 Kjaxin kjuíncheyóexin ch'án í jnko nkehe ntácho ch'án kixin:

—Tjenkayáxinrá nkexrí siín tí nta t'óna to higo la ko kaín tí í so nta.

30 Tió ts'ikonrá kixin tinkák'ayan kahnté tí nta, ntá tsoñoaxínrá kixin í séhya ts'ixenhen nchakuen chrin. 31 Mé kjaxin xikaha tió ts'ikonrá kixin kaín tí nkehe sitóñhen, ntá tsoñoaxínrá kixin tí kjuachaxin kuente Dios la ó chjino tjen.

32 Mé chaxín ntáxrjan kixin kaín tíhi tsoñhen senó ñaxá t'enhya chojni tjejó jie. 33 A ntá tí nkajní la ko tí chjasintajni mé ts'itjáyan. A ntá tí nkehe ntáxrjan la ts'itjáyanya, tsoxiteyá tíha.

34 'Chrókóxakonhanrá chrókuítóéhyará kixin chrókuichróderá kixin tí imá chrókjónterá la ko tí chrókókoanrá. Kíxin tí xikaha la ntá titáya tsi tí yaon la chrók'uejochoénhyará. 35 Na mé éxí ijnko trampa xriñaña ts'ikjehe mé xikaha itsi tí yaon a, la ko xikaha tsoñhen kaín chojni siín chjasintajni tí ts'ejóchoénhya sín. 36 Méxra listo chrók'uejorá la ko chrónixjehérá Dios kaín yaon chrónóehérá ch'án kixin tió tsi kaín tí kjuaxikaon xikaha la ntá tsjinkítsará ch'án tsaará kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

37 Ch'ín Jesús kjuák'ekjakoxxin ch'án tí ñinjo ntiha jnkojnko yaon, a ntá tie la sákjuí ch'án tí jña nchek'in sín Olivo, la ntaha kuitohe ch'án. 38 A ntá

kaín chojni kóchjina sín tí n̄nko jnkojnko nch̄tjen kíxin tsinhin sín tí nkehe tsochronka ch'án.

22

Imó kjuenkayáxin sín n̄kexrí tsotsé sín tí ch'ín Jesús
(Mt. 26.1-5,14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua. ² Ntá tí nchat'á t'etoan la ko tí sín maestro tjako tí ley kjuenkayáxin sín n̄kexrí chrók'óyán sín tí ch'ín Jesús kíxin chrakonhen sín tí chojni ch̄jasin ntiha.

³ A ntá ch'ín Tsochren k'uixenhen asén ch'ín Judas, mé k̄jixin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuitsjehe tí sín nchat'á t'etoan la ko tí sín t'etoan kuente n̄nko, ikjo kíchó sín kíxin n̄kexrí tsjikaán sín tí ch'ín Jesús. ⁵ Ntá jehe sín kóchéhe sín la ko ntáchro sín kíxin tsjenkehe sín tí ch'ín Judas. ⁶ Ntá kjuátehe ch'án sinchexiteyá ch'án ntá kjueyá ch'án n̄kexrí tsotsé sín tí ch'ín Jesús tí kohya chojni.

Kjuixín kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxin ts'óyán sín tí kolélo sine sín kuente tí kia pascua. ⁸ A ntá ch'ín Jesús k'uetuēnhen ch'án tí ch'ín Pedro la ko tí ch'ín Juan kíxin sátsji sín sincheyáxin sín tí nkehe sine sín kuente tí kia pascua. ⁹ Ntá jehe sín kjuanchankíhi sín ch'án kíxin:

—¿Nketí tjinkávan sincheyaxíxinni? —ichro sín.

¹⁰ Ntá kjuátehe ch'án kíxin:

—Tió ts'ixenhenrá ch̄jasin Jerusalén tsoxetará ijnko chojni ntoa yámá ijnko tóa tjá ntá. Chréhérá ch'án sátsjirá tí nchia ts'ixenhen ch'án. ¹¹ Tsontácherá tí ìnché tí nchia kíxin: “Ntáchro Maestro kíxin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?” tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxin, la taha sincheyaxíxinrá tí sineni tsonjín —ichro ch'án.

¹³ A ntá jehe sín sákjuí sín k'uitja sín kaín nkehe éxi tsíchronka ch'ín Jesús. Ntá ntiha kjuíncheyaxíxin sín sine sín kuente pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjaxín sín tí tjen tí mesa. ¹⁵ Ntá ntáchro ch'ín Jesús kíxin:

—Imá tjinkávan kíxin tsjasinni kia sinekianrá tí yaon pascua naxa ts'énhya janhan. ¹⁶ Ntáxrjan kíxin sinehya janhan xikaha ínaá tí naxa tsoxiteyáhya tíha tió tsi kjuachaxin kuente Dios —ichro ch'án.

¹⁷ Ntá kuákja ch'án tí nkehe tjá ínté to uva ntá chjéhe ch'án kjuasáya Dios ntá ntáchro ch'án kíxin:

—Tákjára tíhi la its'irá kaín rá ¹⁸ kíxin ntáxrjan kíxin xík'ikianhyará tí ínté to uva tí naxa tíhya tí kjuachaxin kuente Dios —ichro ch'án.

¹⁹ A ntá kjuixín ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ó ch'án chjéhe ch'án tí jehe sín ntáchro ch'án kíxin:

—Tíhi mé cuerpo kuènta kíxin ts'ényákonhanrá. Mé xikaha tsoxráxinkákonxínrá tí janhan —ichro ch'án.

²⁰ K̄jixin xikaha kjuanjon ch'án tí nkehe tjá ínté to uva tió kjuixín k̄jone sín la ntáchro ch'án kíxin:

—Tí nkehe tjiá tí vaso chronkaxín tí nkehe nixin tsonhen tsoxiteyá kixin tí jnina ts'itji tsotjuáxin tí ijiará.

²¹ Tí nkexro sinchekjina mé tjekian tí tjen mesa ntíhi. ²² Méxra tí Xjeen Dios K'óna Chojni its'en éxi k'uítuénhen; kjánchó nòà tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankíxin sín tjanckankíhi kichó sín:
—¿Xá nkexro sinchekji ch'án? —ichro sín.

Ikjo sín kixin nkexro tí imá ts'etoan

²⁴ A ntá jehe sín mé tjo sín kixin nkexro antsí ts'etoan. ²⁵ A ntá ntáchro ch'ín Jesús kixin:

—Tí sín reyes kuènte tí naciones imá t'etoan sín. A ntá tí chojni mé ntáchro sín kixin tí sín t'etoan la mé chojni ch'e xra jina. ²⁶ A ntá jahará xikahya chrókjuich'erá. Íchá jina tí nkexro imá t'etoan chrók'óna éxi tí nkexro antsí ntasoá chróchóxin chrók'uítuénhen, na mé tí nkexro t'etoan chrók'óna éxi ijnko nkexro ch'exón xra. ²⁷ ¿A ntá nkexro tí antsí t'etoan, á tí nkexro lámə tjetjaxín tí tjen mesa ntá sine ch'án, o á antsí t'etoan tí nkexro kujkəo tí nkehe sine ch'án? Náhí. Tí nkexro tjetjaxín tí tjen mesa mé antsí t'etoan ch'án. Mé xikaha janhan tjénkəkjánrá éxi ijnko nkexro ch'exón xra tí janhan.

²⁸ Jahará xráxin k'uejontaxínrá k'uíkonrá kain nkehe náxrjónhya kónna. ²⁹ Méxra janhan tsjánjuan kjuachaxin tsətoanrá éxi chjina T'aná tí tətoan janhan ³⁰ kixin sinterá la ko its'irá tí tsjak'e mesa kuéntəna tí tsətoan janhan nkaya nkajni la ko tsətoanrá sinchekitəoxínrá tí ijje kain tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigo. ³² Kjánchó janhan xrjanóhə T'aná kixin jaha chrókuiəéhya tí tinkachónkia tí janhan. A ntá jaha kjóntə tsjásian jje, a ntá tsokjan inaá ts'itjəyanhya tinkachónkia tí janhan ntá sinchehéhé kichuárá —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátəhe ch'ín Jesús ntáchro ch'án kixin:

—Pedro, ntáxrjan kixin ijje jaí naxə tsjehya kochíntəə sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuirá kjuikoahyará kabolsa la ko kjuikoahyará tí nkehe t'inka chichaon la ko kjuikoahyará tokəte na, ¿á naxə t'itjəyan ichrén nkehe ní? —ichro ch'án.

Ntá kjuátəhe tí jehe sín ntáchro sín kixin:

—Náhí. Ninkehó nkehe t'itjəyanhya —ichro sín.

³⁶ Ntá ntáchro ch'án kixin:

—A ntá jie tí nkexro chónka kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chónkəhya chica espada chrókjuinchekji ch'án

tí ka t'inkáya ch'án kixin chrók'uenaxín ch'án ijnko chica. ³⁷ Ntáxrjan kixin t'ichjánxin tsoxiteyá tsona éxi nixja xroon itén Dios ntáchro kixin: “Éxi yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

— Ìnchéni, ntihi tjejó yaá chica espada —ichro sín.

Ntá kjuátehe ch'án kixin:

— Kjónté ó táhó la ó nchoxon —ichro ch'án.

Ch'in Jesús nixjeexín ch'án Dios tí Huerto Getsemani

(Mt. 26.36-46; Mr. 14.32-42)

³⁹ Ntá ch'in Jesús sákjuixin ch'án chjasin Jerusalén sákjuí ch'án ijná Olivo kixin xikaha kuènnen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

— Nixjehérá Dios kixin tsjinkítsa ch'án tí jahará kixin tsjásinhyará jie —ichro ch'án.

⁴¹ Ntá ch'in Jesús k'uaxrjenta ch'án tí jehe sín sákjuí ch'án ijnko kjínxin éxi chrók'ue chojni xro. Ntá kjuák'exín toch'in ch'án kixin tsonixjehe ch'án Dios.

⁴² Ntá ntáchro ch'án kixin:

— It'éni, tí tjinkávan chrókjuínchekaáni kaín nkehe náxrjónhya chrók'uat sínkani. Kjánchó jehya éxi tjinkaonni jeheni chrókónhenni. Náhí. Éxi tjinkávan jaha —ichro ch'án.

⁴³ Ntá xrínghya k'uikon ch'án itjen ijnko ángel tsíkixín nkaya nkajní kixin tsjinkítsa ch'án. ⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uúxin ch'án ntachjin éxi yóhe jni xikaha k'uitji k'uánótjen nonte.

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. ⁴⁶ A ntá ntáchro ch'án kixin:

— ¿Nkekuènte tjeochrinrá? T'áyará. Nixjehérá Dios kixin tsjinkítsará ch'án kixin tsjachroehyará ch'in Tsochren —ichro ch'án.

Itsé sín tí ch'in Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'in Jesús naxa tjenixja ch'án ntá xrínghya kui nchónhya chojni yámá chica. Tí ch'in it'in Judas, ijnko tí teyo sín k'uájiko ch'in Jesús, kuítaón ch'án ntia, ntá kóchjinehe ch'án tí ch'in Jesús kixin sineko ch'án kochító. ⁴⁸ A ntá ntáchro ch'in Jesús kixin:

— Judas, ¿á ijnko kochító ó sìnchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'in Jesús tió k'uikon sín kixin xikaha kónhen ntá kjuanchankíhi sín ch'án kixin:

— Ìnchéni, ¿á chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'in ch'ehe xra nchat'á t'etōan, kóchrínjin ch'án ntatsjon ch'án chjina.

⁵¹ A ntá ntáchro ch'in Jesús kixin:

— Táhó, tjtōhé, ó tjen —ichro ch'án.

Ntá ch'in Jesús itsé ch'án tí ntatsjon tí ch'in ch'e xra a, ntá kjuínchekitōhe ch'án jíina. ⁵² Ntá tuénxín ch'in Jesús ntáche ch'án tí sín nchat'á t'etōan la ko tí

* 22:37 Isaías 53.12

sín t'etɔan kuènte n̄inko la ko tí sín táda t'etɔan mé tí sín tsíki sátsjiko sín ch'án ntáchro ch'án ḱixin:

—¿Nkekuènte k'uinkakoará chica espada la ko inta éxí chrótserá ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí n̄inko ntiha la ninkehó tsehyará tí janhan. A ntá jie mé tí hora kuéntará ntá kjuacha tí kjuachaxin kuènte sítié —ichro ch'án.

Ch'ín Pedro kjuínchemá ch'án ḱixin chónhya ch'án tí ch'ín Jesús
(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'ín Jesús kjuínchenteto sín ch'án sákjuiko sín ch'án ntɔe nchat'á t'etɔan. A ntá ch'ín Pedro ikjín tinkáchréhe ch'án. ⁵⁵ A ntá tí ntásin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha. ⁵⁶ A ntá ijnko tjachjin ch'e xra tió k'uikon tjan ḱixin koí ch'ín Pedro tjechjírrohe ch'án ntiha ntá komá tjan tí jehe ch'án ntá ntáchro tjan ḱixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án ḱixin:

—¿Nkekuènte xikaha ichrúa jaha? Ni chonhya tí nkexro a —ichro ch'án.

⁵⁸ A ntá antsíkoá chr'éxin ikui í jnko chojni k'uikon tí jehe ch'án ntá ntáchro ḱixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án ḱixin:

—Náhi, janhya —ichro ch'án.

⁵⁹ Ntá éxí ijnko hora chr'éxin ntá nixja í jnko ch'ín chénka tí í so sín ḱixin:

—Tí ch'ín i chaxin xriko tí ch'ín Jesús ḱixin kjaxin tsíkjin ch'án estado Galilea —ichro ch'án.

⁶⁰ Ntá ntáchro ch'ín Pedro ḱixin:

—Nonahya janhan nkehe tí ntáchrúa —ichro ch'án.

Ntá tuénxin naxá tjenixja ch'án ntá xrinahya ó tsje kochíntɔa. ⁶¹ Ntá Ìnchéni kuinátjía ch'án komá ch'án tí ch'ín Pedro. Ntá ch'ín Pedro xraxinkaon ch'án ḱixin xikaha tsíchronka Ìnchéni ḱixin: “Naxá tsotsjehya kochíntɔa sijnchemána iníya.”† ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús
(Mt. 26.67-68; Mr. 14.65)

⁶³ Tí sín sákjuiko ch'ín Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án ḱixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxinhin sín ch'án.

Ntá sákjuiko sín tí ch'ín Jesús nkayakon tí sín t'etɔan
(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchat'á t'etɔan, la ko tí sín maestro tjako tí ley la sákjuiko sín tí ch'ín Jesús nkayakon tí sín imá t'etɔan. Ntá ntiha kjuanchankíexín sín ch'án ḱixin:

⁶⁷ —Ijie la chronka, ¿á jaha tí Cristo? —ichro sín.

Ntá jehe ch'án kjuátehe ch'án ḱixin:

—Tí tsontáxrjan kixin chaxín janhan na tsitekákonhyará. ⁶⁸ A ntá tí chrókjuáanchánkíhará ichrén nkehe la chrókjuáteehyará la ko chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjaxín tí tja chjina kuénte Dios chóna kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáchro ch'án kixin:

—Chaxín janhan xikaha ntáchrora tí jahará —ichro ch'án.

⁷¹ Ntá kjo sín kíchó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

23

Sákuiko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjen sín ntá sákuiko sín tí ch'ín Jesús nkayakon tí ch'ín Pilato. ² A ntá ntiha kjuankixin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuénténi ntáchro ch'án kixin chrókjuenkeehyani tí gobierno romano, la ko kjaxín ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etuénhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

⁴ A ntá ch'ín Pilato ntáche ch'án tí sín nchat'á t'etqan la ko tí chojni tsikjao sín kixin:

—T'itjáhya nijnko jie chóna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákuiko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsikjixín ch'án. ⁷ A ntá kjuátehe sín kixin ntaha tsikjixín ch'án, ntá k'uetqan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxín ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsikinhin ch'án chrónka chojni nkexri tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoqxin ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxín ntiha k'uejé tí sín nchat'á t'etqan la ko tí sín maestro tjako tí ley la ntá nchónhya jie k'ueka sín ch'án kixin nínkakohen sín ch'án.

¹¹ A ntá ch'ín Herodes la ko tí sín soldado kuénte ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxi t'inkáya tí sín rey. A ntá tuénxín ch'ín Herodes k'uetqan ch'án kixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín

Herodes kjuankíxin sín tjuèhe kíchó sín kíxin tí senó la k'uénínkakohen kíchó sín.

*K'uetóan sín kíxin its'en ch'in Jesús
(Mt. 27.15-26; Mr. 15.6-15; Jn. 18.39—19.16)*

¹³ A ntá ch'in Pilato k'uíyehé ch'an tí nchat'á t'etóan la ko tí sín gobernador la ko kaín chojni chjasin ntiha kíxin tsojnkotsé sín ¹⁴ ntá ntáche ch'an sín kíxin: —Jahará kjuikuánará tí nkexro i ntáchorá kíxin ntoáhya tjakohé ch'an chojni kíxin chrókónínkakohen sín tí gobierno. Kjánchó janhan kjuánchánkíh ch'an itsjé nkehe kuínhínrá ntá k'uikonrá kíxin k'uitjahya ninkehó tí jié tékará ch'an. ¹⁵ La ko kjaxin ch'in Herodes k'uitjahya ch'an tí jié tékará tí ch'in Jesús ntá chr'an ch'an inaá ntihi. Ó k'uikonrá kíxin ninkehó jié chóntahya ch'an chrók'uenxín ch'an. ¹⁶ Sintakjasóte ch'an ntá chr'éxin tsjánjuan kjuachaxin sátsji ch'an —ichro ch'an.

¹⁷ A ntá tí yaon kia a la t'ichjánxin kíxin ch'in Pilato tsjanjon kjuachaxin sátsji ijnko chojni tjechjina kíxin xíkaha kuénhen sín ósé. ¹⁸ Ntá kaín sín kjuankíxin sín k'óyako sín ntáchro sín kíxin:

—¡Tí nkexro la náhí! ¡Ch'in Barrabás mé t'atjánta! —ichro sín.

¹⁹ A ntá ch'in Barrabás tsík'ík'jehé sín ch'an kíxin jehe ch'an la ko í so chojni kónínkakohen sín tí chjasin ntiha la ko tsík'óyán ch'an chojni. ²⁰ A ntá ch'in Pilato tjinkaon ch'an chrók'uanjon ch'an kjuachaxin sáchrók'jui ch'in Jesús. A ntá xík'janchánkíhi ch'an tí chojni siín ntiha inaá. ²¹ Kjánchó jehe sín antsí má tsen k'óyako sín ntáchro sín kíxin:

—¡Tjakékanirá ch'an ntacruz! ¡Tjakékanirá ch'an ntacruz! —ichro sín.

²² Níxin xík'janchánkí ch'in Pilato ntáchro ch'an kíxin:

—¿Xá nkehe ntoáhya kjuích'e ch'an? Janhan la k'uitjahya ninkehó jié chóna ch'an chrók'uenxín ch'an. Sintakjasóte ch'an la ntá chr'éxin tsjánjuan kjuachaxin sátsji ch'an —ichro ch'an.

²³ Kjánchó jehe sín antsí tsen kjuanchia sín ntáchro sín kíxin chrók'juak'enkáni ch'an ntacruz. A ntá k'óyako sín la ko k'óyako tí sín nchat'á t'etóan ntá kjuacha sín kjuanchia sín tí nkehe tsonhen. ²⁴ A ntá ch'in Pilato kjuanjon ch'an kjuachaxin xíkaha tsonhen tí nkehe kjuanchia sín. ²⁵ A ntá kjuanjon ch'in Pilato kjuachaxin sátsji tí ch'in Barrabás éxi kjuanchia sín, na mé tí ch'in k'uikjéhe sín kíxin k'uékje ch'an kjuánkaon la ko k'uék'óyán ch'an chojni. A ntá ch'in Pilato kjuanjon ch'an kjuachaxin kíxin sátsjiko sín tí ch'in Jesús sinchekjasóte sín ch'an éxi tjinkaon sín.

*Kjuak'enkani sín ch'an ijnko ntacruz its'en ch'an
(Mt. 27.32-44; Mr. 15.21-32; Jn. 19.17-27)*

²⁶ A ntá tió sákjuiko sín ch'in Jesús tsjak'enkani sín ch'an ntacruz, ntá itsé sín ijnko ch'in tsík'jxin chjasin Cirene it'in ch'an Simón, mé kjuixín ch'an nontee ch'an, ntá kjuínchekamá sín ch'an tí ntacruz tsjak'enkáni ch'in Jesús la tinkáchréhe ch'an.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkamā sín ch'an. ²⁸ Kjánchó ch'in Jesús nkátjía ch'an komá ch'an tí jehe sín kíxin tsjánka sín ntáchro ch'an kíxin:

—Jahará chojni chjin chjasin Jerusalén, chrótsjankamahyará tí janhan. Chrótsjanará kíxin tí nkehe tsonhanrá jahará la ko xjaanrá. ²⁹ Kíxin itsi yaon tsontáchorá kíxin náxrjón tí sín chóntahya xjan la ko tí sín kjuínchekokjéhya xjan la ko tí sín kjuínchekakíhya ninkehó xjan. ³⁰ Ntá tsjankíxin chojni

tsontáche sín tí jna kixin tsoxrátja sín la ko tsontáche sín tjo kixin tsjavá sín. ³¹ Kjonté tí nta yoa la ó sítónhen kaín tíhi la íchá tíó chróxamá tí nta la çneke tí kaá chrókónhen tí nta tsixámá? —ichro ch'án.

³² Kjaxin sákjuiko sín iyó sín tsikjasin jie kixin ts'óyanko sín ch'ín Jesús. ³³ Ntá tíó kjuíji sín tí jna tikítexín sín tí jna Nta Hueso Kja Chojni, na mé ntiha kjuak'enkanı sín ch'ín Jesús tí ntacruz la ko kjaxin tí iyó sín chóna jie, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin. ³⁴ Ntá tíó kjuixin kjuak'enkanı sín tí ch'ín Jesús tí ntacruz ntá nixjehe ch'án tí It'é ch'án Dios ntáçhro ch'án kixin:

—It'éni, tónínkákuenhya sín kixin tí nkehe kjuích'ezeni sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayehe sín iké ch'án ch'exín sín suerte kixin tsonoexín sín nkexro tsakja tí ka a. ³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etqan tjanoá sín tí jehe ch'án ntáçhro sín kixin:

—Kjuínchekaá ch'án ókjé chojni, a ntá jie jehe ch'án chrókuinchekaá ch'án asén ch'án tí chaxín jehe ch'án tí Cristo tí nkexro tsikjeyá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kuikao sín xranvino náxrjónhya chjéhe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókuinchekaá asán —ichro sín.

³⁸ Kjaxin ntiha ikja tí ntacruz kjuak'enkanı sín ijnko ntachiso ntsí tsíkjin sín nkíva griego la ko nkíva latín la ko nkíva hebreo ntáçhro kixin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxínjin ch'án tí ch'ín Jesús ntáçhro ch'án kixin:

—Tí jaha chaxín Cristo, jahvá chrókuínkajian asán, ntá tsjixin ntá chrókuínkajian tí jeheni —ichro ch'án.

⁴⁰ A ntá tí ch'ín jnko a k'uetuñhen tí íjnko ch'ín a kixin tsotáni ch'án, ntáçhro ch'án kixin:

—Ntáçhrohya xikaha. ¿Á chrakuenhya Dios kixin xikaha ichrúa kixin kjaxin jeheni na ó tjejótsjósóteni? ⁴¹ Yóini na nchoxon tjejótsjósóteni tjejótsjenkani tí jie kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáçhro ch'án kixin:

—Jesús, xráxinkávan tí janhan tíó ts'ayéhé kjuachaxin tsétoan jaha —ichro ch'án.

⁴³ Ntá kjuátehe ch'ín Jesús ntáçhro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uixin tie kuenté chjasintajni hasta las tres kónjin. ⁴⁵ Ik'uén yaon, la ko tí ka t'ínkákuènxín nkaxenhen njnko k'uichje jnkosiné. ⁴⁶ Ntá ch'ín Jesús k'uèya ch'án itsen ntáçhro ch'án kixin:

—It'éni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáçhro ch'án kixin:

—Chaxín tí nkeexo la jína la ninkehó jìe chónthaya —ichro ch'án.

⁴⁸ A ntá kaín tí chojni tsíkójnkotsé ntiha k'uikon sín xíkaha kónhen ntá sákjuixin sín ntiha chrakon sín tjate sín ntakuin sín kixin xíkaha kónhen. ⁴⁹ A ntá kaín tí sín chóxin ch'in Jesús la ko kjaxin tí chojni chjin k'uékinkáchónki sín ch'án tsíkjin sín estado Galilea ikjin tjejó sín tjejótsjehe sín nkerí sítónhen.

Sákjuikjavá sín tí ch'in Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'in it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etóan kuente tí sín judío, jehe ch'án mé ijnko nkeexo jína. ⁵¹ Jehe ch'án kjuák'echónhen ch'án itsi tí kjuachaxin kuente Dios. Méxra kóxrjienhya ch'án nkeexí kjuich'e tí sín í so t'etóan. ⁵² Méxra sákjuitsjehe ch'án tí ch'in Pilato kjuikjanchia ch'án tí cuerpo kuente ch'in Jesús. A ntá ch'in Pilato kjuanjon ch'án kjuachaxin. ⁵³ Ntá sákjuí sín tsjinkajinxin sín ch'án ntacruz. Ntá kjuixin kjuinkajin sín ch'án ntá kjuínchek'ísimá sín ch'án ijnko ka jíe, ntá sákjuiko sín tsoxravá ch'án ijnko tóye xráxín tsík'ich'éna ch'in José jehó tjo la ko naxa ninkeexo tsíxraváhya ntiha. ⁵⁴ Kaín tíha kónhen tí yaon viernes kónjín. Tí yaon mé tjejóyaxínhin sín kixin í séhya tsoxrankixin tí yaon t'ok'éhe sín sábado kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuikoxín ch'in Jesús estado Galilea kjaxin sákjuiko sín sákjuitsjehe sín tí tóye tsoxravá ch'án la ko k'uikon sín jína nkeexí kjuak'e sín tí cuerpo kuente ch'án. ⁵⁶ A ntá tío kjan sín tí nchia tjejó sín k'óyaxínhin sín kjueyá sín xroan xraxé náxrjón itsa ntóe ch'án kixin xíkaha k'uékinkáchónki tí sín judío. A ntá k'ok'éhe sín tí yaon sábado éxí t'etóan tí ley.

24

Ó xechón ch'in Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankixín semana tí chojni chjin na xikjan sín inaá tí tsíxravá ch'in Jesús sákjuiko sín xroan xraxé tsík'ena sín. La ko í so chojni chjin sákjuikotoxin sín. ² Ntá ó kjuíji sín ntiha k'uikon sín tí xro tsík'jénin tí tóye la í xíkahya tjen tí sákjuí sín. ³ Ntá k'uixenhen sín tóye ntá k'uitjahya sín cuerpo kuente Inchéni Jesús. ⁴ Ntá chrakon sín ntá noehya sín nkehe sich'e sín. Ntá xrinahya k'uikon sín iyó chojni ntoa tjejóxin tóté chjinaxón tí tjejó sín, la iké sín la tjákini tsjehe. ⁵ A ntá tí chojni chjin kjuínchek'ísén kja sín tjejótsjehe sín nonte kixin imá chrakon sín, a ntá tí chojni ntoa ntáchro sín kixin:

—¿Nkekuente xritjéyará tí nkeexo tjechón tí sín tí sín tsík'en? ⁶ Tjenhya ch'án ntiha la ó xechón ch'án. Xráxinkáonrá nkehe ntáchro ch'án tí kjuak'e ch'án estado Galilea ⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chónthaya jìe tsjak'enkani sín ch'án ntacruz la ko tí nixin yaon tsoxechón ch'án inaá —ichro sín.

⁸ A ntá tí síhjin xráxinkaon sín kixin nkeexí tsíchronka ch'in Jesús, ⁹ a ntá tío kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. ¹⁰ A ntá tí sín sákjuichenka tí sín apóstol la mé tjan María Magdalena la ko tjan Juana la ko tjan María iné ch'in Jacobo la ko tí í so chojni chjin. ¹¹ A ntá tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

12 Kjánchó ch'in Pedro k'uaxrjexin ch'an nchia tinká ch'an sákjuitsjehe ch'an tí tsíkji_xravá ch'in Jesús. Ntá kjuíji ch'an k'uíkon ch'an tí nkaxenhen tóye k'uíkon ch'an kixin jehó tí ka tsík'ísimá ch'an ntaha tjen. Ntá kjan ch'an tí nchia tjen ch'an chrakon ch'an kixin xíkaha tsíkónhen.

Tí ntia Emaús sákjuí sín la kjuíjichréhe Ìnchéni

(Mr. 16.12-13)

13 A ntá tí yaon a iyó sín sákjuí sín ijnko chjasin ntsi it'in Emaús, mé kjínxin tejnko kilómetro tí chjasin Jerusalén. 14 Tinkáko sín kíchó sín kixin kaín tí nkehe tsíkónhen tí chjasin Jerusalén. 15 A ntá nachrohe nixja sín tinkáko sín, a ntá ch'in Jesús kóchjinehe ch'an tí jehe sín sákjuíko sín ch'an. 16 Kjónté k'uíkon sín ch'an la kjuanjonhya Dios kjuachaxin kixin chrókjuatsóan sín tí jehe ch'an. 17 A ntá ch'in Jesús kjuanchankíhi ch'an sín ntáchro ch'an kixin:

—¿Nkehe tí tinkakjórá tí k'uinkará ntia? ¿Nkekuènte kixin t'avará? —ichro ch'an.

18 A ntá ijnko tí jehe sín mé it'in Cleofas, mé kjuátehe ch'an kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'an.

19 A ntá jehe ch'an kjuanchankíhi ch'an tí jehe sín kixin:

—¿Xá nkehe tsíkónhen? —ichro ch'an.

Ntá chénka sín ch'an kixin:

—Tí nkehe tsíkónhen ch'in Jesús tsíkji_xin ch'an chjasin Nazaret. Jehe ch'an na ijnko nkexro k'uéchronka itén Dios, na mé kjuakoxin ch'an kjuachaxin kuènte nkaya nkajní kaín tí nkehe k'uékjich'e ch'an la ko kaín nkehe k'uéntáchro ch'an mé xíkaha k'uíkon Dios la ko k'uíkon tí chojni. 20 A ntá tí ncha'tá t'etqan la ko tí sín gobierno kjuínchek'áyéhe sín ch'an kixin its'en ch'an la tsjak'enkanı sín ch'an ntacruz. 21 A ntá jeheni k'uejóchónhenni kixin jehe ch'an chrókjuinchekaá ch'an tí sín Israel. A ntá jie ó chóna iní yaon xíkaha kónhen. 22 A ntá iso chojni chjin kjaxin k'uékinkáchónki sín ch'an kjuinchechracon sín tí jeheni kixin jehe sín tsíkjisjehe sín tí tsixravá ch'an imá nchítjén 23 la mé tsík'itjahya sín tí cuerpo kuènte ch'an, ntá kjan sín chrónka sín kixin tsík'ikon sín iyó sín ángel chrónka sín kixin ch'in Jesús la tjechón ch'an, ichro sín. 24 Ntá tuénxin iyó tí sín k'uájikoni kjaxin sákjuitsjehe sín tí tsixravá ch'an la kuik'itja sín éxi chrónka tí chojni chjin, kjánchó ch'in Jesús la k'uíkonhya sín —ichro tí yaá sín a.

25 Ntá kjuátehe ch'in Jesús ntáchro ch'an kixin:

—Lontírá jahará la tjokahya kuitekáonrá tí nkehe k'uéchronka tí sín profeta k'uéjío ósé. 26 ¿Xá t'ichjánxinhya chrókjuasóte Cristo senó ntá chrók'uáyéhe ch'an tí kjuachaxin chrók'uetqan ch'an? —ichro ch'an.

27 Ntá kjuankixin ch'an chronkaxin ch'an nkexrí t'axrjexin kaín tí nkehe nixja xroon itén Dios kixin nkehe tsonhen tí jehe ch'an la mé kjuankíxixin ch'an chronkaxin ch'an tí nkehe tsíkjin ch'in Moisés la ko kjuintaxin chronkaxin ch'an tí nkehe tsíkjin tí í so sín profeta.

28 Ntá kjuíji sín tí chjasin ntsi a, a ntá ch'in Jesús tsjehe ch'an éxi naxa sáchrókjui ch'an kjín. 29 A ntá jehe sín mé chronóehé sín ch'an kixin ntahó chrókuitóhe ch'an, ntáchro sín kixin:

—Títóha ts'ejóni ntíhi kixin ntá ó kóntó la ó ts'ixitie —ichro sín.

Ntá ch'in Jesús la k'uixenhen ch'an nchia kixin tsitqeko sín ch'an. 30 A ntá tjejótjaxinko sín ch'an tí tjen tí ntamesa, ntá ntiha xranjon nkehe sine sín,

ntá kuákja ch'án tí nioṭṭja la kjuanchehe ch'án kjuasáyé Dios la kóchrít'o ch'án kuákja tí jehe sín. ³¹ Ntá tuénxín xraxinkaon sín ntá kjuátsqan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kíchó sín ntáchro sín kixin:

—¿Á chaxínhya chéhe asénni tí kuíkqoni ch'án ntja kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín. ³⁴ A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsqanxín sín tí ch'ín Jesús tí kóchrít'o ch'án nioṭṭja kjuanjon ch'án.

Titàya k'uikuèn sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naṭa tjejóṭjo sín kaín tí nkehe tsíkónhen, a ntá xrínahya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xríntqo chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xíkaha tjenkayáxin asánrá?

³⁹ Tsjehérá tjaná la ko toṭená kixin chaxín janhan. Itserána la ko komárána, kixin ijnko xríntqo chojni chóntahya nto la ko chóntahya hueso éxí t'ikonrá kixin chonta janhan —ichro ch'án.

⁴⁰ A ntá xíkaha ichro ch'án ntá kjuako ch'án itja ch'án la ko toṭé ch'án.

⁴¹ Ntá kiónté xíkaha k'uíkon sín la naṭa kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

⁴² Ntá chjéhe sín ch'án it'o koche tsíchjántaón xrohi la ko ijnko t'o katje kotsjenta tjá tsjen. ⁴³ A ntá jehe ch'án kuákja ch'án kjóne ch'án k'uíkonxín kon sín. ⁴⁴ Na ntá ntáchro ch'án kixin:

—Kaín tí nkehe k'uaṭsínka tí janhan mé k'uéntáxrjan tí naṭa k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'ín Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsona janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxin ts'en, la níxin yaon t'ichjánxin tsoxechón ch'án. ⁴⁷ A ntá t'ichjánxin tsjakoxín sín ihñié ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítqohe sín ijjié sín chrókuitekaon sín tí jehe ch'án kixin jehe ch'án mé chrókuincheyaon tí ijjié sín. ⁴⁸ A ntá jahará mé tsochronkaxínrá kixin xíkaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsíntáchro ch'án. Kjánchó chjasin Jerusalén ntahó titqohará tsoxiteyája ts'ayéhérá kjuachaxin tsjixin nkaya nkajni.

*Ch'in Jesús sákjuí ch'án nkaya nkajní**(Mr. 16.19-20)*

⁵⁰ A ntá ch'in Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíncheyaon ch'án tí jehe sín. ⁵¹ A ntá kjuixin kjuíncheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uikon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

1 12A ntá tí xrankíxixín naḡa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. 2 Tí xrankíxixín na mé tí nkexro xráxín kjuák'eko Dios 3 la ko kjuachaxin kuènte ch'án na mé k'ónaxín kaín xín nkehe siín jie. A ntá kohya ninkehó nkehe k'ónakoá, na mé kaín xín nkehe siín na mé k'ónaxín tí kjuachaxin kuènte ch'án. 4 Jehe ch'án na mé kjuanjon kjuachaxin kaín nkehe síchón siín chjasintajni la ko jehe ch'án mé xrohi t'inkaséyanxínhin jnkobjnko ntje chojni chjasintajni. 5 Tí xrohi a mé t'inkaséyanxín tí sitié a. A ntá tí sitié a mé tjinkaon chrók'ók'anka tí xrohi a, kjánchó kjuachahya k'ók'anka.

6 Ntá kjuák'e ijnko chojni k'uetuēnhen Dios kui mé it'in ch'án Juan. 7 Ikuí ch'án kjuák'echrónka ch'án nkexrínci tjen tí xrohi t'inkaséyanxín chjasintajni kíxín kaín xín chojni chrókuitekaon sín tí tjechrónka ch'án a. 8 A ntá tí ch'ín Juan la jehya tí xrohi a. Ó k'uituēnhón ch'án kui ch'án kíxín tsochrónka ch'án nkerí kuènte tí xrohi a. 9 A ntá tí xrohi chaxín t'inkaséyanxínhin kaín xín chojni na ó tsiki ch'án chjasintajni jie.

10 Kjuák'e ch'án chjasintajni na mé Dios tsíkjich'éanaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naḡa kjuátsoanhya sín ch'án. 11 Ikuí ch'án tí tjejó tí sín judío k'uaxrjeníxín ch'án, kjánchó kuítekakuenhya sín ch'án. 12 A ntá tí sín kuítekaon sín ch'án mé k'uáyéhe sín kjuachaxin kíxín ts'óna sín xjeen Dios. 13 Ntá yóghya ts'axrjeníxín sín it'é sín chjasintajni ntihyó la ko yóghya ijnko it'é chrókjuenkayáxín ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

14 A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uetjuèhé ch'án chojni chjasintajni la ko imá ntoá chrónka ch'án. Kuayeni k'uikonní kíxín imá t'etqan ch'án kíxín jehe ch'án mé tí jnkokoáxón Xjeen It'éni tjen nkaya nkajní na mé xíkaha imá t'etqan ch'án.

15 Ch'ín Juan mé chrónka ch'án nkexrí tjen tí nkexro a. Ntáchro ch'án kíxín: —Senó k'uejkákhohará kíxín chr'éxín tsi tí nkexro a, na mé antsi má t'etqan ch'án, a ntá janhan la náhi kíxín tí janhan naḡa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

16 Kaínni ó k'uáyéheñi tí kjuachaxin jíe tjetjanjon ch'án la ko antsi má tjencheyaonni ch'án la ko tjencheyaonni ch'án. 17 Dios mé tsík'etuēnhen ch'ín Moisés kíxín tsokjin ch'án tí ley. A ntá Ìnchéni Jesucristo mé kjuakoxin ch'án kíxín nkexrí imá tjuèhé Dios tí chojni chjasintajni. A ntá kaín nkehe chrónka ch'án mé antsi ntoá. 18 Kohya ninkexró chjasintajni k'uikon sín Dios a. A ntá tí jnkokoáxón Xjeen ch'án na mé xráxín jnkokoá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

*Ch'ín Juan mé chrónka ch'án nkexrínci tjen ch'ín Jesús
(Mt. 3.11-12; Mr. 1.7-8; Lc. 3.15-17)*

19 Iso tí sín judío k'u'éjó sín chjasin Jerusalén na ntá ichr'án sín iso chojni nchat'á la ko iso tí sín levita, ikui sín kuinixjehę sín tí ch'in Juan kjuanchankíhi sín ch'án kixin:

—¿Nkexro tí jaha? —ichro sín.

20 Ntá kjuínchemáhya ch'án, ntáchro ch'án kixin:

—Náhi. Jehya janhan tí Cristo —ichro ch'án.

21 Ntá xíkjanchankíhi sín ch'án inaá, ntáchro sín kixin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'in Juan la xíkjatehe ch'án ntáchro ch'án kixin:

—Náhi. Jehya janhan Elías —ichro ch'án.

Ntá xíkjanchankíhi sín ch'án inaá kixin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'in Juan inaá kixin:

—Náhi. Janhya —ichro ch'án.

22 Ntá kjuanchankíhi sín ch'án inaá kixin:

—¿Ntá nkexro jaha? T'ichjánxín tsonoheni tsochénkani tí sín ichr'ánni ikuini. ¿Nkehe tsochrónka kixin nkexro tí jaha? —ichro sín.

23 Ntá kjuátęhe ch'in Juan ntáchro ch'án kixin:

—Janhan mé tí nkexro tsjak'e teje ts'èya tsoxrjanka kixin: “Takitjehérá ijnko ntja ntoí tsixín Ìnchéni” —mé xíkaha ichro ch'án kjuátęxín ch'án itén ch'in Isaías k'u'échrónka xroon itén Dios ósé.*

24 A ntá tí sín fariseo mé tsichr'án tí jehe sín kuikjanchankíhi sín tí ch'in Juan.

25 A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'u'échrónka itén Dios ósé. ¿A ntá nkekuénté tikite chojni tí xíkaha? —mé ichro sín.

26 Ntá ntáchro ch'in Juan kixin:

—Janhan na mé intá ó tikítexián chojni. Ó ntihi tjenkákjan ijnko nkexro naxa jtátsoanhyará. 27 Jehé ch'án mé tsi ch'án nóton tí janhan. A ntá antsí mé t'etóan ch'án, a ntá janhan na kénhyó. A ntá tósuána chrókjuasintanka tí correa tokatę ch'án —ichro ch'án.

28 Kain tíha mé tsikónhen tí chjasin it'in Betábara tí nó tjtóxin yaon tóhe tí ntarío Jordán tí kjuák'e ch'in Juan kuikite chojni.

Ch'in Jesús na mé éxi yóhę ijnko kolélo kuente Dios

29 A ntá tí yaon chr'exin mé k'uikon ch'in Juan kixin ó tje kui ch'in Jesús. Ntá nixjehę ch'án tí sín tsíkóchjina ntáchro ch'án kixin:

—Tsjehérá tí nkexro tje kui mé tí Kolélo kuente Dios jehe ch'án. Tíha mé tsjinxín ijie chojni chjasintajni. 30 Janhan mé k'uéxrjanka kixin tí iton tí janhan mé tsichréhę ijnko nkexro antsí t'etóan, a ntá janhan la kénhyó tétóan kixin naxa kohyana na jehe ch'án la ó xráxin tjen ch'án. 31 Kjaxin janhan naxa chonhya nkexro tíha. A ntá xra ó k'uinka kjuak'é kuikítexián chojni intá kixin tí chojni nación Israel mé chrókjuátsoanxín sín ch'án —ichro ch'in Juan

32 Kjuintaxín ntáchro ch'in Juan kixin:

—Ó k'uikuán kixin tí Nchakuen Dios mé k'uinkajinxin nkaya nkajni na éxi yóhę ijnko kontóá k'uinkajin la ko kjuák'e va ntoí tí tjen ch'án. 33 A ntá janhan kjaxin naxa chonhya nkexro tíha. A ntá tí nkexro k'uętuanna kixin tsjak'é

* 1:23 Isaías 40.3

tsíkijexián chojni ìntà mé tsíchrónka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsqoanxián janhan kixin tí nkexro a mé tsíkijexin ch'án Nchakuen Dios chojni. ³⁴ Ǻ ntá janhan jie mé ó k'uikoxín kuan kixin xikaha kónhen tí jehe ch'án, Ǻ ntá xrjankaxián kixin táha mé Xjeen Dios tíha —mé xikaha chrónka ch'án.

Tí sín sqoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án, ³⁶ Ǻ ntá xrinahya k'uikon ch'án k'uátsínka ch'ín Jesús. Ntá ntáchro ch'ín Juan kixin:

—Tsjeherá tí nkexro i mé tí Kolélo kuénte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjía ch'ín Jesús k'uikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kixin:

—Ìntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uejoko sín ch'án kuenté tí kónjín kixin kjuíji sín ntiha como las cuatro kónjín.

⁴⁰ Ǻ ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chóna ch'án ijnko savé mé it'in Simón Pedro. ⁴¹ Na ntá tuénxin tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrjexin kixin Cristo.

⁴² Ǻ ntá ch'ín Andrés mé kujkəo ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sjintak'ian Cefas —ichro ch'án.

Ǻ ntá tí palabra Cefas la ko tí palabra Pedro na mé yóí mé t'axrjexin kixin ixro tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ Ǻ ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kixin:

—Chréhé tí janhan —ichro ch'án.

⁴⁴ Ǻ ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjeýá ch'án tí ch'ín Natanael na ntá chénka ch'án kixin:

—Ó k'uitjani tí nkexro tsi éxi k'uechrónka tí ch'ín Moisés tí tsíkjin ch'án tí xroon chrónka tí nkehe k'ueqoan Dios. Kjaxin tí sín k'uechrónka tí itén Dios chr'éxin mé k'uechrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ Ǻ ntá ntáchro ch'ín Natanael kixin:

—¿Xá kjuánchí má chrókójina tí nkehe chrók'uaxrjexin tí chjasin Nazaret a? —ichro ch'án.

Ntá kjuátehe ch'ín Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uikon ch'ín Jesús kixin ó kui tinkákóchjina ch'ín Natanael, na ntáchro ch'án kixin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'ín Natanael kjuanchankíhi ch'án tí ch'ín Jesús kixin:

—¿Nkexrí kixin tjátsɔanna? —ichro ch'án.

Ntá kjuátehe ch'ín Jesús ntáchro ch'án kixin:

—Naxá nixjaahya tí ch'ín Felipe mé k'uúkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'ín Natanael kixin:

—Maestro, jaha la chaxín tí Xjeen Dios tjen nkaya nkajní tsétuɛnhén tí nación Israel —ichro ch'án.

⁵⁰ Ntá kjuátehe ch'ín Jesús ntáchro ch'án kixin:

—Jehya tí nkehe ntáxrjan k'uúkuan tjenkankiá nta t'óna to higo, jehya táhó tsitekákoxnian. Náhi. Chr'éxin xiki í jnko kjuaxroan antsi má jié ts'íkuan, a ntá tíhi la kénhyó —ichro ch'án.

⁵¹ Kjaxin ntáchro ch'ín Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuénte Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'ín chjasin Caná estado Galilea. Mé koí tí iné ch'ín Jesús tsík'íyehé sín tjan la ntiha tjen tjan koí. ² Kjaxin tsík'íyehé sín tí ch'ín Jesús la ko tí sín k'uájiko ch'án kixin sátsji sín tí tsikótehe sín ntiha. ³ Ntá ó tsík'ankehe sín tí xranvino ik'uí sín na ntá tí iné ch'ín Jesús mé ntáche tjan tí jehe ch'án kixin:

—Ó tsík'ánká xranvino its'i sín —ichro tjan.

⁴ Ntá ntáchro ch'ín Jesús kixin:

—Naná, ¿nkehe tsoɛnhen chroɛnka? Naxá kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'ueɛtuɛnhanrá ch'án chrókjuinchesteyará —ichro tjan.

⁶ A ntá siín ntiha injon ch̄i tsík'óna xro na mé tíha tjiá ntá t'onti sín kixin xikaha mé ts'axrjehe tí jié chóna sín koí, mé xikaha kuinkáchónki tí sín judío. Na mé jnkojnko ch̄i mé tjacha tikia ochenta litro la o ciento litro ntá. ⁷ Ntá k'ueɛtuɛnhen ch'ín Jesús tí sín ch'e xra kixin:

—Tíkjará ntá kaín tí ch̄i a tsokaón —ichro ch'án.

Ntá kjuinchesteyá sín kjuinchekaón sín ntá jnkojnko tí ch̄i a. ⁸ A ntá ntáche ch'ín Jesús tí jehe sín inaá kixin:

—Tákjá intsi ntá tjiá ch̄i tjikuehé tí ch'ín t'etoan tí kia a —ichro ch'án.

Ntá xikaha kjuich'e sín kjuinchesteyá sín. ⁹ A ntá tí ch'ín t'etoan tí kia a mé tsjéxín ch'án tí ntá tsík'óna xranvino kjónté noehya ch'án nketi kuixín tí xran a. Jehó tí sín ch'e xra kuikao sín mé nohe sín kixin jehe sín mé tsíkakisje sín ntá. Ntá tí ch'ín t'etoan mé k'uúyehé ch'án tí ch'ín tsikótehe. ¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsíkóchjina na ntá tjanjon sín tí xranvino náxrjónhya. A ntá

jaha la náhi. Senó kjuakéchjina tí xranvino ąntsi má náxrjón, ą ntá tí jie tjetjánjuan jaha —ichro ch'án.

¹¹ Tí kjuaxroan a kjuich'e ch'ín Jesús chjasin Caná estado Galilea mé tí kjuaxroan saoxín kjuasin ch'án mé kjuakoxin ch'án nkexrí imá jié tí kjuachaxin kuente ch'án, ą ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, ą ntá sákjuí ch'án chjasin Capernaum, sákjuíko ch'án iné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí nínko jié

(Mt. 21.12-13; Mr. 11.15-18; Lc. 19.45-46)

¹³ ą ntá ó kuichjina tí yaon kia kuente pascua kuente tí sín judío. Ntá ch'ín Jesús sákjuí ch'án chjasin Jerusalén. ¹⁴ Ntá nkaxenhen tí nínko jié ntiha k'uíkon ch'án tí sín nchekjixin koxinta la ko kolélo la ko kontóá. La ko ntiha kjaxin tjetjótjixin tí sín tjinkíxixin chichaon. ¹⁵ Ntá ch'ín Jesús mé kuákja ch'án ihno tsíxehé sín ntiha, kjuich'éna ch'án ijnko chikoté, ntá kuakitsjexín ch'án sín nkaxenhen nínko kaín xín sín la ko tí kolélo la ko tí koxinta. Na ntá tí ntamesa tjinkítóxixin sín tí chichaon mé kótéka ch'án tsíkjaminkí xènjín tí chichaon a.

¹⁶ Ntá k'uetuñhen ch'án tí sín nchekji tí kontóá a kixin:

—Takítsjerá kaín tí nkehe a. Ch'énahyará ijnko ntasin tí ntøe T'aná ntihi —ichro ch'án.

¹⁷ Ntá xráxinkaon tí sín k'uájiko ch'án tí nkehe tsíkjin sín ósé kixin: “Éxí xrohi k'uákjen ąsenná nínkañan kixin tí ntøa tjikosáyehya sín.” *

¹⁸ Ntá tí sín judío mé kjuanchankíhi sín ch'án kixin:

—Ǻxá nkerí kjuaxroan tsjásixián tsjákoñian nketí kjuachaxin chonta kixin xíkaha kjuich'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxikará tí nínko i ntá iníkoá yaon la ó sít'ána nixin tsjak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjío sín kjuich'éna sín tí nínko i, ą ntá jaha ntáchrua kixin iní yaon koá sích'éna inaá, ichrua —ichro sín.

²¹ Kjánchó kienxínhya sín kixin tí nínko ntáchro ch'ín Jesús la tí cuerpo kuente ch'án. ²² Ntá tió kjuixin xechón ch'án ntá xráxinkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen ąsén kaín xín chojni

²³ Tió kjuák'e ch'ín Jesús chjasin Jerusalén tí kia pascua, ą ntá itsjé chojni kuinkáchónki sín tí jehe ch'án kixin ó k'uíkon sín tí kjuaxroan kjuasin ch'án.

²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen ąsén jnkojnko chojni ²⁵ ą ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen ąsén kaín xín chojni.

3

Ch'ín Nicodemo kuinixjehe ch'án tí ch'ín Jesús

* 2:17 Salmo 69.9

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehé ch'án mé ijnko nkexro imá tjetóan kuènte tí sín Israel. ² A ntá ijnko tie kjuíchréhe ch'án tí ch'in Jesús a nixjéhe ch'án ntáchro ch'án kixin:

—Maestro, kónoheni kixin It'eni tjen nkaya nkajní mé tsíchr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'in Jesús ntáchro ch'án kixin:

—A ntá tsotjonka ijnko nkehe imá tjetóan. Tí nkexro tsokjéhya nixien mé xitjahya ts'ikon tí kjuachaxin ts'etóan Dios —ichro ch'án.

⁴ A ntá ch'in Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uixanhan tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'in Jesús ntáchro kixin:

—Ntá tsotjonka ijnko nkehe imá tjetóan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios.

⁶ Tió ijnko xjan ts'axrjenixin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrjanka kixin “Kaín chojni t'ichjánxin tsokjíhi nixien.” ⁸ Éxí yóhe tí tinhín tí chjéhe xrínto ntá noahya nketí kjuixin tí xrínto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xikjanchankí ch'in Nicodemo inaá kixin:

—¿Nkekuénté kixin xikaha chrókonhen? —ichro ch'án.

¹⁰ Ntá kjuátehe ch'in Jesús ntáchro ch'án kixin:

—¿Jaha ijnko maestro imá t'etóan tí nación Israel ntá naxa tiénxinhya tí nkehe ní? ¹¹ Chaxín tjetjonka tí nkehe nõna la ko tí nkehe k'uíkuan ntá titekákonahya jaha. ¹² Tí nkehe tjetjonka la kuènte chjasintajni ó ntá kjónté la titekákonahya jaha. ¿Ntá nkexrí chrókuítekavan tí chrótjonka nkehe kuènte nkaya nkajní? ¹³ Kohya í jnko nkexro k'ujt'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kjuixin ch'án. ¹⁴ Éxí yóhe ch'in Moisés tió k'uixin sín tí nteje, a ntá Dios mé k'uetóan kixin sinchekjanoya ch'án ijnko konche tsjak'enkani ch'án ijnko nta, ntá xikaha kjuích'e ch'án kjuak'enkani ch'án tí konche tí nta a komá sín, konche ntá kuaá sín k'uénhya sín, * mé xikaha tsõnhen tí Xjeen Dios K'óna Chojni mé t'ichjánxin kixin tsjak'enkani ch'án ijnko ntacruz ¹⁵ kixin mé xikaha kaín nkexro tsinkáchónki tí jehé ch'án mé tsaá sín tsochóna sín kjuachón jnkochrín.

Dios imá tjuèhe ch'án tí chojni chjasintajni

¹⁶ Kixin Dios mé imá tjuèhe ch'án chojni chjasintajni ntá kjuanjón ch'án jnkokoáxón Xjeen ch'án, kixin ntá jnkójnko chojni tsinkáchónki tí Xjeen ch'án mé ts'itjányahya sín tsochóna sín kjuachón jnkochrín. ¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jié kjuasin sín. Náhi. Ó jehí ichr'án ch'án tí Xjeen ch'án chjasintajni kixin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitexín Dios tí ijje sín tsjasóte sín kixin titekakuenhya sín tí jnkokoáxón Xjeen Dios. ¹⁹ Na mé xikaha Dios sinchekjasóte sín jnkochrín kixin ó kui tí nkexro t'inkaséyanxín chjasintajni

* 3:14 Números 21.9

na kǝnté ntá ǝntsi má tóxrjínħin sín tí sítié a. A ntá tí t'inkaséyan la náhi kixin naxǝ tóxrjínħin sín tí nkehe jínahya tjejóch'e sín. ²⁰ Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsǝnoxínhya tí nkehe jínahya tjejóch'e sín. ²¹ A ntá tí sín tjejóch'e sín tí jína a na mé chéħe sín tóchjinehe sín tí t'inkaséyan kuènte Dios kixin tsǝnoxín tí nkehe ch'e sín kixin ntá kaín xín chojni mé tsjatsǝan sín kixin tjejóch'e sín tí nkehe tóxrjínħin Dios.

Ch'ín Juan Bautista chrónka inaá kuènte ch'ín Jesús

²² Na ntá chr'éxin ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjóko sín ch'án kuikite ch'án chojni. ²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntǝ síin. Na ntá nkáki sín kuikite sín. ²⁴ Mé xikaha kónhen naxǝ kjuák'echjinahya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín. ²⁶ A ntá tí sín k'uájiko ch'ín Juan sákjuitsjehe sín ch'án chénka sín ch'án kixin:

—Maestro, tí ch'ín kjuák'ekoa tóħe ntarío Jordán, na mé tí nkexro tsíchronka kuènte ch'án, la mé tǝen ch'án tǝkǝte ch'án chojni la ko kaín xín chojni mé tǝchréħe sín ch'án —ichro sín.

²⁷ Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokuahya chrók'uáyéħe chojni. ²⁸ Ó kuínhínrá ntoá k'uéxrjanka senó kixin janhya tí Cristo. Náhi. Janhan ó kuítuannúá kuítǝnxíán ntǝa tsǝxrjanka kixin ó tsi ch'án. ²⁹ Éxí yóħe ijnko ch'ín tsǝteħe na mé jeħe ch'án mé ts'áyéħe ch'án tí ichjien ch'án. A ntá tí ch'ín chóxin ch'án mé chéħe ǝsén ch'án tǝtinhin ch'án tǝjenixja tí ch'ín ts'áyéħe ichjien a. Mé xikaha janhan imá chána kixin xikaha sítonhen kixin itsjé chojni sítóchjinehe sín tí ch'ín Jesús tsinhin sín nkeħe tí tǝjenixja ch'án. ³⁰ A ntá jeħe ch'án t'ichjánxin ǝntsi ts'etǝan ch'án. A ntá janhan la kénhyó —mé chro ch'ín Juan.

Tí nkexro kujxin nkaya nkajní

³¹ Tí nkexro kujxin nkaya nkajní mé kaín nkeħe t'etǝenhen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kujxin nkaya nkajní mé kaín nkeħe t'etǝenhen ch'án. ³² Jeħe ch'án mé chrónka ch'án tí nkeħe tsik'íkon ch'án la ko tí nkeħe tsíkinhin ch'án. Kjánchó koha chojni titekaon sín tí nkeħe chrónka ch'án. ³³ A ntá jnkojín nkexro titekaon sín tí nkeħe chrónka ch'án na mé xikaha tǝǝoxin ch'án jie kixin chaxín ntoá chrónka Dios ³⁴ kixin tí nkexro ichr'án Dios mé nixja itén Dios kixin jehya intsíkoá tí Nchǝkuen Dios k'uáyéħe ch'án. Náhi. ³⁵ It'eni Dios mé tǝuèħe ch'án tí Xjeen ch'án na mé xikaha ó tsíchjéħe ch'án kjuachaxin kixin kaín xín nkeħe ts'etǝenhen ch'án. ³⁶ A ntá tí nkexro tsitekaon tí Xjeen Dios mé xikaha tsochónta sín tí kjuachón jnkochrín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochrín xikaha. Tí sín a mé Dios sinchekjasóte sín jnkochrín.

4

Ch'ín Jesús ikjo ch'án ijnko tjan samaritana

¹ A ntá tí sín fariseo mé kónoħe sín kixin ǝntsi tsjé chojni chréħe sín tí ch'ín Jesús kuikite ch'án sín na ntá tí chojni chréħe sín tí ch'ín Juan la kánhyó tsjé

sín. ² Kjánchó Jehya ch'ín Jesús kuikite ch'án chojni. Méxra tí sín k'uájiko ch'án mé kuikite sín chojni. ³ A ntá tió kónohe ch'ín Jesús kixin xikaha tsikinhin tí sín fariseo ntá k'uaxrjexín ch'án tí estado Judea xikjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria. ⁵ A ntá kjuíji ch'án ijnko chjasin mé it'in Sicar kuente estado Samaria, mé chjino tí nonte tsikjinchekitonhen ch'ín Jacob tí xjeen ch'án José. ⁶ La ó chjino tjen tí tóye takitsje chojni ìnta mé it'in Ìnté Jacob. Na ntá ó chonkíxin kjuí sín ntiha. Méxra tí ch'ín Jesús la ímá kóxrje ch'án kixin ímá kjin tí ntja kjuíxin ch'án ntá kjuák'etjaxín ch'án chrínta tí tóye takitsje sín ìnta. ⁷⁻⁸ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuík'ena sín nkehe sineko sín ch'án. Ntá séhyó ikui ijnko tjan kuente estado Samaria ikui tjan tsakitsje tjan ìnta. Ntá ntáchro tí ch'ín Jesús kixin:

—Chjina íntsi ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuenté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.) ¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsoan jaha nkexro tí tjetjanahaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tóye í la ímá nínka? ¿Ntá nkexrí tsochjina tí ntá tjechón tjimé? ¹² Tí nkexro k'uaxrjeníxinni mé Jacob mé kuítóeheni tí tóye tjia ntá ntihi la ko kjaxin ik'uí ch'án tí ntá la ko kjaxin ik'uí tí xjeen ch'án la ko tí iko kuente ch'án. ¿A ntá xá jaha la xá antsí má tjetjoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátóhe ch'ín Jesús ntáchro ch'án kixin:

—Tí sín it'i sín tí ntá ntihi tí tóye í nántaxón its'en sín ntá ínaá. ¹⁴ A ntá tí sín its'i sín tí ntá sintakitonhan sín mé í ts'enhya sín ntá ínaá. Tí ntá sintakitonhan sín mé ts'óna éxí yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

¹⁵ Ntá ntáchro tí tjan a ínaá kixin:

—Chjina tí ntá, a ntá ts'énhyana ntá ínaá la ko ts'inkahya ntihi tsakítsje ntá —ichro tjan.

¹⁶ Ntá k'uetóan ch'ín Jesús kixin:

—Sátjia tjik'íyehé xiá ntá ts'inkará ntihi ínaá —ichro ch'án.

¹⁷ Ntá ntáchro tjan kixin:

—Chontahya xíná —ichro tjan.

Ntá ntáchro ch'ín Jesús kixin:

—Chaxín ntáchrua kixin chontahya jaha xiá. ¹⁸ K'uéchonta jaha in'ó xiá, a ntá tí ch'ín chonta jie Jehya xiá. Na mé chaxín tí nkehe ntáchrua kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios. ²⁰ A ntá tí sín k'uaxrjeníxinni k'uúxin ósé mé k'uéxraxinkakonxín sín Dios tí jnā ntihi. Kjánchó

jahará chojni judío mé ntáchrorá kixin tí n̄nko jié chjasin Jerusalén kaín ni chróxraxinkakonxínni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekávan kixin tjetsi tí hora a tsoxráxinkákonxínhyará It'éni Dios tí jna ntihi la ko tsoxráxinkákonxínhyará ch'án chjasin Jerusalén kjaxin. ²² Jahará chojni samaritano chonhyará tí nkexro xráxinkaónra. Ntá kaín ni chojnini judío mé chóxino tí nkexro xráxinkaónni. Méxra tí nkexro tsjakjinhin chojni tí jie yámá sín mé ts'axrjenixín tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrjnhin ch'án kixin chojni xikaha chrókjuich'e sín chróxraxinkakonxín sín ch'án. ²⁴ Jehé Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó n̄na kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uikon sín kixin tjenixjehé ch'án ijnko chojni chjin. Kjánchó nijnko sín kjuanchankéhya sín ch'án kixin nkehe tjinkaon ch'án na nkekuénté nixjehé ch'án tí tjan a. ²⁸ A ntá tí tjan mé kjuak'e tjan tí toa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjtsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójhya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehé sín tí ch'ín Jesús. ³¹ Naxá tihya sín nachrohe tí sín k'uájiko ch'án mé chrónóhéhé sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxá noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhé chrókjoné nkehe mé tí sít'a tí xra la ko tsjixinna tí xra kuénte tí nkexro chr'ánna k'uinka. ³⁵ Ntáchrorá kixin: “Noó nitjó naxá t'ítjayan tsochónhenni ntá tsotjáni noatrigó”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tinkáxamá kixin ó jina chrótjáni. ³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochrín. Ntá tí sín k'uenka sín nonte la ko tí sín tjá sín jnkokón tsochéhé sín. ³⁷ Mé xikaha tsoxitéyá tí nkehe ntáchro sín kixin: “Ijnko nkexro mé t'enka noa, a ntá ókjé sín tsotjá sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsik'énkajhyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuénte tí chjasin ntiha mé kjuankixin kuinkáchónki sín tí jehé ch'án kixin xikaha chrónka tjan kixin jehé ch'án ó chrónka ch'án kaín xín nkehe kjuích'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjan ch'ín Jesús ntá chrónóhéhé sín ch'án kixin

tsitohe ch'án ntiha. Ntá kuítóhe ch'án ntiha iyó yaon. ⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chronka kuítekaonni. Náhi. Tí jie ó kuínhinni nixja ch'án ntá kónoheni kixin jehé ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohe jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea. ⁴⁴ A ntá jehé ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án. ⁴⁵ Kjánchó tió kjuíji ch'án tí estado Galilea na mé k'uáyehé sín ch'án la ko kjuikosáyehé sín ch'án jína kixin kjaxin sín sátsíkji sín tí kia pascua chjasin Jerusalén tsík'íkon sín kain tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjamínca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóhe ch'án tí ch'ín Jesús kixin sáchrókjuí ch'ín Jesús ntóe ch'án sinchekitohe jína tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihyará tí janhan —ichro ch'án.

⁴⁹ Ntá chrónóa tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuíni ntóna jaí kixin xjanna ó tjet'en? —ichro tí ch'ín a.

⁵⁰ Ntá kjuátéhe ch'ín Jesús ntáchro ch'án kixin:

—Ikjan sátjia ntóa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntóe ch'án ntá xrínahya tí sín ch'ehe sín ch'án xra kjuíxinhin sín ntja chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankixin kuítóhe xjan jína, na ntá chrónka sín kixin:

—Ijna la una kónjín mé kjuín tí sóa —ichro sín.

⁵³ Ntá kónohe tí it'é xjan kixin xíkaha tí hora tsintáchro ch'ín Jesús kixin tí xjeen ch'án na ó jína tjen. A ntá jehé ch'án la ko kain tí sín siín ntóe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitohe jína ijnko ch'ín tsík'en tote chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá. ² A ntá ntaha chjino tí ntója t'ixenxín kolélo chjasin mé tjen ijnko pila tóxyoyéa ntá mé nkíva hebreo tí ntá mé it'ín Betesda. A ntá chrínta tí pila siín in'ó cuarto ntsíntí. ³ Ntaha tjejótsínka nchónhya chojni níhi, iso sín t'íkonhya la ko iso sín xitjahya tji la ko iso sín tsík'en toté. Tjejóchónhen sín kixin nkehora tsínkí ntá ⁴ kixin nántaxón

k'uínkajin ijnko ángel kjuiánkí ntá kjuínchekinkí ntá. **A** ntá tí nkexro senó tsjiánkí ntá mé tsitohe jina kjónté cualquiera chin chóna. ⁵ **A** ntá ntaha kjuák'e ijnko ch'in na mé chóna ch'an treinta y ocho nánó níhi ch'an. ⁶ **A** ntá tío k'uikon ch'in Jesús kixin tjetsínka tí ch'in a la ko kónohe ch'an kixin ósé níhi ch'an, ntá kjuanchankí ch'an kixin:

—¿Á tjinkávan tsitoha jina? —ichro ch'an.

⁷ Ntá ntáchro tí sinníhi kixin:

—Chóntahyani ninkexró tsjinkitsani tsjiánkíni ntá. **A** ntá tí tjinkaonni chrókjuiánkíni ntá la ntá ókjé nkexro tjítaón ntá tjíánkí ntá senó —mé chro tí sinníhi.

⁸ **A** ntá k'uetóan ch'in Jesús kixin:

—Ije la t'inkatjen, tjatsíyan kaniáa, itjia —ichro ch'an.

⁹ Ntá tuénxín kuitohe ch'an jina, ntá kjuatsen ch'an kanije ch'an kjuankixin itji ch'an. Kjánchó yaon sábadó tíha mé tí yaon t'ok'éhe sín. ¹⁰ Mé xikaha tí sín judío ntáche sín tí ch'in kuitohe jina kixin:

—Ije tí yaon t'ok'éheni ntá kohya kjuachaxin tsamá kaniáa —ichro sín.

¹¹ **A** ntá ntáchro tí ch'in a kixin:

—Tí nkexro kjuínchekitona jina mé k'uetuanna kixin tsjatsíyan kaniána la ko sátsjia —ichro ch'an.

¹² Ntá kjuanchankíhi sín ch'an kixin:

—¿Nkexéhe tí nkexro k'uetuanhan kixin tsjatsíyan kaniáa la ko sátsjia? —ichro sín.

¹³ **A** ntá tí ch'in tsíkitohe jina na í kjuátsoanhya ch'an tí nkexro kjuínchekitohe ch'an jina kixin ntaha la sín nchónhya chojni, a ntá ntahó k'uitjáyánxín ch'in Jesús. ¹⁴ **A** ntá chr'éxin ch'in Jesús xeta ch'an tí ch'in a nkaxenhen tí njnko jie ntá ntáchro ch'an kixin:

—Tsjehé kixin ijie la ó jina tjen jaha la í tjásinhya jie inaá. **A** ntá tí tsjásian jie inaá a ntá antsí má jinahya tsonhan —ichro ch'an.

¹⁵ **A** ntá sákjuí tí ch'in a ntá chénka ch'an tí sín judío kixin jehe ch'in Jesús mé kjuínchekitohe ch'an jina. ¹⁶ Mé xikaha tí sín judío kjuankixin sín chónkíhi sín tí ch'in Jesús la ko chrók'óyán sín ch'an kixin kjuínchekitohe ch'an chojni jina tí yaon t'ok'éhe sín. ¹⁷ Kjánchó ch'in Jesús ntáche ch'an tí jehe sín kixin:

—Méxra T'aná naxá tjech'e ch'an xra. **A** ntá janhan kjaxin tjét'a xra —ichro ch'an.

¹⁸ Méxra xikaha tí sín judío antsí tjinkaon sín chrók'óyán sín ch'an kixin kuitekakenhya ch'an tí ley kuente tí yaon t'ok'éhe sín la ko kjaxin ntáchro ch'an kixin tí It'é ch'an la mé Dios, mé xikaha ncheyóhe ch'an asén ch'an Dios.

Tí kjuachaxin chóna tí Xjeen Dios

¹⁹ Ntá ntáche ch'in Jesús tí jehe sín kixin:

—Ijnko nkehe tjeotan tsotjonkará kixin tí Xjeen Dios nkaya nkajní tí jehó kjuachaxin kuente ó la mé xitjahya sich'e xra. Jehó tí xra t'ikon ch'an tjech'e It'é ch'an mé kjaxin ch'an xikaha ch'e ch'an. ²⁰ **A** ntá tí It'é mé tjuéhe tí Xjeen ch'an, la ko tjakohe ch'an káin xín xra ch'e ch'an, la ko antsí tjeotan tí xra naxá tsjakohe ch'an kixin ntá tsochakonrá kixin ts'ikonrá tí xra sich'e ch'an. ²¹ Tí It'é mé chóna kjuachaxin nchexechón tí sín tsík'en la ko chjéhe ch'an sín kjuachón. **A** ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'an. ²² **A** ntá It'é la í sinchekitogexínhya ch'an ijie ninkexró. Káin tí kjuachaxin kuente ch'an chjéhe ch'an tí Xjeen kixin sinchekitogexín ch'an ijie chojni chjasintajni ²³ kixin ntá

kaín chojni tsjikosáyehe sín tí Xjeen éxí yóhë tjikosáyehe sín tí It'é ch'án. Tí sín tjikosáyehya tí Xjeen xíkaha kjaxin tjikosáyehya sín tí It'é kixin jehe ch'án mé tsichr'án tí Xjeen.

²⁴ 'Jnko nkehe tjetoan tsotjonkará kixin tí jnkojínrá tjeotinhínrá tí nkehe tjákua la ko tinkachónkirá tí T'aná, mé tí nkexro ichr'ánna, na mé xíkaha ó chontará tí kjuachón la ko tsjasótiahyará, na mé kuitohérá tí ntja chrók'uénxinrá, la ntá jie kjuankíxinrá tsochontará tí kjuachón jnkochrín. ²⁵ Jnko nkehe tjetoan tsotjonkará kixin ó tsi tí yaon, na mé jie tíha, mé xíkaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóhón sín. ²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoexín tí ijje chojni chjasintajni kixin jehe mé tí Xjeen Dios K'óna Chojni. ²⁸ Chrakonhyará tjetjonkará xíkaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án. ²⁹ A ntá ts'axrxjén sín tí tòye la tí sín kjuích'e sín xra jína mé tsoxechón sín ntá tsochóna sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'in Jesús

³⁰ Tí jehó kjuachaxin kuèntana xitjahya sít'a ninkehó xra. A ntá jie ntákitoxián tí ijje éxí k'uetuanna T'aná. A ntá tí nkehe ntákitoxián la jína ntoá kixin tjínkaxonhya sít'a éxí tjínkavan. Náhí. Éxí tjínkaon T'aná, tí nkexro ichr'ánna, mé xíkaha tjet'a. ³¹ A ntá tí chróxrjanka kixin nkexrí imá jína janhan la tíha la ninkehó kjuachaxin chróhóntahya. ³² Itjen í jnko nkexro tjechrónka nkexrí tjén janhan a ntá ó nóna kixin tí nkehe chrónka ch'án la sínkí. ³³ Jahará tsikétuènhénrá chojni kjuikjanchankíhi sín tí ch'in Juan kixin nkexrí nchi tjén janhan. A ntá tí nkehe tsíkatehe ch'án la chaxín ntoá tíha. ³⁴ Kjánchó chontiaxinhya tí nkehe tsochrónka nijnko chojni chjasintajni nkexrí nchi tjén janhan. Jehí ntáxrjan tíha kixin jahará jína chrókuaará. ³⁵ Tí ch'in Juan kjuák'e éxí yóhë jnko xrohi kjuák'eche k'uínkaséyanxín la ko jahará kócháhará xíkaha, kjánchó séhya kóxrjínhanrá tí xrohi a. ³⁶ Kjánchó síin nkehe antsi tjetoan tjakoxin nkexrí tjén janhan, a ntá kánhyó tjetoan tí nkehe tsíchronka tí ch'in Juan. Tí xra tjet'a, mé tí xra kjuanjon T'aná sít'a tsjixinna tí xra, na mé tíha mé tjakoxin kixin chaxín T'aná tsichr'án k'uinka. ³⁷ Kjaxin jehe T'aná, tí nkexro ichr'ánna, mé chrónkaxin ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uikonhyará ch'án ³⁸ la ko kjaxin itén ch'án kuitohéhya nkaya kjárá kixin tjínkaxonhyará tsitékaonrá tí Xjeen Dios tsichr'án tsíki. ³⁹ Jahará nchekuáxinrá jína tí xroon tsíkjin tí sín tsíchronka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuènte janhan. ⁴⁰ Kjánchó jahará tjínkaxonhyará tsochjinará tí tjén janhan kixin chrók'uayéhérá tí kjuachón a.

⁴¹ Janhan na tjéyáhya kixin chojni chrókjuikosáyana sín. ⁴² A ntá janhan ó nóna kixin jahará la tjuèhyará Dios. ⁴³ Mé k'uinkaxian janhan tí kjuachaxin kuènte T'aná. Kjánchó jahará la títekákonhyará. A ntá tí chrókui í jnko nkexro kjuachaxin chrókuakitsjenixin asén ó, a ntá tíha mé tjínkaonrá chrókuitekákonnénrá. ⁴⁴ ¿Nkexrí chrókuitekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin

chrókjuanjon jnkokoá Dios? ⁴⁵ Tsontáchröhyará kixin janhan tsjáncchá jie tí jahará nkayakon T'aná. Náhi. Ch'in Moisés mé tsjanchia ch'an jie tí jahará kixin tsontáchrórá kixin jehe ch'an kuinkachónkirá. ⁴⁶ Kja tí jahará chrókuítekáonrá nkehe tsintáchró ch'in Moisés ntá chrókuítekáonrá tí janhan kixin tí xroon tsíkjin ch'an mé chrónka kuente tí janhan. ⁴⁷ A ntá tí titekákonhyará tí nkehe tsíkjin ch'an, ¿ntá nkexrí chrókuítekáonmará nkehe ntáxrjan janhan? —ichro ch'an.

6

Ch'in Jesús kjuanjon ch'an nkehe kjóne in'ó mil chojni

(Mt. 14.13-21; Mr. 6.30-44; Lc. 9.10-17)

¹ A ntá chr'éxin ntá sákjuí ch'in Jesús k'uatòye ch'an tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uíkon sín tí kjuaxroan jie kjuasin ch'an kjuínchekitöhe ch'an jína tí sinníhi. ³ A ntá jehe tí ch'in Jesús chr'in ch'an ijnko jnā na ntá ntaha kjuák'etjāxin ch'an la koí tí sín k'uájiko ch'an a. ⁴ A ntá í séhya ts'ixín tí kia pascua a mé kié tí sín judío a. ⁵ A ntá tí ch'in Jesús k'uíkon ch'an kixin nchónhya chojni chr'in sín kjuichréhe sín ch'an ntá kjuanchankíhi ch'an tí ch'in Felipe kixin:

—¿Nketí chrók'uenani nkehe sine kaín tí chojni a? —ichro ch'an.

⁶ Mé xíkaha ntáchró ch'an kixin siná nkehe tsixro ch'in Felipe. A ntá tí ch'in Jesús la ó nohe ch'an nkehe tí kjuaxroan tsjasin ch'an. ⁷ Ntá kjuátēhe ch'in Felipe ntáchró ch'an kixin:

—Kjonté doscientos chichaon denario chróchóntani chrók'uínáxin tí niotja la naxā chrókjuachahya chrók'uáyēhe jnkojnko sín tot'ò tí niotja a —ichro ch'an.

⁸ A ntá ch'in Andrés, ijnko tí sín k'uájiko ch'in Jesús la savé mé ch'in Simón Pedro mé ntáchró ch'an kixin:

⁹ —Ntíhi tjen ijnko xjan ntoa chóna in'ó niotja tsík'óna noa cebada la ko chóna ch'an yaá koche. ¿Xá chrókjuacha tíhó kixin nchónhya chojni síin? —ichro ch'an.

¹⁰ A ntá ntáchró ch'in Jesús kixin:

—Tétuēnhén tí sín síin a kixin ts'ixitjāxin sín —ichro ch'an.

A ntá nchónhya ika yoa síin na ntá ntaha k'uixitjāxin sín na mé éxi in'ó mil chojni k'uixin sín. ¹¹ A ntá ch'in Jesús kuákja ch'an tí niotja ntá kjuanchehe ch'an Dios kjuasáya ntá chjéhe ch'an tí sín k'uájiko ch'an. A ntá jehe sín k'óxikeyehe sín chjéhe sín kaín tí sín sitjāxin a. Xíkaha kjāxin k'óxikeyehe sín tí koche. A ntá kaín sín kjóne sín éxi tjinkaon sín. ¹² Kjuixin kjóne sín ntá k'uetuēnhen ch'in Jesús tí sín k'uájiko ch'an ntáchró ch'an kixin:

—Tjénájínrá tí nkehe tot'ò síxēhe sín kixin ts'itjāyanhya ninkehó —ichro ch'an.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ò tí in'ó niotja tsík'óna noa cebada síxēhe sín tí kjuixin tsíkjine sín. ¹⁴ A ntá tí sín kjóne tí niotja k'uíkon sín tí kjuaxroan jie kjuasin ch'in Jesús ntáchró sín kixin:

—Jehe ch'an mé chaxín tí nkexro tsíchr'an Dios kixin itsi tí chjasintajni tsjakoheni ch'an —ichro sín.

¹⁵ Kjánchó ch'in Jesús mé kónohe ch'an kixin tjinkaon sín sáchrókjuiko sín ch'an chróchr'áxēnhen sín ch'an tí xrā rey kixin chrók'uetōan ch'an. A ntá jehe ch'an tjinkakonhya ch'an tíha ntá jehó ch'an sáxíkji ch'an nteje inaá kjuák'e ch'an ntíha.

Éxi ijnko ntja xikaha kjuítaón ch'ín Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jnā sákjuí sín chrínta ntayaon ¹⁷ k'uit'ótjen sín ijnko ntabárcō kjuankíxin sín ts'atòye sín ntayaon sátsji sín chjasin Capernaum. Na ó k'uíxin tie na naxā kjanhya ch'ín Jesús. ¹⁸ Ntá kjuankíxin chjéhe xrintō tsankā ntá kjuankíxin tinkákjaminkí ntá. ¹⁹ A ntá tió kjuacha sín á in'ó o injon kilómetro ntá xrināhya k'uikon sín tí ch'ín Jesús tinkákóchjinehe ch'án tí ntabárcō, éxi ijnko ntja tjetjitaón ch'án tí ntā, ntá k'uikon sín ntá imá chrakon sín. ²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcō. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuitōhe tóhe ntayaon na mé ó nohe sín kixin jnkokoáxón ntabárcō k'uékjak'e ntiha la ko ó nohe sín kixin ch'ín Jesús kjá ní sátsikjihohya sín ch'án na mé k'uikon sín kixin jehó tí sín k'uájiko ch'án sátsíkji sín. ²³ Kjánchó sín ntabárcō tixín chjasin Tiberias tinkákóchjinehe tí nó kjónexín sín tí niotja kjuanchaxín ch'ín Jesús kjuasáyé Dios. ²⁴ A ntá tió k'uikon sín kixin kohya ch'ín Jesús la ko kjaxín kohya tí sín k'uájiko ch'án, ntá jehé sín mé k'uit'ótjen sín iso ntabárcō ntá sákjuí sín chjasin Capernaum sákjuíkjeyá sín tí ch'ín Jesús.

Ínchéni Jesús mé éxi niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro ntá.

²⁶ Ntá kjuátēhe ch'ín Jesús ntáchro ch'án kixin:

—Ó nòna kixin jahará tjéyará tí janhan kixin kjónterá niotja kókjahará, la jehya kixin kiénxínrá tí kjuaxroan kjuásian. ²⁷ Chrókjuich'ehyará tí xřá chrók'uite tí nkehe chrókjónterá tjoka tsjeje ó. Náhi. Chrókjuéyará tí nkehe chrókjuejehya chrókjónterá chrók'uayéxínrá tí kjuachón jnkochrixín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjáoxín ch'án kixin tí Xjeen ch'án mé chóna kjuachaxién tí jehé ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokuinchexiteyáni nkexrí tjinkaon Dios? —ichro sín.

²⁹ A ntá kjuátēhe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuákgéxianni chrók'uikonni kixin ntá chrókuitekaonni tí jaha? ¿Nkehe tí xřá ch'e jaha? ³¹ Tí sín tsík'axrjeníxinni k'uéjō sín ósé mé kjóne sín maná k'óna niotja tió k'uíxin sín nteje mé xikaha tí xroon kuénte Dios tsíkjin ijnko nkexro ósé ntáchro kixin: “Kjuanjon ch'án tí nkehe kjóne sín mé niotja tsíkixín nkaya nkajní”^{*} —ichro sín.

³² A ntá kjuátēhe ch'ín Jesús ntáchro ch'án kixin:

—Ijnko nkehe tjeoan tjonkará kixin jehya ch'ín Moisés kjuanjon tí maná k'óna niotja k'uínkajinxín nkaya nkajní. Náhi. T'aná mé tjetjanjon tí niotja

* 6:31 Salmo 78.24

chaxín jína k'uínkajinxín nkaya nkajní. ³³ Tí nioṭṭja tjanjon Dios mé tí nkexro k'uínkajinxín nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Ìnchéni, jnkochrixin chjehéni tí nioṭṭja a —ichro sín.

³⁵ A ntá ntáchro ch'ín Jesús kixin:

—Janhan mé tí nioṭṭja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

³⁶ Kjánchó éxi k'uétjonkará senó na ó k'uikonrá tí janhan na kjónté naxa titekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuanhya sín kixin sátsji sín.

³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhi. K'uinka kixin chrókjuít'a tí xra tóxrjínhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sintak'itjáyanhya ninkexró tí sín chjina ch'án na mé tjinkaon ch'án kixin janhan mé sintaxechón kaín sín tí yaon tsjixixín. ⁴⁰ Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrixin. A ntá janhan sintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'ín Jesús kixin tsintáchro ch'án kixin jehe ch'án mé tí nioṭṭja k'uínkajinxín nkaya nkajní. ⁴² Mé ntáchro sín kixin:

—¿A jehya tí Jesús, it'é mé it'ín José, na mé chóxinni tí it'é la ko tí iné ch'án? ¿Ntá nkekuénté ntáchro ch'án kixin nkajní k'uínkajinxín ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Tjotóhérá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókjuínkítahya T'aná. A ntá tí sín tóchjina na mé sintaxechón sín tí yaon tsjixixín. ⁴⁵ Na mé tí sín k'uechrónka itén Dios ósé mé tsíkjin sín xroon ntáchro kixin: “Dios mé tsjakohe ch'án kaín chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sítóchjina sín tí tjén janhan.

⁴⁶ Jehya kixin itjen ijnko chojni tsík'ikon T'aná. Náhi. Jehó tí nkexro kujxin tí tjén Dios mé tsík'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrixin. ⁴⁸ Janhan na mé tí nioṭṭja tjanjon kjuachón. ⁴⁹ Tí sín k'uaxrjenixinrá k'uejó ósé kjóne sín tí maná k'óna nioṭṭja tió k'uejó sín nteje, a ntá kjónté ik'ueén sín k'uitjayan sín. ⁵⁰ Tí nkehe xrjanka mé tí nioṭṭja k'uínkajinxín nkaya nkajní, a ntá tí sín sine tí nioṭṭja a mé ts'enhya sín. ⁵¹ Janhan mé tí nioṭṭja tjechón k'uínkajinxín nkaya nkajní. A ntá tí sín sine tí nioṭṭja a mé ts'ejóchón sín jnkochrixin. Tí nioṭṭja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

—¿Nkexrí chrókjuanjon ch'án ntóe ch'án chrókóneni? —ichro sín.

⁵³ A ntá kjuátehe ch'ín Jesús ntáchro ch'án kixin:

—Ntá tsotjonkará kixin tí sintehyará ntóe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí sinterá ntóna la ko it'irá jnina ntá tsochontará kjuachón jnkochrixin la ko janhan mé sintaxechónrá tí yaon tsjixixín. ⁵⁵ Kixin ntóna na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntóna la ko it'i sín jnina mé jnkokoá tjenkayáxinkian sín la ko janhan mé xríkian sín. ⁵⁷ T'aná tsíchr'án

ch'án tí janhan mé chóna kjuachaxin, a ntá janhan mé tjéchonxian tí jehe ch'án. Ntá tí sín sine tí ntona mé ts'ejóchónxin sín tí janhan. ⁵⁸ A ntá tjénixja kuénte tí niotja k'uínkajinxin nkaya nkajni na mé yóghya tí maná tsík'óna niotja kjóne tí sín tsík'axrjenixinrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajni ntá ts'ejochónrá jnkochrín —mé chro ch'in Jesús.

⁵⁹ Kaín tíha mé kjuakohe ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'in Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'in Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkebro chrókuinhin tíha? —ichro sín.

⁶¹ A ntá kónohe ch'in Jesús kixin xikaha tóxakonhen sín kíenxínhya sín tí nkehe tsintáchro ch'án ntá kjuanchankíhi ch'án sín kixin:

—¿Á kjaxinrá tjinkákonhyará tsinhínrá tíhi? ⁶² ¿Ntá nkebrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuénte tí Nchakuen Dios na mé tjejóchónxin chojni. ⁶⁴ Kjánchó isorá naxa titekákonnahyará —ichro ch'án.

Mé xikaha ichro ch'án kixin tí xrankixín ó kónohe ch'án kixin nkebro tí sín tsitekakuenhya sín ch'án la ko kónohe ch'án kixin nkebro sinchekji ch'án. ⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkítsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'in Jesús ntá xrinahya kuítóhe sín, í chrèhya sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'in Simón Pedro kixin:

—Jaha Inchéni, ¿nkekuénté tjanchankíhíni á sáchrókjuini ókjé? Jaha tí tan chronka a mé tsochóntaxíni kjuachón jnkochrín ⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'in Jesús ntáchro ch'án kixin:

—Janhan kjuéyá tí kaín rá teyórá la ko jnkojínrá ntihi mé tsónará ijnko jínahya —ichro ch'án.

⁷¹ Tíha mé t'axrjéxin tí ntáchro ch'in Jesús chrónka ch'án kixin ch'in Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'in Jesús.

7

Tí sín jnkokoá kichó ch'in Jesús mé kuítekakuenhya sín ch'án

¹ Ntá kjuixin tíha ntá k'uáji ch'in Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé its'van tsjasixin sín kia.* ³ A ntá tí sín kichó ch'in Jesús ntáche sín ch'án kixin:

* 7:2 Levítico 23.34

—Chrókuitoahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tió tjínkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhí. Chrók'uikon kaín xín chojni síin chjasintajni —mé chro sín.

⁵ Xikaha ntáchro tí sín kichó ch'án kixin kjaxin jehe sín titekakuenhya sín tí jehe ch'án. ⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuéntana tsjásian kjuaxroan. Ntá jahará la cualquier hora tjínkáonrá jina chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jina tí nkehe tjejóch'e sín. ⁸ Jahará la sájtírá tí kia a. A ntá janhan la tjíhya kixin naxa kjuixrakáhya tí hora kuéntana —ichro ch'án.

⁹ Mé xikaha ntáchro ch'án ntá kuítóhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jina ch'án”; kjánchó í so sín ntáchro sín kixin: “Jehya chojni jina ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xikaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí nínko jié ntá kjuankixin ch'án kjuako ch'án. ¹⁵ A ntá tí sín judío chakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakóehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuéntana na mé tí xra kuénte tí nkexro tsíchr'ánna k'uinka. ¹⁷ Tí jnkojinrá tjínkáonrá chrókjuínchexiteyéherá éxi tóxrjínjin Dios la tsonohará á chaxín kuénte Dios tí nkehe tjákua o á kuéntana tíha. ¹⁸ A ntá tí nkexro tjako tí nkehe t'axrjeníxin kja sín ó mé xikaha ch'e kixin tjínkaon sín kixin tí chojni ó mé chróchéntehé sín ch'án kjuasáya. A ntá tí nkexro tjínkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra nkekuénte tjínkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chakonrá.† ²² A ntá ch'ín Moisés tsík'etoan kixin xjaanrá ntoa itsa xjan xroye, (kjánchó jehya ch'ín Moisés kjuankíxin ch'án kjuako ch'án tíha, na mé tí sín tsík'axrjeníxinrá kjuankíxin sín kjuako sín tíha). Mé xikaha nchekará xjan tí xroye a kjónté yaon t'ok'éheni. ²³ A ntá xikaha nchekará xjan xroye tí yaon t'ok'éheni kixin

† 7:21 Juan 5.2-9

xikaha chrókjuinçek'itjáyankíhyará ninkehó tí nkehe k'u'etqan ch'ín Moisés, ¿ntá nkekuènté kixin ninkákonnará tí janhan kixin kjuintakítóhā jína ijnko chojni tí yaon t'ok'éheni? ²⁴ Chrókjuanchahyará jié kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínhñ Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

²⁵ A ntá iso sñn chjasin Jerusalén kjuankíxin sñn kjo sñn kichó sñn kjuanchankí sñn kixin:

—¿Á jehya tí ch'ín a xritjeyá sñn chrók'óyán sñn? ²⁶ Ntá jie noxín tjen ch'án nixja ch'án kohya ninkexró nínkakonhen ch'án. Kjá tí síxreé titekaon sñn kixin tí nkexro a chaxín Cristo tíha. ²⁷ Kjánchó ó noheni nketí tsíkjiixin ch'án. A ntá tió tsi tí nkexro Cristo ntá ninkexró tsoñoehya nketí tsjxin ch'án —ichro sñn.

²⁸ A ntá ch'ín Jesús kjuák'ekjako ch'án tí nínko jié ntá kuínhin ch'án kixin xikaha kjo sñn, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjiixian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajíní. Jahará naḡa chonhyará tí nkexro a. ²⁹ Janhan la choxian ch'án kixin ntaha tsík'inkaxian na mé jehe ch'án mé tsichr'ánna ch'án —ichro ch'ín Jesús.

³⁰ Ntá chrótsé sñn ch'án chrókjuak'echjina sñn ch'án ntá kjónté ninkexró tséhya sñn ch'án kixin naḡa kjuanjonhya Dios kjuachaxin chrótsé sñn ch'án.

³¹ Kjánchó itsjé chojni kuítekaon sñn tí jehe ch'án. A ntá ntáchro sñn kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sñn.

Tí sñn fariseo ichr'án sñn chojni policia tsotsé sñn tí ch'ín Jesús tsjak'echjina sñn ch'án

³² A ntá tí sñn fariseo kuínhin sñn nkehe tí ntáchro chojni kixin nkexrí tjen ch'ín Jesús, ntá jehe sñn la ko tí sñn nchát'á t'etqan k'u'etuenhen sñn iso sñn policia kuènte nínko tsotsé sñn ch'án tsjak'echjina sñn ch'án. ³³ A ntá ntáchro ch'ín Jesús kixin:

—Kjxin í séhya tsjak'é ntíhi ts'ejóni ntá sáxikjiya tí tjen tí nkexro ichr'ánna.

³⁴ A ntá jahará tsjeyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sñn judío kjuankíxin sñn kjuanchankíhi sñn kichó sñn kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sñn judío tjejóyákjan tí sñn nixja nkíva griego kixin ntá tsjakóhe ch'án tí sñn griego? ³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sñn.

Ntarío tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kjá tí jnkojínrá ik'uénrá ntā xrákirá its'irá ntā. ³⁸ A ntá éxí ntáchro xroon Itén Dios kixin tí sñn titekaon sñn tí janhan na mé nkaya asén sñn ts'óna ijnko río ts'axrje intā tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxa tíhya tí Nchakuen Dios kixin ch'ín Jesús naxa sátjihya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuénté chrókjuixín Galilea tí nkexro Cristo? ⁴² Tí xroon tsíkjin sín ósé mé chrónka kixin tí nkexro Cristo mé ts'axrjeníxin tí sín k'uaxrjeníxin tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kaín sín kixin nkexro tí ch'ín Jesús. ⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuich'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuénte nínko mé kjan sín tí tjejó tí sín fariseo la ko tí sín nchat'á t'etqan. Ntá tí sín a mé kjuanchankíhi sín tí sín policia kixin:

—¿Nkekuénté kjuikoahyará ch'án? —ichro sín.

⁴⁶ Ntá kjuátehe tí sín policia kixin:

—Kohya ninkexró nixja éxi xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kuítóhéra kjuít'ayahará ch'án? ⁴⁸ ¿Á kuítekaon tí jehe ch'án jnkójín tí sín t'etqan kuénténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuénténi la kohya kjuachaxin sinchekjasóteni ijnko chojni tí naxa kíenhyani nkehe nixja ch'án la ko kíenhyani tí jié kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuíxian estado Galilea ní? Nchekuáxian tí xroon itén Dios ntá tsonoha kixin nijnko tí sín k'uéchrónka itén Dios tsíkji xínhya sín tí estado Galilea —ichro sín.

Ijnko tjan kjuasin jié chóna ókjé chojni ntoa

⁵³ Ntá jnkójnko tí sín xíka sín sákjuí sín ntqé sín.

8

¹ Ntá ch'ín Jesús mé sákjuí ch'án tí jnā Olivo. ² Ntá tí kóyaon nchítjen ikjan ch'án k'uixenhen ch'án tí nínko jié a la ko kaín xín tí chojni mé kóchjinehe sín ch'án. Ntá kjuák'etjaxín ch'án kjuankíxin ch'án kjuako ch'án. ³ Ntá tí sín tjako tí ley la ko tí sín fariseo mé kjuikqao sín ijnko tjachjín kónoxíxin kixin chóna tjan ókjé chojni ntoa. Ntá kjuak'e sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxíxin kixin kjuasin tjan jié chóna tjan ókjé chojni ntoa. ⁵ A ntá tí ley tsíkjin ch'ín Moisés mé t'etqan kixin ixro chrók'óyáxninni tí chojni chjín xikaha ch'e. ¿A ntá jaha, nkechrúa? —ichro sín.

6 Mé xíkaha ichro sín kixin tjinkaon sín kixin ách'e ntoáhya chrókjuatêhe ch'in Jesús ntá chrókjuanchia sín jie. Ntá ch'in Jesús mé k'uisén ch'an kjinxin ch'an dedo tja ch'an nonte a. 7 Ntá naxá tinkákjanchankíhi sín ch'an. Ntá k'uínkatjen ch'an k'uetōan ch'an kixin:

—Xá nkexro tí tjeorá ntihi chóntahya ninkehó jie mé saoxín chróchjéhe sín tjan xro —ichro ch'an.

8 Ntá xík'isén ch'an inaá ikjin ch'an tí nche inaá. 9 Ntá tí sín a mé kuínhin sín tí nkehe k'uetōan ch'in Jesús ntá kósuêhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'in antsí má táda ch'an sákjuí ch'an, ntá kaín tí sín í so a sákjuí sín kjaxin sín.

Ntá jehó tí ch'in Jesús la ko tí tjan a kuitōhe sín ntiha. 10 Ntá xrentoá ch'an la kjuanchankíhi ch'an tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'an.

11 Ntá ntáchro tjan kixin:

—Náhi, Ìnchéni, ninkexró —ichro tjan.

Ntá ntáchro ch'in Jesús kixin:

—Kjaxin janhan sjintakjasótiahya. Sátjia la í tjásinhya jie inaá —ichro ch'an.

Ch'in Jesús mé xrohi t'inkaséyanxín chjasintajni

12 Ntá ch'in Jesús xínixjehé ch'an tí sín tsíkóchjina inaá ntáchro ch'an kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítié a —ichro ch'an.

13 Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

14 Ntá kjuátêhe ch'in Jesús ntáchro ch'an kixin:

—Janhván tjetjonkará nkexrí tjen na kjónté chaxín xrjanka kixin ó nòna nketí nó k'uinkaxian la ko nòna nketí sátsjijá. A ntá jahará noahyará nketí k'uinkaxian la ko noahyará nketí sátsjijá. 15 Jahará la éxí chojni chjasintajni ó tékará jie. A ntá janhan la tékahya jie ninkexró. 16 Kjánchó ntoá chrókjuintakitōaxián ijíé chojni kixin jehya janhván t'á tíha, T'aná tjékian, na mé tí nkexro k'uetōanna k'uinka ntihi na mé jehe ch'an mé tjékian ch'an ntihi ntakitōaxínkian ijíé chojni. 17 A ntá tí ley tsíkjin ch'in Moisés mé ntáchro kixin tí tsonoxín iyó sín tsochrónka á chaxín xíkaha tsíkónhen ntá chrókuitekaon chojni. 18 Ntá janhan na mé tjéxrjanka nkexrí tjen janhan la ko kjaxin T'aná mé tí nkexro k'uetōanna k'uinka mé jehe ch'an kjaxin chrónka ch'an nkexrí tjen janhan —ichro ch'an.

19 Ntá kjuanchankíhi sín ch'an kixin:

—¿Nketí tjen It'á? —ichro sín.

Ntá kjuátêhe ch'in Jesús ntáchro ch'an kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'an.

20 Mé xíkaha chro ch'in Jesús tí kjuák'ekjakoqxín ch'an tí nínko jíé chjino ntacajón tjetóxroyéya chichaon tjanjon sín. Kjánchó ninkexró tséhya sín ch'an kixin naxá kjuixrakáhya tí hora tsotsé sín ch'an.

“Xitjahya tsjasánrá tí nó sátsjijá janhan”

21 Ntá ch'in Jesús ntáche ch'an sín inaá kixin:

—Ntá sátsjijá janhan. Ntá jahará tsjéyará tí janhan, ntá tió ts'énrá naxá yamára ijjára. Xitjahya tsjasánrá tí nó sátsjijá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjjini tí nó sátsji ch'án? —ichro sín.

²³ Ntá ntáche ch'ín Jesús tí jehe sín kixin:

—Jahará la nonte ntíhi k'uaxrjénixínrá. A ntá janhan la nkaya nkajni k'uaxrjénixián. Jahará la kuènte chjasintajni ntíhi. A ntá janhan la janhya kuènte chjasintajni. ²⁴ Mé xikaha tjonkará kixin tió ts'énrá naxá tsochontará ijjára kixin tí tsitékákonyhará tí janhan, mé tí nkexro xráxín tjen,* ntá kjónté ts'énrá naxá tsochontará tí ijjára —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankixixín kjuankixian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókjuíntakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'án la chaxín. A ntá jehó tí nkehe kuínhan chrónka ch'án mé tjákoqha tí sín chjasintajni —ichro ch'án.

²⁷ Kjánchó jehe sín mé kíenxínhya sín kixin nixja ch'án kuènte It'é ch'án tjen nkaya nkajni. ²⁸ A ntá ntáchro ch'án kixin:

—Tió sìnchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjen.† Ntá tsonohará kixin jehya janhan tétóan tí xra jtét'a. Náhi. Jehó tí nkehe kjuakona T'aná mé jtétjaku. ²⁹ Tjékian tí nkexro k'uetuanna k'uinka kixin jehí xráxín T'aná la kuítónahya janhván kixin xráxín ntaxitéyáha tí nkehe tóxrjínhin ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehe ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsítóhe sín ijje sín

³¹ Ntá nixjehe ch'ín Jesús tí sín judío kuinkáchónki sín ch'án ntáchro ch'án kixin:

—Tí tsitóéhyará tí tan kjuákohará ntá jahará chaxín discípulo kuèntana ³² la ko tsjatsóanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsókohya nkehe ts'inkákonhen —ichro ch'án.

³³ Ntá kjuátehe sín ntáchro sín kixin:

—Jeheni mé tsík'axrjénixinni ch'ín Abraham na í xráxín kohya nkexro k'uena tí jeheni. ¿Nkekuèté ntáchrúa jaha kixin ts'áyéheni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjétjonkará kixin tí sín tjasin jie mé éxí chojni k'uíná chrokjuahya tsítóhe sín ijje sín. ³⁵ A ntá ijnko chojni k'uíná la jnkochrínxínhya tsjak'e ch'án tí ntepe tí nkexro a. A ntá tí xjeen tí nkexro na mé jnkochrínxín tsítóhe ntíha. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsókohya nkehe ts'inkákonhen. ³⁷ Ó nóna kixin jahará tsík'axrjénixínrá ch'ín Abraham. Kjánchó tjinkáonrá chrók'oyánrá tí janhan kixin títekákonyhará tí nkehe tjéxrjanka. ³⁸ Janhan xrxjanka tí nkehe k'uikuqan kixin nkexrí tjen T'aná. A ntá jahará tjejonchexitéyéhérá tí nkehe kuínhínrá chrónka it'ára —ichro ch'án.

* 8:24 Éxodo 3.14 † 8:28 Éxodo 3.14

³⁹ A ntá jehe sín kjuátêhe sín ntáchro sín kixin:

—It'eni mé ch'in Abraham —ichro sín.

Kjánchó ntáchro ch'in Jesús kixin:

—A ntá tí jahará chrókóchaxín xjeen ch'in Abraham ntá chrókjuich'erá éxi kjuich'e ch'án. ⁴⁰ A ntá tjétjonkará tí tan chaxín kujnhan chrónka Dios na kjónté chrók'oyánrá tí janhan. A ntá ch'in Abraham xikahya kjuich'e ch'án. ⁴¹ Jahará tjejoch'erá éxi kjuich'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'eni mé Dios —ichro sín.

⁴² Ntá ntáche ch'in Jesús tí jehe sín kixin:

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjenixinna Dios k'uinkaxian tí tjen ch'án. Jehya kixin janhván k'uinka. Náhí. Dios mé ich'ránna k'uinka. ⁴³ ¿Nkekuénté kixin tiénxinhyará tí nkehe tjonkará? Jehí tjinkákonhyará chrókuinhinrá tí nkehe xrxanka. ⁴⁴ Jahará mé xjeen Tsochren la ko jahará tsik'axrjenixinrá ch'án la ko tjinkáonrá sinchexiteyará tí nkehe tjinkaon ch'án. Tsochren mé xrankixixín kjuaya ch'án. Nunca k'uénixja ch'án ntoá. Xraxín ch'ia ch'án kixin xikahó tjenkayáxin ch'án. Jehe ch'án mé it'é kain tí kjuach'ia. ⁴⁵ A ntá janhan tjétjonkará nkehe ntoá ntá útekákonahyará. ⁴⁶ ¿Á tjejorá jnkójnra nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuénté útekákonahyará? ⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonhyará chrókuinhinrá itén ch'án —ichro ch'in Jesús.

Cristo la ó xráxin tjen ntá chr'éxin kjuá'e ch'in Abraham

⁴⁸ A ntá tí sín judío ntáche sín tí ch'in Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátêhe ch'in Jesús ntáchro ch'án kixin:

—Janhan chontahya ninkehó nchakuen tí jínahya. Tí xra t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáha nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jie tí sín kuítekakohya. ⁵¹ Imá tjetóan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'án.

⁵² Ntá kjuátêhe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'in Abraham la ko kain tí sín k'uéchrónka itén Dios ósé la mé ik'uén sín. Ntá jaha ntáchrúa kixin tí tsítekaonni tí nkehe tjákua jaha ntá í ts'énhyani, ichrua. ⁵³ ¿Xá imá tétóan jaha la ntá kánhyó t'etóan it'eni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátêhe ch'in Jesús ntáchro ch'án kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrórá kixin jehe ch'án mé Dios kuéntará. ⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyóna tí jahará chrókjuít'ayahará. Kjánchó janhan na choxian ch'án la ko ntáxiteyáha tí nkehe t'etóan ch'án. ⁵⁶ Ch'in Abraham tí nkexro tsik'axrjenixinrá la imá kóchéhe ch'án kixin ts'ikon ch'án

tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha *naxa* chontahya cincuenta nánó, ¿na ntá nkekuènté ntáchrua kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjeotan tí nkehe tjétjonkará kixin *naxa* kohya ch'ín Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'ín Jesús. Kjánchó kjuák'emá ch'án nínko ntá chr'éxin k'uaxrxjén ch'án ntiha. K'uátsínka ch'án jnkqsiné tí tjejó sín sákjuí ch'án.

9

Ch'ín Jesús kjuínchekitøhe jína ijnko ch'ín tsíkokjéxín t'ikonhya ch'án

¹ K'uátsínka sín ijnko ntja ntá k'uíkon ch'ín Jesús ntiha tjen ijnko ch'ín tsíkokjéxín t'ikonhya ch'án. ² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuènté tsíkokjéxín ch'án t'ikonhya ch'án? ¿Á ijje it'é o iné ch'án o á ijje ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijje ch'án la ko jehya ijje it'é la ko iné ch'an. Náhí. Jehí xíkaha tsíkónhen ch'án kixin tí kjuachaxién Dios tsjakoxin kixin tsitoexín ch'án jína.

⁴ Naxa nchakotjin t'ichjánxin sít'a tí xra tjinkaon tí nkexro tsíchr'anna. Ntá ts'ixin tie ntá kohya ninkexró tsjacha sich'e xra. ⁵ Naxa itjén janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kujíte ch'án ntaten ch'án intsi nche k'óna nchet'ò ntá kuátematóxin ch'án ikon tí ch'ín t'ikonhya. ⁷ Ntá k'uetuenhen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnjé Siloé mé t'axrxjén nkívee sín kixin K'uítuenhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án. ⁸ Ntá tí sín ntøe chjinaxón ntøe ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxín ch'án k'uékjanchak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuích'èna ch'án nchet'ò kuátematóxin ch'án kuan la ntá k'uetuanna ch'án kixin satsjia ti pila tjiá ntá nchek'in sín Siloé ts'ontia kuan, ichro ch'án. Ntá sákjuia k'ontia, ntá xrínahya ó k'uíkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuátehe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítóhe jína

¹³ Ntá tí sín a sákjuiko sín tí ch'ín k'uék'ikonhya sákjuíchréhe sín tí sín fariseo a. ¹⁴ A ntá tí yaon t'ok'éhe sín mé tsík'jich'éna ch'ín Jesús tí nchet'o kjuínchekitoexín jína tí ch'ín k'uék'ikonhya. ¹⁵ A ntá tí sín fariseo xík'janchankíhi sín ch'án inaá kixin nkexrí kuítóhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxin ch'án nchet'o kuən, ntá k'ontia kuən ntá jie t'íkuən —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuente Dios kixin chónthaha ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí chónthaha ch'án jie? —ichro sín.

Mé xíkaha jnkokónhya kjuenkayáxin tí jehe sín. ¹⁷ Ntá xík'janchankíhi sín tí ch'ín k'uék'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátehe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyehé sín tí it'é la ko tí iné tí ch'ín tsíkitohe jína.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrórá kixin tí tsíkokjéxin ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátehe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxin ch'án t'ikonhya ch'án. ²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jína. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuítóhe ch'án jína —ichro sín.

²² Mé xíkaha kjuátehe tí it'é la ko tí iné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxin ts'ixenhen nínko tí sín titekaon kixin ch'ín Jesús mé tí nkexro Cristo. ²³ Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyehé tí sín judío tí ch'ín k'uék'ikonhya ntá k'uuetuēnhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chónthaha ch'an jie —ichro sín.

²⁵ Ntá tí ch'ín k'uék'ikonhya kjuátehe ch'án kixin:

—Nonahya á chónthaha ch'án jie o á chónthaha ch'án jie. Jnkokoá nkehe nóna kixin senó k'uék'ikonhya ntá jie t'íkuən —ichro ch'án.

²⁶ Ntá xík'janchankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

²⁷ Ntá kjuátehe ch'án ntáchro ch'án kixin:

—Ó kjuixin tjonkará kjánchó titekákonhyará. ¿Nkekuenté tjinkáonrá kixin tsotjonkará inaá? ¿Á kjáxinrá tjinkáonrá tsochréhérá ch'án? —ichro ch'án.

²⁸ Ntá kóninkakonhen sín ch'án la k'uántaxínhjin sín ch'án la ko kjuátēhe sín kixin:

—Jaha la chréhé tí chojni a. A ntá jeheni na chréhēni tí nkehe k'uetōan ch'ín Moisés. ²⁹ Ó noheni kixin Dios k'uénixjēhe ch'ín Moisés. A ntá tí ch'ín a la noehyani nketí tsíkijxin ch'án —ichro sín.

³⁰ Ntá kjuátēhe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonna. A ntá jahará ntáchrórá kixin noahyará nketí tsíkijxin ch'án. ³¹ Ó noheni kixin tienhya Dios tí nkehe tjanchia tí chojni chóna jje. Jehó tinhin ch'án tí nkehe tjanchia tí sín titekaon Dios la ko nchexitéyēhe sín tí nkehe tjinkaon ch'án. ³² Nunca kienhyéni kixin ijnko nkexro chrókjuinçek'ikon ijnko chojni tsíkokjéxín t'ikonhya. ³³ A ntá tí nkexro a tí chrókujixinhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátēhe tí sín fariseo ntáchro sín kixin:

—Jaha la nchónhya jje chonta tió kokjíha. A ntá jie zá tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjéxín ch'án tí n̄nko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xikaha k'uetuēhen tí sín judío kixin ts'axrjéxín n̄nko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátēhe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátēhe ch'ín Jesús ntáchro ch'án kixin:

—Ó k'uikuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijje kuítekavan tí jaha Inchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoaxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uéjontaxín kuínhin sín kixin xikaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuátēhe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chróchontahyará jje. Kjánchó ntáchrórá kixin t'ikonrá. Méxra chontará jje —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kixin:

—Imá tjeotan tí nkehe tjetjonkará kixin tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xichee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjēhe ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé tsjatsōan va itén

ch'án. Ntá t'iyexin ch'án jnkojnko ihnié jnkojnko tí kolélo kuènte ch'án ntá ts'axrjexín va ntøe va. ⁴ Ntá t'ikon ch'án kixin k'uaxrje kaín va ntá kuítõnhen ch'án va ntja ntá tinkáchréhe va kixin tjatsõan va itén ch'án. ⁵ Chrohya va tjichréhe va ijnko chojni ókjé na mé tsinkéhe va tí chojni a kixin tjatsõanhya va itén ókjé chojni —ichro ch'án.

⁶ Mé xikaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexín tíha.

Ch'ín Jesús mé tí pastor jina

⁷ Ntá chrónka ch'ín Jesús inaá ntáchro ch'án kixin:

—Ijnko nkehe tjetõan tsõtjonkará kixin janhan la éxí tí puerta t'ixenxín tí kolélo tí t'inkachjina va. ⁸ Kaín tí sín kuitõnxin ntja kui senó mé xíchee la ko chrókueé. La ntá tí kolélo la ántõsén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexín va tí kòrré va sátsjikjine va la ko siín kjuachaxin ts'ixenhen va tí ts'inkachjina va inaá.

¹⁰ 'A ntá xíchee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. 'A ntá janhan k'uinka kixin tsochontaxinrá kjuachón na mé kjuachón jnkochríxín. ¹¹ Janhan mé ijnko pastor jina a ntá tí pastor jina mé ts'enyákonhén tí kolélo a. ¹² 'A ntá tí nkexro ch'e xrá tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé xikaha tí chojni tjinkaon chrókjuacha tí xrá chrókjuich'e ó la mé sátsji. 'A ntá tí kolélo la ántõsén ch'án kuáhya ch'án kuénté tí jehe va.

¹⁴⁻¹⁵ 'A ntá janhan mé ijnko pastor jina. Mé xikaha T'aná chóxin ch'án tí janhan la ko kjaxin janhan choxian tí jehe ch'án mé xikaha choxian janhan tí sín éxí kolélo kuéntana la ko jehe sín mé chóxin sín tí janhan. Ntá ts'enyákonhán tí sín éxí kolélo kuéntana. ¹⁶ Kjaxin chonta kolélo naxa jehya kòrré va ntihi mé kjaxin t'ichjánxin sátsjicakjián va. 'A ntá tí tsitekakonna va ntá ts'óna jnkokoá kòrré va la ko jnkokoá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna inaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna inaá. Tíhi mé k'uetuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín. ²⁰ Nchónhya tí jehe sín ntáchro sín kixin:

—¿Nkeuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínaha la ko lóco ch'án —ichro sín.

²¹ Ntá ikjé sín ntáchro sín kixin:

—Xikaha chrónixja ijnko chojni chóna nchakuen tí jínaha. ¿Á ijnko nchakuen tí jínaha la á jina chrókjuinçek'ikon ijnko chojni t'ikónhya? —ichro sín.

Tí sín judío kuítækakuenhya sín tí ch'ín Jesús

²² 'A ntá tí nchakuen kin tí chjasin Jerusalén k'uixin kia xraxinkakonxín sín tí yaon tsíkjin tsík'óna nínko. ²³ Ntá ch'ín Jesús itjen ch'án tí nínko tí ntáxin kuènte Salomón. ²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

²⁵ Ntá kjuátehe ch'ín Jesús kixin:

—Ó tjonkará ntá naxá titekákonhyará. Kaín tí xra tjét'a janhan tí kjuachaxin kuènte T'aná mé tjakoşin nkekro tí janhan. ²⁶ Kjánchó jahará titekákonhyará kixin jahará la jehya kolélo kuèntana éxí tjonkará senó. ²⁷ Tí kolélo kuèntana mé tjatsoan va tí tanná la ko kjaxin janhan tjátsoan tí jehe va la ko jehe va mé chréhe va tí janhan. ²⁸ Janhan mé tjaḥa va tí kjuachón jnkochrixín la í ts'itjáyanhya va la ko ninkexró tsjachahya tsakitsjexín va tjaná. ²⁹ Ó kjuanjon T'aná, mé tí nkekro tjetóxin t'etsoan, na ninkexró tsjacha tsakitsjexín va tí tja ch'án. ³⁰ Janhan la ko T'aná na mé jnkokoá nkekro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá. ³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uikonrá kjuákoşian kjuachaxin kuènte T'aná. ¿Ntá nkekuèté chróchjinára xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiánni xro. Náhí. Jaha ijnko chojni ó ntá kjuincheyóhé aşán Dios na mé tsotjiáxiánni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxí Dios tí jahará.”* ³⁵ Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xíkaha ntáchro Dios kixin éxí Dios jnkojno nkekro k'uáyéhe itén ch'án. ³⁶ A ntá kjuéyána Dios ichr'ánna ch'án chjasintajni, ¿ntá nkekuèté ntáchrorá kixin k'uántaxínhan Dios kixin janhan ntáxrjan kixin Xjeen Dios tí janhan? ³⁷ Kja tí chrókjuít'ahya tí xra ich'e T'aná la chrókuitekákonhyará. ³⁸ A ntá kjónté tjét'a tí xra a kjónté titekákonhyará tí janhan na mé chrókuitekáonrá tí xra tjét'a chrókonoaxínrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xíkaha chrótsé sín tí ch'ín Jesús inaá chrók'uijkéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntario Jordán inaá tí k'uékjak'e ch'ín Juan k'uékikítexín ch'án chojni senó. ⁴¹ Ntá nchónhya chojni sákjuichréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jié la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'uén ch'ín Lázaro

¹ Tjen ijnko ch'ín níhi mé it'ín ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta. ² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Ínchéni la ko kjuínchexámáxin tjan kaşihí tjan toté ch'án.* ³ A ntá yóí tí kichó ch'án chjin ichr'án sín ijnko nkekro tsochenka tí ch'ín Jesús kixin:

—Ínchéni jaha, tí nkekro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

* **10:34** Salmo 82.6 * **11:2** Juan 12.3

—Tí chin chón̄ta ch'án̄ jehya ḱixin ónaá chrók'uitjáyaxón ch'án̄ tí ts'en ch'án̄. Náhi. Tíha mé tsjakoxin tí kjuachaxin jié kuente tí Xjeen Dios —ichro ch'án̄.

⁵ A ntá tí ch'ín̄ Jesús la imá tjuéhé ch'án̄ tí tjan Marta la ko tí tjan kichó tjan la ko tí ch'ín̄ Lázaro. ⁶ Na ntá tió kuínhin ch'án̄ ḱixin níhi ch'ín̄ Lázaro na kjónté kuitqhe ch'án̄ iyó yaon inaá tí nó kjuák'e ch'án̄. ⁷ A ntá chr'éxin̄ ntáche ch'án̄ tí sín̄ k'uájiko ch'án̄ ḱixin:

—Sátsjini estado Judea inaá —ichro ch'án̄.

⁸ Ntá kjuátqhe tí sín̄ k'uájiko ch'án̄ ḱixin:

—Maestro, naḡa séhya tí sín̄ judío ntiha chrótjáha sín̄ xro tjincaon sín̄ chrók'óyánxian sín̄ xro. ¿Á tjinkávan sátsjia ntiha inaá? —ichro sín̄.

⁹ Ntá ntáchro ch'ín̄ Jesús ḱixin:

—Jnkojnko yaon mé chón̄ta teyó hora. Tió ixri chojni nchakotjin tsóténkixinhya sín̄ ninkehó ḱixin t'inkaséyanxín xrohi chjasintajni a. ¹⁰ Tí sín̄ ixri tie mé tsóténkixín̄ sín̄ nkehe ḱixin chón̄tahya sín̄ xrohi —ichro ch'án̄.

¹¹ Ntá chr'éxin̄ ntáche ch'ín̄ Jesús tí sín̄ k'uájiko ch'án̄ ḱixin:

—Ó k'uájua tí nkexro chóxinni mé ch'ín̄ Lázaro. Ntá sátsjia sintakjayaha ch'án̄ —ichro ch'án̄.

¹² Ntá ntáchro tí sín̄ k'uájiko ch'án̄ ḱixin:

—Inchéni, tí k'uájua ch'án̄ la mé chrókuitqhe ch'án̄ jína —ichro sín̄.

¹³ Kjánchó tí nkehe ntáchro ch'ín̄ Jesús mé t'axrjéxin̄ ḱixin ó tsikjixin tsík'en tí ch'ín̄ Lázaro. Ntá tí sín̄ k'uájiko ch'án̄ kjuenkayáxin̄ sín̄ ḱixin ó jehí tjejua ch'ín̄ Lázaro. ¹⁴ Ntá ntoá chrónka ch'ín̄ Jesús ḱixin:

—Ó tsík'en ch'ín̄ Lázaro. ¹⁵ Ntá chàna ḱixin kohyana ntiha ḱixin mé xikaha tsítékákonxínra. A ntá jie intará sátsjitsjeheni ch'án̄ —ichro ch'án̄.

¹⁶ Ntá ch'ín̄ Tomás, kjaxin̄ tikítexín̄ sín̄ ch'án̄ ch'ín̄ Nóhé, mé ntáche ch'án̄ tí í so sín̄ ḱixin:

—Sátsjini koíni kaín̄ ni ts'enkaoni Inchéni —ichro ch'án̄.

Ch'ín̄ Jesús ntáchro ch'án̄ ḱixin sinchexechón ch'án̄ chojni inaá

¹⁷ Ntá kjují ch'ín̄ Jesús kuínhin ch'án̄ ḱixin ch'ín̄ Lázaro la ó chón̄ta noó yaon tsikjixravá ch'án̄. ¹⁸ A ntá tí chjasin Betania mé chjinaxón tí chjasin Jerusalén, chón̄ta iyó kilómetro ko t'ó kjínxin̄. ¹⁹ A ntá itsjé tí sín̄ judío sátsikjitsjehe sín̄ tí tjan Marta la ko tí tjan María tjejónixjehe sín̄ ḱixin kánhyó ts'ává sín̄ ḱixin tsík'en tí kichó sín̄ a. ²⁰ Ntá kuínhin tjan Marta ḱixin ó kui ch'ín̄ Jesús ntá k'uaxrjéxin̄ tjan nchia tsjixinhin̄ ntja. A ntá tí tjan María kuitqhe tjan nchia.

²¹ Ntá tí tjan Marta ntáche tí ch'ín̄ Jesús ḱixin:

—Inchéni jaha. Chrókjuak'e ntihi ntá chrók'uenhya kichó ni. ²² Kjánchó ó nõna ḱixin Dios tsotjáha kaín̄ nkehe tsjanchehé ch'án̄ —ichro tjan.

²³ Ntá ntáchro ch'ín̄ Jesús ḱixin:

—Tsoxechón kichuá inaá —ichro ch'án̄.

²⁴ Ntá ntáchro tjan Marta ḱixin:

—Ó nõna ḱixin tsoxechón ch'án̄ tió tsoxechón kaín̄ tí sín̄ tsík'en, tí yaon tsjixixín̄ —ichro tjan.

²⁵ Ntá ntáchro ch'ín̄ Jesús ḱixin:

—Janhan mé ntáxechón chojni la ko tsochón̄ta sín̄ kjuachón̄. Tí nkexro tsítékaon sín̄ tí janhan na kjónté ó tsík'en sín̄ la naḡa sintaxechón̄ sín̄ inaá. ²⁶ La ko kaín̄ xín̄ tí sín̄ naḡa tjejóchón̄ sín̄ la tsítékaon sín̄ tí janhan na ts'enhya sín̄. ¿Á títékávan xikaha ní? —ichro ch'án̄.

²⁷ Ntá ntáchro tjan ḱixin:

—Chaxín Ìnchéni títekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjiḡravá nkexro Lázaro

²⁸ Ó kjuixin ntáchro tjan Marta xikaha ntá sákjuuk'íyehḡ tjan kíchó tjan María ntá imó chénka tjan kixin:

—Ntiha tjen Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuútsjehe tjan tí ch'ín Jesús. ³⁰ Naxa tsík'ixenhya ch'án chjasin naxa tjen ch'án tí xéta ch'án tjan Marta. ³¹ Ntá tí sín judío tjejónixjeḡ tjan María kixin kánhyó ts'ává tjan, mé k'uikon sín kixin tjoka k'uaxrjéxín tjan nchia, ntá kjuíchréḡ sín tjan kjuenkayáxin sín kixin sátsji tjan tí tsíkjiḡravá kíchó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjen ch'ín Jesús ntá kjuák'exín toh'in tjan toté ch'án ntáchro tjan kixin:

—Ìnchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uikon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ìnchéni, ¿á sátsjtsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòyḡ. Tí tòyḡ mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'ueḡoan ch'ín Jesús kixin:

—Tjakjiyan tí xro a —ichro ch'án.

À ntá tí tjan Marta mé kíchó tí nkexro k'uén mé ntáchro tjan kixin:

—Ìnchéni, kjá noha kixin kjá imá xra kixin ó chónḡa noó yaon tsík'en ch'án —ichro tjan.

⁴⁰ Ntá kjuáteḡhe ch'ín Jesús ntáchro ch'án kixin:

—Ó tjonka kixin tsítekávan ntá ts'ikuan tí kjuachaxin jíé kuénte Dios —ichro ch'án.

⁴¹ Ntá kjuakjlin sín tí xro a. Ntá ch'ín Jesús konta ch'án nkajní ntáchro ch'án kixin:

—It'éni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nõna kixin xráxin tjetinhín tí nkehe ntáxrjan ntá xikaha ntáxrjan jie kixin tsinhín tí sín tjejóntaxín ntihi ntá tsitekaon sín kixin jaha mé kuéḡoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¿Lázaro, t'axrjéxian méḡe! —ichro ch'án.

⁴⁴ Ntá tí ch'ín tsík'en k'uaxrjéxín ch'án tòyḡ, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkjèxin ijnko ka. Ntá k'ueḡoan ch'ín Jesús kixin:

—Tjasintankará tí ka chróntetoxín ch'án kixin jina tsji ch'án —ichro ch'án.

*Imó kjuenkayáxin sín kixin nkexrí ts'óyán sín tí ch'ín Jesús
(Mt. 26.1-5; Mr. 14.1-2; Lc. 22.1-2)*

⁴⁵ Ntá itsjé tí sín judío sákjuikotoxin sín tí tjan María mé k'uikon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuitsjehe sín tí sín fariseo kjuichénka sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchat'á t'et'otan jnkokoá kójkotséko sín tí sín antsí t'et'otan, la ntáchro sín kixin:

—¿Xá nkexrí chrókjuich'eheni tí ch'ín a kixin jehe ch'án mé tjasin ch'án kjuaxroan jié? ⁴⁸ A ntá tí chrókuítóheni ch'án xikahó ntá kaín xín chojni chrókuitekaon sín tí jehe ch'án, ntá tsí tí sín romano t'et'otan sinchek'itjáyán sín tí nínkoéni la ko tí xra chóntani la ko tí nación kuénténi —ichro sín.

⁴⁹ Ntá ch'ín Caifás mé tí nkexro t'et'uenhen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjasénni kixin ntá chrók'uitjáyánhya kuenté tí nación kuénténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehe ch'án mé k'uet'uenhen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. ⁵² A ntá jehya tí nación kuénté sín ó chrók'uenyákonhen ch'án. Náhi. Kjaxin kixin sinchekaá ch'án kaín tí sín ts'óna xjeen Dios tjejó sín kuenté chjasintajni. ⁵³ A ntá tí yaon a tí sín t'et'uenhen tí sín judío mé kjuankíxin sín kjuenkayáxin sín kixin chrók'óyán sín tí ch'ín Jesús.

⁵⁴ A ntá ch'ín Jesús la í noxínhya k'uáji tí k'uejó tí sín judío, na mé k'uaxrjéxin ch'án tí estado Judea, sákjuí ch'án chjinaxón nteje, tí tjen ijnko chjasin it'in Efraín. Ntaha kuítóeko ch'án tí sín k'uájiko ch'án.

⁵⁵ Ntá í séhya ntá ts'ixín tí kia pascua mé ijnko kié tí sín judío. Ntá itsjé chojni k'uaxrjéxin sín chjasén sín sákjuí sín chjasin Jerusalén kixin ntaha tsoyaxínhin sín kixin tsotjóá sín kjónté naxa xrankíxinhya ts'ixín tí kia pascua. ⁵⁶ Ntaha k'uájikjeyá sín tí ch'ín Jesús k'uejóxnenhen sín tí nínko jié ntá kjuanchankíhi sín kichó sín kixin:

—¿Jahará nkechrorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'et'uenhen tí sín nchat'á na ó k'uet'otan sín kixin tí sín ijnko nkexro nohe nketí tjen ch'ín Jesús chróchrónka sín kixin ntá jína chrókjuitsé sín ch'án chrókjuinchenteto sín ch'án la ko chrókjuak'e'chjína sín ch'án.

12

*Ijnko tjan kjuíncheká tjan aceite xraxé náxrjón toté tí ch'ín Jesús
(Mt. 26.6-13; Mr. 14.3-9)*

¹ Naxa t'itjáyán injon yaon ntá ts'ixín tí kia pascua. A ntá ch'ín Jesús sákjuí ch'án chjasin Betania tí tjen ch'ín Lázaro. Tí ch'ín Jesús mé tsíkjinchexechón ch'án. ² Ntá ntíha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uejó sín kjóneko sín tí ch'ín Jesús. ³ Ntá tjan María kuíjao tjan it'o litro aceite tsík'óna xroan nardo imá tjete tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan. ⁴ Ntá ch'ín Judas Iscariote, it'é ch'án mé it'in Simón, jehe

ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuènté kóxiha tí xroan xraxé, chrókóxi^xin iní ciento chichaon denario kixin chrókjuinkitsa tí sín nòà? —ichro ch'án.

⁶ Kjánchó ch'ín Judas la jehya ntáchro ch'án xikaha kixin chrókujikonóhe ch'án tí sín nòà. Náhi. Ntáchro ch'án tíhi kixin xráxín chee ch'án kixin jehé ch'án t'ayakonhen ch'án tí nkehe tjinká chichaon ntá xráxín teé ch'án tí chichaon tsixrenájín ntiha. ⁷ Ntá ntáchro ch'ín Jesús kixin:

—Nté títóherá tjan. Tsíkjak'echjina tjan tí xroan a kixin tí yaon tsoxrávána.

⁸ Tí sín nòà jnkochríxín ts'ejokoará sín. A ntá janhan jnkochríxínnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uúixikónohe sín kixin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'ín Jesús ó. Náhi. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. ¹⁰ Ntá tí sín nchát'á t'etōan mé kójnkotsé sín kjuenkayáxin sín chrók'óyán sín tí ch'ín Lázaro kjaxin ¹¹ kixin itsjé tí sín judío kuítekaon sín tí ch'ín Jesús kixin xikaha kjuínchexechón ch'án tí ch'ín Lázaro ntá k'uaxrjekjanxín sín tí sín nchát'á.

K'uúixenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uúixikónohe sín kixin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuúixinhin sín ntja itsji ch'ín Jesús, itsje sín, ntáchro sín kixin:

—Tjancheheni Dios kjuasáya. Imá jína tí nkexro kúixin tí kjuachaxién It'eni tjan nkaya nkajni. Imá jína tí ch'ín Rey ts'etuñhen tí naciòn Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxi nixja itén Dios kixin:

¹⁵ Chrakonhyará jahará tjejorá chjasin Jerusalén,

tsjehérá ó tjekei tí ch'ín Rey kuèntará,

tjekjen ch'án ijnko kolócho.*

¹⁶ A ntá tió kónhen tíha kíenxínnya tí sín k'uájiko ch'ín Jesús kixin nkekuènté xikaha kónhen. A ntá chr'éxin tió kjuixin sákjuijia ch'án nkaya nkajni ntá xraxinkaon sín kixin xikaha tsíkjin tí sín k'uéchrónka itén Dios ósé nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

¹⁷ Mé xikaha kaín tí sín tsíkójnkotsé tí kjuák'e ch'ín Jesús tió k'uúyehé ch'án tí ch'ín Lázaro kixin ts'axrjéxín ch'án tí tòyè tsíkji^xravá ch'án ntá xechón ch'án mé tí sín a mé chrónka sín tí nkehe k'uúikon sín. ¹⁸ Mé xikaha sákjuúixinhin sín tí ntja tsjixin ch'ín Jesús, k'uúixikónohe sín kixin xikaha tsíkjasin ch'ín Jesús tí kjuaxroan jíé. ¹⁹ Mé xikaha ntáchro tí sín fariseo itjo sín kichó sín kixin:

—Tsjeherá kaín rá, ninkehó tsjachahyani sich'eni kixin kaín xín chojni sákjuúichréhe tí jehé ch'án —ichro sín.

Iso sín nkivee griego tjejá sín tí ch'ín Jesús

* 12:15 Zacarías 9.9

²⁰ Iso sín nixja griego k'uejóyákan t́ sín sákjuí sín t́ kia chjasin Jerusalén tsoxraxinkakonxín sín Dios. ²¹ Ntá kóchjinehe sín t́ ch'ín Felipe, chjasén ch'án mé Betsaida, estado Galilea, chrónóhē sín ch'án ḱixin:

—Tjinkaonni chrók'uikonni t́ ch'ín Jesús —ichro sín.

²² Ntá ch'ín Felipe sákjuíchenka ch'án t́ ch'ín Andrés. Na ntá yóí sín sákjuíchenka sín t́ ch'ín Jesús. ²³ Ntá ntáchro ch'ín Jesús ḱixin:

—Ó kjuixraká t́ yaon, a ntá t́ Xjeen Dios K'óna Chojni mé sátsji ch'án ts'áyéhe ch'án t́ kjuachaxin kuente It'é. ²⁴ A ntá tsotjonkará ijnko nkehe chaxín ḱixin t́ chrókjuítsínkahya ijnko noatrigó t́ nche chrók'uenhya t́ noa a, ntá jnkokoá noa chrókjuak'e. A ntá t́ chrók'uen t́ noa a ntá chrók'óna nchónhya noa ḱixin chrótjá sín. ²⁵ A ntá t́ nkexro imá tjuéhē asén ḱixin kohya nkehe chrók'uatsínka na mé tsochóntahya ch'án kjuachón jnkochŕixin. A ntá t́ nkexro tjekuènhya asén kjónté chrók'uénxin ntihi chjasintajni t́ chrónka ch'án itén Dios na mé chr'éxin tsochónta ch'án kjuachón jnkochŕixin. ²⁶ A ntá t́ jnkojín nkexro tjinkaon chrókjuich'ena sín xra t'ichjánxin tsochréhe sín t́ janhan. A ntá t́ tjén janhan na mé kjaxin tjejó t́ sín ch'ena sín xra. A ntá jnkojín sín sich'ena sín xra xíkaha na mé T'aná mé tsjikosáyehe t́ jehe sín.

Ch'ín Jesús chrónka ch'án ḱixin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná ḱixin sínchekaána ch'án t́ nkehe tsona jie o náhi? Kjánchó xra ó k'uínka xíkaha tsona. ²⁸ Jaha It'éni, tjáqoxian t́ kjuachaxin kuente ihníá —ichro ch'án.

Ntá kuínhin sín nixja ijnko nkexro nkajní ntáchro ḱixin:

—Ó kjuixin kjuáqoxian t́ kjuachaxin la ko xíkaha xikjáqoxian inaá.

²⁹ A ntá t́ sín tjejóntaxín tsíkinhin sín mé ntáchro sín ḱixin kjónta, la ko í so sín ntáchro sín ḱixin:

—Ijnko ch'ín ángel nixjehē ch'án —ichro sín.

³⁰ Kjánchó ntáchro ch'ín Jesús ḱixin:

—Náhi. Jehya ḱixin janhan t́ jie chrókjuínhan t́ nixja ch'án. Náhi. Nixja ch'án ḱixin tsinhínrá jahará. ³¹ Ntá jie tsitoxén t́ ijje chojni chjasintajni na mé t́ nkexro t'etóan chjasintajni mé ts'axrjehe ch'án t́ xra t'etóan ch'án. ³² A ntá tío tsjak'énkánia ijnko ntacruz ntá nchónhya sín ts'ikon sín ntá tsitekaon sín t́ janhan —ichro ch'án.

³³ Mé xíkaha chrónkaxín ch'án ḱixin nkexrí ts'enxín ch'án. ³⁴ A ntá kjuátēhe t́ sín ntiha ntáchro sín ḱixin:

—Kuínhini nchekuáxin sín t́ xroon tsíkjin sín ósé chrónka ḱixin Cristo la jnkochŕixin tsjak'e ch'án. ¿Ntá nkekuènté ntáchrua ḱixin t́ Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe t́ Xjeen Dios K'óna Chojni? —ichro sín.

³⁵ Ntá ntáchro ch'ín Jesús ḱixin:

—Naxa tjen t́ xrohi tjejókoará, kjánchó í séhya tsjak'e. Chrók'uajirá t́ naxa tjen t́ xrohi t'inkaséyanxín ntíja. A ntá náhi la ó ts'ixín tie. A ntá t́ sín ixri t́ sítie a mé noehya sín nketí sátsji sín. ³⁶ Títekáonrá t́ xrohi t́ naxa tjen t'inkaséyan ḱixin mé ts'ónará chojni kuente t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án t́ jehe sín.

T́ sín judío kuítekonhya sín t́ ch'ín Jesús

³⁷ K'uékjasin ch'ín Jesús nchónhya kjuaxroan jié k'uikonxín kon sín ntá kjónté kuítekakuenhya sín ch'án ³⁸ kixin mé xikaha tsoxiteyá tí nkehe tsíntáchro ch'ín Isaías tsíkjin ch'án ósé kixin:

Ínchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jié kuénte ch'án.†

³⁹ Méxra kuítekakuenhya sín tí ch'ín Jesús éxí tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

kixin ntá chrók'uikonhya sín,

la ko chrókiénxínhya sín,

kixin ntá chrókóchjinehya sín tí janhan kixin chrókjuintakitoha sín jína.‡

⁴¹ Xikaha k'uéchrónka ch'ín Isaías imá ósé kixin k'uék'ikon ch'án tí kjuachaxin jié kuénte Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etöan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókónínkaon sín la í chrókjuanjonhya sín kjuachaxin chrók'uixenhen sín tí ninköe sín judío. ⁴³ Mé xikaha imá kóxrjínhin sín kixin chojni chjasintajni chrókjuikosáyehe sín ntá kánhyó kjueyá sín kixin chrókjuikosáyehe sín Dios.

Tí nkehe ntáchro ch'ín Jesús mé tsitöexixin ijíe chojni

⁴⁴ Ntá itsen nixja ch'ín Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uëtuanna k'uinka. ⁴⁵ Éxí tí t'ikonrá tí janhan mé xikaha t'ikonrá tí nkexro k'uëtuanna k'uinka. ⁴⁶ A ntá janhan mé xrohi k'uinka chjasintajni kixin tí sín titekáon sín tí janhan ts'ejóhya sín tí sítié a. ⁴⁷ A ntá tí jnkójnirá tinhínrá tí nkehe xrjanka ntá titekáonnyará la jehya janhan sintakjasótiará kixin jehya kixin k'uinka sintakjasóte chojni chjasintajni. Náhí. K'uinka kixin sintakaá chojni. ⁴⁸ A ntá tí titekáonnyará tí janhan la ko titekáonnyará tí tan kuéntana la ó sín nkexrí tsitöexixin ijíará, na mé éxí tí tan xrjanka mé Dios sinchekitöexín ijíará tí yaon tsjixixín chjasintajni. ⁴⁹ Jehya tí nkehe kuéntana tjéxrjanka. Náhí. T'aná na mé tí nkexro k'uëtuanna k'uinka mé k'uëtuanna nkehe tsöxrjanka la ko nkehe tsjáku. ⁵⁰ A ntá nóna kixin tí nkehe k'uëtuöan T'aná mé xranjonxín tí kjuachón jnkochrísín. Mé xikaha tí nkehe ntáxrjan mé tjéxrjanka kixin T'aná mé k'uëtuanna.

13

Ch'ín Jesús kjuínchek'önti ch'án toté tí sín k'uújiko ch'án

¹ A ntá tí yaon xika tí ntóye tsjasin sín tí kia pasua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xrásín tjuèhé ch'án tí sín kuénte ch'án chjasintajni, a ntá jie tsjakoxin ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuñhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. ³ Ntá ch'ín Jesús la ó nohe ch'án kixin tsíkixín ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuñhen ch'án kaín xín nkehe. ⁴ Ntá naxa tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'önti k'uínkat'óxin

ch'án. ⁵ Ntá kujkija ch'án ijnko nkehe ntá, ntá kjuankíxin ch'án kjuínchek'ónti ch'án toté jnkojnko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kíxin:

—Jaha Ìnchéni la, ¿nkekuènté chrókjuínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kíxin:

—Jaha la naxá tiénxinhya tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kíxin:

—Jaha la sínchek'óntihya toténi —ichro ch'án.

Ntá ntáchro ch'ín Jesús kíxin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kíxin:

—Náhi, Ìnchéni. Jehya tí toténi ó chrókjuínchek'óntia. Kjaxin itjani la ko ikjani chrókjuínchek'óntia —ichro ch'án.

¹⁰ Ntá ntáchro ch'ín Jesús inaá kíxin:

—Tí sín tsíkjin tsík'ónti la t'ichjánxinhya kuènté sín ts'ónti sín inaá. Náhi. Jehó toté sín ó mé t'ichjánxin naxá ts'ónti kíxin kuènté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kíxin kénhya sín tjóá sín kíxin ó nohe ch'án nkexro sínchekji ch'án.

¹² Ntá tió kjuixin kjuínchek'ónti ch'án toté sín kaín sín ntá xík'inkáya ch'án inaá tí ka kuítsáte ch'án ntá kjuák'etjaxin ch'án tí k'uínkatjénxin ch'án. Ntá ntáchro ch'án kíxin:

—¿A kiénxinrá tí nkehe kjuít'a? ¹³ Jahará la ntáchrórá kíxin janhan Maestro kuèntará la ko Ìnchárá. Chaxín ntoá ntáchrórá kíxin janhan tíha. ¹⁴ Janhan tí Maestro kuèntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kichuára. ¹⁵ Janhan mé kjuáqxian kíxin xikaha chrókjuích'erá éxi kjuít'a janhan. ¹⁶ Ijnko nkehe chaxín tsotjonkará kíxin tí sín ch'exón xrá mé t'etóanhya sín éxi t'etóan tí lámge sín, la ko tí sín k'uáyéhe sín ijnko xrá t'etóanhya sín éxi t'etóan tí sín kjuanjon tí xrá a. ¹⁷ Tí chrókiénxinrá nkehe tíha la ko chrókjuínchexiteyará la chróócháhará má.

¹⁸ Jehya kaín rá xikaha ntáxrjan. Ó nòna kíxin nkexro kjuéyá janhan. Kjánchó t'ichjánxin tsoxiteyá tí nkehe tsíkjin sín ósé ntáchro kíxin: “Ijnko nkexro tjénekian mé tsjanjonkian.”* ¹⁹ Mé xikaha tjétjonkará senó kíxin tió ts'atsínka tíha ntá tsítekáonrá kíxin janhan mé tí nkexro xráxin tjen. ²⁰ Ijnko nkehe tjetoan tjétjonkará kíxin tí tsjánjonrá kjuachaxin tsitóhe tí chojni ich'án janhan, mé éxi yóhe chrókjuánjonrá kjuachaxin chrókuitóhe tí janhan, a ntá tí tsjánjonrá kjuachaxin tsitona janhan mé éxi yóhe chrókjuánjonrá kjuachaxin chrókuitóhe tí nkexro k'uetuanna k'uinka —ichro ch'ín Jesús.

Ch'ín Jesús chrónka kíxin ch'ín Judas sínchekji ch'án

(Mt. 26.25; Mr. 14.17-21; Lc. 22.21-23)

²¹ Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kíxin:

—Ijnko nkehe tjetoan tsotjonkará kíxin jnkojínrá tjejorá ntihi mé sínchekjiráni —ichro ch'án.

* 13:18 Salmo 41.9

²² Ntá tí sín k'uájiko ch'án kjuanjíxin komáxin la ko í komáxin kíchó sín kixin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá tjuèhe ch'án itjen ch'án chjinaxón tí tjen ch'ín Jesús tjejóne sín. ²⁴ Ntá ch'ín Simón Pedro kjuakoxén seña k'uëtuenhen ch'án tí í jnko ch'ín a kixin:

—Tjanchankíhi ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Ínchéni, ¿nkexro tíha? —ichro ch'án.

²⁶ A ntá kjuátehe ch'ín Jesús ntáche ch'án tí ch'ín a kixin:

—Sintakjata it'ò nioṭja, a ntá tí nkexro tsotjaha tí t'ò nioṭja a mé tí nkexro a —ichro ch'án.

A ntá mé xíkaha kjuínchekjata ch'ín Jesús it'ò nioṭja ntá chjéhe ch'án tí ch'ín Judas Iscariote, it'é ch'án mé it'in Simón. ²⁷ Ntá k'uáyéhe ch'án tí nioṭja ntá tuénxín k'uixenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xra tjinkávan sich'e la jaí tóxakonhan —ichro ch'án.

²⁸ Kjánchó nijnko tí sín tjejóne ntiha kienxínhya sín nkekuénté xíkaha ntáchro ch'án. ²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uëtuenhen ch'án tí ch'ín Judas kixin ichrén nkehe sátsjik'ena ch'án kuente tí kia a, o ách'e ichrén nkehe sinchekitonhen ch'án tí sín nò a. ³⁰ Ntá k'uáyéhe ch'ín Judas tí nioṭja, a ntá k'uaxrjexín ch'án ntiha. A ntá ó k'uúxin tie.

Ijnko nkehe nixin k'uetqan ch'ín Jesús

³¹ A ntá ó kjuixín sátsíkji ch'ín Judas, ntá ntáchro ch'ín Jesús kixin:

—A ntá jie tsonoxín tí kjuachaxín jié kuente tí Xjeen Dios K'óna Chojni la ko tsjakoxín ch'án tí kjuachaxín jié kuente Dios. ³² Na mé xíkaha tí Xjeen Dios K'óna Chojni mé tsjakoxín tí kjuachaxín jié kuente Dios. A ntá Dios mé tsjakoxín ch'án tí kjuachaxín kuente Xjeen ch'án la tjoka tsoxiteyá. ³³ Xjeenni, í séhya naxa tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxí yóhe k'uétjanka tí sín judío mé tjonkár kjaxinrá kixin: Ninkexró xitjahya tsjiji sín tí sátsjiyá janhan.† ³⁴ Ijnko nkehe nixin tétuqhanhárá ijie kixin chrótjuèhérá kichuárá éxí yóhe tjuahará mé xíkaha chrótjuèhérá kichuárá.

³⁵ Tí tsotjuèhérá kichuárá ntá tsonoxín kaín xín chojni síin chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án

(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Ínchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhérá jaí. Ntá chr'éxín tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuénté xitjahya tsochráha tí jaha jaí? Kjóté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

† 13:33 Juan 7.33

—¿Á chaxín ts'enyákonna jaha? Ijnko nkehe chaxín tsotjonka kixin naxa tsotsjehya tí kochíntqa la ó tsjixin sijnchemána nýa kixin chonhyana, tsixrua.

14

Jesús mé ntja sátsjixinni tí tjen It'eni tjen nkaya nkajni

¹ Tóxakuanhyará jahará. Títekáonrá Dios la ko kjaxin títekáonrá tí janhan. ² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjonkará. Méxra sátsjijá sintonyoxian tí chrók'uejóni. ³ A ntá tí sátsjijá sintonyoxian, ntá tió tsjixin ntá ts'inka inaá, ntá sátsjini kixin jahará kjaxin chrók'uejorá ntiha tí tsjak'é janhan. ⁴ Jahará la ó nohará nketí sátsjijá la ko ó nohará tí ntja a —ichro ch'án.

⁵ Ntá kjuátqhe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntja a? —ichro ch'án.

⁶ Ntá kjuátqhe ch'ín Jesús ntáchro ch'án kixin:

—Janhan mé tí ntja la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná. ⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, títóhéni kixin tsochóxinni It'á. Táho mé tjínkaonni —ichro ch'án.

⁹ Ntá kjuátqhe ch'ín Jesús ntáchro ch'án kixin:

—Felipe, óse tjejóni, ¿a ntá naxa jtátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuénté tjanchána kixin chrókuitóha chrók'uikonrá tí T'aná? ¹⁰ ¿Á títekákonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níjja janhan la jehya kuéntana. Náhi. T'aná tjékian janhan mé tjech'e ch'án tí xra kuente ch'án. ¹¹ Títekáonrá kixin jnkokoá tjékian T'aná, a ntá T'aná itjen tí tjén janhan. Kjonté kuítékákonhyará xikaha la chrókuítékáonrá kixin tí kjuaxroan jie kjuáqoxian k'uikonrá. ¹² Ijnko nkehe chaxín tjonkará kixin tí chaxín tsítekáonrá tí janhan ntá kjaxinrá tsjachará sich'erá xra yóhe tjet'a la ko kjaxin ixra antsí jie tsjachará sich'erá kixin janhan la ó sátsjijá tí tjen T'aná. ¹³ Kaín nkehe tsjanchatóxixínrá tí njina na mé tsjánjuan kixin xikaha tsjáqoxian tí kjuachaxin kuente T'aná. ¹⁴ Tí chrén nkehe tsjanchatóxixínrá njina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxín tjuéhérá tí janhan ntá chrókjuínchexiteyéhérá tí nkehe kuétuanhanrá. ¹⁶ Ntá tsoxrjannóaha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánrá la mé ts'ejokoará jnkochr'ín. ¹⁷ Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínrá ch'án kixin tjejokoará ch'án la ko ts'ejokoará ch'án jnkochr'ín. ¹⁸ Janhan na tsjtoáhyará nõerá jahorá, na mé tsokjan inaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónrá kixin janhan na tjéchuan. ²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni. ²¹ Tí nkexro nohe tí nkehe tétqan la ko sinchexiteyéhé sín mé xikaha tsjáqoxin sín kixin chaxín

tjuèhe sín tí janhan. **A** ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuahá sín la ko tsjako_xian nkexrí tjén janhan —ichro ch'in Jesús.

²² **A** ntá tí ch'in Judas, jehya tí ch'in Iscariote tíha, na mé kjuanchankí ch'án kixin:

—Inchéni, ¿nkekuènté jehóni tjáko_xian, a ntá tjáko_xéinhya tí chojni chjasintajni? —ichro ch'án.

²³ Ntá kjuátehe ch'in Jesús ntá chro ch'án kixin:

—Tí nkexro tjuèhe tí janhan mé sinchexiteyéhe tí nkehe tétōan. La ko T'aná mé tsotjuèhe tí jehe sín la ntá T'aná la ko janhan ts'ejókoni sín. ²⁴ **A** ntá tí sín tjuèhya tí janhan la mé nchexiteyéhya sín tí nkehe tjákua. **A** ntá tí nkehe tjákua tjejotínhrá la jehya kuèntāna. Náhí. Kuènte T'aná tí nkexro k'uetuāna k'uinka.

²⁵ 'Naxá tjejóni la tjetjōnkará kaín tíhi. ²⁶ **A** ntá Nchakuen T'aná tsochr'án ch'án kjuachaxin njna mé tsjinkitsa tí jahará la ko sinchechéhe asánrá la ko tsjakohará kaín nkehe la ko sinchexraxinkaonrá kaín nkehe xrjanka.

²⁷ 'Kjuaxróxin tsjto_h la ko kjuaxróxin kuèntāna tsotjahará. Jehya éxi tí kjuaxróxin chrójuanjon tí sín chjasintajni. Náhí. Chróko_xakuenhya asánrá la ko chróchrakonhyará. ²⁸ Ó kuínhrá ntáxrjan kixin sátsjijá la ko tsokjan janhan ts'ejóni inaá. Tí chaxín tjuèhérá tí janhan ntá chróko_xcháhará tí kuínhrá kixin sátsjijá tí tjen T'aná kixin antsí t'etōan ch'án la kánhyó tétōan janhan. ²⁹ Senó tjetjōnkará tíhi kixin tíó tsonhen tíha la ts'ikonrá ntá tsitekáonrá jahará.

³⁰ 'Ntá jie la í séhya tsonixjahará kixin tí jie itsi tí ch'in Tsochren, mé tí nkexro t'etuēnhen tí sín chjasintajni. **A** ntá jehe ch'án la ninkehó t'etuānaha tí janhan. ³¹ Kjánchó t'ichjánxin kixin xikaha tsonhen ntá tí sín chjasintajni mé tsonohe sín kixin tjuahá T'aná la ko nchexiteyáha tí nkehe k'uetuāna ch'án. Ntá jie t'inkatjenrá sátsjixínni ntihi.

15

Tí nta t'óna to uva la ko tí chaan nta

¹ Janhan mé éxi yóhe ijnko ntanò tjechón itsa to uva la ko T'aná mé éxi yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. **A** ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ **A** ntá jahará la kótjuáxinrá tí tanná k'uetjōnkará senó. ⁴ Tí tsjtoéhyará tí janhan ntá kjaxin janhan tsjtoahya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahórá tsjachahyará sich'erá tí xrā kuèntāna tí tsjtohérá tí janhan.

⁵ Janhan na mé yóhe tí ntanò, a ntá jahará la tí chaan tí ntanò tsík'ayanta. Tí nkexro jnkoko_q tjenkayáxinkian mé tsjacha ts'óna nchónhya to. **A** ntá tí tsinkáchónkihya sín tí janhan la ninkehó xrā tsjachahya sín sich'e sín. ⁶ **A** ntá tí nkexro jnkokoáhya tjenkayáxinkian na mé éxi yóhe tí nta ch'ehya xrā tsíkóchrínjin sín tsík'itjí sín chrínta tí nonte a tsoxámá ntá tsoxrejo ntá tsoche.

⁷ 'Ntá tí chaxín tsjtoéhyará tsinkachónkirá tí janhan la ko ts'itjāyanhyará tí nkehe kjuákohará ntá tsjanchará ichrén nkehe tjinkáonrá la ts'ayéhérá. ⁸ **A** ntá T'aná la tsqchéhe ch'án tí ts'ónará itsjé to. Mé xikaha tsjako_xinrá kixin tinkachónkirá tí janhan. ⁹ Janhan tjuahará tí jahará éxi tjuāna T'aná. Chrókonohará kixin tjuahará. ¹⁰ Tí tsitekáonrá tí nkehe kuétuānhanrá ntá tsonohará kixin tjuahará éxi yóhe kjaxin janhan ntaxiteyá tí nkehe k'uetuāna T'aná ntá kónòna janhan kixin tjuāna ch'án.

11 Mé xikaha tjonkará kaín tíha kixin ntá éxi chàna mé xikaha tsjintaxín tsochéhe asánrâ. 12 Tí nkehe kuétuanhanrá la mé tíhi kixin chrótuèhérá kichuárâ éxi tjuahará xikaha. 13 Ninkexró chrókóyóhé éxi tí nkexro imá tjuèhe tí sín chóxin ch'án ntá ts'enyákonhen ch'án tí jehe sín. 14 Jahará la chojni choxian tí tsítekaonrá tí nkehe tétuanhanrá. 15 Ntáxrjanhya janhan kixin jahará chojni ch'exón xrâ kixin tí chojni xikaha ch'exón xrâ mé noehya sín nkehe tí xrâ ch'e tí lámœe sín a. Náhi. A ntá jahará la chojni choxian kixin kaín xín nkehe kjuakona T'aná mé kjuákohará. 16 Jehya kixin jahará kjuéyará tí janhan. Náhi. Janhan mé kjuéyá tí jahará kixin tsotjahará xrâ, a ntá éxi yóhé to xé mé chrók'uaxrje jina tí xrâ sich'enará kixin chrók'uitjáyanyha. A ntá T'aná mé tsotjahará ch'án kaín xín nkehe tsjanchexínrá nina. 17 Mé xikaha tétuanhanrá kixin tsotjuèhérá kichuárâ.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

18 Tí tsónínkakonhanrá tí chojni chjasintajni ntá chrókónohará kixin senó janhan nínkakonna sín. 19 Tí chrókókuentárâ chjasintajni ntá tí sín chjasintajni chrótuahará sín kixin naça kjéhyará sín. Kjánchó janhan kjuéyá tí jahará kixin chrók'uaxrjékjanxínrá tí sín síin chjasintajni. A ntá tí sín chjasintajni nínkakonhanrá sín kixin jahará jahyarâ kuentárâ chjasintajni. 20 Xráxinkáonrá tí nkehe tsítjonkarâ kixin tí sín ch'ehe lámœe sín xrâ tjetóxinhya ts'etœan sín.* Éxi yóhé chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákoha sín ntá kjaxin tsítekaon sín tí nkehe naça tsjákohérâ sín. 21 Mé xikaha sit'ahará sín kixin jahará tinkachónkirâ tí janhan la ko jehe sín chónhya sín tí nkexro ichr'ánna k'uinka ntihi.

22 Tí chrók'uinkahya janhan ntihi chrónixjahya sín ntá chrókuamáhya sín jie. Ntá jie koha nkeri tsaáxin sín kixin tí jie tinkákjasin sín. 23 Tí sín nínkakonna mé xikaha nínkakonhen sín T'aná. 24 Chróchóntahya sín jie tí chrók'uejókianhya sín ntihi chrókjuásinnya janhan kjuaxroan jie éxi tsíkjasinnya ninkexró senó. Ntá jie ó k'uíkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. 25 Mé xikaha tsónhen kaín tíha kixin ntá tsoxitéyá tí nkehe ntáchro tí ley kuente sín kixin: "Koha jie kjuásian janhan ntá kjónté kónínkakonna sín."† 26 A ntá tsi tí nkexro tsjinkítsa la ko sinchechéhe asánrâ. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuente T'aná. A ntá jehe ch'án mé tsochrónka nkexrí tjén janhan 27 la ko jahará kjaxinrá tsochronkarâ nkexrí tjén janhan kixin tí xrankixixín la k'uéjóni jnkokoâ.

16

1 Kaín tíhi tjetjonkarâ kixin chrókútoéhyará tí nkehe kjuákohará. 2 Tí sín judío tsjanjonhya sín kjuachaxin ts'ixenhenrá nínkoé sín la ko tsjixrakâ tí yaon kixin tí sín ts'óyán sín tí jahará tsontáchro sín kixin xikaha mé tjejóch'e sín xrâ kuente Dios, tsixro sín. 3 Mé xikaha sich'e sín kixin chónhya sín T'aná la ko chónhyana sín. 4 A ntá tjonkarâ kaín tíhi kixin tió tsjixrakâ tí yaon xikaha tsónhen ntá tsoxráxinkáonrá kixin ó k'uétjonkarâ senó a.

Tí xrâ ch'e Nchakuen Dios

Tí xrankixixín k'uétjonkarâ híhi kixin jnkokoâ k'uék'ejóni. 5 Ntá jie sátsjiyá tí tjen tí nkexro ichr'ánna k'uinka. Kjánchó nijnkorâ tjanchankíhyará

* 15:20 Juan 13.16 † 15:25 Salmo 35.19; 69.4

nketí sátsjiyá. ⁶ Ntá kjuixin tjonkará tíha ntá imá t'avará kixin kuínhínrá xíkaha xrjanka. ⁷ A ntá chaxín tí nkehe tjétjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhya ntá chrókuihya tí nkexro tsjinkitsará. A ntá tí sátsjiyá janhan ntá tsétoan kixin itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjéxin sín jie, la ko itjen ijnko ntja ntoá chrókuakja sín la ko Dios mé sinchekitoexín tí jie kjuasin sín. ⁹ Xíkaha chóna sín jie kixin tinkáchónkihya sín tí janhan. ¹⁰ A ntá tsonohe sín kixin itjen tí ntja ntoá kixin sátsjiyá tí tjen T'aná ntá ts'ikonhyará tí janhan inaá, ¹¹ la ko tsonohe sín kixin Dios sinchekitoexín ijie kixin ó kjuixin kuítóexín ijie tí nkexro t'etóan chjasintajni kixin tsjasóte.

¹² Naxa chonta janhan itsjé nkehe chrótjonkará, kjánchó chrókjuachahyará chrókiénxinrá jie. ¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjakohará ch'án kaín xín nkehe ntoá. Méxra jehya tí nkehe kuente ch'án tsochrónka ch'án na mé tí nkehe tsinhin ch'án mé tsochrónka ch'án tsjakohará ch'án tí nkehe tsonhen chr'éxin. ¹⁴ Jehe ch'án mé tsjikosàyana ch'án kixin ts'áyéhe ch'án tí nkehe kuéntana ntá tsjakohará ch'án nkehe tíha. ¹⁵ Kaínxín nkehe chóna T'aná na mé kuéntana. Mé xíkaha ntáxrjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjakohará ch'án nkehe tíha.

Senó ts'ává sín ntá chr'éxin tsochéhe sín

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrxéjin tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án inaá kixin sátsji ch'án tí tjen It'é ch'án?

¹⁸ ¿Nkexrí t'axrxéjin tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xíkaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan inaá. ¿Á tíha mé tjejtjanhankíhírá kichuára ní?

²⁰ Tjétjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sjintanihará kjónte chr'éxin tsocháhará má. ²¹ Éxi yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. ²² Mé xíkaha jahará ijie t'avará. Ntá xik'íkuan tí jahará inaá ntá imá tsochéhe asánra la ko tsokohya ninkexró tsakitsajahará tí kjuachéhe tsochontará.

²³ Tió tsi tí yaon a ntá tsjanhankínahyará ninkehó. Chaxín tí nkehe tjétjonkará kixin T'aná tsotjáhará ch'án kaín nkehe tsjanchatóxixínra nina.

²⁴ Naxa kjuánchatóxixínhyará ninkehó tí nina. Ntá jie tjanchará la ts'ayéherá, a ntá tsjintaxín tsocháhará.

Ínchéni Jesucristo mé kjuacha ch'án k'uetóan ch'án, ntá chjasintajni la náhi

²⁵ Tí nkehe tjétjonkará mé kjuíntayóaxián ó. Ntá tsjixraká tí yaon la í ninkehó sjintayóaxián na mé ntoá tsótjonkará nkexrí tjen T'aná. ²⁶ A ntá tí yaon a mé tsjanchaxínra nkehe nina. Ntá ntáxrjanhya tíhi kixin tsonixjayákonhanrá tí tjen T'aná ²⁷ kixin jehe T'aná mé tjuahará jahará. Na

mé tjuahará ch'án kixin jahará tjuanará tí janhan la ko kixin kuítekaonrá kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitohá chjasintajni ntá sátsiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie toá tjéchronka ninkehó ncheyoéxinhya. ³⁰ Ntá jie tienxínni kixin jaha mé noha kaín xín nkehe la ko t'ichjánxinhya kixin jnkójín nkexro chrókuanchankíha sín ichrén nkehe. Méxra xíkaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátéhe ch'ín Jesús ntáchro ch'án kixin:

—¿Á jie kuítekaonrá ní? ³² Ntá tsi tí yaon na mé jie tíha na ntá tsochrakonrá jnkojnkorá toxikará sátsjirá ntá tsitonará janhván tsjak'é. Kjánchó jehya janhván tjén. T'aná mé tjékjan. ³³ Tjéjtonkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjónté kjuaxróxinhya tjeorá tjetotjasóterá kjánchó chrakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etóan —ichro ch'án.

17

Ch'ín Jesús chrónóhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. ² Jaha tsichjehé kjuachaxin tí Xjaan kixin ts'etuénhen ch'án kaín xín chojni na ntá jehe ch'án tsochjéhe kjuachón jnkochrín kaín tí sín tsichjehé ch'án. ³ Tí kjuachón jnkochrín mé t'axrjéxín kixin tsochóxian sín tí jaha tí jnkokoá Dios chaxín tjechón la ko kjaxin tsochóxin sín Jesucristo la mé jaha kuétuénhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sít'a. ⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkokoá naxá k'ónahya chjasintajni.

⁶ Ó kjuixin kjuáqohá tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuáqohá sín itán la ntá ijie la ó kuítekaon sín. ⁷ Ntá jie ó kjuátsoan sín kixin kaín tí kjuachaxin chonta janhan la jaha tsíkánjuan. ⁸ Kixin ó kjuixin kjuáqohá sín tí tán chjina jaha, ntá kuítekaon sín, ntá kuénxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.

⁹ Janhan mé xrjanóaha kixin chrók'uayakonhén tí jehe sín. Jehya kixin xrjannóaha kixin chrók'uayakonhén kaín tí chojni sín chjasintajni. Náhi. Jehó xrjanóaha kixin chrók'uayakonhén tí sín chjina kixin kuéntá sín. ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jie kuéntana mé ts'inkaséyanxín tí jehe sín.

¹¹ A ntá jie tsitonahya janhan ntihi chjasintajni. Kjánchó jehe sín naxa tsitohé sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuenxián sín tí kjuachaxin tí ihniá kixin ntá jnkokoá chrókjuenkayáxin sín éxi tí jaha la ko janhan jnkokoá tjenkayáxinni. ¹² A ntá tí naxá k'uéjókian

tí jehe sín ntihi chjasintajni la k'uàyuakuànxián sín tí kjuachaxin tí ihniá chjina. Nijnko tí jehe sín k'uitjáyannya sín. **A** ntá jnkokoá nkexro mé k'uitjáyannya mé tí ch'in xráxín ts'itjáyannya kixin xikaha tsoxiteyá éxi níxja tí xroon tsíkin sín.

13 'Ntá jie ó tsjasán tí tjen jaha. **A** ntá naxa itjén janhan chjasintajni mé ntáxrjan tíhi kixin ntá tsochéhe sín éxi yóhe imá chàna. **14** Janhan mé kjuákoḥa sín itán jaha, **a** ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxi kjaxin janhan na janhya kuèntana chjasintajni. **15** Tjánháha kixin chrókuakítsjehé sín chjasintajni. Náhí. Tjánháha kixin chrók'uayakonhén sín kixin chrókujuich'iyehya sín tí Jínahya. **16** Jehe sín la jehya kuènte chjasintajni éxi yóhe janhan kjaxin janhya kuènte chjasintajni. **17** Nchetjuáxian sín tí kjuachaxin kuèntá kixin itán jaha mé tí tan chaxín ntoá. **18** Éxi yóhe jaha kuétuanna k'uinka chjasintajni mé xikaha janhan tétuannhan sín kixin chrók'uejójáxian sín tí sín chjasintajni. **19** Jehó tí xra kuèntá chrókjuít'a kixin chrókjuinkítsa tí jehe sín, **a** ntá jehe sín kjaxin chrókjuich'e sín tí xra kuèntá kixin kuínhin sín itán chaxín ntoá.

20 'Kjánchó jehya kixin xrjanóaha kixin chrókjuinkítsa tí jehó sín. Náhí. Kjaxin xrjanóaha kixin chrókjuinkítsa kaín tí sín tsitekaon sín chr'éxin tsin-hin sín tí nkehe tsochrónka tí sín a. **21** Mé xikaha xrjanóaha kixin kaín tí jehe sín jnkokoá chrókjuenkayáxian sín éxi jaha It'eni la ko janhan jnkokoá tjenkayáxinni mé xikaha xrjanóaha kixin kaín tí jehe sín la ko jaha la ko janhan jnkokoá chrókjuenkayáxinni. **A** ntá tí sín chjasintajni chrókuitekaon sín kixin jaha tsíkétuanna k'uinka ntihi. **22** **A** ntá tí kjuachaxin jie chjina na mé tjaha tí jehe sín kixin ntá kaín sín jnkokoá chrókjuenkayáxian sín éxi yóhe jaha la ko janhan jnkokoá tjenkayáxinni. **23** Janhan la ko jehe sín jnkokoá chrókjuenkayáxinni éxi jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehe sín éxi yóhe tjuana tí jaha.

24 'Jaha It'eni, tí sín kjuánjuan la tjínkavan kixin tí jehe sín chrók'uejójáxian sín tí tsjak'é janhan kixin chrók'uikon sín tí kjuachaxin jie chjina; kixin xráxín naxa k'ónahya chjasintajni k'uétjuana jaha. **25** It'eni jaha, imá jina jaha. Kjónté tí sín chjasintajni naxa chónhaya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka. **26** Ó kjuákoḥa sín kixin nkexro tí jaha la ko xikaha naxa tsjákoḥa sín, kixin éxi tjuana jaha mé xikaha chrójtjuéhe sín kichó sín la ko janhan chrók'uejójáxian tí jehe sín —mé xikaha chrónóḣe ch'in Jesús tí It'é ch'án.

18

*Ch'in Jesús sákjuiko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)*

1 Ó kjuixin ntáchro ch'in Jesús kaín tíha ntá jehe ch'án la ko tí sín k'uájiko ch'án k'uaxrjéxín sín ntiha k'uatoye sín tí tsaka Cedrón. Ntaha tjen ijnko nonte siín nchónhaya nta k'uixenhen ch'in Jesús la ko tí sín k'uájiko ch'án. **2** Kjaxin ch'in Judas tí ch'in sinchekji tí ch'in Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'in Jesús tí sín k'uájiko ch'án a. **3** **A** ntá ch'in Judas ó kjuikao ch'án nchónhaya sín soldado la ko iso sín policia kuènte njnko tsík'etuénhen tí sín nchat'á t'etoan la ko tí sin fariseo. Ntá kjuí sín kaín sín xraá sín chica la ko kjuikao sín xrohi t'inkaséyanxín tí

kjuixin sín. ⁴ **A** ntá ch'in Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'in Jesús tsíkjin chjasin Nazaret —ichro sín.

Ntá kjuátehe ch'in Jesús ntáchro ch'án kixin:

—Janhan tíha —ichro ch'án.

A ntá ch'in Judas tí ch'in tsíkjinchekji tí ch'in Jesús mé koí tjenkákjan ch'án tí jehe sín ntiha. ⁶ **A** ntá tió kjuátehe ch'in Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xikjanchankí ch'in Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xintáchro sín kixin:

—Tjeyáni tí ch'in Jesús tsíkjin chjasin Nazaret —ichro sín.

⁸ Ntá ntáchro ch'in Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá títóherá sátsji tí í so sín xríkian —ichro ch'án.

⁹ Mé xíkaha ntáchro ch'in Jesús kixin ntá tsoxiteyá tí nkehe tsintáchro ch'án kixin: “Tí sín kuanjon T'aná la ninkexró kjuíntak'itjáyanya.”* ¹⁰ Ntá ch'in Simón Pedro kuakitsje ch'án tí chica espada chrinkatoxin ch'án kóchrinjin ch'án tatsjon chjina ijnko ch'in it'in Malco, mé ijnko ch'in ch'ehe nchat'á t'etóan xra. ¹¹ Kjánchó ch'in Jesús ntáche ch'án tí ch'in Pedro kixin:

—Chr'axenhen tjoje chica espada méhe. Kjá ntáchrúa kixin tsjasótehyana, kjá ichrúa. Kjánchó T'aná kuanjon kjuachaxin kixin nchónhya tsjasótена —ichro ch'án.

Ch'in Jesús kjuák'e nkayakon tí ch'in t'etuenhen tí sín nchat'á
(Mt. 26.57-58; Mr. 14.53-54; Lc. 22.54)

¹² **A** ntá tí sín soldado la ko tí ch'in comandante t'etuenhen sín la ko tí sín policia judío kuente nínko mé itse sín tí ch'in Jesús kjuíncheteto sín ch'án.

¹³ **A** ntá sákjuíko sín ch'án ntóje ch'in Anás ich'ee tí ch'in Caifás mé tí nkexro tsík'áyéhe xra nchat'á t'etóan tí nánó a. ¹⁴ **A** ntá tí ch'in Caifás, jehe ch'án na mé tí nkexro tsintáche tí sín judío kixin íchá jina kixin jnkokoá chojni chrók'uenyákonhen kaín tí sín chjasén ch'án.†

Ch'in Pedro kjuínchemá ch'án kixin chóxin ch'án tí ch'in Jesús
(Mt. 26.69-70; Mr. 14.66-68; Lc. 22.55-57)

¹⁵ Ch'in Simón Pedro la ko í jnko ch'in k'uék'ajiko ch'in Jesús mé kuinkáchréhe sín ch'án. Tí ch'in ijnko a mé chóxin ch'án tí nchat'á t'etóan. Ntá k'uixenko ch'án tí ch'in Jesús tí ntásin ntóje tí nchat'á t'etóan. ¹⁶ Kjánchó ch'in Pedro kuitóhe ch'án ntója ntásin ó. Ntá tí ch'in ijnko a chóxin tí nchat'á t'etóan mé k'uaxrje ch'án ntásin nixjehe ch'án tí tjan t'ayakonhen tí ntója ntásin chrónóhe ch'án tjan ntá xranjon kjuachaxin ntá k'uixenhen ch'in Pedro kjaxin. ¹⁷ Na ntá tí tjan t'ayakonhen tí ntója ntásin kjuanchankíhi tjan tí ch'in Pedro kixin:

—¿Á jahya kjaxin xríkoa tí ch'in a? —ichro tjan.

Ntá kjuátehe ch'in Pedro kixin:

—Náhi, janhya —ichro ch'án.

* 18:9 Juan 17.12 † 18:14 Juan 11.49-50

¹⁸ Ntá imá kin ntá tí sín ch'exón xra la ko tí sín policia kjuaka sín xrohi ntaha tjejóxin toté sín tjejóchjixrohe sín. La ko koí ch'ín Pedro tjechjixrohe ch'án ntiha.

Tí nchat'á t'etöan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etöan kjuankíxin kjuanchankíhi ch'án tí ch'ín Jesús kíxin nkexro tí sín k'uájiko ch'án la ko nkehe tí kjuákohe ch'án sín. ²⁰ Ntá kjuátehe ch'ín Jesús ntáchro ch'án kíxin:

—Noxín kjuak'é kjuákua, la ntá kaín xín chojni kuínhin sín. Xrácín k'uékjákoxian kaín xín tí nínko ntsí la ko tí nínko jié tójnkotséxin kaín xín sín judío. Nínkehó nkehe kjuákohya imó. ²¹ ¿Nkeuènté tjanchankina tí janhan xíkaha? Chrókjuanchankíhi tí sín kuínhin kíxin nkexrí kjuákohe sín. Jehe sín mé nohe sín nkehe kjuákohe sín —ichro ch'án.

²² Kjuixín ntáchro ch'ín Jesús tíhi ntá ijnko ch'ín policia kuènte nínko mé tjentaxín ch'án ntiha ch'jéhe ch'án nkayakon tí ch'ín Jesús ntáchro ch'án kíxin:

—¿Á xíkaha jiéhe tsjátéhé tí nchat'á t'etöan ní? —ichro ch'án.

²³ Ntá kjuátehe ch'ín Jesús ntáchro ch'án kíxin:

—Tí ntoáhya tí nkehe xrjanka ntá chonka nkehe tí ntoáhya. A ntá tí ntoá tí nkehe xrjanka, ¿ntá nkeuènté kíxin tjatena? —ichro ch'án.

²⁴ Ntá k'uetöan ch'ín Anás kíxin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etöan.

Ch'ín Pedro xíkjinchemá ch'án inaá kíxin chóxin ch'án tí ch'ín Jesús

(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxa tjejín toté ch'án tjechjixrohe ch'án. Ntá kjuanchankíhi sín ch'án kíxin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kíxin:

—Náhi, janhya —ichro ch'án.

²⁶ A ntá ijnko ch'ín ch'ehe tí nchat'á t'etöan xra, na mé tí ch'ín a mé naxa kjéhya ch'án tí ch'ín tsíkochrínjin ch'ín Pedro ntatsjon, na mé kjuanchankí ch'án kíxin:

—¿Á jehya jaha tí k'uíquon tjekoa ch'án tí huerto ní? —ichro ch'án.

²⁷ Ntá ch'ín Pedro xíkjinchemá ch'án inaá kíxin jehya ch'án, ichro ch'án. Ntá xrinahya tuénxín itsje ijnko kochíntoa.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntöe ch'ín Caifás, sákjuiko sín ch'ín Jesús tí palacio t'etöanxín tí ch'ín gobernador. Ntá ó kjuankíxin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kíxin tí xíkaha chrók'uixenhen sín tí nchia a la chrókuamá sín tí jié siín ntiha la í xitjahya sine sín tí kia pascua, ichro sín. ²⁹ A ntá ch'ín Pilato k'uaxrjexín ch'án tí nchia t'etöanxín ch'án kjuanchankíhi ch'án sín kíxin:

—¿Nkehe tí jié chóna tí nkexro i? —ichro ch'án.

³⁰ Ntá kjuátehe sín ntáchro sín kíxin:

—Tí chróchóntahya ch'án jié jié la chrókjuíkoahyani ch'án —ichro sín.

³¹ Ntá k'uetöan ch'ín Pilato kíxin:

—Sátjikoará ch'án nchekitöexínrá nkerí jié chóna ch'án kíxin éxí ntáchro tí ley kuéntará —ichro ch'án.

Ntá kjuátehe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyánni ninkexró —ichro sín.

³² Mé xíkaha tsoxiteyá tí nkehe tsíntachro ch'ín Jesús kixin nkexrí ts'enxín ch'án. ³³ Ntá ch'ín Pilato xík'ixenhen ch'án tí nchia t'etoxánxín ch'án ntá k'uíyehé ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanchankíná, ¿á jahyá kjuenkayáxian xíkaha, o á í jnko nkexro kjuanchia jìe kixin tí janhan? —ichro ch'án.

³⁵ Ntá kjuátehe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etoxan mé kjuikaán sín tí jaha. ¿Xá nkehe kjuich'e kixin? —ichro ch'án.

³⁶ Ntá kjuátehe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhi. Tí chrókuétoan chjasintajni ntá tí sín xríkian chrókjuanjonko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrua? —ichro ch'án.

*Ch'ín Pilato kjuanjon kjuachaxin kixin its'en ch'ín Jesús
(Mt. 27.15-31; Mr. 15.6-20; Lc. 23.13-25)*

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjehe ch'án sín ntáchro ch'án kixin:

—K'úitjáhya ninkehó jìe chóna tí nkexro i. ³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjinkáonrá kixin ts'atjánta tí ch'ín Rey t'etuenhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uétoan ch'án kixin tsjate sín tí ch'ín Jesús. ² Ntá tí sín soldado kjuich'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehé sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntáchro sín kixin:

—Isé tsjak'e tsétuenhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'etoxánxín ch'án inaá nixjehe ch'án tí sín tsíkójkotsé ntáchro ch'án kixin:

—Tsjeherá tsakítsjexián ch'án ntihi kíxin tsonohará kíxin k'uitjáhya janhan ninkehó jie chóna ch'án —ichro ch'in Pilato.

⁵ Ntá k'uaxrjexin ch'in Jesús ntiha tjenkáya kja ch'án tí corona tsík'óna ntach'i la ko tjenkáya ch'án tí ka kjátse tié. Ntá ntáchro ch'in Pilato kíxin:

—Tsjeherá, ntihi tjen ch'án —ichro ch'án.

⁶ A ntá tió k'uikón tí sín nch'at'a t'et'otan la ko tí sín policia kuènte nínko ntá kjuankíxin sín t'óyako sín ntáchro sín kíxin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntáchro ch'in Pilato kíxin:

—Jahará tjíkoará ch'án tjaké nkanirá ch'án ntacruz kíxin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kíxin:

—Jeheni chojni judío mé chóntani ijnko ley t'et'otan kíxin chrók'uen ch'án kíxin ncheyóhe ch'án asén ch'án kíxin Xjeen Dios tí jehe ch'án —ichro sín.

⁸ Ntá tió kuínhin ch'in Pilato tíha ntá antsi chrakon ch'án ⁹ ntá xik'ixenhen ch'án tí nchia t'et'oxin ch'án inaá kjuanchankíhi ch'án tí ch'in Jesús kíxin:

—¿Nketí k'uinkaxian jaha? —ichro ch'án.

Ntá ch'in Jesús ninkehó kjuáteheya ch'án.

¹⁰ Ntá ntáchro ch'in Pilato kíxin:

—¿Jaha nkekuénté tjáteheya nkehe tjánchánkíha? ¿Á noahya jaha kíxin chonta janhan kjuachaxin tséotan tsjak'enkania ntacruz la ko kjaxin chonta janhan kjuachaxin tsontáxrjan kíxin sátsjia kohya nkehe tsonhan? —ichro ch'án.

¹¹ Ntá kjuátehe ch'in Jesús ntáchro ch'án kíxin:

—Ninkehó kjuachaxin chróchontahya jaha chrókuéotan chrók'uén o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsi jíe jie chóna sín, a ntá jaha la kánhyó —ichro ch'án.

¹² Ntá kuínhin ch'in Pilato tíhi ntá kjuankíxin ch'án kjueyá ch'án nkexrí chrók'uet'otan ch'án kíxin sáchrókjui ch'in Jesús kohya nkehe chrókónhen ch'án. Kjánchó tí sín judío k'óyako sín ntáchro sín kíxin:

—Kja tí tsjtohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'in t'et'uenhen tí nación kuénténi. Tí nkexro ch'éna asén ch'án éxi ijnko rey mé nínkakonhen ch'án tí ch'in t'et'uehenni —ichro sín.

¹³ Ntá kuínhin ch'in Pilato tíhi ntá k'uet'otan ch'án kíxin tsakitsje sín tí ch'in Jesús ntója ntá ch'in Pilato kjuák'etjaxin ch'án tí silla nchekit'oxin ch'án jie, mé nkíva hebreo mé it'in Gabata, mé t'axrjexin kíxin t'at'ó noi jehó xro tsík'óna. ¹⁴ Na mé ó chjina chonkíxin ntá tí tsonjin la mé ó tsjasin sín tí kia pascua. Ntá ch'in Pilato ntáche ch'án tí sín judío kíxin:

—Ntihi itjen tí ch'in rey kuéntará —ichro ch'án.

¹⁵ Kjánchó jehe sín k'óyako sín ntáchro sín kíxin:

—¡It's'en ch'án! ¡It's'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'in Pilato kíxin:

—¿Á tjínkáonrá kíxin janhan chrókjuakénkania ijnko ntacruz tí ch'in rey kuéntará ní? —ichro ch'án.

Kjánchó tí sín nch'at'a t'et'otan mé kjuátehe sín kíxin:

—Náhi. Chóntahyani í jnko rey, jehó tí ch'in César —ichro sín.

¹⁶ Ntá ch'in Pilato kjuanjon ch'án kjuachaxin sátsjiko sín tí ch'in Jesús tsjak'enkáni sín ch'án ntacruz. Ntá sákjuiko sín ch'án.

*Kjuák'enkáni ch'ín Jesús ntacruz**(Mt. 27.32-44; Mr. 15.21-32; Lc. 23.26-43)*

¹⁷ Ntá sákjuiko sín tí ch'ín Jesús kuamá ch'án tí ntacruz tsjak'enkáni ch'án. Ntá kjuíjiko sín ch'án ijnko tjo t̄ik̄itexín sín Hueso Kja Chojni. ¹⁸ A ntá nkiva hebreo mé t̄ik̄itexín sín Gólgota. Ntaha mé kjuak'enkáni sín ch'án tí ntacruz. Ntá k̄j̄axin yaá sín nánánko k'uéj̄o jnkojnko sín ntá jnkosiné kjuák'e ch'ín Jesús. ¹⁹ Ntá k'uętoan ch'ín Pilato k̄ixin tsokjin sín ijnko ntachiso tsjak'enkáni sín ikja tí ntacruz ntáchro k̄ixin: “Ch'ín Jesús kjuix̄in ch'án chjasin Nazaret, mé tí ch'ín Rey kuente tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna k̄ixin chjino tí chjasin Jerusalén tsikjak'enkáni sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín. ²¹ Ntá tí sín nchat'á t'ętoan kuente tí sín judío mé ntáche sín tí ch'ín Pilato k̄ixin:

—Chrókjinhya jaha x̄ikaha k̄ixin jehe ch'án mé tí “Ch'ín Rey kuente tí sín judío.” Náhí. Íchá jina chrókjin jaha k̄ixin “Jehe ch'án ntáchro ch'án k̄ixin jehe ch'án mé tí ch'ín Rey kuente tí sín judío” —ichro sín.

²² K̄j̄ánchó kjuátęhe ch'ín Pilato k̄ixin:

—Tí letra kuętoan k'óna la ó k'óna, k̄j̄onté x̄ikahó tsitohe —ichro ch'án.

²³ Ntá tí sín soldado tió tsíkjin tsikjak'enkáni sín tí ch'ín Jesús tí ntacruz ntá kuákja sín tí ké ch'án la k'ókikayęhe sín jnkojnko ka kuákja sín kanoé sín. La ko k̄j̄axin kuákja sín tí ka k̄j̄injin k'uék'inkáya ch'án. Tí ka mé tsixronhya ka la me jnkokóá ka tíha. ²⁴ Ntá tí sín soldado kjo sín kichó sín ntáchro sín k̄ixin:

—Tsótséchjehyani tí ké ch'án. Íchá jina sich'exinni suerte ntá tsotsjeheni siná nkexo ts'áyęhe tí ka.

Mé x̄ikaha xiteyá éxí ntáchro xroon itén Dios tsíkjin sín ósé ntáchro k̄ixin: “Kjuích'exin sín suerte ntá k'ókikayęhe sín kaná.”* Mé x̄ikaha kjuích'e tí sín soldado.

²⁵ A ntá chjino tí ntacruz kjuák'enkáni ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena. ²⁶ A ntá tió k'uikon ch'ín Jesús k̄ixin itjen tí iné ch'án la ko chjino tjen tí ch'ín antsi tjuéhé ch'án k'uék'ajiko ch'án, ntá nixjęhe ch'án tí iné ch'án, ntáchro ch'án k̄ixin:

—Naná, tsjehé k̄ixin ntaha tjen xjaan —ichro ch'án.

²⁷ Ntá nixjęhe ch'ín Jesús tí ch'ín a ntáchro ch'án k̄ixin:

—Tsjehé k̄ixin ntaha itjen iná —ichro ch'án.

A ntá tí ch'ín a mé k'uáyęhe ch'án tí tjan a sákjuiko ch'án tjan ntęe ch'án k'óna éxí iné ch'án x̄ikaha.

*Ik'uén ch'ín Jesús**(Mt. 27.45-56; Mr. 15.33-41; Lc. 23.44-49)*

²⁸ Ntá ó nohe ch'ín Jesús k̄ixin kaín x̄r̄á ó kjuixin xiteyá ntá tjinkaon ch'án k̄ixin tsoxiteyá kaín nkehe ntáchro tí xroon tsíkjin sín ósé ntá x̄ikaha ntáchro ch'án k̄ixin:

—Ik'uén ntá.

²⁹ Ntá ntíha tjen ijnko nchésen tsíkaón xranvino sán ntá kjuínchekjataxin sín ijnko ka tí xranvino, a ntá tí ka a kjuak'ekjen sín ijnko nta k̄j̄injin, ntá kjuínchekhriin sín tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án k̄ixin:

—Ó kjuixin xiteyá kaín xín nkehe —ichro ch'án.

* 19:24 Salmo 22.18

Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuénte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé injko yaon imá jíé, ichro sín. Mé xikaha kjuanchehe sín tí ch'ín Pilato kixin ts'etqan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuénte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá injko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jñi la ko ìnta. ³⁵ A ntá janhan mé tjékjan tí xroon í mé kjuak'é ntiha k'uíkuqan kixin xikaha kónhen ntá ntoá tjéxrjanka kixin jahará kjaxinrá chrókúitekáonrá. ³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésqe ch'án.”[†] ³⁷ Kjaxin itjen í jnko nketí nixja tí xroon itén Dios tsíkjin sín ósé ntáchro kixin: “Tsokomá sín tí nkexro tsích'áte sín chica.”[‡]

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé injko ch'ín kjuixín chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxín ch'án tí ntacruz tí cuerpo kuénte ch'ín Jesús sátsjiko ch'án tsjavá ch'án. Jehé ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuénte ch'ín Jesús. ³⁹ Kjaxin ch'ín Nicodemo, tí ch'ín kjuínixjehe tí ch'ín Jesús injko tie a mé kjuí ch'án kjuíkqao ch'án treinta kilo xroqan xraxé tjiko xroqan mirra la ko xroqan aloes. ⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuénte ch'ín Jesús kjuínchek'ísímá sín injko ka kjínjin tsika tí xroqan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkání ch'ín Jesús ntacruz ntá chjinaxón ntiha tjen injko huerto itjen injko tóye nixin naxa ninkexró tsixráváhya ntiha. ⁴² Ntaha kjuavá sín tí ch'ín Jesús kixin chjinaxón tjen tí tóye a la ko í séhya tsoxrankixin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankixixín semana ntá tí tjan María Magdalena naxa sítié sákjuí tjan tí tjen tí tóye, ntá k'uíkon tjan kixin ó tsíkjin tí xro tsík'íkjèxin tí tóye a. ² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuéhe ch'ín Jesús, ntá ntáchro tjan kixin:

—Ó tsíkakitsjexín sín tóye tí cuerpo kuénte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tóye a. ⁴ Ntá yóí sín kuinká sín sákjuíko kichó sín. Kjánchó tí ch'ín í jnko antsí tjiqan kuinká ch'án ntá kánhyó tjiqan kuinká ch'ín Pedro, ntá tí ch'ín í jnko

senó ch'án kjuuji ch'án tí tjen tí tòye a. ⁵ K'uísén ch'án tsjehe ch'án nkaxenhen tí tòye a. **A** tí ka tsík'isímá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòye a. ⁶ Ntá kjónté chr'éxin kjuuji ch'ín Simón Pedro ntá k'uixenhen ch'án tí tòye a. Ntá kjaxin k'uíkon ch'án kixin tjejó tí ka tsík'isímá ch'ín Jesús ⁷ la ko k'uíkon ch'án tí ka tsík'isímá ikja ch'án na mé tí ka tsíxrèya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkjiiji senó na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. ⁹ Kixin naxa k'uékienxínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús. ¹⁰ **A** ntá tí sín sátsíkijtsjehe tòye la xíkjan sín ntøe sín.

Titàya k'uikuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítøhe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye ¹² ntá xrínahya k'uíkon tjan yaá sín ángel tjejóyá sín ka tjóá tjejótxajin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. ¹³ **A** ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátøhe tjan ntáchro tjan kixin:

—Sátsíkijko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátøanhya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjánka? ¿Nkexro tjejóyá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chrónka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkíva hebreo ntáchro tjan kixin:

—¡Raboni! —ichro tjan. Tíha mé t'axrjexin kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxa sátjíhya janhan tí tjen T'aná. Sátjia tjítsjehé tí sín kíchina chénka sín kixin sátsjyá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kixin xíkaha tsík'ikon tjan Ìnchéni. La ko kjaxin chrónka tjan kixin xíkaha tsíntáchro ch'án.

Tí sín k'uék'ajiko ch'ín Jesús titàya k'uikuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ **A** ntá ó kónjin tí yaon a mé tí yaon xrankixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jína kixin chrakonhen sín tí sín judío. Ntá xrínahya titàya kónohe sín k'uíkon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jína tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uikon sín Inchéni. ²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tetuanhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéherá Nchakuen Dios. ²³ Tí ts'itjáyhanhárá tí jie kjuasin jnkojin chojni ntá xikaha tsjin tí ijje sín. Ntá tí ts'itjáyhanhárá tí jie kjuasin jnkojin chojni ntá naxá kjuinhya tí ijje sín —ichro ch'án.

Ch'ín Tomás k'uikon ch'án kixin tsixechón Inchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikitexín sín ch'ín Nóhé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uikonni Inchéni —ichro sín.

Kjánchó ntáchro ch'ín Tomás kixin:

—Tí ts'íkõnha janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, ¿na mé nkexrí chrókuitekavan? —ichro ch'án.

²⁶ A ntá tí k'uátsínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jina ntá xrínahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chróntáchrohya kixin chaxínha. Tsítekavan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—¡Inchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuitekavan. Ntá antsí náxrxón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsikjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrxón k'uikon tí sín k'uájiko ch'án kjónté chrónkahya tí xroon i kixin xikaha kónhen. ³¹ Tí nkehe chrónka tí xroon i ikjian janhan kixin chrókuitekáonrá jahará kixin Jesús mé tí Cristo, mé tí Xjeen Dios kixin ntá kaín ni chróchóntani kjuachón jnkochrín kixin chrókuitekaonni ch'án.

21

Yato tí sín k'uék'ajiko ch'ín Jesús xrínahya titàya k'uikon sín ch'án

¹ A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xikaha kónhen ² kixin jnkokoá k'uéjé sín ch'ín Simón Pedro la ko ch'ín Tomás, me tí ch'ín tikitexín sín ch'ín Nóhé, la ko ch'ín Natanael kuixin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús. ³ Ntá ntáchro ch'ín Simón Pedro kixin:

—Sátsjitse koche —ichro ch'án.

Ntá kjuátehe sín kixin:

—Koíni sátsjikoani —ichro sín.

Ntá sákjuí sín k'ujt'ótjen sín ijnko ntabárcɔ. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xríngħya titàya k'uíkon sín itjen ch'ín Jesús chrínta ntayaon, kjánchó kjuátsoanħya tí sín k'uek'ajiko ch'án kixin jehe ch'án. ⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tseh̄yará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabárcɔ la tsotserá va —ichro ch'án.

Ntá xikaha kjuich'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónħya koche tjinká. ⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—İnchéni tí méhe! —ichro ch'án.

Ntá kuínħin ch'ín Simón Pedro kixin İnchéni tíħa ntá k'uinkáya ch'án iké ch'án inaá (kixin tsákakitsje ch'án iké ch'án) ntá kjuiankí ch'án ntá. ⁸ Tí í so sín k'uek'ajiko ch'ín Jesús mé kjuíji sín tí chrínta ntayaon kjuikao sín tí ntabárcɔ tinkánkákjentóxin tí nchísén tjinká koche chrítaón ntá kixin ijnko ciento metro kjinxin tí chrínta ntá k'uejó sín. ⁹ Ntá kjuíji sín chrínta ntá ntá k'uinkajinxin sín tí ntabárcɔ ntá k'uíkon sín tjeche xrohi síxenkj xrinta ntá chrítaón tí xrinta tjekjen ijnko koche la ko nánko siín niotja. ¹⁰ Ntá kjuanchia ch'ín Jesús ntáchro ch'án kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'ujt'ótjen ch'án tí ntabárcɔ kuákja ch'án tí nchísén kuinkánkákjen ch'án xrákao ch'án tí nchísén tjinká koche iye na mé ijnko ciento cincuenta y tres va. Ntá kjónté nchónħya va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

A ntá nijnko tí sín k'uek'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin İnchéni tíħa. ¹³ Ntá kóchjina ch'ín Jesús kuákja ch'án tí niotja chjéhe ch'án tí jehe sín la ko xikaha xikjanjon ch'án tí koche.

¹⁴ Tíħi mé níxin k'uíkon tí sín k'uek'ajiko ch'ín Jesús kixin tsíxechón ch'án.*

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánħyó? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, İnchéni, ó noha kixin tjinkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha la t'ayakohén tí kolélo kuéntana —ichro ch'án.

¹⁶ Ntá yóxin kjuanchankí ch'ín Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátehe ch'ín Pedro ntáchro ch'án kixin:

—Jeén, İnchéni, ó noha kixin tjinkavan tí jaha —ichro ch'án.

* 21:14 Juan 20.19,26

Ntá ntáchro ch'ín Jesús kixin:

—Ntá xikaha la t'ayakonhén tí kolélo kuèntana —ichro ch'án.

¹⁷ Ntá nixin kjuanchankí ch'ín Jesús kixin:

—Jaha Simón, xjeen Jonás, ¿á tjinkávan tí janhan? —ichro ch'án.

À ntá k'uává ch'ín Pedro kixin nixin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkavan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuèntana. ¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. À ntá tió tsotáda jaha ntá tsjéntoá tjá ntá í jnko nkexro sintak'inkáya ka la ko sátsjikoá sín tí tóxrjínnya sáchrókjuia —ichro ch'án.

¹⁹ À ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjéxín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uikon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án.† ²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjínkavan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehi ntáchro ch'án kixin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ À ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxa siín nchónhya nkehe kjuakoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasin-tajni chrók'uinka kaín tí xroon chrók'óna xikaha. Amén. Ó tjen.

† 21:20 Juan 13.25

Tí xrā kjuích'e tí sín kjueyá ch'ín Jesús

Itsi Nchakuen Dios

¹ Tjuaha jaha Teófilo na tí libro saoxín mé kjan̄ kaín nkehe kjuako ch'ín Jesús la ko tí xrā kjuích'e ch'án tí xrankixín ² hasta tí yaon sákjuí ch'án nkaya nkajní. **A** ntá tí naxā sákjuíhya ch'án nkajní la kjueyá ch'an tí sín sich'ehe ch'án xrā la ntá tí Nchakuen Dios mé kjuínkítsa ch'án ntá nixjehé ch'án sín la k'uetuēnhen ch'án sín kixin̄ tsonohe sín nkehe tí xrā chrókjuich'e sín. ³ Tió kjuixin̄ k'uén ch'án ntá kónoxín kixin̄ tjechón ch'án, k'uikon̄ tí jehe sín la ko cuarenta yaon mé k'uikon̄ sín ch'án jnkoyaxón. Itsjé nkehe kjuakoxín ch'án kixin̄ tsonoexín sín kixin̄ chaxín tjechón ch'án la ko kjuako ch'án nkexrí tí kjuachaxin̄ kuēnte Dios.

⁴ Tí naxā kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kixin̄ naxā sátsjichronkarā sín tí chjasin̄ Jerusalén. Chronka ch'án kixin̄:

—Chróchonhénrā ntihō chrók'uayéhérá tí nkehe tsjanjon T'aná, me tí nkehe kuinhínrā xrjan̄ka janhan. ⁵ **A** ntá chaxín ch'ín Juan̄ intá ó kuíkítexín ch'án chojni. **A** ntá ijie kánhyó itsjé yaon̄ ntá jahará la Nchakuen Dios la tsikitiaxínrā.

Sákjuí ch'ín Jesús nkaya nkajní

⁶ Ntá tí naxā kójnkotséko sín ch'ín Jesús, kjuanchankíhi sín ch'án kixin̄:

—Jahā Ìnchéni, ¿á tsjánjonhya kjuachaxin̄ jaí ts'etōanni chjasénni Israel inaá? —ichro sín.

⁷ Ntá kjuátēhe ch'ín Jesús kixin̄:

—Náhi. Chontahyará kjuachaxin̄ tsonohará nkesá tsonhen tíha. Jehó T'aná chóna kjuachaxin̄ ts'etōan tíha. ⁸ Ntá itsi tí Nchakuen Dios ntá ts'ayéhérá kjuachaxin̄ sátsjichronkarā nkehe tí xrā kjuít'a, mé sátsjirá tsjákohérá kaín sín chjasin̄ Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin̄ nixja ch'ín Jesús ntá xrin̄ghya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án. ¹⁰ Ntá naxā tjejókonta sín tí sákjuí ch'ín Jesús nkajní, ā ntá xrin̄ghya títàya k'uikuén sín yaá chojni ntoa tjejóyá sín ka tjóá tjejó sín chjinxón tí tjejó tí jehe sín. ¹¹ Ntá tí sín a mé ntáchro sín kixin̄:

—Jahará chojni kjuíxinrā estado Galilea, ¿nkehe tsonhen naxā kontará nkajní? Xíkaha tjejokontará sákjuí Jesús la ko mé xíkaha xiki ch'án inaá —ichro sín.

Xreyá ch'ín Matías tsjiatéhe lùké ch'ín Judas

¹² Na ntá kjanxin̄ sín tí jnā it'in Olivo na ikjan sín chjasin̄ Jerusalén. Tíha a mé kjin̄hyó tjen kixin̄ ó xíkahō k'uetōan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin̄ ntiha ntá k'uit'ótjen sín tí yóxin̄ piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin̄ ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuēnte tí partido cananista, la ko kjaxin̄ ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehé sín Dios

la ko k'uéjoko sín tí kíchó tí ch'in Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'in Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsikójnkotsé ntíha. Ntá ntáchro ch'án kixin:

¹⁶ —Kíchóni, t'ichjánxin tsoxiteyá éxí nixja xroon itén Dios éxí tsínixja ch'in David tsichróntka Nchakuen Dios nkehe sich'e ch'in Judas. Tí ch'in Judas mé kjuikao ch'án tí sín tsotsé ch'in Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyèkoni ch'án. ¹⁸ A ntá jehe ch'án mé sákjuík'enaxín ch'án ijnko nonte tí chichaon kjuacha ch'án kixin tí jie kjuasin ch'án. Ntá k'uánótjen ch'án la ikja ch'án k'uitja nonte la xitjehé tsee ch'án k'uaxrje kaín sjintanòé ch'án. ¹⁹ Ntá xikaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrjexín kixin ijnko nonte síin ijni. ²⁰ Tí xroon Salmo mé nixja xikihí:

Tsitöhe ntóé ch'án a,
la kóhya nkexro ts'ejó ntíha.

La ko kjaxin ntáchro kixin:

Í jnko nkexro ts'áyéhe tí xra kuènte ch'án.*

Mé xikaha tsíkjin ch'in David.

²¹ Tí tjejóni ntíhi la síin chojni ó k'uájikoni xráxín tí k'uék'ajikoni Ìnchéni Jesús ²² desde k'uikonní nkexri kjuíkite ch'in Juan tí jehe ch'án la ko hasta k'uikonní sákjuí ch'án nkaya nkajní. Ntá ijie t'ichjánxin tsoxreyá jnkójín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xikaha chrónka ch'in Pedro.

²³ Ntá kjuenkayáxin sín tsonoxín yaá chojni mé tí ch'in José, t'ikõn ch'án Barsabás la ko Justo, la ko kjaxin í jnko ch'án it'in Matías. ²⁴ Ntá nixjehé sín Dios la ntáchro sín kixin:

—Ìnchéni jaha mé choxian asén kaín chojni. Tjákohéni nkexro tsonhen tocar xra tí yaá tí nkexro í kónoxín ²⁵ tsjiatéhe xra apóstol kuènte ch'in Judas. A ntá tí ch'in Judas mé kuítóhe ch'án tí xra kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínahya kónhen tocar tí ch'in Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xrínahya kuínhin sín ijnko tóvéntó kuixín nkajní. Tí tóvéntó mé éxí ijnko xrinto fuerte chjéhe. Kuenté tí nchia tjejóxehen sín mé kóvéntó kjaxin. ³ Ntá xrínahya k'uikon sín nkehe éxí xrohi nene tsjehe. Ntá tíha xikayehe la k'uéjókjen jnkójnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankixin sín nixja sín í jnko nkíva kixin Nchakuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjó chojni judío tjinkaon sín sinchexiteyéhé sín tí nkehe tinkáchónki sín, mé tsíkjin sín nkuixín chjasinta-jni. ⁶ A ntá jehe sín mé tsíkinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kixin jnkójnko tí jehe sín mé

* 1:20 Salmos 69.25; 109.8

kuínhin sín kixin nixja tí sín a jnkojnko nkívee sín. ⁷ Ntá síxrànkā sín, chrakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkijxin sín estado Galilea? ⁸ La ¿nkekuènté tjejótinhini kixin nixja sín jnkojnko nkíveeni? ⁹ Kixin ntihi mé siín chojni tsíkijxin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuixín Africa ántsi nó ntaha Cirene. La ko kjaxin chojni romano tjejó ntihi. Iso tí sín a mé chaxín tsíkokjéxín judío, la í so la tìnkáchónki sín Dios éxí tí sín judío xíkaha. ¹¹ La kjaxin siín chojni tsíkijxin Creta, la ko Arabia. Mé xíkaha kaín ni tsíkijxinni tí chjasin a mé tsíkinhini tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kixin:

—¿Nkehe t'axrjéxín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'in Pedro chénka tí sín siín

¹⁴ Ntá jehe ch'in Pedro mé k'uínkatjen ch'an, kjuák'exín toté ch'an la ko tí tejnko sín apóstol mé k'uínkatjen sín la ntá ch'in Pedro mé itsen nixja ch'an. Ntáchro ch'an kixin:

—Jahará chojni judío la ko jahará tjejorá chjasin Jerusalén. Kaínrá tjejorá tinhínrá tí nkehe tsóxrjanka. ¹⁵ Tí sín tjejó ntihi la jehya tsékoan sín éxí ntáchrorá, kixin na ntá las nueve nchítjen la kohya nkexro tsékoan. ¹⁶ Tíhi mé tsíchronka ch'in profeta Joel:

¹⁷ Ntáchro Dios kixin: Itsi ijnko yaon tsjixixín

ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'íkuèn sín tí nkehe tsjákoḡa.

La ko tí sín ó táda la kotáchrién sín ts'íkonxín sín kixin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xṛa la ko tí síchjin kjaxin

la tochrónka sín tanná.

¹⁹ Ntá janhan mé tsjákoḡian ijnko kjuachrakon nkajní.

A ntá chjasintajni tsjákoḡian kjuaxroan:

mé ts'ixín ijnj la ko xrohi la ko itjuj tsík'óna ihnchi.

²⁰ Mé tí yaon la ts'inkaséyanxínnya, ts'óna ts'ixín tie.

A ntá tí nitjó mé ts'óna ijnj.

Xíkaha senó tsonhen ntá itsi Ìnchéni.

Tíhi mé ijnko yaon imá jié la imá náxrjón.

²¹ A ntá kaín tí nkexro tsjanchehe ihnjé Ìnchéni kixin tsjinkítsa sín mé tsaá sín.*

Mé xíkaha tsíchronka ch'in Joel.

²² Jahará chojni israelita tinhínrá tí nkehe tsóxrjanka. Tí ch'in Jesús tsíkijxin chjasin Nazaret mé Dios kjuakoḡin ch'an kixin tsíchr'an ch'an kixin kjuasin ch'an itsjé kjuaxroan jié k'uíkonrá la ko kjuako ch'an kixin Dios tsíchjéhe ch'an kjuachaxin kixin tjinkaon ch'an chrók'uíkonrá. Jahará ó jína nohará kaín tíha. ²³ Kjónté xíkaha k'uíkonrá la jahará itserá ch'an éxí tsíkjenkayáxin Dios ósé. A ntá jahará kjuinçek'ayéhéra ch'an tí sín jínahya, a

* 2:21 2.17–21 Joel 2.28–32

ntá tí sín jínahya mé k'óyán sín ch'án, kjuak'enkani sín ch'án ijnko ntacruz.
²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté
 kuènte kjuach'én kixin ntá tí kjuach'én xitjahya ts'etuñhen tí jehe ch'án. ²⁵ A
 ntá ósé tí ch'ín rey David tsíchrónka ch'án kuènte Jesús ntáchro ch'án kixin:

Jaha Ìnchéni t'íkuan kixin jnkochrín tjétaón ntja tí xritjak'é janhan.

Jaha mé itjen tjaná chjina kixin chrókohya jie chrókjuásian.

²⁶ Méxra imá chéhe asenná. Ir'va tsjexian tí nkehe náxrjón.

Ó nòna kixin kohya nkehe ts'atsínka kjónté its'én.

²⁷ Ó nòna kixin tí jaha tsjtóehya asenná chríkjan tí siín chojni tsík'en.

Tsjánjonhya kjuachaxin kixin tsqxíka ntóna kixin janhan mé ijnko nkexro
 t'aha xra jína tjuèhe.

²⁸ Jaha mé kjuákona tí ntja tsjanjon kjuachón. Jaha mé nchechàna kixin
 t'ayakonna.†

Mé xíkaha tsíkjin ch'ín David.

²⁹ 'Kíchóni tjtóhérá tsontáxrjan kixin ch'ín David, tí nkexro k'uaxrjeníxinni
 mé tsík'én ch'án la ko tsíkjixravá ch'án. Ntá naxa noheni nketí tsíxravá ch'án.

³⁰ A ntá ch'ín David mé ijnko nkexro tsíchrónka itén Dios la ó nohe ch'án kixin
 chaxín Dios chrónka kixin ijnko nkexro ts'axrjeníxin ch'án mé ts'óna rey mé
 ts'etóan éxi jehe ch'án k'ueṭoan ch'án. ³¹ Mé xíkaha ch'ín David la ósé ó nohe
 ch'án nkehe tsonhen la mé chrónka ch'án kixin tsóxechón Cristo la ko ntáchro

ch'án kixin tí asén ch'án tsitóehya tí siín tí sín tsík'en la ts'itjáyanhya tí cuerpo
 kuènte ch'án. ³² Méxra Dios kjuínchexechón tí ch'ín Jesús, mé k'uikonni kaín
 ni la mé chrónkani kixin chaxín tíha. ³³ Ntá ijie Jesús mé sákjuiko ch'án Dios

la nàno itja chjina Dios mé tjen ch'án. Ntá tsintáchro It'é ch'án Dios kixin
 tsochr'án ch'án tí Nchakuen ch'án. Ntá jie ó kui la ó k'uikonrá la ko kuínhínrá
 nkehe kónhen. ³⁴ Tí ch'ín David la jehya jehe ch'án sákjuí nkaya nkajní, kixin

jehe David ntáchro ch'án kixin:

Ìnchéni Dios mé ntáche tí Ìnchéni kixin:

“Tjak'e tjaná chjina ntiho tsétóan,

³⁵ tsjixinjian kaín xín tí sín nínkakonhan la tsjachahya sín ts'etóan sín kixin
 jahvá mé tsétóan.”‡

Mé xíkaha tsíkjin ch'ín David.

³⁶ Ntá kaín rá chojni israelita chrókónohará chaxín kixin jehe tí ch'ín Jesús ó
 kjuakénkanirá tí ntacruz la Dios mé kjuích'éna Ìnchárá ijie, mé tí Cristo —mé
 xíkaha chrónka ch'ín Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi
 sín ch'ín Pedro la ko tí í so sín kjueyá ch'ín Jesús. Ntáchro sín kixin:

—Kíchóni, a ntá jie la znkexrí chrókjuich'eni?

³⁸ Ntá kjuátehe ch'ín Pedro ntáchro ch'án kixin:

—Chrókuitóhérá tí ijjará la chróxráxinkáonrá Dios. Ntá chrókuikitiaxínrá
 ihnjé Jesucristo ntá Dios mé tsjakjihinhará tí ijjará ntá jehe ch'án tsjanjon
 ch'án Nchakuen ch'án ts'ayéhérá. ³⁹ Dios mé sinchekjtonhanrá ch'án tí
 Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án
 Nchakuen ch'án kaín xín tí sín tjejó ikjín. Mé jehe ch'án tsochjéhe ch'án
 Nchakuen ch'án jnkoinko tí nkexro tsjeyá ch'án.

⁴⁰ Mé xíkaha ntáchro ch'ín Pedro la ko í so nkehe ntáchro ch'án. Nta nixjehe
 ch'án sín inaá, ntáchro ch'án kixin:

—Chrókuiŋtōhérá tí jínahya tjenkayáxin tí chojni siín chjasintajni kíxin jahará me jína chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankíxin tinkáchónki Închéni Jesús la k'uíto tí sín ó xráxin siín. ⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueya Jesús la kjuínkítsa sín kjuanjón sín tí nkehe chrókjóné tí í so sín la ko chjéhe sín Dios kjuasáya la ko kójnkotsé sín kíxin sine sín niotja xraxinkakonxín sín kíxin ik'uén Închéni.

Mé xíkaha k'uéjé tí sín xrankixín tinkáchónki Închéni

⁴³ La ntá kaín tí í so sín mé chrakon sín kíxin tí sín tsíkjejá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokoá k'uéjé sín la jnkokoá chóna sín tí nkehe sine sín. ⁴⁵ Kjuínchejji sín tí nkehe chóna sín ntá k'óxikeyehe sín tí chichaon la chjéhe sín tí sín chónahya. ⁴⁶ Jnkojnko yaon kójnkotsé sín tí nínko la ntá jnkojnko ntōe sín kjóneko kichó sín. La ko kjóné sín niotja kíxin xraxinkakonxín sín kíxin ik'uén Închéni la ko kjuaxróxin k'uéjé sín la kohya nkexro kjuínchehnke. ⁴⁷ Kjuanchehe sín kjuasáyé Dios. Ntá kaín chojni k'uéchónthehe sín kjuasáya. A ntá jnkojnko yaon Închéni mé kjueya iso chojni kíxin tsotsjé tí sín tsaá.

3

Kuítohe jína ijnko nkexro xitjahya tji

¹ Ijnko yaon tí ch'ín Pedro la ko ch'ín Juan mé chrin sín sákjuí sín tí tjen tí nínko. Mé kjuíji sín las tres kónjín, tí hora mé nixjehe sín Dios. ² Kaín yaon kjuák'e ntiha ijnko ch'ín tsíkokjéxin xitjahya tji. Sátsíkjiko sín ch'án tí nínko la tsíkjak'etjaxín sín ch'án tí ntója puerta mé it'ín Ntója Náxrjón. Ntaha tjetjanachak'éhe ch'án chichaon tí sín sit'ixenhen ntiha. ³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kíxin:

—Tsjehé ntihi.

⁵ A ntá tí ch'ín a tjetsjehe ch'án jína kíxin ách'e ichrén nkehe tsjanjon tí sín a, ichro ch'án. ⁶ A ntá ch'ín Pedro ntáchro kíxin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnié Jesucristo, tí nkexro tsíkjiixin chjasin Nazaret, la t'inkatjen itjia —mé xíkaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankíxin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni siín tí chjasin ntiha la k'uíkon sín kíxin ó tji ch'án la ko chjéhe ch'án kjuasáya Dios. ¹⁰ Ntá chrakon sín kíxin xíkaha tsíkónhen kíxin tsíkatsōan sín kíxin jehe tí nkexro kjuák'etjaxín kjuanchak'á ch'án chichaon ntója nínko it'ín Ntója Náxrjón.

Nixjehe ch'ín Pedro tí chojni siín tí ntāsin Salomón

¹¹ Na tí ch'ín xitjahya tji la mé titōehya ch'án tí ch'ín Pedro la ko ch'ín Juan. Ntá kaín xín tí sín siín ntiha chrakon sín kuinká sín sákjuitsjehe sín tí ntāsin

kuènte n̄nko it'in nt̄asin Salomón k̄ixin ntaha t̄ejó tí sín a. ¹² Ntá tí k'uikón ch'ín Pedro x̄ikaha la ntáche ch'án sín k̄ixin:

—Jahará chojni israelita, ¿nkekuènte chrakonrá jahará la ko nkekuènte komaráni? ¿Á t̄jenkayáxinrá k̄ixin jehóni kjuínchekit̄gheni jína tí ch'ín i k̄ixin jehóni chóntani kjuachaxin la ko k̄ixin imá tinkáchónkini Dios? ¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá ch̄jéhe ch'án kjuachaxin tí Xjeen ch'án Jesús. Kjánchó jahará tsík̄jikenhenrá ch'án tí sín t'et̄oan. Ntá tí ch'ín Pilato mé tjinkaon ch'án chrók'uát̄jánta ch'án tí ch'ín Jesús kjánchó jahará la tjinkákonhyará x̄ikaha. ¹⁴ A ntá jahará chrók̄juanchiará chrókuit̄ohe sáchrók̄jui tí nkexro t̄jóá jína asén. A ntá náhi. A ntá jahará mé tjinkáonrá sáts̄ji ijnko chojni chóna nchónhya j̄iē. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé x̄ikaha k'uikónni la chrónkani. ¹⁶ Tí kjuachaxiēn ihnjé Jesús mé tinkáchónkini la ntá tíha mé kuit̄oexín jína tí nkexro k'uikónrá la ko choxinrá. Tí ch'ín a mé kuit̄ekaon ch'án ntá kuit̄ohe ch'án jína. Mé x̄ikaha ó k'uikónrá kaín rá.

¹⁷ 'Kichóni ó nòna k̄ixin tió jahará la ko tí sín t'et̄oan k'oyánrá Jesús la ni kónoahyará nkehe kjuich'erá. ¹⁸ Ntá ó xiteyá tí nkehe tsintáchró Dios tsínixjax̄in tí sín tsíchrónka itén ch'án k̄ixin tí Cristo t'ichjánx̄in tsjasóte ch'án. ¹⁹ Méxra tsit̄ohérá ij̄járá ntá xráxinkáonrá Dios ntá jehe ch'án mé ts'óxika ij̄járá ntá Inchéni mé sinchekit̄ohará ch'án jína. ²⁰ Ntá jehe ch'án mé tsochr'án Jesucristo inaá la xr̄á ó tsi k̄ixin tsaáxinrá. ²¹ Na ntá ijie la Jesucristo la nkaya nkaj̄ní ntahó tsit̄ohe ch'án hasta tsjasiyóxinjian Dios kaín nkehe éxi tsintáchró ch'án tsínixjax̄in ch'án tí sín tsíchrónka itén ch'án ósé. ²² A ntá senó tí ch'ín Moisés tsíchénka tí sín tsík'axrjenix̄inni k̄ixin: “Inchéni Dios mé tsochr'án ijnko nkexro ts'axrjenix̄inrá tsochrónka itén ch'án éxi tsíchr'án ch'án tí janhan. T'ichjánx̄in tinhínrá kaín tí nkehe tsontáchró ch'án. ²³ A ntá tí chojni titekakonhya tí nixja tí nkexro a la ts'it̄jayan sín la tsit̄ohe sín tí nació Israel,”* mé x̄ikaha tsíchrónka ch'ín Moisés.

²⁴ Kaínx̄in tí sín tsíchrónka itén Dios kjuankix̄ixín ch'ín Samuel la ko kaín tí sín kui chr'éx̄in mé chrónka sín k̄ixin kaín tíha t̄sonhen x̄ikaha tí yaon i. ²⁵ Mé tí nkehe tsintáchró Dios tsínixjax̄in ch'án tí sín tsíchrónka itén ch'án k̄ixin x̄ikaha chrók'uayéhérá jahará tí nkehe chrók̄juanjon ch'án k̄ixin chrók'uejorá jína. Dios tsík̄jich'éna ch'án ijnko pacto mé nixjehē ch'án tí sín tsík'axjenix̄inrá mé tsintáche ch'án tí ch'ín Abraham k̄ixin: “Kaínx̄in chojni chjasintaj̄ní mé tsoyaonx̄in sín k̄ixin ijnko nkexro ts'axrjenix̄in tí jaha.”† ²⁶ Dios kjuínchexechón ch'án tí Xjeen ch'án la saox̄in ichr'án ch'án tí t̄jedorá jahará israelitará k̄ixin chrók̄juintayaonrá ch'án k̄ixin jnkojnko tí jahará chrókuit̄ohérá tí nkehe jínahya ich'erá —ichro tí ch'ín Pedro.

4

Tí ch'ín Pedro la ko ch'ín Juan nkayakon tí sín t'et̄oan

¹ Ch'ín Pedro la ko ch'ín Juan la naḡa t̄jéjónixjehē sín tí sín tsíkójnkotsé ntá xrínahya ikui tí sín nch̄at̄á la ko tí ch'ín t'et̄uēnhen tí sín soldado kuènte tí n̄nko la ko tí sín saduceo. ² Imá kónínkaon sín k̄ixin ch'ín Pedro la ko ch'ín Juan kjuak̄ohe sín tí sín tsíkójnkotsé nkexrí tsoxechón chojni tsík'en k̄ixin x̄ikaha xechón ch'ín Jesús. ³ Ntá kuínhin sín x̄ikaha ntá itsé sín tí sín a ntá sák̄juiko sín, chr'áxnenhen sín nt̄oqchiso. Ntahó k'uéjó sín hasta kóygon k̄ixin ó ntá kóntó. ⁴ A

* 3:23 3.22–23 Deuteronomio 18.15,19 † 3:25 Génesis 22.18

ntá nchónhya tí sín tsíkinhin tí tan a la kuítekaon sín. Ntá kjuixraká tí número tí chojni ntoá mé in'ó mil chojni ntoá ó.

⁵ A ntá tí yaon chr'èxin kójnkotsé tí chjasin Jerusalén tí sín t'etóan kuènte tí sín judío la ko tí sín tjako tí ley. ⁶ Mé kjaxin ntaha tjen ch'in Anás, mé jehe ch'an mé tí nchat'á imá t'etóan, la ko ch'in Caifás, la ko kjaxin ch'in Juan, la ko ch'in Alejandro, la ko kaín tí chojni kjéhya tí nchat'á t'etóan. ⁷ Ntá k'uetóan sín kixin síxraoa ch'in Pedro la ko ch'in Juan. Ntá k'uejó sín jnkosiné la ntá kjuanchankíhi sín ntáchro sín kixin:

—¿Nkexro kjuanjón kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'in Pedro imá chóna ch'án kjuachaxin kuènte Nchakuen Dios ntá kjuátēhe ch'án ntáchro ch'án kixin:

—Jahará chojni t'etóan kuènte chjasin la ko jahará sín táda kuènte chjasin Israel, ⁹ jahará mé tjanchankirá kixin nkexrí kuitōhe ijnko chojni níhi jina kixin tjinkáonrá tsonohará. ¹⁰ Ntá tinhínrá jina tí nkehe tsochrónkaxinni kixin kaín rá chojni chjasin Israel tsonohará kixin tí ch'in i itjen ntihi mé kuitōhe ch'án jina kjuachaxiēn ihnié Jesucristo, tí nkexro tsíkjin chjasin Nazaret. A ntá jahará mé tsíkjakékanirá ch'án tí ntacruz la ntá Dios kjuínchexechón ch'án inaá. ¹¹ Tí ch'in Jesús i mé tí xro náxrjónhya kuitōentará tió kjuich'énará tjat'ó ntá mé jie k'óna tí xro tjetóan.* ¹² Kohya í jnko nkexro chóna kjuachaxin chrókuaáxinni kixin kohya í jnko ihnié chojni ntihi chjasintajni chrókuinkáchónkini chrókuaáni —mé xikaha ichro ch'in Pedro.

¹³ Tí síxreé mé k'uikón sín kixin ch'in Pedro la ko ch'in Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etóan ntá kjuátsoan sín kixin tí sín a mé tsík'ajiko ch'in Jesús. ¹⁴ A ntá tí ch'in tsíkitohe jina mé ntiha tjejóko sín ch'án. Méxra xitjahya tsjanchia sín jie tsjasóte tí sín a. ¹⁵ Ntá tí síxreé a mé k'uetóan sín kixin tí sín a ts'axrje sín ntója ntá jehó sín k'uejóxehenhen sín nchia ikjo sín kichó sín. ¹⁶ Ntá ntáchro sín kixin:

—¿Nkehe chrókuich'eheni tí sín a? Kaínxín tí chojni ntihi chjasin Jerusalén mé ó k'uikón sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha. ¹⁷ Í tjinkakonhyani kixin naxa tsochrónka sín tíha kixin naxa tsinhin chojni. Méxra ts'etóanni kixin í tsochénkahya sín ninkexo tí ihnié Jesús.

¹⁸ Na ntá k'uiyēhe sín tí sín a inaá ntá k'uetuenhen sín kixin ninkehó chrónixja sín la ko chrókjuako sín ihnié Jesús, ichro sín. ¹⁹ A ntá ch'in Pedro la ko ch'in Juan kjuátēhe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuinchexiteyéheni tí jehe ch'an? ²⁰ A ntá jeheni la xitjahya tsítóheni tsochrónkani tí nkehe ó k'uikónni la ko tí nkehe kuínhinni —ichro sín.

²¹ A ntá kjónté xikaha kuínhin tí síxreé la jiehe k'uetóan sín ntá kjuanjón sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. ²² Na mé tí ch'in kuitōhe jina kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochraconhya sín

* 4:11 Salmo 118.22

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetóan tí sín ncha't'á t'etóan la ko tí sín táda. ²⁴ Ntá kjuixín kuínhin tí sín tsíkójnkotsé na ntá kaín sín nixjehe sín Dios la ntáchro sín kíxin:

—Ínchéni, jaha mé kjuich'éna nkajni la ko chjasintajni la ko tí ntayaon la ko kaín xín tí nkehe siín. ²⁵ Jaha mé kjuachaxiín Nchakuan nixjaxian ch'ín David tí nkexro kjuít'aha xra. Ntáchro ch'án kíxin:

¿Nkekuènte kíxin kónínkaon kaín tí chojni nación ókjé?

¿Ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakonhen sín Ínchéni la ko Cristo.†

Mé xíkaha tsíkjin ch'ín David ósé.

²⁷ Mé xíkaha chaxín ch'ín Herodes, la ko ch'ín Poncio Pilato, la ko kjaxín tí chojni tsíkjin ókjé, la ko tí sín israelita mé tsíkójnkotsé sín tí chjasin ntihi kíxin kónínkakonhen sín tí Xjaan Jesús chóntahya jie, mé tí nkexro tsíkjéyá jaha sit'aha xra. ²⁸ Mé xíkaha kjuínchexiteyá sín tí nkehe ósé tsíkjenkayáxin kíxin t'ichjánxin xíkaha tsonhen. ²⁹ ¿Ntá Ínchéni, tsjehé kíxin imá jiehe k'uetóan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán. ³⁰ La ko tí kjuachaxián sijnchekitóexín jína tí chojni níhi la ko tsjákoxian kjuaxroan kjuachaxiín ihnié tí nkexro Jesús t'aha xra —mé xíkaha nixjehe sín Dios nkaya nkajni.

³¹ ¿Ntá tí kjuixín nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

Tí kaín nkehe siín la kaín sín mé kuènte sín

³² La kaín tí sín kuínkáchónki sín Jesús mé jnkokoá kjuenkayáxin sín. Kohya nkexro ntáchro kíxin jehó kuènte tí nkehe siín. Náhi. Kaín sín mé kuènte sín. ³³ Tí sín tsíkjéyá Jesús mé kaín asén sín chrónkaxín sín kíxin nkexri xechón Ínchéni Jesús. Ntá Dios antsí kjuíncheyaoon kaín sín. ³⁴ Kohya ninkexró nóaxinhya tjejó ntiha kíxin kaín tí sín chónta nontee sín o ntóe sín kjuínchekji sín. Na ntá tsíkikjao sín tí chichaon ³⁵ chjéhe sín tí sín kjuéyá Jesús. ¿Ntá tí sín k'ókikayehe sín tí chichaon, kuákja tí sín nóa. ³⁶ Mé xíkaha kjuich'e ijnko ch'ín levita it'in José. Jhehe ch'án la tsíkjin ch'án nonte Chipre jnkosiné ntayaon. Tí sín kjuéyá Jesús mé kjuínchek'in sín ch'án Bernabé, mé t'axrxjín kíxin tí ch'ín nchechéhe asén chojni. ³⁷ Jhehe ch'án a mé kjuínchekji ch'án ijnko nontee ch'án ntá kjuíkjo ch'án tí chichaon kjuínchek'áyéhe ch'án tí sín kjuéyá Jesús.

5

Ije kjuasin ch'ín Ananías la ko tjan Safira

¹ ¿Ntá í jnko ch'án mé it'in Ananías, a ntá ichjién ch'án mé it'in Safira, mé jhehe sín mé kjuínchekji sín ijnko nontee sín. ² ¿Ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuíko ch'án la chjéhe ch'án tí sín kjuéyá Jesús la kjuanjon ch'án éxi kaín. ³ Ntá ntáchro ch'ín Pedro kíxin:

—Ananías, ¿kuènté chjehé kjuachaxin tí Tsochren kíxin k'uetuénhen asán? Ntá kjuich'iyehé tí Nchakuen Dios kíxin kjuínchemá iso chichaon kjuínchekjixián nontaa. ⁴ ¿Á jehya nontaa tíha? Ntá tíó kjuínchekjia la, tí

† 4:26 4.25-26 Salmo 2.1-2

chichaon la, ¿á Jehya kuèntá? ¿Kuènte kjuenkayáxian s̄ich'e tíha? Kjuich'iyehé Dios, Jehya chojni kjuich'iyehé.

⁵ Na ntá kuínhin tí ch'ín Ananíás ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjuí iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuiko sín, sákjuikjavá sín.

⁷ Ntá k'uátsínka iní hora ntá kjuíji ichjién ch'ín Ananíás k'uixenhen tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín x̄ikahó kóxīxin tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín x̄ikahó kóxīxin.

⁹ Ntá ntáchro ch'ín Pedro kixin:

—¿Nkekuènte jnokoá kjuenkayáxinrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuikjavá sín xia na ntá jaí sátsjiko sín tí jaha —mé x̄ikaha ichro ch'ín Pedro.

¹⁰ Ntá tuénxin kjuítsínka tjan Safira toté tí itjen ch'ín Pedro ntá ik'uén tjan. Ntá k'uixenhen tí sín ntasoá tí nchia a ntá k'uikon sín kixin tsíkjin tsík'en tjan. La ntá sákjuiko sín tí cuerpo kuènte tjan la kjuavá sín tjan tí chjinaxón tsíxrává tí x̄i tjan. ¹¹ Na kaín tí sín kuènte n̄nko la ko tí í so sín kuínhin tí x̄ikaha tsíkónhen, mé imá chrakon sín.

Itsje kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí siín chojni ntiha la ko kaín sín mé kójnkotsé sín tí ntasin it'in Salomón. ¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín. ¹⁴ La ntá xrináhya nchónhya chojni ntoa la ko chojni chjin kjuankixin tinkáchónki sín Ìnchéni. ¹⁵ Ntá itsje chojni mé kuakitsje sín tí chojni níhi k'uejo sín ntja. Tjéjóták'á sín chrítaón cama la ko kania kixin ts'atsínka ch'ín Pedro ntá kjónté its'ueen ch'án ó ts'atsínka tí tjejó sín mé chrókuitoexín sín jína. ¹⁶ Kjaxin tí chjasin chjino mé kjuixin nchónhya chojni ikjuí sín chjasin Jerusalén la kjuikao sín tí chojni níhi la ko tí chojni chóna nchakuen tí jínahya. La kaín sín a mé kuítqhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etqan la ko tí sín kuènte tí sín saduceo mé imá kóchjinoxínhin sín. ¹⁸ Na ntá itsé sín tí sín kjueyá Jesús la chr'áxenhen sín ntqechiso. ¹⁹ A ntá ijnko ángel kuènte Ìnchéni ikui tí tie a kuakitjehe ch'án ntója ntqechiso ntá kuakitsje ch'án tí sín a. La ntá k'uetuénhen ch'án sín kixin:

²⁰ —Sátjirá n̄nko la tsjákohérá kaín tí sín ntiha tí tan n̄xin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixenhen sín tí n̄nko kjuako sín.

A ntá tí nchat'á t'etqan la ko tí sín k'uejóko ch'án mé k'uíyehé sín tsojnkotsé kaín tí síxreé, mé tí sín t'etqan kuènte Israel. Na ntá k'uetqan sín kixin tsoxrakoa tí sín tjejóchjina tsíkjevá Ìnchéni. ²² A ntá kjuíji tí sín policía tí ntqechiso a ntá k'uitjahya sín tí sín a. La ntá ikjan sín la ²³ ntáchro sín kixin:

—Kjujini ntiha la k'uikoni tsíkjehe jina ntogchiso a la k'uejó tí sín soldado a ntója. Ntá kuakitjeheni ntogchiso la k'uitjahyani ninkexró tí nkaxenhen —ichro sín.

²⁴ Ntá kaín tí nchat'á t'etqan la ko tí ch'in k'uetuenhen tí policía kuènte ninko la ko i so tí sín nchat'á t'etqan mé kuínhin sín ntá ntáchro sín kixin xá nkexrí chrókónhen chrók'uitjáyán tí xra kuènte tí sín a. ²⁵ Na ntá tuénxín kjujii jinko nkexro ntáchro kixin:

—Tí sín k'uejochjinará jahará mé ó nkaxenhen ninko ntaha tjejó sín tjejótkaqohe sín chojni —ichro ch'án.

²⁶ La ntá tí ch'in k'uetuenhen tí sín policía mé sákjuúko ch'án tí sín policía la kjuúakajín tí sín tjako. Ninkehó kjuich'ehya tí sín policía tí sín tjako kixin chakon sín kixin ách'e tí sín sín ntiha mé tsjak'e sín xro, ichro sín. ²⁷ Na ntá tíó kjuíkao sín tí sín a la k'uejó sín nkayakon tí sín t'etqan ntá tí nchat'á t'etqan ntáchro ch'án kixin:

²⁸ —Jeheni kjuanjonhyani kjuachaxin kixin tsjákorá ihnié tí nkexro a. ¿A ntá nkehe kjuich'erá jahará? Kuenté chjasin Jerusalén tsíkjákorá. La tjínkaónrá tsékaráni jie kixin jeheni tsik'óyáni tí ch'in a —ichro ch'án.

²⁹ A ntá ch'in Pedro la ko tí iso sín kjueyá Jesús ntáchro sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni. ³⁰ Tí Dios tsíkincháchónki tí sín tsik'axjenixinni ósé mé kjuínchexechón Jesús, ti nkexro a mé kjuakénkanirá tí ntacruz tsik'oyánrá.

³¹ Ntá jie tjeko ch'án Dios nkaya nkajni la nángo itja chjina Dios mé tjen ch'án la Dios kjuích'éna ch'án ijnko nkexro t'etqan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjáyán tí jie chóna sín. ³² La ko kjaxin jeheni chrónkani kaín tí nkehe k'uikoni kjuachaxién Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etqan a mé kuínhin sín tíha ntá kónínkaon sín la ko tjínkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uetqan ch'án kixin tí sín tsíkjejá Inchéni mé ts'axrje sín ntója intsi, ichro ch'án. ³⁵ Na ntá nixjéhe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuich'eherá tí sín a. ³⁶ Xráxinkáonrá kixin senó kjuák'e ijnko ch'in it'in Teudas la tónhen asén ch'án kixin imá t'etqan ch'án. Ntá itsjé sín mé noó ciento chojni kjuichréhe ch'án. Na ntá ókjé chojni k'óyán sín tí ch'in a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuèxín tí xra k'uekjich'e sín. ³⁷ Ntá chr'éxin tíó xrenájín kaín ihnié chojni k'uejó na ntá ikjuí ijnko ch'in mé it'in ch'án Judas la kjuixín ch'án estado Galilea. Ntá itsjé chojni kjuichréhe ch'án. La ntá kjaxin k'óyán sín ch'án la ntá kaín xín tí sín kjuichréhe ch'án xíka sín sákjuí sín inaá. ³⁸ Méxra títqhéra tjiatéhyará tí jehe sín a. A ntá tí tjejóch'e sín xra kuènte chojni ó la kjaxin ts'itjáyán. ³⁹ A ntá tí chaxín tjako sín kjuachaxién Dios ntá tsjachahará sinchek'itjáyánrá tíha. Méxra títqhéra sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueyá Jesús. La ntá kjuate sín la xík'etuenhen sín kixin í tsonixjahya sín ihnié Jesús la ntá kjuanjon sín kjuachaxin kixin sátsji sín. ⁴¹ Ntá tí sín kjueyá Jesús mé

k'uaxrjexín sín tí tjejó tí sín t'etqan kjónté xikaha kónhen sín la chéhe sín kixin Dios kjuanjon kjuachaxin kjuasóte sín kixin tí kjuako sín ihnié Jesús. ⁴² Kuítqehya sín tsjako sín kuénte Jesucristo kaín yaon tí nkaxenhen nínko la ko tí jnkojnko ntqé chojni.

6

Kjueyá sín yato chojni tsjinkitsa

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakonhen sín tí sín nixja nkíva hebreo. Ntácho sín kixin tí sín chjin k'án kuénte sín la kánhyó jína k'uáyéhe tí nkehe síxikayéhe sine sín jnkojnko yaon, ichro sín. ² Na ntá tí teyó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehe sín, ntácho sín kixin:

—Jeheni la jehya jína tsítqheni tí xra tjakoni itén Dios, kixin ntá sit'aharáni xra ts'óxikayeheni tí nkehe sine tí sín k'án. ³ Méxra jahará kichó ni tsjéyará yato chojni ntoa tí tjejorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyéheni tí xra a. ⁴ A ntá jeheni la tsonixjeheni Dios la ko tsinkákjakoni itén ch'án —mé xikaha ichro sín.

⁵ La ntá kaín sín mé kuínhin sín xikaha ntá jnkokoá kjuenkayáxin sín. La ntá kjueyá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkjin ch'án chjasin Antioquía la ósé mé tsikínkáchónki ch'án tí nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín tí tjejó tí sín tsíkjeýá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsikónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín ncha'tá judío kjuankixin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxin ch'án tí sín chojni.

⁹ A ntá iso sín tsíkjin sín nínko judío kuénte tí sín senó k'uejé esclavo sín tsíkjin sín chjasin Cirene, la ko Alejandría, la ko Cilicia, la ko estado Asia, mé kjuankixin sín ikjo sín ch'ín Esteban. ¹⁰ Kjónté xikaha la kjuachahya sín kixin Nchakuen Dios mé kjuínkitsa tí ch'ín Esteban nixja ch'án. ¹¹ Na ntá jehé sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xikaha k'uixité kaín chojni la ko tí sín t'etqan kuénte nínko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí sín tí síxreé a. ¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntácho tí sín a kixin:

—Tí ch'ín a mé títoqehya ch'án t'ántaxínhin ch'án tí nínko kuénténi la ko tí ley.

¹⁴ Kuínhinmi kixin chónka ch'án kixin tí ch'ín Jesús, tí ch'ín tsíkjin chjasin Nazaret, mé sinchek'itjáyan ch'án tí nínkoeni ntíhi la ko tsjitóxinhin ch'án tí nkehe tinkáchónkini mé tí nkehe tsík'etqan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjaxín ntiha la komá sín tí ch'ín Esteban la mé k'uíkón sín kixin tí kàrè ch'án mé éxí ijnko ángel mé xíkaha tsjehe tí jehe ch'án.

7

Tí nkehe kjuátehe ch'ín Esteban

¹ A ntá tí sín nchát'á t'etōan kjuanchankíhi sín tí ch'ín Esteban kixin:

—¿Á chaxín kaín tíhi tsintáchrúa?

² Na ntá jehe ch'án kjuátehe ch'án ntáchrō ch'án kixin:

—Kainrá kichó ní Israel la ko sín táda tinhínrá tí nkehe tsontáxrjan.

Dios kuèteni chóna kjuachaxin mé kjuakohe ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxá sátjihya ch'án tsjak'e ch'án nonte Harán. ³ Dios tsintáchrō kixin: “Títōhé chjasán la ko kain tí nkexro kjéhya. Na ntá sátjia tí nonte tsjákohá jaha.”* ⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixín ik'uén it'é ch'án na ntá Dios kjuíkao tí jehe ch'án tí nonte tjejórá ijie. ⁵ Kjánchó ch'ín Abraham la kuákjahya ch'án nít'ō nonte hasta ní tí tsjak'e toté ch'án la chónahya ch'án. A ntá chrónka Dios kixin chaxín chr'éxín tí tsjixin ts'en ch'ín Abraham la tí sín ts'axrjeníxín ch'án mé ts'áyéhe sín tíha. Kjonté naxá kohya nijnko xjeen ch'án la mé xíkaha ntáchrō Inchéni. ⁶ Kjaxín tsintáchrō Dios kixin tí sín ts'axrjeníxín ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó. ⁷ La kjaxín xintáchrō Dios inaá kixin: “Ntá chr'éxín janhan sítakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan,” mé xíkaha ichro Dios. ⁸ Na ntá Dios mé tsíkjo ch'ín Abraham kixin kaín tí chojni ntoa ts'axrjeníxín ch'án mé itsa sín xroye. Na ntá xíkaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijní yaon. Ntá kjaxín xíkaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xíkaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxín tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuíko sín ch'án nó nación Egipto, kjánchó Dios mé kjuínkítsa tí jehe ch'án. ¹⁰ Dios mé kjuínchekaa ch'án tí náxrjónhya k'uékjak'e ch'án. La ko Dios kjuanjón kjuachaxín kixin imá tsoñohe ch'án. Na ntá k'uíkón ch'ín Faraón tí rey kuènte nación Egipto a xíkaha tí xra jína kjuích'e ch'ín José ntá kjuanjón ch'án kjuachaxín kixin ts'etōan ch'ín José tí nación Egipto la ko tí ntōe ch'án.

¹¹ Na ntá kókjinta xrináhya la náxrjónhya k'uejé tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohe ch'án tí ch'ín Faraón tí sín naxá kjéhya ch'án. ¹⁴ La ntá k'uetōan tí ch'ín José kixin sátsjikájín sín it'é ch'án Jacob la ko kain tí sín kjéhya ch'án, mé ijnko setena y cinco chojni kjéhya ch'án. ¹⁵ Mé xíkaha kónhen la tí ch'ín

* 7:3 Génesis 12.1

Jacob mé sákjuí ch'án la kjuák'e ch'án naci6n Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxin kuakitsjexin sín t6y6 tí hués6é tí ch'ín Jacob la sákjuiko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ La ntá ó kuichjina tsoxiteyá tí nkehe tsintáχρο Dios tsíkjo ch'ín Abraham ntá tí sín Israel imá k6tsjé sín naci6n Egipto. ¹⁸ A ntá xrínahya í jnko ch'ín rey kjuankíxin k'uet6an naci6n Egipto la k'uéchónhya ch'án tí ch'ín José. ¹⁹ La ntá tí ch'ín rey kjuich'iyehé ch'án tí sín naxá kjéhyani la ko kjuínchekjasóte ch'án sín. La tsík'et6an ch'án kíxin tí xjan ntoa na ntá kokjíhi mé tsjik'itjí sín xjan kíxin its'en xjan. ²⁰ Na ntá tí y6on a tsík6kíjhi ch'ín Moisés ntá imá k6xrjínhjn Dios tí xjan a. It'é la ko iné xjan mé k'uéchóna sín xjan iní nitjó koá nt6e sín. ²¹ Ntá chrokjuahya tsjak'ema sín xjan la ntá kjuíkjáka sín xjan. La ntá xjeen tí ch'ín rey kuénté Egipto mé kjuíkkakja tjan xjan la sákjuiko tjan nt6e tjan la kjuínchek'ánkí tjan xjan éxí xjeen tjan xíkaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjet6an tí nkehe k'uéntáχρο ch'án la ko tí nkehe k'uékjich'e ch'án.

²³ La ntá tió chóna tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxá kjéhya ch'án. ²⁴ Ntaha mé k'uikon ch'án kíxin ijnko chojni Egipto kjuate ijnko chojni naxá kjéhya tí jehe ch'án. Ntá chr6kjuinkítsa ch'án tí sín naxá kjéhya ch'án ntá k'6yán ch'án tí ch'ín Egipto a. ²⁵ Kjuenkayáxin ch'án kíxin tí sín naxá kjéhya ch'án, mé tí sín israelita, mé tsoñoéxin sín kíxin Dios mé tsich'án tí jehe ch'án sinchekaá sín ch'án. Kjánchó tí sín a kjuátsoanhya sín. ²⁶ La ntá í jnko y6on tí ch'ín Moisés k'uikon ch'án kíxin yaá sín israelita tjanjonko kíchó sín. La ntá tjinkaon ch'án chr6kjuít'oxin ch'án kíxin chrokjuanjónhya sín. La ntáχρο ch'án kíxin: “Jahará jnkoq6á kíchuará la, ¿nkekuénté tjánjonrá?”. ²⁷ A ntá tí nkexro chóna tí jje mé k6nínkaon ch'án la k6téka ch'án tí ch'ín Moisés. Ntá ntáχρο ch'án kíxin: “¿Nkexro kjuanj6n kjuachaxin kíxin jaha k'6na juez kuénténi? ²⁸ ¿Á tjinkávan ts'oyánni kjaxinni éxí k'oyán tí ch'ín Egipto ijna ní?” ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí naci6n Madián ntá ntiha kjuák'e ch'án éxí ijnko chojni tsikjixin ókjé. Ntá ntaha tsík6tehe ch'án la ko kjuích'éna ch'án yaá xjan ntoa.

³⁰ Na ntá k'uaúsinka cuarenta nánó ntá tí nteje chjino jn6 it'in Sinaí mé xrínahya k'uikon ch'án ijnko ángel tjenkákjan tí xrohi chríkjan tí ntayoa tjeche. ³¹ Ntá tí ch'ín Moisés la chrakon ch'án kíxin xíkaha k'uíkon ch'án la ntá k6chjinehe ch'án kíxin chr6tsjehe ch'án la ntá kuínhin ch'án itén Ínchéni ntáχρο kíxin: ³² “Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob,” mé xíkaha ichro Dios. Ntá tí ch'ín Moisés la kjuankíxin chrakon ch'án la síxránka ch'án ntá í tjinkakonhya ch'án tsotsjehe ch'án. ³³ Na ntá ntáχρο Ínchéni kíxin: “Takítsje t6katá kíxin tí nonte tinkatja la nonte tj6á ch6ntahya jje. ³⁴ Ó k'uíkuan kíxin tí sín kuéntana mé imá tjet6tasóte sín naci6n Egipto. La ó kuínhan kíxin t'èya sín. La ntá ijje ó k'uinka kíxin tsjinkítsa sín. Méxra xrákiá jaha tsétuanhan jaha sátsjia naci6n Egipto,”[†] ichro Dios.

³⁵ Tí sín israelita mé kjuanoá sín tí ch'ín Moisés. Tsintáχρο sín kíxin: “¿Nkexro kjuanj6n kjuachaxin kíxin jaha k'6na juez?” ichro sín. Kjánchó Dios ich'án ch'án tí ch'ín Moisés kíxin ts'et6an ch'án la ko sinchekaá ch'án tí sín

† 7:34 7.30–34 Éxodo 3.1–10

israelita kjuachaxin tí ángel k'uikón ch'án chríkjan tí nta. ³⁶ Ntá tí ch'ín Moisés kuakítsjexín ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxín ch'án tí nacióñ Egipto, la ko tí Ntayaon Kjátse, la ko tí nteje k'uáji sín cuarenta nánó. ³⁷ Jehe tí ch'ín Moisés a mé chénka tí sín israelita kíxin: “Dios mé tsochr'án ijnko chojni tsoníxja itén Dios ts'axrjeníxín tí sín kichuárá éxi ichr'án ch'án tí janhan. Títekákonhénrá tí jehe ch'án.”[†] ³⁸ Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

³⁹ A ntá tí sín k'uaxrjeníxinni ósé mé tjinkakonhya sín kíxin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nacióñ Egipto. ⁴⁰ A ntá ntáche sín ch'ín Aarón kíxin: “Tjinkaonni sích'éna ijnko dios kíxin tsínkáchónkíni kíxin í noehyani nkehe kónhen tí ch'ín Moisés, tí nkexro kjuínkítsa k'uaxrjéxíni nacióñ Egipto.”[§] ⁴¹ Ntá kjuínchekjanoya sín ijnko koxintáxjan la ntá k'óyán sín iko kjokehe tí nkehe tsíkjanoya a la imá kóchéhe sín k'uikón sín tí nkehe tsík'ónaxín tja chojni. ⁴² A ntá Dios mé kuítóhe tí jehe sín kíxin tsínkáchónki sín tí konotsé síñ nkajní. Tíhi mé tsíkjin ijnko nkexro k'uéchrónka itén Dios ntáchro xíkíhi:

Jahará chojni Israel, ¿á k'oyánrá tí iko kjókanará tí janhan tí cuarenta nánó k'uejorá nteje ní?

⁴³ Kja náhi, jehó tí nkehe kjuich'énará mé kjókehérá tí ko a. Kjuikoará tí nínkpe tí dios Moloc

la ko kjaxin kjuikoará tí konotsé kuénte dios Renfán.

A ntá tí nkehe tsíkjich'énará jahará mé xráxínkákoxínrá éxi Dios kuéntará.

Méxra janhan tsakítsjexínrá tí tjejorá la tsétuanhánrá sátsjirá chjasin Babilonia.*

Mé xíkaha ntáchro Dios ósé.

⁴⁴ Naxa k'uéjé tí sín k'uaxrjeníxinni tí nteje la chóna sín ijnko nínko kamantá chóna tí ley tsík'etóan Dios. Tíhi kjuich'éna sín éxi tsík'etuenhen Dios tí ch'ín Moisés kíxin sích'éna ch'án kaín nkehe k'uikón ch'án. ⁴⁵ Ntá tí sín tsík'axrjeníxinni mé k'uáyéhe sín tí nínko kuítóñhen sín. Ntá tí sín kjuíkao ch'ín Josué mé kjuíkao sín tí nínko tió kjuacha sín k'uáyéhe sín í jnko nonte kuénte í so chojni kuakítsje Dios, kíxin ts'áyéhe tí jehe sín. Mé xíkaha kónhen hasta tí yaon kjuankíxin k'uetóan ch'ín David. ⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sích'éna ch'án ijnko nínko kuénte Dios mé tí Dios k'uékinkáchónki ch'ín Jacob. ⁴⁷ Kjánchó jehe ch'án kjuich'énahya ch'án tí nínko a. Tí ch'ín Salomón mé kjuich'éna. ⁴⁸ Kjánchó Dios nkaya nkajni chrohya tsjak'exenhen ijnko nchia tsíkjich'énaxín chojni itja. Ntáchro ijnko ch'ín nixja itén Dios kíxin:

⁴⁹ Janhan Dios nkaya nkajní itjén tétóanxián ntá chjasintajni tjejen totená.

¿Xá nkexéhe tí nchia chrókjuich'énará?

¿Xá nketí chrókjuak'é chrók'ók'ánaxián?

⁵⁰ ¿Xá jehya tjaná kjuít'ánaxián kaín tí nkehe ní?†

Mé xíkaha ichro Dios.

⁵¹ A ntá jahará la icha asánrá xráxín títekákonhyará. Jahará tinhínrá kjánchó ich'erá éxi chojni chónhya Dios. Xráxín tjánjonkoará Nchakuen Dios. Jahará mé tóyohará tí sín tsík'axrjeníxínrá ósé. ⁵² Tí sín tsík'axrjeníxínrá

‡ 7:37 Deuteronomio 18.15,18 § 7:40 Éxodo 32.1 * 7:43 7.42-43 Amós 5.25-27 † 7:50 7.49-50 Isaías 66.1-2

kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chóntahya jie. **A** ntá ó kui tí nkexro a ntá jahará kjuínchekjirá ch'án ntá k'óyán sín ch'án. ⁵³ Jahará k'uayéhérá tí nkehe k'uetqan Dios senó, mé tí nkehe chrónka tí ángel, la kjónté xíkaha kuítekákonyhará —ichro ch'in Esteban.

Ik'uén ch'in Esteban

⁵⁴ Ntá tí kuínhin tí jehe sín tí nkehe ntáchro tí ch'in Esteban ntá imá kónínkaon sín la netaón neno sín kixin nínkakonhen sín ch'án. ⁵⁵ **A** ntá ch'in Esteban antsi chóntha ch'án Nchakuen Dios la konta ch'án nkajní k'uikon ch'án kjuachaxién Dios la ko k'uikon ch'án kixin ch'in Jesús tjexín toté ch'án nánko tja chjina Dios. ⁵⁶ Ntá ntáchro ch'in Esteban kixin:

—Tsjuhérá kixin k'uikuan kixin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ **A** ntá jehe sín la k'uikjehe sín ntatsjon sín la itsen k'uixité sín ntá sákjuí sín k'uixitja sín ch'án ⁵⁸ sákjuiko sín ch'án ikon chjasin ntá ixro chjéhe sín ch'án. La tí sín tjanchia jie mé kuakitsje sín iké sín la k'uejo sín toté ijnko ch'in ntasoá it'in Saulo kixin ts'ayakonhen ch'án tí ka a. ⁵⁹ La it'e sín xro ntá ch'in Esteban mé chrónóhe ch'án Ìnchéni la ntáchro ch'án kixin:

—Ìnchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—Ìnchéni jaha mé tahya kuentá tí jie kjuasin sín.

Mé xíkaha ichro ch'án ntá ik'uén ch'án.

8

Ch'in Saulo chrók'óyán ch'án tí sín tinkáchónki Jesús

¹ La tí ch'in Saulo mé jnkokón kjuenkayáxinko ch'án tí sín k'óyán tí ch'in Esteban.

A ntá tí yaon a na mé kjuankixin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankixin tinkáchónki Cristo mé xíkayéhe sín sákjuí sín nkuixín estado Judea la ko estado Samaria. **A** ntá jehó tí sín tsíkjeýá Jesús mé kuítóhe sín ntiha. ² Na iso sín imá tinkáchónki Dios mé kjuavá sín ch'in Esteban la ko tsjánkàma sín ch'án la ko t'avéhe sín ch'án. ³ **A** ntá tí ch'in Saulo la kjuankixin kónínkakonhen ch'án tí sín tinkáchónki Cristo. K'uixenhen ch'án jnkojnko jnkojnko ntqe sín la itsé ch'án tí sín ntoa la ko tí chojni chjin. La ntá kuínkánkákjen ch'án sín sákjuiko ch'án sín kixin ts'ejóchjina sín.

Kjuako sín itan jína tí estado Samaria

⁴ **A** ntá tí sín sákjuixin chjasin Jerusalén mé xritjako sín nkexrí tí tan tsaáxinni nkuixín tí sákjuí sín. ⁵ La ijnko ch'in it'in Felipe mé sákjuí ch'án ijnko chjasin estado Samaria la kjuankixin ch'án chrónka ch'án itan kuénte Cristo. ⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'in Felipe kixin ó k'uikon sín tí kjuaxroan kjuakoxin ch'án. ⁷ Itsjé chojni chóntha nchakuen tí jínahya mé kuítóhe sín jína la tí nchakuen tí jínahya k'óyako k'uaxrjexín tí jehe sín. La nchónhya tí sín chóntha chin xitjahya itji la ko tí sín síxénká toté mé kuítóhe sín jína. ⁸ **A** ntá imá kóchéhe kaín tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kixin ijnko chojni imá tjetóan tí jehe ch'án. ¹⁰ La kaín tí sín ntiha k'uejó sín kuínhin sín jína, mé tí chánjan ntsíntí hasta tí chojni imá táda la k'uéntáchro sín kixin:

—Tí ch'ín i imá chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó. ¹² Ntá tió kuítekaon sín tí tan jína kjuako ch'ín Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuikite sín. ¹³ A ntá kjaxin tí ch'ín Simón, mé kuítekaon ch'án la kuikite ch'án, koí ch'án. Ntá kjuankixin k'uájiko ch'án tí ch'ín Felipe la imá chrakon ch'án kixin k'uikon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuēnhen sín ch'ín Pedro la ko ch'ín Juan sátsji sín ntiha. ¹⁵ Ntá tió kjuji sín ntá kjuanchehe sín Dios kixin tí sín ntiha tinkáchónki Cristo chrók'uáyéhé sín Nchakuen Dios ¹⁶ kixin nijnko tí jehe sín ntiha naxá tsík'áyéhya sín Nchakuen Dios. Jehó tsíkikitexín sín ihñjé Ìnchéni Jesús. ¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhé sín Nchakuen Dios.

¹⁸ Na ntá tí ch'ín Simón mé k'uikon ch'án kixin tí sín apóstol k'uejotja itja sín chrítaón kja tí sín a ntá k'uáyéhé tí sín a Nchakuen Dios. La ntá xróxin ch'án chichaon ¹⁹ la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkojin chojni ntá chrók'uáyéhé sín Nchakuen Dios —ichro ch'án.

²⁰ Ntá ntáchro ch'ín Pedro kixin:

—Jaha la ko tí ch'ichakóan ts'itjáyankoa kixin tjenkayáxian kixin chrók'uèna tí kjuachaxin kuènte Dios. ²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán. ²² Méxra tsitohé tí ijjá la chrónóhé Dios kixin ách'e tsjakjnhan ch'án tí jié tjenkayáxian. ²³ Ó t'íkuan kixin imá chjinoxínhin asán la ko nchónhya jié chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kixin:

—Nixjehérá Ìnchéni kixin tí janhan kixin chrókónnahya tí janhan éxí tí ntáchrórá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátsjia nó sur tsoxeta tí ntja t'ínkajinxin chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'átsínka nó nteje. ²⁷ Na ntá tí ch'ín Felipe k'uínkatjen sákjuí tí ntja. La ntiha xrínahya xeta ch'án ijnko chojni tsíkjin nó nación Etiopía. Jehe ch'án mé ijnko chojni eunuco mé tja ch'án sín ch'ichakóen tí tjan reina Candace t'etuenhen tí nación Etiopía. Jehe ch'án sátskji ch'án chjasin Jerusalén xraxinkakonxín ch'án Dios. ²⁸ A ntá tí ch'ín a la xíkjan ch'án inaá chjasén ch'án. Kjuák'exenhen ch'án ijnko carro la

tjenchekuáxin ch'án ijnko xroon tsíkjin ch'ín Isaías, ijnko nkexro k'uéchrónka itén Dios. ²⁹ La ntá tí Nchakuen Dios mé k'uətuənhen tí ch'ín Felipe ntáchro kixin:

—Sátjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuianxian kixin kohya nkexro tsjinkitsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuiko sín éxí ijnko kolélo kjuiko sín ts'óyan sín.

La éxí ijnko kolélo tsjánkahya tíó kjínhin sín kaxree va

mé xíkaha jehe ch'án ninkehó xítjeehya ir'va ch'án.

³³ K'uikon sín ch'án éxí ijnko chojni chóna jje la ntoáhya kjuínchekjasóte sín ch'án.

Kohya nkexro tsjacha tsochrónka kuente tí sín chrók'uaxrjenixin ch'án

kixin jehe ch'án la k'uénxín ch'án chjasintajni.*

Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chrónka nkexro tsənhen tíha. ¿Á jehe ch'án tsənhen tíha o á ókjé nkexro ní? —mé xíkaha kjuanchankí ch'án.

³⁵ La ntá tí ch'ín Felipe kjuankixin chrónka ch'án kuente tí nkehe tjenchekuáxin tí ch'ín a la chrónka ch'án tí tan jína kuente Jesús. ³⁶ A ntá xringhya kjuíji sín tí tjía ntá, ntá ntáchro tí ch'ín eunuco kixin:

—Tsjehe tíja ntá. ¿Á xitjahya chrókuíkítina? —ichro ch'án.

³⁷ Na ntá ntáchro tí ch'ín Felipe kixin:

—Tí kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kixin:

—Títekávan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjin Etiopía a k'uətoan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjin Etiopía mé k'uínkajin sín ntá kjuíankí sín ntá la tí ch'ín Felipe kjuíkite ch'án tí ch'ín a. ³⁹ La ntá kjuixin k'uaxrjenkí sín ntá la ntá tí Nchakuen Inchéni sátsíkjiko tí ch'ín Felipe ókjé. A ntá k'uíkonhya kichó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án. ⁴⁰ A ntá tí ch'ín Felipe xringhya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Inchéni kixin nkexrí tsaáxin sín hasta kjuíji ch'án chjasin Cesarea a.

9

*Tí nkehe kónhen ch'ín Saulo
(Hch. 22.6-16; 26.12-18)*

* 8:33 8.32-33 Isaías 53.7-8

¹ A ntá tí ch'ín Saulo la imá tjinkaon ch'án chrók'óyán ch'án tí sín tinkáchónki Ìnchéni Jesús. Méxra sákjuitsjehe ch'án tí ch'ín nchat'á t'etoan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí nínko chjasin Damasco tsjeyá ch'án tí sín kuákja ntja nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuuji ch'án chjinaxón chjasin Damasco, a ntá xrinahya titàya ikui ijnko xrohi t'inkaséyan kuixin nkaya nkajni k'uantatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátéhe, ntáchro kixin:

—Janhan mé Jesús, mé tí nkexro xritjéyá jaha. ⁶ T'áya sátjia. T'ixenhen tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuakitjenki ch'án ikon ch'án kjánchó t'íkonhya ch'án. A ntá tí sín xriko ch'án tinkátséhe sín itja ch'án sákjuiko sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátéhe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'inkatjen sátjia tí ntja it'in Ntja Ntoí. Ntá tió tsjasán ntoe ch'ín Judas tjanchankíhí sín á ntahya itjen ijnko ch'ín tsíkjin chjasin Tarso me it'in ch'án Saulo. Jehe ch'án mé tjechrónóana ch'án. ¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

—Ìnchéni náhi, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jina kjuích'ehe ch'án tí sín kuítekaon tí jaha chjasin Jerusalén. ¹⁴ A ntá jie la ó kjuí ch'án ntihi kixin tsik'áyéhe ch'án kjuachaxin kuènte nchat'á t'etoan kixin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohé ch'án tí sín ókjé nación la ko tí sín rey la ko kjaxin tí sín israelita. ¹⁶ Janhan tsjakoḥa ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Ìnchéni Jesús, tí nkexro k'uíkuan tí ntja k'uinkaxian, mé k'uetuanna kjuiha kixin sintak'íkuan inaá la ko ts'ayéhé Nchakuen ch'án —ichro tí ch'ín Ananías a.

18 Ntá tuénxín k'uanojtjenxín ikon ch'ín Saulo ijnko nkehe éxí kjoje koche xíkaha. Ntá xík'ikon ch'án inaá. La ntá k'uínkatjen ch'án la ko kuíkite ch'án. 19 La ntá chr'éxin ntá kjóne ch'án la ntá ikjan asén ch'án inaá. Ntá kuítøhe ch'án iso yaon k'uéjoko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

20 Na ntá kjuankíxin ch'ín Saulo kjuakoxín ch'án iso nínko Israel kíxin Jesús mé Xjeen Dios. 21 La kaín tí sín tjejótinhin imá chrakon sín la ntá chro sín kíxin: —¿Á jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á jehya tí xrá a kjuixín ch'án ntihi kíxin tsotsé ch'án sín la sátsjiko ch'án sín tí tjejó tí sín nchat'á t'etøan? —ichro sín.

22 Kjánchó antsí má fuerte kjuako ch'ín Saulo kíxin chaxín tí ch'ín Jesús mé tí Cristo. La tí sín judío k'uéjoko chjasin Damasco kjuachahya kjuachaxín sín ch'án.

Kjuachahya tí sín judío chrótsé sín tí ch'ín Saulo

23 Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyan sín tí ch'ín Saulo. 24 A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyan tí jehe ch'án tí ntója ts'axrjexín ch'án chjasin. 25 A ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajinxín sín tí ntaxra tjenkáya tí ch'ín Saulo nóton tí tjàt'ø tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

26 Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kíxin kuítekakonhya sín kíxin á chrókóchaxín kjaxin ch'án tinkáchónki ch'án Ìnchéni. 27 A ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kíxin ch'ín Saulo mé tsík'ikon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxrá chjasin Damasco k'uékjako ch'án ihnié Ìnchéni la chrakonhya ch'án. 28 Méxrá ch'ín Saulo kuítøhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihnié Ìnchéni Jesús. 29 La ikjo ch'án tí sín judío nixja nkiva griego. A ntá jehe sín la tjinkaon sín chrók'óyan sín tí jehe ch'án. 30 A ntá tí sín kíchó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uøtuønen sín ch'án sátsji ch'án chjasin Tarso.

31 Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uéjoko sín la antsí má tinkáchónki sín Ìnchéni. K'uéchonta sín kjuasáyé Ìnchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuítøhe ch'án jína

32 Na ntá tí ch'ín Pedro xritsjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kíchó ni tjejó chjasin Lida. 33 Ntiha mé k'uitja ch'án ijnko ch'ín it'in Eneas. Ijní nánø tjetsínkaták'á ch'án cama kíxin tsík'en toté ch'án. 34 Na ntá ntá chro ch'ín Pedro kíxin:

—Eneas, Jesucristo mé sintakitøha jína ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín síin chjasin Lida la ko chjasin Sarón k'uikon sín kixin kuitohe ch'án jina la ntá kjaxin sín kuinkáchónki sín Ìnchéni.

Ó xechón tjan Dorcas

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkíva griego la mé t'axrjexín kixin Dorcas. A ntá tí tjan a mé jina kjuich'e tjan tí k'uékjak'e tjan la kjuínkítsa tjan tí chojni nòa. ³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpóe tjan la ntá tí yóxin piso noi kjuák'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjen tí cuérpóe tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan. ⁴⁰ A ntá k'uetóan ch'ín Pedro kixin kaín sín ts'axrje sín ntója. Na ntá kjuák'exín toch'in ch'án nixjehé ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'áya.

Ntá kuakitjenkí tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'íkon sín kixin ó xíxechón tjan. ⁴² Na ntá kaín sín síin chjasin Jope mé kónohe sín tí kjuaxroan kjuich'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuitohe ch'án itsjé yaon tí chjasin a la kjuák'e ch'án ntóe ch'ín Simón, ijnko ch'ín nchentá tjoé iko.

10

Ch'ín Pedro la ko ch'ín Cornelio

¹ Chjasin Cesarea kjuák'e ijnko ch'ín it'in ch'án Cornelio. Jehé ch'án mé capitán k'uetuēnhen tí sín soldado italiano. ² Tí ch'ín a la imá jina ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkítsa tí sín judío la ko xráxin nixjehé ch'án Dios. ³ La ntá ijnko yaon las tres kónjín titàya k'uíkuēn ch'án ijnko ángel kuēnte Dios k'uixenhen tí tjen ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehé ch'án la ko tí jina ch'e tjínkítsa tí sín nòa.

⁵ Ntá jaha tétuēnhén jnkojín chojni sátsji chjasin Jope kixin tsjikakjín sín ch'ín Simón kjaxin it'in ch'án Pedro. ⁶ Itjen ch'án ntóe ijnko ch'ín kjaxin it'in Simón. Tí ch'ín a mé nchentá tjoé iko. Mé tjen ntóe ch'án chjinaxón tí ntayaon a.

⁷ Ntá tió sákjuj tí ángel nixjehé ch'ín Cornelio la ntá jehé ch'án k'uíyehé ch'án yaá sín ch'ehe ch'án xra la ko ijnko ch'ín soldado kjaxin xraxinkaon Dios, la chónthehe sín kjuasáya kichó sín. ⁸ Ntá kjuixin chénka ch'án kaín sín tí nkehe k'uíkon ch'án ntá k'uetuēnhen ch'án sín sátsji sín chjasin Jope.

⁹ Í jnko yaon chr'éxin chjina chonkíxin tjejóyá sín ntja chjino chjasin Jope ntá ch'ín Pedro mé k'uit'ótjen ch'án chrítaon nchia kíxin ntaha nixjeexin ch'án Dios. ¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uikuèn ch'án nkehe ¹¹ mé k'uikon ch'án kíxin xitjehe nkaya nkajní ntá ntíha k'uínkajinxin ijnko ka jíe. Kanoé punté tí ka tjejóte. ¹² Tí nkaxenhen tí ka a tjínká ko noó toté la ko konche la ko kain ko xritjaká. ¹³ Ntá kuínhin ch'án nixja ijnko nkexro ntáchro ch'án kíxin:

—Pedro, t'aya, t'oyán tí ko a ntá inte.

¹⁴ Ntá ch'ín Pedro kjuátēhe ch'án kíxin:

—Náhi, Ìnchéni. Nunca nehyaní tí nkehe tjuáhya.

¹⁵ Ntá kjuátēhe tí tan inaá ntáchro kíxin:

—Tí nkehe ó kjuínchetjóá Dios. La ntáchrohya kíxin tjuáhya —ichro ch'án.

¹⁶ Xíkaha kónhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjéxin tí k'uikon ch'án la xrináhya ó kui tí sín ichr'án ch'ín Cornelio ntója nchia. Ó tsikjanchankí sín nketí tjen ntōe ch'ín Simón. ¹⁸ Ntá kjuanchankí sín itsen kíxin:

—¿Á ntihi tjen ch'ín Simón kjáxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uikon ch'án ntá Nchakuen Dios chrónka kíxin:

—Tsjehé ó kui iní sín xritjeyá tí jaha. ²⁰ T'aya t'inkajián sátjikoa tí sín a. Tóxakuanhya jaha, janhan mé kuétuanhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kíxin:

—Janhan tí nkexro xritjeyará. ¿Nkehe tí tsonhen tjínkáonrá?

²² Ntá kjuátēhe sín ntáchro sín kíxin:

—K'uetōan tí ch'ín capitán Cornelio ikuini ntihi. Jehe ch'án me ijnko chojni imá jína la ko xraxinkaon ch'án Dios. Kain tí sín judío tjikosáyehe ch'án la ko tjuēhe sín ch'án. Ijnko ángel kuente Dios mé nixjehe ch'án chénka ch'án kíxin chrók'uíyēhe ch'án tí jaha kíxin chrókjuaia ntōe ch'án la ntá chrókuinhin ch'án tí nkehe tsontáchrúa —mé xíkaha chrónka sín.

²³ Na ntá tí ch'ín Pedro kjuanjōn kjuachaxin kíxin ntahó chrók'ok'éhe sín tí tie a. Ntá kóyaon ntá sákjuíko ch'án sín. Kjáxin iso sín tinkáchónki Ìnchéni tjejó chjasin Jope mé sákjuíkotōxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjáxin kain sín kjéhya ch'án la ko tí sín chóxin ch'án. K'uíyēhe ch'án tí jehe sín kíxin tsinhin sín. ²⁵ Ntá tió kjuíji tí ch'ín Pedro ntōe tí ch'ín Cornelio ntá k'uaxrjéxin ch'án nchia nixjehe kíchó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kíxin:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uixenhen sín ntōe ch'án la ntá k'uikon tí ch'ín Pedro kíxin nchónhya chojni tsíkójnkotsé ntiha. ²⁸ Ntá ntáchro ch'án kíxin:

—Jahará nohará kíxin tí jeheni judióni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntōe chojni ókjé. Kjánchó Dios kjuakōna kíxin xitjahya tsontáxrjan kíxin tjuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónōna kíxin nkekuente k'uíyanará.

³⁰ Ntá kjuátēhe ch'ín Cornelio ntáchro ch'án kíxin:

—K'uátsínka tí noó yaon ntá tí hora kjuák'eni ntihi ntogeni kjónehyani la nixjeheni Dios. Ntá xrínahya k'uíkonní ijnko chojni chóna iké tjákini. ³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjinkítsa jaha tí chojni nò. ³² Méxra tétuénhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntøe ijnko ch'ín mé kjaxin it'in Simón nchéntá ch'án tjøé iko. Chjino tí ntayaon a itjen ntøe ch'án,” ichro tí ángel. ³³ Méxra xikaha tjoka ichr'anni sín tsíkjeýá sín tí jaha. Jína k'uinka ntøeni. Ntá ijie ó nohe Dios kixin kaín ni tjinkaonni tsinhinni nkehe tí k'uetuanhan Ìnchéni tsøchronka tsinhinni.

Ch'ín Pedro kjuakohe ch'ín Cornelio ntøe ch'án

³⁴ Ntá ntáchro ch'ín Pedro kixin:

—Ijie ó t'íkuañ kixin jnkokón t'ikon Dios kaín xín chojni. ³⁵ Tí nkexro kaín nación titekaon la chónthehe kjuasáyé Dios la mé tóxrjnhjn ch'án. ³⁶ Dios mé nixjehé ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehé ch'án mé Ìnché ch'án kaín nkehe. ³⁷ Jahará ó nohará jína kaín tí nkehe tsikónhen nkuixin tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni. ³⁸ Jahará ó nohará kixin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkjin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínchekitøhe ch'án jína kaín chojni tjasótéxin kaín tí kjuachaxién tí jínahya. Mé xikaha jína kjuích'e ch'án kixin Dios tjejo tí jehe ch'án. ³⁹ A ntá jeheni mé chaxín k'uíkonní kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'èxin kjuak'enkanı sín ch'án ijnko ntacruz la k'óyán sín ch'án. ⁴⁰ A ntá Dios kjuínchexéchón ch'án tí nixin yaon la kjuanjon ch'án kjuachaxin kixin k'uíkonní ch'án inaá. ⁴¹ Jehya kixin kaín chojni chrók'uikon sín ch'án. Náhi. Jehó tí sín tsíkjeýá Dios kixin ts'ikon chaxín xechón ch'án. Jeheni kjónekoni ch'án la ko k'uíkaroni ch'án tió xíxechón ch'án inaá. ⁴² K'uetøan ch'án kixin jeheni tsjakøheni chojni la tsochrónkani kixin jehe ch'án mé tí nkexro juez sinchekitøexin ijie tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kixin jnkojnko tí sín tinkáchónki Jesús mé ts'óxíka ch'án ijie sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxin ch'ín Pedro la chrakon sín kixin Dios mé kjuanjon Nchakuen ch'án, kjaxin k'uáyéhe tí sín jehya judío. ⁴⁶ Méxra kuínhin sín nixja sín jnkojnko nkíva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kixin:

—Jehé sín ó k'uáyéhe sín tí Nchakuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

⁴⁸ La ntá k'uetøan ch'ín Pedro kixin tsikite kaín sín kjuachaxién ihñié Jesucristo. Ntá tí sín kuíkite mé kjuanchia sín kixin chrókuitøhe tí ch'ín Pedro ntiha iso yaon.

11

Nixjehé ch'ín Pedro tí sín tinkáchónki Cristo chjasin Jerusalén

¹ Na ntá tí sín tsíkjeýá Ìnchéni la ko kaín tí sín tinkáchónki Ìnchéni k'uejó estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'ín Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án. ³ Kjuanchankíhi sín ch'án ntácho sín kixin:

—¿Nkekuènté kjuítsjehé tí sín jehya judío, la ko kjontekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xránkixixin kaín nkehe tsikónhen ch'án. Ntácho ch'án kixin:

⁵ —Janhan mé kjuak'é chjasin Jope kjuak'énixjahá Dios. La ntá titàya k'uíkuèn ijnko ka jíé k'uínkajínxín nkaya nkajní. Kanoé punté tí ka tjejóte la kjuak'e chjino tí tjén. ⁶ Ntá tsjahá jína tí nkehe la k'uíkuan kixin tí nkaxenhen tí ka tjínká ko noó toté la ko iko nteje la ko konche la ko iko xritjaká. ⁷ La kjaxin kuínhan itén ijnko nkexro nixjana ntácho ch'án kixin: “Pedro, t'aya t'oyán tí ko a ntá inte.” ⁸ A ntá kjuátahá kixin: “Náhi, Ìnchéni. Nunca nehiani tí nkehe tjuáhya.” ⁹ A ntá kjuátehe tí tan kuixín nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án. ¹⁰ Xíkaha kónhen iní veces. Ntá sákjuí kaín tí nkehe a nkaya nkajní inaá. ¹¹ Ntá xrínahya tuénxín kjuíji iní chojni ntoa tí nchia tjejóni. Tsíkjixín sín chjasin Cesarea xritjeýá sín tí janhan. ¹² Tí Nchakuen Dios mé k'uetóan kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaínni k'uíxenhenni ntóe tí ch'ín a. ¹³ A ntá tí ch'ín ntóe ntiha mé chrónka ch'án kixin k'uíkon ch'án ijnko ángel tjejín toté la nixja ntácho kixin: “Tétuénhén chojni sátsji chjasin Jope kixin tsjikakjín sín ijnko ch'ín it'in Simón la ko kjaxin it'in ch'án Pedro. ¹⁴ Jehe ch'án mé tsonixjahá ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankíxian nixjahá sín na ntá ó kui tí Nchakuen Dios k'uáyéhe sín éxi k'uáyéheni tí senó a. ¹⁶ Na ntá xraxinkaonni tí nkehe k'uénixja Ìnchéni. K'uéntácho ch'án kixin: “A ntá chaxín ch'ín Juan Ìntá ó kuíkítexín ch'án chojni, a ntá ijie jahará tsikitiáxínrá tí Nchakuen Dios.” ¹⁷ Éxi xíkaha jeheni tió kjuankíxin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéheni mé xíkaha ijie la kjuanjon Dios tí Nchakuen ch'án k'uáyéhe tí jehe sín kjaxin. ¿Xá nkexro tí janhan kixin chrókjuánjonkian Dios? —ichro ch'ín Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsikónhen ntá tání sín ntá kjuanchehe sín kjuasáyé Dios. Ntácho sín kixin:

—Kjuanjon Dios kjuachaxin kjaxin kixin tí sín jehya judío ts'áyéhe sín kjuachaxin kixin tsinkáchónki sín Dios la ko tsakja sín kjuachón jnkochrínín —mé xíkaha ichro sín.

Tí ninko chjasin Antioquía

¹⁹ Tí kjuixin k'uen ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakóhe sín tí sín judío nkexrí tjen tí tan jína. A ntá tí sín jehya judío la náhi. ²⁰ A ntá í so sín tinkáchónki Ìnchéni tsíkjixín chjasin Chipre la ko tsíkjixín sín Cirene sákjuí sín chjasin Antioquía. Tió kjuíji sín ntiha mé kjuakóhe sín tí sín jehya judío nkexrí tjen tí tan jína kuènte Ìnchéni Jesucristo. ²¹ Tí kjuachaxin kuènte Ìnchéni mé chónka tí jehe

sín; méxrə nchónhya tí sín ntiha mé kuítqhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. ²³ Ntá tió kjuíji ch'án ntiha ntá k'uíkón ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehe ch'án sín kixin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chóna ch'án Nchakuen Dios la jína tinkáchónki ch'án; méxrə kóchjina nchónhya sín kuínkáchónki sín Ìnchéni.

²⁵ Kjuixin tiha a ntá ch'ín Bernabé sákjuí ch'án chjasin Tarso sákjuíkjeýa ch'an tí ch'ín Saulo. ²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuenté ijnko nánó la kjuakqhe sín itsjé chojni. Ntiha chjasin Antioquía kjuankixin sín kuíkítexín sín tí sín tinkáchónki Cristo mé ihnjé cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía. ²⁸ Ijnko ch'ín it'in Agabo k'uínkatjen ch'án kjuák'exín toté ch'an tí tsíkójkotsé tí sín tinkáchónki Jesús la kjuachaxién Nchakuen Dios chrónka ch'án kixin tsokjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetqan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kichó sín tinkáchónki Ìnchéni estado Judea. La jnkojnko sín kjuanjón sín tí nkehe chóna sín. ³⁰ Mé xikaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen njnko estado Judea.

12

Ik'uén ch'ín Jacobo la ko kjuák'echjina ch'ín Pedro

¹ A ntá tí yaon a tí ch'ín rey Herodes mé ntá kjuankixin ch'án kónínkakonhen ch'án tí sín tinkáchónki Jesús. ² La k'uetqan ch'án kixin tí ch'ín Jacobo ts'enixín ijnko chica espada tjate. Jehe ch'án mé kichó ch'án tí ch'ín Juan a. ³ Ntá k'uíkón ch'ín Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'ín Pedro. Tiha mé kónhen tí yaon kia pascua tió kjóne sín niqtja chónthaya tí xroan nchek'ánki niqtja. ⁴ Kjuixin itsé ch'ín Herodes tí ch'ín Pedro ntá chr'áxenhén ch'án ntqechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kixin ts'íkon kuenté chjasin ntiha kixin nkexrí its'en ch'án. ⁵ Méxrə ch'ín Pedro naxə tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehe sín Dios kaín asén sín kixin tsjinkítsa Dios tí ch'ín Pedro.

Dios kjuínkítsa ch'ín Pedro k'uaxrjexín ch'án ntqechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntqechiso. ⁷ A ntá xrínahya tuénxín ikui ijnko ángel kuente Ìnchéni, a ntá tí nkaxenhén ntqechiso imá k'uínkaséyan ijnkóyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetqan tí ángel ntáchro kixin:

—Tjoka t'áya.

La ntá tí chica cadena tjejóchróntetoxín itja ch'in Pedro mé k'uánótjen. ⁸ Ntá xík'etóan tí ángel ntáchro kíxín:

—T'inkaya iká la tjanka tokatá.

Ntá kuítekaon ch'in Pedro la kjatée xík'etóan tí ángel ntáchro kíxín:

—T'ítsate iká ntá chréhe sátsjini —ichro ch'án.

⁹ Ntá ch'in Pedro chréhe ch'án iton tí ángel a ntá noehya ch'án á chaxín xíkaha kónhen tí nkehe kjuích'e tí ángel o náhí. Ntáchro ch'án kíxín ách'e ijnko nkehe k'uíkoxón ch'án. ¹⁰ Ntá kjuixín k'uátsínka sín tí tjejó tí soldado saoxín la kjuixín xík'atsínka sín tí tjejó tí soldado a yóxin. La ntá kjuíji sín ijnko puerta chica jijé chjinaxón ntía. La ntá tí puerta chica la jehó xitjehé. Ntá k'uaxrje sín tjejótji sín ijnko ntía la ntá xrínahya tí ángel ó sákjuí la ntá jehó ch'in Pedro kuítóhe ch'án. ¹¹ A ntá tí ch'in Pedro kónohe ch'án kíxín chaxín kónhen tíha. Ntá ntáchro ch'án kíxín:

—Ntá ó noheni kíxín chaxín Ìnchéni tsíchr'án tí ángel kuénte ch'án kíxín sinchekaáni kíxín ts'óyánhyani ch'in Herodes la ko tsoenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntóe ijnko tjan María, iné ch'in Juan kjaxin tükítexín sín Marcos. Ntaha tsíkójnksé itsjé sín tinkáchónki Ìnchéni tjejónixjehé sín Dios. ¹³ La ntá t'ínka ch'án tí puerta chjinaxón ntía la nixja ch'án. La ntá ijnko tjan it'in Rode k'uaxrje tjan kjuitsjehe tjan kíxín nkexro tíha. ¹⁴ A ntá tíó kjuátsóan tjan itén ch'in Pedro ntá k'uitjáyenhen tjan kuakitjehya tjan tí ntója a kíxín imá kóchéhe tjan. Kuínká tjan sákjuíchrónka tjan kíxín ntója puerta ntíha itjen ch'in Pedro. ¹⁵ Ntá ntáchro sín kíxín:

—Lontia.

La naḡa chrónka tjan kíxín chaxín jehe ch'án ntá xíntáchro sín kíxín:

—Jehya jehe ch'án. Kjá tí xríntoe ch'án.

¹⁶ A ntá ch'in Pedro naḡa t'ínka ch'án tí ntója puerta la ntá tíó kuakitjehé sín la k'uíkon sín ch'án ntá chrakon sín. ¹⁷ A ntá kjuáqoxín ch'in Pedro itja ch'án kíxín tsotáni sín ntá chrónka ch'án kíxín Ìnchéni mé kuakitsjexín ch'án ntóechiso. Ntá k'uetóan ch'án ntáchro ch'án kíxín:

—Chenkará ch'in Jacobo la ko kaín kíchó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kíxín noehya sín nketi sátsíkji ch'in Pedro. ¹⁹ La ntá k'uetóan ch'in Herodes kíxín sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetóan ch'in Herodes kíxín its'en sín. Na ntá kjuixín tíha ntá ch'in Herodes k'uaxrjexín ch'án estado Judea ntá sákjuí ch'án chjasin Cesarea la ntíha kjuák'e ch'án.

Ik'uén ch'in Herodes

²⁰ A ntá ch'in Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kíxín sátsjitsjehe sín ch'án. Ntaha itjen ijnko ch'in it'in Blasto k'uàyakonhen ch'án ntóe ch'in Herodes ntá kjuanchehe sín ch'án kíxín tsonixjayákonhen sín ch'án tí ch'in t'etóan. Kjuanchia sín kíxín chrókóninkakuenhya sín ch'in Herodes kíxín naḡa tsochr'án ch'án tí nkehe sine sín kíxín chjasén ch'án sítixjín tí nkehe ine sín. ²¹ Ntá ch'in Herodes k'uúyehé ch'án sín kíxín tsojnkotsé sín ijnko yaon. Ntá jehe ch'án k'uitsá ch'án ka náxrjón kuénte chojni t'etóan la kjuák'enkáya ch'án ijnko silla

kuènte chojni t'etòan. La ntá kjuankíxín ch'án nixjehe ch'án tí sín tsíkójkotsé.

²² A ntá tí sín a kjuankíxín k'uèya sín, ntáchro sín kíxín:

—Jehya chojni tjenixja. Dios tjenixja —ichro sín.

²³ A ntá tuénxín ijnko ángel kuènte Ìnchéni kjuínchenlíi ch'ín Herodes kíxín kjuíncheyóhe ch'án asén ch'án Dios. La ntá kosintò kjóne nkaya tsee ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuènte sín chjasin Jerusalén la ntá sáxíkji sín chjasin Antioquia la sákujuiko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákujujako sín

¹ A ntá tí nínko chjasin Antioquia la sín iso sín nixja sín itén Dios la kjuakóhe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkiko ch'ín Herodes tí ch'ín t'etòan estado Galilea, la ko ch'ín Saulo. ² Ijnko yaon la tjejótojnkotsé sín xraxinkaon sín Dios la kjóneha sín. Ntá Nchakuen Dios mé ntáche ch'án sín kíxín:

—Tsakitsjekjan ch'ín Bernabé la ko ch'ín Saulo kíxín ó kjuéyá sín tsánjuan ijnko xra sich'e sín.

³ Ntá nixjehe sín Dios la kjóneha sín la ntá kjuixin ntá k'uejotja tja sín chrítaón ikja tí sín a la nixja sín jnkoinko sín kíxín ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákujuí sín chjasin Seleucia. Ntá ntaha k'uixenhen sín ijnko ntabárcø sákujuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Ntaha kjuakoxín sín itén Dios tí nínko kuènte tí sín judío. Kjaxin kjuíjiko sín ch'ín Juan kíxín tsjinkítsa ch'án. ⁶ La ntá sákujuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kíxín kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín

governador Sergio Paulo. A ntá tí ch'ín gobernador mé imá jína kjuenkayáxin ch'án. K'uíyehé ch'án tí ch'ín Bernabé la ko tí ch'ín Saulo kíxín jehe ch'án tjínkaon ch'án tsinhin ch'án itén Dios. ⁸ A ntá tí ch'ín nchexroan, nkiva griego mé tikítexín sín ch'án Elimas, mé nínkakonhen ch'án tí sín tjako a kíxín tjínkakonhya ch'án kíxín tí ch'ín t'etòan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kíxín:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kíxín ch'éna jínahya tí ntja ntoá kuènte Ìnchéni? ¹¹ A ntá ijie la Ìnchéni sintakjasótia. Tsitòha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uixítie tjen ch'án. La ntá kjuéyá ch'án ijnko nkexro tsinkátséhe tja ch'án sátsjiko ch'án kíxín t'ikonhya ch'án. ¹² A ntá xíkaha mé k'uikon tí ch'ín gobernador nkehe kónhen la ntá kjuankíxín tinkáchónki ch'án Ìnchéni kíxín k'uikon ch'án tí kjuachaxin kuènte Ìnchéni.

Ch'in Pablo la ko ch'in Bernabé tjejó chjasin Antioquia estado Pisidia

¹³ Ntá tí ch'in Pablo la ko tí sín xriko ch'an sákjuixin sín chjasin Pafos. K'uixenhen sín ntabarco sákjuí sín kjuíji sín chjasin Perge estado Panfilia. Ntá ntaha ch'in Juan* kuitohe tí jehe sín ntá kjan ch'an chjasin Jerusalén. ¹⁴ Ntá sákjuixin ch'in Pablo la ko ch'in Bernabé chjasin Perge kjuíji sín chjasin Antioquia chjinaxón Pisidia. A ntá tí yaon t'ok'éhe sín ntá k'uixenhen sín tí njnko Israel na ntaha k'uejótjaxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsikjin tí sín k'uechrónka itén Dios ntá tí sín t'etoan kuènte njnko mé k'uíyehé sín tí sín a ntá ntáchro sín kixin:

—Kichóni tí chonta nkehe tsochronka kixin antsí má tsochéheni la chronka jie tsinhinni —ichro sín.

¹⁶ Ntá ch'in Pablo k'uínkatjen ntá kjuakoxin itja ch'an kixin tsotání sín. Ntá ntáchro ch'an kixin:

—Chrókuinhínrá jahará chojni israelita la ko kjaxin chrókuinhínrá jahará tsikjixinrá chjasin ókjé tí chaxín tjinkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjueyá ch'an tí sín tsik'axrjenixinni. Ntá chr'exin Dios kjuanjon kjuachaxin kixin chrókótsjé tí jehe sín tí naxa k'uejó sín chjasin Egipto. Éxí chojni tsikjixin ókjé k'uejó sín a ntá chr'exin ntá kjuachaxién Dios kjuínkítsa sín k'uaxrjexin sín tí nonte ntiha inaá. ¹⁸ Dios kjuínkítsa sín tí cuarenta nánó k'uejó sín tí nteje. ¹⁹ Ntá chr'exin kjuínchek'itjáyan ch'an yato nación k'uek'ejó nonte Canaán, kixin tí sín tsik'axrjenixinni chrók'uáyéhé tí nonte a. ²⁰ Ntá kaín sín k'uejó sín ntiha ijnko cuatrocientos cincuenta nánó. K'uek'etoan tí sín juez hasta ikjui tí ch'in Samuel ijnko ch'in k'uechrónka itén Dios. ²¹ Ntá kjuanchia tí sín israelita ijnko ch'in rey ts'etuenhen sín. Ntá kjueyá Dios tí ch'in Saúl la k'uetóan ch'an cuarenta nánó. Jehe ch'an it'é ch'an mé ch'in Cis la k'uaxrjenixin ch'an ch'in Benjamín. ²² Ntá chr'exin Dios kuakitsjehe ch'in Saul tí xra kjuák'e ch'an ntá k'uáyéhé ch'in David tí xra rey. Ntá ntáchro Dios kixin: “Ó k'uitjá ch'in David, it'é ch'an mé Isaí. Jehe ch'an mé ijnko chojni nchechàna mé sinchexiteyàna ch'an kaín nkehe tjínkavan”. ²³ Ijnko tí chojni k'uaxrjenixin tí ch'in David mé Jesús. Tíha la Dios tsíchr'an ch'an kixin sinchekaá tí sín israelita. Mé xikaha tsintáchro ch'an. ²⁴ Naxa tjakohya ch'in Jesús ntá ch'in Juan kjuako ch'an tí tan kuínhin tí sín israelita la ntáchro ch'an kixin chrókjan sín chrórxaxinkaon sín Dios ntá chrokuikite sín. ²⁵ Ntá chjina its'en ch'in Juan ntá ntáchro ch'an kixin: “Janhan na jehya tí nkexro tjenkayáxinrá. Náhí. Chr'exin na itsi í jnko nkexro la chrókósuàna chrókjuasintanká tí correa tokaté ch'an kixin antsí mé t'etoan tí jehe ch'an la kánhyó t'etoan tí janhan,” mé xikaha tsintáchro ch'in Juan.

²⁶ Jahará kichó ni tsik'axrjenixinrá ch'in Abraham tinhínrá la ko kaín rá chojni tsikjixin ikjin nchexiteyéhérá Dios, tinhínrá tí tán tsaáxinrá. ²⁷ Méxra tí sín k'uek'ejó sín chjasin Jerusalén la ko tí sín t'etoan ntiha mé kónoehya sín nkexro tí ch'in Jesús la ko kuienxinhya sín tí nkehe tsikjin tí sín k'uechrónka itén Dios senó tió kjuínchekuáxin sín tí xroon tí nkaxenhen njnko jnkojnko tí yaon t'ok'éhe sín. Mé xikaha jehe sín tió kjuínchekjasóte sín tí ch'in Jesús la kjuínchexiteyá sín éxí nixja tí xroon a. ²⁸ Ntá k'uitjahya sín ninkehó jie kixin chrók'uen ch'an ntá kjónté kjuanchehe sín tí ch'in Pilato kixin ts'etoan ch'an kixin its'en ch'an. ²⁹ A ntá ó xiteyá tí nkehe tsikjin tí sín ósé kuènte ch'an. Ntá

* 13:13 Hechos 12.25

kjuixin k'uén ch'án ntá kjuinkajinxin sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uifkon sín ch'ín Jesús tí sín k'uék'ajiko ch'án tió sákjuixin sín estado Galílea la sákjuí sín chjasin Jerusalén. A ntá ijie tí sín a mé tjejónixja sín nkexrí kjuako ch'ín Jesús, tjakohe sín kaín chojni.

³² 'A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjenixinni ósé. ³³ Mé xíkaha xiteyá k'uáyéheni tí jeheni tsík'axrjenixinni tí sín a. A ntá Dios kuènte tí sín a mé kjuínchexechón tí ch'ín Jesús éxi nixja tí xroon yóxin Salmo, ntáchro kixin: "Jaha mé xjanna. Janhan mé tjahá kjuachón jie."† ³⁴ Ntá tsintáchro Dios kixin sinchexechón ch'án tí ch'ín Jesús kixin tsoxíkaha cuérpóé ch'án. Mé xíkaha chrónka tí xroon itén Dios. Ntáchro kixin: "Janhan mé sintaxiteyá tí nkehe chaxín tjanka ch'ín David."‡ ³⁵ La ko í jnko Salmo mé ntáchro xíkíhi: "Jaha tsjánjonhya kjuachaxin kixin tsoxíka tí cuérpóé tí nkexro tjóá kjuít'aha xra."§ ³⁶ A ntá ch'ín David kjuínchexiteyá ch'án éxi tsík'etqan Dios tí kjuák'e ch'án ntá kjónté chr'éxin ik'uén ch'án ntá xravá ch'án xíkaha k'uéxravá tí sín tsík'axrjenixinni la ntá kjónté la xíka ntqé ch'án. ³⁷ A ntá tí cuérpóé tí nkexro kjuínchexechón Dios la kótjehya. ³⁸ Méxra kichó ni t'ichjánxin tsonohará kixin nkexrí tsjin ijjará kixin Jesús mé k'uenyákonhánrá. ³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetoan ch'ín Moisés kjuachahya kótjuáxin tí jie. ⁴⁰ Chrókokaxonhanrá kixin chrókuánhyará xíkaha éxi tsíkjin tí sín ósé xíkíhi:

⁴¹ Tsjehérá jahara chojni titekakonhya. Ijie la tsochrakonrá kixin nkehe tsonhen

kixin janhan Dios tsjákoxian ijnko nkehe jie ijnko yaon
kjánchó tsitékakonhyará kjónté ókjé nkexro chróchrónka.*

⁴² A ntá ch'ín Pablo la ko tí nkexro k'uájiko ch'án k'uaxrjexin sín nkaxenhen tí njnko, a ntá chrónða tí sín jehya sín judío tsíkokjixén, kjuanchia sín kixin í jnko semana tí yaon t'ok'éhe sín la inaá tsochrónka ch'án éxi tí kjuako ch'án.

⁴³ Ntá tí kjuixin xíkaxin sín tí kójnkotsé sín tí njnko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxi tí sín judío la xraxinkaoon sín Dios, la mé imá kóxrjínhin sín tí nkehe kjuako ch'ín Pablo la ko ch'ín Bernabé la ntá sákjuíchréhe sín. A ntá jehe sín mé k'uetoan sín kixin antsí jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín síin tí chjasin ntiha kixin tjinkaon sín tsinhin sín itén Dios. ⁴⁵ A ntá k'uifkon tí sín judío a kixin nchónhya chojni tsíkójnkotsé, ntá imá kóchjinoxin hin sín, ntá kjuankixin sín k'uántaxin hin sín tí ch'ín Pablo. ⁴⁶ A ntá ch'ín Pablo la ko ch'ín Bernabé la íchá antsí má chrakonhya sín nixja sín ntáchro sín kixin:

—T'ichjánxin senó jahará judiorá chrókuinhín itén Dios. Kjánchó tjinkakonhyará tsinhínrá tí nkehe jína tsjanjon kjuachón jnkochríxin. A ntá ijie la tsitohará tí jahara judiorá la ntá jeheni la sátsjini tsjakoheni tí sín jehya judío ⁴⁷ xíkaha tsík'etqan Inchéni. Ntáchro ch'án kixin:

Janhan ichr'an tí jahará éxi xrohi ts'inkaséyanxín kaín nación
kixin sátsjikoará tí tan tsjanjon kjuachón tsaáxin chojni hasta tí antsí má kjín
kjuèxin chjasintajni.†

† 13:33 Salmo 2.7 ‡ 13:34 Isaías 55.3 § 13:35 Salmo 16.10 * 13:41 Habacuc 1.5 † 13:47 Isaías 42.6; 49.6

Mé xikaha k'uetōan Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntáchro sín kíxin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkĩtoenxín sín kíxin tsochóna sín kjuachón jnkochrín. ⁴⁹ Ntá xikaha xrankíxin xrako tí itén Ìnchéni nkuixín tí chjasin ntiha. ⁵⁰ A ntá tí sín judío nixjehé sín iso chojni chjin jína tjetōan la ko tí chojni ntoa t'etōan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'ín Pablo la ko tí ch'ín Bernabé ntá sákjuixin sín chjasin ntiha. ⁵¹ A ntá jehe sín la kótsjénka sín tokaté sín kíxin tsoxénjin tí nche chóna toté sín. Tíha mé kjuakoxín sín kíxin ntoáhya kjuenkayáxin tí sín a. A ntá sákjuí tí jehe sín chjasin Iconio. ⁵² Ntá tí sín tinkáchónki Ìnchéni la imá chéhe sín kíxin antsí chóna sín Nchakuen Dios.

14

Ch'ín Pablo la ko ch'ín Bernabé tjejó chjasin Iconio

¹ Ntá kjuíji ch'ín Pablo la ko ch'ín Bernabé tí chjasin Iconio. Ntá k'uixenhen sín njnkeé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kíxin tsonínkakonhen sín tí sín tjako. ³ A ntá tí sín tjako la isé kuitōhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínhin ch'án tí nkehe nixja sín kíxin nkexrí tjuèheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjevá Ìnchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etōan kíxin sinchechrakon sín tí sín tsíkjevá Ìnchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuixín ntiha. ⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kíxin tsikokjéxín ch'án xitjahya itji ch'án. ⁹ Méxra ó tjetjaxínkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kíxin tí ch'ín antsí tinkáchónki ch'án Ìnchéni kíxin tsitōhe ch'án jína. ¹⁰ Ntá jehe ch'án itsen ntáche ch'án tí ch'ín a kíxin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uúikon sín nkehe kjuích'e ch'ín Pablo, ntá kaín sín k'uúyexin sín nkívee sín Licaonia ntáchro sín kíxin:

—Dios tsík'óna chojni mé tsíkixín nkajní tjejókoni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kíxin imá nixja ch'án. ¹³ Ntá tí ch'ín nch'at'á kuènte tí dios Júpiter mé chóna ch'án njnko tí t'ixenxinni ikon chjasin ntá kjuíkao ch'án koxinta tjeteyá tsjo. A ntá jehe ch'án la ko kaín tí chojni la chréhe sín kíxin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko

ch'ín Bernabé mé kónohe sín tíha ntá kjuankíxin sín kótséchje sín iké sín la sákjuíkjiakjan sín tí chojni síin ntiha la t'óyako sín ntáchro sín kíxin:

¹⁵ —¿Kuènté kíxin tjejoch'erá xíkaha? Jeheni chojni éxi tí jahará. Tí xra ó kuini kíxin tsochrónkani itén Dios kíxin tsitohérá kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehé ch'án mé kjuíuch'éna ch'án nkajní la ko chjasintajni la ko tí ntayaon la ko kaín tí nkehe síin. ¹⁶ Ntá ósé mé kuítóhe Dios chojni kíxin jehó ts'aji sín ntje sín. ¹⁷ Kjonté la Dios tjakoxin ch'án kíxin jehé ch'án t'etóan ch'án kíxin kjuíuch'éna ch'án kaín nkehe. Jehé ch'án mé t'etóan kíxin ts'aniá chrin ntá ts'enkani la jína ts'óneheni, la jehé ch'án tjanjon ch'án nkehe kíxin jnkochrín ts'ixín nkehe sineni, la ko jehé ch'án mé nchechéheni ch'án —mé xíkaha ichro ch'ín Pablo.

¹⁸ Kjonté xíkaha ichro tí sín tjako la naxá tjinkaon tí chojni chrokjuikosáyehe sín chrók'óyan sín koxinta chrókjokehe sín tí sín tjako.

¹⁹ A ntá ikuí iso tí sín judío kjuixín sín chjasin Antioquía la ko chjasin Iconio. Nixjehé sín tí sín ntiha kíxin tsitóhe sín tí nkehe jehya jína tjako tí sín a ntá kóninkaon sín ntá kjuankíxin chjéhe sín xro tí ch'ín Pablo. La ntá ách'e ó kjuixín tsík'en ch'án ntá kuinkánkákjen sín ch'án sákjuiko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uañtatjen sín tí ch'ín Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxin ntá sákjuiko ch'án tí ch'ín Bernabé chjasin Derbe.

²¹ A ntá ó kjuixín chrónka sín tí tan jína la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. ²² Nkuixín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uetóan sín kíxin naxá jína chrókuinkáchónki sín Ìnchéni la ntáchro sín kíxin tí ts'ixenhenni tí kjuachaxin kuènte Dios t'ichjánxin tsjasóteni. ²³ A ntá ntiha kjueyá sín chojni jnkojnko ñínko kíxin ts'etueñhen sín tí sín tinkáchónki Jesús kíxin jína ts'ejó sín. Ntá nixjehé sín Dios tí naxá kjónehya sín la ntá ntáche sín Ìnchéni kíxin ts'ayakonhen ch'án tí sín ó kuinkáchónki tí jehé ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsínka sín estado Pisidia la ntá kjuíji sín estado Panfilia. ²⁵ Ntá chjasin Perge kjuako sín tí tan kuènte Ìnchéni la ntá kjuixín ntá sákjuí sín chjasin Atalia. ²⁶ Ntá ntiha k'uúixénxín sín ntabárcó ntá sákjuí sín chjasin Antioquía tí chjasin k'uénixjehé chojni Dios k'uékjanchia sín kíxin Dios tsjinkítsa tí sín a sich'e sín tí xra. La ntá ó kjuixín xiteyá. ²⁷ Ntá tíó kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'ín Pablo nkexrí kjuínkítsa Dios tí jehé sín la ko nkexrí kjuanjon Dios kjuachaxin tsjakóhe sín tí chojni jehya judío kíxin kjaxín sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsjé yaon k'uéjoko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsíkixín sín estado Judea ntá kjuíji sín chjasin Antioquía. Ntá kjuankíxin sín kjuakóhe sín tí sín kíchó ni kíxin xitjahya tsaáxin sín tí chóntahya sín tí xroye tsík'etóan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuankíxin kjuanjonkoxín sín kíchó sín. Ntá áxri ntá

kónoxín kixin tí ch'in Pablo la ko tí ch'in Bernabé la ko í so chojni la sátsji sín chjasin Jerusalén. Ntaha tsonixjehé sín tí sín apóstol la ko tí sín t'etōan n̄nko kixin nkexrí tsonhen tí xroye tsík'etōan ch'in Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchónka sín kixin nkexrí tí sín ókjé jehya sín judío kjuitoxínhin tí k'uékjenkayáxin sín ntá kuákja sín ntje Dios. Ntá kain tí sín kichó ni imá kóchéhe sín tí kuínhin sín xikaha.

⁴ La ntá kjuíji ch'in Pablo la ko ch'in Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etōan kuènte n̄nko mé kjuanjōn sín kjuachaxin ts'ejó tí sín a. Ntá chrónka sín kixin Dios imá kjuínkjsa tí jehé sín. ⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ituenhen sín sinchexiteyéhé sín kain tí ley —ichro sín.

⁶ Na ntá kain tí sín apóstol la ko tí sín t'etōan n̄nko mé kójnkotsé sín kjuenkayáxin sín nkexrí tsonhen kixin xikaha ichro tí sín judío. ⁷ Ntá imá nixjehé kichó sín ntá k'uínkatjen ch'in Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjeýá tí jeheni kixin tsjakōheni kain tí sín jehya judío kixin tsínhin sín tí tán jina kuènte Cristo kixin kjaxin jehé sín tsitekaon sín. ⁸ Dios mé ó nohe ch'án nkexéhe kain asén chojni. Kjuakoxin ch'án kixin k'uáyéhé ch'án tí sín jehya judío kixin chjéhe ch'án sín Nchakuen ch'án éxi tí xikaha k'uáyéhéni tí jeheni. ⁹ Dios la t'ikon kain chojni jnkokón éxi tí jeheni. Ntá kjuínchetjóa ch'án asén sín kixin ó tinkáchónki sín Ìnchéni. ¹⁰ Méxra ¿nkekuènté titekákonhyará tí nkehe kjuích'e Dios la ntá tétuēnhénrá chojni sinchexiteyá sín kain tí nkehe ixra tsitekaon sín? Ni jeheni la ko ni tí sín tsík'axrjenixinni kjuachahya sín kjuínchexiteyá sín tíha. ¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehé sín kuítekaon —mé xikaha ichro ch'in Pedro.

¹² Ntá kain tí sín tsikójnkotsé tání sín kuínhin sín nkexrí chrónka tí ch'in Bernabé la ko tí ch'in Pablo kixin Dios kjuínkjsa sín kjuasin sín itsjé kjuaxroan k'uikon tí sín jehya sín judío. ¹³ Kjuixin nixja ch'in Pablo la ko ch'in Bernabé ntá kjuankixin nixja ch'in Jacobo, ntáchro ch'án kixin:

—Kichóni, tinhínrá tí nkehe tsōxrjanka. ¹⁴ Ch'in Simón Pedro chrónka nkexrí kjuakoxin Dios kixin tjuéhe ch'án tí chojni jehya judío la nkexrí kjuéyá Dios iso tí sín kixin tsinkáchónki sín tí jehé ch'án. ¹⁵ Mé xikaha chaxin chrónka tí xroon tsíkjin tí sín k'uéchónka itén Dios kixin:

¹⁶ Janhan mé tsokjan chr'éxin.

Tió ts'ínka ntá sit'ána n̄xin tí nchia tsík'oya kuènte David la janhan la tsjínkjsa sín ts'etōan sín.

¹⁷ Kixin kjaxin kain xín chojni mé tsjeyá sín Ìnchéni

la ko kjaxin kain xín tí sín ókjé nación mé tí sín kótjuáxin n̄ina mé tsinkáchónkina sín.

¹⁸ Ìnchéni mé kjuakoxin kain tíha tí ósé la tsíkjanjon ch'án tí tan kuènte ch'án.* Mé xikaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuènté tí ley kixin ó kuítōhe sín tí nkehe kuinkáchónki sín senó kixin jina chrókjuéyá sín Dios. ²⁰ Méxra tsochr'énhenni sín ijnko xroon la jehó

* 15:18 15.16-18 Amós 9.11-12

ts'etueñhenni sín kixin chrókjonehya sín tí nto tsíkjokehę chojni tí nkehe tsíkjanoya la ko chróchóntahya sín chojni chjin ókjé la ko chrókjonehya sín tí nto kuènte ko tsichrínjinhya ikja va la ko chrókjonehya sín ijñié va. ²¹ A ntá jnkojnko chjasin síin nkeexo chrónkaxín tí ley kuènte ch'ín Moisés nchekuáxin sín tí nkaxenhen ñinko jnkoinko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeýá Ìnchéni la ko tí sín t'etōan kuènte ñinko la ko kaín tí í so sín tinkáchónki Ìnchéni kjeueýá sín iso chojni tsochr'án sín chjasin Antioquía, mé kjeueýá sín ch'ín Judas, tìkìtēxín sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetōan ntiha. ²³ Ntá ichr'án sín tí xroon sákjuiko tí sín a ntáchro kixin:

“Jeheni chojni tsíkjeýá Ìnchéni la ko chojni t'etōan kuènte ñinko ntihi la nixjहारáni tí jahará, kichó ni jehya judío, tjejórá chjasin Antioquía la ko estado Siria la ko estado Cilicia. ²⁴ Ó noheni kixin iso chojni tsíkixín chjasénni kjónté k'uéchéntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etōan ch'ín Moisés. ²⁵ Ntá jnkokoá kjuenkayáxinni tsjeýáni nkeexo tjejó ntihi kixin sáchrókjuitsjehe tí jahará la chrókjuujiko sín ch'ín Bernabé la ko ch'ín Pablo kixin imá tjeñeheni sín. ²⁶ Tí sín a mé ántōsen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'ánni ch'ín Judas la ko ch'ín Silas tsjiji sín kixin jehe sín mé tsonixjहारá sín tsochrónkaxín sín kaín tíha. ²⁸ Jína kixin Nchakuen Dios mé kjuínkítsani kjuenkayáxinni kixin jehya chrók'uetōanhanráni ijnko nkehe imá xra. Náhi. Jehó tí nkehe kánhyó xra t'ichjánxin sinchexiteyará mé t'etōanni: ²⁹ chrókjóntehyará tí iko tsíkjokehę chojni tí nkehe tsíkjanoya la ko kjaxin chrókjóntehyará ijñié tí ko a la ko chrókjóntehyará tí nto kuènte tí ko tsichrínjinhya kja la ko kjaxin ninkexró chrókuakjahya í jnko chojni chjin ókjé. Ntá tí sijnchexiteyará kaín tí nkehe t'etōanni la jína ts'ejorá.” Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a. ³¹ Ntá tió kjuínchekuáxin tí sín kichó ni tí xroon a ntá imá kóchéhe sín kixin xikaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kichó ni kixin tí nkehe nixja sín. ³³ Ntá ntahó k'uéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehe sín jína ntá ó xikjan sín inaá tí tsíkixín sín tí tjejó tí sín tsich'án sín. ³⁴ Kjánchó ch'ín Silas kjuenkayáxin ch'án kixin ntahó chrókuitōhe ch'án. ³⁵ A ntá ch'ín Pablo la ko ch'ín Bernabé kuitōhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

³⁶ A ntá chr'exín ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjitsjeheni tí sín kichó ni kaín tí chjasin kjuakōxínni itén Ìnchéni ósé. Tsjitsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tìkìtēxín sín ch'án Marcos. ³⁸ A ntá ch'ín Pablo kóxrjēnhya sátsjiko sín tí ch'ín Marcos a kixin jehe ch'án kuitōhe ch'án sín estado Panfilia la kjuínkítsahya ch'án kixin naxa tsonhen tí xra.† ³⁹ Méxra jnkokoáhya

† 15:38 Hechos 13.13

kjuenkayáxin sín la ntá xikayehé sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabárcø sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueyá ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchehé sín asén tí sín tinkáchónki Ìnchéni njnko ntiha.

16

Ch'ín Timoteo sákjuíko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehé ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kíchó ní tjejó chjasin Listra la ko chjasin Iconio mé nixja sín kixin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetøan ch'án chrókua tí ch'ín Timoteo a tí xroye kixin tsonínkakonhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínka sín la nixjehé sín tí sín kíchó ni la chrónkaxin sín tí nkehe tsik'etøan tí sín apóstol la ko tí sín t'etøan kuente njnko chjasin Jerusalén. ⁵ Ntá tí chojni tinkáchónki Ìnchéni mé antsí má ntoá k'uejó sín la ko jnkojnko yaon sítinkákótsjé sín.

Xrínghya titàya k'uíkuen ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. ⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínghya titàya k'uíkuen ch'ín Pablo ijnko ch'ín estado Macedonia kjuák'exín toté ch'án chrónòa ch'án kixin: "T'átsínka Macedonia tsjínkítsani," ichro ch'án. ¹⁰ Méxra tíha tsik'íkon ch'ín Pablo la ntá tuéxín kóyaxinhinni kixin sátsjini estado Macedonia kixin kónoexinni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uejókotoxinni kíchó ni ntiha.]

Ch'ín Pablo la ko ch'ín Silas, k'uejó sín chjasin Filipos

¹¹ Ntá ntaha chjasin Troas k'uixenxinni ijnko ntabárcø ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uechóna tí sín romano ósé ntá ijnko chjasin antsí má tjeotan tí it'ø tí estado Macedonia. Ntaha mé k'uejóni iso yaon. ¹³ Ntá tí yaon t'ok'éhe sín ntá k'uaxrjéxinni tí chjasin Filipos ntá sákjuíni ijnko chrínta ntario mé ntiha kuénhen sín tsojnkotsé sín tsonixjehé sín Dios. Mé ntaha k'uejótjaxinni la kjuankíxinni kjuakoheni iso chojni chjin tsikójkotsé ntiha. ¹⁴ Ntá ijnko tí jehé sín mé ijnko tjan it'in tjan Lidia la tsikjixin tjan chjasin Tiatira. Jehé tjan mé nchekji tjan ika náxrjøn kjátse tié. Ntá jehé tjan xraxínkaon tjan Dios la jína tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo. ¹⁵ Ntá jehé tjan la ko kaín tí sín tjejó ntøe tjan mé kuíkite sín. Ntá chrónóehé tjan tí ch'ín Pablo ntáchro tjan kixin:

—Tí chaxín tjátsəon kixin chaxín tinkáchónkini Ìnchéni la jína chrókuitəha ntəeni ntihi —ichro tjan.

Ntá kjónté kuitəheni ntiha.

¹⁶ Ntá ijnko yaon sákjuini tí nó kuènnen sín nixjəexín sín Dios ntá ó xətani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhya chichaon tjacha tí ìnché tjan kixin xíkaha tónohe tjan. ¹⁷ A ntá tí tjan tjarisoá a kjuankixin tjan tinkáchrəhe tjan tí ch'ín Pablo la ko tí jeheni ntá t'əya tjan ntáχρο tjan kixin:

—Tí sín i ch'ehə sín xrə Dios nkaya nkajni la tjako sín ijnko ntja jína tsaáxin chojni.

¹⁸ Mé xíkaha kjuich'e tjan itsjé yaon. Ntá kóchjinhj ch'ín Pablo la nkátjá ch'án nixjəhe ch'án tí nchakuen tí jínahya chóna tí jehe tjan, ntáχρο ch'án kixin:

—Kjuachaxiəni ihnié Jesucristo tétuənhán kixin ts'axrjəxian tí jehe tjan —ichro ch'án.

Ntá tuénxín ó k'uaxrjəxín tí nchakuen tí jínahya tí jehe tjan.

¹⁹ Na ntá tí ìnché tí tjan a mé k'uikon sín nkehe kónhen tjan la ó nohe sín kixin í tsjachahya sín chichaon kuente tí xrə ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuiko sín tí tjejó tí síxreé ntasin tjeəon. ²⁰ Ntá kjuíkəán sín ntaha tí tjejó tí sín juez la ntáχρο sín kixin:

—Tí sín i mé sín judío la imá síjtjé sín chjasénni. ²¹ Tjako sín tí nkehe kuènhyani tsənoheni la tóxrjənhyani sich'eni kixin jeheni mé chojni romanoni.

²² Kaín tí sín ntiha kónínkakohenen sín tí jehe sín. Ntá tí sín juez mé k'uetəon ts'axrjəhe sín iké sín ntá ts'ekonxín sín nta sé. ²³ Ntá tió kjuixin k'uekon sín nchónhya ntá chr'əxənenh tí sín a ntəechiso ntá k'uetəuənenh sín tí ch'ín t'ayakonhen ntəechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntəechiso mé k'uáyəhe ch'án kjuachaxin ntá chr'əxənenh ch'án tí sín a ijnko cuarto chríka ntəechiso kixin ts'axrjəhya sín. Ntá chr'əxənenh ch'án toté sín tí nta tjejóxrja la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjəhe sín Dios la ko itsje sín himno kuente Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín. ²⁶ Ntá xrinahya tjan kuínki nonte la kjuínchekinkí kuente tí xrankixixín ntəechiso ntá tuénxín kaín tí ntója puerta mé xitjəhe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntəechiso mé k'uəya ch'án. Ntá k'uikon ch'án kixin síxítjəhe tí ntója puerta ntəechiso a. Ntá kuakitsje ch'án chica espada ntá chrók'óyán ch'án asén ch'án kixin kjuenkayáxin ch'án kixin ó kjuixin tsíkínká kaín tí sín síchjina, ichro ch'án. ²⁸ Ntá ch'ín Pablo k'uəya ch'án itsen ntáχρο ch'án kixin:

—Náhi kohya nkehe ch'ehé asán kixin kaín ni naxə tjejóni ntihyó —ichro ch'án.

²⁹ Ntá tí ch'ín t'ayakonhen ntəechiso kjuanchia kixin ts'ákjen xrohi ntá k'uixənenh ch'án kuínká ch'án la síxránkə ch'án chrakon ch'án ntá kjuítsínka ch'án toté tí ch'ín Pablo la ko tí ch'ín Silas. ³⁰ Ntá tuénxín kuakitsjəxín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátəhe sín ntáχρο sín kixin:

—Títekəvan Ìnchéni Jesucristo la tsaá jaha la ko tí sín tjejó ntəa.

³² Ntá kjuakohę sín tí jehe ch'án a la ko kaín tí sín tjejó ntęe ch'án ti tan kuente İnchéni. ³³ Na kjónté sítié la tí hora a sákjuiko ch'án sín kjuínchek'íjmá ch'án tí tsíchrit'ó sín. Ntá tuénxín jehe ch'án la ko kaín xín sín tjejó ntęe ch'án mé kuikite sín. ³⁴ Na ntá chr'éxín tí jehe ch'án sákjuiko sín ntęe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntęe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuęnen sín tí sín policia sátsjitsjehe sín tí ch'ín t'ayakonhen ntęechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntęechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'ętoan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policia kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jię chóntani. Náhí. Kjónté la chr'áxenhenni sín ntęechiso. A ntá ijie la zá imó chrókuakitsjeni sín ní? Náhí. Tsjijia ti jehe sín tsakitsjeni sín —ichro ch'án.

³⁸ Ntá tí sín policia mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónðehe sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntiha ntá chrónða tí sín a sátxixín sín tí chjasin ntiha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntęechiso ntá kjuíji sín ntęe tí tjan Lidia. Ntá tió kjuixín sákjuítsjehe sín tí sín kichó ni la kjuínchechéhe sín ntá sákjuixín sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uaítsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. ² A ntá ch'ín Pablo sákjuí ch'an nínko éxí kuęnen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án kixin tí nkexro Cristo mé t'ichjánxín its'en la ko chr'éxín tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhúnra jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxínkaon Dios a la ko kjaxin nchónhya chojni chjin tjetean kuítekaon. ⁵ A ntá iso tí sín judío tinkáchónkihya İnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uúxité sín la kjuínchexakonhen sín tí sín siín chjasén sín. Ntá itsjé sín k'uúxēnhen sín ntęe ijnko ch'ín it'ín Jasón kjueyá sín ch'ín Pablo la ko ch'ín Silas kixin tjínkaon sín sáchrókjuikohe sín tí sín a tí sín t'ętoan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki İnchéni ntá kuínkánkájjen sín sákjuiko sín tí siín tí síxreé tí chjasin ntiha. Ntaha nínkaon sín k'uéya sín ntáchro sín kixin:

—Tí sín i mé kjuínchexakonhen chojni kuénté chjasintajni. La ntá ó kjuí sín chjasénni ntihi kjaxin. ⁷ La ntá tí ch'ín Jasón a mé kjuanjon ch'án kjuachaxin kixin tí sín a mé ts'ejó sín ntęe ch'án. Kaín sín titekakonhya sín tí ley kuente

tí ch'ín romano t'et̄oan. Ntáchro sín kixin itjen í jnko nkexro antsi má t'et̄oan, ntá tíha mé Jesús —ichro sín.

⁸ Ntá tió kuínhin kaín tí sín tsikójnkotsé la ko tí síxreé ntá k'uúixité sín kóninkaon sín. ⁹ Ntá ch'ín Jasón la ko tí sín tjejóko ch'án kjuenka sín ntá tí síxreé kuítōhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uúixenhen sín tí nínkoé tí sín judío. ¹¹ A ntá tí sín judío ntiha la antsi má jína asén sín, ntá tí sín chjasin Tesalónica la náhi. Antsi má kóxrjnh̄in sín tsinhin sín tí itén Dios la jnkójnko yaon kjuínchekuáxin sín tí xroon chóna itén Dios kixin tsonohe sín á chaxín ntoá xikaha tí ntáchro tí sín a. ¹² Méxra nchónhya tí jehe sín kuítekaon sín la ko kjaxin nchónhya tí chojni chjin griego tjetōan mé kuítekaon la ko kjaxin tí chojni ntoa. ¹³ A ntá tí sín judío chjasin Tesalónica kónohe sín kixin ch'ín Pablo mé kjuakox̄in itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a. ¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítōhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uuet̄oan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uúává asén ch'án kixin k'uúikon ch'án kixin tí chjasin ntiha síin nchónhya tí nkehe tsíkjanoya. ¹⁷ Ntá tí nínko ntiha kjuakōhe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakōex̄in ch'án tí chojni síin ntiha. ¹⁸ La iso tí sín kjuínchekuáxin tí xroon kuente tí chojni it'in epicúreo la ko iso tí sín kjuínchekuáxin tí xroon kuente tí chojni it'in estoico kjuankixin nixjehe sín tí ch'ín Pablo. Iso sín ntáchro sín kixin:

—¿Nkekuènté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuente í jnko dios.

Mé xikaha ichro sín kixin kjuako ch'ín Pablo tí tán jína kuente Jesús la ko kjuako ch'án kixin Jesús kjónté k'uén ntá xechón. ¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuénhen sín tójnkotsé sín kixin tjenkayáxixín sín. Ntá nixjehe sín tí ch'ín Pablo, ntáchro sín kixin:

—Tjinkaonni tsochrónka tí nkehe nixin kjuíkoa. ²⁰ Itsjé tí nkehe ókjé tjetjákua la tjinkaonni tsonoheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsikjix̄in ókjé tjejó ntiha mé tóxrjénhya sín í jnko xra, jehí tóxrjinh̄in sín chrókuinhin sín la ko chrónixja sín jnko nkehe nixin.

²² Ntá ch'ín Pablo k'uúinkatjen ch'án kjuák'ex̄in toté ch'án tí síin tí jehe sín chrítaón tí Tjo Areópago. Ntá ntáchro ch'án kixin:

—Jahará tjejorá chjasin Atenas tinhínrá. Janhan ó k'uúikuān kixin jahará la itsjé dios tinkachónkirá. ²³ Ntá tí kjuak'é ntiha k'uúája la k'uúikuān itsjé tí nketí tjásixínrá culto ntá k'uitja ijnko altar ts'ínixín kixin: “Ntihi xraxinkakonxínni

ijnko Dios naxa chónhyani". Méxra tí Dios xráxinkáonrá kjónté naxa chonhyará mé tí Dios a mé tjákoará.

²⁴ Tí Dios mé kjuích'éna ch'án chjasintajni la ko kaín nkehe síin chjasintajni. Jehe ch'án mé inché nkajni la ko chjasintajni. La tjexenhya ch'án ijnko njnko tsíkijch'énaxín chojni tja. ²⁵ La t'ichjánxienhya ch'án kixin chojni chrókjuinkítsa tí jehe ch'án kixin jehe ch'án mé chjéhe kjuachón kaín chojni la ko tjanjon ch'án xrijto la ko kaín nkehe síin.

²⁶ Kaín tí nacióon k'uaxrjenixin jnkokoá chojni kixin chrók'uejó sín nkuíxin chjasintajni. Kjaxin chrónka Dios nkesá la ko nketí ts'ejó chojni. ²⁷ Méxra jeheni t'ichjánxin tsjeyáni Dios kixin ntá tsienxínni nkexrí ts'itjani ch'án. Jehya imá ikjín itjen ch'án, chjino tí tjejóni itjen ch'án. ²⁸ Jehe ch'án tjejóchónxinni ch'án la ko nchekinkíni ch'án la jehe ch'án t'ayakonhenni ch'án. Mé xikaha tsintáchro jnko ch'án chjasánrá ósé kixin: "Jeheni mé naxa kjéhya Dios."

²⁹ Jeheni mé naxa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsíkjenkayáxin chojni kixin sich'éna sín dios kuénte sín. ³⁰ Senó Dios kónínkakhonhya ch'án kixin ó nohe ch'án kixin naxa chónhya sín ch'án. Ntá ijie t'etuenhen Dios kaín xín chojni síin chjasintajni tsokjan sín la tsinkáchónki sín tí jehe ch'án. ³¹ Dios tsíkjejá ijnko yaon sinchekitoexín ijie chojni chjasintajni. Tsíkjejá ch'án ijnko chojni la kjuákoxin kaín kjuachaxin kixin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín kixin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kixin:

—Chr'éxin tsinhinni inaá tí nkehe ntáchrúa —ichro sín.

³³ Ntá ch'ín Pablo kuitohe ch'án tí jehe sín. ³⁴ Na ntá iso sín kjuíchréhe sín ch'ín Pablo la kjuankixin tinkáchónki sín Inchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitoexín ijie chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Inchéni.

18

Sákjuí ch'ín Pablo chjasin Corinto

¹ Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto. ² Ntíha mé xéta ch'án ijnko ch'ín judío it'in Aquila. Jehe ch'án mé tsíkijxin ch'án estado Ponto la séhya jehe ch'án la ko ichjién ch'án Priscila mé kjuixín sín nacióon Italia kixin t'ichjánxin ts'axrjexín sín ntíha kixin tí ch'ín t'etoan mé it'in Claudio k'uetoan ch'án kixin kaín tí sín judío mé ts'axrjexín sín tí chjasin Roma. Ntá ch'ín Pablo mé kjuínixjehe ch'án sín.

³ Jnkokón xra ch'e sín la ko jehe ch'án, ch'éna sín kamantá t'óna nchia. Méxra ntá ntahó kuitoeko kichó sín kixin jnkokoá sich'e sín tí xra a. ⁴ Ntá jnkojnko tí yaon t'ok'éhe sín sákjuí ch'ín Pablo tí njnko nixjehe ch'án tí sín judío la ko tí sín jehya judío kixin tjnkaon ch'án kixin kaín tí chojni chrókuitekaon sín.

⁵ Ntá tió ch'ín Silas la ko ch'ín Timoteo kjuixín sín estado Macedonia ntá ch'ín Pablo kjuák'e xra ó kjuako ch'án itén Dios kixin tsoñohe tí sín judío kixin Jesús mé tí nkexro Cristo. ⁶ Ntá tí sín judío mé kjuankixin kónínkakhonhen sín tí ch'ín Pablo la imá k'uántaxínhin sín ch'án. Ntá jehe ch'án k'ótsjenka ch'án iké ch'án kixin kjuákoxin ch'án kixin xikaha tsjasóte sín. Ntá ntáchro ch'án kixin:

—A ntá ijie la jahará kjuéyará tí jię ts'itjáyanxínrá. A ntá janhan la í chontahya jię kixin ó kjuákohará tí tán jína, a ntá kuítékákonhyará. A ntá ijie la íchá jína sátsjia tsjákoħa tí sín jehya judío —íchro ch'án.

⁷ Ntá k'uaxrjéxin ch'án nınko ntá sákjuí ch'án ntęe ijnko chojni mé it'in Justo mé jehe ch'án xraxinkaon ch'án Dios. Ntęe ch'án mé chjinaxón nınko. ⁸ Ntá ch'ın Crispo, ijnko nkexro t'ętoan kuente nınko, la ko kaın tí sín tjejó ntęe ch'án, mé kjuankixin sín kuítekaon sín İnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankixin sín kuítekaon sín İnchéni la kuíkite sín. ⁹ Ntá ijnko tie titaya k'uíkuèn ch'ın Pablo İnchéni nixjeħe ch'án ntáchro kixin:

—Chrakonhya tjákua itan kuéntana. Tjtoéhya tsochronka ¹⁰ kixin janhan tjejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹ Méxra ch'ın Pablo mé kuítęe ch'án ijnko nánó ko t'ę ntiha chjasin Corinto, kjuákęęe ch'án sín itén Dios.

¹² A ntá tí yaon k'ųetoan ch'ın Galión estado Acaya, ntá itsjé tí sín judío kóninkakonhen sín tí ch'ın Pablo. Ntá itsé sín ch'án sákjuiko sín ch'án tí tjejó tí sín t'ętoan. ¹³ A ntá ntáche sín tí ch'ın t'ętoan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sín Dios la ko tsitekakonhya sín tí nkehe t'ętoan tí ley.

¹⁴ Na ntá tjınkaon ch'ın Pablo chrónixja, ntá ch'ın Galión ntáche ch'án tí sín judío kixin:

—Tí chaxın ijnko jię jié kjuasin tí ch'ın i ntá kjónté chrókuınħan tí nkehe ntáchrorá jahará judíora. ¹⁵ A ntá jehí tjanjonxinrá tí nkehe nixjará la ko ihnié chojni la ko tí ley tinkáchónkirá. Méxra jahóra chrókuınchekitęxinrá tíha kixin janhan tjınkakonhya ts'óna juez sıntakitęaxian kuente tí nkehe a —íchro ch'án.

¹⁶ Ntá k'ųetoan ch'án kixin sátsjixin sín ntiha. ¹⁷ Ntá tí sín griego la kóninkaon sín la itsé sín tí ch'ın Sóstenes tí ch'ın t'ętoan kuente tí nınko judío, la ntahó kjuatexın sín ch'án. Jehe ch'ın Galión a la mé kjónté k'uíkón ch'án la ántęsén ch'án.

Ch'ın Pablo xıkjan ch'án chjasin Antioquia ntá sákjuí ch'án nıxin viaje

¹⁸ A ntá ch'ın Pablo kuítęe ch'án chjasin Corinto itsjé yaon ntá nixjeħe ch'án tí sín kichó ni ntiha ntá k'uíxenhen ch'án ntabárcę sákjuí ch'án nó estado Siria a sákjuiko ch'án tjan Priscila la ko ch'ın Aquila. Ntá kjuíji sín chjasin Cenebra la ntá naħa k'uíxenhya ch'án ntabárcę inaá la ikjın ch'án mólóé kixin xıkaha kjuákęxin ch'án kixin kjuınchexiteyá ch'án tí nkehe chrónka ch'án.

¹⁹ Ntá tió kjuíji sín tí chjasin Éfeso ntá kuítęe ch'ın Pablo tí tjan Priscila a la ko tí ch'ın Aquila. Ntá sákjuí ch'án ijnko nınko la ikjó ch'án tí sín judío tsikójnkoťsé ntiha. ²⁰ Ntá jehe sín chrónða sín kixin chrókuitęe ch'án isé ntiha, kjánchó jehe ch'án la chroħya ch'án. ²¹ Ntá tuénxin nixjeħe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahę tí jahará tí naħa tjınkaon Dios —íchro ch'án.

Ntá kuítęe ch'án sín ntá k'uíxenhen ch'án ntabárcę sákjuixin ch'án chjasin Éfeso. ²² Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjeħe ch'án tí sín tinkáchónki İnchéni ntiha. Ntá tuénxin xıkjan ch'án chjasin Antioquia. ²³ Ntá kuítęe ch'án ntiha itsjé yaon ntá xıkji ch'án

inaá ntá xík'atsínka ch'án itsjé chjasin estado Galacia la ko estado Frigia la kjuínchechéhe ch'án kaín tí sín tinkáchónki Ìnchéni.

Ch'ín Apolos kjuako ch'án chjasin Éfeso

²⁴ Ntá tí yaon a mé ijnko ch'ín judío it'in Apolos ikui chjasin Éfeso mé tsíkixín ch'án chjasin Alejandria. Jehe ch'án mé ijnko nkexro antsí nohe chrónka kixin chóxin ch'án xroon itén Dios. ²⁵ Jehe ch'án ó xrakohe ch'án ntje Ìnchéni ntá imá tóxrjínhin ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. ²⁶ A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sín ch'án la kjuakohe sín ch'án tí nkehe naḡa noehya ch'án kuènte ntje Dios. ²⁷ Ntá tjinkaon ch'ín Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjin sín ijnko xroon chr'énhen sín tí sín tinkáchónki Ìnchéni tjejó ntiha kixin jína tsjanjon sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohe ch'án tí sín tsíkinkítsa Dios tsíkitekaon sín ch'án. ²⁸ Ntá kjuakoexín ch'án kaín chojni kixin ntoáhya ch'e tí sín judío, la xitjahya tsontácho sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'ín Pablo chjasin Éfeso

¹ Ntá naḡa itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jnḡ la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios. ² Ntá kjuanchankíhi ch'án sín kixin:

—¿A k'uayéhérá Nchaḡuen Dios tió kuinkachónkirá Ìnchéni? —ichro ch'án.

Ntá kjuátehe sín kixin:

—Náhi, kíenhyani á tjen Nchaḡuen Dios —ichro sín.

³ Ntá kjuanchankí ch'ín Pablo kixin:

—¿Nkexro kjuachaxién kuíkítará? —ichro ch'án.

Ntá kjuátehe sín kixin:

—Éxi kjuako ch'ín Juan kuíkiteni —ichro sín.

⁴ Ntá ntácho ch'ín Pablo kixin:

—Ch'ín Juan mé kuíkite ch'án chojni kixin chrókjan sín chrókuinkáchónki sín Dios la ko kjuako ko'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xíkaha ntá kuíkite sín kjuachaxién ihnjé Ìnchéni Jesús. ⁶ A ntá ch'ín Pablo kjuák'etja itja ch'án chrítaón ikja sín ntá ikui Nchaḡuen Dios k'uáyéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'ín Pablo k'uékji ch'án nínko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuènte Dios. ⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'ín Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoexín ch'án kaín yaon. ¹⁰ Mé

xikaha kjuák'e ch'án kjuako ch'án iyó nánó, ntá kaín tí sín k'u'éjó ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsí má kjuakoxin kjuaxroan jíé kixin tí nixja ch'ín Pablo. ¹² Ntá itsjé chojni kjuikao sín pañitogé sín la ko iké sín kuákóxin ch'ín Pablo ntá sákjuiko sín kjuínchekakóxin sín tí sín níhi ntá kuítóhe sín jína la ko kjaxin nchakuen tí jínahya k'uaxrxjén tí jehe sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjínkaon sín tí kjuachaxién ihnié Jesús. La ntá ntáche sín tí nchakuen tí jínahya kixin:

—Kjuachaxién ihnié tí Jesús tjako tí ch'ín Pablo t'etqanxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'ín judío it'in Esceva mé ijnko nchat'a t'etqan. ¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátgehe ntáchro kixin:

—Chóxinni nkexro ch'ín Jesús la ko ó noheni nkexro ch'ín Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'ín chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuínchenli ch'án kaín sín la imá kjoté sín. Ntá k'uaxrxjén sín ntogé sín tjóchin sín la ko síchrít'o cuérpogé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsikónhen la imá chrakon sín. Imá jíé tí kjuachaxin ihnié Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exin sín xra ntá kjuaka sín tí libro a la k'uikon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Ìnchéni sítinkák'ánki la tjakoxin kixin chaxín chóna kjuachaxin.

²¹ Ntá kjuixin tíha ntá ch'ín Pablo mé kjuenkayáxin ch'án chrókjuitsjehe ch'án tí sín nó Macedonia la ko Acaya ntá ntaha sáchrókjuixin ch'án chjasin Jerusalén. Ntá kjaxin ntáchro ch'án kixin tsjixin sátsji ch'án chjasin Jerusalén ntá kjaxin t'ichjánxin sátsji ch'án chjasin Roma. ²² Ntá ichr'án ch'án iyó tí sín tjinkitsa ch'án sátsji sín estado Macedonia, mé ch'ín Timoteo la ko ch'ín Erasto, ntá nachrohe jehe ch'án naxa kuítóhe ch'án estado Asia iso yaon.

Kónínkaon k'uixité chojni chjasin Éfeso

²³ Ntá itsjé chojni chjasin Éfeso kónínkaon sín la k'uixité sín kixin kórxjénhya sín tí itén Ìnchéni. ²⁴ Kixin ntiha mé itjen ijnko ch'ín it'in ch'án Demetrio. Kjuich'éna ch'án nkehe chica plata tsehe éxi njnko kuénte tí dios Diana la nchónhya chichaon kjuacha ch'án la ko tí sín kjuich'eko ch'án xra. ²⁵ Ntá kójkotséko sín í so sín jnkokón tí xra ch'e sín. Ntá ntáchro ch'án kixin:

—Jahará nohará kixin tí xra ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhínrá tí nkehe xritjako ch'ín Pablo. Tjako ch'án kixin tí nkehe tsikjanogya mé jehya Dios. Kjánchó jehya chjasin Éfeso ó. Náhi, nkuixín estado Asia kuitekaon chojni. ²⁷ Imá tóxakonhenni kixin tí xra ch'eni ts'itjayan la kjaxin tóxakonhenni tsontáchro sín kixin chónkó tí njnkoje tí dios Diana imá jíé la ko ts'itjayan tí kjuachaxin kuénte tjan. Ntá í

tsitekakonhya sín tí kjuachaxin kuènte tjan nkuíxín estado Asia la ko kuènté chjasintajni —ichro ch'ín Demetrio.

²⁸ Ntá tí kuínhin sín xíkaha la imá kónínkaon sín ntá k'uèya sín ntáchro sín kixin:

—Ts'itjáyanyha tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkakohen sín tí ch'ín Gayo la ko tí ch'ín Aristarco mé iyó sín tsíkjixín sín Macedonia. Ntá kuinkánkákjen sín kuikao sín tí nchia jié tójkotséxin sín xráxín. ³⁰ Ntá ch'ín Pablo tjinkaon ch'án chrók'uixenhen ch'án tí nchia kixin tsonixjehe ch'án sín, a ntá tí sín tinkáchónki Ìnchéni mé chrohya sín kixin ts'ixenhen ch'án tí nchia a. ³¹ Kjaxin iso tí síxreé kuènte tí estado Asia mé chóxin sín ch'ín Pablo, ntá k'uetoan sín kixin tsochénta chojni tí ch'ín Pablo kixin chrókjuiatéha ch'án tí sín sín ntiha. ³² A ntá iso tí sín tsikójkotsé ntáchro sín ijnko nkehe, la í so sín ntáchro sín ókjé nkehe kixin nínkaon sín. La itsjé sín la í noehya sín nkehe xra tsikójkotséxin sín kixin nínkaon sín. ³³ La iso sín judío chénka sín ijnko ch'ín it'in Alejandro nkeri xra kjuixín sín kixin tsonixja ch'án. Ntá kjuák'e ch'án jnkosiné ntá kjuakoxín ch'án itja ch'án kixin tsotáni sín ntá tsonixjaxín ch'án tí sín judío tsinhin kaín chojni. ³⁴ Ntá tió kjuátsoan tí sín tsikójkotsé kixin kjaxin tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanyha tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uetoan ch'án tsotáni sín. Ntá ntáchro ch'án kixin:

—Chojni chjasén Éfeso tinhínra. Kuènté chjasintajni nohe sín kixin tí sín chjasin ntihi mé t'ayakonhen sín tí njnko kuènte tí dios Diana. Tí retrato kuènte tjan mé tsikixín nkaya nkajni. ³⁶ Kohya nkexro tsontáchro kixin chaxínha tíha. Méxra táníra. Tjenkayáxinra jína nkehe chrókjuich'erá. ³⁷ Jahará kjuíkoará tí sín a ntihi la kjánchó k'uántaxíenhya sín tí njnqoeni la ko k'uántaxíenhya sín tí tjan santo kuènténi. ³⁸ Méxra ch'ín Demetrio la ko tí sín ch'eko ch'án xra la tí tjanchia sín jié jnkojín nkexro la sín juez sinchekitoexín. Méxra tsochrónka sín tí tjan juez kixin jnkojnko sín la chrókuitoexín tí jié chóna sín. ³⁹ Ntá tí sín ijnko nkehe tsjanchiará ntá t'ichjánxin tsojnkotsérá la ntoá chrókuitoexín. ⁴⁰ Tóxakonhenni kixin kjá tí sín t'etoan ts'ekani sín jié kixin jehya jína k'uixiténi kónínkaonni. Noehyani nkehe tsjateheni kixin tí tsjanhanki sín nkekuènte k'uixiténi, tsixro sín.

⁴¹ La ntá k'uetoan ch'án kixin sátsji sín kixin ó kjuixín tí kójkotsé sín.

20

Sátsji ch'ín Pablo estado Macedonia la ko estado Grecia

¹ Ntá tí kjuixín k'uixité sín, a ntá ch'ín Pablo k'uixéhe kaín tí sín tinkáchónki Ìnchéni ntiha ntá kjuako ch'án iso kjuaxrexínkaon jína, ntá nixjehe kichó sín ntá sáxíkji ch'án nó estado Macedonia. ² Ntá nkuíxín k'uatsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia. ³ Ntiha kuitohe ch'án iní ntió ntá chrók'uixenhen ch'án ijnko ntabarco ntá sáchrókjui ch'án estado Siria. Ntá kónohe ch'án kixin iso sín judío nínkakohen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuiko ch'ín Pablo mé tí ch'ín Sópater mé jehe ch'án tsíkjixín ch'án chjasin

Berea, la ko kjaxin ch'in Aristarco, la ko ch'in Segundo. Jehe sín mé tsíkjiixin sín chjasin Tesalónica, la ko ch'in Gayo tsíkjiixin ch'an chjasin Derbe, la ko kjaxin sákjuiko ch'an ch'in Timoteo, la ko ch'in Tiqico, la ko ch'in Trófimo, mé tsíkjiixin sín estado Asia. ⁵ Ntá tí sín kichó ni a mé kuitónxin sín ntja ntá tjejóhónhen sín tí jeheni chjasin Troas. ⁶ Kjuixin k'uátsínka tí kia tió kjóne sín niotja chónthaya tí xroan t'ánkixin niotja, ntá k'uixenhenni ijnko ntabárcø k'uaxrjexínni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuitónxin sín ntja. A ntá ntiha kuitóheni yato yaon.

Ch'in Pablo sákjuí chjasin Troas

⁷ Ntá tí yaon xrankíxixin semana ntá kójnkotséni kixin tsochrít'o niotja tsoxraxinkakonxínni Ìnchéni. Ntá ch'in Pablo nixjehe ch'an kaín tí sín tinkáchónki Ìnchéni la tjinkaon ch'an sátsjixin ch'an ntiha tí yaon chr'éxin, ntá antsí má sé tí nkehe chrónka ch'an la naxa tjenixja ch'an k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'in ntasoá it'in ch'an Eutico mé tjetjaxin ch'an chrítaón ventana. Ntá tí ch'in Pablo imá sé nixja ch'an ntá tí ch'in ntasoá mé tsíkíhi ch'an kotáchrin. A ntá xringhya tsík'ajua ch'an ntá tsík'anótjexin ch'an tí ventana tí níxin piso ntiha ntá sákjuíkjatsen sín ch'an la ó tsíkjiixin tsík'en ch'an. ¹⁰ Ntá ch'in Pablo k'uínkajin ch'an ntá kjuítsínkaták'a ch'an chrítaón tí ch'in tsík'anótjen a la kjóa ch'an. Ntá ntáche ch'an tí sín kichó ni kixin:

—Chrakonhyará tsík'enhya ch'an, tjechón ch'an —ichro ch'an.

¹¹ Ntá ch'in Pablo k'ujit'ótjen ch'an inaá tí k'uínkajinxin ch'an kixin ntiha ts'ókikayehé ch'an niotja sine sín tsoxraxinkakonxín sín Ìnchéni. Ntá naxa tjenixja ch'an hasta k'uínkaséyan a ntá sákjuí ch'an. ¹² Ntá tí ch'in ntasoá tsík'anótjen sákjuiko sín la tjechón ch'an kohya nkehe xéhe ch'an ntá kaín sín imá kóchéhe sín.

Sákjuixin ch'in Pablo chjasin Troas kjuíji ch'an chjasin Mileto

¹³ Jeheni mé kuitónxinni ntja saoxín la k'uixenhenni ijnko ntabárcø sákjuíni nó chjasin Asón kixin ntiha tsoxetani ch'in Pablo éxi tsintáchro ch'an kixin tjinkaon ch'an sátsjixin ch'an toté ch'an ntiha. ¹⁴ Ntá ó xetani tí jehe ch'an chjasin Asón ntá k'uixenhenni ch'an tí ntabárcø kjaxin ch'an ntá sákjuíkoni ch'an nó chjasin Mitlene. ¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uixenhenni tí ntabárcø ntá sákjuíni chjasin Trogilio ntá ntiha k'ók'eheni. Ntá xík'ixenhenni ntabárcø inaá ntá tí yaon chr'éxin kjuíjini chjasin Mileto. ¹⁶ Mé xíkaha kjuich'eni kixin ch'in Pablo í tjinkakonhya ch'an chrókjuak'e ch'an isé estado Asia la í tjinkakonhya ch'an chrókjan chjasin Éfeso kixin tjinkaon ch'an tjoka chrókjuíji ch'an chjasin Jerusalén kixin ntiha chrókjuak'e ch'an tí yaon Pentecostés, ichro ch'an.

Nixjehe ch'in Pablo tí sín t'etujenhen nijnko chjasin Éfeso

¹⁷ Tí itjen ch'in Pablo tí chjasin Mileto k'uiyehé ch'an tí sín t'etujenhen tí nijnko chjasin Éfeso. ¹⁸ Ntá tió kui sín ntá ntáchro ch'an kixin:

—Tí jahará la ó nohará nkexrí kjuak'é la ko kjuákua desde tí yaon xrankíxixin k'uinka estado Asia. ¹⁹ Ó nohará kixin kaín tí yaon k'uejóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasótena kixin tjinkaon tí sín judío chrók'óyánna sín. ²⁰ Janhan la

kuiṭoḡhya kjuàkua kaín tí nkehe jína t'ichjánxin tsoṇohará. Mé xíkaha kjuàkua tió kójnkotsérá la ko xíkaha kjuíkjàkuaxian jnkojnko ntoará. ²¹ Kjuákoḡa kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. ²² Ntá ijie sátsjiyá chjasin Jerusalén kixin Nchakuen Dios k'uētuanna la í nonahya nkehe tsoṇna ntiha. ²³ Ntá jehó ñona kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. ²⁴ Kaín tíha la tóxakonahya. Kjonté chrókjuasótexián la ninkehó sínkíhyana la janhan la chàṇa kixin tí xṛa chonta la chrókjuintaxín la chrókjuintaxiteyá tí xṛa chjina Ìnchéni Jesús kixin tsjakua tí tan jína nkexrí tjuèhe Dios chojni.

²⁵ Ntá jie ó ñona kixin tí jahará kjuákoḡhára kjuachaxin kuènte Dios la nijnkorá ts'ikonyhará tí janhan inaá. ²⁶ Méxṛa tinhínra ijie kixin í jehya jiena kixin jnkojínra chrók'uitjayanra. ²⁷ Kixin ó kjuàkua kaín tí nkehe tjinkaon Dios kixin tsoṇohará la í t'itjayanhya ninkehó. ²⁸ Méxṛa xráxinkáonra ts'ejorá jnkojína la ts'ayakonhénra kaín tí sín tinkáchónki Ìnchéni kixin Nchakuen Dios mé tjáhará tí xṛa pastor kixin ts'ayakonhénra tí sín kuènte tí ñinkoe ch'án k'uēnaxín ch'án tí ijñé ch'án. ²⁹ Ó ñona tió sátsjia ntá itsji í so chojni éxí kolóbo jiehe tsojtjinkaon sinchek'itjayan tí sín tinkáchónki Ìnchéni. ³⁰ La ntá kjonté jahará la isorá tjejorá ntihi tsjankixínra tsjàkorá kjuach'ia chrínki chrókjuákoḡhára kíchuará tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxṛa chrórxáxinkáonra kixin chjina iní nánó kjuak'é kjuákoḡhára nchakotjin la ko tie la kuiṭoḡhya kjuintaxraxinkávan hasta kjuíncheníhi asenná nixjahará jnkojnko tí jahará.

³² A ntá jie la jahará kíchó ní tjetjáncháḡa Dios kixin t'ayakuanxínra ch'án tí itén ch'án kixin tjuaḡhára ch'án. Jehé ch'án imá chónka kjuachaxin tsjinkjtsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsikótjóá. ³³ Janhan mé kjuakéhya asenná chjchakoen chojni o iké jnkojín chojni. ³⁴ Náhí. Jahará ó nohará jína kixin janhan na mé tjaná kjuj't'axián xṛa kjuácha k'uēnaxín tí nkehe t'ichjánxinna la ko kjaxín tí nkehe t'ichjánxinhin tí chojni k'uejókian. ³⁵ Méxṛa kjuàkuaxínra xíkaha s'ich'erá xṛa kixin jína tsjinkjtsará tí chojni chónthaha. Xráxinkáonra kixin tsintáchro Ìnchéni Jesús kixin: "Antsí tsochéheni kixin tí nkehe chrókjuanjoni, a ntá kánhyó tsochéheni kixin tí nkehe chrók'uáyéheni."

³⁶ Ntá kjuixin ntáchro ch'in Pablo xíkaha ntá jehé ch'an la ko kaín sín k'uejóxin toch'in sín ntá nixjeḡhe sín Dios. ³⁷ Ntá kaín sín tsjánka sín la ko kjóá sín ch'án la ko tséhe sín tja ch'an. ³⁸ Imá k'uává sín kixin chrónka ch'án kixin í ts'ikonyha sín ch'án inaá. Ntá sákjuikotoxin sín ch'án nó tí tjen tí ntabárcó sátsjiko ch'án.

21

Sákjuí tí ch'in Pablo nó chjasin Jerusalén

¹ A ntá tió kuiṭoḡheni tí sín kíchó ní ntá k'uúixenhenni ntabárcó la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabárcó sátsji nó estado Fenicia. Ntá k'uúixenhenni tí ntabárcó a ntá sákjuíni. ³ Ntá tió k'uátsínkani la k'uúikonni tí nonte Chipre itjani ikjon kuiṭoḡhe ntá k'uatsínkani estado Siria. Ntá tí ntabárcó la ts'atsínka tsítóhe tí nkehe tjínká tí puerto

chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kúitohékoni sín yato yaon. ⁴ Ntá jehe sín mé kjuínchenohe sín Nchakuen Dios chénka sín tí ch'ín Pablo kíxin sáchrókjuíhya ch'án chjasin Jerusalén. ⁵ Ntá kjuixin k'uátsínka tí yato yaon a ntá sákjuíxinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuíkotoxínni tí k'uaxrjentani ikon chjasin ntá sákjuíni chrínta ntayaon. K'uéjóxinni toch'inni nixjeheni Dios ⁶ ntá tuénxín nixjeheni sín jnkójina ntá tséhe tja kíchó ni. Ntá k'uíxenhenni tí ntabárcø, a ntá jehe sín ikjan sín ntøe sín.

⁷ Ntahó chjasin Tiro kjuixixín tí k'uíxenhenni tí ntabárcø ntá kjuíjini chjasin Tolemaida. Ntiha kjuínixjeheni tí sín kíchó ni tinkáchónki Ìnchéni. Ntá ntiha k'uéjókoni sín ijnko yaon. ⁸ Ntá tí yaon chr'éxín sákjuíxinni ntiha ntá kjuíjini chjasin Cesarea. Ntá ntiha sákjuíni ntøe ch'ín Felipe, ijnko ch'ín kjaxin tjako itén Ìnchéni. Jehe ch'án mé ijnko tí sín yatøxín tjinkítsa tí sín kjueyá Ìnchéni. ⁹ Ntá jeheni mé kúitoheni ntiha. ⁹ Tí ch'ín Felipe a mé chónka ch'án noó xjeen ch'án chjin náxa tótøehya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uéjókoni sín itsjé yaon ntá ikjui ijnko ch'ín nixja itén Dios it'in Agabo, tsíkjixín ch'án estado Judea. ¹¹ Ikjui ch'án kjuínixjehø ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchentetoxín tötøe ch'án la ko itja ch'án ntá ntáchro ch'án kíxin:

—Tí Nchakuen Dios mé ntáchro kíxin mé xíkaha chjasin Jerusalén tí sín judío sinchenteto sín ìché tí tjoa sinchek'áyèhø sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónøeheni tí ch'ín Pablo kíxin sáchrókjuíhya ch'án tí chjasin Jerusalén. ¹³ Ntá kjuátøhe ch'ín Pablo kíxin:

—¿Nkekuénté tsjankará la ko nkekuénté nchek'áváráni? Janhan na chrakonhya kjónté jehya tí sinchentetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kúitoheni ch'án. Ntáchroni kíxin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén. ¹⁶ Ntá sákjuíkoni iso tí sín tinkáchónki Ìnchéni tsíkjixín chjasin Cesarea. Sákjuíkoni sín ntøe ijnko ch'ín tsíkjixín Chipre it'in ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kúitoheni.

Ch'ín Pablo sákjuítsjehe tí ch'ín Jacobo

¹⁷ Tió kjuíjini chjasin Jerusalén ntá tí sín kíchó ni tinkáchónki Ìnchéni mé kjuanjon sín kjuachaxín k'uéjóni la chéhø sín. ¹⁸ Ntá tí yaon chr'éxín ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etøan kuénté nínko. ¹⁹ Ntá ch'ín Pablo kjuixin nixjehø ch'án sín ntá tuénxín chrónka ch'án kaín tí xrá kjuích'e Dios tió kjuakohe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kíxin:

—Kíchóni, jaha k'uíkuan kíxin síin itsjé mil sín judío ó kuinkáchónki sín Jesús kjánchó kaín sín ntáchro sín kíxin t'ichjánxín tsítøehyani tí ley. ²¹ Ntá tsíkinhin sín kíxin jaha mé tsíkjakohé tí sín judío tjejó chjasin ókjé kíxin t'ichjánxienhya sinchexitéyèhø sín tí nkehe k'uetøan ch'ín Moisés. La kjaxin kuínhin sín

kíxin jaha tsíkjákohe sín kíxin tí xjeen sín t'ichjánxjenhya itsa sín tí xroye la ko t'ichjánxjenhya tinkáchónki sín éxí k'uékinkáchónkini ósé. ²² ¿Ntá nkehe chrókjuich'eni? Kíxin tió tsinhin sín kíxin kjuihá la tsojnkotsé nchónhya sín. ²³ Méxra íchá jína jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios. ²⁴ Jaha sáchrókjuíkoa sín la chrókótjóa jaha la ko jehe sín. La ko kjaxin chrókjuénka tsokjín sín ntá tsonoxín tí sín judío kíxin chaxínhya tí nkehe tsikinhin sín la ko tsonoxín sín kíxin kjaxian jaha nchexiteyéhé tí ley. ²⁵ A ntá tí sín jehya judío tsíkitekaoon Ìnchéni la ikjinni ijnko xroon ó chr'énhenni sín. K'uetuénhenni sín kíxin sinehya sín tí nto tsíkjokehe chojni tí nkehe tsíkjanoya, la ko kjaxin sinehya sín jni, la ko sinehya sín tí nto tsíchrínjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí nínko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóa asén sín. Ntá kjuixin ntá k'uixenhen ch'án tí nínko kíxin tsochrónka ch'án kíxin ó kjuixin kjuínchexiteyá ch'án tí nkehe k'uítuénhen ch'án. Tíhi mé t'axrxén kíxin jnkojnko sín tsíkjaó sín nkehe tsjanjon sín.

²⁷ Ó chjina chróxétja tí yato yaon ntá iso tí sín judío tsíkjixín estado Asia mé tsík'ikon sín ch'ín Pablo nkaxenhen tí nínko. Ntá kjuínchekónínkaon sín kaín chojni chjasin ntiha ntá itsé sín tí ch'ín Pablo. ²⁸ Ntá k'uèya sín ntáchro sín kíxin:

—Kaínra chojni chjasin Israel tsjínkítsaráni kíxin tsotséni tí ch'ín i. Jehe ch'án mé ixri nkuíxin xritjakohe ch'án chojni nkehe jehya jína kuènte chjaséni, la ko titekakonhya ch'án tí ley kuènte Moisés, la ko titekakonhya ch'án nínkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí nínko tjóa —ichro sín.

²⁹ Mé xíkaha ichro sín kíxin tsík'ikon sín senó kíxin chjasén sín mé xriko ch'ín Pablo tí ch'ín Trófimo tsíkjixín chjasín Éfeso. Kjuénkayáxin sín kíxin ch'ín Pablo la kjá tsíkjiko ch'án tí ch'ín a nkaxenhen nínko.

³⁰ Ntá kuénté tí chjasin a kónínkaon sín la ntá kaín tí chojni kuínká sín ikui sín ntá itsé sín tí ch'ín Pablo. Ntá kuínkánákjénxín sín ch'án nkaxenhen nínko la kuakitsje sín ch'án ntója ntá tuénxín k'uíkjehe sín tí puerta nínko. ³¹ Ntá tjínkaon sín chrók'óyán sín ch'án ntá ijnko ch'ín comandante k'uetuénhen itsjé tí sín soldado romano kuínhin ch'án kíxin kuénté tí chjasin Jerusalén k'uixité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'uetuénhen tí soldado a la kuínká sín sákjuí sín tí síin tí chojni. Ntá tió k'uíkon tí sín a kíxin ó kjuíji tí ch'ín comandante la ko tí sín soldado a ntá kuitóhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetqan ch'án kíxin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kíxin nkexro tí jehe ch'ín Pablo la ko nkehe tí kjuíche ch'án. ³⁴ A ntá tí chojni tsíkójkotsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xíkaha kjuíche sín kíxin k'uixité sín. Ntá k'uetqan ch'án kíxin tí sín soldado sátsjiko sín tí ch'ín Pablo tí cuartel síin tí sín soldado. ³⁵ La ntá tió kjuíjiko sín ch'án tí t'it'ótjénxín sín tí nchia a ntá t'ichjánxin kuámá sín tí ch'ín Pablo kíxin tí chojni tjínkaon sín chrókjuate sín ch'án kíxin nínkaon sín. ³⁶ Kaín tí chojni chréhe nóton t'éya sín ntáchro sín kíxin:

—Chrók'uen ch'án —ichro sín.

Ch'in Pablo chrónka nkayakon chojni kixin chóntahya ch'án jie

³⁷ Ntá tió sáchrókjuíko sín ch'in Pablo tí nkaxenhen tí cuartel kuènte tí sín soldado a ntá kjuanchankíhi ch'in Pablo tí ch'in comandante ntáchro ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'in comandante ntáchro ch'án kixin:

—¿Jaha la á noha nixja griego? ³⁸ Méxra ¿á jehya jaha tí chojni tsíkjin Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátehe ch'in Pablo ntáchro ch'án kixin:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan me ijnko chojni tsíkjin ijnko chjasin imá tjetooan. A ntá ijie xrjannóaha kixin tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'in comandante kjuanjon kjuachaxin ntá ch'in Pablo kjuák'exin toté ch'án tí tjen escalera ntá tja ch'án ó kjuakoxin ch'án kixin tsotání sín. Ntá tání sín ntá kjuankixin nixjxin ch'án nkíva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhínra nkehe tí tsóxrjanka kixin chontahya jie —ichro ch'án.

² Ntá kuínhin sín kixin nixjxin ch'án nkíva hebreo ntá antsí má tání sín. Ntá ntáchro ch'in Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntihi chjasin Jerusalén la kjuintakuáxian tí nkehe kjuako tí ch'in Gamaliel la titekavan tí ley tsíkokjínaxián tí sín tsík'axrjenixinni ósé. Tjínkavan chrókjuít'ahá Dios xra kaín asenná éxi tjínkoonrá jahará ch'erá tí yaon ijie.

⁴ Ti senó k'uéninkakonhan chrók'oyán tí sín tinkáchónki Ìnchéni kjuintanteto chojni ntoa la ko chojni chjin kixin chrók'uejóhijina sín. ⁵ A ntá tí sín nchat'á t'etqan la ko kaín tí sín tada t'ayakonhen njnko la mé nohe sín kaín tíha kixin jehe sín mé kjuanjon sín xroon ts'áyehé tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótsé sín ntá chrókjuíkian sín ntihi Jerusalén chroklusóte sín.

Ch'in Pablo chrónka nkexrí kjuankixin tinkáchónki ch'án Ìnchéni (Hch. 9.1—9; 26.12—18)

⁶ A ntá tió kjuasán chjina chjasin Damasco chjina chonkixin ntá xrinahya k'uinkáséyan jnkontatjén tí tjén ijnko xrohi imá t'inkaséyan kuixin nkajni.

⁷ Ntá kjuachr'ítsinka nonte ntá tuénxín kuínhan itén ijnko nkexro nixjana ntáchro kixin: “Saulo, Saulo, ¿nkekuénté ninkákonna xritjéyá tí janhan?” ⁸ Ntá kjuánchánkiá kixin: “¿Xá nkexro jaha?” Ntá kjuátehe ch'án ntáchro ch'án kixin: “Janhan mé tí nkexro Jesús tsíkjin chjasin Nazaret, mé tí nkexro xritjéyá.” ⁹ La ntá tí sín k'uájikian mé k'uíkon sín tí xrohi la chrakon sín kjánchó kuíenhya sín itén tí nkexro nixjana. ¹⁰ Ntá kjuánchánkiá kixin: “¿Xá nkehe tsonhen tjínkáván sít'aha jaha?” Ntá kjuátehe ch'án ntáchro kixin: “T'aya sátjia t'ixénhén chjasin Damasco ntá ntiha tsochrónka sín kaín nkehe s'ich'e.” ¹¹ Ntá tí xrohi a mé k'uixenka ikuān ntá í xitjahya t'íkuān. Ntá tí sín chríkian mé kuinkátséna sín sákjuíkian sín chjasin Damasco.

12 Ntá ntaha kjuák'e ijnko ch'in it'in Ananías ijnko chojni jína kjuínchexiteyéhe ch'án tí ley kuènte ch'in Moisés. Kaín tí sín judío siín chjasin Damasco tjikosáyehe sín tí jehe ch'án. 13 Ntá ch'in Ananías mé kuitsjehe ch'án tí janhan ntá tió kui ch'án ntáchro ch'án kixin: “Kíchóni Saulo, ijie la ts'ayéhé kjuachaxin ts'ikuan inaá.” Ntá ó jína t'ikuan. 14 Ntá tuénxín ntáchro ch'án inaá kixin: “Tí Dios kuinkáchónki tí sín tsík'axrjeníxinni la ó tsík'eyá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jína la ko tsinhín tan k'uaxrjexín ir'va ch'án. 15 Jaha mé tsochronka tí nkehe k'uíkuan la ko tí nkehe kuínhín tsinhín kaín tí chojni chjasintajni. 16 A ntá jie la í choénhya má. T'áya la tsikítixián ihnjé Ìnchéni kixin mé ts'ímáxin ijíá,” ichro ch'in Ananías.

Pablo chrónka kixin Dios ichr'án ch'án tsjákohe tí sín jehya sín judío

17 Na ntá tió xíkjan chjasin Jerusalén ntá sákjuia núnko tsonixjáha Dios ntá titáya k'uíkuèn 18 Ìnchéni ntáchro ch'án kixin: “Tjoka ts'axrjéxian chjasin Jerusalén kixin tsitekakuenhya sín tí nkehe tjákua mé tí tan kuéntana.” 19 Ntá janhan ntátjan ch'án kixin: “Ìnchéni, jehe sín ó nohe sín kixin senó k'uék'atsínka kaín tí núnko la k'uétse tí sín tinkáchónki tí jaha la sákjuíkjan sín ntóechiso k'uékon sín. 20 Tió k'óyán sín tí ch'in Esteban tí nkexro k'uék'jit'aha xra, k'uénixja tí tan kuénta ntá janhan kjaxín tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.” 21 Ntá Ìnchéni xínixja inaá, ntáchro ch'án kixin: “Tétuanhan jaha kixin sátsjia chjasin kjín kixin tsjákohé tí chojni jehya judío.”

Ntá tí ch'in comandante k'uáyéhe tí ch'in Pablo kixin tsjasóte ch'án

22 Ntá tí sín tsíkójnkotsé mé kuínhin sín kaín tíha ntá kjuankíxin k'uèya sín ntáchro sín kixin:

—Its'en ch'án, í tsjak'echónhya ch'án —ichro sín.

23 Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín. 24 Ntá tí ch'in comandante mé k'uétuenhen ch'án tí sín soldado a kixin sátsjiko sín ch'in Pablo nkaxenhen tí cuartel kuènte sín. Ntá ntiha k'uétjan ch'án kixin tsjatéxín sín ch'án chikoté ntá tsonoxín tí ch'in comandante nkekuènte imá t'óyako sín núnkakonhen sín tí jehe ch'án. 25 Ntá kjuixín kjuínchenteto sín ch'án kixin tsjate sín ch'án ntá nixjéhe ch'in Pablo ijnko ch'in capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxa kjuéyáhyará nkeri jje chonta? —ichro ch'án.

26 Tió kjuixín kuínhin tí ch'in capitán ntá sákjuíchénka ch'án tí ch'in comandante ntáchro ch'án kixin:

—¿Nkehe sích'e jaha kixin tí nkexro i mé ijnko chojni romano?

27 Ntá tí ch'in comandante mé kóchjinehe ch'án tí ch'in Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátéhe ch'in Pablo kixin chaxín jehe ch'án.

28 Ntá ntáchro tí ch'in comandante kixin:

—¿Á ntá nkexrí kixin janhan nchónhya chichaon kjuènká kixin ts'ónana chojni romano?

A ntá ntáchro ch'in Pablo kixin:

—Janhan na chojni ntiha tsíkókjínaxián.

²⁹ Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítóhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsikjinchenteto ch'án.

Ch'ín Pablo nixjehe ch'án tí sín t'etoan kuènte tí sín judío

³⁰ A ntá tí kóyaon ntá tí ch'ín comandante a mé tjinkaon ch'án tsonohe ch'án nkehe tí jie chrók'ueka tí sín judío tí ch'ín Pablo. Ntá kjuasintanka ch'án chica cadena tsíchróntetoxín tja tí ch'ín Pablo ntá k'uetjoan ch'án kixin tsojnkotsé kaín tí nchat'á t'etoan la ko tí sín t'etoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siín tí jehe sín.

23

¹ Ntá ch'ín Pablo komá tí sín t'etoan kuènte sín judío ntá ntáchro ch'án kixin: —Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jína chonta —ichro ch'án.

² Ntá tí ch'ín Ananías tí ch'ín nchat'á t'etoan mé k'uetuenhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátehe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. A ntá ¿nkekuènte kuítekákonhya tí ley, la kuétoan kixin ts'ékonna? —ichro ch'án.

⁴ A ntá tí sín siín ntiha ntáchro sín kixin:

—¿Á xikaha ts'antaxínhín tí nchat'á t'etoan kuènte Dios?

⁵ Ntá kjuátehe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchat'á t'etoan. Ntáchro tí xroon itén Dios kixin: “Chrók'uantaxíenhya tí chojni t'etuenhen chjasán”* —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha. ⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sitjité sín nínkaon sín. Ntá tí ch'ín comandante a mé tóxakonhen ch'án kixin chrókjuinckekuen sín tí ch'ín Pablo ntá k'uetuenhen ch'án tí sín soldado a kixin sátsjikakjín sín ch'án la tsíkao sín ch'án inaá tí cuartel kuènte tí sín soldado.

¹¹ A ntá tí tie a na ntá xrínahya titàya k'uúkuèn ch'ín Pablo Ìnchéni nixja ch'án, ntáchro kixin:

* 23:5 Éxodo 22.28

—Chrakonhya Pablo kixin éxí chronka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'in Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'in Pablo. Ntá k'uákjenxin sín ihnié Dios chaxín tsoxiteyá la sinehya sín la ko ts'ihya sín ninkehó tí naxa ts'óyánhya sín ch'án. ¹³ Chjina cuarenta sín kjuenkayáxin sín kixin xikaha sich'e sín. ¹⁴ Ntá sákjuichenka sín tí sín nchát'a t'etoan la ko tí sín t'etuénhen kuènte tí sín judío la ntáche sín kixin:

—K'uákjenxinni ihnié Dios kixin chaxín tsoxiteyá kixin í sinehyani ninkehó tí naxa ts'óyánhyani tí ch'in Pablo. ¹⁵ Méxra ntá jahará la ko í so tí sín t'etuénhen tí sín judío tsontácherá tí ch'in comandante a kixin tsjikao sín tí ch'in Pablo ntihi tí tjejorá ntóye nchítjen kixin antsí má tsjanhankíhírá ch'án nkehe siná á chaxín tí jje t'íká ch'án. A ntá jeheni senó ts'ejóchónhenni tí tsjixin ch'án ntá ts'óyánni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'in Pablo a mé ts'ínkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kixin tsochronka ch'án nkehe tí tjo sín kuínhin ch'án. ¹⁷ La ntá ch'in Pablo mé k'uíyehé ch'án ijnko tí sín capitán la ntáchro ch'án kixin:

—Sátsjikoa tí ch'in ntasoá tí tjen tí ch'in comandante kixin tjinkaon ch'án tsochronka ch'án nkehe —ichro ch'án.

¹⁸ Ntá tí ch'in capitán a mé sákjuíko ch'án ti tjen tí ch'in comandante ntá ntáchro tí ch'in capitán a kixin:

—A ntá tí ch'in Pablo tjechjina mé k'uíyeheni ch'án kixin tsjikao ni tí ch'in ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'in comandante a mé tséhe ch'án itja tí ch'in ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochronka? —ichro ch'án.

²⁰ Ntá ntáchro tí ch'in ntasoá a kixin:

—Iso tí sín judío mé kjuenkayáxin sín kixin tsjanhaha sín kixin ntóye nchítjen sátsjikoa ch'in Pablo tí tsojnkotsé tí sín judío t'etoan. Sit'ayaha sín tsontáchro sín kixin tjinkaon sín tsjanhankíhi sín ch'in Pablo tí nkehe antsí má xra. ²¹ A ntá jaha la chróútekekákonhya kixin chjina cuarenta chojni tjejóchónhen sín imó la k'uákjenxin sín ihnié Dios kixin sinehya sín la ko ts'ihya sín ninkehó tsjixinjian its'en ch'in Pablo. Ntá ijie tjejóchónhen sín tsonhe sín nkehe tsixrua jaha —ichro ch'án.

²² A ntá tí ch'in comandante a mé nixjehé ch'án tí tí ch'in ntasoá la k'uetóan ch'án kixin:

—Tsochenkahya ninkexró kixin xikaha kjuíchronka —ichro ch'án.

Ichr'án sín tí ch'in Pablo tí itjen tí ch'in gobernador Félix

²³ Ntá tí ch'in comandante a mé k'uíyehé ch'án yaá tí sín capitán a ntá k'uetóan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uituénhen sín sinchekamá sín kokate tsjiták'á ch'in Pablo la ts'ayakonhen sín ch'án jína kixin kohya nkehe tsonhen kixin tsjiji ch'án tí tjen ch'in Félix, tí ch'in gobernador. ²⁵ Ntá tí ch'in comandante ikjin ch'án ijnko xroon a, ntáchro kixin:

26 “Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jina, nixjaha. 27 Tí sín judío a mé itse sín tí ch'ín i kixin chrók'óyán sín ch'án. Ntá tió kónona kixin ijnko chojni romano tí jehe ch'án la ntá sákjuikian sín soldado kjuintakaá ch'án. 28 Tjínkavan tsonona nkekuente kixin nínkakonhen sín ch'án. Ntá sákjuikian ch'án tí tsikójnkotsé tí sín judío. 29 Ntá kónoxín kixin nínkakuenxín sín ch'án kixin tí ley kuente sín kjuínchexiteyáha ch'án, ichro sín. Jehya jie jie tsíkjasin ch'án kixin chrók'óyán sín ch'án o chrókjuak'echjina sín ch'án. 30 Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuiji sín tí tjen jaha chrókjuá sín kixin nkekuente nínkakonhen sín ch'án. Kjuasáyá. Ó tjen.”

31 Ntá tí sín soldado a mé kjuínchexiteyá sín éxi k'uituenhen sín a ntá sákjuiko sín tí ch'ín Pablo tí tie a chjasin Antípatris. 32 Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uéjókjen kokaṭe a mé naṣa sákjuiko sín tí ch'ín Pablo. 33 Ntá tió kjuji sín tí chjasin Cesarea ntá tí sín soldado a mé kjuanjón sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo. 34 Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjinín tí ch'ín a. 35 Ntá ntáchro ch'án kixin:

—Ntá tsínhan nkehe tsixro tí sín itsji ts'eka jie.

Ntá k'uētuenhen ch'án tí sín soldado a kixin ts'áyakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehe ch'án ch'ín Félix chrónka ch'án kixin kjuasinhya ch'án jie

1 Ntá k'uátsínka in'ó yaon, ntá ch'ín Ananíás, tí ncha't'á imá t'etoan, kjuji ch'án chjasin Cesarea. Kjaxin kuikao ch'án iso tí sín t'etoan kuente nínko a la ko ijnko ch'ín abogado it'in Tértulo. Tí ch'ín a mé tsonixjehe tí ch'ín gobernador kixin tsjanchia sín jie kuente ch'ín Pablo. 2 Ntá tió kuikao tí sín soldado tí ch'ín Pablo ntiha ntá tí ch'ín Tértulo kjuankixin ch'án nixjehe ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí nacióon kuenteni. 3 Kjuasáyá jaha Félix. Imá jina jaha kixin k'uáyéheni kaín tíha. 4 Tjínkakonhya sjintak'itjányanhan nchónhya tiempo la xrjanógha kixin chrókjuak'é chrókuinhín intsikoa tí nkehe tsoxrjanka. 5 A ntá ijie ó k'uitjani kixin tí ch'ín i mé éxi ijnko chin t'óxíka kuenté chjasintajni kixin ch'iyehé ch'án tí sín judío ntá xíka sín. Jehe ch'án mé t'etoan ch'án tí sín tinkáchónki tí ch'ín tsíkjinín chjasin Nazaret. 6 Jehe ch'án mé kjaxin chrókjuínchekjita ch'án tí nínko. A ntá itséni ch'án ntá chrókjuínchekitexínni tí ijie ch'án éxi t'etoan tí ley kuenteni. 7 A ntá tí ch'ín comandante Lisias kjuixrónkáxin ch'án kuikao ch'án nchónhya sín soldado la kuakitsje sín tí ch'ín Pablo. 8 Ntá k'uētoan ch'án kixin tí sín tjanchia jie chrókuitsjehe sín tí jaha kixin jaha chrókjuanchankíhí ch'án kixin chrókónoha jina nkexéhe tí jie chrókjuínchekjasótéxin sín ch'án —ichro tí ch'ín Tértulo.

9 Ntá ntáchro kaín tí sín judío sín ntiha kixin:

—Kaín tíha la chaxín —ichro sín.

10 Ntá tí ch'ín gobernador a mé kjuakoxin tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jje kjuasinni kixin ó noheni kixin jaha la juez kuènte tí naciòn ntihi la nchónhya nánó tétòan. ¹¹ Jaha la kjaxin ó chrókónoha kixin na ntá teyó yaon kjujini chjasin Jerusalén kixin ntaha tsoxráinkakónxinni Dios. ¹² Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró njnko la ko ní tí njnko ntási la ko ninketó chjasin. ¹³ Tí sín í la xitjahya tsontáchro sín kixin xikaha tí jje kjuasinni. ¹⁴ Janhan chaxin xrxjanka kixin t'ahá xra tí Dios k'uéinkáchónki tí sín tsik'axrjenixinni mé yóhe tí ntja nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsikjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios. ¹⁵ Kjaxin tinkáchónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jina la ko kaín chojni jínahya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jje la ko kjaxin chojni chrókjuanchahya jje.

¹⁷ Nta kjuixin k'uatsínka iso nánó ixrini ókjé ntá kjujini chjaséni kixin tsjanjonni chichaon la ko kjaxin tsochjéheni Dios nkehe. ¹⁸ Méxra mé xikaha tjenni nkaxenhen njnko nta iso sín judío tsikjixin estado Asia ó xetani ntiha. Ntá kjuínchetjóáni aséni la tsjéhya chojni k'uikon la kohya chojni kjuánjonkoni. ¹⁹ A ntá tí sín a mé t'ichjánxin chrókui sín ntihi kixin chrókjuanchia sín jje tí nínkakonna sín. ²⁰ A ntá tí náhi la tí sín tjejó ntihi chróchrónka sín kixin nkehe tí jje k'uitjaxin sín tió kjuak'eni tí tjejó tí sín t'etòan kuènte tí sín judío. ²¹ Kjá tí tsontáchro sín kixin náxrjónhya ijnko nkehe itsen k'uèya ntáxrjan kixin: “Ijje sinchekitoexinrá jjeña kixin sinchekjasótenará kixin janhan tinkáchónkia kixin tsoxechón chojni tsik'en” —ichro ch'án.

²² Ntá kjuixin kuínhin tí ch'ín Félix, la jehe ch'án jina kónohe ch'án kixin nkexrí tí ntja nixin. Ntá kjuínchekitoexinnya ch'án ijje ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jje tjanchiará ntá tsòndona —ichro ch'án.

²³ Ntá k'uètuènen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjujiko ch'ín Félix tjan Drusila ichjién ch'án, mé ijnko tjan judía. Ntá k'uètoan ch'án kixin tsjik'iyéhe sín tí ch'ín Pablo kixin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kixin nkexrí ts'ejó chojni jina la ko nkexrí ts'etuènen chojni asén sín kixin ch'ehya sín tí jínahya la ko nkexrí Dios sinchekitoexin ijje chojni tí tsjixixin. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jje la sátjia. Ntá ts'iyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehe ch'án. ²⁷ Ntá xikahó kónhen hasta k'uátsínka iyó nánó ntá tí ch'ín Félix kuítóhe ch'án tí xra gobernador la ntá í jnko ch'ín it'in Porcio Festo mé k'uíxenhen ch'án tí xra a ínaá. A ntá ch'ín Félix mé kuítóhe ch'án tí ch'ín Pablo tjechjina ch'án kixin tjinkaon ch'án chrókjuínchexiteyá ch'án tí nkehe tjinkaon tí sín judío.

25

Ch'in Pablo nkayakon tí ch'in Festo

¹ Ntá tí ch'in Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. ² Ntiha tí sín nchat'á t'et'otan la ko tí sín judío imá tjet'otan mé kjuanchia sín kixin tsjasóte ch'in Pablo. ³ Kjuanchia sín kixin xra ó chrók'uet'otan ch'án kixin chrók'jui ch'in Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'in Pablo. ⁴ Kjánchó ch'in Festo kjuátehe ch'án ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'in Pablo la tjechjina ch'án chjasin Cesarea la xitjahya ts'et'otan ch'án kixin tsjixrakoa. ⁵ Ntá ntáchro ch'án kixin:

—Tí chojni tjet'otan kuèntará sáchrók'juikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'in Festo.

⁶ Ntá ch'in Festo kjuák'e ch'án chjasin Jerusalén chjina ijní o ite yaon ntá ikjan ch'án chjasin Cesarea inaa. Ntá tí yaon chr'éxin a kjuák'etjaxín ch'án tí tjet'et'otaxín ch'án ntá k'uet'otan ch'án kixin tsjikakjín sín tí ch'in Pablo. ⁷ Ntá tió k'uixenhen ch'in Pablo ntiha ntá tí sín judío kuixín Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. ⁸ A ntá tí ch'in Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'in gobernador romano.

⁹ A ntá ch'in Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'in Pablo ntáchro ch'án kixin:

—¿Á tjinkávan sátsjia chjasin Jerusalén kixin ntaha janhan chrók'juintakitoxián nkehe tí jie chonta jaha? —ichro ch'án.

¹⁰ Ntá kjuátehe ch'in Pablo kixin:

—Náhi, jeheni ó ntihi tjenni tí t'et'otaxín tí sín gobierno romano la jina chrók'juinchekitoxián ijieni kixin jaha la ó noha kixin ninkehó ijie kjuich'ehyani tí sín judío. ¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'ué. A ntá tí chaxínhya xikaha t'ekana sín jie la ninkexró chóntahya kjuachaxin chrók'uet'otan sáchrók'juikoni tí jehe sín. A ntá tjánchá kixin jehe tí ch'in imá t'et'otan mé sinchekitoxín tí jie —ichro ch'án.

¹² Ntá ch'in Festo mé kjuanchankíhi ch'án iso tí sín tjinkitsa ch'án ntá ntáchro ch'án kixin:

—Jaha mé tjanchia kixin tí ch'in imá t'et'otan sinchekitoxín ch'án ijíá. Méxra tétuqhan sátsjia tí tjen tí ch'in a —ichro ch'án.

Ch'in Pablo nkayakon tí ch'in rey Agripa

¹³ Ntá k'uaúsinka iso yaon ntá tí ch'in rey Agripa la ko tjan Berenice kjuíji sín chjasin Cesarea kixin tsonixjehe sín tí ch'in Festo. ¹⁴ Ntá ntiha mé kuít'ot'he sín itsjé yaon ntá ch'in Festo a mé chénka ch'án tí ch'in rey nkehe kuènte tí ch'in Pablo. Ntáchro ch'án kixin:

—Ntihi itjen ijnko ch'in tjechjina tsík'ot'he ch'in Félix. ¹⁵ A ntá tió kjuak'é chjasin Jerusalén ntá tí sín nchat'á t'et'otan la ko tí sín t'et'uenhen tí sín judío a mé kjuíjitsjehe sín tí janhan ntá kjuanchia sín jie kuènte ch'in Pablo. Kjuanchia sín

kíxin chrók'óyánni tí jehe ch'án. ¹⁶ Ntá janhan kjuátaha kíxin: Jeheni chojni t'etoan kuènte sín romano mé kuènyani ts'etoanni its'en ninkexró tí naxa tsochjinahya tí ch'in kjuasin jie kíxin tsonáchro ch'án á chaxín tí jie tjanchia sín o náhi. ¹⁷ Ntá tí sín judío kui ntihi ntá chuanhya má. Kjóté tí yaon chr'éxin kjuak'étjaxian tí ntakitoexián ijíe chojni la kuétoan kíxin síxrakoa tí ch'in Pablo. ¹⁸ A ntá tí sín kóchjina kohya ninkehó ichro sín kuènte tí jehe ch'án éxi kjuenkayáxian janhan chróntáchro sín. ¹⁹ Jehó nínkakuénxín sín ch'án kíxin tí nkehe tinkáchónki ch'án la ko nínkakuénxín sín ch'án kíxin tí nkexro it'in Jesús mé ik'uén ch'án ntá jie ntáchro ch'in Pablo kíxin tjechón ch'án inaá. ²⁰ Janhan la nonahya nkexrí tsitoexín tí ijíe ch'án ntá kjuánchánkiha tí ch'in Pablo á tjinkaon ch'án sátsji ch'án chjasin Jerusalén kíxin ntaha tsitoexin tí jie ch'án. ²¹ A ntá jehe ch'án tsíkjanhia ch'án kíxin tí ch'in imá t'etoan mé chrókjuinchekitoexin ch'án ijíe ch'án. Ntá kuétoan janhan kíxin naxa ntihyó tsjak'echjina ch'án tsononajia janhan nkesá tsétuanhan ch'án sátsji ch'án ntiha —ichro ch'án.

²² A ntá ch'in Agripa ntáche ch'an tí ch'in Festo kíxin:

—Kjaxian janhan tjínkavan tsinhan tí nkehe tsochrónka tí ch'in a.

Ntá kjuátehe ch'in Festo ntáchro ch'án kíxin:

—Ntóye tsinhín nkehe tsochrónka ch'án.

²³ Ntá tí yaon chr'éxin tí ch'in Agripa la ko tí tjan Berenice kjuíji sín la k'uixenhen sín la ko tí sín soldado t'etoan tsíkjkiao sín, la ko k'uixenko sín iso chojni tjeoan kuènte chjasin ntiha. Ntá k'ueoan ch'in Festo kíxin tsjixrakoa tí ch'in Pablo. ²⁴ Ntá ntáchro ch'in Festo kíxin:

—Jaha ch'in rey Agripa tinhín la ko tinhínra kaín rá tsíkójnkotsérá ntihi. Tsjehérá tí ch'in Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuíteohya sín, tjanchana sín kíxin chrók'uen ch'án. ²⁵ A ntá tónhenni kíxin kohya jie jie kjuasin ch'án kíxin chrók'uen ch'án. Kjánchó jehe ch'án mé tsíkjanhia ch'án kíxin tí ch'in imá t'etoan chrókjuinchekitoexin ijíe ch'án. Ntá kjuenkayáxian kíxin tsétuanhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhe tí ch'in t'etoan. Ntá jie kuétoan kjuikakjín sín ch'án kjuikao sín ch'án tí tjejóni ntihi kíxin tjeoan kíxin jaha ch'in Agripa la ko kaín rá tjejorá ntihi tsjanchankihíra ch'án kíxin mé tsonóna janhan nkehe tsokjian. ²⁷ Méxra náxrxjónhya chróchr'an ijnko tí chojni tjechjina naxa nonahya nkehe tí jie t'eka sín ch'án.

26

Ch'in Pablo nkayakon tí ch'in rey Agripa chrónka ch'án tí jie t'eka sín ch'án

¹ Ntá tí ch'in rey Agripa a mé ntáche ch'án tí ch'in Pablo kíxin:

—Ó nchoxon jahvá tsochronka —ichro ch'án.

Ntá tí ch'in Pablo mé kjuaya tja ch'án ntá kjuankíxin nixja ch'án, ntáchro ch'án xikihi:

² —Chána kíxin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kíxin jaha la ó noha jina kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrjannógha kíxin tjak'etinhín jina.

Chrónka ch'in Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uekjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jina

chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuente tí nkehe tinkáchónkini. ⁶ Ntá ijie sinchekitoexián jiena kixin nínkaon tí sín judío a kixin tjéchonhan kixin Dios mé sinchexechón chojni inaá xikaha tsíchénka ch'án tí sín tsík'axrjeníxinni. ⁷ Tí teyó tribu tsík'axrjeníxín ch'ín Israel mé tjejóchónhen sín kixin ts'íkon sín tsoxiteyá tí nkehe tsíchónka Dios. Méxra xraxinkaon sín Dios nchakotjin la ko tie. Méxra mé xikaha tjéchonhan, jaha rey Agripa, la mé xikaha nínkakonna tí sín judío ijie. ⁸ ¿Á títékákonhyará jahará kixin Dios sinchexechón chojni tsík'en?

Ch'ín Pablo k'uénínkakonhen ch'án tí chojni tinkáchónki Ìnchéni

⁹ Janhan mé kjaxin k'uéjkenayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixín chjasin Nazaret. ¹⁰ Mé xikaha kjaxin k'uéjkit'a chjasin Jerusalén. Tí sín nchat'á t'etóan mé kjuanjón sín kjuachaxin kixin janhan tsochr'áxanhan ntóechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchóxon xikaha kónhen. ¹¹ Nchónhya veces kjuíntakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uéjkit'a kaín xín nínko kixin imá k'uénínkakonhan tí jehe sín la xikaha k'uájichráha sín kjónté sátsíkji sín chjasin ókjé.

*Chrónka ch'ín Pablo nkexrí kuínkáchónki ch'án Ìnchéni
(Hch. 9.1—19; 22.6—16)*

¹² Méxra xra ó sákjuia janhan chjasin Damasco. Tí sín nchat'á t'etóan mé ó kjuanjón sín kjuachaxin kixin xikaha t'ahá sín xra. ¹³ A ntá tí ntja a jaha rey chrókónoha kixin chonkixin k'uíkuan éxí ijnko xrohi t'inkaséyan kuixín nkaya nkajní antsí má fuerte la kánhyó fuerte tí xrohi kuente yaon la tí t'inkaséyan mé k'uantatjen tí janhan la ko tí sín xríkian. ¹⁴ Ntá kaín ní kjuítsínkani nonte ntá xrínahya kuínhan nixja ijnko nkexro mé nkíva hebreo nixjaxín ch'án. Ntáχρο tí nkexro a kixin: “Saulo, Saulo, ¿nkekuente nínkakónna xritjéyá tí janhan? Jahvá nchekjasóte asán kixin tjanjonkoa tí janhan. Éxí yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha. ¹⁶ Ijie t'áya jaha, tjak'exián tohá. Janhan kjuánjuan kjuachaxin kixin k'uíkuan tí janhan ijie kixin jaha sjich'ena xra. Janhan kjuéyá tí jaha kixin tsóchénka chojni kixin k'uíkuan tí janhan la ko tsóchronka tí nkehe tsjákohá inaá tí xik'íkuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tétóan satsjia. ¹⁸ Méxra tétóan sátsjia tí tjejó tí jehe sín kixin takítjenkia ikon sín kixin í ts'ajihya sín ntja sitié la ts'aji sín ntja t'inkaséyan la ko tsóhóntahya tí jínahya kjuachaxiэн ts'etuenhen tí jehe sín. Jehe sín mé tsínkáchónki sín tí janhan. Ntá janhan ts'áyáha sín la tsjiin ijie sín la ko tsjtonhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'íkon ch'án

¹⁹ Mé xikaha jaha rey Agripa kjuíntaxiteyáha tí nkehe k'uíkuan kuixín nkaya nkajní. ²⁰ Saóxín kjuákoqha tí sín sín chjasin Damasco, la ntá chr'éxín chjasin Jerusalén, la ko kuente tí estado Judea ntá kjaxin kjuákoqha tí sín jehya judío. Kjuákoqha sín kixin chrókuítóhe sín ijie sín, la chrókjan sín chrókuínkáchónki sín Dios, la ko chrókuákoqxin sín xra jina kixin chaxín ó

kjuítóx̄inhin sín tí nkehe tinkáchónki sín. ²¹ Mé x̄ikaha tí x̄r̄a tséxinna tí sín judío a nkaxenhen n̄inco la tjinkaon sín chrók'óyanna sín. ²² Ntá kjuasáyé Dios kjuínk̄itsana la ntoá itjén ijie tják̄oh̄a kaín chojni ntsíntsi la ko chojni ihyé la ninkehó k'uantax̄ianhya kuénte tí nkehe tsíchrónka tí sín tsíchrónka itén Dios la ko tí nkehe tsíchrónka ch'ín Moisés tsonhen, ²³ k̄ixin t'ichj̄ánx̄in its'en Cristo la ko tsoxechón ch'án inaá. Tí itén ch'án éxí ijnko xrohi ts'ínkaséyanx̄in tí sín síin ntihi la ko tí sín síin í so nacióon k̄ixin tsaáxin sín.

Ch'ín Pablo nixjehe ch'án ch'ín Agripa k̄ixin chrókuinkáchónki ch'án Inchéni

²⁴ Mé x̄ikaha ichro ch'ín Pablo k̄ixin kohya j̄ie kjuasin ch'án ntá tí ch'ín Festo mé itsen k'uèya ch'án k̄ixin:

—Pablo jaha la k̄já tsík'ixikj̄án. Imá tsíkjinchekuáxian mé x̄ikaha tsikólókoxián —ichro ch'án.

²⁵ Ntá kjuát̄ehe ch'ín Pablo k̄ixin:

—Jehya tsík'ixikj̄ánna. Jaha Festo imá tjuáha. A ntá tí nkehe ntáxrjan la ijnko nkehe jina la ijnko nkehe chaxín. ²⁶ Ntihi itjen tí ch'ín rey Agripa. Jehhe ch'án mé jina nohe ch'án kaín tí nkehe a. Méx̄r̄a tjenixj̄ah̄a ch'án jnkojina k̄ixin ó nòna k̄ixin jehhe ch'án ó nohe ch'an kaín nkehe kónhen k̄ixin jehya ijnko nkehe imó kónhen tíha. ²⁷ Jaha, rey Agripa, z̄á titekávan tí nkehe tsík̄jako tí sín tsíchrónka itén Dios ósé? Janhan la ó nòna k̄ixin titekávan jaha.

²⁸ Ntá kjuát̄ehe ch'ín Agripa ntáchro ch'án k̄ixin:

—Ó antsikóá chrokuacha chrókuachròena k̄ixin chrók'ónana cristiano —ichro ch'án.

²⁹ Ntá ntáchro ch'ín Pablo k̄ixin:

—Ntáxrjan k̄ixin á isé tsoxrjanka o á séhya la Dios mé tjinkaon k̄ixin jehya jahvá chrókuinkachónkia ch'an. Náhí. Kjaxin tjinkaon ch'án k̄ixin kaín nkexro tjejótinhin chrók'óna sín éxí tí janhan k̄jánchó x̄ikahya chróchóna sín cadena.

³⁰ Ntá kjuixin nixja ch'ín Pablo ntá k'uúkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótx̄in ntiha. ³¹ Ntá kaín sín k'uaxrjenta sín la ikjo sín kichó sín. Ntáchro sín k̄ixin:

—Kohya j̄ie tsík̄jasin tí ch'ín a k̄ixin chrók'uénx̄in ch'án la ko chrók̄juak'echjinax̄in ch'án ntòechiso.

³² Ntá tí ch'ín Agripa ntáche ch'án tí ch'ín Festo k̄ixin:

—Ó nchoxon chrók̄juánjuan kjuachaxin sáchrókjui tí ch'ín a tí jehhe ch'án chrók̄juanchahya ch'án k̄ixin tí ch'ín imá t'et̄oan sinchekit̄oex̄in ij̄ie ch'án —mé x̄ikaha ichro tí ch'ín Agripa.

27

Ch'ín Pablo sákjuí ch'án chjasin Roma

¹ Ntá k'uètoan sín sátsjini nacióon Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehhe ch'án me ijnko policia kuénte tí ch'ín t'et̄oan Augusto César. ² Ntá k'uixenhenni ijnko ntabárco tsík̄j̄ix̄in nó puerto Adramítio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsík̄j̄ix̄in chjasin Tesalónica nó estado Macedonia. ³ A ntá tí yaon chr'éx̄in mé kjujini tí puerto chjasin Sidón. Ntá ch'ín Julio mé ikjo jnkojina ch'ín Pablo ntá chjéhe ch'án kjuachaxin k̄ixin sátsjitsjehhe ch'án tí chojni chóxin ch'án ntiha k̄ixin tsjink̄itsa sín ch'án. ⁴ Ntá chr'éx̄in sákjuix̄inni chjasin Sidón. Ntá kjujini ijnko isla it'in Chipre la nó tja kjonni kuít̄ohe tíha

la imá chjéhe xr̄nto. ⁵ Ntá k'uatòyeni tí ntayaon chjinaxón chjasin Cilicia la ko Panfilia la ntá kjujini chjasin Mira estado Licia.

⁶ A ntá ntiha tí ch'ín capitán, tí ch'ín k'uetuenhen tí sín soldado a, mé k'uitja ch'án í jnko ntabárc̄o tsíkijxin nó chjasin Alejandria sátsji nó nación Italia. Ntá ntácho ch'án kixin tíha sátsjikoni kixin tsjjini ntiha. ⁷ Nchónhya yaon kjujixinni kixin imá iyó la imá xrā kjujini chjino chjasin Gnido. Ntá naxa chjéhe xr̄nto tsanka ntá k'uátsínkani chjinaxón Salmón ntá kuinkátjíaixinni chjino tí isla Creta. ⁸ Ntá xjakahó imá xrā k'uátsínkani chjinó chr̄nta ntá kjujini ijnko chjasin it'in Puertos Jína chjino chjasin Lasea.

⁹ Ntá k'uitjáyankí nchónhya yaon, ntá ó kjuixraká tí yaon xitjahya sátsjiko sín ntabárc̄o chr̄ntaón ntayaon kixin ó kóchjina tí nchakuen kin. Méxrā ch'ín Pablo nixjehe tí sín a. ¹⁰ Ntácho ch'án kixin:

—Tinhínrá tí nkehe tsoxrjanka. T'íkuān kixin nchónhya kjuachrakon tsonhen. Sinchek'itjáyanni tí ntabárc̄o a la ko tí nkehe tjínká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuente tí sín soldado a mé antsí má tjínkaon ch'án chrókuinhin tí nkehe chrónka tí ch'ín tjiko ntabárc̄o la ko tí nkehe chrónka tí inché tí ntabárc̄o a ntá tí nkehe ntácho ch'ín Pablo la náhi. ¹² Jehya jína kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jína sátsjixinni ntiha kixin ákué xitjahya chrókjujini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xr̄nto chjéhe chr̄ntaón ntayaon

¹³ Ntá kjuankixin chjehe xr̄nto kjuixin nó sur kjánchó kánhyó fuerte ntá kjuenkayáxin sín kixin kjá jína sátsjini.

Ntá sákjuixinni ntiha kjánchó kjónté naxa sákjuíni chjinaxón tí chr̄nta ti isla Creta a. ¹⁴ A ntá chr'éxin ikjui ijnko xr̄nto kjuixin noroeste k'uúntaté tí ntabárc̄o. ¹⁵ La kjuankixin xr̄nto sákjuiko tí ntabárc̄o kixin tsjachahyani sátsjini tí sítjixin tí xr̄nto a. Ntá t'ichjánxin kuítóheni sákjuiko xr̄nto tí ntabárc̄o tjejóxenhenni. ¹⁶ Ntá k'uátsínkani chjino ijnko isla ntsí it'in Claudia kixin ntiha mé kánhyó tjian chjéhe xr̄nto. Ntá imá xrā k'uitjáiini tí ntabárc̄o ntsí t'etenixin nóton ntabárc̄o jíé. ¹⁷ Ntá kjuixin kjuínchek'it'ótjen sín tí ntabárc̄o ntsí ntá imá chrakon sín ntá kjuínchenteto sín tí ntabárc̄o jíé kixin kohya nkehe tsonhen. Kjaxin tóxakonhen sín chrakon sín tsíkijne nchesen tí ntabárc̄o tí tsjji sín tí it'in Sirte. Ntá kuakjinjin sín tí ka chóna ntabárc̄o ntá kuítóhe sín sátsjiko xr̄nto. ¹⁸ Ntá tí yaon chr'éxin ntá naxa imá tjian chjéhe xr̄nto. Ntá ik'ue sín tí nkehe sítjínká tí ntabárc̄o a chr̄nta ntayaon kixin kánhyó tsoye. ¹⁹ A ntá tí yaon níxin a mé itjani ó kuakitsjexinni tí nkehe kuente tí ntabárc̄o. ²⁰ Isé k'uúkonhyani yaon la k'uúkonhyani konotsé kixin imá tjian chjéhe xr̄nto la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

²¹ Ntá ó k'uatsínka itsjé yaon kjónehyani ntá k'uúkatjen ch'ín Pablo nixjehe ch'án kaín tí sín tjejóxenhnen ntabárc̄o a ntácho ch'án kixin:

—Chrókuitekáonrá tí nkehe xrjanka kixin chrókuitoeheni tí estado Creta ntá chrók'uitjáyenyani tí nkehe tjínká tí ntabárc̄o a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárc̄o la ts'itjáyán. ²³ Ntá tí tie a mé k'uúkuān ijnko ángel tsíchr'án Dios tinkachónkia la ko t'ahā xrā. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán

tí tjen tí ch'ín César t'etōan la kjaxin Dios la tsjinkĩtsa jaha la ko tí sín tjejókoa kixin ts'enhya sín." ²⁵ Méxra chróchrakonhyará jahará kixin tí Dios tinkachónkia la chaxin nchexiteyá tíha, éxí tsíntácho tí ángel. ²⁶ Kjónté ó jehí t'ichjánxin sátsjikoni xrĩnto ijnko nonte jnkosiné ntayaon —ichro ch'án.

²⁷ Kjuixin k'uaúsinka iyó semana ntá ijnko tie ntá kjujini ijnko ntayaon it'in Adria ntá sákjuiko tí ntabárcō ijnko lado la í jnko lado ti xrĩntō. Ntá chjino k'áxrótjen ntá tí sín tjiko ntabárcō mé ó kónohe sín kixin ó chjina kjuixraká sín ijnko nonte xámá. ²⁸ Ntá kjuáchroa sín tí nkekjain nĩnkaxín tí ntá mé chóna treinta y seis metro nĩnkaxín. Ntá sákjuíni kjinhya la ó xĩljachroa sín la veintisiete metro ó nĩnkaxín. ²⁹ Imá chakon sín kixin ts'itjaton tí ntabárcō itjō ntá kjuinkajin sín noó chica gancho tí nóton tí ntabárcō a kixin ntahó tsochónhen tí ntabárcō hasta chrók'uinkaséyan. ³⁰ Ntá tí sín tjiko ntabárcō kjuenkayáxin sín sáchrókjuí sín ntá kjuankixin kjuinkajin sín tí ntabárcō ntsí chríaón ntá éxí tjinkaon sín chrókjuinkajin sín tí gancho chóna tí kja ntabárcō. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitōehya tí sín i ntihi nkaxenhen ntabárcō ntá xitjahya tsaára —ichro ch'án.

³² Ntá tí sín soldado a mé kóchrĩnjint'ō sín tí hñō kuènte ntabárcō ntsí tsítōhe sín tsjankí ntā.

³³ Ntá chjina t'inkaséyan a ntá ch'ín Pablo nixjehē ch'án kaín tí sín siin ntiha ntácho ch'an kixin chrókjónē sín ichrén nkehe. Ntácho ch'án kixin:

—Ó k'uaúsinka iyó semana k'uejóchrinhyará la ko kjóntehyará. ³⁴ Tinhínra t'ichjánxin chrókjónterá ichrén nkehe tí tjinkáonrá tsaára kixin ntihi la kohya nkexro ts'itjáyān la nijnko tí kaxjhi chóna kjará ts'itjáyān.

³⁵ Ntá xikaha ichro ch'ín Pablo ntá kuákja ch'án ijnko niotjā a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ō ch'án ntá kjuankixin kjóne ch'án. ³⁶ Ntá kóchéhe sín kaín sín kjuankixin kjóne sín kjaxin. ³⁷ Kaínni tsik'ixenhenni ntabárcō mé iyó ciento setenta y seis chojni. ³⁸ Ntá kjuixin kjóne sín la kókjehe sín ntá ik'ue sín tí noa trigo a tjinká tí ntabárcō a chrínkí tí ntayaon a kixin kánhyó tsoye tí ntabárcō a.

Tí ntabárcō kjuixin k'uaúniánkí ntā

³⁹ A ntá ó k'uínkaséyan, a ntá tí sín tjiko ntabárcō la kjuátsoanhya sín tí nonte ntá k'uikon sín ijnko chrĩnta ntā. Ntácho sín kixin ákué tsjachahya sín sátsjiko sín tí ntabárcō ntiha. ⁴⁰ Ntá kóchrĩnjint'ō sín tí hñō síchroéxin tí gancho kixin ntahó tsitōhe chrínkí ntayaon. Ntá kjuínchenta sín tí nkehe tjikoxín sín tí ntabárcō a. Ntá kjuínchek'it'ótjen sín tí ka tjiko nkayakon tí ntabárcō. A ntá tí ntabárcō kjuankixin sákjuí chrĩnta ntā. ⁴¹ Xrínahya kjujji ntabárcō tí iyó kójnkojéxin ntayaon ntá ntiha kjuíkjiat'ó tí kja tí ntabárcō tí nchesen siin ntiha. Ntá í xitjahya nchekinkí ninkehó, a ntá nóton tí ntabárcō kjuankixin síxika kixin imá sítji chjéhe ntā a. ⁴² Ntá tí sín soldado a mé tjinkaon sín chrók'óyán sín tí sín tjejóchjina kixin tjinkakonhya sín kixin ninkexró sáchrókjuí ókjé. ⁴³ A ntá tí ch'ín t'etuenhen tí sín soldado a mé tjinkakonhya ch'án kixin its'en ch'ín Pablo ntá kjuanjonha ch'án kjuachaxin. Íchá k'uetōan ch'án kixin tí sín jina tjitaón ntā la senó sátsji sín kixin tsjiji nonte xámá ⁴⁴ la ko tí sín noehya tsjitaón ntā a mé sátsjiko sín tí ntatabla o it'ō tí ntabárcō. Ntá xikaha kaín ni kjujini tí nonte xámá la ó kuaáni.

28

Itjen ch'in Pablo tí isla Malta

¹ Ntá tió tjejóni kaín ni kuaáni ntá kónoheni kixin tí isla la mé nchek'in sín Malta. ² A ntá tí sín chjasin ntiha mé imá jína kjuínkítsa sín kaín ni la kjuaka sín ijnko xrohi jié kixin imá kin kixin sí'taniá chrin. Ntá k'uèya sín kixin tsochjinani kaín ni tsochjixroheni. ³ A ntá ch'in Pablo mé sákjuikakja ch'án í so njo tsixámá ntá kjuasinkáte ch'án tí xrohi a. Ntá xríngaha k'uaxrjenkixin ijnko konche tí xrohi a kixin imá sóa ntá xríngaha k'uúsímá itja ch'in Pablo. ⁴ Ntá tí sín chjasin ntiha mé k'uíkon sín tí konche kítjankítjen itja ch'án ntá ikjo sín kichó sín. Ntáchro sín kixin:

—Kjá tí ch'in a la ijnko chojni tsikjaya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxa tsjak'echón ch'án.

⁵ A ntá jehe ch'án kótsjenka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uéjóchónhen sín isé la k'uíkon sín kixin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

⁷ Ntá chjino tí k'uéjóni a mé itjen nontee ijnko ch'in t'etóan kuènte isla me it'in Publio. Mé jína kjuanjón ch'án kjuachaxin k'uejóni ntóe ch'án la kjuanjón ch'an nkehe kjóneni iní yaon. ⁸ Ntá it'é tí ch'in Publio a mé tjetsínka ch'án kixin níhi ch'án chóna ch'án sóa la ko chinjni. Ntá ch'in Pablo sákjuítsjehe ch'án la kjuixin níxjehe ch'án Dios, ntá kjuák'etja itja ch'án tí ch'in a ntá kuitóhe ch'án jína. ⁹ Mé xíkaha kjaxin kóchjina í so tí sín níhi sín tí isla ntá kaín sín kuitóhe sín jína. ¹⁰ Na ntá imá kjuikosáyehe sín ch'án. A ntá chr'éxin tió kjuixin k'uíxenhenni ntabárcó inaá ntá kjuanjón sín kaín nkehe t'ichjánxinhinni sátsjikoni.

Kjuíji ch'in Pablo chjasin Roma

¹¹ Ntá k'uátsínka iní nitjó tjejóni tí isla ntá k'uíxenhenni ijnko ntabárcó mé ntaó tsikitóhe k'uátsínkajia tí nchakuen kin. Tí ntabárcó a mé tsikjixín chjasin Alejandria la ko mé chóna nkehe tsikjangya chóna ihnjé dios Cástor la ko Pólux. ¹² Ntá sákjuíni ntá kjuíjini puerto chjasin Siracusa la ntaha kuitóhenni iní yaon. ¹³ Ntá xík'ixenhenni tí ntabárcó la k'uátsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xrintó kjuixín nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso kichó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma. ¹⁵ Ntá tí sín kichó ni chjasin Roma la ó nohe sín kixin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'in Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuíji sín chjasin Roma ntá tí ch'in capitán kjuikénhen tí sín tjejóchjina, k'uáyéhe tí ch'in jefe ts'ayakonhen ch'án. A ntá ch'in Pablo la kuitóhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'in Pablo kjuako chjasin Roma

¹⁷ Ntá k'uátsínka iní yaon ntá tí ch'in Pablo a mé k'uíyehé ch'án kaín tí sín judío tjeoan kuènte chjasin Roma. Ntá tió kjuixin kójnkotsé kaín sín ntá ntáchro ch'án kixin:

—Kíchóni, kohya ninkehó jię kjuásian kixin chrókóninkakonna tí sín judío la jehya kixin ninkakonxian tí nkehe k'uékinkáchónki tí sín tsík'axrjenixinni. A ntá kjónté itséna sín kjuak'ęchjina sín tí janhan chjasin Jerusalén la ko kjuínchekjasótena tí sín romano a. ¹⁸ Ntá k'uitjahya sín ninkehó jię chonta. Ntá tjinkaon sín chrók'uatjántana sín kixin k'uitjahya sín ninkehó jię chrók'uénxian. ¹⁹ A ntá tí sín judío a mé imá kónínkaon sín tjanchia sín jię. Ntá t'ichjánxin tsjanchiani kixin tí ch'ín César mé chrókjuinchekitęxín ch'án nkehe tí jię chóntani, kjónté chóntahyani ninkehó jię ts'eka tí sín tí nacióon kuénteni. ²⁰ Méxra k'uíyahará kixin tjinkaonni ts'íkuan tí jahará la ko tsonixjahaaráni kixin tinkáchónkini tí nkexro tjejóchónhen kaín tí sín israelita mé xikaha t'ikonrá kixin tjechrontetoxínni cadena ntihi.

²¹ Ntá ntáchro sín kixin:

—K'uáyęhyani ninkehó xroon chrókjuixin Judea kuénte tí jaha la ko kuihya nijnko tí sín kíchó ni judío chróntáchro sín ichrén nkehe jínahya tsíkjich'e. ²² Tjinkaonni chrókuinhinni nkexrí tjenkayáxian kixin ó noheni kixin itsjé chjasin t'ántaxínjin sín tí nkehe nixin tjákua —mé xikaha ichro sín.

²³ Ntá chr'éxin kjueyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuénté yaon chrónka ch'án nkexrí tí kjuachaxin kuénte Dios. Nixjęę ch'án sín kixin chrókuitekaon sín tí nkehe kjuako ch'ín Jesús, la chrónkaxín ch'án kixin nkexrí nixja tí ley kuénte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuítekaonhya sín. ²⁵ Ntá jnkokoáhya kjuenkayáxín tí jehe sín la iso sín tjinkaon sín kixin sáchrókjui sín, ntá ch'ín Pablo mé ntáchro ch'án kixin:

—Ntoá nixja tí nkehe chénka Nchakuen Dios tí sín tsik'axrjenixinni ósé chrónkaxin ch'ín profeta Isaías ntáchro kixin:

²⁶ Sátjia nixjehé tí chojni a

kixin jehe sín kjónté tjejóntihin sín la tienxínhya sín,
la kjónté tjejótsjehe sín la t'ikonhya sín.

²⁷ A ntá asén tí chojni tí chjasin i la tsík'óna imá cha
la ntatsjon sín la tsík'ikjehe

la ikon sín la tsíchr'áto
kixin t'ikonxínhya sín

kixin tinhín sín la tjinkakonhya sín chrókuienxín sín,
la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kixin ntá janhan
chrókjuintakitęhą sín jína.*

Mé xikaha tsíkjin ch'ín Isaías. ²⁸ Méxra chrókónohará jahará kixin ijie tí sín jehya judío me ts'áyęę sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kíchó sín.

³⁰ A ntá ch'ín Pablo kuítęhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjuíjitsjehe ch'án. ³¹ La kjuako ch'án tí kjuachaxin kuénte Dios la ko kjuako ch'án kuénte İnchéni Jesucristo. La kohya ninkexró k'uínkákonęęn tió kjuako ch'án. Ó tjen.

* 28:27 28:26–27 Isaías 6.9–10

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'áha xrá Jesucristo mé kjian tí xroon i. Kjueyána Dios kixin sít'aha ch'án xrá tsjákuwa tí tan jína tsaáxinni.

² Tíha mé tsintáchro Dios senó kixin tsoxiteyá éxi nixja tí xroon nixjaxin tí sín tsíchronka itén ch'án ósé. ³ Tí tan a mé chrónka nkexrí tjen Ínchéni Jesucristo Xjeen Dios. Jehé ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴ Tí kjuachaxin jié mé kjuákoxin kixin jehé ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjeotan. ⁵ Kjuasáyé Jesucristo k'uáyéheni kjuachaxin kixin sich'eheeni ch'án xrá sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrótjuéhe sín ch'án. ⁶ Jahará k'uék'ejorá éxi tjejó tí jehé sín, a ntá jie la kjueyará Dios kixin chrókuitekáonrá Jesucristo.

⁷ Janhan ikjian tí xroon chr'anhánrá kaín rá tjejorá chjasin Roma. Tjuàhará Dios la kjueyará ch'án kixin tjóá chrók'uejorá. Kjuasáyé It'éni Dios la ko Ínchéni Jesucristo kixin kjuanjon ch'án kjuaxróxin k'uayéhérá.

Ch'ín Pablo tjínkaon chrókjuitsjehé ch'án chjasin Roma

⁸ Xrankíxixin kjuachaxién Jesucristo tjánchaxian Dios kjuasáya kixin jahará ó kuitekáonrá ch'án la ko nkuíxin chjasintajni nixja sín nkexrí tinkáchónkirá ch'án. ⁹ Dios, tí nkexro t'áha xrá kaín asenná xrjanka tí tan jína kuénte Xjeen ch'án, mé nohe ch'án kixin xráxín xráxinkavan tí jahará tíó nixjahá ch'án. ¹⁰ Xráxín tjáncháha Dios kixin tí chrókjuanjon ch'án kjuachaxin la chrókjuasántsahará. ¹¹ Kixin tjínkavan chrókjuasántsahará tí jahará kixin chrókjuínkítsa tí jahará kixin chrók'uitjará jína nkexrí chrók'uejorá ntoá. ¹² Me xíkaha tsócháhará la ko tsóchàna kixin jnkokoá tinkáchónkini Ínchéni, jahará la ko janhan.

¹³ Kíchóni, tjínkavan chrókónohará kixin nchónhya veces tjínkavan chrókjuasántsahará kjánchó naxá xitjahya tsjasán. Tjínkavan chrókjuasán kixin chrókjuít'a xrá kuénte Ínchéni kixin chrókjuachani nchónhya chojni chrókuínkáchónki Dios éxi kjuít'a xrá í so chjasin naxá chónhya sín Dios. ¹⁴ T'ichjánxin tsjákoqha kaín chojni, á chojni griego o á chojni jehya griego o á chojni nohe o á chojni noehya. ¹⁵ Mé xíkaha xrá ó tjéchonhan chrókjuasán chrókjuákohará tí tan tsaáxinrá tí jahará tjejorá chjasin Roma.

Tí kjuachaxin kuénte tí tan jína

¹⁶ Tósuànaha xrjanka tí evangelio kixin táha ijnko tan jína kixin chóna kjuachaxin kuénte Dios chrókuaáxin kaín xín tí chojni chrókuitekaon, mé saxín tí sín judío la ko kjaxin tí sín jehya judío. ¹⁷ Kixin tí tan jína kuénte Dios tjákuexin tí jeheni kixin chrókótjuáxin ijíeni kixin tinkáchónkini ch'án la jehó ch'án tinkáchónkini. Éxi ntáchro xroon itén Dios kixin: "Tí nkexro kótjóá kixin kuitekaon sín Dios mé táhó ts'ejóchónxin sín."*

Tí jie tjasin chojni

* 1:17 Habacuc 2.4

18 Dios tjen nkaya nkajní mé tsonínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'ínkákónhen kixin chrókónohe sín tí nkehe jína chaxín. 19 Jehé sín ó nohe sín jína nkexrí tjen Dios kixin jehé ch'án kjuakuexín ch'án tí jehé sín. 20 Tí kjuachaxin kuénte Dios kjónté t'ikonhyani la kjánchó noexínni kixin tí nkehe kjuích'éna ch'án. Kixin tí naxá k'ónahya chjasintajni kónoxín kixin jehó ch'án mé Dios t'etóan la ko chóna ch'án kjuachaxin jnkochrín. La ntá tí sín jínahya xitjahya tsontáchro sín kixin k'uénoehya sín. 21 Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sitié ó kuítóhe sín. 22 Kjónté ntáchro sín kixin imá nohe sín kjánchó imá lontí sín kixin antsí kjuasin sín jie. 23 A ntá ó kjuixin kjuínki sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó toté.

24 A ntá xikaha Dios kuítóhe ch'án tí jehé sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuèxin sín ch'ehe kichó sín 25 kixin kuítekakonhya sín tí nkehe chaxín kuénte Dios, a ntá tí nkehe jínahya mé kjuéyá sín. Kjuích'éna sín dios kuénte sín tí nkehe tsíkjich'éna Dios. A ntá tí nkexro kjuích'éna tí nkehe la titekakonhya sín. Jehé ch'án mé chrókjuancheheni ch'án kjuasáya jnkochrín kixin jehé ch'án mé kaín tí nkehe siín mé kuénte ch'án. Amén.

26 La ntá xikaha kjuích'e sín ntá Dios kuítóhe ch'án tí jehé sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuích'éna sín asén sín chojni ntoa. 27 A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'ehe kichó sín jnkokón ntoa sín. Mé xikaha mé tí cuerpo kuénte sín mé tsjasótéxin sín tí jie kjuasin sín.

28 Tjinkakonhya sín tsoxraxinkaon sín Dios ntá jehé ch'án mé kuítóhe ch'án tí jehé sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'e hya sín. 29 Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehé sín chjinóxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. 30 T'ántaxínhin sín kichó sín la ko nínkakonhen sín Dios, la ko jehó sín chrók'uetóan sín, la ko nchehnke sín, la ko jehó sín ch'éna sín nkehe jínahya tjasín chojni jie, la ko tjikosáyehya sín it'é sín la ko iné sín. 31 Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóghya kichó sín. 32 Jehé sín ó nohe sín jína kixin nkexrí k'uetóan Dios la jehé sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxá tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitqéxin ch'án tí jie tjasin chojni

¹ Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótéxinrá kjaxin kixin jahará jnkokón jie tjásinrá. ² Ó noheni kixin ntoá sinchekitoexín Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiará Dios ní? ⁴ ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxa nínkakuanhyará ch'án? A ntá jahará la kuiénxinhyará kixin Dios tjuáhará kixin tjinkaon ch'án chrókujtóherá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókujtóherá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótéxinrá tí yaon tsjixixín tió tsonoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkojnko chojni nkehe tí xrá tsíkijch'e sín. ⁷ Tsjanjon ch'án kjuachón ts'áyéhe tí sín tjeýá sín tí nkehe náxrjón la ko tí kjuachaxin ts'itjáyanyha la ko xráxin kjuich'e xrá jína. ⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhin sín kjuich'e sín tí nkehe jínahya. ⁹ Mé xikaha tsjasóte sín la ko kjuaxróxinnya tsonhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuich'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótéxin sín. ¹³ Jehya tí sín ó chrókuinhón tí ley la ó chrókótjuáxin ijé sín. Náhí. Tí sín sinchexiteyéhe sín tí nkehe k'uetqan Dios mé tsotjuáxin ijé sín. ¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuínchexiteyéhe sín éxí nixja tí ley la jehí jehó sín t'etuenhen asén sín. ¹⁵ Kixin tí kjuínchexiteyá sín ch'e sín tí nkehe jína mé tjákoxin sín kixin asén sín xraxinkakonxín sín tí nkehe ntoá la ko asén sín tjanchankíhi sín á jína tjejó sín o náhí. ¹⁶ Itsi tí yaon la Dios mé sinchekitoexín kjuachaxin Inchéni Jesucristo kaín nkehe imó kjuich'e chojni éxí nixja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kixin jahará judiorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuáqohará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá. ²⁰ Ntáchrórá kixin nohará tsjákohérá tí sín noehya la ko tsjínkítsará tí sín tienxínnya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í so chojni, a ntá jahará, ¿nkekuénté tjákoéhyará asánrá xikaha? Jahará tjákohérá chojni kixin chrókuéehya sín, a ntá jahará la, ¿nkekuénté teerá? ²² Ntáchrórá kixin xitjahya tsochóna chojni yaá chojni chjin, a ntá jahará la, ¿nkekuénté xikaha ch'erá? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuénté teerá tí nkehe tjeje síin nkaxenhen

njinko? ²³ Nchehnkerá kixin chontará tí ley, a ntá jahará chontahyará kjuasáyé Dios kixin kjuinchexiteyehyará éxi k'ueŋtoan tí ley. ²⁴ Ntoá ntáchro tí xroon itén Dios kixin: "Tí sín jehya judío la t'ántaxinhin sín Dios kixin tí ijjará."

²⁵ A ntá tí chaxín kjuinchexiteyará tí ley tsikjin ch'ín Moisés la ntá jehya chónkó tsikará xroye. A ntá tí kjuinchexiteyehyará tí ley la éxi tsikahyará ninkehó xroye. ²⁶ A ntá tí sín tsikahya xroye kjánchó titekaon sín nkexrí t'etean tí ley la tjejó sín éxi ó tsíka sín xroye kjónté chaxínhya chóna sín. ²⁷ A ntá tí nkexro kuáhya xroye tí cuerpo chóna kjánchó nchexiteyéhé tí ley, mé jehe sín tsjanchia sín jie tí jahará kixin jahará kuítekákonhyará kjónté chontará tí xroon nixja tí ley la ko kjónté ó tsikará xroye. ²⁸ A ntá tí xikaha la chaxínhya judío jahará kixin ó ntója ó chontará xroye la chaxínhya tsikará xroye kixin chrítaón cuépporá ó, chontará. ²⁹ A ntá tí chojni chaxín judío la t'ichjánxin chróchóna sín xroye nkaya asén sín. Jehya tí ley chrók'ueŋtoan xikaha chrókonhen. Náhi. Táha la Nchakuen Dios. Jehya kixin chojni chrókóxrjinhin kixin ó nchoxon. Náhi. Dios mé tsóxrjinhin kixin nchoxon tíha.

3

¹ ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye? ² Chaxín xikaha jína kixin Dios kjuanjón tí itén ch'an saoxín k'uáyéhe tí sín judío kixin chrókjunchexiteyá sín. ³ A ntá ¿nkehe tsonhen tí jnkójn tí jehe sín chrókjunchexiteyáhya sín? Kjónté xikaha chrókjuich'e sín la, ¿á chrókuítóhe Dios chrókjunchexiteyáhya ch'an tí nkehe tsintáchro ch'an? ⁴ Kjá náhi. Dios la sinchexiteyá kaín nkehe tsintáchro ch'an kjónté kaín chojni chrókjuich'ia. Ntáchro xroon itén Dios kixin:

Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie.*

⁵ Tí jie chóntani mé tjakoxin kixin Dios mé nohe nkexrí sinchekitōexin ch'an ijjé chojni. ¿A ntá nkehe chróchroni? ¿Á ntoáhya chrókjuich'e Dios kixin chrókjunchekjasóteni ní? (A ntá janhan nixja éxi nixja chojni ó.) ⁶ Kjá náhi. A ntá tí jehya ijnko nkexro jína tí jehe ch'an, ¿ntá nkexrí chrókjuinchekitōexin ch'an ijjé chojni chjasintajni?

⁷ A ntá tí chrókjuinkjtsa tí kjuach'ia kuéntana kixin chrókonoaxínra tí nkehe chaxín kuénte Dios, ¿a ntá nkekuénte ts'ékaráni jie kixin janhan mé ijnko chojni chóna jie? ⁸ Tí xikaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xikaha ichro iso chojni t'ekani jie kixin xikaha tjakoni, ichro sín. Tí sín a chrókjuasóte sín kixin xikaha ichro sín.

Kaíni chóntani jie

⁹ ¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhi? Kjá náhi. Kixin kaín ni chojni judíoni la ko tí sín jehya judío mé kaín ni kjuinchexiteyéhēni tí jie kjuasinni. ¹⁰ Ntáchro tí xroon itén Dios kixin: Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxin,

Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya, kohya ninkexró chrókjuich'e tí nkehe jína la kohya nijnko chojni.†

* 3:4 Salmo 51.4 † 3:12 3.10-12 Salmo 14.1-3, Salmo 53.1-3

13 Tí isin chojni la éxí tòyε tsíxrankehe tsíxravá chojni kíxin tí nejen chojni ch'iyaxín.

La tí veneno kuènte konche chóna ir'va chojni.‡

14 Tí ir'va chojni tsíkaón nkehe jínahya la ko kjuanínkaon.§

15 Xritinká sín kíxin tjinkaon sín chrók'óyán sín chojni.

16 Tí ntja k'uáji sín tió xíkaha kjuích'e sín mé kjuínchek'itjáyan sín kaín kjuaxróxin k'uechóna ókjé chojni.

17 Chónhya sín tí ntja tjanjon kjuaxróxin*

18 Kíxin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

19 Ó noheni kíxin kaín tí nkehe nixja tí xroon chóna tí ley mé k'uetuenhen kaín tí sín tinkáchónki tí ley kíxin ntá kaín chojni chjasintajni chrótáni sín kíxin kaín chojni tsjasóte kíxin Dios mé sinchekitqexín ijé kaín chojni. 20 Kíxin ninkexró chrókjuacha chrókótjuáxin ijé sín kíxin chrókjuinchexiteyéhe sín tí nkehe t'etqan tí ley. Tí ley la jehó ch'e xra tsoexoéinni kíxin chóntani jie.

Tsaáxinni kíxin tinkáchónkini Cristo

21 A ntá jehya tí ley chrókuaáxinni. La ntá ó kónoxín nkexrí Dios tsaáxinni la kjaxín tí xroon chóna ley la ko tí nkehe nixja tí sín profeta la ó nixja xíkaha.

22 Tsotjuáxin ijéni kíxin titekaonni Jesucristo kíxin kaín chojni chrókuaáxin tí tsitekaon sín tí jehe ch'án kíxin t'íkon ch'án kíxin jnkokón tsjehe kaín chojni.

23 Kíxin kaín xín chojni kjuasin jie la k'uáyèhya sín tí kjuachaxin chrókuaáxin sín. 24 A ntá kjuasáyé Dios kíxin k'uenyákonhenni Cristo Jesús la kótjuáxin ijéni. 25 Dios mé ichr'án ch'án Cristo, kuámá ijéni, k'uenyákonhenni ch'án kíxin chrókuínchónkini ch'án ntá chrókuaáxinni. Mé xíkaha kjuích'e Dios kíxin kjuakoxín ch'án kíxin ntoá kjuenkayáxin ch'án kíxin kónínkakhonhya ch'án kjónté nchónhya jie tsíkjasinni senó. 26 Xíkaha kónhen kjuakoxín Dios kíxin jína ch'án ijie la naḡá tjechónhen ch'án sinchetjóá ch'án ijé tí sín kuítekaon Jesús.

27 A ntá ¿nkeuèté chrókjuinchehnkeni? Xitjahya sinchehnke chojni nkayakon Dios kíxin jehya kíxin kjuínchexiteyéheni tí nkehe k'uetqan tí ley ntá chrókuaáxinni. Náhí. Kíxin Ìnchéni kuítekaonni ntá kuaáni. 28 Mé xíkaha ó noheni kíxin tsotjuáxin ijéni tí tsitekaonni Dios kíxin Dios tahya cuenta á kjuínchexiteyéheni tí nkehe k'uetqan tí ley.

29 ¿xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxín Dios mé kuènte tí sín jehya judío. 30 Kíxin kohya í jnko Dios la jehe ch'án sinchetjóá ch'án ijéni kíxin tinkáchónkini ch'an la tahya ch'an cuenta á chóntani xroye o náhí. 31 A ntá tí tinkáchónkini Ìnchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéheni tí ley.

4

Tí kjuakoxín ch'ín Abraham

1 ¿Nkehe tsixroni kíxin nkehe k'uitja ch'ín Abraham, tí nkexro k'uaxrjeníxinni ósé? 2 Ntá ch'ín Abraham tí chrókótjuáxin ijé ch'án kíxin tí xra kjuích'e ch'án ntá chrókóhnke ch'án, kjónté jehya nkayakon Dios. 3 A ntá ntáchro xroon itén Dios kíxin: "Ch'ín Abraham kuítekaon Dios ntá táhó kuaáxin ch'án la ko kótjuáxin ijé ch'án."* 4 Jnkojín chojni kjuích'e xra la jehya

‡ 3:13 Salmi 5.9, 140.3 § 3:14 Salmo 10.7 * 3:17 Isaías 59.7-8 † 3:18 Salmo 36.1 * 4:3 Génesis 15.6

k'uáyehékoá ch'án tí chichaon. Náhi. Táha la tí xṛá kjuíuch'e ch'án mé kjuacha ch'án. ⁵ A ntá kjónté jnkojín chojni kjuíuch'ehya ninkehó xṛá ntá chrókuitekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án. ⁶ Mé kjaxin tsintáchro ch'in David kixin náxrjón tí nkexro kótjóá kixin Dios kuáhya kuentá nkeri jie tsikjasin ch'án. ⁷ Ntáchro ch'in David kixin: Náxrjón tjejó tí nkexro kjuíncheyaon Dios kjónté jínahya kjuíuch'e sín la kjuakjin ch'án ijje sín.

⁸ Náxrjón tjejó tí nkexro kixin Ìnchéni kuáhya ch'án kuentá tí jie k'uéchénta sín.†

⁹ ¿Á jehó tí sín ikuá xroye la náxrjón tjejó sín o á kjaxin náxrjón tjejó tí sín chónahya xroye? Ó chrónkani kixin Dios la kuíkonóehé tí ch'in Abraham kixin kuítekaon tí jehe ch'án la táhó mé kótjuáxin ijje ch'án.‡ ¹⁰ ¿A ntá nkesá tsikjincheyaon Dios tí ch'in Abraham? ¿Á ó tsíka ch'án xroye o naxá náhi? Kjá naxá náhi. Senó tsikjincheyaon Dios tí jehe ch'án. ¹¹ Ntá chr'éxin ch'in Abraham ikuá ch'án tí xroye éxi ijnko sello kjuakoxin Dios kixin ó kótjuáxin ch'án kixin kuínkáchónki ch'án Dios. Kixin ntá xikaha ts'óna ch'in Abraham xjeen kaín chojni tinkáchónki Dios, kjónté chojni tsikahya xroye. Ntá kjaxin jehe sín la Dios sinchetjóá ijje sín. ¹² La ko jehe ch'in Abraham mé ts'axrjenixin ch'án kaín tí sín tsíka xroye kixin ntá chrókuínkáchónki sín éxi kuínkáchónki tí jehe ch'án kjónté naxá tsikahya ch'án xroye.

Tí nkehe tsintáchro Dios la tsoxiteyá kixin tinkáchónki sín tí jehe ch'án

¹³ Dios tsintáche ch'in Abraham kixin jehe ch'án la ko tí sín ts'axrjenixin ch'án ts'áyehé sín chjasintajni ts'ejó sín. A ntá tí nkehe ts'áyehé ch'in Abraham la jehya kixin kuítekaon ch'án tí ley. Náhi. Ts'áyehé ch'án tíha kixin kuítekaon ch'án Dios la ntá Dios mé kjuínchetjóá ijje ch'án. ¹⁴ A ntá tí jehó tí sín tsikjinchexiteyéhé tí ley ó chrók'uáyéhé sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsintáchro Dios la kjá ninkehó sínkíhya tí xikaha. ¹⁵ Kixin tí ley la tjikao kixin tsjasótéxin chojni, a ntá tí chrókókohya ley la chrókókohya nkehe chrókjuanchia jie.

¹⁶ Méxṛá tí nkehe tsintáchro Dios la kjuasáyé ch'án tsjanjon ch'án kixin kuínkáchónki ch'in Abraham tí jehe ch'án la ntá Dios sinchekit'onhen tíha kaín tí sín tsík'axrjenixin ch'án. Jehya jehó tí sín tinkáchónki tí ley chrók'uáyéhé sín tí nkehe tsjanjon Dios. Náhi. Kjaxin tí sín tsitekaon éxi kuítekaon ch'in Abraham mé ts'áyehé sín tíha. A ntá jehe ch'án mé k'óna ch'án it'é kaín ni.

¹⁷ Éxi nixja xroon itén Dios kixin: “Janhan kjuánjuan kjuachaxin kixin jaha ts'óna it'é nchónhya chojni chjasintajni.”§ Mé xikaha tjetsjehe Dios kixin jina kuítekaon ch'in Abraham tí jehe ch'án. Tí Dios a mé sinchexechón tí chojni tsík'en la ko t'etoan ch'án kixin ts'óna tí nkehe naxá kohya.

¹⁸ Kjónté k'uéchéntahya ch'in Abraham xjeen ch'án la kuítekaon ch'án la chónhen ch'án kixin ts'óna ch'án it'é nchónhya chojni éxi tsíchronka Dios kixin xikaha nchónhya chojni ts'axrjenixin ch'án. ¹⁹ Ch'in Abraham k'uéchénta ch'án chjina ijnko ciento nánó la kjánchó k'uitjáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda nána sín kixin naxá chróchénta sín xjeen sín. ²⁰ Ch'in Abraham la kóxakuenhya ch'án la ko chrakonhya ch'án kixin tí nkehe tsjanjon Dios. Náhi. Íchá antsi má kuínkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'in

Abraham kixin Dios ch'onta kjuachaxin sinchexiteyá kaín nkehe tsintáchro ch'án. ²² Dios k'uúkon kixin jehe ch'ín Abraham kuítekaon ch'án ntá Dios kjuínchetjóá ijíe ch'án.

²³ La jehya kixin tsík'óna tí xroon kixin tí ch'ín Abraham ó. ²⁴ Náhí. Tsíkjin sín xroon kixin kjaxin jeheni chrókótjuáxin ijíeni kixin tsitekaonni Dios. Tíhi mé tí nkexro kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kixin tí jie ch'ontani. Ntá xechón ch'án inaá kixin tsotjuáxin ijíeni kixin ó kuítekaonni tí jehe ch'án.

5

Kótuáxin tí jie ch'ontani

¹ Kótuáxin tí jie ch'ontani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo. ² Kjuasáyé Cristo kixin jína tsochjineheni Dios kixin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jína tsjinkítsa kixin jína ts'ejóni la ko tsochéheni ts'ejóchónhenni kixin ntá tsjintaxín ts'áyéheni tí kjuachaxin jie kuènte Dios. ³ Kjaxin jehya táhó. Náhí. Kjaxin tsochéheni kjónté nchónhya nkehe tsohneni kixin ó noheni kixin xíkaha tsohneni kixin ntá ts'itjani tsoínkakonyani. ⁴ A ntá tí xíkaha jína chrók'uejóni ntá tsjachani kixin jína ts'ejóchónhenni. ⁵ A ntá tí tjejóchónhenni la tósuèhyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jie ch'ontani. ⁷ Kjá ninkexró chróntáchro chrók'ueyákonhen sín í jnko chojni kjónté ijnko chojni imá jína tjuèhe kichó. Kohya nkexro xíkaha chrókjuich'e. ⁸ A ntá Dios mé kjuakoxin kixin imá tjuèheni ch'án kixin kjónté naxa ch'ontani jie la Cristo k'uenyákonhenni. ⁹ A ntá Dios mé kjuínchetjuáxin ch'án ijíeni kixin Cristo k'uenyákonhenni ch'án ntá ó noheni kixin jehe ch'án tsaáxinni ch'án kaín tí nkehe chrókjuasótéxinni. ¹⁰ Kjónté naxa k'uénínkakonyeni Dios la jehe ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxin tsaáxinni ch'án kixin tjechón ch'án la ntá ijie kjuaxróxin tjejókoni ch'án. ¹¹ La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo ch'ontaxinni kjuaxróxin tí tjen Dios.

Adán la ko Cristo

¹² Mé xíkaha ó jnko nkexro kjuasin jie ntá k'uúxin jie kuènté chjasintajni. Mé xíkaha kjuankixin k'uén chojni ntá kaín chojni kjuankixin k'uén kixin kaín sín kjuasin sín jie. ¹³ Kixin ósé la k'uékohya ley ntá ó xráxin k'uúxin jie chjasintajni kjánchó naxa kohya ley chrókjuanchia jie chrókjuasótéxín sín. ¹⁴ Desde kjuák'e ch'ín Adán hasta kjuák'e ch'ín Moisés la k'uéchóna kjuachaxin tí kjuach'én kixin tí jie kjuasin sín mé k'uénxín sín. Kjánchó tí jie kjuasin sín la yóghya tí nkehe kjuich'e ch'ín Adán, kuítekakonyaha ch'án tí nkehe k'uetóan Dios. Ntá ch'ín Adán yóhe tsotsjehe éxi tí nkexro tsi chr'éxin.

¹⁵ Ntá tí jie kjuasin ch'ín Adán la xitjahya chrókóyóhe tí nkehe tsjanjon Dios kixin tí jie kjuasin jnkokoá chojni la ntá nchónhya chojni k'uénxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni. ¹⁶ A ntá tí jie kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jie kjuankixin kjuasótéxín chojni kixin kjuasin jnkokoá chojni jie. A ntá tí tsaáxinni la

kjuasáyé Dios sinchekaáni ch'án la ko nchetjóá ch'án tí jje chóntani kjónté nchónhya jje kjuasin chojni. ¹⁷ Tí kjuach'én la k'uéchónta kjuachaxin kixin tí jje kjuankíxixín kjuasin jnkokoá chojni. A ntá kjuasáyé Dios kjuínchetjóá ch'án tí jje chóntani la ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jje kjuasin ch'ín Adán la ntá kaín chojni kjuasin sín jje chroklusótexín sín. A ntá ijie la Cristo mé kótuáxin ijie kaín chojni kixin tí jína ch'án k'uenyákonhenni ch'án. ¹⁹ Mé xíkaha kuítekakonhya jnkokoá chojni, mé Adán tíha, ntá nchónhya chojni kjuasin jje. A ntá jnkokoá nkexro jína kuítekaon kjuakoxín, mé Cristo tíha, a ntá nchónhya chojni tsaáxin tí jehe ch'án kjónté k'uéchonta sín jje.

²⁰ Ikui tí ley kuínhin sín ntá kónoxín kixin íchá antsí kjuasin sín jje. A ntá antsí k'uíxin jje la kjónté xíkaha la antsí má kuíkonóhēni Dios kixin jehe ch'án tsjinkitsani ch'án tsaáxinni. ²¹ Mé xíkaha tí jje k'uíxin k'uéchónta kjuachaxin kjuíkao kjuach'én chrók'uénxinni. A ntá kjuasáyé Dios kjaxin antsí má chóntha ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochrín kixin Inchéni Jesucristo ikui ch'án k'uenyákonhenni ch'án, tsaáxinni.

6

Ó k'uén tí jje ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jje kixin ntá Dios naxa chrókjuakoxín ch'án kixin chrókuíkonóhēni ch'án? ² Kjá náhi. A ntá jeheni la éxi chojni tsík'en chrokjuaHYa tsjasin jje. ¿A ntá nkeuente naxa chrókjuasinni jje inaá? ³ ¿Á noahyará jahará kixin tí kuíkiteni kixin tinkáchónkini Cristo la yóhe k'uénkoni ch'án? ⁴ Tí kuíkiteni la éxi yóhe xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntja nixin mé xíkaha Cristo xechónxin ch'án tí kjuachaxin jie chóntha tí It'é ch'án.

⁵ Kixin tí chaxín k'uénxinni éxi ik'uén tí jehe ch'án la ntá kjaxin tsoxechónni éxi xechón tí jehe ch'án. ⁶ Ó noheni kixin nkexrí k'uejóni senó mé táha mé k'uénxín Cristo kjuák'enkánixín ch'án ntacruz kixin ntá chrók'uitjáyaxín kaín tí jje k'uékjasinni kixin ijie í chrókjuínchexiteyēhyani tí jje. ⁷ Tí nkexro ó k'uén la ntá ó kuítóhe tí jje. ⁸ A ntá jeheni tí k'uénxinni Cristo la ó noheni kixin ts'ejókoni tí jehe ch'án. ⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án inaá kixin tí kjuach'én í chónthaya kjuachaxin kixin naxa ts'óyan tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios. ¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jje kixin ntá ijie la xixechonrá chrókjuích'eherá xra Dios kixin tinkachónkirá Cristo Jesús, mé Inchéni tíha.

¹² Méxra chrókuítóehyará kixin chrókjan tí jje chrók'uetuēhen tí cuérporá inaá kixin tí jje chrók'uetōan kixin chrókjuínchexiteyēhérá tí nkehe tjenkayáxinrá. ¹³ Tjánjonhyará tí cuérporá kixin chrók'óna nkehe chrókjuásixinrá jje. A ntá íchá jína chróchjehérá asánrá Dios éxi ijnko chojni tsík'en ó xixechón inaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kixin tí jje la í chónthaya kjuachaxin ts'etuēhen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etueñhyani tí ley? Kjá náhi. Kjuasáyé Dios tsaáxinni la kjá í chrókjuasinhvani jie. ¹⁶ Jahará ó nohará jina kixin tí sich'eheñi ijnko lámox xra la tsitekakohenni ch'án la tí xikaha la t'ichjánxin ch'eheñi xra tí lámox la t'ichjánxin sinchexiteyéheñi ch'án. Mé xikaha tónhen tí naxa sinchexiteyéheñi tí jie la táha mé ts'énxinni. A ntá tí tsitekaonni Dios la mé chrók'uejóni jnkojina. ¹⁷ Jahará la ósé k'uékjásinrá jie, a ntá ijie kjuasáyé Dios kuikonóghará ch'án kixin kaín asánrá kuítekaonrá tí nkehe xrakohará. ¹⁸ A ntá ó kuítóherá tí k'uékjinchexiteyéherá tí jie. A ntá ijie ó kjuánjonrá asánrá kixin sich'erá xra jina kuente Inchéni. ¹⁹ A ntá jie nixja éxi ijnko chojni ó kixin jahará la tiénxinyará jina tí nkehe i. A ntá xikaha tí senó kjuínchexiteyéherá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kixin chrókjuich'exínra tí xra jina éxi tjinkaon Dios kixin ntá jehe ch'án chrókjuinchetjóará ch'án.

²⁰ A ntá tí jahará tió naxa kjuínchexiteyéherá tí jie la ntá xitjahya sich'erá tí xra jina ntoá. ²¹ ¿A ntá nkehe chrókjuachará kixin xikaha kjuich'erá tí nkehe chrókósuáxinrá ó? Ntá xikaha kjuéyará tí nkehe ts'énxinrá ó. ²² Na ntá ijie ó kjuini tí nkehe k'uék'etuanhanrá k'uékjásinxínra jie. A ntá ijie ch'eherá xra Dios. Táha la tsjinkítsa kixin ts'ejojínra jina kixin ntá tsjixixín tsotjuáxinrá ts'ayéherá kjuachón jnkochríxín. ²³ A ntá tí chrókjuasinni jie la chrókjuachani kixin éxi chrók'uenni ó. A ntá tí nkehe chrókjuinchekitohenni Dios la kjuachón jnkochríxín kixin tinkáchónkini Inchéni Cristo Jesús.

7

Kjuíncheyóexin ch'ín Pablo kuente tí sín tsíkótehe

¹ Kichóni, jahará ó choxinrá tí ley la ó nohará kixin tí ley chóna kjuachaxin ts'etueñhen tí chojni naxa tjejóhón ó. ² Tíha mé ts'axrxéxín éxi ijnko chojni chjin tsíkótehe la tí xii tjan chóna kjuachaxin ts'etueñhen tjan kixin naxa tjejóhón ch'án. A ntá tió tsík'en tí xii la ntá tí tjachjin la ó kuitohe tí k'uék'etueñhen ch'án tjan. ³ A ntá tí jehe tjan chrókuakja í jnko chojni ntoa tí naxa tjejóhón xii tjan la ó chrókjuasin tjan jie. A ntá tió tsík'en xii tjan la jehe tjan la ó kuitohe tí k'uék'etueñhen ch'án tjan la jina tsotehe tjan í jnko chojni ntoa la jehya jie tíha.

⁴ Mé xikaha jahará kichó ni mé k'uenyákonhenni Cristo la ntá jahará la éxi tsík'enrá kixin í t'etuanhyará tí ley la éxi chrókuákjára í jnko xiará la mé xikaha tinkachónkirá Cristo. Cristo mé xechón ch'án inaá kixin ntá jina chrókjuich'eheñi xra Dios. ⁵ Tió naxa k'uékjasinni jie a ntá tí ley chrókjuich'e xra kixin chrókjuasinhvani jie, a ntá ichá antsí má kjuasixinni jie tí cuerpo kuénténi, la táha mé kjuixín tí ts'énxinni. ⁶ A ntá ijie la éxi yóhe ik'uéñni, a ntá tí ley chónahya kjuachaxin naxa ts'etueñhenni. A ntá ijie í kohya nkehe t'inkákonhen kixin jina sich'eheñi xra Dios kixin k'onani ijnko chojni nixín kixin tí Nchakuen Dios k'uáyéheñi. A ntá í t'etueñhyani tí ley ntaxin tsík'óna.

Tí jie naxa chonta

⁷ A ntá tí xikaha la, ¿nkehe chróchroni? Kixin tí ley la, ¿a jie táha ní? Kjá náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé. ⁸ A ntá tió kónona tí ley a ntá

tí jìe àntsí kjuacha k'uetòan. La ntá k'uúxin kaín nkehe ntáchro asenná. A ntá tí chrókohya ley la chrókónoxínhya tí jìe chrók'uenxian. ⁹ A ntá tí ósé la nonahya nkehe tí ley. A ntá tió nòna nkehe tí ley, a ntá àntsí kjuásian jìe la ntá ó nòna kixin tí jìe kjuásian me ts'énxian. ¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'énxinni. ¹¹ Ntá tí jìe mé kjuacha k'uetòan kixin sintaxiteyáhya tí ley. A ntá tí ley mé kjuanchia jìe ts'énxian.

¹² Mé xikaha tí ley la chaxin jina la ko tí nkehe t'etoan Dios la kjaxin jina.

¹³ Mé xikaha ti nkehe jina la çá táha chrók'uenxian? Kjá náhi. Tí jìe kjuásian mé ts'énxian. Mé xikaha kjuakoxin tí nkehe jìe kixin tsonoxin tí jìe kixin tí ley la jina. Mé xikaha kjuakoxin tí ley kixin tí jìe tjasin chojni mé imá jinahya tíha.

¹⁴ Ó noheni kixin tí ley la kuente Dios tíha. A ntá janhan la kjuintaxiteyáha tí ntáchro asenná kixin tí jìe kjuacha k'uetuanna. ¹⁵ A ntá tí janhan la tí nkehe jtét'a la kjaxin naxa tianxínhya kixin janhan la t'ahya tí nkehe tjinkavan chrókjuít'a, a ntá ijie mé it'a tí nkehe tóxrjínahya chrókjuít'a. ¹⁶ A ntá tí nkehe tjinkakonhya chrókjuít'a la tíha me it'a la mé xikaha tjátsoanxian kixin tí ley la jina. ¹⁷ A ntá jehya janhan it'a tíha. Náhi tí jìe chonta mé ch'e tíha. ¹⁸ Kixin janhan ó nòna kixin tí ntáchro asenná la kohya nkehe jina chrókjuít'a. Tjinkavan chrókjuintaxiteyá tí nkehe jina kjánchó tjachahya sit'a tíha. ¹⁹ T'ahya tí nkehe jina chrókjuít'a. Tí nkehe jinahya tjinkakonhya chrókjuít'a mé it'a. ²⁰ A ntá tí it'a tí nkehe jinahya tjinkakonhya chrókjuít'a la ntá jehya janhan it'a tíha. Náhi. Tí jìe chonta mé ich'e tíha.

²¹ Tónòna tíhi. Tí tjinkavan chrókjuít'a tí nkehe jina la mé íchá àntsí it'a janhan tí nkehe jinahya. ²² Kjónté xikaha la tóxrjìinna chrókjuintaxiteyáha tí ley kuente Dios. ²³ T'ikuqan kixin tí nkehe ntáchro asenná mé t'inkakonhen tí nkehe tjinkavan chrókjuít'a. A ntá tí jìe chonta mé éxi tjéchinaxian tíha.

²⁴ Nòna tí janhan. Çxá nkexro chrókjuatsen tí jìe chóna tí cuerpo kuèntana chrók'uenxian? ²⁵ Kjuasáya tjaha Dios kixin ikui Inchéni Jesucristo kuaáxinni. Mé xikaha tí janhan la it'ona tjenkayáxian kixin chrókjuintaxiteyáha Dios a ntá tí t'ona mé ntáchro asenná chrókjuintaxiteyáha tí nkehe kuente tí jìe.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jìe chrókjuasótéxin sín. Jehé sín í tjinkakonhya nchexiteyá sín xikaha ntáchro asén sín. Jehó tjinkaon sín sinchexiteyéhe sín Nchakuen Dios. ² Kixin tí nkehe t'etoan Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuente jìe chrók'uenxinni. ³ A ntá Dios kjuích'e tí nkehe kjuachahya kjuích'e tí ley kuente ch'ín Moisés kixin jeheni kjuachahyani chrókjuinchexiteyéheni tíha. A ntá Dios mé ichr'án ch'án Xjeen ch'án k'óna éxi chojni. La xra ó kui ch'án k'uenyákonhen ch'án tí ijíeni kaín ni ntihi chjasintajni la kjuatsen ch'án tí jìe chrók'uitjáyanxinni. ⁴ Mé xikaha kónhen kixin ntá jeheni jina chrókjuinchexiteyéheni tí nkehe t'etoan tí ley la chrókjuinchexiteyéhyani tí nkehe ntáchro asénni ó. Náhi. Chrókjuinchexiteyéheni tí nkehe ntáchro Nchakuen Dios.

⁵ A ntá tí sín tjinkaon nchexiteyéhe tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhe Nchakuen Dios la ntá xritjeyá sín tí nkehe kuente Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'énxin sín. A ntá tí sín tóxakonhen tí nkehe kuente

Nchakuen Dios la tsochóntaxín sín kjuachón la ko kjuaxróxin. ⁷ **A** ntá tí sín imá tóxrjínhín tí nkehe ntáchro asén sín ó la mé nínkakonhen sín Dios kixin tjínkakonyha sín la ko titekakonhya sín tí ley. ⁸ Tí sín tóxrjínhín sín tí nkehe ntáchro asén sín ó la xitjahya sinchechéhe sín Dios.

⁹ **A** ntá jahará la nchexiteyéhyará tí nkehe ntáchro asánrá. Náhi. Jahará nchexiteyéhérá Nchakuen Dios tí chaxín chontará Nchakuen Dios. **A** ntá tí nkexro chóntahya Nchakuen Cristo la í tinkáchónkihya sín Cristo. ¹⁰ **A** ntá tí Cristo tjejókoará tí jahará la tí asánrá la tjechón kixin Dios kujikonóahará, kjuínchetjóá ch'án tí ijjárá, kjánchó tí cuerpo la éxí tsík'en kixin tí jie chontará. ¹¹ **A** ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón níxin tí cuerpo kuéntará kjónté chóna jie kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyéheni, kjánchó í chrókjuenkayáxinhyani tí nkehe ntáchro asénni. ¹³ **A** ntá jahará tí chrók'uejorá éxí ntáchro asánrá la tíha la mé chrók'uénxínrá. **A** ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéhérá jahará la jehya tí nchakuen tí nkehe k'uék'etuaghánrá ósé kixin chróchrakonrá. Náhi. Ntá tí Nchakuen chóntani la k'ónaxínni xjeen Dios. **A** ntá tí Nchakuen ch'án nchexraxinkaonni tsontáchroni kixin: "Ít'éní Dios kuéntá tí jeheni." ¹⁶ Tí Nchakuen Dios tónoexín nchakuenni kixin k'ónani xjeen Dios. ¹⁷ **A** ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxí tsíntáchro ch'án ósé. Mé ts'áyékoni Cristo tí nkehe tsjanjon Dios. Tí chaxín tsjasóteni éxí Cristo kjuasóte ntá chr'éxin ts'ejókoni ch'án kjuaxróxin.

Tí kjuachaxin jie ítsi chr'éxin

¹⁸ **A** ntá ijie la tókakuenhyani kjónté nkehe ts'atsínkani tsjasótexínni kixin tíha la níneho sínkíhya kixin tíha la xitjahya tóyóhe tí nkehe ts'áyéheni chr'éxin kixin antsí má jína náxrjón tíha. ¹⁹ Tí nkehe tsík'óna tjejóchónhen kixin ts'íkon tí sín tsík'óna xjeen Dios. ²⁰ Kjónté kaín nkehe tsík'óna síin la ts'itjáyan tíha la jehya kixin xikaha tjinkaon tí nkehe tsík'óna. Náhi. Jehí xikaha tsík'etoan Dios. Ntá tjejóchónhen kaín nkehe tsík'jich'éna Dios ²¹ kixin chróchóna kjuachaxin chrók'uitjáyanhya. Ntá náxrjón ts'ixin kaín nkehe éxí náxrjón ts'ejó tí sín tsík'óna xjeen Dios. ²² Ó noheni kixin kaín tí nkehe kjuich'éna Dios la naxá tsjasóte éxí yóhe tjetéxin ijnko chojni nchekokjiji xjeen. ²³ **A** ntá jehya jehó tí nkehe tsík'óna t'íkon chojni chrókjoté. Náhi. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankíxixín kuákjani la naxá ts'áyéheni ínaá tí nkehe naxá tsjanjon Dios. Tjejótjasóteni la ko tjejóchónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naxá tjejóchónhenni tí nkehe t'íkonhyani. Tí k'uíkonni tí nkehe tjejóchónhenni ntá t'íchjánxínhya chrók'uejóchónhenni. Tí nkehe ó t'íkonni la t'íchjánxínhya chrók'uejóchónhenni naxá chrók'uíkonni ínaá. ²⁵ **A** ntá tí chónhenni tí nkehe naxá t'íkonhyani la ntá t'íchjánxín tsonínkakonyani tsochónhenni.

²⁶ Mé kjaxin xikaha tí Nchakuen Dios tjínkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxí chrónixjani. **A**

ntá tí Nchakuen Dios tjinkítsa nixjāxin ch'án tí jeheni kjónté noehyani nkexrí tsochrónóaxinni éxí tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxí tjinkaon Dios la nixjāxin ch'án tí sín tinkáchónki Dios.

²⁸ Ó noheni kixin Dios la k'uetōan kaín nkehe chrók'uaxrje jína kixin tí sín tjuèhe ch'án kixin tsikjeyá ch'án sín kixin xíkaha tjinkaon ch'án. ²⁹ Tí sín tsikjeyá Dios ósé la ntá tsik'iyehē ch'án kixin ts'óna sín éxí tí Xjeen ch'án kixin ntá tí Xjeen ch'án mé ts'etuenhen nchónhya tí sín kíchó ch'án. ³⁰ Mé xíkaha tí sín tsikjeyá Dios ósé mé kjāxin k'uíyehē ch'án sín la ko tí sín k'uíyehē ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochóna sín.

³¹ ¿Á ntá nkehe chróchroni tí xíkaha? Tí Dios tjuèhe tí jeheni, ¿á ntá nkexro chrókjuacha chrókónkakenhen tí jeheni? ³² Kixin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án. ³³ ¿Nkexro chrókjuacha chrókjuanchia jje chrókónkakenhen tí sín kjueyá Dios? Kixin Dios la ó kjuínchetjóá ijíé tí sín a. ³⁴ ¿Nkexro chrókjuínchekjasóte tí jehe sín? Kixin Cristo la ó k'uenyákonhen sín la kjāxin xechón ch'án inaá la itjen ch'án tí tja chjina Dios tjen nkaya nkajní la tjechronò ch'án kixin kaín tí jeheni. ³⁵ ¿Xá nkexro chrókjuakitsjeheni tí tjuèheni Cristo? Kjónté ichrén nkehe chrókónhenni la ko chrókónkakenhen chojni tí jeheni la ko kjónté chrók'uenxínni kjinta la ko chróchóntahyani ikéni o kjónté tí kjuaxikaon chrók'uenxínni la chrókuítōehya ch'án tí jeheni. ³⁶ Éxí ntáchro xroon itén Dios kixin: Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxí t'óyán sín kolélo tí matanza.*

³⁷ Kaín tíha la ańtsí chrókjuachaxínni kixin kjuachaxién tí nkexro tjuèheni.

³⁸ Ó noheni kixin ninkehó nkehe tsjachahya tsakitsjeheni tí tjuèheni Dios. Kjónté tí its'enni, o kjónté tí tjejóchónni, o kjónté tí sín ángel, o tí kjuachaxién tí jímahya, o kjónté tí nkehe sítonhen ijie, o tí nkehe tsonhen chr'éxin, ³⁹ o kjónté tí nkehe síin nkaya nkajní, o tí nkehe imá njinka síin chjasintajni, o íjńko nkehe kjuích'éna Dios. Mé kohya nijńko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kixin k'uenyákonhenni Închéni Jesucristo.

9

Dios kjueyá tí sín Israel

¹ Ntoá xrjanka kixin nanhan ijńko chojni tinkáchónki Cristo la t'ayahya. Tí nkehe tjenkayáxin la Nchakuen Dios nchexraxinkaonna kixin chaxín. ² Imá t'ává asenná la ko náxrjónhya tjen ³ kixin tjńkavan kjónté chrók'uitjáyaxinnna tí tinkáchónkia Cristo kixin ntá jína chrókuinkáchónki Cristo tí sín kíchíná naxa kjéhyana. ⁴ Jehe sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxién ch'án la kjāxin k'uáyéhe sín tí nkehe k'uetōan Dios la ko tí ley tsíkjin ch'ín Moisés la ko k'uáyéhe sín kjuachaxin ts'etōan sín kixin nkehe tí xra tsonhen nkaxenhen njńko la ko k'uáyéhe sín tí nkehe tsintáchro Dios. ⁵ Tsík'axrjeníxin sín tí sín tsík'axrjeníxinni ósé la kjāxin Cristo tsík'axrjeníxin tí sín israelita tíó k'óna ch'án chojni. Jehe ch'án mé Dios kuènte kaín nkehe la tinkáchónkini ch'án jńkochrín. Amén.

* 8:36 Salmo 44.22

6 **A** ntá tí nkehe chrókuakja tí sín Israel kjuanjon Dios la jehya kixin chróxiteyáhya tíha. Náhi. Kixin jehya kaín tí sín tsík'axrjenixin tí sín israelita mé chrók'óna sín chojni chjasin Israel. 7 Kixin kénhya tí sín k'uaxrjenixin ch'ín Abraham chrók'óna xjeen ch'án. Dios mé tsintáche ch'ín Abraham kixin: "Tí sín ts'óna kjéhya jaha mé ts'axrjenixin sín ti ch'ín Isaac."* 8 Tíhi mé tienxinni kixin ninkexró xitjahya ts'óna xjeen Dios kixin tí tsík'axrjenixin sín chojni ó. Náhi. Jehó tí sín tinkáchónki tí nkehe tsíchenka Dios tí ch'ín Abraham mé jehé sín mé chaxín tsík'axrjenixin sín ch'án. 9 Tí nkehe tsíchenka Dios tí ch'ín Abraham mé tíhi: "Itsi ijnko yaon mé tjan Sara sich'éna tjan ijnko xjan."†

10 **A** ntá jehya táhó. Náhi. Kjaxin tí yaá chánjan tsíkjich'éna tjan Rebeca mé chónta jnkokqá it'é xjan mé it'in Isaac, mé tsík'axrjenixinni ch'án. 11 **A** ntá tí xjan la naxá kokjéhya xjan la ninkehó nkehe jína ó jínahya kjuích'e xjan. Ntá kjuakoxin Dios kixin chóna ch'án kjuachaxin éxi tsíkjenkayáxin ch'án tsjeyá ch'án nkexro ts'iyehé ch'án la tahya ch'án kuentá nkehe tí xra kjuích'e sín. 12 Ntá kjónté la ntá chenka ch'án tí tjan Rebeca kixin: "Tí ch'ín saó mé sich'ehe xra tí ch'ín tsoyo."‡ 13 Mé kjaxin xikaha ichro xroon itén Dios kixin: "Tjuahá Jacob, a ntá Esaú la náhi."§

14 ¿A ntá nkehe chróchroni? ¿Á ntoáhya tjenkayáxin Dios? Kjá náhi. 15 Kixin tsintáche Dios tí ch'ín Moisés kixin: "Tsojtuahá tí nkexro tjínkavan tsojtuahá la ko tsíkonógha tí nkexro tjínkavan tsíkonógha."* 16 Jehya éxi tjinkaon chojni ó jehya kixin tí nkehe ch'e chojni. Náhi. Ó jehi Dios tsíkíkonóghé ti jehé sín. 17 Tí ntácho xroon itén Dios mé nixjehé Dios tí ch'ín rey Egipto kixin: "Kjuánjuan kjuachaxin kixin jaha k'óna rey kixin tjínkavan chrókjuakoxian kjuachaxin kuéntana kixin ntá kuéntaj chjasintajni chrókónohe la chrókuitekaon tí njina."† 18 Mé xikaha tí tjinkaon Dios tsíkonóghé ch'án chojni la tsíkonóghé ch'án, a ntá tí nkexro tjinkakonhya ch'án tsíkonóghé ch'án la tsíkonóghya ch'án.

19 **A** ntá tsontáchorá kixin: "**A** ntá tí xikaha la, ¿nkekuénté t'eka Dios chojni jie? ¿Nkexro chrókjuacha chrókjuanjonko tí nkehe t'etqan Dios?" 20 ¿Xá nkexro tí jahará kixin chróntácherá Dios xikaha? ¿Á ti chí tsík'óna nchetje chróntáche tí inché chí kixin: "¿Nkekuénté xikaha kjuích'énaní?" chróchro. 21 **A** ntá kjaxin tí nkexro ch'éna chí mé chóna kjuachaxin tjinkaon sich'éna ch'án tí nkehe tóxrjínjin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón ó tjinkaon ch'án sich'éna ch'án nkehe náxrjónhya.

22 Tjinkaon Dios chrókjuakoxin ch'án tí kjuachaxin kuénte ch'án chrókjuinчекjasóte ch'án chojni la kjónté xikaha kónhen la kjuacha ch'án kónínkakonhya ch'án la kujíkonóghé ch'án tí sín chrókjuinчекjasóte ch'án kixin chrókjuinчек'itjáyán ch'án sín. 23 Mé xikaha kjuích'e ch'án kjuakoxin ch'án tí kjuachaxin imá jie chóna ch'án kixin jehé ch'án kujíkonógheni ch'án kixin xikaha tsíkjenkayáxin ch'án ósé kixin náxrjón chrók'uejókoni tí jehé ch'án. 24 Mé xikaha Dios tsíkjeýá ch'án iso tí sín judío la ko iso tí sín jehya judío. 25 Mé xikaha ntácho tí xroon tsíkjin ch'ín Oseas kixin:

Tí sín jehya chjasenná la mé sintak'ian chjasenná.

La tí sín k'uétjuahya mé tsojtuahá sín ijie.‡

26 Tí chjasin ntiha tsintácho ch'án kixin: "Jahará jehya chjasenná",

a ntá ijie sintak'ian xjeen Dios tjechón.§

* 9:7 Génesis 21.12 † 9:9 Génesis 18.10 ‡ 9:12 Génesis 25.23 § 9:13 Malaquías 1.2-3 * 9:15 Éxodo 33.19 † 9:17 Éxodo 9.16 ‡ 9:25 Oseas 2.23 § 9:26 Oseas 1.10

Mé xikaha ichro itén Dios. ²⁷ Kjaxin nixja ch'ín Isaías kuènte tí sín israelita tsintáchro ch'án kixin: “Nchónhya chojni ts'axrjenixin tí sín Israel éxi tí nchónhya nchesen siín ntayaon kjánchó tsjéhya tí jehe sín tsjacha sín tsaá sín.

²⁸ Ntá tjoka tsonhen tí nkehe tsintáchro Ìnchéni sinchexiteyá ch'án.”* ²⁹ Ntá kjaxin ch'ín Isaías tsintáchro ch'án ósé kixin:

Tí Ìnchéni chóntha kaín kjuachaxin kuitgehya chrók'uitjáyan kaín tí sín k'uaxrjenixin Israel éxi k'uitjáyan tí sín chjasin Sodoma la ko Gomorra.†

Tí sín judío la ko tí tan jina

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijíé sín ntá kjónté la k'uitja sín kixin tsotjóá ijíé sín kixin tinkáchónki sín Cristo.

³¹ A ntá tí sín israelita chrókjuinchexiteyéhé sín ley kixin chrókótjuáxin ijíé sín kjánchó kjuachahya sín kjuínchexiteyéhé sín tíha. ³² ¿A ntá nkekuènté kixin xikaha k'uitjahya sín nkexrí chrókuinkáchónki sín Dios? Kixin kjueyáhya sín nkexrí chrókjuinchetjóá ch'án ijíé sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín. ³³ Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjo ts'ánótjenxin sín.

A ntá tí sín chrókuitekaon tí jehe la chrókósuèhya sín.‡

10

¹ Kichóni, kaín asenná nixjaha Dios kixin tjínkavan kixin tí sín israelita chrókuaá sín. ² Janhan ntáxrjan kixin tí sín israelita imá tjínkaon sín chrókjuich'ehe sín xra Dios kjánchó chaxínhya kixin jehe sín la tienxínhya sín.

³ Kjaxin noehya sín kixin nkexrí chrókjuinchetjóá Dios tí ijíé sín. A ntá jehó sín xritjeyá sín nkexrí chrókótjóá sín la tjínkakonhya sín chrókjuinchexiteyéhé sín Dios. ⁴ A ntá Cristo mé kjuínchexiteyá kaín nixja tí ley. A ntá ijíé kaín tí sín kuitekaon tí jehe ch'án mé sinchetjóá ch'án ijíé sín.

⁵ A ntá tí chrókótjóá ijíé sín kixin tí ley la ch'ín Moisés mé tsíkjin ch'án xikihi: “Tí nkexro chrókjuinchexiteyéhé kaín tí ley la táhó chrókuaáxin sín.”* ⁶ A ntá tí chrókjuinchetjóá Dios tí ijíéni kixin tí tinkáchónkini ch'án ó mé ntáchro xikihi: “Ntáchrohyará kixin, ¿Xá nkexro sáchrókjuj nkaya nkajní? (Tí xikaha la t'axrjexín kixin naxa chrókui Cristo.) ⁷ La ko ntáchrohyará kixin: ¿Xá nkexro chrók'uinkajin tí imá njinka?” (Mé t'axrjexín tíha kixin chrókjuikakjín sín Cristo chrók'uaxrjetaón ch'án kixin itjen ch'án tí siín tí sín tsík'en, ichro sín.) ⁸ ¿A ntá nkehe ichro? Ntáchro kixin: “Itén Dios la chjinaxón tjen tí tjejorá kixin ó nohará la ko xraxínkaon asánra.”† Tí tan a mé tí nkehe tinkáchónkini kjuakoni. ⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá. ¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡ ¹² Dios la t'ikon jnkokón tsjehe kaín chojni á tí sín judío ó á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáchro

¹¹ Ntáchro xroon itén Dios kixin: “A ntá tí sín chrókuitekaon tí jehe ch'án la chrókósuèhya sín.”‡ ¹² Dios la t'ikon jnkokón tsjehe kaín chojni á tí sín judío ó á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. ¹³ Mé xikaha ntáchro

* **9:28** Isaías 10.22-23 † **9:29** Isaías 1.9 ‡ **9:33** Salmo 118.22 * **10:5** Levítico 18.5 † **10:8** Deuteronomio 30.12-14 ‡ **10:11** Isaías 28.16

xroon itén Dios kixin: “Kaín tí sín tjanchaxín nkehe ihñié Ìnchéni la tsaá sín.”[§] 14 ¿A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuitekakohya sín ch'án? ¿A ntá nkexrí chrókuitekaon sín tí jehe ch'án tí naxa kuíenya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakohé sín tí itan a? 15 ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: “Náxrjón tí sín xrichronka itan jína.”*

16 Kjánchó kénhya sín titekaon sín tí itan tsaáxinni. Tsíntáchro ch'ín Isaías kixin: “Ìnchéni ¿xá nkexro ó kuitekaon tí tan xrichronkani?”† 17 Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿Á kuíenya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni.”‡

19 Ntá tjánchánkía inaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuèntana la tsoninkákonhénra sín

kixin injko chjasin tjinkakohya tsinhin la tsoninkákonhénra sín.[§]

20 Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

21 La ko nixja ch'ín Isaías kuènte tí sín israelita kixin: “Kuenté yaon k'uíyaha injko chjasin siín chojni titekakahya sín la ko jiehe sín.”†

11

Tí sín Israel tsíkjeyá Dios

1 A ntá ijie tjánchánkía kixin: ¿Dios la á kuitóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín. 2 Kixin ósé tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehé ch'án Dios tjanchia ch'án jie kuènte tí sín Israel? Mé ntáchro xikihi: 3 “Ìnchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuitóheni tjechónni la tjinkaon sín kjaxin chrók'óyán sín tí jeheni.”* 4 A ntá Dios kjuátehe ch'án kixin: “Naxa kuitóhe yato mil chojni kuitekaon sín tí janhan kjuixienhya sín toh'ín sín tí nkehe tsíkjanoya Baal.”†

5 Ntá kjaxin xikaha ijie naxa kuitóhe iso tí sín naxa tinkáchónki Dios. Kjuasáyé Dios kixin kuikonóhehe ch'án tí sín la tsíkjeyá ch'án kixin tsaá iso tí jehe sín.

6 Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaxin sín la jehya kjuasáyé Dios tí xikaha.

7 A ntá tí xikaha la, ¿nkexrí? Tí sín israelita la k'uitjaha sín tí nkehe xritjeyá sín. A ntá tí sín kjueyá Dios la k'uitja sín. A ntá tí sín í so a la icha asén sín la kuitekakohya sín. 8 Éxí ntáchro xroon itén Dios kixin: “Dios kjuanjonha

§ 10:13 Joel 2.32 * 10:15 Isaías 53.1 † 10:16 Isaías 53.1 ‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10, 14 † 11:4 1 Reyes 19.18

kjuachaxin chrókiénxín tí sín a la ko mé kjaxin xikaha naxa sítónhen tí yaon ijie. La kjuanjónhya ch'án kjuachaxin kixin chrók'uikon sín la ko chrókiénxín sín.* 9 Kjaxin tsintáχρο ch'in David kixin:

Tí kia tjasin sín mé tjasixín sín jie,
tsjasótexin sín.

10 Tí ikon sín ts'ikonxínhya sín kixin ts'óna sín ntakótán
ntá tí jie kuente sín mé jnkochrixin yamá sín. §

Tsaá tí sín jehya sín judío

11 A ntá ijie tjánchánkiá: Tí sín judío la tí kjuasin sín jie la zá ó naá kuítexón Dios tí jehe sín? Kjá náhi. Tió kuítেকаконhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. 12 A ntá tí jie kjuasin tí sín judío, a ntá kuítөhe Dios tí jehe sín, a ntá tí sín jehya judío antsi k'uitja sín nkexrí tsinkáchónki sín Dios. A ntá tí nkehe ntoáhya kjuich'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsi má náxrjón tíha.

13 Chonta iso nkehe chrókuinhínrá jahará jehya judíora kixin Dios mé chr'ánna kixin tsjakohá tí sín jehya judío la antsi tjetöan tí xra kuente Ìnchéni chrókjuít'a. 14 Tjínkavan kixin tí sín chjasenná chrókóchjínqóxínhin sín kixin jahará tinkachónkirá Dios kixin ntá chrókjuacha chrókuaá iso tí jehe sín. 15 Kuítөhe Dios tí sín judío, a ntá iso tí sín jehya judío antsi k'uitja sín tí kjuaxróxin kuente Dios. A ntá tí chrókuitekaon tí sín judío kjaxin la yöhe éxi chróxechón chojni tsík'en tí jehe sín. 16 Tí chrókjuinchetjóá Dios tí niqtja xrankixixín chrók'óna tí ich'o la ntá kuente tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé ijnko nta la kjaxin kain tí chaon tí nta chrókjuinchetjóá ch'án.

17 Ntá isó tí sín judío la éxi iso chaon tí nta olivo mé xikaha tsíchrinjin la ntá jahará la éxi ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jina xráxin tjechón. 18 Ntáχροhyará kixin tí chaon tí nta la antsi jina. Íchá jina tsontáχροrá kixin jehya tí nta t'etuñhen tí nuèé nta. Náhi. Tí nuèé mé tsjinkitsa tí nta mé xikaha tí jahará.

19 Ntá jahará tsontáχροrá kixin: “A ntá tí chaon tí nta la tsíchrinjin kixin ntá jeheni tsitoheni lüké tí nta chaon tsíchrinjin”. 20 Tíha la chaxín. Kjánchó chrínjin kixin kuítেকаконhya Dios. A ntá jahará la tjejora ntíha kixin tinkachónkirá Dios. A ntá chrokjuinchehnkehyará. Íchá jina chróchrakonrá. 21 Kixin Dios la kujikonóehya ch'án tí nta chaon kuente tí nta tronco la ntá mé xikaha kjaxin tí jahará la tsikonóahyará ch'án. 22 Tsjehérá kixin Dios la imá jina kjánchó kjaxin sinchekjasóte ch'án tí sín titekakonhya. A ntá jina ch'án la kjuinkitsa ch'án tí jahará. Kjánchó chrók'uejora jnkójina éxi tjínkaon tí jehe ch'án. A ntá tí náhi la chaxín jahará la tsitohará ch'án. 23 A ntá tí sín judío tsitөhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehe ch'án la imá chóna ch'án kjuachaxin kixin xikaha sich'e ch'án. 24 A ntá jahará jehya judíora mé tsíkóchrínjinrá ch'án nta olivo nteje. A ntá antsi má xra tsotséxin tí nta olivo

jína. A ntá tí sín judío la nta chaon kuènte tí tronco nta olivo jína la antsi xrahya tsjatsuenhen tsotséxin kichó inaá kixin ó nta chaon kuènte.

Tí tsjixixín ntá tsaáxin tí sín Israel

²⁵ Kichóni, tjínkavan tsonohará tí nkehe jehó Dios nohe kixin sinchehnkehyará jahorá kixin ó nohará. Mé tí sín Israel tsitekakonhya sín hasta ts'ixenjian kain tí sín jehya judío tsitekaon. ²⁶ Tió xikaha tsonhen ntá kain tí sín Israel tsaá sín kixin tí xroon itén Dios ntáchro kixin: Tí nkexro sinchekaáni mé tsixín ch'án chjasin Jerusalén la tsjatsen ch'án tí jie kuènte tí sín tsík'axrjenixin ch'ín Jacob.

²⁷ Tíhi mé kjuachaxin nixin kuèntana ts'áyéhe tí jehe sín kixin janhan mé kjuatsìyan ijie sín.*

²⁸ Xikaha kixin tí tan nixin tsaáxinni ntá tí sín judío mé tsoninkakonhen sín Dios kixin ntá jahará ts'ayéherá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsík'ayá ch'án tí sín tsík'axrjenixin tí jehe sín. ²⁹ Kixin tí kain nkehe kjuanjon Dios la tsakitsjehya ch'án la ko tsítogehya ch'án tí sín tsík'iyéhe ch'án. ³⁰ Senó la jahará k'uékitekákonhyará Dios a ntá ijie la tí sín judío titekakonhya sín. A ntá jahará la kjónté la kuikonóghará Dios. ³¹ Mé xikaha jehe sín kuitekakonhya sín Dios la ntá kjónté xikaha la jehe ch'án tsikonóehé tí jehe sín éxi kuikonóghará ch'án. ³² Kixin Dios la kuítóhe ch'án kain chojni kixin chrókjuasin sín jie kixin ntá tsjakoxin ch'án tí kjuachaxin kuènte ch'án kixin sinchetjóá ch'án kain sín kjónté chojni chóna jie.

³³ A ntá tí kjuachaxin kuènte Dios la imá jie la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. ³⁴ Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkitsa chrókjuakohe tí jehe ch'án? ³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?”† ³⁶ Kixin kain nkehe la tixín tí tjen Dios kixin kain nkehe la kjuich'ena ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kixin sinchetjóá ch'án

¹ Mé xikaha kichó ni, xrjanóghará kixin Dios ó kuikonóghará ch'án ntá jahará chróchjehérá cuérporá Dios éxi ijnko nkehe tjechón kixin jehe ch'án ó kjuíntatjóará ch'án la mé xikaha chrókóxrjínhin ch'án. Tíhi mé ijnko nkehe ntoá t'ichjánxin chróchjeheni ch'án. ² Chrokóxrjánhyará tí nkehe síin chjasintajni. Náhí. Chróónixin tí nkehe tjenkayáxinrá kixin jína chrókjuenkayáxinrá. Xikaha ntá chróknohará kixin nkexrí tjinkaon Dios kixin ntoá chrók'uejorá éxi tóxrjínhin ch'án.

³ Kjuasáyé Dios kjuanjon ch'án tí xra tjet'aha ch'án. Mé xikaha nixahará kain rá kixin chrókjuenkayáxinhyará kixin imá tjetoaná. Náhí. Chrókjuenkayáxinrá jína éxi tí kjuachaxin tjáhará Dios éxi nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokoá cuerpo kuènte Cristo. Mé xikaha jnkokoá chrókjuenkayáxinni kixin ó k'ónani jnkokoá cuerpo.

* 11:27 Salmo 14.7, Isaías 59.20 † 11:35 Isaías 40.13-14

⁶ Dios kjuanjon nchónhya clase xra éxi tjinkaon ch'án chróchjéhe ch'án jnkoinko chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuènte ch'án ntá t'ichjánxin sich'eni tí xra éxi titekaonni ch'án. ⁷ A ntá tí kjuanjon ch'án xra tsjinkitsani í jnko nkexro ntá t'ichjánxin jína sich'eni tí xra a. A ntá tí nkexro tsik'áyéhe kjuachaxin tsjako la t'ichjánxin jehó tí xra a chrókuako. ⁸ Tí nkexro tsik'áyéhe kjuachaxin nchexraxinkaon í jnko nkexro la kaín asén chrókuich'e ch'án tí xra a. A ntá tí nkexro tsjanjon ichrén nkehe la chrókójiehya chrókuanjon ch'án. A ntá tí nkexro t'etöan la jína chrókuich'e ch'án xra la ko tí nkexro chrókuinkitsa tí sín chóntahya la kjuaxróxin chrókuinkitsa sín.

Tí nkehe chrókuich'e tí sín tinkáchónki Cristo

⁹ Kaín asánrá chrótuèherá kichuárá. Chrókuitoherá tí nkehe jínahya tjenkayáxinrá la chrókuenkayáxinrá tí nkehe jína. ¹⁰ Chrótuèherá kichuárá la ko chaxín chrókuikosáyehérá kichuárá.

¹¹ Chrókósáhyará la chrókuich'eherá Ìnchéni xra kaín asánrá.

¹² Chrókócháhará kixin tjejóchonhérrá la chrókóninkákonhyará kjónté chrókjuasótiará. Chrókuitoéhyará chrónixjehérá Dios.

¹³ Chrókuinkitsará tí sín tinkáchónki Ìnchéni tí chóntahya sín nkehe sine sín. Chjehérá kjuachaxin ts'ejó tí sín tsjijnixjahará sín.

¹⁴ Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkitsa tí jehe sín la jehya kixin chrókóninkákonhérrá sín.

¹⁵ Tócháhákoará tí sín tjejóchéhe sín la ko tí tjejótsjánka sín la koirá chrótsjankará.

¹⁶ Kjuaxróxin chrók'uejorá. Chrókuinchehnkehyará. Náhi. Chrókóyóhará éxi tí sín nòa. Chrókuinchehnkehyará kixin nohará.

¹⁷ Chrókuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuákoxinrá nkehe jína kixin chrók'uikon kaín chojni.

¹⁸ Chrókuéyará jnkójina chrók'uejorá. Exi nkexrí chrókuachará la kjuaxróxin chrók'uejorá kaín rá. ¹⁹ Tjuahará kichó ni, la chrókuinchekjásótehyará jahórá tí sín ichrén nkehe kjuít'ahará. Náhi. Tjtoherá kixin Dios sinchekjasóte tí sín a. Ntáchro xroon itén Dios kixin: "Ixra kuèntana sjintakitoxián tíha. Janhan tsjénkaha tí sín a, ichro Ìnchéni."* ²⁰ Kjaxin ntáchro xroon itén Dios kixin: "Tí sín nínkakonhan t'énxin sín kjinta la chróchjehé sín nkehe chrókjóné sín la tí t'énxin sín ntá la kjaxin chróchjehé sín nkehe chrók'ui sín. Mé xikaha chrókuich'e kixin chrókósuèhe sín kixin tí nkehe kjuich'e sín."† ²¹ Chrókuitoéhyará kixin chrókuacha tí nkehe jínahya chrók'uetuñhanrá. Náhi. Chrókuich'erá tí nkehe jína kixin chrókuachahya tí nkehe jínahya chrók'uetöan.

13

¹ Kaín chojni t'ichjánxin sinchexiteyéhe sín tí gobiernó kixin tí kjuachaxin chóna sín la Dios tsjkanjon kixin kohya nijnko gobiernó chrók'uejó tí jehya kjuachaxién Dios. ² Mé xikaha tí sín tjanjonko tí sín t'etöan la kjaxin nínkakonhen sín tí nkehe k'uetöan Dios. A ntá tí sín xikaha ch'e la mé jehe sín tjeýá sín jie tsjasótexin sín. ³ A ntá tí sín gobiernó t'etöan la sinchekjasótehya sín tí nkexro titekaon ch'e nkehe jína. Náhi. Tsónínakonhen sín

* 12:19 Deuteronomio 32.35 † 12:20 Proverbios 25.21-22

tí nkeexo ch'e tí jínahya. Tí tjínkáonrá tsonínkakuanhyará sín la chrók'uejorá jnkojína. Chrókjuínchexiteyéhérá sín kixin chrókónínkakuanhyará sín. ⁴ Kixin Dios k'uetóan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchrakonrá kixin jehya chónkó tjejó tí gobierno. Náhí. Chóna sín kjuachaxin sinchekjasótiará sín kixin jehe sín la Dios k'uetóan tjejó sín tí xra a kixin sinchekjasóte sín tí sín jínahya tjenkayáxin. ⁵ Mé xíkaha t'ichjánxin sinchexiteyéhérá tí gobierno la jehya jehi kixin chrókjuínchekjasótiyahará sín. Náhí. Ó jehi jahará chróxráxinkáonrá kixin t'ichjánxin sinchexiteyéhérá sín. ⁶ La kjaxin jehya táhó. Náhí. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókjuenkehérá kaín chojni tjasikéhérá. Tí nkeexo síká kuènte xra la chrókjuenka sín kuènte tí xra, la tí nkeexo síká ichrén nkehe nchekji ntá tíha kjaxin chrókjuenka sín, la kjaxin chrókjuikosáyeherá tí sín t'etóan. ⁸ Kjaxin chrókjuasikéhyará ninkexró. T'ichjánxin chrórtjuèherá kichuára kixin tí nkeexo tjuèhe kichó la mé xíkaha kjuínchexiteyá tí nkehe k'uetóan tí ley. ⁹ Kixin ntáchro tí mandamiento kixin: "Tjakéhya asánrá í jnko chojni chjin la ko t'oyánhyará kichuára la ko tjehyará la nixjahyará kjuach'ia kuènte í jnko chojni. La ko tjaké hya asánrá nkehe ókjé."* Kaín tíha la ko í so nkehe t'etóan Dios mé tienxínni t'axrxéxin kixin: "Chrórtjuèheni kichó ní éxí tjuèxin asénni." ¹⁰ Tí chojni tjuèhe kichó la ninkehó nkehe jínahya sich'ehe kichó. Mé xíkaha chrórtjuèhe kichuára la mé xíkaha mé chróxiteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejósjeheni chrók'uajuahyani. Tí nkeexo tsaáxinni la í séhya itsi ch'án ijie, a ntá tí kjuankixinni kuítakaonni itén ch'án la ísé tsjxin ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkitsa ts'ajini tí t'inkáséyan, éxí ijnko soldado t'inkáyate ch'án ka tsík'óna chica kixin kohya nkehe tsonhen ch'án. ¹³ Chrók'uejóni jnkojína éxí nkeexí chrók'uajini chaxín ntoá tí t'inkáséyan a. Chrókjuasinhyani kia chrókjuanjónxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjueyáhyani kjuaníkaon la ko chrókóchjinqxíenhyani. ¹⁴ A ntá jahará tákjára tí kjuachaxin kuènte Ìnchéni Jesucristo tsjinkitsará la tíha mé éxí chrók'uínkayára nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

14

Tjóntahyará kichuára

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjóntahyará ch'án kjónté kánhyó nohe ch'án. ² A ntá iso sín chaxín nohe sín la tjínkaon sín chrókjóne sín kaín nkehe. A ntá tí sín kánhyó tinkáchónki sín Ìnchéni ntá tjínkaon sín chrókjónehya sín nto, ntá kayoa ó chrókjóne sín. ³ Tí nkeexo chrókjóne kaín nkehe chrókjoníehya tí nkeexo tjínkaon chrókjónehya nkehe. A ntá tí sín chrókjónehya nkehe chrókjóntahya sín tí sín chrókjóne sín kaín nkehe kixin kjónté xíkaha la Dios tsakja tí jehe sín.

* 13:9 Éxodo 20.13-15, 17; Deuteronomio 5.17-19, 21; Levítico 19.18

4 ¿Xá nkexro jaha kixin chrókjóna tí nkexro ch'ehe xra í jnko nkexro? Tíha la xra kuènte tí lámqé ch'án tsonáchro á jina kjuích'e ch'án xra o náhi. 5 Ntá kjá tsjak'e ch'án jina kixin Ìnchéni chóna ch'án kjuachaxin tsjinkitsa ch'án tsjak'e tí ch'in a jina.

5 Iso sín tjenkayáxin sín kixin imá tjetoan ijnko yaon a ntá í jnko yaon la náhi. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. 6 Tí sín xraxinkaon tí yaon la tjikosáyehé sín Ìnchéni la kjaxin tí sín tinkáchónkiha sín xikaha la tjikosáyehé sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehé sín Ìnchéni la kjaxin tjanchehe sín kjuasáyé Dios. 7 Ntá kjaxin tí sín nehya kaín nkehe la xikaha mé tjikosáyehé sín Ìnchéni la kjaxin tjanchehe sín kjuasáyé Dios.

7 Nijnko tí jeheni tjejóni kixin jehóni chrók'ueñoanni la ko jehya jehí chrók'uenni. 8 Tí tjejóni la tjejóni kixin sich'eheeni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóhónni o kjónté chrók'uenni la kuènte ch'án tí jeheni. 9 Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnché tí sín tsík'en la ko tí sín tjejóhón.

10 Ntá jahará la, ¿nkekuènte tjóntará tí kichuára o nkekuènte chontehyará kaín sín kjuasáya? Kixin kaín ni tsochjinani tí tjen Dios kixin tsonáchro ch'án á jina xra kjuích'eni o náhi. 11 Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjen la ts'ejóxin toch'in kaín chojni

kixin kaín chojni la tsjanchia sín kjuasáya kixin janhan mé Dios kuènte sín.*

12 Mé xikaha jnkojnkoní chrókónoheni kixin tsochenkani Dios nkexri kjuích'eni.

Tjachruehyará kichuára

13 Méxra chrókjónthayará kichuára. Íchá jina kixin ninkehó nkehe chrókjuích'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xikaha chrók'uitjáyaxín tí tinkáchónki sín Ìnchéni.

14 Janhan tinkáchónkia Ìnchéni Jesús la ntá xikaha ó nóna kixin kohya ninkehó nkehe jehí tjuáhya. 15 Ntá ijnko nkexro tjenkayáxin kixin jehya nkehe jina tíha ntá chaxín tjuáhya tí nkehe kixin xikaha tjenkayáxin ch'án. 15 Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuèhya tí kichuá. Kixin jehya tí nkehe chrókjóna ó chrókjuínchek'itjáyaxián tí kichuá kixin Cristo k'uenyákonhen ch'án kjaxin. 16 Chrókjuích'ehyará nkehe jínahya kixin ntá xikaha chrók'uántaxínhin sín tí nkehe jina tinkáchónkirá. 17 Kixin tí kjuachaxièn Dios la jehya tí nkehe chrokjóneni o tí nkehe chrok'uini. Náhi. Tí tjen tí kjuachaxièn Dios la chrók'uejóni jnkojina la ko kjuaxróxin chrók'uejóni la ko chrókchéhèni kixin chóntani Nchakuen Dios. 18 Tí nkexro ch'ehe Cristo xra mé chrókjuíncheké Dios la ko chrókjuíncheké chojni.

19 Mé xikaha chrókjuéyáni kaín tí nkehe tjikao kjuaxróxin kixin ntá tsjinkitsani tí sín kichó ni kixin ntá kjaxin sín antsí chrókuínkáhónki sín Ìnchéni. 20 Chrókjuínchek'itjáyaxián tí xra kuènte Dios kixin tí nkehe chrókjóna ó kixin kaín nkehe chrókjóna ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyaxín tí nkehe

* 14:11 Isaías 45.23

tinkáchónki sín. ²¹ Ntá íchá jína chrókjóntehyará into la ko chrók'uihyará vino la ko ninkehó nkehe chrókjuich'ehyará tí xíkaha chrókjuasixín jie kíchuará. ²² Tí nkehe tinkachónkirá la jahorá chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixínhya ch'án jie tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kixin tsjasixín sín jie ntá chaxín xíkaha yamá sín jie kixin kénhya asén sín kjone sín tí nkehe. La tió kénhya asén sín tjenkayáxin sín la ó kjuasin sín jie.

15

Nchechéhérá kíchuará la jehya jahorá

¹ Tí antsí tinkáchónkini Ìnchéni ntá chrókjuinkitsani tí sín kánhyó tinkáchónki tí jehe ch'án la chrókjuich'ehyani tí nkehe chrókóchèxinni jehóni. ² Kjaxin kaín ni chrókjuinchechéheni kíchó ni kixin chrók'uejó sín jína la ko kixin antsí chrókuinkáchónki sín Ìnchéni. ³ Kixin kjaxin Cristo kjuich'ehya ch'án tí nkehe chrókóchèxin ch'án jehó ch'án. Náhí. Kjuínchexiteyá ch'án éxi ntáchro xroon itén Dios kixin: “K'uinika kjuasótexinna kaín tí kjuanínkaon chóna tí sín nínkakonhen Dios.”* ⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókónínkakonhyani kixin tíha mé nchechéheni. ⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkojína la ko jnkokón tsjenkayáxinkoará kíchuará kixin xíkaha kjuakoxin Cristo Jesús. ⁶ Kixin kaín ni jnkokoá chrók'uákjenxinni Dios la chrókjuancheheni kjuasáyé ch'án mé jehe ch'án mé It'é Ìnchéni Jesucristo.

Tí tan jína xrakohe tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxi Cristo tsík'áyéhe ch'án tí jahará mé xíkaha tsjikosáyéherá Dios. ⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjenixinni ósé kixin xíkaha tsjakoxin kixin Dios la jína ch'án la sinchexiteyá ch'án tí nkehe tsintáchro ch'án. ⁹ La kjaxin ikui ch'án kixin kjónté tí sín jehya sín judío la chrokjuanchehe sín kjuasáyé Dios kixin kujikonóehe ch'án sín éxi chrónka tí xroon itén Dios kixin: Janhan la ko tí sín tjejó ókjé nacióm mé tsjancheheni kjuasáyé Dios la ko tsotsjeni himno kixin ts'ákjenxinni ihnié ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháhakoará kaín tí sín kuénté Dios.‡

¹¹ Kjaxin ntáchro xroon itén Dios inaá kixin:

Tjanchehérá kjuasáyé Ìnchéni Dios kaín rá kjónté jehya judiorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjenixin ch'ín Isaí ijnko nkexro

la ts'etueñhen ch'án kaín tí sín jehya judío,

a ntá tí sín a mé tsinkáchónki sín tí nkexro a.*

Mé xíkaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe

* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11

Salmo 117.1 * 15:12 Isaías 11.10

ch'án kixin ntá ts'ánkí tí kjuachéhe tjejóchónhenni kjuachaxién Nchakuen ch'án.

¹⁴ Kíchóni, chaxín tónòna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjinkitsará chénkará kichuára.

¹⁵ La kjónté xikaha la chrakonhya ikjian tí xroon í chr'anhánra xrxjanka kaín tí nkehe kixin chrók'uitjanyhará chróxráinkáonrá kaín nkehe. Mé xikaha it'a tí xra kixin kjuasáyé Dios kjuanjon ch'án tí xra. ¹⁶ Kixin sít'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsjánjuan tí sín jehya judío ts'áyéhe Dios éxí ijnko nkehe tsóxrjnhjn ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha siín kjuachaxin tsochána kixin t'aha xra Dios. ¹⁸ Chrokuahya tsohnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxién Dios mé kjuákoxián tí kjuásian kjuaxroan la ko kjuákoxián tí kjuachaxin kuènte Nchakuen Dios. Mé xikaha kjuintaxixín kjuákua tí tan jína tsaáxin chojni Cristo xrankixixín chjasin Jerusalén la nkuixín chjinaxón ntiha la hasta estado Ilírico. ²⁰ Mé xikaha tjínkavan tsjinkákua tí tan tsaáxiní tí chjasin naça tienhyé sín ihnjé Cristo kixin tí janhan tjínkakonhya tsjxíronkaxián tí xra kuènte í jnko chojni xráxín tjech'e xra. ²¹ Íchá jína éxí ntáchro xroon itén Dios kixin:

Chrókuinhin tí sín naça kienhyé sín tí tan kuènte ti jehe ch'án.

La ko chrókiénxín tí sín naça kienhyé tí tan kuènte ch'án.†

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsajahá tí jahará kjánchó naça xitjahya kjuasán ntiha. ²³ Kjánchó ijie la ó kjuixinna tí xra nkuixín tí tjèn ntihi. Ntá itsjé nánó tjínkavan chrókjuasántsajahá tí jahará ²⁴ a ntá ijie ts'atsínka tsonixjahará tí sátsjia nación España. Ntá tsochána ts'íkuan tí jahará ntá tsjixin ntá chr'éxin tjínkavan kixin jahará tsjinkitsará tí sátsjia. ²⁵ A ntá ijie la sátsjia chjasin Jerusalén, sátsjikian tí nkehe tsjinkitsa tí sín kichó ni ntiha.

²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsochr'énhen sín tí sín kichó ni ntiha tsochjéhe tí sín nòna tjejó chjasin Jerusalén. ²⁷ Jehe sín kóxrjnhjn sich'e sín xikaha kixin tí sín judío tinkáchónki Cristo kjuinkitsa tí jehe sín tsoñohe sín itén Dios. Ntá ijie la jehe sín chrókjuinkitsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xra la ts'áyéhe sín tí chichaon la ntá janhan sátsjia España la ts'atsínkua tsonixjahará. ²⁹ Ó nòna kixin tió sátsjia la Cristo mé imá sincheyaan ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kichó ni mé xrxjannóahará kixin jnkokoá chrókjuenkayáxiní kixin tí xra tjét'a la ko chrónixjehérá Dios kixin tí janhan.

³¹ Tjancheherá Dios kixin tsjinkitsa ch'án tí janhan kixin kohya nkehe tsonna kixin kaín tí sín titekakonhya Dios siín chjasin Judea. La ko tjanchará kixin jína sátsjikian tí nkehe tsjinkitsa tí sín kichó ni tjejó chjasin Jerusalén kixin jína chrók'uáyéhe sín. ³² Ntá tí tjínkaon Dios la tsochána tsjasán tí tjejorá jahará la

ko kjuaxróxin tsjak'é tí tsjasántsjahará. ³³ Dios tjanjon kjuaxróxin ts'ejokoará kaín rá. Amén.

16

Ch'ín Pablo nixjehé ch'án tí sín chóxin ch'án

¹ Tétuǵnhanrá tsjínkĩtsará tí tjan kichó ni Febe ch'e tjan xra ñinko chjasin Cencrea ² mé tjanjonrá kjuachaxin tsjak'e tjan kjuachaxién ihñié Ìnchéni éxi ch'ehérá í so sín kichó ni tinkáchónki Ìnchéni. Tsjínkĩtsará tjan ichrén nkehe t'ichjánxĩnħin tjan kixin jehe tjan kjaxin kjuínkĩtsa tjan nchónhya chojni la kjaxin kjuínkĩtsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoá kjuích'ekoni xra kixin kjaxin sín mé ch'ehe sín Cristo xra. ⁴ Jehe sín chrók'uenxín sín kixin kjuínkĩtsana sín tí janhan mé xikaha tjahá sín kjuasáya la jehya janhván, kjaxin kaín sín kichó ni ñinkoé tí sín jehya judío. ⁵ Nixjehérá kjaxin kaín kichó ni tóchjina ntøe tjan Priscila la ko ch'ín Aquila. Nixjehérá tí ch'ín choxian jina Epeneto mé jehe ch'án la saoxin kuítekaon ch'án Cristo estado Acaya.

⁶ Nixjehérá tjan María kixin kjaxin tjan kjuích'e tjan xra tí tjejorá ntiha. ⁷ Kjaxin nixjehérá tí sín tsíkijixin chjasenná mé ch'ín Andrónico la ko ch'ín Junias. Tí k'uíkjená ntøechiso la kjaxin tí jehe sín k'uijkjehé sín. Kjaxin kaín tí í so sín apóstol la tjikosáyehe sín tí sín a. Jehe sín senó kuínkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuhā tinkáchónki Ìnchéni. ⁹ Nixjehérá ch'ín Urbano kixin jnkokoá kjuít'akian ch'án xra kuènte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuích'e sín xra kuènte Ìnchéni la ko nixjehérá kjaxin tí tjan kichó ni Pérsida. Kjaxin kjuínkĩtsa tjan kjuích'e tjan xra kuènte Ìnchéni. ¹³ Kjaxin nixjehérá ch'ín Rufo, ijnko chojni tsíkijeyá Ìnchéni la ko nixjehérá tí iné ch'án kjaxin kixin kjaxin tjan kjuínkĩtsa tjan tí janhan la éxi ñaná k'uíkuan tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kichó ni tjejóko tí jehe sín ntiha. ¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuárá kjuachaxin ihñié Ìnchéni. Kaín tí sín ñinko kuènte Cristo ntihi xraxinkaon sín tí jahará la nixjahará sín.

¹⁷ Kichóni, xrjanóahará kixin chrótsjehérá nkexro tí sín tjixrónkáxin chrók'óxika tí sín jnkokoá tinkáchónki Ìnchéni. Jehe sín titekakonhya sín tí itén Dios kjuáakohará k'uitjará. Tí xikaha ch'e sín la chrók'uaxrjekjanxínrá ntiha. ¹⁸ Tí nkexro xikaha ch'e la jehya Ìnchéni Jesucristo ch'ehe xra. Náhí. Jehí tjinkaon sín chrókjuixrónkáxin sín la nixja sín tí nkehe náxrxjón ó la xikaha ch'iyehé sín asén tí chojni ñaxā noehya. ¹⁹ Kaín chojni ó nohe kixin jahará la ó kuítekaonrá Ìnchéni. Mé xikaha chàna tí janhan la tjínkavan chrókóxakonhanrá chrókjuích'erá xra jina. Jehya kixin chrókjuích'erá nkehe jínahya. ²⁰ Tí Dios

tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehé ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'ueṭoan ch'ín Pablo la kjaxin nixjahará kjuachaxiën Ìnchéni.

²³ Ch'ín Gayo nixjahará ch'án. Jehé ch'án kjuanjon kjuachaxin kjuak'é janhan ntṭe ch'án la ko kaín tí sín kuente n̄nko tójnkoṭsé ntṭe ch'án. La ko nixjahará ch'ín Erasto. Jehé ch'án mé tesorero kuente chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehé ch'án tjinkitsa ch'án kixin jina chrók'uejorá éxí chrónka tí tan jina tsaáxinni la ko éxí kjuakoni kuente Jesucristo. Tíha mé chaxín chrónka éxí Dios k'ueṭoan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsoñoexínni nkexrí nixja xroon ikjin tí sín profeta kixin nkexrí k'ueṭoan Dios itjen jnkochrixín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrixín. Amén. Ó tjen.

Tí xroon saoxín ikjin ch'ín Pablo chr'énhen ch'án tí sín tinkáchónki Cristo síin chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'ahá ch'án xrá. Janhan la ko kíchó ni Sóstenes mé ² ikjinni tí xroon i chr'ánhanráni tí jahará tójnkotsérá nínko chjasin Corinto. Ó kjuínchetjóará Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín Ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochr'ín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá xikaha antsí jína nohará chrónkaxínrá kixin nkexrí tinkachónkirá Ìnchéni la ko kjaxin antsí jína tiénxínrá kaín nkehe chaxín ntoá. ⁶ Tí nkehe kuínhínrá kixin nkexrí tjen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nchakuen Dios, la í ninkehó t'itjáyankíhya tí kjuachaxin kuènte ch'án k'uayéhérá nachrohe tjejochonhérrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin tsitjéhyará tí tinkachónkirá ch'án hasta tsjixraká tí yaon tsjixixín. Ntá ninkexró ts'ekahyará jie kixin ntoáhya tjejoch'erá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeýará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoqáhya kjuenkayáxin tí sín tinkáchónki Cristo ntiha chjasin Corinto

¹⁰ Kíchóni, xrjanóaxínrá tí kjuachaxin ihnjé Ìnchéni Jesucristo kixin jnkokoqá chrókjuenkayáxinrá la ko chrók'uaxrjentahyará ókjé na mé jnkokoqá chrókjuenkayáxinkoará kichuárá. ¹¹ Kíchóni, ó kuínhan tí nkehe chrónka tí sín kjéhya ch'ín Cloé kixin síin kjuanínkaon tí tjejorá tójnkotsérá ntiha. ¹² Na mé ntáxrjan kixin isorá ntáchrorá kixin jahará chréhérá tí janhan Pablo, la ko í sorá ntáchrorá kixin jahará chréhérá tí ch'ín Apolos, la ko í sorá ntáchrorá kixin jahará chréhérá tí ch'ín Pedro, la ko í sorá ntáchrorá kixin chréhérá Cristo. ¹³ ¿Xá nkekjaín Cristo síin kixin? ¿Á jehya jnkokoqá Cristo tinkáchónkini? ¿Á janhan Pablo k'uényákonhanrá ní? ¿Á kuíkitezínrá tí njina ní? ¹⁴ Tjáncháha Dios kjuasáya kixin nínko tí jahará kuíkítiahyará ntiha. Jehó ch'ín Crispo la ko ch'ín Gayo mé kuíkíte janhan. ¹⁵ Na mé nijnkorá xitjahya tsontáchrorá kixin njina kuíkitezínrá. ¹⁶ Kjaxin jehó kuíkíte tí ch'ín Estéfnas la ko tí sín kjéhya ch'án. Xráxinkakonhya á kuíkíte í so sín o náhi. ¹⁷ Kixin tí xrá chjina Cristo jehya kixin chrókuíkíte chojni. Náhi. Tí xrá chjina Ìnchéni kixin tsoxrjanxaxián

tí tan tsaáxinni. Tjínka konhya kixin chrókjuákoxián palabra náxrxón noi kixin xikaha chrókjuákua ntá chrókjuíntamá tí kjuachaxin jié kónoxin tí k'uénxin Ínchéni Jesús tí ntacruz, kjuák'enkáni ch'án, k'uenyákonhenni ch'án.

Cristo mé tjákoxin tí kjuachaxién Dios la ko tjákoxin ch'án kixin imá nohe Dios

¹⁸ Chronkaxinni kixin k'uenyákonhenni Cristo tí ntacruz. A ntá tí tsinhin tí sín xráxin ts'itjáyán ntá ts'íkon sín tíha éxi nkehe chónkó. A ntá kaín ni chojni kuaáni mé t'íkonni kixin kjuachaxin jié tíha. ¹⁹ Mé xikaha ntáχρο xroon itén Dios tsíkinjín sín ósé kixin Dios mé sinchek'itjáyán tí nkehe tjenkayáxin tí sín imá nohe, la ko tsítóenta ch'án tí nkehe ntáχρο tí sín imá tienxín sín.*

²⁰ ¿Mé nkehe tsonhen ntáχρο sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe siín chjasintajni ó. A ntá Dios mé t'íkon ch'án kixin lontj sín kixin xikaha ichro sín. ²¹ Kixin Dios antsí nohe ntá xikaha kuítóehya ch'án kixin kjuachaxin kuénte sín ó chrókjuacha sín chrókóxién sín ch'án. Ntá kóxrjínjin Dios chrókjuéyá ch'án chrókjuincheaka ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjínkaon sín chrók'uikon sín kjuaxroan jié, ichro sín. A ntá tí sín nkíva griego mé xritjeyá sín kixin antsí chrókónohe sín, ichro sín. ²³ A ntá jeheni kaín ni tinkáchónkini Cristo la tjínkakonhyani chrókónoheni kaín tíha la mé jehó Cristo tjákoxiníni. Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáχρο sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáχρο sín kixin chojni lontj tí jeheni kixin xikaha tinkáchónkini, ichro sín. ²⁴ A ntá tí sín kjuéyá Dios, kjónté judío sín na o griego sín, la kaín ni ntáχροni kixin Cristo mé k'uenyákonhenni ch'án. Mé xikaha tjákoxin Dios tí kjuachaxin jié la ko tí kjuaxrexinkaon jína kuénte ch'án. ²⁵ Ntá jehe sín ntáχρο sín kixin éxi ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhe sín ch'án. La ko kjáxin ntáχρο sín kixin jiéhya tí kjuachaxin chóntha Dios. A ntá tí sín antsí má chóntha kjuachaxin ntihi chjasintajni kjónté la tóyóehya sín Dios kixin antsí chóntha ch'án kjuachaxin t'etóan ch'án. ²⁶ Kíchóni, xráxinkáonrá nkexrj k'uéjorá ntá kjónté kjuéyará Dios tí jahará. Na mé tsjéhyará imá kónohará éxi t'íkon tí sín chjasintajni la kjónté kjuéyará Dios tí jahará. La ko tsjéhyará imá kuétóanrá la ko tsjéhyará k'uaxrjenúxinrá tí sín imá k'uék'etóan.

²⁷ Ntá kjónté Dios mé kjuéyá iso tí sín noehya éxi t'íkon tí sín chjasintajni kixin xikaha tjínkaon ch'án chrókjuinchesuèhe ch'án tí sín imá nohe ntihi chjasintajni. La ko kjáxin kjuéyá Dios iso tí sín chónthaha kjuachaxin éxi t'íkon tí sín chjasintajni kixin xikaha tjínkaon ch'án chrókjuinchesuèhe ch'án tí sín imá chóntha kjuachaxin ntihi chjasintajni. ²⁸ Dios mé kjuéyá ch'án iso tí sín t'etóanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuinchek'itjáyán ch'án kjuachaxién tí sín jehó chrók'uétóan. ²⁹ Méxra xikaha ninxeró tsjachahya sinchehnke tí tjen Dios. ³⁰ A ntá tí kjuachaxin kuénte Dios mé tinkáchónkirá Cristo Jesús, a ntá chóntaxinni Cristo kjuaxrexinkaon jína, la ko tí kjuachaxin kuénte ch'án kókíka tí jié kuénteni, la ko tí kjuachaxin kuénte ch'án sinchetjuáxinni ch'án, la ko tí ijníé ch'án k'uénaxínni ch'án. ³¹ Mé xikaha éxi chrónka tí xroon

* 1:19 Isaías 29.14

tsíkjin sín ósé ntáchro kixin: “Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoxin ch'án kixin imá t'etōan tí kjuachaxin kuènte Dios.”†

2

Ch'in Pablo mé tjako ch'án kixin Jesucristo kjuák'enkáni ch'án ntacruz

1 Kichóni, tió kjuasán ntiha chjasánrá níxjहारá chrókjuákoahará nkexrí tjen Dios la jehya ijnko tan tienxínnya chojni la ko jehya itan imá noi chrókjuákoáxinrá. 2 Kixin tió k'uéjóni jnkokoá ntiha kjuenkayáxinnya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. 3 K'uéjóni jnkokoá ntiha la ntá jahará ó nohará kixin janhan kjuak'é éxí chrókjuachahya kixin síxrànkana, chràkonna. 4 Tí kjuankixian níxjहारá la ko xrjankaxián tí tan tsaáxin chojni, la tjínkakonhya chrókjuáchrúáxinrá tí nkehe náxrjón níxja chojni tsíkónohe má. Náhi. Tió kjuákoahará kónoxín kixin tjékian Nchakuen Dios la ko kónoxín tí kjuachaxin jié kuènte ch'án, 5 kixin jehya kjuaxrexinkaon kuènte chojni tsíkónohe má chrókuinkachónkirá. Náhi. Tí kjuachaxin kuènte Dios mé chrókuinkachónkirá.

Nchakuen Dios mé tsochóxixinni ch'án

6 Kjánchó tió tjákoḡa tí sín chaxin ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etōan chjasintajni, na mé tí kjuachaxin kuènte sín la tjoka ts'itjáyán. 7 Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naḡa k'ónahya chjasintajni kixin nkexrí tsaáxinni. 8 Nijnko tí sín t'etōan chjasintajni kienxínnya sín tí nkehe tsíkjenkayáxin Dios. A ntá tí chrókiénxín sín tíha la ntá chrókjuak'enkanihya sín Ìnchéni tjetōan tí ntacruz. 9 Éxí ntáchro xroon itén Dios tsíkjin sín ósé kixin: Naḡa k'uúikonhya chojni la ko naḡa kíénnya chojni, la ko naḡa kjuenkayáxinnya chojni

kixin nkexrí síin kaín xín nkehe kjuích'éna Dios ts'áyéḡe tí sín tjuèhe ch'án.*

10 A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí síin kaín xín nkehe la ko kjaxin nkexrí tjen tí nkehe tjenkayáxin Dios.

11 Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. 12 A ntá jehya tí nchakuen chojni chjasintajni k'uáyéḡeni. Náhi. Tí Nchakuen kuixín tí tjen Dios mé k'uáyéḡeni kixin ntá tsonoexínni kixin kaín xín nkehe kjuínchekitonhenni Dios. 13 Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhi. Tí Nchakuen Dios mé nchenoexínni nkexrí tsjakōexínni tí sín chónḡa Nchakuen ch'án.

14 Kjánchó tí sín naḡa chóntahya Nchakuen Dios mé xitjahya ts'áyéḡe sín tí nkehe tjanjon Nchakuen Dios. Na mé éxí lóco t'ikon sín kaín tíha kixin jehó tí sín chónḡa Nchakuen Dios mé tsjacha sín tsienxín sín tíha. 15 A ntá tí nkexro chónḡa Nchakuen Dios mé chrókjuacha chrókónohe nkexrí síin kaín xín nkehe. Kjánchó tí nkexró chóntahya Nchakuen Dios tsjachahya tsjanchia jié tí jehe ch'án. 16 Méxra ntáchro xroon itén Dios kixin: ¿Xá ninkexró chrókónohe kixin

† 1:31 Jeremías 9.23 * 2:9 Isaías 64.4

nkexrí tjenkayáxin Ìnchéni kixin chrókjuacha sín chrókjuakohe sín ch'án inaá?†
Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuích'ehe sín Dios xra

¹ Mé xíkaha, kíchó ni, kjuachahya janhan chróníxjahará éxí chojni t'etuenhen asén sín Nchakuen Dios. Náhí. Éxí chojni naxa nchexiteyéhe sín tí nkehe ntáchro asén sín, na mé éxí xjan ntsínsí na ntá kjuankíxin kuinkáchónki Cristo mé xíkaha tí jahará. ² Janhan na kjuákoáxinrá nkehe xrahya éxí yóhe ijnko xjanhnté tí jahará naxa nchekakí iné tsjen kixin naxa xitjahya sine nkehe cha. Mé xíkaha tí jahará naxa xitjahya sinterá nkehe cha ³ kixin naxa éxí chojni ó nchexiteyéhérá tí nkehe ntáchro asánrá kixin tí naxa síin kjuachjinoxínhin la ko síin kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni. ⁴ Isorá ntáchrór kixin chréhérá tí janhan Pablo, la ko í sorá ntáchrór kixin chréhérá tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkáchónkirá Ìnchéni kixin janhan kjuákoahará. Jnkojnkoní kjuích'eni tí xra kjuanjon Ìnchéni. ⁶ Janhan kuènka, a ntá ch'ín Apolos ìnta kjuáka ch'án, a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'ueñkaxin la ko tí nkexro tjáka ntá la kánhyó tjetaon kixin Dios mé chóna kaín kjuachaxin la jehe ch'án nchek'ánkí kaín nkehe síin. ⁸ A ntá tí sín t'enka la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. ⁹ Méxra jeheni mé jnkokoá ch'ehe ni Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án. ¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xrankíxixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xro a, ¹¹ kixin kohya ninkexró tsjacha tsjak'e í jnko xro xrankíxixín tí nchia a kixin táha la ó tsíkjixin tsik'óna, kixin Jesucristo tíha. ¹² A ntá chrítaón tíha mé tsjacha sich'éna chojni nchia tsik'óna chica oro, la ko chica plata, la ko xro náxrjón tjete, la ko inta tabla, la ko kanj, la ko ntaxro. ¹³ Na mé tsonoxín nkehe tí xra kjuích'e jnkojnko chojni tió tsí tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxin nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuích'éna ijnko nchia tsochehya la mé tsjacha ch'án tí xra kjuích'e ch'án. ¹⁵ A ntá tí chróche tí nchia kjuích'éna ijnko chojni, ntá chrók'uitjáyán kuénté. A ntá tí nkexro kjuích'éna nchia la tsaá éxí yóhe chrókuinkéhe ch'án xrohi.

¹⁶ ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá? ¹⁷ A ntá jnkojín nkexro tjinkaon ts'óxika tí ninkoe Dios na mé Dios mé sinchek'itjáyán tí nkexro xíkaha sich'e kixin tí ninkoe Dios la tjóá tíha. A ntá tí ninko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjára chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontí t'ikon Dios. A ntá ntáchro tí xroon itén Dios tsíkjin sín ósé kixin: “Tí nkehe tsik'itjá sín

ch'iayaxín sín la tíha mé tsokjan ts'enxín sín.*²⁰ La ko kjaxin ntáchro xroon itén Dios kixin: “Ínchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios.”†²¹ Méxra chrókjuínchehnkehyará jahará kixin chréhérá ijnko chojni imá nohe, kixin kaín xín nkehe síin la kuéntará jahará,²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sitónhen jie, la ko tí nkehe tsqonhen chr'éxin, la kaín la kuéntará tí jahará.²³ A ntá jahará la Cristo mé t'ayakonhanrá. Kixin Cristo la jehe ch'án la mé kuènte Dios.

4

Tí xra kjuích'e tí sín kjueya Ínchéni

¹ Jahará chrók'uiakonrá tí jeheni éxi chojni ch'ehó Cristo xra k'uáyéheni tí xra tjakoni tí nkehe kuènte Dios ninkexró k'uénoehya. ² A ntá ijnko chojni k'uáyéhe xra ts'etqan chrókjuakoxin kixin jina ch'án la ko jina ch'e ch'án xra. ³ A ntá janhan tóxakonahya tí nkehe chróntáchrórá jahará chrókjuanchiará jie tí janhan kixin tí xra t'aha Dios, la ko kjaxin tóxakonahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékaha jie asenná. ⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhi. Jehe Ínchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuínchekitoxínrá ichrén jie. Chonhénrá tí tsi Ínchéni kixin jehe ch'án mé sinchenoxin ch'án kaín tí nkehe símá tí sítié, la ko sinchenoxín ch'án kaín xín nkehe imó tjenkayáxixín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kichóni, nixjahará tí nkehe i kixin jina chrók'uejorá jahará ntá xikaha kjuintayóaxian éxi ch'ín Apolos la ko éxi janhan kixin chrók'uitjará kixin chrókjuenkayáxinrá jehó tí nkehe tsikjin sín ósé, kixin nijnko nkexro chrókjuínchehnkehya kixin chréhe sín ijnko chojni, a ntá tsochóntehya sín kjuasáyé tí ijnko chojni. ⁷ ¿Méxra nkexro ntáchro kixin jahará antsí tjetonará? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkekuènte nchehnkerá kixin jahóra tsíkjéyará tíha?

⁸ Jahará tónhanrá kixin imá ricorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la í t'ichjánxianhyará ninkehó tí jeheni kixin naxa chrókjuinkitsani. Tí chrókóchaxin chrók'onará ijnko rey chaxín ntá kjaxinni chróhóntani kjuachaxin chrók'uetqanni.

⁹ Ntá tónhen asenná kixin jeheni chojni kjueya Ínchéni mé kjuanjon Dios kixin jeheni chrókjuixixín chrók'uejóni éxi chojni kuítqonhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxi chojni lontj. A ntá t'ikon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'enxínni kjinta, la ko t'enxínni nta, la ko chóntahyani ikéni, la ko nínkakonhenni chojni, la ko chóntahyani nkerí ts'ejóni. ¹² La ko tóxrjéni kixin itjani ch'exínni xra. A ntá tió t'ántaxínhínni sín la tjancheheni Dios kixin sincheyaon ch'án tí jehe sín. La ko tió chónkíhi sín tí jeheni la tónínkakuenhyani

* 3:19 Job 5.13 † 3:20 Salmo 94.11

sín. ¹³Tió t'ántaxínhinni sín la jnkojína tjatehēni tí jehe sín. T'ikon sín tí jeheni éxi chjínínó ntihi chjasintajni, na mé éxi ijnko nkehe ninkehó sínkíhya la ko mé xíkaha naḡa sítóhnen tí yaon jie.

¹⁴Ikjian tíhi na jehya kixin chrókjuintasuàhará. Náhí. Tjínkavan chrókjuintaxráxinkáonrá kixin éxi xjanna t'íkuan tí jahará, tjuahará. ¹⁵Kjonté chróchontará ite mil chojni chrókjuákoḡhará nkexrí tjen Cristo la chontahyará tsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákoḡhará tí tan jína tsaáxinni. ¹⁶Mé xíkaha xrjanóḡhará kixin chrókjuákoḡxinrá éxi tí janhan.

¹⁷Méxra kuétuḡnhan tí ch'ín Timoteo kixin tsjiji ch'án ntiha. Na mé éxi xjanna t'íkuan tí jehe ch'án, tjuḡḡa ch'án, kixin kjuákoḡa ch'án ntá kuítekaon ch'án Inchéni ntá xráxin jína ch'e ch'án xra. Ntá tsjiji ch'án sintaxraxinkáonrá ch'án nkexrí tjákoḡxian tí ntje Cristo éxi xráxin tjáku kaín xín njnko t'atsínka tí janhan. ¹⁸Ntá iso tí jahará imá ihnkerá kixin tjenkayáxinrá kixin chaxínhya chrókjuasántsjahará. ¹⁹Ḃ ntá tjoka chrókjuasántsjahará tí chaxín xíkaha tjínkaon Inchéni. Ḃ ntá jehya jehó tí nkehe nixja tí sín xriko kjuahnke mé chrókujnhan. Náhí. Na mé ts'íkuan á chaxín chóna sín kjuachaxin kixin xíkaha nixja sín. ²⁰Ḃ ntá tí kjuachaxién Dios la jehya tí nkehe tsonixjani ó. Náhí. Tí tjákoḡxinni la tí kjuachaxién Dios. ²¹¿Nkehe tjínkáonrá tí jahará, kixin á chrókjuasán chrókjuíntakjasótiará? o ¿á tjínkáonrá kixin jnkojína chrókjuasán?

5

Tsitoxén ijnko jie tjacheḡe kíché chojni

¹¿Á chaxín tsik'ikon sín kixin tí tjeorá ntiha la ijnkorá mé chontará náḡonrá éxi ichjiánrá? Tíha mé ijnko jie jíé, la mé kjonté tí sín chónhya Dios la xíkahya ch'e sín. ²Ḃ ntá kjonté xíkaha tsíkónhen la imá ihnkerá. Íchá jína imá chrók'uavará. Ḃ ntá tí xíkaha ch'e ijnko chojni ntá chrókuétuēnhénrá ch'án sáchrókjui ch'án, chrók'uejokoahyará ch'án ntiha. ³Ḃ ntá ntáxrjan janhan kjonté tjenhya cuerpo kuētḡana tí tjeorá ntiha la tí tjenkayáxian la ntaha tjēn éxi chrókjuak'é janhan, ntá t'akjénxian ihnjé Inchéni Jesucristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xíkaha tsíkjich'e. ⁴Tió tsojnkoḡsérá kaín rá ntiha la éxi koyá tsjak'é ntiha la kjánchó nchakuenná ó la ko koí tí kjuachaxién Inchéni Jesús ts'ejókoará ntiha. ⁵Ḃ ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuēnte ch'án. Ntá tió tsokjan Inchéni mé tsaá ḡsén ch'án.

⁶Jahará chrókjuínchehnkehyará kixin tí nkehe tsíkónhen ntiha. ¿Á noahyará nkehe ntáchro sín, kixin tí ch'o a mé tjiko intsikóá tí xroḡn nchek'ánki niotja, ntá kjonté la tsosán kaín tí ch'o? ⁷Méxra chrókuakítsjerá ntója kaín tí xroḡn ntaxin nchek'ánki niotja, kixin ntá jahará ts'ejorá éxi niotja tsik'óna ch'o nixsin tsíkjikohya xroḡn nchek'ánki niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyan sín tí yaon pascua, mé k'ueyákonhēnni ch'án. ⁸Ḃ ntá chrókjuasinni tí kia a la kaín ḡsēnni chrórxaxinkaonni, tíha la éxi tí niotja chóntahya xroḡn nchek'ánkixin. La jehya kixin chrókjuasinni tí kia naḡa chróchóntani kjuanínkaon kixin táha la yóḡe tí xroḡn ntaxin nchek'ánki tí niotja a.

⁹ A ntá í jnko xroon chr'anhanrá k'uéntáxrjan kixin ninkehó chrók'úitohyará tí sín tjasin jie chóna chojni chjin ókjé. ¹⁰ Ntá jehya kixin kuétuānhanrá kixin chrók'úitohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xikaha chrókuich'era la t'ichjánxin chrók'uaxrxénrú tí chjasintajni. ¹¹ Méxra ó kuétuānhanrá kixin chrók'úitohyará ninkehó jnkójn chojni ntácho sín kixin kichó ni tí jehe sín, ntá naxá tjasin sín tí jie chóna sín chojni chjin ókjé, la ko tjinkaon sín jehó sín tsochóna sín itsjé nkehe, la ko tí sín naxá tinkáchónki sín nkehe tsíkjanoya, la ko tí sín naxá tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xikaha ch'e la chrókjontekoahyará sín. ¹² Jehya xraa chrókuintakitoaxián tí ijie tí sín jehya kuente nínko ntiha. A ntá tí xra kuéntará jahará kixin chrókjuinchekitoexínrú tí ijie tí sín kichó ni tójnko tsé nínko ntiha. ¹³ A ntá Dios mé sinchekitoexín ch'an ijie tí sín jehya kuente nínko. Méxra, takítsjekjanxinrú tí ch'in jínahya kjuasin jie tí tjejorá ntiha.

6

Chrókuikjanahya sín jie nkayakon tí ch'in juez tinkáchónkihya Ìnchéni

¹ A ntá jnkójnrá chrókuánjonkoará kichuára chrókuikjanahyará jie nkayakon tí ch'in juez tinkáchónkihya Ìnchéni. Íchá jína chrókjuírá chróchenkará tí sín tinkáchónki Dios. ² ¿Á noahyará kixin tí sín tinkáchónki Ìnchéni mé sinchekitoexín sín ijie kaín xín chojni chjasintajni? A ntá xikaha sinchekitoexínrú ijie kaín xín chojni chjasintajni, ¿ntá nkekuente tsjachahyará sinchekitoexínrú kjónté ijnko jie ntsi? ³ ¿Á noahyará jahará kixin kjónté tí sín ángel tsotsjeheni nkehe tí xra kjuich'e sín? A ntá ijnko nkehe intsí ntihyó, la ¿á xitjahya chrókuásiyóxinrú? ⁴ A ntá xikaha chrókuánjonkoará kichuára, ¿ntá nkekuente tjíkjanchiará jie nkayakon tí sín tikínixinhya kuente nínko? ⁵ Ntáxrjan xikaha kixin chrókuintasuáhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijie kichó ni? ⁶ Jahará jnkokoá kichuára ntá tjanjonrú, la ko kjaxin sátjíkjanchará jie nkayakon tí ch'in juez tinkáchónkihya Ìnchéni.

⁷ Kjónté ijnko jie ntsi ntá imá tjanjonkoáxinrú kichuára; tíha mé t'óna ijnko jie jie. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókujitohérá sín kjónté tsaáhará sín. ⁸ Kjánchó kjaxin jahará ntoáhya tjejoch'era kixin kjónté jnkokoá kichuára la teherá sín.

⁹ ¿Á noahyará kixin tí sín jínahya ch'e la ts'áyéhya sín kjuachaxin kuente Dios? Chrókuitoéhyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachehe kichó sín, la ko tí chojni t'ó chjin, t'ó ntoa, la ko tí sín jnkokón ntoa sín tóxrjínhin kichó sín, ¹⁰ la ko tí xíchee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyéhya sín kjuachaxin kuente Dios. ¹¹ Xikaha k'uéjorá isorá senó. Ntá jie ó k'uújmára, kjuínchetjorá Dios, ntá ó xika ijiará kjuachaxin ihnié Ìnchéni Jesucristo la ko kjuachaxin kuente Nchakuen Dios.

Tí cuerpo ó tsikótjóa

12 Síin kjuachaxin kaín nkehe chrókjuít'a, kjánchó iso nkehe la ó chónkó. Síin kjuachaxin kaín nkehe chrókjuít'a, kjánchó chrókuítoghya ninkehó nkehe chrók'uetuanna. 13 Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'ítjáyán yóí tíha. A ntá k'ónahya tí cuerpo kuènteni kixin chrókjuasixínni jie. Náhi. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. 14 Méxra Dios mé kjuínchexechón Ìnchéni, mé xíkaha sinchexechónxinni ch'án tí kjuachaxin kuènte ch'án.

15 ¿Á noahyará kixin jnkojnko cuerpo kuèntará mé it'ó tí cuerpo kuènte Cristo? ¿Á chrókjuít'a janhan kixin it'ó tí cuerpo kuènte Cristo chrók'óna it'ó cuerpo kuènte ijnko chojni chjin ch'iyehé nchónhya chojni ntoa? Méxra kjá náhi. 16 ¿Á noahyará kixin tío ijnko chojni ntoa chrókuakja ijnko chojni chjin chóna nchónhya chojni ntoa, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: “Yóí sín la ts'óna sín jnkokoá chojni.”* 17 A ntá tí jnkojín chojni tinkáchónki Ìnchéni, ntá jehe la ko Ìnchéni mé ts'óna jnkokoá.

18 Méxra chrókuítoghérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. 19 ¿Á noahyará kixin jnkojnko cuerpo kuèntará mé éxi ijnko ninko itjen Nchakuen Dios kjuanjón ch'án k'uayéhérá, la ko chontará tí Nchakuen ch'án tjóá? Jahará la jehya ìché tí cuerpo kuèntará 20 kixin jahará la tjete k'uénaxínrá Dios. Méxra chjéxínrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

7

Chenka ch'án tí sín tsíkótehe kixin nkexrí chrók'uejó sín

1 A ntá jie tsjataha tí nkehe tsíkjinrá kjuanchankínará, na mé ntáxrjan kixin chaxín chrókójína kixin tí chojni ntoa chrókuakjahya ichjién. 2 Kjánchó tí xíkaha imá tjínkaon sín tsochóna sín itsjé chojni chjin tsjasinko sín jie, la íchá jína jnkojnko chojni ntoa chróchóna jnkojnko ichjién kuènte la ko jnkojnko chojni chjin chróchóna jnkojnko xii kuènte. 3 Tí chojni ntoa la ko tí chojni chjin chrókjuínchexiteyéhe sín kichó sín. 4 Tí chojni chjin jehya ìché tí cuerpo kuènte tjan, na mé kuènte xii tjan. Ntá kjaxin xíkaha tí chojni ntoa la jehya ìché tí cuerpo kuènte ch'án, na mé kuènte ichjién ch'án. 5 Chrókjuíncheniéhyará kichuárá, jehí jnkokoá chrókjuenkayáxinrá yóírá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin chrókjuítoghéhyará kixin ch'ín Tsochren chrókjuacha chrókjuachroerá ch'án chrókjuásínrá jie.

6 Kaín tíhi tjonkará kixin tsonohará kixin síin kjuachaxin xíkaha na kjánchó jehya kixin xíkaha tétuanhanrá. 7 A ntá janhan ntáxrjan kixin chrókójína kixin kaín rá chojni ntoará chrókóyóhará éxi tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

8 A ntá tí sín naxá tóteehya la ko tí chojni tsíkó'án na ntátjan sín kixin chrókójína kixin xíkahó chrók'uejó sín chrókóteehya sín éxi tí janhan xíkaha.

* 6:16 Génesis 2.24

⁹ Kjánchó tí chrókjuachahya sín tí tjak'e asén kíchó sín, naxa chrókjuasin sín jie, ntá íchá jína chrókótehe sín kixin jehya jína kixin jnkochríxin chrókjuak'ó asén sín.

¹⁰ A ntá jahará ó tsíkjixin tsíkótahará, la tétuanhanrá tíhi: a ntá jehya kixin kjuachaxin kuéntana tétuanxínrá. Náhi. Kjuachaxin kuente Ìnchéni mé tétuanxínrá kixin tí chojni chjin chrókjuákehya xii. ¹¹ A ntá tí chrókjuákehé ijnko chojni chjin tí xii, ntá xikahó chrókuitohe tjan jehó tjan la ko chrókójina chrókóyóxin, chrókjuiinhin tí kjuanínkaon kixin tí kjuákehé kíchó sín. Kjaxin xikaha tí chojni ntoa la chrókjuákehya tí ichjién.

¹² A ntá tí nkehe tétuanhan tí í so sín jaí la kuéntana janhvàn, jehya kuente Ìnchéni, kixin tí tjen ijnko ch'ín kíchó ni chóna ch'án ichjién ch'án tinkáchónkihya Ìnchéni, na kjónté naxa tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan. ¹³ La ko tí tjen ijnko tjan kíchó ni chóna xii tjan tinkáchónkihya Ìnchéni, ntá kjónté naxa tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kixin tí xii tjan tinkáchónkihya Ìnchéni ntá jie ó kótjóá ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóá tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóá tí xjeen sín. ¹⁵ A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehé kíchó sín, la ája nohe sín tjákehé kíchó sín, kixin Dios tjinkaon kixin kjuaxróxin chrók'uejorá. ¹⁶ Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxi tsíkjanjon Ìnchéni kjuachaxin tsík'áyehe sín, la ko éxi tí k'uejó sín tió k'uíyehé sín Dios, kjánchó chrókuitoehya sín tí jehe ch'án. Mé xikaha tétuanhan kaín tí njnko. ¹⁸ Tí chrók'uíyehé Dios ijnko ch'ín chóna xroye, ntá xikahó chrókuitohe ch'án. A ntá tí chrók'uíyehé Dios ijnko ch'ín chónahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhya á chóna chojni tí xroye o á chónahya chojni tí xroye. Na mé tí nkehe tjetuan kixin chrókjuinchexiteyéhéni tí nkehe k'uetuan Dios. ²⁰ Chrók'uejóni jnkojnkoní éxi k'uejóni tí k'uíyehéni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókuaákjá tíha. ²² Kixin tí nkexro kjuích'exón xra tió k'uíyehé Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uituenhya tió k'uíyehé Ìnchéni la mé jie mé ch'ehe ch'án xra Cristo. ²³ Dios imá tjehe k'ueanaxín ch'án tí jahará. Méxra chrókjuánjonhyará kjuachaxin kixin ókjé chojni chrók'óna inchará. ²⁴ Méxra kíchó ni, éxi k'uejorá tió k'uíyahará Dios kixin tsinkáchónkirá ch'án, la xikahó naxa chrók'uejorá jie kixin chontará Ìnchéni tsjinkítsa.

²⁵ A ntá tí chojni naxa tóteehya sín na mé janhan chontahya nkehe kuente Ìnchéni chrókúetuanhan sín. Kjánchó tsqxrjanka tí nkehe tjenkayáxian janhvàn, a ntá chrókúitekáonrá tí janhan kixin kuikonóna Ìnchéni. ²⁶ Mé xikaha tónna kixin chrókójina kixin jnkojnko chojni chrókuitohe sín éxi tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuákeéhyará tjan. A ntá tí chontahyará ichjiánrá ntá íchá jína chrókjuéyahará. ²⁸ Kjánchó tí chrókótahará la jehya jie tíha,

la ko tí chrókótehe ijnko tjan tjarisoá la kjaxin jehya jje. A ntá tí sín tsíkótehe la tsochónta sín kjuaxikaon, mé xikaha janhan chrókjuínkítsa sín kixin chróchóntahya sín kjuaxikaon.

²⁹ Mé xikaha tjétjonkará kichó ni kixin tsjéhya yaon naxa t'itjáyán tsokjan Ìnchéni. Mé xikaha tí chojni ntoa chónta ichjién sín, la antsí tjetooan saoxín chrórxaxinkaon sín Ìnchéni, la ntá chr'éxin chrótjuèhe sín ichjién sín. ³⁰ A ntá tí sín tsjánka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhya sín. La ko tí sín t'ena nkehe la chrók'uejó sín éxi chóntahya sín tí nkehe tsík'ena sín. ³¹ La ko tí sín kjuacha nkehe siín chjasintajni la chrók'uejó sín éxi ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

³² Tjínkakonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinhexiteyéhe ch'án tí nkehe tórxjínhjin Ìnchéni. ³³ A ntá tí ch'ín tsikótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xì tjan.

³⁵ Tjétjonkará tíhi kixin tjínkavan kixin jína chrók'uejorá, jehya kixin xikaha chrókuétuánhanrá. Náhi. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsotehe tjan na mé jehya jje. ³⁷ A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí títóherá xjaanrá chjin kixin tsotehe tjan la ó nchoxon. La ko kjaxin tí tjinkakonhya tjan kixin chrókótohe tjan na mé antsí jína tíha.

³⁹ Tí tjan tsíkótehe mé k'uítuénxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochónta tjan kjuachaxin tsotehe tjan inaá tí nkexro tsórxjínhjin tjan, kjánchó jehó ijnko nkexro tinkáchónki Ìnchéni mé chrókótehe tjan. ⁴⁰ Kjánchó antsí chrókóchéhe tjan tí jehó tjan chrókuitohe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsórxjánka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonhenni kixin tí chrók'uitjani má ntá chrókóhnkeni má. Antsí tjetooan chrótjuèheni kichó ni kixin xikaha antsí chrókuiinkáchónkini Ìnchéni. ² Tí jnkojín nkexro ntácho kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án. ³ A ntá jnkojín nkexro tsotjuèhe Dios la Dios tsochóxin tí jehe ch'án.

⁴ A ntá tí chrókójneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuánhya ninkehó ntihi chjasintajni, la

ko ó noheni kixin jnkokoá Dios tjen. ⁵ A ntá síin nkehe nchek'in sín díos nkaya nkajni la ko chjasintajni na, kjánchó tí xikaha la kjá chrók'uixin itsjé díos la ko itsjé inché sín. ⁶ A ntá jeheni chóntani jnkokoá Dios na mé It'éni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Inchéni Jesucristo, na mé kaín xín nkehe síin la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuénhen sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyéhe ijnko díos, kixin náxa noehya sín má, ntá ntáchro sín kixin ó kuámá sín tí jie kuénte tí nkehe tsíkjanoya. ⁸ Ó noheni chaxín kixin jehya kixin chrókóxrjínhin Díos tí jeheni kixin tí nkehe jina chrókjóneni. Náhi. Jehya kixin chrók'uejóxinni jina kixin tí nkehe chrókjóneni na ko tí nkehe chrókjónehyani. ⁹ Méxra tjetóehyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni náxa noehya jina tinkáchónki Inchéni ntá tíha chrókjuasixín sín jie. ¹⁰ A ntá tí chrók'uikon sín kixin jahará ó nohará jina ntá ts'ejorá sinterá nkehe nkaxenhen ijnko njnkoje nkehe tsíkjanoya, ntá tí chojni kichó ni náxa noehya jina ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsíkjokehe chojni ijnko díos chaxínhya. ¹¹ A ntá jahará ó nohará jina ntá xikaha tjejoch'erá itsará sijnchek'itjayanrá tí kichó ni náxa noehya jina tinkáchónki Inchéni kixin Cristo k'uenyákonhen tí jehe ch'án kjaxin. ¹² Méxra tí xikaha chrókjuích'erá la chrókjuásinhínrá jie tí sín kichó ni náxa tinkáchónkihya sín Inchéni jina, na mé xikaha kjaxin chrókjuásinrá jie chrókuitekákuenhyará Cristo. ¹³ Méxra tí xikaha chrókjuasixín jie ijnko kichó ni kixin tí nkehe chrókjóneni, ntá íchá jina chrókjónehyani nto ínaa kixin xikahya ntá chrókjuichroexín tí sín kichó ni ntá chrókjuasixín sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Inchéni kixin janhan k'uíkuan ch'án. Jahará mé tjákoxinrá tí xra kjuít'a kuénte Inchéni. ² Iso sín ntáchro sín kixin tjátsoanhyana sín kixin ijnko apóstol tsíkjeýá Inchéni. Ntá jahará kaín rá mé chrókjuátsoanrá tí janhan kixin tí kuitekáonrá kuinkachónkirá Inchéni mé xikaha tjákoxinrá kixin chaxín janhan tsíkjeýána ch'án.

³ Méxra janhan jina chrókjuátaha tí sín xritjontana, chróntáxrjan kixin: ⁴ Janhan chonta kaín kjuachaxin chrók'uayáha nkehe chrókjonè la ko chrók'uia. ⁵ Kjaxin chonta kjuachaxin chróchonta ijnko chojni chjin tinkáchónki Inchéni chrók'uajikian éxi chóna tí í so sín tsíkjeýá Inchéni, la ko tí sín kichó Inchéni, la ko éxi chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsitóheni tí xra sich'exínni tjani? ⁷ ¿Nkexro ch'e xra soldado ntá chjchaköen ch'án ó chrókuicháxinhin? Nkexro k'uenká nta to uva ntá kjónehya ch'án to? ¿La ko nkexro t'ayakonhen kolélo ntá k'uíhya tí tsjen t'énnen sín va? ⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xikaha nixja. ⁹ Méxra kjaxin ntáchro tí xroon tsíkjin ch'ín Moisés óse

kíxin: “Chrókjuéjójáhyará kampoxa ir'va koxinta tí tsinkátja va noatrigo tió tsónkéhe sín noa.”* Tíha mé t'axrjexín kíxin jehya koxinta ó tóxakonhen Dios. ¹⁰ Náhí. Tóxakonhen ch'án kíxin tí jeheni. Méxra xíkaha nixja tí xroon kíxin chrók'uejójinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uáyéhe sín tí nkehe k'óna. ¹¹ A ntá tí k'uénkani tí itén Dios asánra, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xíkaha í so sín chóna sín tí kjuachaxin tjanchia sín nkehe ts'áyéhe sín, ntá jeheni antsí má chóntani kjuachaxin chrók'uáyéheni nkehe.

Kjonté chóntani kjuachaxin xíkaha la kjuanchahyani nkehe, kjonté kánhyó náxrjón k'uejóni kíxin tjinkakonhyani chrókjuanchiani nkehe chrók'uichjánxinhinni kíxin ách'e xíkaha ntá chrók'uinkákonhen tí itén Cristo chrókjuakoni. ¹³ Jahará ó nohará kíxin tí sín ch'e xra kúente nínko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntqe tí ko t'óyánxin sín ntiha. ¹⁴ Méxra xíkaha kjaxin k'uetqan Ìnchéni kíxin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóne sín. ¹⁵ Kjonté janhan síin kjuachaxin xíkaha chrókjuít'a, la xíkahya kjuít'a la ko kjaxin xíkahya ikjian tí xroon í kíxin jahará chróchjínará ichrén nkehe. Náhí. Kjonté chrók'ueñxian kjinta chrókjuáncháhyará nkehe kíxin tjínkakonhya kíxin ninkexró chrókuakitsjena tí kjuachéhe chonta.

¹⁶ Jehya kíxin chrokjuintahnke chrókjuákua tí tan tsaáxinni. Náhí. Janhan na ó jehí sít'a tí xra a. Nòa tí janhan tí chrókjuákohya tí tan jína chrókuaáxin chojni. ¹⁷ A ntá tí janhván tjínkavan chrókjuákua la xíkahó chrókjuacha janhan. A ntá tí tjákua itén Dios kíxin xíkaha kuítuanna ntá xíkahó ntaxiteyá tí xra chjina Dios. ¹⁸ A ntá nkehe chrókjuacha janhan? Tíha mé chrókjuacha janhan kíxin chrókóchàna má kíxin chrókjuákua tí itan tsaáxinni la nínkehó chrókjuánchàhya chrókjuacha la ntá tí xíkaha la chrókuákjaáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehí chrókjuít'ahá kaín xín chojni xra kíxin xíkaha antsí tsjé chojni chrókjuacha janhan kíxin chrókuitekaon sín Cristo. ²⁰ Tí tjèn tí síin tí sín judío ntayóha éxí jehe sín xíkaha janhan kíxin xíkaha chrókjuacha jnkojín sín chrókuitekaon sín. Na mé t'axrjexín kíxin tí chrókjuacha iso tí sín nchexiteyéhé tí ley k'uetqan ch'ín Moisés, la t'ichjánxín kíxin kjaxin janhan chrókjuíntaxiteyá tí ley kjonté janhan la xíkahya t'etuanna tí ley. ²¹ A ntá tí chrókjuacha jnkojín tí sín nchexiteyèhya tí nkehe k'uetqan ch'ín Moisés la ntayóha éxí tí jehe sín xíkaha janhan kjaxin, kjonté chaxín t'etuanna tí nkehe k'uetqan Dios méxra ntaxiteyá tí nkehe k'uetqan Cristo. ²² Tíó tjèn tí síin tí sín tienxínhya jína, ntá kjaxin janhan t'óna éxí tí jehe sín kíxin xíkaha chrókjuacha jnkojín tí jehe sín chrókuitekaon sín. Méxra ntayóha éxí kaín xín chojni xíkaha janhan kíxin xíkaha chrókjuacha janhan kíxin chrókuaá iso tí jehe sín. ²³ Mé xíkaha kaín tíha tjét'a kíxin chrókuinhin sín tí tan chrókuaáxin sín la ko kjaxinna antsí má chrókjuintayaonna Dios.

²⁴ Jahará ó nohará kíxin tió itsjé sín tsinkáko kíchó sín la kjánchó ójnkó nkexro tsjacha tí tsjtonhen nkehe. A ntá jahará xíkaha chrókuinkará kíxin chrók'uayéhérá tí nkehe chrókjuítonhanrá. ²⁵ Tí sín tinkáko kíchó sín na mé jína t'ayakonhen sín asén sín, títóhe sín kaín xín nkehe chrókjuich'ehe sín dañó kíxin tjínkaon sín chrókjuacha sín, chrók'uáyéhe sín kjonté ijnko corona

* 9: Deuteronomio 25.4

tsík'óna kayoa ó tjoka tsoxámá. Kjánchó jeheni ch'eni xra kuènte Ìnchéni kixin ntá ts'áyéheni ijnko nkehe chónhya tsoxámá. ²⁶ A ntá janhan jehya éxi ijnko chojni t'ikonhya chrókuinka. Jehya éxi xrinto ó chrókuanjonkian. ²⁷ Náhí. Janhan tjanjonkian tí cuerpo kuèntana, tétuanhan kixin jina chrókuinchexiteyàna kixin tóxakonna kixin chrókuásian ichrén jie ntá janhan chrókuachahya kjónté senó kjuáqoha itsje chojni.

10

Tí nkehe t'etoan ch'án kuènte tí nkehe tsíkjanoya

¹ Tjínkavan janhan kixin chrókónohará kichó ni kixin tí sín k'uaxrjenixinni ósé, kaín sín k'uixinkánki sín chrínki tí tjuj, la ko kaín sín k'uátòye sín Ntayaon Kjátse, ² la ko kaín sín k'uéchréhe sín ch'ín Moisés éxi yóhe chrókuikite sín kixin jnkokoá k'uéjé sín tí tjen tí tjuj la ko tí ntayaon la ko kjuínchexiteyéhe sín ch'án kixin jehe ch'án k'uék'etoan ch'án. ³ La ko kaín sín kjóne sín jnkokón nkehe kuxin nkaya nkajní ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyao Dios, na mé tí tjo a la mé t'axrjexín kixin Cristo tíha. ⁵ Kjánchó itsjé tí jehe sín kjuínchexèhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chróxaxinkakonxinni jeheni, chróntáchrohya asénni chrókuich'eni tí nkehe jínahya éxi kjuích'e tí jehe sín. ⁷ Méxra chrókuinkachónkihará jahará nkehe tsíkjanoya éxi k'uékinkáchónki iso tí jehe sín, éxi ntáchro tí xroon itén Dios tsíkjin sín ósé kixin: “Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín”.* ⁸ Méxra chrókuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoá yaon.† ⁹ Kjaxin chrókuinchekóninkakonhyani Ìnchéni éxi kjuích'e sín ntá ik'uén sín kixin kjónehe sín konche,‡ ¹⁰ la ko chrók'uantaxíenhyani Dios éxi k'uántaxínhin tí jehe sín ntá tí ángel kuènte kjuach'én mé kui k'óyán sín.§

¹¹ Kaín tíha kónhen tí sín k'uaxrjenixinni ósé kixin chrókónoexinni la ko k'óna xroon chrónka xikaha kixin nchexaxinkaonni tí jeheni tjejóni jie kixin í séhya tsjixixín tsjeje chjasintajni. ¹² A ntá tí nkexro ntáchro kixin ntoá tjen na chrókóxakonhen kixin chrókuichroehya. ¹³ Jahará naxa k'uatínsinkahyará ninkehó nkehe tí chrókuachahya chojni chrókónhen. Méxra jahará chróxaxinkáonrá Dios kixin jehe ch'án chrókuítòehya ch'án tí jahará kixin chrók'uatínsinkará nkehe imá xra chrókuachahyará. Méxra tí itsi ichrén nkehe tsonhanrá la Dios tsjinkítsará ch'án kixin chrókuachará chrók'uatínsinkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókuítòherá tí nkehe tsíkjanoya. ¹⁵ Nixjahará jahará kixin jahará chojni ó tienxín. Méxra jahóra chrokJuenkayáxinrá kixin á jina tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjakoqxinni tí ijnié Cristo ó k'uitji. La ko tíó tóchrít'óni tí niotja ineni, na mé kaín ni jnkokoá tjakoqxinni tí cuerpo kuènte Cristo. ¹⁷ Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjokehé sín Dios ntá xikaha tjakoqxin sín kixin xikaha tinkáchónki

* 10:7 Éxodo 32.6 † 10:8 Números 25.6-9 ‡ 10:9 Números 21.5-6 § 10:10 Números 16.41-49

sín. ¹⁹ Ntáxrjanhya kixin tí nkehe tsíkjangya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsíkjangya la antsí chóna kjuachaxin. ²⁰ Náhí. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jínahya la jehya Dios tjokehe sín tíha. Méxra janhan tjínkakonhya kixin xíkaha chrókjuich'era jahará chróxráxinkáonrá tí nchakuen tí jínahya. ²¹ Tí its'ini tí nkehe xraxinkakonxíni ijníe Ínchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrók'uini. Tí sineni tí nkehe xraxinkakonxíni tí cuerpo kuente Ínchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xíkaha chrókjuich'eni chrókjóneni tí nkehe. ²² ¿A jína chrókjuinchekóninkaonni Ínchéni ní? ¿Á jeheni antsí chóntani kjuachaxin la ntá jehé ch'án la náhi ní?

Chóntani kaín kjuachaxin kaín xín nkehe na kjónté antsí tjetooan tsotjuèheni kichó ni

²³ Síin kjuachaxin ichrén nkehe chrókjuich'eni. Kjánchó jehya kixin kaín nkehe la jína. Síin kjuachaxin ichrén nkehe chrókjuich'eni na kjánchó kénhya nkehe chrókjuinkítsa chrókónoheni tí nkehe kuente Dios. ²⁴ Chrókjuéyáhyará tí nkehe chrók'uejóxinrá jína jahóra. Náhí. Kjaxin chrókjuéyárá tí nkehe chrók'uejóxin jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xíkaha ntá ntoáhya chrókjuenkayáxinrá, ²⁶ kixin kuenté chjasintajni la kaín xín nkehe síin la kuente Ínchéni.

²⁷ A ntá jnkójin chojni tinkáchónkihya Ínchéni chrók'uíyahará sín kixin chrókjontekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. ²⁸ Kjánchó tí chróntáchro jnkójin sín kixin tí nto la ó tsíkjokehe sín ijnko nkehe tsíkjangya, ichro sín, ntá tí xíkaha la chrókjontehyará jahará, chrókóxakonhanrá kixin ntoáhya chrókjuenkayáxin tí nkexro chrónka xíkaha. ²⁹ Méxra ntáxrjan tíhi kixin tjínkakonhya kixin ntoáhya chrókjuenkayáxin chojni óké, jehya kixin ntoáhya chrókjuenkayáxinrá jahará.

Kjánchó isorá tsjanhankinará kixin nkekuente chrókóxakonhanrá nkehe chrókjuenkayáxin óké chojni kixin tí kjuachaxin chontará. ³⁰ Tí tjáncháha Dios kjuasáya kixin tí nkehe inè, ¿ntá nkekuente kixin chrókjontana chojni kixin kuente kjoné? ³¹ Tí chrókjónterá nkehe la ko chrók'uirá nkehe la ko ichrén xra chrókjuich'era la chrókjuákoxinrá kixin Dios kjuinkítsará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni njnkoé Dios. ³³ Janhan mé tjéyá kixin kaín xín xra jté'a chrókóxrjínhin kaín xín chojni, na mé jehya kixin tjéyá kixin janhván chrókjuak'é jína. Náhí. Kjaxin tjínkavan kixin chrókuaáxin í so chojni.

11

¹ Chrókjuákoxinrá jahará éxi kjuákoxiā janhan kixin janhan mé kjuákoxiā éxi kjuákoxin Cristo.

Jína chrók'uejó tí chojni chjin tíó tójnkoésé chojni

² Kichóni, chàna kixin xráxin xráxinkáonrá tí janhan la ko nchexiteyéhérá tí nkehe kjuákohárá. ³ A ntá tjínkavan kixin chrókiénxinrá kixin Cristo t'etuenhen jnkójnko chojni ntoa, la ko kjaxin xíkaha jnkójnko chojni ntoa mé t'etuenhen tí ichjién, la ko kjaxin xíkaha Dios mé t'etuenhen Cristo. ⁴ A

ntá tí jnkojín chojni ntoa xrasixín kachjinke ch'án tí tjenixjehe ch'án Dios, o xrasixín ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Ìnchéni t'etuenhen ch'án. ⁵ A ntá ijnko chojni chjin tjóhín kja tjan tí tjenixjehe tjan Dios la o tjóhín kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xii tjan. Mé tóyóhe éxi tsikjín tjan xikaha. ⁶ A ntá tí chojni chjin tjinkakonhya kixin chrók'uiáxin kja tjan nkehe mé chrókjín tjan. Kjánchó tí chrókósuèhe tjan chrókjín tjan, ntá chrók'uiáxin kja tjan tóte tió tójnkostrá. ⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratgé Dios la ko t'inkaséyanxín ch'án tí kjuachaxin kuènte Dios. A ntá tí chojni chjin mé t'inkaséyanxín tjan tí kjuachaxin kuènte tí xii tjan. ⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhi. Tí chojni chjin mé k'uaxrjeníxín tí chojni ntoa. ⁹ Chaxín k'ónahya tí chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin tí chojni chjin ts'iaxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín ángel. ¹¹ Kjánchó kain ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa. ¹² Kixin chaxín tí chojni chjin na tí chojni ntoa k'uaxrjeníxín. A ntá jie tí chojni chjin na mé t'axrjeníxín tí chojni ntoa. A ntá kain ni k'uaxrjeníxinni Dios.

¹³ Jahará nkechorá, zá ó nchoxon kixin ijnko chojni chjin tjóhín kja tjan chrónixjehe tjan Dios? ¹⁴ Jahórá chrókónohará kixin chrókósuèhe tí chojni ntoa chóna kaxihi kjinjin. ¹⁵ A ntá tí chojni chjin chóna kaxihi kjinjin la mé ntoá tíha kixin ó kuítuexin tjan kixin tsochóna tjan kaxihi tjan kjinjin kixin tsojtóhínhya kja tjan. ¹⁶ A ntá tí tjen jnkojín nkexro titekakonhya tíha xikaha ntá chrókónohará kixin jeheni la ko kain xín tí sín ninkqe Dios la xikahó kuènhenni.

Ntoáhya k'jone sín tí niotja xraxinkakonxín sín Ìnchéni

¹⁷ Méxra tí nkehe tjékjian la mé ijnko nkehe tóxrjinnahya tjejoch'erá. Tió tójnkostrá tíha la ijnko nkehe jina chrókjuich'erá. A ntá náhi la ijnko nkehe jínahya tjejoch'erá. ¹⁸ Na mé saoxín na mé ntácho sín kixin tió tójnkostrá la jnkokoáhya tjenkayáxinrá. Ntáxrjan kixin ách'e chaxín xikaha tjejorá. ¹⁹ ¿Xá t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhi? ²⁰ Méxra tí xikaha jnkokoáhya tjenkayáxinrá ntá tió tójnkostrá chrókjónterá niotja la chaxínhya xraxinkákonxínrá Ìnchéni tí xikaha. ²¹ Kixin tió sinterá la senó isorá tjejónterá tí nkehe tsikjasánkoará, la isorá la kjónté naxa t'énxinrá kjinta, la í sorá la tsikókoaná. ²² ¿Á chontahyará nchia ntoará? Ntahó chrókjóntexínrá la ko chrók'uíxinrá nkehe. Mé xikaha chontahyará kjuasáyé tí ninkqe Dios la ko nchesuèhérá tí sín nòa chónthaha ninkehó. ¿Nkehe tsootáxrjan? ¿Á tsootáxrjan kixin jina tjejoch'erá? Kjá náhi. Jehya jina tjejoch'erá.

Jina chróxraxinkakonxínni Ìnchéni (Mt. 26.26-29; Mr. 14.22-25; Lc. 22.14-20)

²³ Kixin Ìnchéni mé chjina ch'án tí nkehe kjuákoará: kixin tí tie tsikóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'o ch'án tí niotja ntá ntácho ch'án kixin: “Tíhi mé ntona xránjon its'en kixin jina ts'ejóxin tí jahará. Méxra xikaha sich'erá kixin

tsoxraxinkákonxínrá tí janhan”, ichro ch'án. ²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: “Tíhi mé tjákoxin kixin chaxín tsoxiteyá ijnko nkehe nixin kuénte Dios kixin ts'ítji jñina. Tió its'irá tíhi mé tsoxraxinkákonxínrá tí janhan”, mé chro ch'án. ²⁶ Kixin tí interá tí niotja la it'irá tí inté to uva mé xikaha tjeotjájákoxinrá kixin xikaha k'uénxin Ìnchéni. Mé xikaha tsjákoxinrá tsjixrakájia yaon tsokjan ch'án.

Ntoá chrókjóneni tí niotja kuénte Ìnchéni

²⁷ A ntá jnkojín nkexro chjini chrókjóne sín tí niotja la ko chrók'ui sín tí inté to uva xraxinkakonxíni Ìnchéni, mé xikaha chrókuasin sín jie chrókuikosáyehya sín tí cuerpo la ko tí ijñié Ìnchéni. ²⁸ Méxra jnkojnkoní chrókuenkayáxinni senó kixin á chóntahyani jie na ntá chrókjóneni tí niotja la ko chrók'ui ní tí inté to uva. ²⁹ A ntá tí xikaha chjini chrókjóneni la ko chjini chrók'ui ní la chaxínhya chróxraxinkakonxíni tí cuerpo kuénte Ìnchéni la mé tí xikaha chrókjuich'eni la chrókuasótexíni tíha. ³⁰ Mé xikaha it-sjérá níhará la ko itsjérá tsankahyará la ko jnkojínrá k'uénrá. ³¹ A ntá tí chrókuatsóanni nkexrí tjen asénni jeheni ntá Ìnchéni t'ichjánxjenhya chrókuincheckjasóteni ch'án. ³² A ntá kjónté chrókuincheckjasóteni Ìnchéni ntá chrók'uitjani chrókuincheckiteyéheñi ch'án, ntá chrókuasótehyani éxí tsjasóte tí í so chojni chjasintajni.

³³ Méxra kichó ní, tió tójnkoisésá sinterá la chróchonhénrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jina senó chrókjónexín nkehe ntoe ó kixin ntá chrókuincheckjasótehyará Dios kixin xikaha ntoáhya tójnkoisésá. A ntá tí í so nkehe la tsjásiyóxian janhan tió tsjasántsjahará.

12

Nchakuen Dios mé chjéhe kjuachaxin jnkojnko chojni

¹ Kichóni, tjínkavan kixin tsonohará jina kixin nkexrí síin tí kjuachaxin tjanjon Nchakuen Dios t'áyéhe jnkojnko chojni.

² Jahará ó nohará jina kixin tió naxa kuinkachónkehyará Ìnchéni na mé kuinkachréhéra tí nkehe tsíkjanoya nixjahya. ³ Méxra chrókonohará kixin nijnko nkexro nixjaxin kjuachaxin Nchakuen Dios tsjacha ts'ántaxínhin Jesús, la ko nijnko nkexro tsjacha tsontácho sín kixin Jesús mé Ìnché sín tí nixjaxínhya sín tí kjuachaxin Nchakuen Dios.

⁴ A ntá nchónhya xra kuénte kjuachaxin Nchakuen Dios síin la kjánchó jnkokoá Nchakuen Dios mé tjetjanjon. ⁵ La ko síin nchónhya nkexrí sich'ehe ni xra Ìnchéni, kjánchó Ìnchéni la ójnkó nkexro tíha. ⁶ La ko nchónhya nkehe t'axrxéní tí xra ch'e jnkojnko chojni la kjánchó jnkokoá Dios tjetjanjon tí kjuachaxin ch'exíni xra kaín ní. ⁷ Jnkojnko chojni mé kuítonhen kixin chrókuákoxin kjuachaxin kuénte Nchakuen Dios kixin xikaha chrókuinkítsa kichó. ⁸ Iso chojni mé ts'áyéhe kjuachaxin tsonixja sín kjuaxrexinkaon jina kixin tjínkítsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuénte Dios noehya tí í so sín kixin Nchakuen Dios mé tjínkítsa sín tsonixja sín. ⁹ La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjínkítsa. La ko í so chojni mé ts'áyéhe kjuachaxin sincheckitohe chojni jina. ¹⁰ La ko í so chojni mé ts'áyéhe

kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxín á kjuachaxin kuènte Nchakuen Dios o á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkíva ókjé naxa k'uitjahya sín tsonixjaxín sín ijnko nkehe kuènte Dios, la ko í so chojni mé ts'áyéhe kjuachaxín tsochronkaxín nkexrí t'axrxjén tí nkehe ókjé nkíva tsíchronka tí í jnko chojni. ¹¹ Kjánchó kaín tíha jnkokoá Nchakuen Dios mé tjinkĩtsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xrā chrókjuich'e sín.

Káinni k'ónani jnkokoá cuerpo kuènte Cristo

¹² Cristo la éxí yóhe ijnko cuerpo chóna nchónhya parte. A ntá ijnko cuerpo la jnkokoá kjánchó nchónhya parte chóna. Kjónté nchónhya parte chóna tí cuerpo la tí cuerpo la ójnkó. Mé xikaha Inchéni Cristo la ójnkó tí jehe ch'án. ¹³ Káinni kjónté chojni judío la kjónté chojni jehya judío, la kjónté chojni ch'exón xrā, la kjónté chojni t'ítuenhya, kaín ni na mé jnkokoáxón Nchakuen Dios kuíkítexínni, na kaín ni k'ónani jnkokoá cuerpo kuènte Cristo, na mé éxí jnkokoá nkehe ik'uíni kaín ni na mé k'uáyéhe ni tí jnkokoá Nchakuen Dios.

¹⁴ Kixin tí cuerpo kuènteni la jehya jnkokoá parte chóna. Náhi. Itsjé parte chóna tí cuerpo. ¹⁵ Tí chróntáchro tí tóteni kixin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kixin ó jehe cuerpo kuènte. ¹⁶ Kjaxin tí chróntáchro ijnko ntatsjoni kixin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kixin ó jehe cuerpo kuènte. ¹⁷ Tí chaxín kuènté cuerpo kuènteni chrók'óna ikonni, ¿ntá nkexrí chrókuinhini? A ntá tí chaxín kuènté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸ A ntá Dios kjuanjon ch'án kjuachaxin nkexrí ch'e xrā jnkojnko nkehe kuènte cuerpo kuènteni kixin jehe ch'án nkexrí tjinkaon ch'án kóxrjínjin ch'án. ¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a? ²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kixin: “T'ichjánxienhyani tí jaha”, la ko kjaxin tí kjani xitjahya tsontáche tí tóteni kixin: “T'ichjánxinnahya tí jaha.” ²² Náhi. Tí nkehe kuènte tí cuerpo tónhenni kixin tjetuanhya na mé kjónté antsí má t'ichjánxin ²³ la ko í so nkehe kuènte tí cuerpo la kánhyó chónteheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakohenni kixin tsonoxínhya. ²⁴ A ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyeheyani jeheni ²⁵ kixin ninkehó xitjahya chrókikayehé tí cuerpo kixin kaín tí nkehe la jnkokón tjinkĩtsa kichó. ²⁶ Tió tsíkóníhi ijnko parte kuènte tí cuerpo la kaín tí í so parte la kjaxin tjeté; la ko tió tjikosáyehe sín ijnko parte la kuènté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸ Méxrā Dios kjueyá ch'án chojni sich'ehe ch'án xrā kuènte njnko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá

ch'an iso chojni chjéhe ch'an kjuachaxin tsjasin sín kjuaxroan, la ko kjaxin kjueyá ch'an í so chojni chjéhe ch'an kjuachaxin sinchekitohe chojni níhi jína, la ko kjaxin kjueyá ch'an í so kjojni chjéhe ch'an kjuachaxin antsí tjinkítsa kichó, la ko kjaxin kjueyá ch'an í so chojni chjéhe ch'an kjuachaxin ts'etōan xra kuènte ch'an, la ko kjaxin kjueyá ch'an í so chojni chjéhe ch'an kjuachaxin tsonixjaxin sín í jnko nkiva. ²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxin sín ijnko nkiva ókjé, la ko kénhya chojni chóna kjuachaxin tsochronkaxin sín nkexrí t'axrxéjin tí nkehe chrónka tí sín nixjaxin ijnko nkiva ókjé. Chaxin kjá náhi. ³¹ Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntia antsí jína chrók'uejorá.

13

Chrótjuèheni kichó ni

¹ Tí chrónixja nkívee chojni ó la ko kjaxin chrónixja éxi nixja tí sín ángel, ntá naxa chrótjuahya kichó ni la ó chónkó tíha la mé éxi chrókóyóna chica tsjánka ó la ko éxi ijnko chica platillo nchevékjan sín ó, kixin ninkehó són chónahya. ² La ko tí chrónixja itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókuacha chróntátjan ijnko jna sáchrókjui ókjé, kjónté tí xikaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókujintakitonhan tí sín nòa kaín nkehe chonta, la ko tí chrókuánjuan kjuachaxin kixin chróchena kuenténa, kjónté tí xikaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejina asénni, la ko tsochjinoxienhyani, la ko sinchehnkehyaní, la ko tsohnkehyaní, ⁵ la ko ch'ehyaní ninkehó nkehe náxrxónhya, la ko tjejáhyani nkehe kuènteni ó, la ko tsonínkakonhyani tjoka, la ko tsochóntahyaní kjuanínkaon isé, ⁶ la ko kjaxin tsochèhyani tió í jnko chojni tjasin jie. Náhi. Chrókóchéheni tió ijnko nkehe jína sítónhen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jína sín la ko naxa chrok'uejóchónhenni chrókónínkakonhyani.

⁸ Tí tjuèheni kichó ni la jnkochrín sín tsjak'e ts'itjáyanyha. A ntá itsi ijnko yaon í t'ichjánxínhya tsochrónka chojni itén Dios, la ko tsókohya kjuachaxin tsonixjaxin chojni ókjé nkiva, la ko tsókohya kjuachaxin tsonohe chojni má. ⁹ Naxa t'itjáyán tí nkehe chrókónoheni la ko naxa t'itjáyán tí nkehe chróchronkaxínni. ¹⁰ A ntá tió tsonoheni kaín xín nkehe ntá tí nkehe ntoáhya k'uénoheni la mé ts'itjáyán.

¹¹ Tió naxa chánjan janhan k'uénixja éxi chánjan la ko k'uékjenkayáxian éxi chánjan. Ntá kóntetona ntá kuitōha tí nkehe kuènte chánjan. ¹² Méxra éxi ijnko xrosentá t'ikonxínhyani jína jie, ntá tsi ijnko yaon chr'éxin ntá ts'ikonxínni jína kaín nkehe. Ijie naxa t'itjáyán tí nkehe chrókónona; ntá tsi ijnko yaon tsonóna jína kaín xín nkehe éxi xikaha kjaxin Dios chóxin ch'an tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó

chojni tsochónhen sín, la ko ts'ejó chojni tsotjuèhe kichó. A ntá iní nkehe siín, la kjánchó antsí má t'ichjánxin tsotjuèheni kichó ni.

14

Tí nixjāxin chojni ókjé nkiva

¹ Chrókóxakonhanrá kixin chrótjuèhérá kichuárá la ko kjaxin chrókjuéyará kixin Nchakuen Dios chrótjáhará kjuachaxin. Kjánchó antsí chrótjinkáonrá tí kjuachaxin tsochronkará ijnko nkehe kuènte Dios. ² Méxra, tí nkexro nixjāxin ijnko nkiva ókjé mé nixjehé sín Dios ó la ntá chojni la náhi, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehé chojni ntá xikaha tjinkitsa tí í so sín kixin antsí chrók'uitja sín nkehe kuènte Dios la ko chrókóchéhé sín. ⁴ A ntá tí nkexro nixjāxin ijnko nkiva ókjé la mé tjinkitsa jehó ch'án antsí tsohohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkitsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjāxinrá ijnko nkiva ókjé. Kjánchó antsí tjetoan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjetoan chrónixjāxinrá ókjé nkiva tí noahyará tsochronkaxínrá nkexrí t'axrjexín tí nkehe chróchronkará kixin chrókuínhin kaín tí sín tinkáchónki Ínchéni kixin antsí chrók'uitja sín nkehe kuènte Dios. ⁶ A ntá kichó ni, tí chrókjuasantsjahará chrónixjāxinrá ijnko nkiva ókjé la ó chónkó tíha. Íchá jína chrónixjāxinrá ijnko nkiva tiénxinrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios naxa noahyará, la chróxrjankaxián ijnko nkehe tjinkaon Dios chrókónohará, la chrókjuákoáxinrá ókjé nkehe nixin.

⁷ Kixin kjaxin tí ison flauta la ko tí isón arpa, tí jnkokónhya chróntácho njkojnko són, ntá chrókjuachahyani chrókjuatsganni nkehe tí ntácho tí són a. ⁸ La ko éxi yóhé tí siín guerra, tjanjonko kichó sín, la ntá ntoáhya chrók'uánao sín tí chica trompeta, ntá kohya nkexro chrókóyaxínhin sín sáchrókjuikjanjonko kichó sín. ⁹ Kjaxin xikaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xikaha tjejonixjará éxi chjéhe xrjntó ó. ¹⁰ Chaxín siín itsjé nkiva chjasintajni la ko kaín nkiva la siín chojni tienxín sín. ¹¹ Kjánchó tí chrókianxinhya janhan tí nkehe tsontácho ijnko nkexro, ntá tí nkexro a ts'ikon tí janhan éxi ijnko nkexro tsíkijxin ókjé la ko kjaxin janhan ts'íkuan tí jehé ch'án éxi ijnko nkexro tsíkijxin ókjé. ¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkitsa tí í so sín kuènte njnko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjāxin ijnko nkiva ókjé la chrókjuanchehe Dios kixin chrókjuinkitsa chróchronkaxín ch'án nkexrí t'axrjexín tí tan a. ¹⁴ Kixin tí tsonixjāxin Dios ijnko nkiva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntana la ókjé tjen. ¹⁵ A ntá tí xikaha, ¿nkehe chrókjuít'a? Íchá jína chrónixjāxin Dios tí nchakuenná la chrókianxin janhan, la ko tió chrótsje janhan himno la chrótsjexian nchakuenná la ko chrókianxin janhan. ¹⁶ Kixin tí tsochjéxinrá kjuasáya Dios nchakuanrá ó ntá tjejótihin í so chojni, ¿ntá nkexrí kixin tí sín naxa kienxínhya sín tí nkehe

nixjehérá Dios chróntáchro sín “Amén, ó nchoxon”? ¹⁷ Kjónté imá náxrxjón tí chrókjuanchehérá Dios kjuasáya la ntá chrókiénxínhya tí sín tjejóntinhin, ntá chrokjuiñkítsahya kixin chrók'uitja sín nkehe kuènte Dios. ¹⁸ Tjáncháha Dios kjuasáya kixin ántsi chonta janhan kjuachaxin tsonixjaxian ókjé nkíva, la ntá jahará la kánhyó nixjará xíkaha. ¹⁹ Kjánchó tió tójnkotsé chojni kíchó ni la mé ntáxrxjan kixin ántsi tijnkavan chrónixja janhan kjónté in'ó palabra ó tiénxin sín kixin xíkaha chrókjuakuxian sín, la ntá kánhyó chrókójina kjónté ite míl palabra chrónixjaxian ijnko nkíva ókjé tiénxínhya chojni.

²⁰ Kíchóni, chrókjuenkayáxinhyará éxi chánjan. Kjánchó chrók'uejorá éxi chánjan náxa noehya nkehe jínahya. A ntá chrókjuenkayáxinrá éxi chojni ntéto. ²¹ Tí xroon tsíkjin sín ósé nkexrí k'ueqoan Dios mé ntáchro kixin: “Janhan tsonixjaxian ókjé nkíva la ko itén chojni ókjé kixin tsinhin tí nacióon Israel na kjónté tsitekakonhya sín, xíkaha ichro Ìnchéni.”* ²² A ntá tí kjuachaxin tsonixjaxin chojni ókjé nkíva mé xránjon chrókjuaqoxin chojni chrókuinhin tí sín tinkáchónkihya Ìnchéni, jehya kixin t'ichjánxin chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuakoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni. ²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjaxinrá ókjé nkíva, ntá tí chrók'ui xenhen nchia ijnko chojni náxa kuènhya sín xíkaha, o chrók'ui xenhen nchia ijnko chojni náxa tinkáchónkihya Ìnchéni ntá chrókuinhin sín xíkaha la kjá tsontáchro sín kixin ó k'uíxikjánrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'ui xenhen nchia ijnko nkexro tinkáchónkihya Ìnchéni, o chrók'ui xenhen ijnko chojni náxa tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jje chónta sín ntá chrókúitohe sín kaín jje chónta sín. ²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxrxaxinkaon sín Dios la ko tsontáchro sín kixin chaxín tjejókoará Dios.

Ntoa chrókjuich'eni kaín xín nkehe tió tójnkotséni

²⁶ A ntá kíchó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuakorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkíva ókjé, la ko isorá chróchronkaxinrá nkexrí t'axrxjén tí nkehe nixjaxin tí í so sín ókjé nkíva. Kjánchó kaín tíha tsonhen kixin tí sín kuènte njnko chrók'uitja sín nkehe kuènte Dios. ²⁷ A ntá tí chrónixjaxin sín ijnko nkíva ókjé na mé yaá o iy'á chojni chrónixja sín la ko chrók'uíxinkí chojni tsonixja, la ko t'ichjánxin kixin jnkojín nkexro nohe tsochronkaxin nkexrí t'axrxjén tí nkehe nixja sín. ²⁸ A ntá tí kohya ninkexro tí njnko ntaha tsjacha tsochronkaxin nkexrí t'axrxjén tí nkehe chrónixja sín, ntá chrónixjaxinhyá sín ókjé nkíva tí tjejóntjnkotsé sín, na mé chrónixjehé sín asén sín ó la ko chrónixjehé sín Dios ó. ²⁹ Tjánjonrá kjuachaxin kixin tsonixja yaá o y'á chojni k'uíyéhe sín kjuachaxin tsochronka sín nkehe kjuínchenohe sín Dios. A ntá tí sín tjejóntinhin mé chrókjuenkayáxin sín á o nchoxon tí nkehe kuínhin sín. ³⁰ A ntá tí xrináhya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro senó kjuankixin chrónka nkehe la chróchónhen ch'án chrónixjahya ch'án. ³¹ O nchoxon jnkojnkorá chróchronkará nkehe

* 14:21 Isaías 28.11-12

tjáhará Dios kixin xikaha kaín rá chrók'uitjárá la ko chrókócháhará. ³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxin í jnko nkexro. ³³ Kixin Dios tjanjon tí kjuaxróxin, a ntá tjinkakonhya ch'án kixin yóxinhya chrók'uejóni.

Tió tójnkotsé chojni kichó ni tinkáchónki Ìnchéni ³⁴ chrónixjahya tí chojni chjin jnkosiné servio. Kohya kjuachaxin xikaha, na mé chrójuinchexiteyéhe sín tí sín ntoa éxi t'etóan tí ley kuente Dios. ³⁵ Tí tjinkaon sín tsoñohe sín nkehe na mé chrókjuanchankíhi sín xìi sín tío tjiji sín ntóe sín. Náxrjónhya chrónixja ijnko chojni chjin nkehe jnkosiné servio.

³⁶ Chrókónohará kixin tí itén Dios xrankíxixínhya tí tjejórá la ko jehya jahóra k'uayéhérá tíha. ³⁷ A ntá tí tjen jnkojin nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjékjian mé ijnko nkehe tsík'etóan Ìnchéni. ³⁸ A ntá tí nkexro titekakonhya tíhi na ntá jahará chrókuitekákueñhyará ch'án kjaxin.

³⁹ Méxra kichó ni, chrókjuéyará kixin chrók'uayéhérá kjuachaxin chróchronkará nkehe kjuínchenohará Dios la ko chrókuitóhérá tsonixjaxin chojni ókjé nkíva. ⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí títóehyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saóxín, kjuákohará tí nkehe k'uayáha kixin Cristo k'uenyákonhen ijíeni, na mé xikaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí nixin yaon éxi ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxin chjina quinientos chojni kichó ni jnkokóá k'uéjé sín k'uíkon sín ch'án. A ntá jie itsjé tí sín a naxa tjejó sín, a ntá jnkojin sín na ó tsík'en sín. ⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol inaá.

⁸ A ntá kjuixixín janhan k'uíkuan Ìnchéni éxi ijnko xjan naxa xetjahya yaon chrókókíhi. ⁹ Kjánchó janhan kánhyó tjetóan la mé tóyóehya tí í so sín tsíkjejá Ìnchéni la ko tósuàna chrók'óna ijnko nkexro ch'ehe xra Ìnchéni kixin janhan mé k'uénínkakonhan tí sín nínkoje Dios. ¹⁰ Kjonté jínahya kjuít'a la kjuasáyé Dios la ko kjuachaxin kuente ch'án mé kjuítóxinhin tí kjuenkayáxian, na mé chónkóhya kuíkonóana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuinkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuente ntáchrorá jnkojinrá kixin tsoxechónhya chojni tsík'en? ¹³ Tí chrókóchaxín tí nkehe ntáchrorá kixin tsoxechónhya chojni tsík'en, ntá kjaxin chróxechónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sinkíhya la ko chónkó tí nkehe kuítekáonrá. ¹⁵ A ntá tí chaxínhya xikaha tsíkónhen,

la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en ¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekaonrá tí jehe ch'án kixin naxá chrókjuínhya tí ijjárá. ¹⁸ La ko tí chrókóchaxín tiha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókúinkáchónkini Cristo kixin chrókjuinkítsa ch'án tí jeheni chjasintajni ntihyó, ntá kohya chojni chrókóyóhe tí jeheni, imá chrókónòéni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxi tí nkehe tsík'óna saxón kixin jehe ch'án saxón xechón ch'án. ²¹ Méxra jnkokóá chojni ntoa kjuankixin kjuasin jie, ntá kjuankixin k'uén kaín xín chojni chjasintajni, la ko kjaxin jnkokóá chojni ntoa xechón, ntá xikaha tsoxechón kaín chojni tsík'en. ²² Kixin tí jie kjuasin ch'ín Adán ntá kaín xín chojni sí't'énxín sín. A ntá Cristo la kaín ni tsochóntaxínni kjuachón. ²³ Jnkojnkonni éxi tsoñhenni tocar, na mé saxón xechón Cristo, a ntá chr'éxin tió tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios. ²⁵ Na mé t'ichjánxin ts'etóan Cristo tsjixrakája tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyán la mé tí kjuach'één. ²⁷ A ntá Dios kjuanjón kjuachaxin kixin kaín nkehe síin mé chrók'uetuénhen Cristo.* Kjánchó tió xikaha ntácho ro tí xroon itén Dios tsikjin sín ósé kixin kaín xín nkehe mé ts'etuénhen ch'án, ntá ó noheni jina kixin jehya kixin Dios la chrók'uituénhen ch'án inaá. Náhi. Jehe ch'án mé chjéhe Xjeen ch'án kaín kjuachaxin ts'etuénhen ch'án kaín xín nkehe. ²⁸ A ntá tió tsjixin tsjacha Cristo ts'etuénhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuénhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín inaá?

³⁰ A ntá tí xikaha, ¿nkekuènte kixin kaín yaon kjuaxróxinhya tjejóni nínkakonheni chojni? ³¹ A ntá kichó ni, kaín yaon síin kjuachrakon chrók'uén janhan. Chaxin tíhi, kjánchó chàna kixin jahará kjaxinrá tinkachónkirá Ìnchéni Jesucristo. ³² Kjónté kóninkakonna chojni chjasin Éfeso éxi iko jiehe la kjónté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntácho ro tí sín titekakonhya Ìnchéni kixin chrókjóné sín la ko chrók'ui sín kixin ijie la o ntóye chrók'uen sín.

³³ Chrókuitóéhyará chrokjuít'áyahará sín. Éxi ntácho ro sín kixin: "Tí chrók'uejókotoxinni chojni jínahya ntá chrók'uitjáyán tí nkehe jina tjenkayáxinni." ³⁴ Chrókjanrá ntia jina ntoa la chrókjuásinhyará jie. Méxra isorá naxá chonhyará Dios. Na mé ntáxrjan tíhi kixin chrókósuàhará.

Nkexrí tsoxechón tí sín tsík'en

³⁵ Kjá jnkójínrá tsjanchankínará kixin: "¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?" ³⁶ Lontírá tjanchankínará xikaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan. ³⁷ Tí nkehe t'enkanı la jehya tí ka a. Náhi. Tí nkehe t'enkanı la

* 15:27 Salmo 8.6

noatrigo o í jnko tje. ³⁸ Kjánchó Dios kjuanjon kjuachaxin kixin jnkojnko nta ts'óna éxi tjinkaon ch'án, la ko jnkojnko nta tsochóna tje kuènte. ³⁹ A ntá jehya kaín tí cuerpo la jnkokon. Náhi. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche. ⁴⁰ Na mé kjaxin xikaha siín cuerpo kuènte tí sín ángel tjejó nkaya nkajní la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrxón tsjehe la ko kjaxin tí cuerpo kuènte tí chojni la náxrxón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjónté itsjé konotsé la ókjé t'inkaséyanxín jnkojnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsojtje, a ntá tí nkehe tsoxechón la mé ijnko nkehe ts'itjáyanhya. ⁴³ Tí nkehe tsoxravá la ijnko nkehe náxrxónhya tíha, la ntá tí nkehe tsoxechón la ijnko nkehe imá náxrxón. Tí nkehe tsoxravá la ijnko nkehe chónthaya kjuachaxin, la ntá tí nkehe tsoxechón la ijnko nkehe tsochóna kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochóna kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochóna kjuachaxin kuènte Nchakuen Dios.

⁴⁵ A ntá éxi ntáchro tí xroon itén Dios kixin: “Tí chojni ntoa k'óna saoxín mé ch'in Adán tíha mé k'uáyéhe ch'án kjuachón ó.”† A ntá tí ó kjuixixín ikui í jnko ch'in éxi yóhe Adán, kjánchó jehe ch'án mé chóna ch'án nchakuen tjanjon kjuachón. ⁴⁶ Kjánchó jehya saoxín k'óna tí cuerpo antsí chóna kjuachaxin kuènte Nchakuen Dios. Náhi. Saoxín k'óna cuerpo kuènte chojni chjasintajni ó, la ntá chr'éxin k'óna cuerpo antsí chóna kjuachaxin kuènte Nchakuen Dios. ⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajní kuixín ch'án. ⁴⁸ Tí cuerpo siín chjasintajni mé yóhe tí cuerpo k'uéchóna tí nkexro tsík'óna nche. A ntá tí cuerpo siín nkaya nkajní mé yóhe tí cuerpo chóna tí nkexro kuixín nkaya nkajní. ⁴⁹ Éxi senó tóyóhēni tí nkexro k'óna nche, ntá xikaha chr'éxin tsóyóhēni tí nkexro kuixín nkaya nkajní.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'etqan ch'án. Na mé tí nkehe tsjeje xitjahya ts'áyéhe tí nkehe tsjejehya. ⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chóntani. ⁵² A ntá xrinahya titàya tjejóni ntá éxi chróchr'áton konni la ko chrókuakitjenkini konni xikaha tíó tsjixixín tsinhinni tsontáchro trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxinhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxin ts'inkáya nkehe chónhya ts'en. ⁵⁴ A ntá tíó tí cuerpo chóntani la tsjeje, na mé t'ichjánxin ts'inkáya tí nkehe chónhya tsjeje, la ko tíó tí cuerpo chóntani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxi nixja tí xroon itén Dios ntáchro kixin: “Tsjachahya tí kjuach'én la mé tsjacha tí kjuachón.”‡ ⁵⁵ “Jaha kjuach'én, ¿kjá tí kjuachaxin kuènta kixin chrók'oyánni?”§ ⁵⁶ Tí jie

tjasinni mé kujxin tí ts'enni. A ntá tí ley k'uetqan ósé antsí k'uixixín jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxinni.

⁵⁸ A ntá jahará kichó ni, imá tjuahará. Chrókuijtoéhyará tinkachónkirá Ìnchéni. Jnkochrixín chrókjuich'ehérá Ìnchéni xrá antsí jína kixin ó nohará jahará kixin tí xrá ch'eheni Ìnchéni jehya chónkó tíha.

16

Tí ofrenda tjenájin sín tsochr'énnen sín tí sín tjejó chjasin Jerusalén

¹ A ntá tí chichaon tjenájinrá kixin tsjínkitsará tí sín kichó ni tinkáchónki Ìnchéni na mé chrókjuich'erá éxi kuétuanhan tí sín ninko estado Galacia. ² Jnkojnko domingo jnkojnkorá chrókuakitsjenteherá nkerí síká chichaon kjuachará tí semana kjuich'erá xrá kixin t'ichjánxinhya chrókjuasánjia janhan ntá chrókjuenájinnrá chichaon. ³ A ntá tió tsjasán janhan tsétuanhan tí sín tsjeyará kixin sátsji sín chjasin Jerusalén, na ntá tsokjian xroon tsjixoxín sín tí chichaon tsikjénájinnrá tsjikaán tí sín kichó ni ntiha. ⁴ A ntá tí chrókójína kjaxin janhan sáchrókjuiyá, a ntá sáchrókjuikian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntiha chjasin Corinto. ⁶ Ach'e ntaó chrókuitona chrók'uatinkajia nchakuen kin. A ntá jahará chrókjuínkitsará tí janhan tió sátsjia óké chr'éxin. ⁷ Méxrá tjínkakhonhya chrók'uatínkoá chrótsjahará ó. Náhí. Tjínkavan chrókuitona iso yaon tí tjejorá ntiha tí Ìnchéni chrókjuanjon kjuachaxin. ⁸ Kjánchó tsitona chjasin Éfeso tsjixrakájia yaon Pentecostés, ⁹ kixin ntihi antsí chonta kjuachaxin chrókjuit'a xrá kuente Ìnchéni la ko jína chrókónhen tí xrá kjónté nchónhya chojni ninkakonna.

¹⁰ A ntá tí tsjiji ch'ín Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xrá éxi janhan. ¹¹ Kaín tí jahará chróchontehérá ch'án kjuasáya. Tjínkitsará ch'án kixin jína itsi ch'án ntihi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóhahá ch'án kixin kjaxin chrókjuijiko ch'án tí í so kichó ni, kjánchó tjínkakhonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuijtoéhyará tí tinkachónkirá Ìnchéni. ¹⁴ Kaín nkehe chrókjuich'erá la koí chrótsjuehérá kichuárá.

¹⁵ Na ntá kichó ni, ó nohará kixin tí sín kjéhya ch'ín Estéfnas saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xrá a tjínkítsa sín tí sín kichó ni tinkáchónki Ìnchéni. ¹⁶ Tjínkavan kixin chrókjuinchexiteyehérá tí sín tjínkítsa éxi tí jehe sín la ko kaín tí sín ch'e xrá. ¹⁷ Chàna kixin ó kui ch'ín Estéfnas la ko ch'ín Fortunato la ko ch'ín Acaico, kixin jahará kjónté tjejohyará. ¹⁸ A ntá jehe sín kjuínchechéhe sín asenná éxi kjuínchekhárá sín. Chróchontehérá kjuasáyé chojni xjka.

¹⁹ Tí sín tójkotsé estado Asia xraxinkaon sín tí jahará. Kjaxin ch'in Aquila la ko tjan Priscila la ko tí sín tójkotsé ntqe sín ima xraxinkaon sín tí jahará kixin tinkáchónkirá Ìnchéni. ²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkójina.

²¹ Janhan Pablo xráxinkávan tí jahará ikjian xroon chr'anhánrá la tjaná kjinxian tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énhen ch'án tí ninko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon i chr'ánhanráni tí jahará ninko Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. ² Kjuasáyé It'éni Dios la ko Ìnchéni Jesucristo chrókuuntayaonrá ch'án la ko chrótjáhara ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehé It'éni mé tikonóeheni ch'án la ko xráxin nchechéheni ch'án. ⁴ Jehé ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxí yóhe jehe ch'án kjuínchechéhe ch'án tí jeheni. ⁵ Mé xikaha tjejótjasóteni éxí yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. ⁶ Tjejótjasóteni kixin tí jahará chrókóchàxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxí tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejótjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjancaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaaxrjexínni ntiha naxa chrók'uejóchónni. ⁹ Ó kónoheni kixin chrók'uenxínni ntiha. Mé xikaha kónhenni kixin chrókónoexínni kixin tí jehóni la chrókjuachahyani tíha. Náhi. Chrókuínchónkini Dios, mé tí nkexro nchexechón chojni tsík'en. ¹⁰ Jehé Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án ¹¹ tí tjinkítsaráni tjancheherá Dios kixin tsjinkítsani ch'án. A ntá tí tsjé chojni chrókjuanchehe Dios kixin tsjinkítsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehe ch'án kjuínkítsani ch'án.

Nkekuénte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'yehyani chojni, mé xikaha k'uejókoaráni. Ntá jehya kjuachaxin kuénteni kjuachaxinni xikaha. Náhi. Kjuachaxin kuénte Dios mé kjuínkítsani kixin xikaha k'uejóni. ¹³ Tió chr'ánhanráni xroon, kjinhyani nkehe chrókiénxinhyará. Náhi. Jehó tí nkehe chrókjuínchekuáxinrá chrókiénxinrá. Tjéçonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsócháhará kixin xikaha kjuakoharáni jeheni la ko kjaxin tsóchéheni kixin jahará kuitéakonrá.

¹⁵ Mé xikaha kjuenkayáxian kixin saoxín chrókjuasántsjahará tí jahará kixin chrókócháhará kixin yáya chrókjuasántsjahará. ¹⁶ Kjuenkayáxian janhan chrókjuasántsjahará saoxín tió sáchrókjuia estado Macedonia la ko chrókjuasántsjahará inaá tió chrókjanxiàn ntiha. Mé xikaha

chrókjuínk̄tsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xikahya kjuáteheni tí jahará kixin chrókjuijini la ko chrókjuijihyani. ¹⁹ Kixin Cristo Jesús mé Xjeen Dios, na mé tí nkexro kjuákoxin ch'ín Silvano la ko ch'ín Timoteo la ko kjuákoxian janhan tí k'uéjóni ntiha, mé xikahya k'uéchronka ch'án, kjuích'iyahya ch'án ninkehó. Náhí. Kaín nkehe tjakoni kuente Cristo la chaxín tíha. ²⁰ Kixin kaín nkehe tsichronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni "Amén, ó nchoxon" kixin tí kjuachaxin kuente Cristo Jesús. ²¹ A ntá Dios mé kjuínk̄tsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochóna asenni senó kixin tsonoexínni kixin chaxín ts'áyeheni nkehe chr'éxin.

²³ A ntá tí naxa kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkakhonhya kixin chrókóxakonhanrá tí chrókjuéntuáhárá tí jahará inaá. ²⁴ Jehya kixin chrókuétuáñhánrá kixin nkexrí chrókuinkachónkirá Inchéni kixin ó nõna kixin ntoá tinkachónkirá ch'án. Ó jehí tjinkaonni chrókjuínk̄tsaráni kixin antsí má chrókócháhará.

2

¹ Mé xikaha kjuenkayáxian kixin chrókjuasánhya janhan ntiha inaá tí naxa xrásinrá kjuanínkaon. ² A ntá tí naxa chrókjuíntak'ávárá, ¿a ntá nkexro chrókjuínchekhàna inaá tí chrókjuínchekhànahyará jahará kixin janhan kjuíntak'ávárá? ³ Mé xikaha ikjian tí xroon chr'anhanrá senó kixin tjínkakhonhya chrókjuasán chrókjuínchekóxakonhará inaá. Náhí. Jahará chrókjuínchekhànará. Méxra ó nõna kixin tí chrókóchàna janhan ntá chrókócháhará kaín rá. ⁴ Kjánchó tió ikjian tí xroon a chr'anhanrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhanrá kixin chrókjuíntak'ávárá. Náhí. Ikjian tí xroon chr'anhanrá kixin chrókónoaxínrá kixin imá tjuahará tí jahará.

Ch'ín Pablo chrókjuínchek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínkakhonhya tjetóxin tsontáxrjan tíha. ⁶ Na mé it-sjé tí jahará nixjehérá ch'án kóyakoterá ch'án kixin chrókjuasinhyá ch'án jie xikaha la táhó la ó tjen. ⁷ Ntá jie chrók'uitjáyenhanrá tí jie kjuasin ch'án, chrókjuínk̄tsará ch'án, kixin tí náhi la ts'itjáyaxín ch'án tí kjuancheníhi. ⁸ Méxra xrjanóghárá kixin chrókjuákoxinrá inaá kixin chaxín tjuéhérá ch'án. ⁹ Mé xikaha senó ikjian xroon chr'anhanrá kuente tí kjuanínkaon chontará kixin tsononaxian á chrókjuínchexiteyànará kaín nkehe chrókuétuáñhánrá. ¹⁰ A ntá tí sijnchek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyenhan ch'án tí jie kjuasin ch'án. Méxra tí chaxín k'ué ichrén jie chrókjuíntak'itjáyenhan ijnko chojni la ó kjuixin kjuíntak'itjáyenhan ch'án tí jie a kixin chrók'uejorá jnkojína. Kjaxin xikaha tjetsjehe Cristo, ¹¹ kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

12 **A** ntá tió kjuasán tí chjasin Troas chrókjuakua tí tan jína kuènte Cristo la antsí xránjon kjuachaxin kixin chrókónhen xra kuènte Ìnchéni. 13 Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

14 Kjuasáyé Dios kixin xráxin jehe ch'án tjinkitsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókjuini mé tjakoxinni tí tan kuènte ch'án éxi ijnko nkehe xraxé náxrjón chrókóxrjínhin kaín xín chojni. 15 Kaínni la éxi yóhe tí xraxé náxrjón kuènte chjincó chrókjuanjón Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan. 16 Tí sín ts'itjáyan mé tókaxraxéhe sín éxi ts'enxín sín tí xraxé a. **A** ntá tí sín tsaá mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? 17 **A** ntá jeheni mé xrinchekjihyani nkexrí nixja itén Dios éxi ch'e nchónhya chojni chrókjuacha sín chichaon. Náhí. Kaín asenni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

3

Tí pacto nixin

1 **A** ntá xikaha ntáchroni, ¿á tjenkayáxinrá kixin kjuankíxinni tsochronkani inaá kixin jína tí jeheni, o á t'ichjánxin kixin chrókjuujikoni xroon kixin tsoñoaxínrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochrónka kixin jína tí jeheni éxi ch'e í so sín? 2 Náhí. T'ichjánxienhyani nijnko xroon kixin jahará mé éxi yóhe ijnko xroon tsikjinni xrikoni chróchóxin la ko chrókjuinchekuáxin kaín xín chojni tsoñoexín sín kixin jeheni mé ch'eheeni Cristo xra. 3 T'ikon sín noxín kixin tí jahará mé éxi yóhe ijnko xroon tsikjin Ìnchéni Cristo xrikoni nchekuáxin chojni. Kjánchó jehya ntáhni tsikjinxín ch'án. Náhí. Kjuanjón ch'án Nchakuen ch'án tjechón chontará la kjaxin jehya xrotabla tsikjin ch'án. Náhí. Táha la asén chojni.

4 Ntá ó noheni chaxín tíhi kixin tinkáchónkini Dios kixin tjinkitsani Cristo. 5 Jéhya kixin ó jehí chróchóntani kjuachaxin kixin chrókjuich'eni xra. Náhí. Kaín tí xra ch'eni na Dios tjetjanjon kjuachaxin. 6 Jéhe ch'án mé kjuanjón ch'án kjuachaxin kixin chrókjuich'eheeni ch'án xra tsochenkani chojni tí tan nixin kui. Tíha jehya ijnko nkehe tsikjin chojni chrókjuinchexiteyéheeni. Náhí. Tíha mé kjuachaxin kjuanjón Nchakuen Dios kixin sinchexiteyéheeni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

7 Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsjehe ikon ch'án.* Kjánchó tí t'inkaséyan kjuankíxin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón. 8 ¿á chrókójeheya kixin antsí má t'inkaséyan kuikao tí tan nixin kujxin kjuachaxin Nchakuen Dios? 9 Méxra xikaha tí ley k'uéchónta kjuachaxin jie kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani. 10 Méxra tí kjuachaxin k'uéchónta tí ley k'uék'etóan ósé la ninkehó

* 3:7 Éxodo 34.29-35

tóyoghya tí kjuachaxin jié tjen jie. ¹¹ A ntá tí k'uechónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochríxín.

¹² Mé xíkaha tí nkehe tsjejhya tjejóchónhenni ntá chrakonhyani chronkaxínni kaín tíha. ¹³ Ch'ehyani éxí kjuích'e ch'ín Moisés k'uikjéxin ch'án ka ikon ch'án kixin tsonohya tí sín israelita kixin ó tinkákjeje tí t'inkaséyan chónta ch'án. ¹⁴ Kjánchó jehe sín naça kienxínhya sín la ko naça xíkaha tjejó sín ijie tió nchekuáxin sín tí nkehe k'uítuénhen sín ósé kixin tí ka naça t'inkákonhen tí chrókiénxín sín kixin naça kjuínhya tí ka. A ntá tí chrókuinkáchónki sín Cristo la ntá jehe ch'án chrókuatsen tí ka a. ¹⁵ A ntá kjónté jie tió nchekuáxin sín tí xroon tsikjin ch'ín Moisés la tjejó sín éxí naça t'inkákonhen tí ka a kixin tienxínhya sín. ¹⁶ A ntá tió ijnko chojni tsjankíxin tsinkáchónki Ìnchéni ntá tí ka t'inkákonhen la tsjii. ¹⁷ A ntá Ìnchéni mé Nchakuen Dios tíha. A ntá tí tjen Nchakuen kuénte Ìnchéni Dios la ntiha kohya nkehe ts'inkákonhen. ¹⁸ A ntá jeheni kaín ni kohya nkehe t'inkákonhen ikonni la mé tjejóni éxí xrosenta tjákini tí kjuachaxin kuénte Ìnchéni, na mé tinkák'ixitóxín tí kjuaxrexinkaon kuénténi kixin antsí chrókóyógheni éxí tí jehe ch'án kixin antsí tsochóntani tí kjuachaxin kuénte ch'án, kixin Ìnchéni, na tí Nchakuen a, mé xíkaha ch'e xra.

4

¹ Méxra xíkaha chrókóxrjéhyani chrókuich'eni tí xra kjuanjon Dios kixin jehe ch'án kujkonógheni ch'án. ² Ó kuítógheni kaín nkehe imó la ko kaín nkehe chrókósuèxinni, la ko ch'iyehyani kichó ni, la ko tjitoxíenhyani itén Dios. Náhi. Jehí tí nkehe ntoá chrónkani. A ntá xíkaha chrókónoexín kaín xín chojni kixin ntoá tjejóni éxí tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xíkaha tinhín sín mé tienxínhya sín kixin xráxín jehe sín la ts'itjáyán sín. ⁴ A ntá jehe sín kuítekakonhya sín, a ntá tí dios kuénte chjasintajni mé kjuínchek'ikonhya sín kixin chrókiénxínhya sín, kixin ntá chrók'uikonhya sín tí t'inkaséyan kuénte tí tan kuénte Cristo, mé tí nkexro chónta kjuachaxin, a ntá jehe ch'án la mé yóghé éxí tsjehe Dios. ⁵ Tió tjakoni na mé jehya tjakoni kixin jeheni chrókuitekáonrá. Náhi. Chronkaxínni kixin chrókuitekáonrá Jesucristo mé Ìnchéni la ko chrónkani kixin jeheni mé t'aharáni xra tsjinkítsani tí jahará kixin tjuahará Jesús. ⁶ Na mé jehe Dios k'uetóan kixin tí xrohi ts'inkaséyanxín tí sítié a na mé kjáxin jehe ch'án kjuanjon ch'án xrohi ts'inkaséyanxín nkaya asénni kixin chrókjuachani chrókónoheni nkexrí tjen tí kjuachaxin jié kuénte Dios t'inkaséyanxín Ìnchéni Jesucristo.

Nkexrí chrók'uejóni kixin tinkáchónkini Ìnchéni

⁷ A ntá tí cuerpo kuénteni la yóghé ijnko ch'í tsík'óna nchetje tjinká nkehe tjete, mé xíkaha ts'ikon sín kixin tí kjuachaxin jié chóntani la kujxín tí tjen Dios kixin jehya kuénteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítóghya ch'án tí jeheni. Kjónté k'uekonni kjuítsínkani kjánchó kjuínchek'itjáyanyani sín. ¹⁰ Kjónté nketí sájtjini xráxín chrók'uenxínni éxí k'uenxín Ìnchéni Jesús, kixin xíkaha tjákoxínni tí kjuachón chónta ch'án. ¹¹ Méxra jeheni naça tjejóchónni la xráxín síin

kjuaxikaon kixin chrók'uenxínni kixin tinkáchónkini Jesús kixin kjaxin xikaha chrókjuakoxínni tí kjuachón ch'án kjónté chrók'uen tí cuerpo chóntani. ¹² Kjónté xikaha chrók'uenxínni, a ntá jahará tsochontará kjuachón.

¹³ Éxí ntáchro tí xroon itén Dios tsíkin sín ósé kixin: “Kuítékavan ntá xikaha xrjan̄ka.”* A ntá kjaxin jeheni kuítékaonni ntá xikaha chrónkani. ¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kixin jahará jina chrók'uejoxinrá. La ko kjaxin xikaha nchónhyará chrók'uayéherá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié ch'ánta ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénténi. ¹⁷ A ntá tí nkehe tjasótéxínni tí tjejóni ntihi jie mé tíha la tjoka ts'atsínka la ts'áyèxínni ijnko nkehe imá jié la ko í tsjejehya tíha. ¹⁸ Ntá chrókómáhyani tí nkehe síin chjasintajni ntihyó. Náhi. Chrókjuéyáni tí nkehe nāxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tió tsjeje tí cuerpo chóntani na mé yóhé éxí ijnko nchia tjoka tsjeje, a ntá Dios mé kjuíchéna jnkojnko nchia nixin ts'itjáyanyha jnkochríxin nkaya nkajni kixin jehya tja chojni kjuíchénoxín tíha. ² Tí nāxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkajni ³ kixin táha ts'inkáyani éxí ijnko ka, ntá xitjahya chrókótjóchínni. ⁴ Tí nāxa tjejóchónxínni tí cuerpo chóntani jie la náxrjónhya tjejóni tjasóteni. Tjinkakonhyani xikahó chrókuitóekoni tí cuerpoéni ntaxin, na mé tjinkaonni kixin tí cuerpoéni ntaxin chrókónixin ó. Ntá chrók'uitjáyani tí chrók'uenxínni la ntá chrókuaqjani tí kjuachón nixin. ⁵ Dios mé kjuenkayáxin ch'án kixin xikaha sinchekjtonhenni ch'án ntá kjuínchekjtonhenni ch'án tí Nchakuen ch'án kixin ntá chrókónoexínni kixin chaxín ts'áyéheni tí nkehe tsjanjon ch'án.

⁶ Mé xikaha xráxin ó noheni kixin tí nāxa tjejóni ntihi nāxa chóntani cuerpoéni ntá nāxa tjejókohyani Ìnchéni. ⁷ A ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéheni tjinkaonni chrókuítógheni tí cuerpoéni chóntani jie kixin sáchrókjuini tí tjen Ìnchéni, chrók'uejókoni ch'án ntiha. ⁹ Méxra xikaha tjinkaonni chrókjuínchexchéheni Ìnchéni kjónté nāxa chróchóntani cuerpoéni ntihi la o í chróchóntahyani, la nāxa chrókuinkáchónkini ch'án. ¹⁰ Kixin kaín ni t'ichjánxin tsochjineheni Cristo tí tjen ch'án t'etóan ch'án kixin nkehe ts'áyéheni jnkojnkonni kixin nkerí xra kjuíchéni á jina o náhi tí nāxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xikaha noheni chróchrakõhenni tí kjuachaxin jié kuénte Ìnchéni ntá tóxakonhenni tjakõheni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjaxinrá chrókónohará. ¹² Jehya kixin chrótjonkará inaá kixin jina ch'eni xra. Náhi. Jehí ntáchroni kixin síin nkehe chrókóchaxinrá kixin tí jeheni ntoá chrónkani kixin chrókónohará

* 4:13 Salmo 116.10

nkexrí chrókjuáteherá tí sín imá nchehnke sín kixín imá náxrxjón nixja sín a ntá xraxinkakonhya sín tí jie chóna asén sín. ¹³ A ntá tí lóconi na mé tíha kixín tjínkaonni chrókjuich'eheñi Dios xra. A ntá tí jehya lóco tí jeheni la mé jehí tjínkaonni chrókjuinkitsani tí jahará. ¹⁴ Kixín Cristo la imá tjuèhe kaín xín chojni ntá t'etueñhenni ch'án kixín ó noheni jína kixín jehó ch'án k'uenyákonhenni ch'án tí ijíeni kaín ni kixín éxí kjaxinni ik'uéñni kaín ni kixín jehe ch'án k'uenyákonhenni ch'án. ¹⁵ Mé xikaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheñi. Náhi. Chrókjuinchexiteyéheñi ch'án kixín k'uenyákonhenni ch'án la ko xechón ch'án ínaá kixín tsaáxinni ch'án. ¹⁶ A ntá jie jeheni tjenkayáxinhyani éxí tjenkayáxin chojni chjasintajni ó. Kjánchó senó k'uéchóxinni Cristo kixín nkexrí kjuák'e ch'án chjasintajni ó, a ntá jie la xikahya t'ikonni ch'án. ¹⁷ Méxra tí nkexro tinkáchónki Cristo mé k'óna ijnko chojni nixín. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixín.

¹⁸ Kaín tíha mé tí xra kjuích'e Dios. Jehe ch'án mé kjuanjón ch'án kjuaxróxin kixín jína chrók'uejókoni ch'án kixín k'uenyákonhenni Cristo. Ntá jie jeheni k'uáyéheñi tí xra tsochénkani í so chojni kixín kjuaxróxin chrók'uejóko sín ch'án. ¹⁹ A ntá ó noheni kixín Dios ichr'án Cristo k'uenyákonhenni ch'án, ntá xikaha Dios tjínkaon kixín kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuénta kaín tí jie chóna chojni, a ntá jeheni k'uáyéheñi tí xra tsjakoni itén ch'án. ²⁰ Ntá jeheni kjuachaxin kuènte Cristo chronkaxinni kixín Dios chrónóaxínrá ch'án tí jeheni. Mé xikaha tí kjuachaxin kuènte Cristo chrónóaxínrání kixín kjuaxróxin chrók'uejókoará Dios. ²¹ A ntá Cristo la ninkehó jie kjuasinhya ch'án, ntá ijíeni k'uénxin ch'án. Kjánchó Dios k'uíkon kixín éxí tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6

¹ Ntá kaín ni jnkokoá ch'eheñi Dios xra, ntá chrónógharáni kixín chrókjuítoéghyará tí kjuasáyé Dios kjuákuaxínrá ch'án. ² Kixín ntáchro xroon itén Dios kixín:

A ntá tí yaon kórxjínhin Dios kuínhin ch'án tí nkehe chronòa chojni;

Tí yaon tsaáxin chojni mé kjuínkitsa ch'án tí jehe sín.*

A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixín ntá chrók'uántaxínhin sín tí xra tjejóch'eni. ⁴ Náhi. Kaín nkehe ch'eni tjáqoxinni kixín ch'eheñi Dios xra. Na mé tjachani tónínkakonhyani kjónté nchónhya nkehe tjasótxínni, la kjónté ichrén nkehe t'ichjánxínhinni, la kjónté ichrén kjuaxíkaon síin. ⁵ Na mé k'uékonní, la k'uéjóchjinani, la nchónhya k'uíxite chojni kónínkakonhenni sín, la ko tí xra kjuích'eni la imá xra. Kjaxín k'uájuaahyani la ko kjónehyani. ⁶ Tjáqoxinni kixín tjóá tjenkayáxinni, la ko tjáqoxinni kixín ó noheni tí nkehe chaxín, la ko tjáqoxinni kixín tónínkakonhyani, la ko tjáqoxinni kixín ch'eni tí jína. La ko chóntani Nchakuen Dios, la ko kaín aséñni tjuèheñi kíchó ni, ⁷ la ko chrónkani tí tan ntoá kuènte Dios, la ko tjáqoxinni kixín chóntani tí kjuachaxin kuènte ch'án. Ntoá tjejóni ntá xikaha tsjachani ntá kohya nkehe tsoñhenni. ⁸ Iso sín náxrxjón nixjehe sín tí jeheni la ko iso sín náxrxjónhya nixjeheñi sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon

* 6:2 Isaias 49.8

sín tí jeheni éxi chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóhónni. Kjuateni sín na kjónté k'óyanhyani sín. ¹⁰ T'aváni la kjónté xraxinkaonni kixin Ìnchéni t'ayakonhenni la chéheni. Éxi nõani jeheni na kjónté chénkani itsjé chojni tí itén Dios tsaáxin sín éxi chróchjeheni sín ijnko nkehe imá tjete xikaha. Éxi chóntahyani ninkehó nkehe la kjónté la kaín nkehe chóntani.

¹¹ Kíchóni tjejórá chjasin Corinto, ntoá chrónkani nixjahaaráni la ninkehó t'ayaharáni la mé kaín asénni tjuahará. ¹² Jehya jeheni chrók'uitjáyan kixin chrótjuahará. Náhi. Jahórá t'itjáyan kixin chrótjuèhérá tí jeheni. ¹³ Janhan xrjanóahará éxi ijnko it'é xjan chrónógehe tí xjeen ch'án kixin kjaxinrá kaín asánrá chrótjuèhérá tí jeheni éxi tjuèheni tí jahará.

Jeheni mé éxi ninkoe Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxi yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni naxa náhi? ¿La ko nkexrí chrók'óyóhe tí t'inkáséyan la ko tí sítié?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kíchó ijnko chojni tinkáchónki Cristo la ko ijnko chojni tinkáchónkihya.

¹⁶ Xitjahya chrók'uito tí ninkoe Dios la ko tí nkehe tsikjanoya. Kixin jeheni mé tí ninkoe Dios tjechón, kixin jehe ch'án tsintáchro ch'án kixin:

Ntaha tsjak'é la ko xritjak'é tí tjejó tí jehe sín,
 a ntá janhan mé ts'óna Dios kuènte sín

la ko jehe sín mé ts'óna chjasin kuèntana.†

¹⁷ Méxra xikaha kjaxin ntáchro Ìnchéni kixin:

T'axrjekjanxínrá tí jehe sín na ókjé tjejórá;

tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ará,

a ntá jahará ts'ónará xjanña ntoa la ko xjanña chjin,

ichro Ìnchéni Dios chóna kaín kjuachaxin.§

7

¹ Mé xixaha kíchó ni, tí nkehe i mé tsintáchro Dios tsjanjon ch'án. Méxra t'ichjánxin kixin tjóá chrók'uejóni, chrókuítóheni kaín nkehe chrókjuinçekjita tí cuérpoéni la ko tí asénni. Ntá chrókóxakonhenni chróchrakonhenni Dios la t'ichjánxin chrókjuancheheni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxinhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. ³ Jehya ntáchroni tíhi kixin chrókuékará jie. Náhi. Ó nohará kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'ueenni. ⁴ Janhan la imá tjikosáyahará tí jahará la ko imá chàna kixin jína tjejórá. Kjónté kaín nkexrí tjejójtjasóteni na imá chàna.

† 6:16 Levítico 26.12, Ezequiel 37.27 ‡ 6:17 Isaías 52.11 § 6:18 Oseas 1.10

⁵ A ntá tió kjujini estado Macedonia la xitjahya chrók'ok'éheni kixin nkuixín síin chojni nínkakönhenni la ko kóxakönhen asénni. ⁶ Kjánchó Dios na mé tí nkeexo nchechéhe asén kaín tí sín tsíkóxrjé mé kjuínchechéhe ch'án asénni kixin ó kjují ch'ín Tito. ⁷ Ntá jehya kixin tí kjují ch'án ó chrókóchéxinni. Náhí. Chéheni kixin jahará kjuínchechéhérá ch'án. Chrónka ch'án kixin imá tjínkáonrá chrók'uikónrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuñhanrá. Mé kuñhan kaín tíha ntá antsí má kóchána.

⁸ Kjuñtak'ávára kixin tí xroon kjian chr'anhánrá la kjónté la ntá jie í tóxakonahya. Na mé senó kóxakonna ntá k'uikuñ kixin tí xroon kjuñtaxakonhanrá kjánchó kánhyó isé tíha. ⁹ Ntá jie chána, kjánchó jehya kixin tí nkehe kjuñtak'ávára. Náhí. Chána kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá í ts'áváhya sín chr'éxin. A ntá tí sín kuítqehya tí nkehe kuente chjasintajni mé t'ává sín kixin táhó ts'enxin sín. ¹¹ A ntá jahará kjuachará k'uátsínkará tí kjuat'ává éxi kóxrjínhin Dios, a ntá jie kónohará kixin jína tjejorá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuínchekónínkaonrá la ko kjaxin kjuínchechrakonrá. Ntá chr'éxin ntá tjínkáonrá chrók'uikónrá tí janhan. Ntá kjuínchekjasóterá tí nkeexo kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen. ¹² A ntá tí nkehe kjian la jehya kixin kjuenkayáxian janhan kuente tí ch'ín kjuasin jie, la ko jehya kixin kjuenkayáxian janhan kuente tí ch'ín k'uává ó. Náhí. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'ueñoanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uikonni kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntiha. ¹⁴ Janhan k'uetjanka tí ch'ín Tito kixin chána kixin tí jahará la jehya kjuach'ia tíha la kósuánahya. Náhí. Kaín nkehe k'uetjonkará la chaxín la ko kjaxin kaín nkehe k'uentátjan ch'ín Tito la chaxín kixin chéheni kixin kuítekáonrá. ¹⁵ A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuikosáyehérá ch'án kjuánjonrá kjuachaxin kuítqhe ch'án ntiha. ¹⁶ Ntá imá chána kixin ó nõna kixin jahará sìnchexiteyánará.

8

Antsí má chrókjuínkítsa sín kichó sín

¹ Ntá jie kichó ni, tjínkaonni chrókónohará kixin nkexrí tí sín tinkáchónki Ínchéni tóinkotsé sín estado Macedonia kjuákoxin sín nkexrí tí kjuasáyé Dios. ² Kjónté nõhnyha nkehe tsíkónhen sín la kjónté la kóchéhe sín; la ko kjónté nõa sín la antsí má kjuínkítsa sín tí sín í so éxi chojni chóna itsje chichaon xikaha kjuich'e sín. ³ Chaxín k'uikuñ kixin kjuanjon sín éxi tí nkehe chóna sín la ko antsí má xíjjanjon sín inaá kixin xikaha kjuenkayáxin sín. ⁴ Nchónhya chrónóqehé sín tí jeheni kixin chrókjuanjonni kjuachaxin kixin chrókjuínkítsa sín tí sín kichó ni tinkáchónki Dios. ⁵ Na mé antsí má kjuanjon sín la xikahya kjuenkayáxinni kixin xikaha chrókjuanjon sín, na mé senó kuinkáchónki sín

Ìnchéni, ntá kjuixin ntá kjuínchexiteyéhe sín tí jeheni éxi tóxrjínhìn Dios. ⁶ Méxra chrónóeheni tí ch'ín Tito kixin chrókjuenájín ch'án chichaon tí tójnkontsérá ntiha éxi kjuankíxin ch'án senó. ⁷ A ntá jahará la tjákoxinrá jina kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuèhéra tí jeheni. Méxra xikaha antsí chrókjuákoxinrá tí xra jina chrókjuínkĩtsará tí sín kichó ni.

⁸ Jehya ntáxrjan tíhi kixin chrókuétuághanrá xikaha. Náhi. Jehí tjínkavan chrókónohará nkexrí jina kjuíuch'e tí í so sín kixin kjaxínrá chrókjuákoxinrá kixin tjuèhéra kichuárá. ⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónòaxín ch'án mé jahará kóríkoxínrá.

¹⁰ Méxra tsotjonkará tí nkehe tjenkayáxian janhan kuènte tí xra i kixin jahará tí nánó k'uaúsínka kjuankíxinrá kjuínkĩtsará kjuánjonrá nkehe, la mé jehya kixin ó jehí kjuínkĩtsará sín. Náhi. Kjaxin imá kócháhará kixin kjuínkĩtsará sín. ¹¹ A ntá jie chrókjuintaxín chrókjuánjonrá éxi tí chrókjuachará chrókjuánjonrá éxi xránkíxixin tsíkateherá tsjínkĩtsará tsjánjonrá nkehe. ¹² Mé xikaha tí chaxín tjinkaon jnkojín chojni chrókjuanjon sín nkehe, ntá tsoxrjínhìn Dios tí tjanjon sín tí nkehe chóna sín. Dios la tjanchahya ch'án tí nkehe chóntahya chojni.

¹³ Jehya kixin xikaha tí í so sín chrók'uejò sín jina kixin tí nkehe kjuínkĩtsará sín la ntá jahará chrók'uitjayan nkehe t'ichjánxinhanrá. Náhi. ¹⁴ Chrókójina chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehé sín tsochóna sín tí nkehe tsochontahyará. Chrókjuínkĩtsará tí sín chóntahya kixin chróchontará nkehe jnkokón. ¹⁵ Éxi ntácho xroon itén Dios kixin: “Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín.”*

Ch'ín Tito la ko tí sín k'ujíko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxi tóxakonna kixin tí jahará. ¹⁷ Ntá kóxrjínhìn ch'án tí nkehe k'uetuènhenni ch'án, la ntá kjaxin jehé ch'án kóxakonhen ch'án kixin á jina tjejorá, ntá jehé ch'án tjinkaon ch'án chrókjuíitsjehé ch'án tí jahará.

¹⁸ Kjaxin k'uetòanni sátsjikotoxin tí ch'ín Tito í jnko kichó ni, na mé kain chjasin tí sín tinkáchónki Ìnchéni mé chóxin sín ch'án kixin tí xra jina tjech'e ch'án tjako ch'án tí tan tsaáxinni. ¹⁹ La ko kjaxin tí sín kain tí njnko ntihi kjueyá sín tí nkexro kichó ni kixin sátsjikotoxin ch'án tí jeheni tí xra sátsjikoni tí chichaon tsjikènhenni tí sín nòa. Na mé tí xra ch'eni kixin xikaha tsjikosáyeheni Ìnchéni la ko xikaha tjákoxinni kixin tjinkaonni chrókjuínkĩtsa sín. ²⁰ Tjinkaonni kixin tsokohya nkexro chrók'uaántaxínhìn kixin tí chichaon xrenájín kjuíijikoni. ²¹ Méxra tjinkaonni chrókjuíuch'eni tí nkehe ntoá, jehya jehó tí nkehe chrókóxrjínhìn Ìnchéni. Náhi. Kjaxin tjinkaonni kixin chrók'uikon chojni kixin jina tjejóch'eni.

²² La ko kjaxin k'uetuènhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kixin chéhe ch'án chrókjuínkĩtsa ch'án kixin itsjé xra kjuíuch'e ch'án. A ntá jie antsí má

* 8:15 Éxodo 16:18

chrókjuich'e ch'án xra kixin chóxin ch'án tí jahará. ²³ A ntá jnkojín sín tsjanchankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkĩtsa ch'án tí janhan kixin xikaha tjinkĩtsa ch'án tí jahará. A ntá tí tsjanchankí sín kixin nkehe tí xra ch'e tí í so kichó ní ntá chenkará sín kixin tí sín kaín njnko k'ueŋoan sín kixin sátsji sín ntiha kixin mé xikaha tsjikosáyehe sín Cristo. ²⁴ Méxra chrókjuákoxinrá kixin chaxín tjuèhérá kichuárá kixin tsoñohe tí sín kichó ní í so njnko la ko kjaxin tsoñohe sín kixin chaxín chéheni kixin tí jahará.

9

Tí chichaon xrenájín tsjinkĩtsa tí sín kichó ní

¹ A ntá tí xrenájín chichaon kixin tsjinkĩtsará tí sín kichó ní tinkáchónki Ìnchéni, la t'ichjánxienhya tsokjian xroon tsochr'anhánrá ² kixin xráxin kónóna kixin jahará tjinkáonrá chrókjuinkĩtsará, na mé xikaha chána la tjanka tí sín tjejó estado Macedonia kixin jahará chojni estado Acaya desde tí nánó k'uaátsínka xráxin tjejorá tjinkáonrá chrókjuinkĩtsará. A ntá antsí tsjé sín estado Macedonia tjinkaon sín chrókjuinkĩtsa sín kixin jahará xikaha kjuákoxinrá nkexrí tjinkáonrá chrókjuinkĩtsará. ³ A ntá ichr'an tí sín kichó ní kixin tjinkavan kixin tsonáchrohya sín kixin chaxínhya tí nkehe jina ntátjan sín senó. Mé xikaha jahará chrókóyaxínhanrá chrókjuinkĩtsará tí sín kichó ní éxi ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxin kixin naxa kohya nkehe tsjánjonrá ntá chrókósuèheni tí jeheni kixin imá chóxinni kichó ní la ko kjá chrókósuàhará kjaxinrá. ⁵ Méxra xikaha tóna kixin t'ichjánxin tsonátjan tí sín kichó ní kixin sátsji sín tsitónxin sín ntia tsjijitsjehe sín tí jahará senó tsjinkĩtsa sín kixin tsjenájínrá tí chichaon tsintáchrórá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxi ijnko nkehe chaxín tjinkáonrá chrókjuánjonrá la jehya éxi ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxra jnkojnko chojni chrókjuanjon tí nkehe kjuenkayáxixin sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe. ⁸ A ntá Dios chóna kaín kjuachaxin jíé ntá tsotjáhará ch'án kaín nkehe t'ichjánxinhanrá kixin tsochontará nkehe tsochjehérá í so chojni chóntahya kixin xikaha sích'erá kaín xra jina. ⁹ Éxi ntáchro tí xroon itén Dios kixin:

Tí nkexro t'óxikáyehe ch'án itsjé nkehe nchekĩtonhen ch'án tí sín nòa

na mé nunca tsjejehya tí xra jina ch'e ch'án.*

¹⁰ Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'énkará la ko jehe ch'án sinchek'ánkí ch'án tí xra jina tjejoch'erá. ¹¹ A ntá tsochontará kaín nkehe tjeje kixin ntá antsí tsjachará tsjinkĩtsará tí í so sín kichó ní. A ntá xikaha tsjijikenhenni sín tí nkehe tsochjehérá tí sín kichó ní ntá tsjanchehe sín Dios kjuasáya. ¹² Kixin xikaha chrókjuinkĩtsará tí sín kichó ní na jehya kixin chrók'uaáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya kixin tí nkehe kjuánjonrá kjuákoxinrá

* 9:9 Salmo 112.9

kíxin nchexiteyéhérá tí tan kuènte Cristo. Kjaxin tsjikosáyehe sín Dios kíxin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios kíxin tsjinkítsa ch'án tí jahará kíxin jehe sín tjuahará sín kíxin t'ikon sín kíxin tjákoxinrá kíxin tí kjuasáyé Dios chontará. ¹⁵ Tjancheheni Dios kjuasáya kíxin kjuínchekítònghenni ch'án ijnko nkehe imá jié tsaáxinni la tsjachahyani tsochronkaxínni kaín tíha.

10

Kjuachaxin chóna ch'in Pablo kíxin tsík'óna ch'án apóstol

¹ Janhan Pablo tío xrjanóghará nkehe la jnkojína xrjanóghará la mé tjákoxian éxi toxrjínjin Cristo. Ntáchrórá kíxin tío tjèn tí tjeorá ntiha la tósuána, a ntá tí kjín tjèn la imá jiéna, ichrorá. ² Méxra xrjanóghará kíxin tí tsjasántsahará tjínkakhonya kíxin chrókuinçekóninkáonráni kíxin ntá tsonínkakhánrá jnkojínrá kíxin tsékaráni jié kíxin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxi chojni ó, na kjánchó tío tjanjónni la tjanjonyani éxi tjanjon chojni chjasintajni. ⁴ Kíxin tí nkehe xraáni tjanjónxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinchek'itjáyán kaín kjuachaxin kuènte tí Jínahya. ⁵ Na mé tsjachani sinchek'itjáyanni tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kíxin chrókóchóxin chojni Dios. A ntá kjuachaxin kuènte Cristo tjákohe ni kaín chojni kíxin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchónhenni sinchekjasóteni kaín tí sín ntiha naxá tjinkakhonya sín chrókuinchesiteyá sín tí tsjixín tsonoheni kíxin á chaxín tsjachará sinchexiteyará jína.

⁷ A ntá jahará tékaráni jié kíxin tí nkehe t'ikonrá ó. A ntá tí nkexro tjenkayáxin kíxin chaxín ch'ehe Cristo xra la mé kjaxin chrókjuátsoan kíxin kjaxinni jeheni la ch'ehe ni Cristo xra. ⁸ A ntá tí chrókujintahnkena ntsí kíxin tí kjuachaxin chonta janhan ntá chrókósuánahya kíxin Ìnchéni kjuanjón tí kjuachaxin kíxin chrókuinkítsa tí jahará kíxin ántsi chrók'uitjará kuènte Dios, la mé jehya kíxin chrókujintak'itjáyánrá. ⁹ Tjínkakhonya kíxin chrókujintachrakonxínrá tí xroon chr'anhánrá. ¹⁰ Kíxin ntáchró sín kíxin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xíkaha ntáchró chrókónohe ch'án kíxin jnkokón nixja janhan éxi nixja tí xroon tsikjan kjónté ikjín tjèn la ko kjónté tí chrók'uejóni ntiha.

¹² Tjínkakhonyani chrókujenkayáxinni kíxin chrókóyóhenni tí í so sín ntáchró sín kíxin jína tí jehe sín. Jehe sín mé lonjé sín kíxin ncheyóhe sín asén sín í so chojni. ¹³ A ntá jeheni la chrókuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjón ch'án kjuachaxin kíxin kjujini kjuich'eni xra tí tjeorá chjasin Corinto. ¹⁴ Jehya kíxin chróchóntahyani kjuachaxin chrók'uejtuaghanráni. Tí chaxín jehya jeheni saoxín kjujini tí tjeorá ntá xíkaha chróchóntahyani kjuachaxin. Ntá náhi, kíxin jeheni saoxín kjujini ntiha kjuakoharáni itan kuènte Cristo. ¹⁵ Chrókuinchehnkexínhyani ijnko xra kjuich'e ókjé chojni éxi xra chrókuich'eni jeheni. Náhi. Tjinkaonni kíxin ántsi chrók'uitjará tsinkachónkirá Ìnchéni ntá xíkaha la ántsi chrókuinkítsani tí jahará kíxin jehó tí xra k'uáyéheni tjejóch'eni. ¹⁶ Kjaxin tjinkaonni chrókjuakoni tí

itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xrá chrókjuich'e ókjé chojni.

17 **A** ntá jnkojín sín tjincaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín.* 18 Kixin tóxrjénhya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'in Pablo la ko tí sín chaxínhya apóstol

1 Tjínkavan chrókuinhínrá ntási tí lontjina. ¿Á chrókjuachará chrókuinhínrá nkehe tsontáxrjan? 2 Janhan tjínkakonhya kixin í jnko nkexro chrókuinkachónkirá. Kjaxin xikaha tjínkakonhya Dios. Ó ikjuá Cristo kixin chrókuakja ch'án tí jahará. Tjínkavan chrókjuánjuan tí jahará chrókuakja tí jehe ch'án éxí yóhe ijnko tjan tjarisoá chrókótehe jnkoá xii. 3 Tóxakonna kixin éxí tí konche tí kjuach'ia xriko ntá kjuich'iyehé tjan Eva, ntá xikaha kjaxinrá jahará tsitohérá sit'ayahará ókjé chojni ntá tsitohérá tí nkexrí kaín asánrá tinkachónkirá Cristo. 4 **A** ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxí tí chronkaxínni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá saó, la ko cháhará chrókuítekáonrá ijnko nkehe ókjé chrókuaáxinrá jehya éxí tí nkehe kuítekáonrá senó. 5 Ó nõna kixin chaxínhya ninkehó sínkíhyana janhan, a ntá antsi sínkí tí sín chréhérá jahará, ichrorá. 6 Kjonté kánhyó náxrjón níxja janhan la jehya kixin kánhyó chrókónõna chrókjuakua. **A** ntá tjákoáxinrá jahará tíhi kixin kaín nkehe t'a.

7 ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókjuacha la ko éxí ijnko chojni nõè kjuak'é janhan kixin tjínkavan chrókjuínkítará chrók'uitjará? 8 Tí sín í so njnko kjuínkítsana sín kjuanjón sín chichaon k'uayáha kixin tsjak'é tsjákohará jahará. 9 Tí kjuak'é tí tjejorá jahará la kjonté t'itjáyan nkehe la ninkexró kjuáncháhya nkehe. Jehó tí sín kichó ni kjuixín estado Macedonia kjuikao sín tí nkehe t'ichjánxinna. Méxra tjínkakonhya kixin chrótjohará xrá tí jahará la ko xikaha naxa tjét'a jie. 10 Xikaha chaxín choxian tí tan chaxín ntoá kuente Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta. 11 ¿Nkeuente xikaha ntáxrjan? ¿Á xikaha ntáxrjan kixin tjuahyará tí jahará ní? Náhi. Dios la ó nohe kixin imá tjuahará.

12 Kjánchó ó jehí tsjintaxín xikaha sit'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín. 13 Kjánchó jehe sín ijnko apóstol chaxínhya mé ch'ia sín ncheyóhó sín éxí chojni kjueyá Cristo. 14 Jehya ijnko kjuachrakon tíha kixin kjaxin ch'in Tsochren kjaxin xikaha ncheyóhe ch'án éxí ijnko ángel kuente tí t'inkaséyan. 15 Méxra xikaha kjaxin kuènhen tí sín ch'ehe tí jínahya xrá mé ncheyóhe sín tí sín jína. Ntá tsjixixín mé tsjasótéxín sín tí xrá jínahya kjuich'e sín.

Kjuasóte ch'in Pablo kixin apóstol tí jehe ch'án

16 Ntáxrjan inaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la títóhérá tsonixja janhan éxí lócona kixin kjaxinna jína

* 10:17 Jeremías 9.24

chrókjuıntahnke ntσί. ¹⁷ Tí xíkaha ntáhnkexián la jehya kjuachaxin kuènte Ìnchéni ntáxrjanxian tíha. Náhi. Jehí éxí ijnko chojni lóco nixja. ¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan štintahnke. ¹⁹ Kíxin jahará ntáchrórá kíxin imá nohará ntá cháhará tjejó tí sín lóco. ²⁰ Kíxin tjánjonrá kjuachaxin t'etuághanrá sín la nchexitexyéhérá sín la ko takitsjahará sín tí nkehe chontará la ko ch'éna asén sín éxí ìnché sín tí jahará, la ntá kjoniehýará sín la ko tjate sín nkaya ikonrá. ²¹ Kjóté chrókósuána tsontáxrjan kíxin jeheni la kánhyó jiehe k'uetuághanráni.

Kjánchó tí nkehe nchehnkexín sín la janhan ntáhnkexián kjaxinna, kjóté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjaxin janhan. ¿Á chojni israelita jehe sín? Kjaxin janhan. ¿Á k'uaxrjeníxin sín ch'ín Abraham? Kjaxin janhan k'uaxrjeníxian ch'án. ²³ Ch'ehe sín Cristo xra kjánchó janhan la antsí má la jehe sín la kénhyó, kjóté ntáxrjan tíhi éxí ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntóchiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uúxin kjuaxikaon kíxin chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexinna sín inta la ko í jnko vez kjuak'e sín xro. Níya k'uániánkí ntabárcó ntá ntá ijnko yaon la ko ijnko tie tjénkataván ntayaon. ²⁶ K'uájia má, k'uúkuáñ kjuaxikaon chrók'uénxian tí ntarío la ko chrók'óyánna tí xíche la ko chrók'óyánna tí sín chjasenná la ko tí sín tsíkjixín ókjé. K'uúkuáñ kjuaxikaon tí chjasin jie la ko tí ntaje la ko tí ntayaon la ko chrók'óyánna tí sín chaxínhya tinkáchónki Ìnchéni. ²⁷ Kóxrjéna kíxin tí xra kjuít'a la ko itsjé nkehe náxrxjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónghya ninkehó la ko kókinna la ko chontahya kaná.

²⁸ Kjóté kaín tíha la ko í so nkehe kónna la mé jnkojnko yaon imá tóxakonna kíxin kaín tí sín tójnko tsé sín kaín tí njnko. ²⁹ ¿Á tjen jnkojínra níhará? A ntá tí xíkaha la koína éxí nina. ¿Á tjen jnkojínra kjuásinra jie? A ntá tí xíkaha la kjaxin tóxakonna. ³⁰ Tí chrókjuıntahnkexian nkehe la mé tjínkavan kíxin jehó chrókjuákoxian kíxin kánhyó jieña. ³¹ Dios, It'é Ìnchéni Jesucristo, na mé tí nkexro chrórxaxinkaonni jnkochríxín mé ó nohe ch'án kíxin chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xra mé k'uetuñhen ch'án tí sín soldado kíxin tsochónhen sín tí ntója tí chjasin kíxin chrótséna sín chrókjuak'échjina. ³³ Kjánchó síin nkexro k'uúinkajinxinna ijnko ntaxra ijnko ventana tí tját'o k'uantatjen chjasin la mé xíkaha kuaána, tséhyana sín.*

12

Tí nkehe k'uúkon ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uúkuáñ la ko tí nkehe kjuínchenóna Ìnchéni. ² Choxian ijnko nkexro tinkáchónki Cristo. A ntá k'uúátsínka catorce nánó sátsíkji ch'án tí níxin nkajní. Nonahya á sátsíkjikó ch'án cuerpo kuènte ch'án o asén ch'án ó. Jehó Dios mé nohe. ³ Méxra ó nõna kíxin xíkaha sátsíkji ch'án la ntá nonahya á koí cuerpo kuènte ch'án o asén ch'án ó. Jehó Dios mé nohe. ⁴ A

* 11:33 Hechos 9.23-25

ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jína chrókujuíntahnkexián kixin xíkaha kónhen tí nkexro a. A ntá tí chrókujuíntahnkexián kixin kjuachaxin kuéntana la jehya jína tíha. Íchá jína chrókujuákoxián kixin janhvàn la chontahya kjuachaxin. ⁶ Tí chrókujuíntahnkexián tí nkehe kónna la chrókolócohyana kixin chaxín tí nkehe chróxrjanka. Kjánchó xíkaha t'a kixin tjínkaonhya kixin xíkaha chrókuenkayáxin chojni kixin ántsi jína janhan. Náhí. Tjínkavan kixin tí xra t'íkon sín la ko tí nkehe tinhin sín mé chrókuenkayáxin sín kixin á jína tí janhan, tsixro sín.

⁷ Méxra chrókujuíntahnkexinhya na ntá xíkaha xránjon kjuachaxin kixin chrók'uayáha ijnko kjuatjoté éxi ijnko ch'i kuikjiáte cuerpo kuéntana mé ijnko nkehe tsík'etuénhen ch'ín Tsochren ikui kjuínchekjoténa. ⁸ Iní veces xrjanógha Ínchéni kixin chrókujuatsen ch'án tí kjuatjoté chonta. ⁹ Kjánchó ntáchro Ínchéni kixin jehó tí kjuachaxién ch'án chrókuachaxián janhan. Kixin tí kjuachaxién ch'án ántsi tsjákoexín chojni fuértehya. Méxra ntá chàna kixin fuértehyana kixin ntá xíkaha tsjákoxián tí kjuachaxin kuénte Cristo. ¹⁰ Méxra chàna kjónté fuértehyana la ko kjónté t'ántaxína sín la ko kjónté t'ichjánxínna nkehe la ko kjónté chónkina sín chrók'óyánna sín la ko kjónté siín kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó njnko chjasin Corinto

¹¹ ¿Á lócona kixin xíkaha xrjanka? Kjánchó jahará kuítekákonhyará ntá xíkaha xrjanka. Jahará chróchronkará xíkaha kixin jína janhan. Jehya kixin kánhyó sínkina la ntá tí sín chréhérá la ántsi sínkí sín. Náhí. Kjónté janhan la chaxín ninkehó sínkíhyana. ¹² Kjuásian itsjé kjuaxroan jié la jína kjuak'é kónínkaonhya kjuákoxián kixin chaxín janhan ijnko nkexro tsíkjeýá Ínchéni. ¹³ ¿Xá k'uikuan tí jahará éxi kánhyó sínkirá a ntá tí í so njnko la ántsi sínkí sín kixin tí kjuasán janhan la ninkehó xra tjaáhyará? A ntá tí xíkaha ntoáhya kjuít'a la tóninkákonhyará.

¹⁴ A ntá ijie ó yaxínna tí nixin vez chrókjuasántsahará la ko tjaáhyará ninkehó xra. Janhan la tjéyáhya tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'íkuan. Méxra tí sín it'é xjan chrókjuenájín sín chichaon chrók'uayakuénxín sín xjeen sín. Jehya xra kuénte tí xjan chrókjuenájín xjan chichaon chrók'uayakuénxín sín tí it'é xjan. ¹⁵ Tóxakonnahya kjónté chrókujuíntakjeje kaín nkehe chonta janhan o kjónté chrók'uénxián kixin tí jahará la jína chrók'uejorá. A ntá janhan imá tjuahará la kjánchó éxi tóna janhan kixin jahará kánhyó tjuèherá tí janhan.

¹⁶ Méxra kjónté janhan tjaáhyará ninkehó xra la kjónté xíkaha ntáchrórá kixin kjuít'ayahará, ichrorá. ¹⁷ ¿Xá kjuít'ayahará kixin jnkójín sín ichr'an kjuíjitsjehe sín tí jahará? ¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuanhan tí í jnko kichó ni sátsjikotoxín ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kixin jnkokón Nchakuen Dios chóntani?

¹⁹ ¿Á tjenkayáxinrá kixin xíkaha kjuátéheni kixin chóntani jié ní? Kjánchó xíkaha. Dios tjetsjehe kixin nixjani éxi chojni tinkáchónki Cristo. Kichóni tjuahará la kaín tíha ntáxrjan kixin tjínkavan kixin ántsi chrókuinkachónkirá Ínchéni. ²⁰ Tóxakonna kixin tíó tsjasántsahará la tsóxrjinnahya nkexrí tjejorá

la ko kjaxinrá tsoxrjíanhyará tí nkehe tsonotáxrjan. Tóxakonna kíxín naxa ts'ixín kjuanínkaon la ko naxa ts'ixín kjuachjínóxínhin la ko tsonínkáonhénrá kíchuára la ko chrókuétóanrá jahóra la ko naxa tsinkachónkirá kjuach'ia la ko naxa ts'ántaxínhínrá kíchuára la ko naxa chontará kjuahnke la ko jnkokoáhya tsjenkayáxinrá. ²¹ Tóxakonna kíxín tió tsjasántsjahará inaá la tí Dios kuéntana mé sinchuaána tí tjeorá la ntá imá tsotsjanka kíxín itsjérá tsíkjasínrá jie tí ósé la naxa títóéhyará tí nkehe tjuáhya ch'erá la ko naxa títóéhyará chontará chojni chjín ókjé tjásinkoará jie la ko títóéhyará kaín tí í so nkehe jínahya k'uékjich'erá ósé.

13

Nchexraxinkaon ch'án sín la ko tsjixín nixja ch'án

¹ A ntá jie la níyaxín tsjasántsjahará. A ntá tí kaín nkehe tjínkáonrá tsonóna la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjahá tí sín tsíkjasín jie ósé, la ko nixjahará kaín rá kíxín kjónté ikjín tjèn la inaá nixjahará éxi nixja tí kjuak'é k'uéjóni tí iyó kjuasántsjahará kíxín tió tsjasán inaá la í tsikónóahya tí sín kjuasín jie. ³ Jahará tjínkáonrá tsinhínrá á chaxín níxjaxián kjuachaxín kuénte Cristo. Jehya kíxín Cristo tsjachahya tsjakoxín ch'án tí kjuachaxién ch'án tí tjeorá ntiha. Náhí. Chaxín tjakoxín ch'án tí kjuachaxín chóna ch'án tí tjeorá ntiha. ⁴ Chaxín tí k'uénxín ch'án tí ntacruz la mé éxi chóntahya ch'án kjuachaxín. Kjánchó ijie tjechónxín ch'án tí kjuachaxín kuénte Dios. Kjaxinni jeheni éxi kjuák'e ch'án k'uéchóntahyani kjuachaxín la ntá ijie tinkáchónkini tí jehe ch'án la tjejóchónxinni tí kjuachaxín kuénte Dios kíxín jína tsjínkítsani tí jahará.

⁵ Jahará chrókjuenkayáxinrá á nchoxon tjeorá, á kaín asánrá tinkachónkirá Ìnchéni. ¿Á noahyará kíxín tjejokoará Jesucristo? A ntá jahará tsonohará á chaxín tinkachónkirá o náhí. ⁶ Kjaxín tjínkavan chrókónohará kíxín jeheni la jehya chojni chaxínhya tinkáchónki Ìnchéni. ⁷ Nixjeheni Dios kíxín chrókuítgehya ch'án tí jahará kíxín ninkehó nkehe jínahya chrókjuich'erá. Jehya kíxín chrókjuakoxinni kíxín jína tí jeheni. Náhí. Jehí tjínkaonni kíxín jahará chrókjuich'erá nkehe jína. Ántosénni kjónté tsóntáchro sín kíxín chóntani jie. ⁸ Ninkehó nkehe chrókjuich'eni kíxín chrókjuinçek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹ Méxra chrókóchéhenni tí t'ichjánxínhya imá chrók'uejóanni, tí chaxín jína chrók'uejorá. Ntá naxa tsonixjeheni Dios kíxín chrókjuixraká chrók'uejorá ntoá. ¹⁰ Mé xíkaha ikjín tihí senó naxa tsjasántsjahará ntiha kíxín ntá tió tsjasán la ts'ichjánxínhya naxa sijnchekóninkáonrána tsoníxjaxián tí kjuachaxín chonta janhan. Kíxín Ìnchéni mé chjina tí kjuachaxín jehya kíxín chrókjuíntak'itjáyánrá. Náhí. Kjuanjon ch'án tíha kíxín jahará ántsi chrókuinkachónkirá Ìnchéni.

¹¹ Na ntá kíchó ní, chrókócháhará. Tjéyará kíxín jína chrók'uejorá. Chrókjuínchechéhérá kíchuára la jnkokoá chrókjuenkayáxinrá la ko kjuaxróxín chrók'uejorá. Kíxín Dios mé ts'ejokoará ch'án. ¹² Nixjehérá kíchuára jnkójina la tsehérá tja kíchuára. ¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjínkítsará kaín rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí n̄nko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjuéyána la ko jehya chojni ichr'ánna. Náhí. Kjuéyána Jesucristo la ko It'éni Dios, mé tí nkexro kjuínchexechón Jesús. ² Janhan la ko kain tí sín kichó ni tjejókoni ntihi ikjinni tí xroon ts'áyéhe tí n̄nko siín estado Galacia. ³ Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuénte ch'án. ⁴ Jesucristo mé k'uenyákonhen ch'án ijiéni ntá kuaáxinni la mé ijie tsjachahya tí nkehe jínahya siín chjasintajni tsjachroneni mé xíkaha tjinkaon It'éni Dios. ⁵ Tjáncháha Dios kjuasáya jnkochrixin mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakjtohérá Dios kjuéyará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá. ⁷ A ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxínhin sín tí tan chrókuaáxinni kuénte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóehya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o jnko ángel chrókuixin nkaya nkajní. ⁹ Senó xrjanka la inaá tsoxrjanka kixin jnkojín nkexro chrókjuako ijnko tan ókjé tsaáxinrá yóehya tí tan ó kuítekáonrá la mé Dios sinchekjasóte tí jehe sín.

¹⁰ Janhan la tjéyáhya kixin chrókóxrjínhin chojni tí xra t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xra Cristo.

Ch'ín Pablo k'óna jnko chojni tjako itén Dios

¹¹ Jahará kichó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhírá nkexrí k'uékjak'é tió naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyán sín.* ¹⁴ Tí naxa k'uék'ájikian tí sín judío la antsí má k'uénóna. A ntá kain tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékítekavan tí nkehe k'uék'etóan tí sín tsík'axrjenixinni. ¹⁵ Kjánchó Dios kjuéyána kjónté naxa tókjínahya la kjuasáyé ch'án kjuéyána ch'án kixin xíkaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kixin tsjàkoha tí sín jehya judío tí tan tsaáxinni. Tió kjuéyána Dios la ninxeró kjuakonahya. ¹⁷ La ko kjaxin kjuítsjáhya janhan tí sín tsík'óna apóstol siín chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco.

* 1:13 Hechos 8.3; 22.4-5; 26.9-11

18 **A** ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekjan ch'án quince yaon. 19 Kjánchó k'uikõnhyá tí í so sín apóstol. Jehó k'uikuãan ch'ín Jacobo kichó Ìnchéni. 20 Ó tjetsjehe Dios kixin tí nkehe ikjian la mé chaxín tíha.

21 **A** ntá chr'éxin ntá sákjuia nó estado Siria la ko Cilicia. 22 **A** ntá tí sín kichó ni tinkáchónki Cristo tjejó estado Judea la naxá tjaotsoanhyana sín. 23 **A** ntá ó kuínhõn sín kixin tí nkexro k'uéchréhe sín chrók'óyán sín la ntá ijie mé tjako tí tan chrókjuinçek'itjayan ch'án. 24 **A** ntá ijie tjanchia sín kjuasáya kixin janhan ó tinkáchónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

1 La ntá catorce nánó chr'éxin ntá sákjuiyá chjasin Jerusalén inaá la sákjuikian ch'ín Bernabé la ko kjaxin ch'ín Tito. 2 Sákjuiyá ntiha kixin Dios kjuínchenõna kixin sáchrókjuiyá. Ntiha chjasin Jerusalén la kójnkotsékoni tí sín t'etõan ninko ntiha la ntá xrjankaxiãan nkexrí tí tan tsaáxinni tjáqõhã tí sín jehya judío. Mé xikaha kjuít'a kixin janhan tjínkãvan jnkokoá chrókjuenkayáxinni kixin ntá tí xrã kjuít'a la jehya chrókóchónkó. 3 **A** ntá kjónté tí ch'ín Tito kjuák'ekjan ch'án la jehe ch'án mé griego ch'án la k'uëtuãnhya sín kixin chrókua ch'án xroye. 4 **A** ntá iso tí sín kichó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuente Cristo chóna kjuachaxin. **A** ntá jehe sín tjínkaon sín kixin chrókjuinçhexiteyéhëni inaá tí nkehe k'uék'etõan tí ley. 5 **A** ntá tahyani kuente nkehe tí tjejóchro sín kixin jehí tjínkaonni kixin tí tan tsaáxinni la ntoá chrókuinkachónkirá jahará.

6 **A** ntá tí sín kónoxín t'etõan kjuakõnahya sín ninkehó. **A** ntá jeheni la tahyani kuentá á chojni t'etõan o náhi kixin Dios la jnkokón t'ikõn ch'án kaín chojni. 7 **A** ntá kjuátsoan sín kixin Dios ó chjina tí xrã tjáqõhã tí sín jehya judío tí tan jina éxi yóhe tsíchjéhe Dios xrã ch'ín Pedro tjáqõhe ch'án tí sín judío. 8 Tí Dios tsík'etuenhen ch'ín Pedro ts'óna apóstol tsjáqõhe ch'án tí sín judío la ko kjaxin tsík'etuãna ch'án ts'óna apóstol tsjáqõhã tí sín jehya judío.

9 Méxrã ch'ín Jacobo la ko ch'ín Pedro la ko ch'ín Juan, mé tí sín t'etõan kuente ninko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xrã la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjáqõhëni tí sín jehya judío la jehe sín nachrohe tsjáqõhe sín tí sín judío. 10 Jehó k'uëtuãan sín kixin tsoxraxinkaan la ko tsotjuéhëni tí sín nõa la xráxín tókakõnhëni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquia

11 **A** ntá tió kjuíji ch'ín Pedro chjasin Antioquia la kjuentuáha ch'án kixin ntoáhya kjuích'e ch'án. 12 Senó k'uékjineko ch'án iso chojni kjónté jehya sín judío. Ntá ikui iso sín kuixín tí tjen ch'ín Jacobo. **A** ntá kjuankixin k'uaxrjenta ch'án la kuítõhe kjónekohya ch'án tí sín jehya judío a. Xikaha kjuích'e ch'án kixin chrakõnhën tí sín kui kixin tí sín neko ch'án naxã tsíkahya sín xroye. 13 Tí iso sín kichó ni judío kjaxin kuítëkakõnhen sín tí ch'ín Pedro kjónté ntoáhya kjuenkayáxín ch'án. Kjaxin ch'ín Bernabé la kjuacha kjuachrohe sín ch'án kixin tí nkehe ntoáhya kjuích'e sín. 14 **A** ntá tió k'uikuãan kixin tí nkehe kjuakõxin sín la tóyóehya tí chrónka tí tan jina tsaáxinni tjako sín la ntá níxjahã tí ch'ín Pedro nkayakon kaín tí sín tsíkójnkotsé. Ntáxrjan kixin: "Jaha mé

ijnko chojni judío la kjónté itjen éxí jehya ijnko chojni judío. ¿A ntá kuènte tétuènhén tí sín jehya judío kíxín chrók'uejó sín éxí chrókóyohé tí sín judío?"

Tí sín judío la ko tí sín jehya judío la jnkokón tsaá sín kíxín chóntha sín fe

¹⁵ Jeheni la k'uaxrjeníxinni chojni judío desde tí kokjíexinni la jeheni na chóntahyani jie éxí tí í so chojni chónhya Dios. ¹⁶ Kjónté xíkaha la ó noheni kíxín tsotjuáxinhya ijé chojni tí nkehe tsík'etqan ch'ín Moisés. Jehó tí sín tinkáchónki Jesucristo mé tsotjóá ijé sín. Méxra kjaxinni tinkáchónkini Jesucristo kíxín tjinkaonni sinchetjóá ch'án ijéni kíxín titekaonni ch'án. Méxra ninkexró tsjachahya tsotjuáxin ijé sín kíxín chrókjuinchexiteyéhé sín tí nkehe t'etqan tí ley.

¹⁷ Tí tjinkaonni tinkáchónkini Cristo kíxín tsotjuáxin ijéni, a ntá jeheni kjaxin xraxinkaonni kíxín ó kjuasinni jie. A ntá í jehya Cristo k'uetqan kíxín chrókjuasinni jie. Kjá chaxín náhí. ¹⁸ Tí kuítqoheni tí ley la ntá naxá chrókjanni chrókuinkáchónkini tí ley inaá la tíha la ó jie kuènteni tíha. ¹⁹ A ntá tí ley la kjuanchia jie k'uénxian. A ntá ijie la tjéchuán kíxín tinkachónkia Dios. ²⁰ Janhan la ó tsík'en kíxín ó k'uénkian Cristo. A ntá ijie la janhya tjéchuán. Cristo mé tjéchónxin tí janhan. La ntá jie la tjéchónxian tí cuerpo chonta kíxín tinkachónkia tí Xjeen Dios kíxín jehé ch'án la tjuana ch'án la k'uenyákonhenni ch'án. ²¹ Tjinkakonhya tsjanoá tí kjuasáyé Dios. Tí chrókótjuáxin ijé chojni tí ley tsík'etqan ch'ín Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontírá. ¿Nkexro kjuít'ayahará? Kíxín tí nkehe kjuákohará mé kuinhírrá kíxín Cristo k'uenxín tí ntacruz k'uenyákonhenni ch'án. ² Jnkokoá nkehe tjínkavan chrókjuateherá. ¿Á k'uayèxírrá Nchakuen Dios kíxín kuítekáonrá tí nkehe tsík'etqan ch'ín Moisés o á k'uayèxírrá Nchakuen Dios kíxín kuítekáonrá tí tan chrónkani kuinhírrá? ³ Imá lontírá jahará. Tí kjuankíxixírrá la kuítekáonrá kjuachaxièen Nchakuen Dios. A ntá jie la tjínkáonrá jahórá sínchekjintaxírrá tí xra. ⁴ ¿Á chónkó kaín tí nkehe tsík'atsínkará? Kjá chrókjuinkítsa chrókjuich'e xra tíha. Jehya chónkó tí nkehe kjuasótiaxírrá. ⁵ ¿Nkekuènté kjuanjon Dios tí Nchakuen ch'án la ko kjuasin ch'án kjuaxroan k'uíkonrá? Jehya k'uayèxírrá tíha kíxín kuítekáonrá tí nkehe tsík'etqan tí ley. Náhí. K'uayèxírrá tí nkehe kíxín kuinkachónkirá tí tan kuinhírrá.

⁶ Ch'ín Abraham kuítekaon tí nkehe k'uetqan Dios ntá Dios k'uíkon kíxín jína ch'án. ⁷ Méxra chrókónohará jahará kíxín tí sín chaxín tikínixin sín ch'ín Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kíxín tí sín jehya judío mé sinchetjóá Dios ijé sín kíxín tsinkáchónki sín ch'án. Mé xíkaha Dios mé chénka ch'ín Abraham ósé tí tan jína, ntáchro ch'án kíxín: "Ijnko nkexro ts'axrjeníxin tí jaha mé tsyaonxín kaín nación."* ⁹ Mé xíkaha kjaxin kaín sín tinkáchónki Dios mé tsyaon sín jnkokón éxí kóyaon ch'ín Abraham kíxín kuítekaon ch'án.

¹⁰ Kaín sín jehó tinkáchónki tí nkehe tsík'etqan ch'ín Moisés la tsjasóte sín kíxín ntáchro xroon itén Dios kíxín: "Tsjasóte kaín tí sín tsjachahya sínchexiteyéhé tí nkehe tsík'etqan tí xroon chóntha ley."† ¹¹ Ntá ó ntoá ntáchro kíxín kohya nkexro tsotjuáxin ijé sín tí tsitekaon sín tí ley. Xroon itén Dios ntáchro

* 3:8 Génesis 12.3 † 3:10 Deuteronomio 27.26

kixin: “Tí nkexro tsíkótjóa la tjejóchónxin sín kixin tinkáchónki sín Dios.”[‡] 12 Ntá tí chrókuinkáchónkini tí ley tsík'etōan ch'in Moisés la chrókuinkáchónkihyani Cristo. Ntáchro xroon itén Dios kixin: “Tí nkexro sinchexiteyá tí ley la táhó chrók'uejóchónxin sín.”[§]

13 A ntá Cristo kjuatsen ch'an kaín tí chrókjuasótexinni tí ley. Tí náhi la chrókjuasóteni kixin chrókjuachahyani sinchexiteyéhēni tí ley. Jehē ch'an kjuenka ch'an tí ijiēni kixin k'ueenyákonhēni ch'an. Ntáchro xroon itén Dios kixin: “Kaín tí chojni chóna jie ts'ejótjjan sín ijnko nta ntá its'en la mé xikaha k'uáyéhē sín tí kjuanínkaon kuēnte Dios.”* Mé xikaha k'uikon sín tí ch'in Jesús. 14 Mé xikaha kónhen kixin ntá tí nkehe chénka Dios tí ch'in Abraham senó mé ts'áyéhē tí sín jehya judío kixin kjuachaxiēn Cristo Jesús. Ntá xikaha kaín ní ts'áyéhēni tí Nchakuen Dios kixin tinkáchónkini ch'an mé xikaha tsintáchro ch'an.

Tí ley la ko tí nkehe kjuanjon Dios

15 Kíchóni, tíhi mé sintayóaxian kuēnte chojni ó. Tió ijnko chojni ch'éna ijnko xroon tsochóna firma kuēnte sín la ntá xitjahya ts'óxika í jnko nkexro la xitjahya í jnko nkexro sich'éna í so nkehe. 16 A ntá Dios mé tsíkjo ch'an tí ch'in Abraham kixin tsjanjon ch'an nkehe ts'áyéhē tí nkexro ts'axrjenixin ch'an. Tí xroon itén Dios ntáchrohya kixin kaín nkexro ts'axrjenixin ch'in Abraham chrók'uáyéhē tíha. Náhi. Ntáchro kixin ts'áyéhē jnkokoá nkexro ts'axrjenixin ch'an la mé Cristo tíha.† 17 Méxra xrjanka tíhi. Dios chénka tí ch'in Abraham ijnko nkehe chaxín la tsoxiteyá tíha kixin éxi yóhé ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uechrónka ch'in Moisés. La ntá kjónté xikaha la xitjahya tsoxika tí nkehe tsichrónka Dios o tsochtáchro chojni kixin tjetoanhya tí nkehe tsintáchro ch'an.‡ 18 Tí chrókjuanjon Dios nkehe kixin chrókjuinchexiteyáni tí nkehe k'uetōan tí ley la ntá tí nkehe tsintáchro Dios senó mé chróxiteyáhya. A ntá Dios mé tsíchénka ch'in Abraham kixin sinchekjōnhen ch'in Abraham tí nkehe kjuasáyé ch'an.

19 ¿A ntá xikaha la nkehe tsonhen tí ley tsík'etōan ch'in Moisés? Chr'éxin kjuanjon Dios tí ley kixin tsoxoexinni nkehe tí jie tjasinni. K'uetōan Dios sinchexiteyéhē chojni tí nkehe tsík'etōan ch'in Moisés tsijia tí nkexro ts'axrjenixin ch'in Abraham, mé tí nkexro kjuéyá Dios kixin xikaha tsoxiteyá tí nkehe chrónka ch'an. A ntá tí ley mé chrónka tí sín ángel ntá k'uáyéhē ch'in Moisés la ó chrónkaxón ch'an. 20 A ntá tí nixjehē Dios tí ch'in Abraham la jehó ch'an la ko jehó Dios la méxra t'ichjánxinhya í jnko nkexro.

Tí xra kuēnte tí ley

21 ¿A ntá á chrók'uaxrjexín kixin tí ley tsík'etōan ch'in Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón la ntá chrókótjuáxin ijiēni tí chrókuitekaonni tí nkehe t'etōan tí ley. 22 A ntá tsintáchro xroon itén Dios kixin tí jie mé t'etūenhen kaín xín chojni kixin ntá tí sín chrókuinkáchónki Jesucristo ntá chrók'uáyéhē sín tí nkehe tsichrónka Dios.

23 A ntá tí naxa kuihya Cristo la ntá tí ley la k'uetūenhen kaín ní la k'uejóchónhēni kixin chrókónoxín tí nkehe chrókuinkáchónkini. 24 Tí ley la éxi ijnko maestro kuēnte chánjan k'uetōan. A ntá jie ikui Cristo la jehē ch'an mé

‡ 3:11 Habacuc 2.4

§ 3:12 Levítico 18.5

* 3:13 Deuteronomio 21.23

† 3:16 Génesis 12.7

‡ 3:17 Éxodo 12.40

kótuáxinni ch'án kixin titekaonni ch'án. ²⁵ A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

²⁶ A ntá jahará ó k'ónará xjeen Dios kixin ó tinkachónkirá Jesucristo. ²⁷ Kaínrá kuíkitaixínrá kjuachaxién Cristo mé xikaha jehe ch'án kótuáxinrá ch'án. ²⁸ A ntá jehya tjetóan á chojni judío o á chojni jehya judío o á chojni ch'exón xrá o á chojni t'etoan o á chojni ntoa o á chojni chjin. Kaínna la ó k'ónani jnkokoá kixin tinkáchónkini Cristo. ²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéheni tí nkehe tsíchronka Dios.

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitogeko tí nkehe kuènte tí it'é la jehe ch'án la tóyóhó ijnko nkexro ch'exón xrá kixin tí jehe la xitjahya t'etoan xrá kjónté chaxín kuènte ch'án kaín tí nkehe a. ² Siín nkexro t'ayakonhen ch'án la t'etoan tí xrá kuènte ch'án tsjixrakájia tí yaon tsíntáchro tí it'é. ³ Mé xikaha kónhen tí jeheni. Kixin tí naxá k'uéchánjanni la kuítekaonni kaín tí nkehe kuènte chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxín ch'án ijnko chojni chjin. La kjuínchexiteyá ch'án kaín tí nkehe tsík'etoan tí ley kuènte Moisés. ⁵ Ikui ch'án xikaha kixin tsaáxinni ch'án kjónté senó k'uék'etuènhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ A ntá kjuakoxín Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochóna asénni la tí Nchakuen ch'án mé t'eyaxín: "It'éni jaha mé kuéntá tí jeheni." ⁷ Méxra xikaha jahará la jehya ijnko nkexro ch'exón xrá. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekitõnhanrá tí nkehe kuènte ch'án kixin tinkachónkirá Cristo.

Ch'ín Pablo tóxakonhen ch'án kixin tí sín tinkáchónki Inchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya. ⁹ A ntá ijie la ó choxínrá Dios, o íchá jina chróntáchroni kixin Dios la ó chóxin ch'án tí jahará. A ntá jehya jina kixin naxá chrókuinkachónkirá inaá tí nkehe chóntahya kjuachaxin la ko tí nkehe chónkó kixin tí xikaha naxá chrókjuínchexiteyéhérá tí nkehe tinkáchónki chojni. ¹⁰ A ntá jahará la tjásinrá kia ichrén tí yaon la ko tí nitjõ la ko tí yaon kia tí nanó. ¹¹ Imá tóxakonna kixin á chónkó tí xrá kjuít'a kjuákohará.

¹² Kíchóni, xrjanóahará kixin chrókóyóhárá éxi tí janhan kixin janhan mé tóyóhe éxi k'uejorá senó kixin t'etuènhyani tí ley. Janhan la tékahyará ninkehó jie. ¹³ Ó nohará kixin tíó saoxín kjuákohará tí tan tsaáxinni la k'uétsankahyana kixin k'uénina k'uéchonta ijnko chin k'uékjínchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jina kjuánjonrá kjuachaxin kjuak'é ntiha. Éxi chrók'uayéhérá ijnko ángel kuènte Dios o éxi chrók'uayéhérá jehe Inchéni Jesucristo mé xikaha kjuak'é jina ntiha. ¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jina tí jahará kixin tjinkáonrá kjónté ikonrá chrókuakítsjerá chróchjínará tí janhan. ¹⁶ A ntá ijie la, ¿á ninkákõnnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuitohérá tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jina chrókótjinkáonrá

tí í so sín kjánchó ntoá chrókjuenkayáxinrá kixin jehya tí chrókjuak'é tí tje-jorá ó chrókuítekaónrá jína. ¹⁹ T'íkonni tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhe ijnko iné xjan tsjoté tjan tió sinchekokjílhi tjan xjeen tjan mé xikaha janhan la naxa tsjasóténa kixin tjínkavan kixin Cristo chrókjuinchetjóá tí jahará. ²⁰ Chrókójína ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chrónkará nkehe. Jahará naxa tjinkáonrá chrókjuinchexiteyéhérá tí ley tsík'etóan ch'ín Moisés la zá kuiénhyará nkehe chro tí ley? ²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuénhya.* ²³ Tí xjeen tjan ch'exón xra kokjílhi ch'án éxí tokjílhi chojni ó. A ntá tí xjeen tí tjan t'ítuénhya la mé ó kokjílhi ch'án kixin tsoxiteyá tí nkehe tsintáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etóan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kixin t'ítuénhen sín. ²⁵ Mé xikaha tí tjan Agar mé tóyóexín tí jna Sinaí nacióan Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuénhen sín la ko kaín xjeen sín. ²⁶ A ntá tí chjasin Jerusalén itjen nkaya nkajni la mé t'ítuénhya. Náhí. Mé jeheni la kuènteni tíha. ²⁷ Ntáchro xroon itén Dios kixin:

Jaha chojni chjin chontahya chánjan kjónté chrokócháha.

Jaha k'uikonhya ninkehó kjuatjoté kixin kjuínchekokjíehya xjan la kjónté chrokócháha.

Tí tjan kuítsínkehe na mé nchónhya înté tjan ts'íkon tjan,

a ntá tí tjan kjuák'eko xii tjan la kánhyó ts'íkon.†

²⁸ Kíchóni jeheni la éxí yóhèni ch'ín Isaac kixin kaín ni la xjeen Dios kixin xikaha tsintáchro ch'án. ²⁹ A ntá éxí senó tí xjan kokjílhi éxí tokjílhi chojni ó la jehe ch'án k'uéchónkíhi ch'án tí xjan kokjéxín kjuachaxién Nchakuen Dios. Mé xikaha kjaxin sitónhen jie. ³⁰ A ntá ntáchro tí xroon itén Dios kixin: “Tétuénhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsitonhen tí xjeen tí tjan t'ítuénhya.”‡ ³¹ Méxra kichó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuénhya.

5

Jína chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuenhyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuénhen inaá.

² Tínhínrá, janhan Pablo mé ntáxrjan kixin tí chrókuará tí xroye a ntá ó chónkó chrókuinkachónkirá Cristo. ³ Tjínkavan tsóxrjanka inaá kixin tí jnkójin nkexro itsa tí xroye la jehe ch'án mé t'ichjánxín sinchexiteyéhé ch'án kaín tí sín tsikjan ch'ín Moisés. ⁴ A nta jahará la xritjéyará tsotjuáxin ijjará kixin sinchexiteyéhérá tí ley la ntá ó kuítóhérá Cristo la ko ó kuítóhérá tí kjuasáyé

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10

Dios tjuahará. ⁵ A ntá Jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijieni. ⁶ Jeheni mé tinkáchónkini Jesucristo la ntá kánhyó tjeotan tí xroye. Antsi tjeotan chrókuinkáchónkini Ìnchéni la ntá tí tinkáchónkini Ìnchéni la chrótjuèheni kichó ni.

⁷ Jahará la jína kjuankixínrá tinkachónkirá Ìnchéni. ¿A ntá nkexro k'uetjoan kixin chrókuítòhéré tí nkehe chaxín? ⁸ Jehya nkehe kuènte Dios tí tjejoch'erá méhe. Méxra jehe ch'án la kjueyará ch'án. ⁹ Ntácho sín kixin tí ch'o t'óna niotja tsjiko intsíkoá tí xroan nchek'ánkí niotja, a ntá ts'ánkí kaín tí ch'o. ¹⁰ A ntá janhan tinkachónkia Ìnchéni la ko ó nòna kixin jahará kjaxin tinkachónkirá ch'án la kjá í chrókjuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tjixrónkáxin kixin Dios la chrakuenhya ch'án ninkexró.

¹¹ Kichóni, tí naxa chrókuétoan chrókua chojni xroye la ntá tí sín judío chrókónínakonnahya sín. Tí xikaha la chrók'uántaxienhya sín tí tan jína chrónka nkexrí k'uénxín Cristo tí ntacruz. ¹² Méxra tí sín ntaxakonhanrá la t'etjoan sín itsará xroye la íchá jína naá chrók'uátsínkó chrókóchrít'o sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhí. Chrókjuinkitsani kichó ni la ko chrótjuèheni kichó ni. ¹⁴ Mé xikaha tí ley mé t'axrjexín kixin: “Chrótjuèhérá kichuára éxí tjuèxinrá asánrá.”* ¹⁵ A ntá tí chrókjóntehérá kichuára la ko chrókjónterá kichuára la ntá chrókóxakonhanrá kixin tí xikaha la chrókjuincheck'itjáyanrá kichuára.

Tí jie chrókjuasin chojni la ko tí nkehe t'etjoan Nchakuen Dios

¹⁶ A ntá ntáxrjan kixin chrók'uejorá éxí tjinkaon Nchakuen Dios, a ntá chrókjuéyáhyará tí nkehe jínahya chrókjuenkayáxinrá. ¹⁷ A ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjínkaonrá chrókjuich'erá. ¹⁸ A ntá tí Nchakuen Dios tjetjinkitsará, a ntá Jehya tí ley t'etuághanrá jie.

¹⁹ Xrahya ts'ikonni tí jie tjasin chojni jínahya tjenkayáxin. Mé tíha la tí sín tjasinko jie chojni chjin óké, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuánínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochónta itsjé nkehe, la ko tí chojni tjinkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhé xikaha. Na mé éxí yóhé senó mé k'uétjonkará la ko ijie la xikaha tjetjonkará inaá kixin tí nkexro xikaha tinkájasin jie mé xitjahya ts'áyéhe sín tí kjuachaxin kuènte Dios.

²² A ntá tíó chóntani Nchakuen Dios ntá tsotjuèheni kichó ni, la ko tsochéheni, la ko kjuaxróxin ts'ejóni, la ko tsochónhenni tsonínakonhyani, la ko jnkojína ts'ejókoni kichó ni, la ko nchexiteyáni jnkojína. ²³ La ko tsohnkehyaní, la ko ts'etuènhenni asénni kixin tsjasinhyani jie. Kohya nijnko ley chrókjuincheckjasóteni kixin tí jína chrók'uejóni xikaha. ²⁴ Mé tí chojni tinkáchónki Jesucristo la kaín jie k'uéchónta sín la ko tí jínahya k'uékjenkayáxin sín la ó kjuenka Ìnchéni kjuáenkáni ch'án ntacruz. ²⁵ A ntá tí tjejókoni Nchakuen Dios t'ichjánxin tsítòheni kixin Nchakuen Dios ts'etuènhenni.

* 5:14 Levítico 19.18

²⁶ Méxra chrókjuinchehnkehyani la ko chrókjuachaxinhyani kichó ni la ko chrókóchjinoxienhyani.

6

Tjínkĩtsará kichuára

¹ Kichóni, a ntá tí chrók'uikonrá jnkojín nkexro kjuasin ichrén jie a ntá tí jahará tí chaxín chontará Nchakuen Dios la chrókjuéntuéhérá sín la chrókjuínkĩtsará sín. A ntá jnkojína chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jie kjaxin.

² Tsjínkĩtsará kichuára kixin jóhya tсамará tí nkehe ye. Kixin tí xikaha la ó chrókjuinchesteyáni tí nkehe t'etqan Cristo.

³ Ntá jnkojín nkexro ntáchro kixin imá tjetqan tí jehe ch'án la chaxínhya tíha la jehó ch'iyehé asén. ⁴ Jnkojnko chojni chrórxaxinkaon á nchoxon tjenkayáxin la chrókónehe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni. ⁵ Kixin jnkojnko chojni yámá tí jie kuènte.

⁶ Tí nkexro xrakohe tí tan jina la chrókjuinkĩtsa sín chrókjuanjon sín nkehe chrók'uáyéhe tí nkexro tjako.

⁷ Sijh'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsotjá. ⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'enxín sín. A ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrínín ts'áyéhe sín. ⁹ Mé xikaha chrókóxrjéhyani chrókjuich'eni kaín nkehe jina kixin tí tsoxrjéhyani la ntá chaxín tsjixraká tí yaon tsjachani ts'áyéheni tí nkehe jina. ¹⁰ Méxra xikaha xráxin chrókjuich'eni nkehe jina la antsí t'ichjánxin chrókjuinkĩtsani tí sín kichó ni tinkáchónki Inchéni.

Ch'ín Pablo nchexraxinkaon tí sín ntiha la ko kjuixixín nijxa ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etqanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuènte Cristo.

¹³ Kjonté tí sín tsíka xroye la nchesteyáhya sín kaín tí nkehe t'etqan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sjintahke ninkehó. Íchá jina chróntáxrjan kixin Cristo k'uenyákonhenni. A ntá xikaha k'uenxín Cristo tí ntacruz la ntá tí nkehe k'uék'etqan kuènte chjasintajni la kjaxin k'uitjáyán la ko janhan kjaxin kuitqahá tí nkehe kuènte chjasintajni. ¹⁵ La ntá ninkehó sínkíhya á tsíka chojni xroye o náhi. Tí nkehe sínkí la chrók'ónani ijnko chojni nixin. ¹⁶ A ntá tí sín ts'áyéhe kjuaxróxin kixin kjuikonóhehe Dios tí jehe sín la mé kaín tí sín kuítekaon tí nkehe t'etqan ch'án mé kaín tí sín chaxín tsik'óna xjeen ch'án.

¹⁷ A ntá ijie la tjínkakonhya kixin chrók'uekana jie ninkexró. Janhan mé chaxín chonta tí tsikjatsqenxín tsíchrít'ó cuerpo kuèntana kixin kjuasótexinna kixin kjuít'ahá xra Inchéni Jesús.

¹⁸ Kichóni tjáncháha Inchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí ninko chjasin Éfeso

¹ Janhan Pablo tsikjeyána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko titekáonrá Cristo Jesús. ² Tjétjáncháha It'eni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixin nkaya nkajni kjuanjon ch'án. ⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsikjeyáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhjin ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xikaha kuaáxinni ijnje tí Xjeen ch'án k'úitji la xikaha tsjixín kaín ijje. ⁸ Dios kjuaqoxin ch'án kixin imá tjuèheni ch'án. Kjuanjon ch'án kaín kjuachaxin kixin chrókuiénxinni jína la ko kjuanjon ch'án kjuaxrexinkaon jína. ⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhjin ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjon kjuachaxin kixin Jesucristo ts'etuenhen ch'án kaín xín nkehe siín nkaya nkajni la ko chjasintajni.

¹¹ Dios kjueyáni kixin chrókuinkáchónkini Cristo la ntá xikaha chrók'uíyéheni tí nkehe tsík'áyéhe ch'án. Kaín tíha la mé xikaha tsonhen éxi tóxrjínhjin Dios. ¹² Mé xikaha kjuích'e ch'án kixin ntá jeheni kuítekaonni Cristo saoxin chrók'uejóni chrókjuancheheni kjuasáya Dios kixin tí kjuachaxin jie chóna ch'án. ¹³ A ntá kjaxin jahará ó kuinhínrá tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. ¹⁴ Tí Nchakuen Dios kuítonghenni mé kjuínchenoexinni Dios kixin tsakjani kaín nkehe tsjanjon ch'án tió tsaáxin kaín ní tinkáchónkini ch'án. Ntá xikaha kaín ní tsjancheheni kjuasáyé ch'án kixin tí kjuachaxin jie chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuínhan kixin imá tinkachónkirá Ìnchéni Jesús la ko imá tjuèhérá kaín tí í sín tinkáchónki Dios. ¹⁶ Ntá janhan nunca tjuahya nixjaha Dios tjáncháha kjuasáya kixin ó tinkachónkirá ch'án. ¹⁷ Tjéníxjaha Dios, mé jehe ch'án mé ichr'án Ìnchéni Jesucristo, mé It'eni imá tjetoan la tjétjáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrókuiénxinrá jína tí nkehe kuènte ch'án kixin ntá antsí

má chróchoxínrá ch'án. ¹⁸ Kjaxin tjétjáncháha Dios kixin tsjinkĩtsa ch'án tsjanjon ch'án ijnko kjuaxrexinkaon jina kixin ntá tsonohará ts'ejochonhénrá kixin xikaha kjueyará ch'án. La ko tsonohará kixin imá tjetotan tí nkehe sinchekĩtonhenni ch'án kixin jeheni mé tinkáchónkini ch'án. ¹⁹ La ko kjaxin tjétjáncháha Dios tsjinkĩtsará ch'án tsonohará kixin tí kjuachaxin kuènte ch'án mé ijnko nkehe imá jíé noehyani nketi kjuèxín. Tí kjuachaxièn ch'án mé nchexraxinkaon tí sín tinkáchónki ch'án. Jnkokón tí kjuachaxin chóntani la ko tí kjuachaxin imá jíé kjuaxoxin ch'án ²⁰ tíó kjuínchexechón ch'án Cristo. Ntá Cristo sákjuí kjuák'etjaxin ch'án tja chjina tí It'é ch'án itjen nkaya nkajní. ²¹ Mé xikaha kjuanjon Dios kjuachaxin kixin Cristo ts'etuenhen ch'án kaín xín gobierno la ko kaín tí sín t'etotan. Ijie tjet'etuenhen ch'án kaín xín nkehe síñ chjasintajni la ko chr'éxin ts'etotan ch'án kjaxin. ²² Cristo k'uáyéhe ch'án kjuachaxin ts'etuenhen kaín xín nkehe síñ. Jehe ch'án mé ts'etuenhen kaín tí sín k'óna nĩnkoé ch'án. ²³ Tí nĩnko mé éxí tí cuerpo kuènte ch'án la jehó ch'án mé t'etuenhen ch'án. Jehó ch'án mé kuènte ch'án kaín xín nkehe síñ.

2

Kuaáxinni kjuachaxièn Dios

¹ La ntá ijie Dios mé kjuínchekĩtonhanrá tí kjuachón jnkochrixín kixin tinkachónkirá Cristo. Senó la jahará la éxí tsík'enrá kixin tí jínahya k'uékjich'erá la ko tí jie k'uékjásinrá. ² Mé xikaha k'uéchrehérá éxí sítónhen chjasintajni. K'uékjinchexiteyéhérá éxí tóxrjínhĩn tí nchakuen jínahya t'etuenhen tí xrinto la ko t'etuenhen kaín xín tí chojni titekakuenhya Dios. ³ Kaínni xikaha k'uék'ejóni tí ósé a naxa kjuínchexiteyéheni tí nkehe ntácho asénni la ko kjuínchexiteyáni tí kjuaxrexinkaon jínahya k'uéchóntani. A ntá tí naxa xikahó chrókuich'eni la Dios imá chrókuinchekjasóteni éxí tsjasóte tí í so sín. ⁴ A ntá Dios mé imá kuikonógheni ch'án la ko imá tjuèheni ch'án. ⁵ La ntá kjuanjon ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxinrá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. ⁷ Mé xikaha kjuich'e ch'án kjuaxoxin ch'án la naxa tjetjakoixin ch'án kixin tjuèheni ch'án la ko kjuinkĩtsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahórá k'uitjará tíha. Náhi. Táha la mé kjuasáyé Dios kixin tjáharó ch'án. ⁹ Kixin jehya ichrén nkehe jina kjuich'eni kixin chrókuinchehnkexínni. ¹⁰ Dios mé kjuich'éna tí jeheni ntá chr'éxin kjuinkĩtsa ch'án kixin tsinkáchónkini Cristo Jesús, kixin ntá chrókuich'eni tí xra jina kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxra jahará la jehya chojni judíorá. Mé tí sín judío ntak'inrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chóna xroye. ¹² Xráxinkáonrá kixin tí senó la k'uéchonhyará Cristo. Jahará la jehya kuènte tí nación Israel la xikaha k'uéchonhyará tí nkehe tsík'etotan Dios la ko tí nkehe tsintácho ch'án tsjanjon ch'án. Mé xikaha k'uék'ejorá la k'uéchonhyará Dios la k'uéchoénhyará kixin chrókuaará. ¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánra ch'án, k'uítji ijníé ch'án. ¹⁴ Jehe Cristo mé tjejóxinni kjuaxróxin. La ntá tí

sín judío la tí sín jehya sín judío ntá jie jnkokoá chrókjuenkayáxin sín kixin k'óna éxi jnkokoá chjasin. Cristo k'óxika ch'án tí kjuanínkaon éxi ijnko tjat'o k'uinkákonhen. ¹⁵ Jehé ch'án kjuasóte ch'án, la kjuatsen ch'án tí ley. Tí iyó chjasin k'uejó kjuich'éna ch'án jnkokoá chjasin nixin kixin tinkáchónki sín ch'án. Mé xíkaha kjuanjon ch'án kjuaxróxin. ¹⁶ Mé xíkaha k'uenyákonhenni ch'án k'uénxín ch'án tí ntacruz la kjuakjiin ch'án tí kjuanínkaon k'uék'ixín tí iyó chjasin k'uékjanjon sín kixin ntá kjuaxróxin ts'ejóko sín Dios la kaín sín jnkokoá k'óna éxi jnkokoá cuerpo kuènte ch'án.

¹⁷ Cristo mé ikui la kjuakohe ch'án kaín chojni tí tan jina kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxín tí sín chjinaxón k'uejó. ¹⁸ A ntá kjuachaxin kuènte Cristo la kaín ni kjónté jeheni o í so chojni mé tsóchjineheni It'eni Dios kixin jnkokoá k'uáyéhéni Nchakuen ch'án. ¹⁹ A ntá jahará la í tóyóahyará chojni tsíkjiín ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjat'o jie k'óna chrítaón tí xro k'uejo tí sín kjueyá Jesús la ko tí sín tsich'án Dios chrónka itén ch'án ósé. La ntá Jesucristo mé tí xro imá t'etóan kuènte tí tjat'o a. ²¹ Tí xránkixixín mé Cristo la chrítaón k'óna kuenté nchia la tinkák'ánki tí nchia kixin jina tsjak'e, ntá tsjixraká kixin ts'óna ijnko ninko tjóá kuènte Ínchéni. ²² Mé xíkaha jahará tinkachónkirá Cristo la tsjnkotsérá kaín rá ts'óna éxi ijnko nchia kuènte Dios la ntaha tsjak'exenhen tí Nchakuen ch'án.

3

Ch'in Pablo k'uáyéhe ch'án tí xra tsjakohe ch'án tí sín jehya judío tí tan jina

¹ Mé xíkaha janhan Pablo mé tjéchjinaxián tí tjákua itén Cristo Jesús kixin jina ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjon ch'án tí xra k'uayáha kixin tsjákohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xíkaha ikjian ijnko xroon kánhyó tsjé nixja k'uayéhérá. ⁴ Tió sijnchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jina kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jina éxi ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsichrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra í sít'a kixin tsjákua tí itén ch'án kixin tí kjuachaxin kuènte ch'án. ⁸ Janhan mé kánhyó tjetoan kixin janhan la imá intsína la kaín tí í so sín tsíkjinchetjóá Dios la antsí tjetoan sín. Kjónté la Dios mé kjuínchekitónna tí xra imá tjetoan kixin tsotjanka tí sín jehya sín judío tí tan jina nkexrí imá tjetoan tí nkehe kuènte Cristo. ⁹ La k'uayáha tí xra tsotjanka kaín xín chojni nkexrí tsíkjenkayáxin Dios tí ósé kixin nijnko nkexró k'uénoehya tíha. Mé jehé ch'án mé kjuich'éna ch'án kaín xín nkehe. ¹⁰ Mé xíkaha kónhen kixin ntá tí sín kuènte ninko tsjakuexín sín kaín xín tí sín t'etóan nkaya nkajní kixin tsonohe sín kixin xíkaha kaín nkehe jina tsíkjenkayáxin Dios. ¹¹ Kaín tíha kjuich'e Dios éxi

tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsqchjineheni Dios kixin tinkáchónkini ch'án. ¹³ Méxra xrxjanóghará kixin chrókujtoéhyará chrókuinkachónkirá ch'án kjónté tjetjasótena kixin kaín tíha kónhen kixin jahará chrók'uejoxínrá jína.

Cristo imá tjuèheni

¹⁴ Méxra xíkaha tjak'èxian tòch'ian nkayakon It'é Ìnchéni Jesucristo. ¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajni la ko tí sín siín chjasintajni. ¹⁶ Tjáncháha It'éni kixin tsjanjon kjuachaxin kuènte ch'án ts'ayéhéra kjuachaxièn Nchakuen ch'án ¹⁷ kixin Cristo chróchónta asánra kixin tinkachónkirá ch'án la ntá ntoá chrók'uejorá éxi ijnko nta tsíkji nuèe njnka la chrótjuèhéra kichuára. ¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko njnkaxín la ko ntetoxín kixin nkexrí tjuèheni Cristo. ¹⁹ Tjáncháha Dios kixin antsi chrókónohará nkexrí imá tjuèhe ch'án tí jeheni mé antsi má tjuèheni ch'án la tsjachahyani tienxinni kaín tíha. A ntá tí jehe ch'án chrókjuinkitsani ch'án la antsi chrókuiénxinni tí kjuachaxin kuènte ch'án.

²⁰ Tjie la chjéheni kjuasáya Dios kixin jehe ch'án chóna kjuachaxin tsjanjon ch'án antsi má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni.

²¹ Kjuasáyé Dios itjen jnkochrixin kixin Cristo Jesús kjuínchekaá ch'án tí njnko, mé xíkaha ó xiteyá jnkochrixin. Amén.

4

Jína chrók'uejókoni kichó ni kixin chóntani Nchakuen Dios

¹ Janhan mé tjechjimaxián tí xra kuènte Ìnchéni. Méxra xrxjanóghará kixin jína chrók'uejorá kixin xíkaha Dios tsíkjeýá tí jahará. ² Méxra chrókjuínchehnkehyará la ko chrókójjahyará la ko chrókójinará chrókóninkákonhyará la ko chrótjuèhéra kichuára. ³ Méxra jína chrók'uejokoará kichuára kixin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni. ⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

⁷ Jnkojnkoni k'uáyéheni kjuachaxin sich'ehe ni Dios xra kixin xíkaha kjuanjon Cristo. ⁸ Méxra xíkaha nixja xroon itén Dios kixin:

"Jehe ch'án sákjuí ch'án nkaya nkajni la ko sákjuíko ch'án tí sín tjejóchjina, la ntá kjuínchekjtonhen ch'án chojni jnkojnko kjuachaxin kuènte ch'án."*

⁹ ¿Ntá nkexrí t'axrxjén kixin sákjuí ch'án? Tíhi mé t'axrxjén kixin jehe ch'án mé senó k'uínkajinxín ch'án nkaya nkajni la kjuák'e ch'án chjasintajni. ¹⁰ Jehe ch'án mé k'uínkajinxín ntilha mé ntá jie sákíkjí ch'án tí nkajni imá noi. La ntá tjet'etuenhen ch'án kaín xín nkehe. ¹¹ Jehe ch'án mé kjuínchekjtonhen ch'án ijnko kjuachaxin jnkojnko chojni. Kjueýá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjueýá ch'án í so sín ts'óna pastor la ko í so sín

* 4:8 Salmo 68.18

tsjako sín itén ch'án. ¹² Mé xikaha tí xra k'uáyéhe tí sín kjueyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo. ¹³ Ntá xikaha kaín ni jnkokoá tsínkáchónkini tí Xjeen Dios la ko tsochóxinni ch'án jina kixin ntá xikaha ts'ónani chojni ntoá nchexiteyá la ko chrókónoheni éxí nkexrí tjinkaon Cristo. ¹⁴ Méxra chrók'ónahyani éxí xjan ntsíntí. Tí xjanntí la xrahya tsjínkí kjuaxrexinkaon éxí ijnko nkehe sákjuiko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín í jnko ntja ntoáhya kixin chrok'uitjáyenhenni Cristo ntá chrókjuasinni jje. ¹⁵ A ntá íchá jina chrónixjani tí nkehe chaxín ntoá la kaín asénni chrótjuèhèni kichó ni ntá xikaha chrókónoheni kixin xikaha tjinkaon Cristo. Jehé ch'án mé tí kja t'etuenhen tí cuerpo kuènte ch'án. ¹⁶ A ntá kjuachaxièn Cristo kuènté tí cuerpo, tí ch'e xra jnkokón la tjinkítsa kuènté. Ntá jnkojnkoní jina ch'eni xra la mé xikaha ts'ánkí tí xra kuènte ch'án la mé jina chrótjuèhèni kichó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuñhanrá kjuachaxièn ihnié Ìnchéni. Ijje la chrók'uejohyará éxí ch'e tí sín chónhya Dios. Kaín nkehe tjenkayáxin sín la ntoáhya tíha. ¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya sín kixin chrohya tsitekaon sín Dios. ¹⁹ Ó tsíkjinchek'itjáyán sín tí kjuaxrexinkaon kuènte sín la í tósuèhya sín chrókjuasin sín jje. Imá tóxrjínhin sín chrókjuich'e sín kaín nkehe jínahya. ²⁰ A ntá jahará xikahya xrakohará tí nkehe kjuako Cristo, ²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. ²² Méxra tjtòhérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko nkehe jínahya naxa t'ayahará. ²³ Jahará t'ichjánxin kixin chrókónixin tí kjuaxrexinkaon kuèntará la ko tí nchakuanrá. ²⁴ Méxra chrókuákjárá tí kjuaxrexinkaon nixin kjuích'éna Dios xikaha tjinkaon ch'án la ntá chrókuákoxinrá ijnko ntja jina ntoá.

²⁵ Méxra chrókuítjòhérá tí kjuach'ia. Méxra jnkojnkorá chrónixjehérá kichuárá ntoá kixin kaín ni tsík'ónani jnkokoá cuerpo.

²⁶ Tí chrókóninkáonrá la chrókjuásinhyará jje la chrókóninkákonhyará kuènté yaon. ²⁷ Chrókuítjòhéyará kixin Tsochren chrókjuít'ayahará.

²⁸ Tí jnkojínrá kuèrá la tjtòhérá kjuachee. Íchá jina kixin itjára chrókjuích'exínrá xra kixin tsochontará chichaoen sínchek'itjònhénrá jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jina kixin tsjinkítsará ts'ánkí kjuaxrexinkaon kuènte kichuárá la xikaha tsjinkítsará tí sín tjejótinhin.

³⁰ Nchek'ávahyará tí Nchakuen Dios kixin tíha mé k'uayéxinrá éxí ijnko xroye kixin tsoxoaxínrá kixin jahará mé tinkachónkirá Dios la ko tsochonhénrá tí yaon itsi ch'án ntá tsjintaxín tsaará.

³¹ Tjtòhérá tí kjuanínkaon chontará la ko tjtòhérá tí nkehe ntoáhya tjenkayáxinrá la ko tjtòhérá tí kjuanotjon la ko kaín nkehe jínahya. ³² A ntá chrókójínará chrókuíkonóehérá kichuárá. Sínchek'itjáyenhénrá ijje kichuárá kixin Dios kjuatsen tí jje chontará kixin tinkachónkirá Cristo.

5

¹ Jahará ó k'óna xjeen Dios la tjuáhará ch'án. Méxra chrókóxakonhanrá chrókjuákoxinrá éxi kjuákoxin tí jehe ch'án. ² Chrótjuèhérá kichuárá éxi Cristo tjuèhe tí jeheni kixin jehe ch'án la k'uenyákonhenni ch'án, éxi yóhe ijnko kolélo xikaha kjokehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jie la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jie í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchónta sín la mé tíha ó yóhe tí nkexro tinkáchónki nkehe tsikjangya xikaha. Mé tí nkexro xikaha ch'e mé tsjachahya ts'ixenhen tí tjet'etoan Cristo la ko Dios. ⁶ Méxra tjánjonhyará kjuachaxin sit'ayahará ninkehró chrónka tí nkehe chónkó. Méxra xikaha ntá itsí tí kjuanínkaon kuènte Dios la tsjasóte tí sín titekakuenhya sín tí jehe ch'án. ⁷ Méxra chrók'uitohyará tí sín xikaha ch'e.

⁸ Senó la k'uek'ájrítá ntja sítié. A ntá ijie ó k'ónará chojni kuènte Inchéni la ó xritjeorá tí ntja t'inkaséyan kuènte ch'án. Méxra tjenkayáxinrá jína éxi tí sín xritjejó tí ntja t'inkaséyan. ⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjínhín Inchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan. ¹² Chrókósuèheni chrónixjani kuènte tí nkehe imó ch'e tí sín jínahya. ¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. ¹⁴ Mé xikaha ntáchro xikihi:

T'áya jaha tjéchrian t'inkatjenxian tí siín tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkojína chrók'uejorá. Jehya éxi tí sín noehya chrók'uejorá. Náhi. Chrók'uejorá éxi ijnko chojni nohe má. ¹⁶ Chrókóxakonhanrá chrókjuich'erá xra tí jie kixin itsí ijnko yaon jínahya xitjahya sich'erá xra. ¹⁷ Chrókólontíhyará. Chrókóxakonhanrá chrókuiénxinrá tí nkehe tóxrjínhín Inchéni. ¹⁸ Chrókókoanhyará kixin tíha mé chrók'uitjáyanxínrá. Íchá jína chrókjuánjonrá kjuachaxin chrók'uetuághanrá Nchakuen Dios. ¹⁹ Chrónixjéxínrá kichuárá tí salmo la ko tí himno la ko chrótsjerá la xikaha kaín asánrá chrókjuancheherá kjuasáyé Inchéni. ²⁰ Jnkochríxín chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Inchéni Jesucristo.

Jína chrók'uejókoni tí sín kjéhyani kixin tinkáchónkini Inchéni

²¹ Titekákonhénrá kichuárá kixin ó tinkáchónkirá Inchéni. ²² Tí chojni chjin chrókjuinchexiteyéhe xii sín éxi nchexiteyéhe sín Inchéni. ²³ Tí chojni ntoa chóna kjuachaxin ts'etuenhen ichjién éxi Cristo mé ikja t'etuenhen tí nínko. Kjaxin jehe ch'án kjuínchekaá ch'án tí nínko, mé tí cuérpóé ch'án. ²⁴ Méxra éxi tí nínko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xii.

²⁵ Tí chojni ntoa chrótjuèhe tí ichjién kixin éxi Cristo la tjuèhe tí nínko la k'uenyákonhen ch'án. ²⁶ Mé xikaha kjuich'e Cristo kixin sinchetjóá ch'án tí

n̄nko mé kjuínchetjuáxin ch'án tí nt̄a kuíkitexín sín kjuachaxién itén ch'án. ²⁷ Nt̄a tsjanjon ch'án tí jeheni éxí ijnko n̄nko imá jina chóntahya j̄ie la ko chóntahya ninkehó nkehe náxrjónhya, mé ijnko n̄nko tjóá la ko ntoá. ²⁸ Mé xikaha tí chojni ntoa chrótjuèhe tí ichjién sín éxí tjuèxín ch'án cuérpogé ch'án. Tí nkexro tjuèhe ichjién mé kjaxin tjuèhe asén ch'án. ²⁹ Kohya ninkexró nínkakohen tí cuerpo kuènte. Kaín chojni la ine sín la t'ayakonhen sín cuerpo sín la mé xikaha Cristo t'ayakonhen tí n̄nko. ³⁰ Kaínni mé k'ónani cuerpo kuènte ch'án. Jeheni mé ntogé ch'án la ko huésogé ch'án. ³¹ Ntáchro kíxín: “Méxra ijnko chojni ntoa mé tsítoghe it'é la ko iné kíxín tsakja ichjién la yóí sín mé ts'óna éxí jnkokóá chojni.”* ³² Tíhi mé ijnko nkehe imá j̄ié tienxínhya ninkexró. Mé janhan xrjanka kuènte Cristo la tíha mé n̄nkoé ch'án. ³³ Méxra kjaxin tjéxrjanka kíxín chojni ntoa t'ichjánxin tsotjuèhe ichjién sín éxí tjuèxín asén sín la tí chojni chjin chróchóntehe sín kjuasáya tí x̄i sín.

6

¹ Jahará chánjanrá la t'ichjánxin s̄inchexiteyéhérá it'ará la ko inárá kíxín tjuèherá Ìnchéni kíxín tí x̄ikaha mé jina. ² Tí nkehe saoxín tsik'ítuenhenni kíxín chrókuitekaonni nt̄a chrókjuanjon Dios nkehe mé tíhi: “Chrókjuikosáyehérá it'ará la ko inárá ³ kíxín mé náxrjón chrók'uejorá la isé chrók'uejorá ntihi chjasintajni.”*

⁴ Jahará it'é xjan la chrókjuínchekónínkakonyhará tí xjaanrá. Íchá jina kíxín s̄inchek'ánkíxinrá xjaanrá ijnko kjuaxrexinkaon jina kíxín ts'ánkíxin xjan tsínkáchónki xjan Ìnchéni.

⁵ Jahará chojni ch'e xra mé chrókuítekákonhénrá tí lámogará ntihi chjasintajni la chróchontehérá sín kjuasáya. S̄ich'eherá sín xra éxí ch'eherá xra Ìnchéni Cristo.

⁶ Chrókjuich'erá xra jina la jehya kíxín tí tjejó sín tjejótsjehe sín kíxín nt̄a xikahó nt̄a jina chrók'uejoxinrá. Náhí. Éxí ch'eherá xra Cristo kaín asánrá s̄ich'erá xra kíxín mé xikaha tóxrjính̄in Dios. ⁷ Kaín asánrá chrókjuich'erá xra éxí ch'eherá xra Ìnchéni la jehya éxí chojni ó chrókjuich'eherá xra. ⁸ Ó nohará kíxín jnkoinko nkexro kjónté ch'exón xra o kjónté chojni t'ítuenhya mé jnkoinko sín ts'áyéhe sín tí nkehe tsjanjon Ìnchéni kíxín nkexrí tí xra jina kjuich'e sín.

⁹ Tí jahará chojni lámó mé jnkoinja chrókuétuènhénrá tí sín t'ahará xra la séchrókónínkákonhénrá sín. Xráxinkáonrá kíxín jahará la ko jehe sín mé jnkokón chrókjuínchexiteyéhérá Ìnchéni itjen nkaya nkajni kíxín kaín chojni la jnkokón t'íkon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A nt̄a j̄ie kíchó ni, nchefuérte asánrá kíxín tjejókoni Ìnchéni la tjetoan tí kjuachaxin kuènte ch'án. ¹¹ Chrókuaáxinrá kaín tí kjuachaxin tsjanjon Dios kíxín nt̄a xikaha jina chrók'uejorá la chrókjuít'ayahyará Tsochren. ¹² Jehya tjanjonkoni chojni tsik'óna into la ko hueso. Náhí. Jeheni tjanjonkoni kaín tí nchakuen tí jínahya siín chjasintajni. Tíha mé tjinkaon chrók'uetóan tí chjasintajni sitié. ¹³ Méxra chrókuákjárá kaín tí kjuachaxin kjuanjon Dios kíxín nt̄a chrókjuachará tí itsi tí yaon jínahya nt̄a tí x̄ikaha

* 5:31 Génesis 2.24 * 6:3 Éxodo 20.12; Deuteronomio 5.16

chrókjuich'erá la chr'éxin la jína chrók'uejorá. ¹⁴ Nchefeúerte asánrâ. Jína chrók'uejorá. Chrókuítekáonrâ tí itan chaxín kixin tí nkehe ntoá mé chrók'uayakonhanrâ. ¹⁵ Méxra listo chrók'uejorá sátsjichronkará tí tan tjanjon kjuaxróxin. ¹⁶ La antsí tjetóan chrókuinkachónkirâ Ìnchéni. Tíha mé chrok'uinkákonhen tí chica flecha tsochr'án Tsochren. ¹⁷ Tí chrókuaáxinrâ la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios. ¹⁸ La ko kjaxin chrókuítóéhyará chrónixjehérâ Dios la jnkochrínin chrókjuanchehérâ ch'án kaín nkehe t'ichjánxinhanrâ la chrokjuanchatóxixínrâ Nchakuen ch'án. Chrók'uejotsjehérâ la chrókjuanchiarâ kixin tsjinkĩtsa Dios kaín tí sín tinkáchónki ch'án. ¹⁹ Chrónóehérâ ch'án kixin kjaxin janhan tsjinkĩtsana ch'án tsjanjon ch'án tí tan t'ichjánxin tsoníxja janhan kixin ntâ janhan antsí jína chrónixja kixin ntâ tsinhin sín tí nkehe ninkexró k'uénoehya kixin nkexrí tjen tí itén ch'án tsaáxin chojni. ²⁰ Dios mé ichr'ánna tsoxrjanka tí itén ch'án, mé xikaha tjéchinaxián ijie. Nixjehérâ ch'án kixin jína tsoxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kíchóni Tíquico, tí nkexro imâ tjuèheni la ko xráxin ch'ehe xra Ìnchéni mé tsochenkarâ ch'án tí jahará nkexrí tjen la ko nkexrí tí xra tjet'a. ²² Mé xikaha tétuanhan ch'án sátsjitsjehe ch'án tí jahará kixin tsochrónka ch'án nkexrí tjejóni la xikaha chrókócháharâ.

²³ Tjánháha It'eni Dios la Ìnchéni Jesucristo kixin tsochjéhe ch'án kaín kíchó ni kjuaxróxin kixin tsotjuèhe kíchó sín la ko tsinkáchónki sín ch'án. ²⁴ La ko kjuasáyé tí jehe ch'án sincheyaon ch'án kaín tí sín chaxín tjuèhe Ìnchéni Jesucristo. Mé xikaha tsoxiteyâ. Amén. Ó tjen.

Tí xroon ikjin ch'ín Pablo chr'énnen ch'án tí sín síin chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ehe ni xra Jesucristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejórá chjasin Filipos la ko tí sín t'etóan kuénte nínko ntiha. ² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónéhe ch'án Dios kixin tí sín tinkáchónki Jesús ntiha

³ A ntá tió xráinkávan tí jahará la imá tjaḡa Dios kjuasáya ⁴ la ko níxjaha Dios la imá chàna tjáncháḡa ch'án kixin tsjinkĩtsa ch'án kaín tí jahará. ⁵ Jahará la kjuínkĩtsará tió kjuàkua tí tan jína tí saoxín kuinhínrá itén Dios la naḡa tjejotjínkĩtsará ijie. ⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuifekáonrá mé xikaha naḡa tsjintaxín sich'e ch'án tsjixrakájia tí yaon tsokjan Jesucristo. ⁷ Jína kixin tjenkayáxian kuénte kaín tí jahará. Méxra xikaha imá tjuahára. Jahará la ko janhan la jnkokón kjuachaxin k'uáyéhe ni la kjónté janhan tjéjijina o itjén tí tjejó tí sín t'etóan tjéxrxanka kixin jína tí tan tsaáxinni. ⁸ Dios la ó nohe kixin imá tjínkávan chrók'uikuḡan kaín tí jahará kixin éxi tjuàxinrá Cristo. ⁹ Tjáncháḡa Dios kixin tsjinkĩtsa ch'án tí jahará kixin antsí má chrótjuèhérá ch'án la ko chrók'uánkí tí kjuaxrexinkaon kuéntará kixin antsí chrókuiéxinrá kaín nkehe. ¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejórá la ko kohya nkehe chrókjuanchia jie tió tsokjan Jesucristo. ¹¹ Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuifkosáyéhérá Dios.

A ntá janhan la tjéxonxin Cristo

¹² Kichóni tjínkávan tsonohará kixin tí nkehe kjuasótexinna la kjuínkĩtsa kixin kuinhin chojni tí itén Dios tsaáxinni. ¹³ Kaínxín tí chojni síin palacio la ko kaín tí í so sín mé nohe sín kixin tjéjijnaxián kixin tinkachónkia Jesucristo. ¹⁴ A ntá tí tjéjijina la itsjé tí sín kichó ni antsí má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjínkaon sín chrókjuachaxinna sín. A ntá í so sín tjako itén ch'án kixin tjínkaon sín jína chrókjuinkĩtsana sín. ¹⁶ Kjánchó iso sín tjínkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjínkaon sín chrók'uekana sín antsí má jie kixin naḡa tjéjijina. ¹⁷ La í so sín nixja sín kuénte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tspxrxanka tí itan tsaáxinni. ¹⁸ Kjánchó antosenná kjónté á chaxín kaín asén sín tjako sín o náhi, la imá chàna kixin chrónka sín tí tan jína kuénte Cristo la antsí má chéhe asenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjetjinkĩtsana. ²⁰ Jína tjéxonhan kixin Dios la tsítóehya tí janhan kixin ichrén nkehe jínahya chrókóna. Tjínkávan tsochonta kjuachaxin kixin

jína tsonixja kaín asenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoexín sín kixin Cristo imá chóna kjuachaxin kjónté á naxa tjéchuán o á ó tsík'ena. ²¹ Kixin janhan na Cristo tjéchonxian la ntá kjónté ts'énxian xikaha la mé chrókjuácha. ²² A ntá tí naxa tsjak'é naxa tjéchuán ntá naxa jína sit'aha Inchéni xra. Nonahya nkehe tí chrókuákjaá, á chrók'uéen o á chrókjuak'échuán. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uéen la chrókjuak'ékian Cristo. A ntá janhan la ntáxrjan kixin íchá jína tíha. ²⁴ Kjánchó t'ichjánxin naxa chrókjuak'é kixin naxa chrókjuinkitsa tí jahará. ²⁵ Méxra ó nòna kixin naxa tsitona tí tjejorá kixin chrókjuinkitsa tí jahará kixin ntá antsí chrókónohará la chrókócháhará kixin jína chrókuinkachónkirá Inchéni. ²⁶ Ntá tió tsjasán janhan ts'ejóni inaá la imá tsocháhará la tsjanchehéra kjuasáyé Jesucristo.

²⁷ A ntá jahará chrókjuákoxinrá chrók'uejorá jína éxi ntáchro tí tan kjuákoxin Inchéni Cristo. Mé xikaha tí tsjasántsahará o náhi la tjínkavan chrókujnhan kixin naxa imá tinkachónkirá Cristo la ko jnkokoá tjenkayáxinrá la ko jnkokoá tjejoch'erá xra tjákorá tí itan jína tsaáxinni. ²⁸ Chrókujtoéhyará kixin tí sín nínkakonhanrá chrókjuintachrakonrá sín. Tí xikaha chróchrakonhyará la chrókónoexín sín kixin ts'itjáyán sín, a ntá chrókónoxin kixin jahará mé chaxín tsaará. Tíha mé Dios tsjinkitsará. ²⁹ Ó kujtonhanrá tí kjuachaxin kixin tsinkachónkirá Jesucristo la ko kjaxin kujtonhanrá kjuachaxin tsjasótiaxinrá kixin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uikonrá senó nkexri kjuít'a xra la ó kuinhínrá ijie kixin naxa tjet'a xra kjónté nínkakonna sín.

2

Kujtohe Jesús tí kjuachaxin chrók'uetōan ch'án ntá ijie imá tjeōan ch'án

¹ Tí chaxín tí Cristo nchexraxinkaonrá la tí chaxín Cristo tjuáhará ch'án nchecháhará ch'án la tí chaxín tí Nchakuen ch'án xrikoará la tí chaxín nohará kixin tjikonóghará ch'án ² la nchecháhará kixin jnkokoá chrók'uejokoará kichuára la ko jnkokoá chrójtuehéra kichuára la ko jnkokoá chrókjuenkayáxian nchakuanrá la ko jnkokoá xra chrókjuich'erá. ³ Chrókjuenkayáxinhyará chrókuétoanrá la ko chrókjuinchehnkehyará. Náhi. Chrók'ónará chojni t'etōanhyá. Chrók'uikonrá éxi antsí tjeōan tí í so sín, a ntá kánhyó tjeōan tí jahará. ⁴ Ninkexró chrókjuéyá tí nkehe kuente jehó. Náhi. Chrókjuéyará tí nkehe chrókjuinkitsa tí í so chojni.

⁵ Jahará chrókjuenkayáxinrá éxi kjuenkayáxian Cristo Jesús. ⁶ Jehe ch'án chóna ch'án kaín kjuachaxin kuente Dios la kjónté xikaha la tjínkakhya ch'án chrókjuincheyóhe ch'án éxi Dios. ⁷ A ntá kujtohe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuích'e ch'án xra. ⁸ La éxi ijnko chojni k'uetōanhyá kjuák'e ch'án la kjuínchexiteyéhe ch'án Dios kaín asén ch'án kixin ik'uén ch'án, mé k'uénxin ch'án tí ntacruz. ⁹ Méxra Dios imá kjuikosáyehé tí jehe ch'án la ko kjuínchek'in ch'án ijnko ihníé imá tjeōan. ¹⁰ Kixin ntá tsinhin kaín chojni tí ihníé Jesús ntá ts'ejóxin toch'in sín, mé tí sín siín nkaya nkajni la ko tí sín siín chjasintajni la ko tí chojni siín chrínki nche. ¹¹ La ko kaín xín chojni tsochrónka sín kixin Jesucristo mé Inché sín mé xikaha tsjikosáyehé sín It'eni Dios.

Tí sín tinkáchónki Cristo tóyóhe éxi xrohi t'inkaséyanxin chjasintajni

¹² Jahará kichó ni imá tjuáhará la xráxin kjuinchexiteyànará tí k'uék'ejóni. A ntá ijie la chrókjuinchexiteyànará kjónté ikjín tjén. Chrókuitoéhyará tí nkehe tsjanjon kjuachón la chrók'uayakonhénrá jnkójina ¹³ kixin Dios ntaxraxinkaonrá sích'erá tí nkehe jína tjinkaon ch'án.

¹⁴ Kaín xrá ch'erá la chrókóninkákuénhyará kichuárá la ko chrókjontahyará kichuárá ¹⁵ kixin tsókohya ninkexró tsontácho kixin jahará la chontará jje. Kixin jahará la mé tí xjeen Dios chróchontahyará jje, la tjejorá tí sín tí sín jínahya tjasin jje. Na ntá jahará chrók'uinkaséyanxín tí jehe sín éxi tí konotsé t'inkaséyanxín tí chjasintajni sitié. ¹⁶ Méxra jahará chrók'uayakonhénrá jína tí tan tjanjon kjuachón. Tí xikaha chrókjuinchexiteyará jnkójina ntá tío tsi Cristo tsóchéhe asenná kixin xikaha xrá tjejoch'erá kixin ntá tsonóna kixin jehya ó chónkó kjuak'ékjít'a xrá. ¹⁷ Kjónté chrók'uénxian la éxi nkehe chrókjuanchatóxixínrá Dios chrók'uikonrá tí janhan. Mé xikaha chrókjuintaxín tí nkehe chróchjehérá ch'án kixin tinkachónkirá ch'án, la ntá mé janhan mé tsóchána la ko tjínkavan kixin kaín rá xikaha chrók'uayéhérá kjuachéhe. ¹⁸ Méxra chrókócháhará jahará kjaxin la chrók'uayéhérá éxi tí kjuachéhe chonta.

Ch'in Timoteo la ko ch'in Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'in Timoteo tsjijitsjehe ch'án tí jahará kixin ntá tsóchána tsinhan nkexrí tjejorá. ²⁰ Kohya í jnko nkexro chrókjuenkayáxin éxi tí janhan la ko chrókóxakonhen kixin jahará chrók'uejorá jína. ²¹ Kaín tí í so sín tjejá sín tí nkehe tóxrjínhin sín ó la jehya tí nkehe tóxrjínhin Jesucristo. ²² A ntá jahará ó nohará kixin ch'in Timoteo ó kjuakoxin ch'án kixin jína asén ch'án kixin jehe ch'án kjuít'akian ch'án xrá kjuakoni tí tan jína. Éxi ijnko xjanna xikaha kjuínkítsana ch'án. ²³ Mé xikaha tjínkavan tsochr'an ch'án tsjijitsjehe ch'án tí jahará tío tsonóna nkexrí tsi tí xrá kuéntana. ²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'án tí tjejorá. Jehe ch'án mé jnkokoá ch'ekoni ch'án xrá kjónté nínkakhenni chojni. Jahará k'uéchr'anrá ch'án ntihi kixin jehe ch'án tsjinkítsana ch'án kaín nkehe tjínkavan. ²⁶ Imá tóxakonhen ch'án tsjijitsjehe ch'án tí jahará kixin ó nohe ch'án kixin tsíkinhínrá kixin k'uéníhi ch'án. ²⁷ Chaxín k'uéníhi ch'án ó mero chrók'uen ch'án, a ntá Dios kuikonógehe tí jehe ch'án kjáncho jehya jehó ch'án, kjaxin kuikonóna Dios tí janhan kixin kánhyó chrók'uavá. ²⁸ Méxra tjínkavan tsochr'an ch'án kixin ó nóna kixin tsócháhará ts'ikonrá ch'án inaá la ko xikaha janhan í kánhyó chrók'uavá. ²⁹ Imá chrókócháhará chrókjuuji ch'án kixin jehe ch'án mé ijnko kichó ni tinkáchónki Ìnchéni la ko chrókjuikosáyeherá ch'án éxi chrókjuikosáyeherá kaín tí í so sín éxi jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xrá Cristo. Mé síin kjuaxikaon chrók'uenxín ch'án kixin jehe ch'án kjuínkítsana ch'án kixin jahará xitjahya ts'inkará tsjínkítsará tí janhan.

3

Tí nkehe chaxín sínki

¹ A ntá ijie, kichó ni, chrókócháhará kixin jahará la kuénte Ìnchéni. A ntá tí janhan la xrahya tsokjatée tsokjian tí nkehe ó kjian kixin tíha la chrókjuinkítsa tí jahará. ² Chróchontará cuidado tí sín ch'e jínahya éxi konjá la tóchrít'o

sín cuérpogé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxinni Dios kjuachaxién Nchakuen ch'an la ko imá chéheni kixin tinkáchónkini Inchéni Jesucristo. Jehya kixin chrókuinkáchónkini kixin tí cuérpogéni chróköchrínjinni. ⁴ A ntá janhan kjaxin jina chróntáxrjan kixin chróköchrít'ó tí cuérpogé chojni. Ninkexró antsí chróchóna kjuachaxin kixin chrókuitekaoon tí nkehe a. ⁵ Janhan mé tsíkana xroye tí k'uéchonta ijní yaon la ko janhan mé tikínixian tí sín israelita la tsík'axrjeníxinna tí sín tsík'axrjeníxin ch'ín Benjamín la kjaxin janhan mé hebreo la ko t'aná la naná la hebreo sín. La ko janhan mé tinkachónkia tí ley éxi tinkáchónki tí sín fariseo. ⁶ A ntá imá k'uéninkakonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontácho kixin chaxínhya tíha. ⁷ Ntá kaín tíha la tí ósé k'uékjenkayáxin janhan kixin sínkí tíha, a ntá ijie la tinkachónkia Cristo la ntá tí nkehe k'uékóxrjína k'uékjít'a la ntá jie la ninkehó sínkíhya. ⁸ La kjaxin kaín xín nkehe t'íkuon éxi chónkó tíha kixin antsí má tjeoan tsochoxián Inchéni Jesucristo. Kaín kjuaxrexinkaon jínahya k'uéchonta la kjuíntak'itjáyán kixin ijie ó tinkachónkia Cristo la kaín xín tí nkehe k'uéchonta la t'íkuon éxi chjínínó ó kixin ntá xíkaha jina chrókuak'ékian Cristo. ⁹ Chróköchána kixin jnkokoá chrók'uejókoni ch'an. Tjéyáhya kixin tí ley chrókuínxín ijíeni tí chrókuínchexiteyéheni. Náhi. Tinkachónkia Cristo la tsaáxinni kixin Dios la tsjakjlin tí ijíeni kixin tinkáchónkini ch'an. ¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'an tíó xechón ch'an la ko tjínkavan tsjasótexinna éxi kjuasóte ch'an la ko kjónté chrók'uéna éxi k'uénxin ch'an ¹¹ kixin ntá tjínkavan tsjácha tsoxechónna inaá.

Ch'ín Pablo tjinkaon chrókuacha ch'an

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'an senó xíkaha. ¹³ Kíchóni, ntáxrjanhya kixin janhván kjuácha tíha. Náhi. Janhan mé ts'itjáyanna kaín xín tí nkehe ó kuítóhe senó la t'ichjánxin kaín asenná tjichráha tí nkehe naxa t'itjáyán tsjácha. ¹⁴ Kixin xíkaha ntá chrókuácha chrók'uayáha kaín tí nkehe jina tsjanjon Dios. Jehe ch'an la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín asénni la méxra xíkaha chrókuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'an kixin ntoáhya tíha. ¹⁶ A ntá t'ichjánxin chrók'uejóni éxi tí nkehe ó kjuachani.

¹⁷ Kíchóni, chrók'uejorá éxi kjuak'é janhan la ko chrótsjehérá nkexrí tjejó tí í so chojni tjejóch'e éxi kjuakoni kixin xíkaha kjuakoharáni tí jahará. ¹⁸ Nchónhya xrxankaxián senó la ntá xrxánka inaá la imá tsjánka kixin síin nchónhya sín tjejó sín éxi nínkakonhen sín tí Cristo k'uénxin ntacruz. ¹⁹ Tí sín a mé ts'itjáyán sín. Tí dios kuénte sín la mé tí nkehe ntácho asén sín ó la ko tjinkaon sín chrókuínchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó. ²⁰ A ntá jeheni kaín ni la mé chojni kuénte nkajní la tjejóchónhenni kixin ts'inkajinxin nkaya nkajní tí nkexro tsaáxinni, mé Inchéni Jesucristo. ²¹ Ntá jehe ch'an mé tsjinkí ch'an tí cuerpo náxrxjónhya chóntani kixin ntá tí cuerpo chóntani tsoyóhe éxi tí cuerpo náxrxjón chóna ch'an. Tíha mé tsoxiteyá kjuachaxién ch'an jíé kixin ó chóna ch'an kjuachaxin ts'etuenhen ch'an kaín xín nkehe.

4

Jnkochrixín chrókócháhará kixin tinkachónkirá Ìnchéni

¹ Jahará kichó ni imá tjuahará la ko imá tjínkavan chrókjuasántsahará tí jahará kixin jahará imá nchechànará kixin jahará mé éxi ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuahará kichó ni.

² Xrjanóaha tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni. ³ Jaha la jína k'uejóni kjuich'eni xra, méxra xrjanóaha tjínkita tí sín chjin kichó ni kixin jnkokoá chrókjuenkayáxin sín. Jehe sín kjaxin kjuich'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuich'ekoni xra. Tí ihnjé sín la ó ts'ínixín ts'ínixín ihnje chojni tsaá.

⁴ Nchechéhérá asánrá jnkochrixín kixin tjejókoará Ìnchéni. Ínaá kjatee xrjanka nchechéhérá asánrá. ⁵ Kaín chojni chrókónohe kixin jahará la chojni jínará. Chrórxáinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxínni tí kjuaxróxin kuènte ch'án kixin imá ijié tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjnhin Dios.

⁹ Chrókjuich'erá kaín tí nkehe kjuákoará la ko tí nkehe kuínhínra xrjanka la ko tí nkehe kuétuanhánra la ko tí nkehe k'uikónrá kjuít'a, mé kaín tíha chrókjuinchexiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

¹⁰ Ìnchéni imá nchechàna kixin jahará xráinkáonrá tí janhan ínaá. Ntáxrjanhya kixin tsík'itjáyahanhárá tí janhan kixin jahará xitjahya k'uejínkítsará tí janhan. ¹¹ Jehya kixin ntáxrjan tíha kixin imá t'ichjánxinna kixin janhan na ó kuánna kjuaxróxin tjén kjónté tí nkehe chonta ó. ¹² Janhan ó kuánna tjén kjónté nóana la ko kjaxin ó kuánna tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhi la kjónté á chróchonta ichrén nkehe ó á chróchontahya ninkehó la ántosénna. ¹³ Kaín xra tsjácha sjt'a kixin Cristo tsjinkítsana. ¹⁴ Kjánchó jahará jína kjuich'erá kixin kjuínkítsará kjuánjonrá nkehe t'ichjánxinna.

¹⁵ Tió sákjuixian estado Macedonia la kjuankíxian kjuakua tí tan tsaáxinni ínaá la jahórá tí nínko chjasin Filipos ichr'anrá chichaon k'uayáha kixin cháhará kjuákoará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkítsará tí nkehe k'ueichjánxinna ntíha. ¹⁷ La jehya kixin tjínkavan kixin jehó nkehe chrók'uayáha. Náhi. Jehí tjínkavan kixin jahará ántsí má chrókjuich'erá tí nkehe tjinkaon Dios kixin ntá ántsí chrókjuachará. ¹⁸ Ó k'uayáha kaín nkehe tsikjánjonrá la ántsí itsjé chonta. Ó k'uayáha tí nkehe tsichr'anrá mé tí nkehe kjuíkaó ch'ín Epafrodito, la kaín tíha la ó tsjácha. Tíha la éxi yóhe ijnko nkehe xraxé náxrjón chróchjehérá Dios

mé éxí ijnko iko chrók'oyánrá imá chrókóxrjínhìn ch'án. ¹⁹ Tí Dios kuèntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkáchónkirá Cristo Jesús. ²⁰ Kjuasáyé It'éni Dios jnkochríxín. Mé xíkaha tsoxiteyá. Amén.

Tsjixixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjohará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etqan romano mé nixjohará sín. ²³ Tjáncháha kixin Inchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énhen ch'án tí sín chjasin Colosas

Ch'ín Pablo ikjin xroon k'uáyéhę tí nıńko chjasin Colosas

¹ Janhan Pablo tsíkjeýána Jesucristo t'aha ch'án xra kixin xıkaha tjınkaon Dios, la ko kíchó ni Timoteo ² mé ikjinni tí xroon i tsochr'ánharáni tí jahará tsíkjinchetjóára Dios la ko kuítekáonrá Jesucristo tjejórá chjasin Colosas. Kjuasáyé It'eni Dios chrókjuıntayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochr'ín tjancheheni kjuasáya Dios la ko tjanchiani kixin chrókjuinkıtsa ch'án tí jahará mé jehe ch'án It'é İnehéni Jesucristo. ⁴ Ó kuínhinni kixin jına tinkáchónkirá İnehéni Jesucristo la ko tjuèhéra kaín tí sín ó tsíkjinchetjóá Dios. ⁵ Mé xıkaha tjejochonhéńrá kixin ts'ayéhéra tí nkehe chónıta Dios tjen nkaya nkajní. Jahará la xıkaha tjejochonhéńrá kixin tjejetinhéńrá tí tan chaxín kuénte Dios tsaáxinni. ⁶ Tı tan i mé kuínhin chojni la itsje sín tinkáki tekaon sín la tinkák'ánkí tí kjuachaxin kuénte Dios kuenté chjasintajni. Mé xıkaha kónhen tíó kuínhíńrá la ko kuítekáonrá kixin chaxín tjuahará Dios. ⁷ Tıhi mé kjuakohará kíchó ni Epafra. Jehe ch'án la jnkoqá kjuich'ekoni ch'án xra kixin jehe ch'án la jına ch'ehe ch'án xra Cristo kixin xıkaha tjinkıtsa ch'án tí jahará. ⁸ Jehe ch'án mé kui ch'án nıhi chrónka ch'án nkexrı tjuèhéra kıchuára kixin Nchakuen Dios tjinkıtsa tí jahará.

⁹ Méxra xıkaha tí yaon tíó kuínhinni nkexrı tjejórá la títoehyani tjancheheni Dios kixin tsjinkıtsa tí jahará kixin tsonohará jına nkexrı tóxrjinhin ch'án la ko tjanchiani kixin tsjanjon ch'án kjuachaxin kixin tsiéńxıńrá kaín nkehe kuénte ch'án. ¹⁰ Tjancheheni ch'án kixin jına chrók'uejórá kixin tinkáchónkirá İnehéni la ko chrókjuıtoéhyará chrókjuıch'erá éxı tóxrjinhin tí jehe ch'án. Ntı jına chrókjuachará chrókjuıch'erá xra kuénte ch'án la ntá chrókónohará jına nkexrı tjen Dios. ¹¹ Tjanchiani kixin jehe ch'án chrókjuinkıtsa kixin chrók'uejórá fuerte kixin tí kjuachaxin jíé kuénte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehéra kjuasáya It'eni Dios kixin kjuanjon ch'án kjuachaxin kixin ts'áyéhéni tí nkehe tí tjen tí t'inkaséyan mé tí nkehe ts'áyéhę kaín tí sín tsíkjinchetjóá tí jehe ch'án. ¹³ Jehe ch'án mé kuakıtsjekjanxınnı ch'án tí sítıé la ntá kjuanjon ch'án kjuachaxin ts'ejónı tí t'etóan tí Xjeen ch'án, tjuéhe ch'án. ¹⁴ Jehe ch'án kjuınchekaáni ch'án kixin k'uenyákonhenni ch'án la tí ijnjé ch'án mé kjuenka ch'án tí ijjéni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxı tsjehe Cristo mé xıkaha tsjehe Dios kjónté xıtjahya t'ıkonni tí jehe ch'án. Cristo la ó xráxın tjen tí naıa t'ónahya nınkehó. ¹⁶ Kjuachaxıén tí jehe ch'án kjuıch'énaxın Dios kaín tí nkehe síın nkajní la ko chjasintajni la ko kaín tí nkehe naıa t'ıkonhyani la ko tí nkehe ó t'ıkonni. Kjaxın kaín tí sín áńgel t'etóan la ko chónıta kjuachaxın la mé jehe ch'án kjuıch'éna ch'án kixin sıch'ehe sín ch'án xra. ¹⁷ Cristo la ó xráxın tjen kjónté naıa t'ónahya nınkehó la jehe ch'án t'ayakonhen ch'án kaín nkehe síın kixin tí kjuachaxın kuénte ch'án. ¹⁸ La kjaxın jehe Cristo mé tí kja t'etueńhen tí cuerpo mé tíha mé tí nıńko.

Jehe ch'án senó xechón ch'án kixin jehe ch'án mé ts'etueñhen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án. ²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajni. Mé xikaha tsjasin ch'án kjuaxróxin kixin jehe ch'án kjuák'enkáni ch'án nta cruz ik'uén ch'án.

²¹ Jahará la óse ikjín k'uék'ejorá la k'uéninkákonhénra Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios ²² kixin k'uenyákonhánra Cristo, kjuasóte tí cuérpóe ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. ²³ Méxra xikaha chrókuítóéhyará chrókuinkachónkirá Ìnchéni la ko chrókuítóéhyará tí nkehe tjejochonhénra kixin ó kuinhínra tí tan tsaáxinni. Tí tan i mé ó chrónka chojni kuénté chjasintajni la ko janhan Pablo kjaxin tjinkitsa xrjanka xikaha.

Ch'in Pablo ch'e ch'án xra kuente njnko

²⁴ Méxra ijie la tjasótexinna kixin tí jahará la chána kixin xikaha mé tsjintaxín tjasóte janhan kixin tí nkehe t'itjáyán tí naxa chrókjuasóte Cristo kixin jehe ch'án mé kjuasóteyákonhen ch'án tí njnko mé tí cuérpóe ch'án. ²⁵ Mé xikaha Dios kjuéyána kixin sjt'a xra kuente njnko kixin xikaha tí xra k'uétuanna ch'án kixin ntá jina chrók'uejoxínra tí jahará kixin chrókjuíntaxín chróxrjankaxián tí itan kuente Dios. ²⁶ Tí nkehe ninkexró k'uénoehya tjemá óse nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. ²⁷ Dios tjinkaon chrókjuínchenohe tí jehe sín tí nkehe tjemá náxrjón tjehe ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénra ts'ayéhérá tí kjuachaxin jie kuente ch'án.

²⁸ Jeheni mé chronkaxínni nkehe kuente Cristo la nchexraxinkaonni kaín chojni la ko tjakoheni sín kixin chrókuiénxín sín jina. Ntá jnkojnko sín chrók'uánki kjuaxrexinkaon kuente sín kixin tinkáchónki sín ch'án. ²⁹ Méxra xikaha tí xra it'a la kaín asenná it'a xra tí kjuachaxién chjina Cristo.

2

¹ Tjinkavan chróónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan. ² Tjinkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuéhe sín kichó sín. Mé xikaha chrók'uánki kjuaxrexinkaon kuente sín chrókuiénxín sín jina kixin ntá chrókónohe sín tí nkehe ninkexró k'uénoehya kuente It'eni Dios, mé Cristo tíha. ³ Jehe ch'án chóna kaín xín kjuaxrexinkaon kuente Dios la jehe ch'án mé nohe ch'án kaín nkehe. ⁴ Kaín tíha xrjanka kixin ntá ninkexró chrókjuít'ayahyará tí jahará kixin tí náxrjón chrónixja sín ó. ⁵ Kjónté tjenhya tí cuerpo kuéntana tí tjejorá la ntá nchakuenná la mé tjen ntiha kixin xráxinkavan tí jahará la chána kixin t'ikuán kixin jina tjejorá naxa tinkachónkirá Cristo.

⁶ Méxra xikaha kuinkachónkirá Ìnchéni Jesucristo la mé xikaha jnkokoá chrókjuenkayáxinkoará tí jehe ch'án. ⁷ Éxi jnko nta tsíkji nuéé njnka mé xikaha chrókuinkachónkirá tí jehe ch'án éxi kjuakohará ch'án la ko chrókjuanchehérá Dios kjuasáya jnkochríxín.

Cristo tjanjon jnko ntja njxin

⁸ Chrókuítóéhyará kixin ninkexró chrókjuit'ayahará kixin tí nkehe ntoáhya chrókuáqohará sín. **A** ntá jehe sín chrónkahya sín éxi tjinkaon Cristo. Náhi. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxin kjuachaxin chóna Dios mé chóna Cristo kjónté k'óna ch'án chojni. ¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuenhen ch'án kaín nkehe síin la ko t'etuenhen ch'án kaín nchakuen t'etóan. ¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuènte tí cuerpo. Náhi. Kjuakjiin ch'án tí jie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo. ¹² Tí kuíkiterá jahará mé xikaha éxi xravákoará Cristo. Ntá ó xechón tí jehe ch'án la kjaxinrá xechónrá kixin ó kuítekaónrá tí kjuachaxin kuènte Dios kixin Cristo la ó xechón ch'án ínaá. ¹³ Jahará ósé la éxi tsík'en asánrá k'uék'ejorá kixin tí jie k'uéchontará kixin k'uéchonhyará Dios la k'uéchontahyará xroye kuènte ch'án. **A** ntá ijie la éxi xechónrá kixin Cristo kjuatsen tí jie chontará. ¹⁴ Mé Dios kjuatsen ch'án kaín tí nkehe tsík'etóan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kixin Cristo kjuák'enkáni ch'án tí ntacruz la xikaha kjuatsenxin ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuèhé ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajní

¹⁶ Méxra ninkexró chrókjontahyará kixin tí nkehe chrókjónterá ó tí nkehe chrók'uirá ó á tjikosáyehérá tí yaon kia ó tí nitjó nixin ó tí yaon t'ók'éheni. ¹⁷ Kaín tí nkehe a la ó tóyóhó tí nkehe itsi. **A** ntá tí nkehe chaxín la mé Cristo tíha. ¹⁸ Méxra chrókuítóéhyará kixin ninkexró chróntáchro sín kixin ts'itjáyánrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxi kotáchrién sín t'íkonxín sín la nchehnke sín kixin tí nkehe t'axrjeníxin kja sín ó. ¹⁹ **A** ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ni la jehe ch'án mé ch'éna ch'án jnkoqóá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xikaha tjinkaon Dios.

²⁰ **A** ntá jahará la ó k'uénkoará Cristo la kuítóhérá tí nkehe k'uék'etóan kuènte chjasintajni ó. **A** ntá nkekuènté naxa tjejorá éxi tí chojni síin chjasintajni chrókjúin chexiteyará tí nkehe t'etóan sín? ²¹ Mé xikaha t'etóan sín kixin jahará chrótséhyará tíha la chrókjóntehyará tí nkehe la chrókuákjáhyará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjeníxin ikja chojni ó. ²³ Chaxín kixin jehe sín ntáchro sín kixin jína xikaha sinchexiteyá sín kixin tinkáchónki sín tí sín ángel la nchehnkehya sín la ko itsje nkehe ch'ehe sín cuérpóé sín, kjánchó kaín tí nkehe ch'e sín xikaha la chónkó kixin tjinkítsahya kixin chrókuítóhe sín tí nkehe ntoáhya tjenkayáxin sín.

3

¹ **A** ntá tí jahará la ó tsíxechónkoará Cristo. Méxra chrókuéyará tí nkehe síin nkaya nkajní kixin Cristo la ntíha tjetjaxín ch'án tí tja chjina Dios. ² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko

Dios chóntehe tí kjuachón kuèntará. ⁴ Jehé Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jíe kuènte ch'án.

Tí ntia ntaxin la ko tí ntia nixin

⁵ A ntá chrókuítoghérá kaín tí jie tjenkayáxinrá chjasintajni. Ninkexró chrókuasinko jie chojni chjin ókjé, la ninkexró chrókuíuch'e nkehe jínahya, la ko ninkexró chrókuíuch'e ninkehó tí nkehe ntáchro asén sín, la ko kjaxin chrókóxrjienhya sín chróchónta sín itsjé nkehe kixin tíha mé yóhe tí chrórxaxinkaoon sín tí nkehe tsíkjanoya. ⁶ Méxra tí nkexro titekakonhya tí nkehe t'etóan Dios la tsonínkakonhen Dios tí jehe sín la sinčekjasóte sín ch'án. ⁷ Mé xikaha k'uékjich'erá jahará tí ósé. ⁸ Méxra ijie chrókuítoghérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kichuárá la ko tí nkehe jínahya t'axrxéjin ir'vará. ⁹ Chrókuíuch'iyéhyará kichuárá kixin ósé xikaha k'uékjich'erá a ntá jie la ó chrókuítoghérá kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuíuch'éna ch'án tí jahará. Mé xikaha chrókuixraká chróchoxínrá tí jehe ch'án jína. ¹¹ Jehya tjetóan á chojni judío o náhí o á chojni tsíka xroye o náhí o á chojni tsíkjixin kjin o náhí o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etuénhen kaín nkehe.

¹² Dios la tjuèhe ch'án tí jahará la tsíkjayará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókuíkonoghérá kichuárá la jína chrók'uejorá la ko chrókuínchehnkehýará la ko chrókójjahýará la ko chrókóninkákonhyará. ¹³ Chrókóninkákuénhyará kichuárá la chrók'uitjáyanhánrá ichrén jie kjuasinhánrá í jnko chojni kixin Cristo la k'uitjáyenhen ch'án tí jie kjuásinrá la kjaxin jahará la xikaha chrókuíuch'erá. ¹⁴ Mé xikaha chrótjuèhérá kichuárá la jnkokoá chrókjuenkayáxinrá. ¹⁵ Tí kjuaxróxin kuènte Cristo mé chrók'uetuénhen asánrá kixin xikaha kjuenkayáxin Dios k'uíyáhará ch'án kixin chrók'ónará jnkokoá cuerpo kuènte ch'án mé xikaha chrókjuancheherá ch'án kjuasáya.

¹⁶ Tí tan kuènte Cristo jnkochrínín chróchónta asánrá. Mé xikaha chrókjuákohérá kichuárá la chrókjuínchechéhérá kichuárá kaín kjuaxrexinkaoon jína. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrá. ¹⁷ Kaín xra chrókuíuch'erá la ko tí nkehe chróntáchorá la kaín táha chrókjuanchaxínrá ihníé Ìnchéni Jesús la chrókjuanchehérá kjuasáya It'éni Dios kjuachaxién Jesucristo.

Jnkójina chrók'uejóko kichó tí sín tinkáchónki Cristo

¹⁸ Jahará chojni chjin la chrókjuínchexiteyéhérá tí xiyará kixin mé t'ichjánxin xikaha chrókuíuch'erá kixin tinkachónkirá Ìnchéni. ¹⁹ Jahará chojni ntoá la chrótjuèhérá tí ichjiánrá la chrókóninkákuénhyará tí jehe tjan. ²⁰ Jahará chánjanrá la chrókjuínchexiteyéhérá it'ará la ko inárá kaín nkehe chrók'uetóan sín kixin xikaha mé tóxrjínhin Ìnchéni. ²¹ Jahará it'é xjan la chrókjuínchekóninkakonhyará tí xjaanrá kixin tí xikaha la chrókjuínchek'ávahýará tí jehe xjan. ²² Jahará chojni ch'exón xra chrókjuínchexiteyéhérá tí lámóará ntihi chjasintajni. Jehya kixin tí tjejótsjehe sín ó chrókuíuch'erá xra kixin ntá jína chrók'uejoxínrá. Náhí. Kaín asánrá

chrókjuich'erá xrá kixin ó nohará kixin xikaha ch'eherá Ìnchéni xrá. ²³ Kaín nkehe chrókjuich'erá la kaín asánrá chrókjuich'erá xrá éxi chrókjuich'eherá xrá Ìnchéni la jehya kixin éxi chojni ó chrókjuich'eherá xrá. ²⁴ Ó nohará kixin Ìnchéni la sintakitonhanrá tí nkehe chónṭa ch'án kixin jahará ch'eherá Cristo xrá la jehe ch'án mé chaxín Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xrá. Chrórxáinkáonrá kixin kjaxinrá jahará chontará ijnko Dios tjen nkaya nkajní.

² Chrókuitoéhyará nixjehérá Dios la ko chrókjuancheherá ch'án kjuasáya.

³ Kjaxin tjancheherá ch'án tsjinkítsa tí jeheni kixin tsjanjon Ìnchéni kjuachaxin chrókuinhin chojni tsochrónkaxínni tí itén Cristo. Tí xrá k'uénoehya ninkexró mé tjechjinaxián jie. ⁴ Tsjancheherá Dios kixin tsjinkítsa ch'án tí janhan kixin chrókianxian jína chrókjuákua éxi tjinkaon Dios.

⁵ A ntá jahará la jína chrókjuáakohérá itén Dios tí sín naxa tinkáchónkihya Ìnchéni kixin kánhyó tiempo siín kixin tsjakorá. ⁶ Chrónixjehérá sín jnkojína kixin chrókovárxinhin sín la chrókónohará chrókjuáteherá nkexrí tsixro jnkojnko chojni.

Kjuixin nixja ch'ín Pablo

⁷ Kíchóni Tíquico, mé ijnko nkexro jína tjinkítsa tí janhan ch'ehe Ìnchéni xrá, mé tsjiji ch'án tsochrónka ch'án nkexrí tjén janhan. ⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuèheni kíchó ni la ko jehe ch'án mé kjaxin jína ch'e ch'án xrá, la mé tsjijitsjehe sín tí jahará. Jehe ch'ín Onésimo mé sín chjasánrá. Jehe sín mé tsochrónka sín kixin nkehe sitóhenen tí tjejóni ntíhi.

¹⁰ Ch'ín Aristarco mé jnkokoá tjechjinakian ch'án ntóechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrá tí ch'ín Marcos tí tsjijitsjehe ch'án tí jahará la chjehérá ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikítexin sín ch'án Justo. Jehó tí sín a mé sín judío tinkáchónki Cristo, a ntá ijie tjinkítsa sín tí xrá tjet'a la chrónkaxín sín nkehe kuènté tí kjuachaxin kuènté Dios. La tí sín a mé imá kjuínchechána sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xrá Cristo la jehe ch'án mé sín chjasánrá. Jehe ch'án jnkochríxín chrónóehé ch'án Dios tjinkaon ch'án kixin kaín asánrá chrókuinkachónkirá Dios éxi tjinkaon ch'án. ¹³ Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kíchó ni tjejó chjasin Laodicea la kjaxin nixjehérá tjan Ninfas la ko tí sín tójnkoṣé ntóe tjan. ¹⁶ Tió tsjixin sinchekuáxinrá tí xroon tsíkijiji tí tjejorá ntíha la ichr'anrá xroon sátsji sinchekuáxin tí sín tjejó nínko chjasin Laodicea la ko kjaxin sinchekuáxinrá tí xroon tsíkijijihí tí jehe sín tió tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókjuinchexiteyá ch'án jína tí xrá tsíkjanjon Ìnchéni sich'e ch'án.

¹⁸ Janhan Pablo tjaná kjinxiān tí palabra nixjahará. Jahará chróxráxinkáonrá kixin janhan la tjechjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'eni Dios la ko Ìnchéni Jesucristo. Kjuasáyé It'eni Dios la ko Ìchéni chrók'uejorá.

Tí sín ókje chjasin mé kjuíncheyóhe sín tí sín Tesalónica

² Jnkoyaxón chjéheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará. ³ Tió nixjehe ni It'eni Dios xraxinkaonni kixin kaín asánrá kuitekáonrá Ìnchéni, a ntá tjejoch'erá xrá la ko imá tjuèhérá kíchuará ntá jnkokoá tjejochonhénrá tsokjan Ìnchéni Jesucristo. ⁴ Kíchóni jahará, imá tjuahará Dios la ó noheni kixin jehe ch'án tsíkjeýará ch'án tí jahará. ⁵ Na mé xíkaha tió kjuíjini chjasánrá kjuakoqharáni tí tan jína nixin tsaáxinni chrónkani na jehya iténni ó. Náhí. Kjaxin kjuachaxièn Nchakuen Dios kjuakoqxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jína kixin nkexrí k'uejóni tí tjejorá kixin xíkaha chrók'uejorá chrókjuakoqxinrá.

⁶ Mé xíkaha kjuíncheyóhérá tí jeheni la ko kjuíncheyóhérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnchéni la ko kócháhará kixin tí Nchakuen Dios mé t'etuehenen asánrá kjónté nchónhya nkehe k'uatínkará. ⁷ Mé xíkaha kjuákuexínrá kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸ Jahará kjuákoqxinrá tí itén Dios la jehya jehó estado Macedonia la ko tí estado Acaya kjuákoqxinrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe naxa chróchronkani, ⁹ kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuitekáonrá tí itén Dios kjuakoqharáni la ntá kuítóhérá kaín tí nkehe tsíkjanoya kixin ntá kjuankixinrá kuinkachónkirá Dios tjechón chaxín. ¹⁰ La ko kjaxin tjejóchronka sín kixin jahará tjejochonhénrá tsokjanxin nkaya nkajní tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexínni itsi.

2

Tí xrá tsíkijich'e ch'ín Pablo tí chjasin Tesalónica

¹ Kónohará kaín rá kichó ni kixin jehya chónkó kjuíjini chjasánrá. ² Ó kónohará kixin senó tí sín chjasin Filípos k'ueéjinchekjasóteni sín la ko k'ueé'ántaxínhinni sín. Kjánchó Dios mé kjuínkitsa ntá chrakonhyani kjuakoqharáni tí tan tsaáxinni kuènte Dios kjónté imá k'ueéninkakonhenni sín. ³ Kónohará kixin jehya ntoáhya kjuakoqharáni la ko jehya ijnko nkehe náxrjónhya kjuakoni la ko kjuít'ayahyaráni ninkehó. ⁴ Náhí. Dios mé kjuéyá ch'án tí jeheni kixin chrókjuakoni tí tan tsaáxinni, mé xíkaha ntoá tjakoni.

Jehya kixin chojni ó nchechéheni. Náhí. Nchechéheni Dios tí nkeexo nohe nkehe tónhen asénni. ⁵ Ó nohará kixin kjuích'iyaxínhyani itan imá náxrjón kixin xíkaha chrókuakitsjexínni chichaon chrókuachani. Náhí. Dios la ó nohe ch'án kixin xíkahya kjuích'eni. ⁶ Tjeyáhyani kixin chojni chrókuikusáyeheni sín la á jahará la o í so chojni. Náhí, xíkahya ch'eni, kjónté chóntani kjuachaxin chrók'uetuáhanrání kixin chrókuánjonrá nkehe chrók'uáyéheni kixin jeheni ch'eheni xra Cristo. ⁷ Jnkojína k'uénixjaharáni k'uék'ejóni. Éxí yóhe ijnko iné xjan t'áyakonhen xjeen kixin ts'ánki xjan mé xíkaha jeheni k'uáyakonhanrání tí jahará. ⁸ Imá tjuàhará ntá jehya jehó tí itén Dios chrókuakoḡharáni. Náhí. Kjónté chrók'uénxínni tí tjakoḡharáni kixin xíkaha imá tjuahará. ⁹ Kíchóni, chrórxaxinkáonrá kixin tió k'uéjóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uénaxínni nkehe sineni kixin tjinkakonhyani kixin chrótjāharáni xra chrókuánjonrá nkehe chrókjoneni nachrohe k'uejóni ntíha kjuakoḡharáni itén Dios.

¹⁰ Jahará la ó nohará la ó nohe Dios kixin chaxín jína k'uéjokoaráni jahará chojni tinkáchónki Ìnchéni. Nijnko nkeexo ts'ekahyani jie kixin ichrén nkehe jínahya chrókuích'eni. ¹¹ Jahará ó nohará kixin kjuakoḡharáni la ko kjuínchechéheni tí jahará jnkojnkora éxí ch'e ijnko it'é xjan tjuèhe xjeen ch'án. ¹² La ko k'uetuáhanrání kixin jína chrók'uejorá éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyāhará ch'án kixin chrók'uayéhérá tí kjuachaxin kuènte ch'án.

¹³ Méxra jnkochríxín tjancheheni Dios kjuasáya kixin tió kuínhínrá tí tan jína kuènte ch'án kjuakoḡharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntjará. ¹⁴ Mé xíkaha jahará kíchó ni kjuasótiará kónínkakonhanrá tí sín chjasánrá éxí yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankíxín kuínkáchónki sín Ìnchéni ntá tí sín judío chjasén sín mé kjuankíxín sín kónínkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xíkaha kjaxín k'uinkíténi sín. A ntá xíkaha kjuích'e sín la kónínkakonhen sín kaín chojni. A ntá Dios la kóxrjénhya ch'án kixin xíkaha kjuích'e sín. ¹⁶ A ntá tjinkaonni kixin chrókuakoḡheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókuakoni. Na mé xíkaha imá nchek'ánki sín tí jie kuènte sín. A ntá xíkaha kjuích'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'ín inaá tí sín chjasin Tesalónica

¹⁷ Kíchóni, tió kuítōheni tí jahará a ntá kjónté ókjé k'uéjóni la k'uérxaxinkaonni kaín asénni tí jahará la ko imá tjinkaonni chrókujuitsjeheni tí jahará inaá. ¹⁸ Na mé xíkaha janhan Pablo itsjé veces mé tjínkavan chrókuasántsjahá tí jahará, a ntá tí ch'ín Tsochren mé k'uinkakónna ntá xitjahya tsjasán. ¹⁹ ¿Nkehe tsoḡhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochèxínni tió tsi Ìnchéni Jesucristo kixin kuítekáonrá ch'án. ²⁰ Méxra jahará mé kóchèxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójina jehóni chrókuítōheni chjasin Atenas ² na ntá ichr'ánni tí kíchó ni Timoteo a tsi-

jitsjehe ch'an tí jahará kixin kjaxin ixra kuente Dios tjech'e ch'an tjejókoni ch'an tjako ch'an tí tan kuente Cristo tsaáxinni. Ntá ichr'ánni ch'an kixin sintaxraxinkaonrá ch'an tí itén Ìnchéni la ko sinchechéhe ch'an asánrá ³ kixin tsqxrjéhya asánrá má kixin tí kjuaxróxinhya tjejó't'atsínkará. Kixin xikaha ó nohará kixin t'ichjánxìn tsjasótéxinni tí xra kuente Ìnchéni. ⁴ Naxa k'uejóni jnkoqó ntiha la ó tjonkará kixin kaín ni kjuaxróxinhya tsonhenni tsjasóteni. A ntá jie la ó nohará kixin chaxín xikaha kónhen. ⁵ Méxra imá kóxakonna ntá ichr'an kichó ni Timoteo kjujitsjehe ch'an nkexrí tjejórá, á naxa tinkachónkirá Ìnchéni o ách'e ch'ín Tsochren chrókjuachroerá chrókuítóhérá tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxìn ch'ín Timoteo chjasánrá Tesalónica chrónka ch'an kixin jina tjejórá naxa tinkachónkirá Ìnchéni, la ko naxa tjejórá tjeuhérá kichuárá la ko chrónka ch'an kixin xraxinkáonrá tí jeheni tjinkáonrá chrókjujitsjeheni tí jahará. Kjaxin jeheni xikaha tjinkaonni chrók'uikonni tí jahará. ⁷ Mé xikaha kichó ni tjejó't'atsínkani kjuaxróxinhya ntihi na ntá kjónté kóchéhe asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xikaha kixin jina tjejórá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'an. ¹⁰ Tie la ko nchakotjin chronóeheni Dios kixin tsjanjon ch'an kjuachaxin tsjijitsjeheni tí jahará inaá kixin naxa t'itjayan iso nkehe chrókjuakoharáni naxa chrók'uitjára nkexrí jina chrókuinkachónkirá Ìnchéni.

¹¹ Tjejó'tjancheheni T'éni Dios la ko Ìnchéni Jesucristo kixin chrókjuinkitsani ch'an chrókjujitsjeheni tí jahará ¹² la ko tjancheheni Ìnchéni kixin chrókjuinkitsa ch'an tí jahará kixin antsí má chrótjuehérá kichuárá la ko chrótjuehérá kaín xín chojni éxi yóhe tjuàhará. ¹³ Tjancheheni ch'an kixin sintaxraxinkaonrá ch'an kixin kaín asánrá chrókuitekáonrá ch'an kixin ntá tsochóntahya asánrá ninkehó jie nkayakon It'éni Dios tió tsokjan Ìnchéni Jesús tsikao ch'an kaín tí sín ó tsíktójtóá.

4

Nkexrí tóxrjnhìn Dios chrók'uejóni

¹ Jahará kichó ni chronógharáni la kontaxraxinkaonráni tí kjuachaxin ihñje Ìnchéni Jesús kixin jina chrók'uejórá tinkachónkirá Ìnchéni éxi tjejóch'erá jie kixin éxi kjuakoharáni. Mé xikaha jina sinchechéhérá Dios.

² Ó nohará tí nkehe kjuakuaxinráni kjuachaxin kuente Ìnchéni Jesús. ³ Tí nkehe tjinkaon Dios kixin jina tjóá chrók'uejórá la ko chrókjuasínkoahyará jie í jnko chojni chjin ókjé. ⁴ Jnkojnkorá chrókónohará chróchontará jnkojnko ichjiánrá la ko jina chrók'uejórá chrótjuehérá kichuárá. ⁵ Jehya kixin chrókjuakérá asánrá tí nkehe jínahya chrókjuich'erá éxi ch'e tí chojni chónhya Dios. ⁶ Nijnkorá chrókjuich'iyehérá ichjiéni kichuárá xikaha kixin Ìnchéni mé imá sinchekjasóte ch'an tí chojni xikaha sich'e mé xikaha kjuíntaxraxinkaonráni senó. ⁷ Dios mé k'uíyeheni ch'an kixin jina chrók'uejóni, jehya kixin naxa chrókjuasinni jie. ⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhi. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhérá kichuárá la í t'ichjánxinhya naxa chrókjinni tsochronkani kixin nkexi chrótjuèhérá kichuárá kixin jehe Dios mé tjetjakohará ch'án nkexi chrótjuèhérá kichuárá. ¹⁰ Xrácín xikaha tjejoch'erá tjuèhérá kaín tí sín kichó ni tjejó estado Macedonia. Kjánchó chronóaharáni kichó ni kixin antsí má chrótjuèhérá kichuárá. ¹¹ Tóxakonhanrá kixin kjuaxróxin chrók'uejorá. Jnkoinkorá nohará nketí xra chrókjuich'exínrá tjárá éxi k'uetuñhanráni. ¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

¹³ Kichóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjanámárá sín chrókóyóghyará tí sín tinkáchónkihya sín Ìnchéni naxa chónhya sín kixin chróxechón sín inaá. ¹⁴ Kuítekaonni kixin ik'uéñ Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsítónxinhyani ntia, naxa tsochónhenni tí sín tsík'en. ¹⁶ Jehe Ìnchéni mé ts'inkajinxin ch'án nkaya nkajni la ko itsen tsonixja ch'án kixin tí kjuachaxin jié kuènte ch'án la ko ts'èya tí ángel t'etqan la ko tsontáchro tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'éxin kaín xinni tjejóchónni la ko kaín xín tí sín tsixechón mé jnkokoqa tsochrinni kixin tí kjuachaxin jié kuènte Ìnchéni. A ntá xríkjan tjuj tsoxetani ch'án. Mé xikaha ts'ejókonni ch'án jnkochrícín. ¹⁸ Méxra xikaha chrókjuinchechéxínrá kichuárá tí tan i kixin xikaha tsonhen tió tsokjan Ìnchéni.

5

¹ A ntá tí yaon tsonhen tíhi kichó ni t'ichjánxinhya naxa tsokjinni í jnko nkehe tsinhínrá. ² Jahará ó nohará jina kixin titàya itsi tí yaon tsokjan Ìnchéni éxi yóhe chrókui ijnko xíchee tí tie a. ³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrináhya titàya itsi tí kjuaxikaon jié la ko kjuachakon mé ts'itjáyanxín tí kjuachón chróchónta sín éxi yóhe ijnko tjan tjejá xrináhya titàya tsjankixin ts'ontáki tjan kixin sinchekokjilhi tjan xjeen tjan na mé jehe tjan xitjahya tsontáchro tjan “Náhi”, mé xikaha jehe sín chóntahya sín nkerí tsaáxin sín. ⁴ Ntá jahará kichó ni sítíehya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxi chrókui ijnko xíchee chrókjuintachakonrá. ⁵ Ntá jie kaín rá mé tjejorá tí ntia t'inkáséyan. Jeheni la jehya tjejóni tí ntia sítíe a. ⁶ Méxra xikaha chrók'uejójuahyani éxi tjejójua tí sín í so na mé chrók'uejósjeheni chrókjuenkayáxinni jina. ⁷ A ntá tí sín t'ajua la tjejójua sín tí sítíe ó la ko tí sín tókoan la tókoan sín tí sítíe a. ⁸ A ntá jeheni na tjejóni tí ntia t'inkáséyan t'ichjánxin kixin jina chrók'uejóni chrókjuasinhyani jie. Chrókuinkáchónkini Ìnchéni la ko chrótjuèhene ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'ín soldado t'inkáya ka tsík'óna chica kixin kohya nkehe tsonhen ntaquin ch'án. La ko chrók'uejóchónhenni itsi Ìnchéni tsaáxinni ch'án na mé éxi tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. ⁹ Kjuéyáhya

Dios tí jeheni kixin chrókjuinchekjásóteni ch'án. Náhi. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrixin kjónté naxa tjejóchónni o kjónté ó tsik'enni tió tsokjan ch'án. ¹¹ Méxra xikaha chrókjuinchechéhérá kichuárá la ko chrókjuinkĩtsará kichuárá kixin jína chrók'uejó sín éxí xráxín tjejoch'erá.

Ch'ín Pablo mé nhexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntiha tjejójtitaón sín ntĩa chrónka sín itén Ìnchéni. ¹³ Na mé chróchontehérá sín kjuasáya la ko chrótjuéhérá sín má kixin tí xra tjejóch'e sín. A ntá jahará kaín rá jnkojina chrók'uejokoará kichuárá.

¹⁴ Méxra tétuñhanrání kichó ni kixin chrókjuéntuéhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuinkĩtsará tí sín naxa noehya sín jína la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejotjenkayáxinrá.

¹⁶ Méxra nchechéhérá asánrá jnkochrixin. ¹⁷ Chrókuítóéhyará chrónixjehérá Dios jnkochrixin. ¹⁸ Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkachónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios. ²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá. ²² Chrókuítoghérá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jje tió tsi Ìnchéni Jesucristo. ²⁴ Dios tí nkexro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókjuincheyaon tí jehe sín

²⁵ Kichóni chrónóghérá Dios kixin tsjinkĩtsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'etqanxinni tí kjuachaxin kuènte Ìnchéni kixin nchekuáxinrá tí xroon ch'anhánrá tshinín kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nínko chjasin Tesalónica kixin jnkokoá tinkáchónkini It'éni Dios la ko Ìnehéni Jesucristo. ² Kjuasáyé It'éni Dios la ko Ìnehéni Jesucristo chrókuintayaonrá ch'án kixin kjuaxróxin chrók'uejorá.

Dios sinchekitoxén ch'án tí ijje chojni tió tsokjan Ìnehéni Cristo

³ Kichóni chrókuancheheni Dios kjuasáya jnkochrín kixin tí jahará. Na mé jína xikaha chrókuich'eni kixin tinkák'ánkí tí tinkachónkirá Ìnehéni Jesús la ko tinkák'ánkí tí tjuèhérá kichuára tjejorá ntiha. ⁴ Ntá chéhe ni chenkaní tí sín kichó ni kaín tí nínkoje Dios kixin naḡá tjákoxinrá kixin naḡá tinkachónkirá Ìnehéni kjónté síin chojni nínkakonhará la ko kjónté t'atsínkará itsjé kjuaxróxinhya. ⁵ Tíha mé tjákoxinrá kixin tjínkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejotjasótéxinrá jie.

⁶ Méxra ó nchoxon kixin sinchekjasóte Dios tí sín tjejónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnehéni Jesús ts'inkajinxin ch'án nkaya nkajní tsjkaon ch'án kaín tí sín ángel t'etoan kuènte ch'án na mé tsjkaon ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonyha tí tan jína kuènte Ìnehéni Jesucristo chrókuaáxin sín. ⁹ A ntá tí sín kuítekakonyha mé tsjasóte sín jnkochrín ts'ítuenhen sín ts'axrjenta sín tí kohya Ìnehéni, í ts'ikonhya sín tí kjuachaxin t'etoanxin ch'án. ¹⁰ Xikaha tsonhen tí yaon itsi Ìnehéni tsjikosáyehe ch'án kaín xín tí sín kjuínchetjóá ch'án la ko kaín tí sín kuínkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekáonrá tí nkehe kjuakoharáni.

¹¹ Mé xikaha jnkochrín tjancheheni Dios kixin jína chrók'uejorá éxi tjínkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkitsará ch'án kixin chrókjuachará ch'erá kaín tí xra jína tjínkáonrá chrókjuich'erá kixin tinkachónkirá ch'án. ¹² Mé xikaha kaín xínrá tsjikosáyehehérá tí ihnjé Ìnehéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xikaha kjuasáyé Dios la ko Ìnehéni Jesucristo kixin kuíkonógheni ch'án.

2

Tsonoxín tjnko ch'ín jínahya

¹ Kichóni, a ntá tí tsi Ìnehéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójin nkexro tónohe sín kixin ó kjuixraká tí yaon itsi Ìnehéni, la ko chróchrakonhyará

xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxí jeheni tsíkjanjonni chrónka kixin xikaha tsonhen. ³ Títoéhyará kixin jnkójin nkexro chrókjuít'ayahará xikaha. Naxa tsihya tí yaon ntá senó itsjé chojni tsonínkakohen sín Dios, la ko tsonoxín ijnko ch'án jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxín ch'án nkaxenhen tí nínkoe Dios kixin jehe ch'án mé sich'éna asén ch'án éxí Dios tí jehe ch'án.

⁵ ¿Á xráinkákonhyará kixin xikaha k'uéxrjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjóté naxa t'itjayan kixin sáchrókjuí tí nkexro chónthehe. ⁸ A ntá tí ch'ín jínahya tsonoxín ch'án. Ntá tíó tsi Ìnchéni Jesús ntá tí itén ch'án ts'axrjéxín ir'va ch'án ó mé ts'enxín tí jínahya a kixin mé xikaha sinchek'itjayanxín ch'án tí jínahya tí kjuachaxin jie tsíkao ch'án. ⁹ Méxra tí ch'ín jínahya mé tsíkao ch'án tí kjuachaxin kuente ch'ín Tsochren la mé xikaha tsochóna ch'án kjuachaxin jie tsjakoxín ch'án sich'iyaxín ch'án tsjasín ch'án kjuaxroan ntoáhya. ¹⁰ Mé xikaha kaín nkehe jínahya sich'iyéxín ch'án tí sín xráxín ts'itjayan sín kixin chrohya sín chrókuitekaon sín tí tan chaxín ntoá chrókuaáxín sín. ¹¹ Méxra tsítóhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuitekakonhya sín tí tan chaxín chrókuaáxín sín na mé antsí kóxrjínhin sín chrókjuasín sín jie tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjeýá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekaónrá. ¹⁴ Méxra xikaha k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jie kuente Ìnchéni Jesucristo.

¹⁵ Mé xikaha kichó ni, jina chrók'uejorá chrók'uitjayanhyará tí nkehe kjuakoharáni tíó k'uéjóni jnkokoá la ko tí nkehe chrónka tí xroon ikjinni k'uayéhérá. ¹⁶ Ntá Ìnchéni Jesucristo la ko It'éni Dios na mé tí nkexro kjuasáyé ch'án tjeúhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jina chrónixjará la ko kaín xra jina chrókjuich'erá.

3

Nixjehérá Dios kixin tsjinkítsa kaín ni

¹ Méxra kjuixixín chrónóaharáni kichó ni kixin chrókjuanchehérá Dios kixin chrókjuinkítsa ch'án tí jeheni kixin tjoka sáchrókjuikjakoni itén Ìnchéni nkuixín kixin ntá tsinhin chojni la tsjikosáyehe sín ch'án éxí yóhe kuítekaónrá jahará. ² Kjaxin nixjehérá Dios kixin chrókjuinkítsani ch'án kixin kohya nkehe chrókónhenni tí síin chojni jínahya nínkakohenni kixin kénhya sín tinkáchónki Ìnchéni. ³ Ntá Ìnchéni mé chaxín jina ch'án la jehe ch'án tsítóehya ch'án tí jahará naxa tsjinkítsará ch'án kixin jina ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkítsa ch'án

tí jahará kixin naxa s'ich'era xra éxi k'uetuñhanrani. ⁵ Ìnchéni tsjinkĩtsará ch'án tsonohará kixin Dios la tjuahará ch'án la ko tsjinkĩtsará ch'án kixin chrókóninkákonhyará éxi kónínkakonhya Cristo.

T'ichjánxin chrókjuich'eni xra

⁶ Kíchóni t'etoxínini tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kíchó ni tjinkakonhya sich'e xra la ko xrihya sín éxi kjuakoharani. ⁷ Ó nohará kixin nkexri chrók'uejorá chrókjuákoxinrá éxi k'uejótí tí jeheni kixin tí k'uejótíkoaráni la jehya kixin kjuich'ehyani xra. ⁸ Jehya kixin kjóneni niotjé jnkójín nkexro ntá chrókjuenkahyani. Náhí. Kóxakonhenni nchakotjín la ko tie kjuich'eni xra kixin ninkehó chóntjixínhyani tí jahará kixin chrókjuánjonrá tí nkehe chrókjóneni. Náhí. ⁹ Kjónté chóntani kjuachaxin chrókjuanchaharáni kixin chrókjuínkĩtsará tí jeheni kjánchó jeheni na kjuich'eni xra kjuakoxínini kixin xikaha jahará chrókjuich'era xra. ¹⁰ Kixin tí naxa k'uejótí jnkokoá ntíha k'uetqanni kixin: Tí nkexro tjinkakonhya ch'e xra la kjaxin chrókjonehya. ¹¹ Ó kuínhinni kixin tjejorá jnkójínrá ninkehó xra ch'ehyará a ntá kjuach'ia ó xríkoará. ¹² A ntá tí kjuachaxién Ìnchéni Jesucristo t'etoxínini la ko chrónóexinni tí sín a kixin chrókóninkakonhya sín chrókjuich'e sín xra kixin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjéhyará chrókjuich'era tí nkehe jína. ¹⁴ A ntá tí tjen jnkójín nkexro titekakonhya tí nkehe t'etoxínini tí xroon i la tsjehérá jína nkexro tíha la ntá chrók'uitohyará ch'án la ntá chrókósuéhe ch'án. ¹⁵ Kjánchó jehya kixin chrókjuánjonkoará ch'án. Náhí. Chrókjuínchexraxinkáonrá ch'án jnkójína éxi ijnko chojni kíchó ni.

Ó kjuixixín nixja ch'in Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochrixin kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xikaha chrókjuátsqanxínrá tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuañ éxi xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókujuntayavan ch'án la ko chrókuiñonóaha ch'án kixin kjuaxróxin tsjak'e jaha.

Chrókuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxi xrjannóaha tió sákjuia estado Macedonia la mé jaha chrókuítgha tí chjasin Éfeso la nataha chrókuétuénhén iso tí sín ntiha kixin chrókuakohya sín tí nkehe ntoáhya. ⁴ La ko chrókuétuénhén sín kixin chrókuahya sín kuenté tí cuento tsichronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í tsjinkítsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótuèheni kichó ni kaín ni kixin ó kótjóá asénni la ko ó noheni kixin jína tjenkayáxinni la ko kaín asénni tinkáchónkini Cristo. ⁶ Iso sín la kjuíchròe sín kixin itjo tí nkehe chónkó. ⁷ Tjinkaon sín chrók'óna sín maestro chrókuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jína tí chrokuakoni éxi tjinkaon Dios. ⁹ Ó noheni kixin tí sín tjasinnya jie t'ichjánxienhya sín tí ley tsík'etgan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chónthahya kjuasáyé Dios la ko tí sín t'oyán it'é la ko ìné sín la ko kaín tí sín tjáya. ¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jína tjakoní. ¹¹ Tí nkehe tjakoní mé chaxin tí tan jína sinchekaá chojni la tí Dios tjetoan mé k'uetuanna kixin tsjákua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuíñkítsana ch'án la ko k'uíkon ch'án kixin jína sít'ahá ch'án xra ntá chjina ch'án tí xra í. ¹³ Mé xíkaha kjueyána ch'án kjónté senó imá k'uék'ántaxínhan tí sín tinkáchónki ch'án la ko k'uéchonkihá sín la ko chrók'oyán sín. Kjónté la Dios imá kuñkonóehe ch'án tí janhan kixin ó nohe ch'án kixin k'uéinkachónkihya janhan tí jehe ch'án la ko k'uénonahya nkehe tí xra k'uékjít'a. ¹⁴ Méxra Ìnchéni antsí má kjuíncheyaonna kixin ntá kjuanjon ch'án kjuachaxin kixin tsinkachónkia ch'án la ko tsotjuahá ch'án. Mé xíkaha kaín ní chóntani tí kjuachaxin tinkáchónkini Cristo Jesús.

¹⁵ Tíhi mé chaxin la kaín ní chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásin jie. ¹⁶ Kjónté xíkaha kjuít'a la Dios antsí má kuñkonóana ch'án tí janhan kixin xíkaha kjuákoxin Jesucristo kixin kónínkakonhya ch'án. Mé xíkaha tsjákuañan

kaín nkexro tsitekaon tí jehe ch'án kixin tsochóna sín kjuachón jnkochrín. ¹⁷ Ntá jnkochrín tsochónteheni kjuasáyé tí Rey t'etöan. Jehe ch'án mé ijnko nkexro xráxín tjen la mé ijnko nkexro chónhya ts'en la xitjahya ts'ikonní ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkachónkia jína Ìnchéni la ko tjenkayáxian tí nkehe jína. Mé xíkaha sínchexiteyá tí nkehe kuínhín senó kixin tí sín kíchó ní chrónkaxín ihnjé Dios. ¹⁹ Í so sín la kjuenkayáxinhya sín tí jína ntá kjuíchròe sín kuitòhe sín tí nkehe tinkáchónki sín. ²⁰ Mé xíkaha kónhen ch'ín Himeneo la ko ch'ín Alejandro. Janhan kjuánjuan kjuachaxín kixin ch'ín Tsochren mé sinchekjasóte sín kixin mé xíkaha ts'itja sín kixin í ts'ántaxíenhya sín Dios.

2

Nkexrí chrónixjeheni Dios

¹ A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkítsa ch'án kaín xín chojni. ² Chrókjuanchia sín kixin Dios imá chrókjuinkítsa ch'án kaín tí sín t'etöan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni. ³ Xíkaha mé imá jína la tóxrjínhín Dios, mé tí nkexro tsaáxinni. ⁴ Jehe ch'án mé imá tjínkaon ch'án kixin tsaá kaín xín chojni la ko tjínkaon ch'án kixin tsonohe chojni tí nkehe chaxín ntoá. ⁵ Mé itjen jnkokoáxón Dios la ko itjen jnkokoáxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikuí ch'án chjasintajni. ⁶ Jehe Jesucristo mé k'uenyákonhenni kaín xinni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsíntácho Dios ósé kixin xíkaha tsonhen ch'án. ⁷ Méxra tí xra mé kjueyána Dios kixin tsíjkjáqohá tí sín jehya judío kixin tsínkáchónki sín Jesucristo la ko tsonohe sín tí nkehe chaxín. Janhan mé tinkachónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóá asén sín la ko chrókónínkakonhya sín la ko chrókjuéhya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsíkjinchetjóá Dios. ¹¹ Tí chojni chjin t'ichjánxin chrókuinhín sín itén Dios la chrónixjahya sín la ko chrók'uetöanhya sín. ¹² A ntá janhan tjánjonhya kjuachaxín kixin chojni chjin chrókjuako tí nchónhya chojni síin la ko tjánjonhya kjuachaxín chrók'uetuénhen sín chojni ntoa. Jehe sín la tání sín chrók'uejó sín ¹³ kixin saoxín la Dios kjuíchéna ch'án tí ch'ín Adán la ntá chr'éxin kjuíchéna ch'án tjan Eva. ¹⁴ A ntá ch'ín Adán la ninkexró kjuích'iyehya ch'án. Náhi. Tí tjachjin mé tsíkitekakonhen tjan tí nkexro tsíkjich'iyehé tjan ntá xíkaha xrankíxixín k'uúxin jie. ¹⁵ A ntá tí chojni chjin la kjónté xíkaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuéhe sín ch'án la ko ntoá ts'ejó sín la ko jína tsjenkayáxín sín.

3

Jína chrók'uejó tí sín t'etuenhen tí nínko

¹ Ijnko nkehe chaxín tjonka. Tí nkexro tjinkaon sich'e xra kuènte nínko mé imá jína xra tjinkaon ch'án. ² Tí ch'ín chrók'ueŋtoan mé ntoá chrókjuak'e ch'án kixin kohya nkexro chrók'ueka ch'án jje la ko kjaxin chróchónta ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchónta ch'án kjuasáyé ch'án la ko kjaxin jína chrónixjehé ch'án tí nkexro tjiji ntøe la ko kjaxin chrókónohe ch'án tí nkehe chrókjuako ch'án. ³ La ko kjaxin chrókókoanhyia ch'án la ko chrókjuéhya ch'án kjuanínkaon la ko kjaxin chrókóxrjienhyia ch'án kixin chrókjuacha ch'án nchónhyia chichaon. A ntá chrókójiehyia ch'án la ko kjuaxróxin chrókjuak'e ch'án la ko chrókóxrjienhyia ch'án chróchónta ch'án itsjé chichaon. ⁴ Jehé ch'án mé kjaxin jína chrók'ueŋtuenhen ch'án tí sín tjejó ntøe ch'án la ko chrókjuentuéhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuenhen ch'án tí sín tjejó ntøe ch'án la çntá nkexrí chrók'ueŋtoan ch'án tí nínko kuènte Dios? ⁶ Íchá jína kixin jehya ijnko nkexro na ntá k'uixenhen chrókjuako kixin tí nkexro na ntá k'uixenhen la imá chrókjuinchehne ch'án la ntá chrókjuasin ch'án jje éxi kjuasin ch'ín Tsochren ijje senó. ⁷ Kjaxin t'ichjánxin kixin kaín xín tí sín naxa tinkáchónkihya Ìnchéni mé tsochónta sín kjuasáyé tí ch'ín t'etøan a. Tí náhi la ts'eka sín ch'án jje ntá tí xikaha la ch'ín Tsochren tsjacha tsjachrøe tí ch'ín a ntá tsjasin ch'án jje.

Nkexrí chrók'uejó tí sín tsjinkitsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejó sín kixin chróchóntehe sín kjuasáyé chojni. Kjaxin t'ichjánxin kixin chrókjuinchehiteyá sín tí nkehe ntácho sín la ko chrókókoanhyia sín la ko kjaxin chróchóntiaxinhyia sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kixin jehé sín chróxraxinkaon sín á nchøxon tí xra ch'e sín. ¹⁰ Saoxín chrótsjehe kaín chojni á ninkehó jie chóntahya tí nkexro la ntá tí chaxín jína jehé ch'án la ninkehó jie chóntahya ch'án ntá jína ts'ixenhen ch'án tí xra kuènte nínko. ¹¹ La ko kjaxin tí chojni chjin mé chrók'uejó sín jína kixin chróchónta sín kjuasáyé sín. Kjaxin chrókjuinkáchónkihya sín kjuach'ia la ko jína chrók'uejó sín la ko chrókjuinchehiteyá sín kaín nkehe. ¹² Tí sín diácono la mé chróchónta sín jnkokoá ichjién sín la jína chrók'ueŋtuenhen sín xjeen sín la ko jína chrók'ueŋtoan sín ntøe sín. ¹³ T'ichjánxin ijnko xra jína sich'e sín kixin ntá tsjacha sín ts'áyéhe sín ijnko nkehe jína tsjanjon Ìnchéni la ko kjaxin tsosuehyia sín tsochrónka sín nkexrí tinkáchónki sín Cristo Jesús.

Dios mé kjuinchenoheni tí nkehe k'uékiexínhyani

¹⁴ Tjínkavan tjoka chrókjuasántsjaha tí jaha kjánchó senó tsokjian tí xroon i. ¹⁵ A ntá tí tsøxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna nínkøe Dios tjechón. Jeheni kaín ní mé tjejó'tayakonhenni tí tan chaxín ntoá. ¹⁶ Ninkexró chróntáchrohya kixin chaxínhyia tí nkehe tinkáchónkini mé ijnko nkehe imá jie tíha la ninkexró k'uénoehya tí senó a.

Dios mé ikui k'óna chojni;

ikui ch'án kjuakoxin ch'án kjuachaxién Nchakuen Dios chóna ch'án kixin jína tí jehé ch'án.

La ntá tí sín ángel mé k'uíkon sín ch'án

la kuenté chjasintajni mé ó kuínhin sín nkehe chrónka ch'án ntá itsjé sín kuítekaon sín ch'án.

Ntá Dios k'uáyéhe tí jehe ch'án nkaya nkajní.

4

Tí sín kútohe tinkáchónkiya Cristo

¹ A ntá ntáchro Nchakuen Dios kixin tí chjina tsjeje chjasintajni mé iso sín mé tsítóhe sín í tsínkáchónkiya sín Ìnchéni la ntá tsitekaon sín nchakuen tí jínahya sich'iyehé sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjonté imá tsjan sín jie la í tsosuehya sín kixin éxí tsíchján tí tjenkayáxixin sín la í tjenkayáxinhya sín jína. ³ Jehe sín mé tjinkakonhya sín kixin chrókótehe chojni la ko kjáxin tjinkakonhya sín kixin chrókjóneni nto. A ntá jeheni ó noheni kixin Dios mé kjuich'éna ch'án kaín xín nkehe ineni la tjinkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kjuasáya ntá chrókjóneni. ⁴ Méxra kaín xín tí nkehe kjuich'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjóneni ⁵ kixin tíó tsoxraxinkaonni itén Dios la tsonixjeheni ch'án la ntá sincheyaoon ch'án tí nkehe sineni.

Jnko chojni jína ch'ehe xra Jesucristo

⁶ Jaha tjákehé tí sín kíchó ní kaín tí nkehe i la ntá xikaha imá jína sich'ehé xra Jesucristo la ko antsí tsjinkítsa ch'án ts'ánki kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xráqoha. ⁷ Jaha mé tahya kuénté tí cuento chónkó la ko tí nkehe ntoáhya tinkáchónki iso sín. A ntá jaha la chrókútoéhya chrókuinkachónkia Dios. ⁸ Tí chojni tsítán la jína tíha kjánchó antsí má tjetoan chrórxaxinkaonni Dios. Tíha la tsjinkítsa kixin jína xritjéjóni ijie la ko kjáxin tsjinkítsa kixin ts'áyéheni kjuachón jnkochríxín tíó tsokjan Ìnchéni. ⁹ Kaín tíhi mé chaxín la kaín chojni chrókuitekaon. ¹⁰ Mé xikaha kjónté t'ántaxínhíni chojni la jína ch'eni tí xra i kixin tinkáchónkini Dios tjechón. Jehe ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'lichjánxin tsétoan la ko tsjákua. ¹² Jaha chrókútoéhya kixin chrokjuaoná sín kjónté naxa ntasoyá. Chrókjuáqoxián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuéhe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín. ¹³ Nachrohe tsjasán la jaha sinchekuáxian tí xroon itén Dios kixin tsinhin kaín sín la ko sjnchexraxinkávan kaín tí sín kíchó ní la ko tjákehé sín. ¹⁴ Sjnchek'itjáyanhya tí kjuachaxién Dios k'uayéhé tíó tí sín t'etóan kuénte nínko kjuachaxién Dios k'uejotja tja sín chrítaon íkjá.

¹⁵ Chrókóxakonhan chrókjuínchexiteyá kaín tíha kixin kaín chojni tsotsjehe sín kixin jína noha. ¹⁶ Chrókjuenkayáxian jína tí nkehe tjákua kixin jína chrókjuak'e jaha, chrókjuínchexiteyá kaín nkehe la ntá tí xikaha sich'e la tsaa jaha la ko tí sín tjejótinhin tjákua la tsaa sín kjáxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jína chrónixjehé sín jnkojína éxí chrónixjehé it'á. La kjáxin tí sín ntasoá chrónixjehé sín éxí chrónixjehé kichuá mero. ² A ntá tí sín ó nána la mé chrónixjehé sín éxí

chrónixjehé iná xikaha. Kjaxin tí sín tjarisoá mé jnkojína chrónixjehé sín éxi chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuinkitsa tí síchjin tsíók'án la ko nchekitonhén sín nkehe sine sín tí chaxín kohya nkexro tsjinkitsa sín. ⁴ A ntá tí chojni chjin tsíók'án chóna xjeen o chóna inté, a ntá tí jehe sín mé chrók'uitja sín chrókjuinkitsa sín kixin sine tí sín kjéhya sín. Tíha mé chrókjuenkaxin sín tí it'é, iné sín kixin kjuínchek'ánki sín, kixin xikaha mé jina tórxjínjin Dios. ⁵ Tí tjan chaxín tsíók'án na jehó tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin. ⁶ A ntá tí sín tsíók'án ixri sín tjasin sín jie la kjónté tjejóhón sín la éxi tsík'en sín xikaha tjejó sín. ⁷ Tétuehén tí sín kixin sinchexiteyá sín kaín tíha kixin tsokohya nkexro tsjanchia jie. ⁸ A ntá tí nkexro tóxakuenhya kixin sín sín naxa kjéhya la ko kjaxin tóxakuenhya kixin sín tjejó ntøe ch'án mé xikahó tjakoxin kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Ìnchéni la kénhyó.

⁹ Tí ts'ínixín ihnjé tí sín tsíók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii. ¹⁰ Kjaxin chrókjuakoxin tjan kixin jina ch'e tjan xra la ko chrókjuakoxin tjan kixin jina kjuínchek'ánki xjeen tjan la ko kjaxin jina nixjehé tjan tí nkexro tjiji ntøe tjan la ko kjaxin k'uáyakonhen tjan tí sín tinkáchónki Cristo la nchehnkehya tjan la ko kjaxin kjuinkitsa tjan tí sín níhi la ko í so xra jina kjuích'e tjan.

¹¹ A ntá chrók'uénixínhya ihnjé tí sín tsíók'án naxa tsjéhya nánó chóna kixin tsontácho asén sín kixin í jnko chojni ntoa tsotøe sín inaá la ntá tsítóhe sín ixra kuénte Cristo. ¹² Ntá xikaha tsjasin sín jie kixin sinchexiteyáhya sín tí nkehe tsintácho sín. ¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jina tí xikaha chrónixja sín. ¹⁴ Méxra tí sín tsíók'án naxa tjarisoá sín la íchá jina chrókótehe sín chróchóna sín xjeen sín la ko chrók'uáyakonhen sín ntøe sín. A ntá tí xikaha la tí sín nínkakohan la chrókjontahya sín tí jaha. ¹⁵ A ntá iso tí sín tsíók'án ó kuítóhe sín tinkáchónki sín Ìnchéni kixin ch'in Tsochren tsíkjachròe sín.

¹⁶ A ntá jnkojín chojni tinkáchónki Cristo ts'ikon sín kixin tsíók'án tí síchjin kjéhya sín ntá t'ichjánxin tsjinkitsa sín kixin sine tí sín a kixin tsochóntiahya sín tí nínko tsjinkitsa. Méxra jehó tí sín chaxín tsíók'án chónahya nínkexró tsjinkitsa mé chrókjuinkitsa tí níngo.

¹⁷ Tí nkexro jina t'etøan xra kuénte níngo la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxin sín la ko tjako sín. ¹⁸ Kixin xroon itén Dios mé ntácho kixin: “Chrók'uejójáhyará kamposa ir'va tí koxinta tjejóch'e xra”, la ko kjaxin ntácho kixin: “Tí sín ch'e xra la síin kjuachaxin chrókjuacha sín.”*

¹⁹ Chrókuahya kuénté jnkojín nkexro tsjikaø kjuach'ia t'eka jie tí nkexro t'etøan xra kuénte níngo. T'ichjánxin tsønóxín yaá o iy'á sín tsochrónka kixin chaxín chóna jie tí nkexro a. ²⁰ Chrókjuéntuéhé tí sín tjasin jie nkayakon kaín sín kixin ntá tsinhín tí í so sín kixin tsochrakon sín, í tsjasinhya sín jie. ²¹ Tétuánxian kjuachaxién Dios la ko Ìnchéni Jesucristo la ko tí sín ángel kjueyá ch'án kixin jnkokón tsjéntuéhé kaín chojni la ko jnkokón tétuehén sín kaín tí nkehe xrxanka. ²² Chrókjuéyáhya chjini jnkojín sín kixin ts'etøan sín xra kuénté

* 5:18 Deuteronomio 25.4, Mateo 10.10; Lucas 10.7

n̄inko k̄ixin tí chróchón̄ta s̄in j̄iē la k̄j̄axin jaha chrókuamá tí j̄iē. A ntá jaha chrókuítoghé kaín nkehe jínahya.

²³ Jaha la jnkoyaxón tóniha t̄joté tsaa. Jehya int̄a ó chrók'uaia. K̄j̄axin intsí xranvino chrók'uaia ntá chrókuítogaxián jína.

²⁴ Tí ij̄iē jnkój̄in chojni la t'ikonn̄i nox̄in tí n̄ax̄a kuítoḡexínhya ij̄iē s̄in. A ntá í so s̄in nóxinhya t̄jasin s̄in j̄iē k̄jánchó tió tsjixixín la tsonox̄in tí j̄iē t̄jasin s̄in.

²⁵ Mé x̄ikaha k̄j̄axin ó t'ikonn̄i k̄ixin iso chojni imá ch'e s̄in tí x̄r̄a jína. A ntá í so s̄in k̄j̄onté t'ikonhyani la xitjahya tsjak'emá s̄in tí nkehe jína ch'e s̄in.

6

¹ Tí s̄in ch'exín x̄r̄a mé t'ichj̄ánx̄in tsochón̄tehe s̄in k̄juasáya tí lamo kuènte s̄in, k̄ixin ntá tí í so s̄in la ts'ántaxiēnhya s̄in ih̄nié Dios la ko ts'ántaxiēnhya s̄in tí nkehe tjakoni. ² A ntá tí s̄in ch'exín x̄r̄a la chón̄ta s̄in lámogé s̄in tinkáchónki Cristo la mé chrókuítoghya s̄in tsjikosáyehe s̄in tí lamo k̄ixin jnkoka kichó s̄in. La mé ant̄si jína chrók̄juink̄itsa s̄in k̄ixin ó nohe s̄in k̄ixin tjink̄itsa s̄in ijnko nkexro tinkáchónki Cristo la chrót̄juēhe s̄in kichó s̄in. Jaha mé tjákohé s̄in kaín tíha.

Tí nkehe tinkáchónk̄ini tsoch̄èx̄inni

³ Iso s̄in tjako tí nkehe jehó s̄in t̄jenk̄ayáxin s̄in la tóyoḡehya tí nkehe jína k̄juako Ìnchéni Jesucristo la ko jehya tí nkehe tinkáchónk̄ini. ⁴ Ó jehí nchehnke s̄in la nínkehó noehya s̄in. Tí ntoáhya nixja s̄in la tíha mé éx̄i ijnko chin chón̄ta s̄in la tíha mé t̄j̄ix̄in tí k̄juachj̄in̄ox̄ínhin la ko tjanjonko kichó s̄in la ko t'ántaxiñh̄in s̄in kichó s̄in la ko chón̄tehya s̄in kichó s̄in k̄juasáya. ⁵ Mé tí s̄in la náx̄r̄j̄ónhya t̄jenk̄ayáxin s̄in la jnkochr̄ix̄in tjanjonko kichó s̄in la noehya s̄in tí nkehe chaxín. Mé t̄jenk̄ayáxin s̄in k̄ixin tinkáchónki s̄in Ìnchéni k̄ixin x̄ikaha chrók̄juacha s̄in nchónhya chichaon, ichro s̄in. Jaha la chrókuítoghé tí s̄in x̄ikaha ch'e. ⁶ Tí tinkáchónk̄ini Ìnchéni la ijnko nkehe imá t̄jetoan la ko t̄jete tíha a ntá k̄juaxr̄ox̄in chrók'uejóni k̄j̄onté tí nkehe chón̄tani ó. ⁷ A ntá tí kokj̄ih̄ini la ninkehó kuikohyani tí kuini chjasintajni la k̄j̄axin tió ts'enni la ninkehó nkehe xitjahya sáts̄jikoni. ⁸ A ntá tí chón̄tani nkehe sineni la ko chón̄tani ikéni la k̄j̄onté táhó la chrókóchéh̄eni. ⁹ A ntá tí s̄in t̄j̄in̄kaon s̄in imá chrókóríko s̄in mé tí s̄in a mé tsjichr̄è s̄in la lont̄i s̄in k̄ixin x̄ikaha t̄jenk̄ayáxin s̄in, la mé ts'it̄j̄ayanx̄in s̄in tíha. ¹⁰ Tí imá t̄juèh̄eni chichaon la tíha mé nuèé kaín nkehe jínahya. Jnkój̄in chojni imá t̄j̄in̄kaon s̄in tsochón̄ta s̄in chichaon ntá tsjichr̄è s̄in tsítogh̄e s̄in tsinkáchónki Ìnchéni la tíha mé imá sinchekjasótex̄in s̄in as̄en s̄in.

Jína tí nkehe tinkáchónk̄ini

¹¹ Jaha mé tinkáchónké Dios la t̄j̄toghé kaín tí nkehe i. Chrók̄juak'e ntoá la ko kaín as̄án chróxr̄áx̄inkáv̄an Dios la ko chrók̄juinkáchónkia ch'án la ko chrót̄juéhé kichua la ko chrókóninkákonhya tjoka la ko chrók̄juinchehnkehya as̄án. ¹² Tjanjonkoa kaín nkehe jehya tí jína la ko kaín as̄án tinkáchónkia Ìnchéni k̄ixin ntá chrók̄juacha chrók'uayéhé tí k̄juachón jnkochr̄ix̄in k̄ixin mé x̄ikaha k'uíyaha Dios tí jaha. Jaha la ó tsíchronka k̄ixin tinkáchónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro ch̄jéhe k̄juachón kaín x̄in tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé t̄etuñhan ¹⁴ k̄ixin sinchexiteyá kaín tí nkehe t'et̄oan Dios k̄ixin í chrók̄juink̄ihya tí nkehe chrók̄juinkáchónkia la ntá tsokohya ninkexr̄ó ts'eka j̄iē tió tsjixrakájia tí ȳaon tsokjan Ìnchéni

Jesucristo. ¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóna ch'án kjuachaxin ts'etöan ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Inché kaín chojni. ¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsochjina tí tjen ch'án. Nínkexró k'uíkonhya tí jehe ch'án la ko nínkexró xitjahya ts'ikon tí jehe ch'án. Tsjikosáyeheni ch'án kixin jehe ch'án chóna ch'án kjuachaxin ts'etöan jnkochrín. Amén.

¹⁷ Tí sín chóna itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiaxínhya sín tí nkehe chóna sín kixin jnkochrínhya tsochóna sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xikaha tjinkaon ch'án tsochéheni. ¹⁸ Tétuenhén sín kixin chrókjuich'e sín tí nkehe jína kixin tí chaxín chrókóríko sín la chrókjuinkítsa sín kichó sín la chrók'óxikayehé sín tí nkehe chóna sín. ¹⁹ Mé xikaha chrókjuacha sín tí nkehe tjete kixin chr'éxin la jína chrók'uejó sín kixin chrókjuacha chróchóna sín tí kjuachón jnkochrín.

Kjuixín k'útuenuen ch'in Timoteo

²⁰ Jaha Timoteo t'ayakonhén tí xra la tiénhya tí nkehe ntoáhya nixja chojni. Ntácho sín kixin imá nohe sín kjánchó chaxínhya tíha. ²¹ Iso sín ó xikaha ntácho sín kixin imá nohe sín la ntá kjuíchròe sín í tinkáchónkihya sín Inchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹Janhan Pablo mé kjueyána Jesucristo t'ahá ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrínin tí tsinkáchónki sín Jesucristo. ²Ikjian tí xroon i chr'anhan jaha kichó ni Timoteo. T'íkuən éxi xjanna tí jaha mé imá tjuəha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókuikonógha ch'án la ko chrótjaha ch'án kjuaxróxin.

Chróchronka ch'án kixin tinkáchónki ch'án Jesucristo

³Xráxinkavan tí jaha tió níxjaha Dios nchakotjin la ko tie la ko tjetjánhaha kjuasáyé Dios kixin imá tinkáchónkia ch'án. Jehe ch'án mé t'ahá xra kaín asenná éxi xikaha mé k'uékjich'e tí sín tsik'axrjeníninna. ⁴Xráxinkavan jnkochrínin nkexri tsjanika la tjinkavan kixin chrótsjaha tí jaha inaá kixin tsochéhe asenná. ⁵Ó nóna kixin kaín asán tinkáchónkia Jesucristo. Kjaxin náchria tjan Loida la ko iná tjan Eunice mé saoxín kuinkáchónki sín Ìnchéni Jesús la ntá ó nóna kixin kjá kjaxin jaha xikaha tinkáchónkia ch'án.

⁶A ntá ijie ntaxráxinkavan kixin chrók'uitjányanhya tí kjuachaxiën Dios kjuanjon ch'án k'uayéhé tió kjuaké tjaná chrítaon tí jaha. ⁷Dios la kjuanjonyanhya Nchakuen ch'án kixin tsochrakonní. Náhi. Kjuanjon ch'án tí Nchakuen ch'án kixin tsochóntani kjuachaxin la ko jina tsojtjuèheni ch'án la ko jina tsjenkayáxinni. ⁸Chrókósuàhya chróchronka kixin tinkáchónkia Ìnchéni la ko kjaxin chrókósuàhya chróchronka kixin janhan tjechjinaxián tí xrjanka itén ch'án. Kjónté la íchá jina chrókjuasótexián tí tjákua tí tan tsaáxinni kixin tí kjuachaxin kuènté Dios ó k'uayéhé. ⁹Jehe Dios mé kuaáxinni la ko kjueyá ch'án tí jeheni kixin jina chrók'uejóni. La jehya tí xra jina kjuích'eni ntá chrókuaáxinni. Náhi. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixínnya chjasintajni mé tsikjenkayáxin ch'án tíha kixin jehe ch'án mé imá tjuèheni ch'án. ¹⁰Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjányan ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxin itén ch'án nkexri tsaáxinni ntá ó kónoexinni kixin tí kjuachón kjuakoxin ch'án mé xitjaha ts'itjányan.

¹¹Dios mé k'uetuanna sátsjixrjanka itén ch'án la ko kjueyána ch'án tsjákoha tí sín jehya sín judío tí tan jina. ¹²Mé xikaha tjetjasótexinna kaín tí nkehe i la kjónté tósuànanya kixin ó choxian jina tí nkexro tinkáchónkia. Mé ó nóna kixin chóna ch'án kjuachaxin ts'ayakonhenni ch'án tsjixrakájia tí yaon tsokjan ch'án. Méxra janhan tjahá ch'án asenná kixin ts'ayakonhen ch'án.

¹³T'itjányanhya tjákua kaín nkehe jina ó kjuákoha. Naxa títékavan la ko tjuèhé kichuára kixin tinkáchónkia Cristo Jesús. ¹⁴Kjuachaxiën tí Nchakuen Dios chóntani jnkojnkoni mé t'ayakonhén jina tí tan tjákua kjuíntakítõnhan Dios k'uayéhé.

¹⁵Jaha mé ó noha kixin kaín tí sín estado Asia mé jehe sín kuítõna sín la ko kjaxin tí ch'ín Figelo la ko ch'ín Hermógenes. ¹⁶Tjáncháha Ìnchéni kixin imá

tsikonóhē ch'án tí sín tjejó ntōe tí ch'ín Onesiforo kixin jehe ch'án mé imá kjuinkitsana ch'án la ko kósuehya ch'án ikui ch'án kjónté tjéehjina. ¹⁷ Tí nantá kjuíji ch'án chjasin Roma ntá kuítóehya ch'án kjueyána ch'án hasta k'uitjana. ¹⁸ Tjánháha Inchéni kixin tí yaon itsi ch'án ntá chrókuikonóhē ch'án tí ch'ín a kixin jaha ó noha jína kixin nkexrí kjuinkitsa ch'án tí janhan tí chjasin Éfeso kjaxin.

2

Kjuíncheyóexin ch'ín Pablo kixin jeheni éxi yóhē ijnko soldado jína kuènte Jesucristo

¹ Jaha xjeenni tákjá tí kjuachaxin kjuasáyē Jesucristo kjuanjon ch'án kixin tsjinkitsa kixin tinkáchónkini ch'án. ² Tí nkehe kuínhín kjuákua nkayakon nchónhya chojni mé xíkaha chjehé tí xrā tí sín jína choxian jína ch'e xrā kixin ntá jehe sín mé xíkaha chrókjuakohē sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo. ⁴ Kohya nijnko soldado jína ch'e xrā chrók'uixenhen ókjé xrā kixin t'ichjánxin jnkójínxón xrā sich'e ch'án kixin éxi tjinkaon tí nkexro t'etuenhen ch'án. ⁵ Mé xíkaha éxi yóhē ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etōan. ⁶ La éxi yóhē ijnko nkexro ch'e xrā nonte ntá chóna ch'án kjuachaxin saoxín tsakja ch'án tí nkehe ts'óna. ⁷ Chrórxaxinkávan jína kaín tí nkehe xrjanka la inchéni mé tsjinkitsa tesiexian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'ín rey David. Tíha mé tí tan jína tsaáxinni tjetjákua. ⁹ Tí tan tjejrjanka mé tjasótexinna. Tíha mé tjéchrontetoxinna cadena éxi ijnko chojni tsikjaya la kjónté tí itén Dios la jehya tjechrontetoxín cadena. ¹⁰ Méxra kjónté nchónhya t'atsínka tí janhan la ntáxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochrín kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxin ts'ejókoni ch'án.

¹² La tí tsjasótexinni tí jehe ch'án la ntá kjaxin ts'áyéhe ni kjuachaxin kuènte ch'án ts'etōanni.

A ntá tí chrókjuinchemáni tí jehe ch'án na ntá kjaxin ch'án la xíkaha sich'e ch'án.

¹³ Kjónté nchexiteyèhya ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xrā jína

¹⁴ Nchexraxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjonxin sín kixin ó chónkó tíha la ninkehó sínkíhya. Tí xíkaha ch'e sín la sinchek'itjayan sín tí sín tjejótinhin. ¹⁵ Sich'e xrā jína kixin tsōxrjínhin Dios tí xrā tjech'e a. Ntoá chrókjuákua tí tan jína chaxín kixin ntá chrók'uichjánxinhya chrókosuaha. ¹⁶ La tjtōhé tí nkehe náxrjónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín. ¹⁷ Tí nkehe jehya jína tjako sín mé éxi yóhē ijnko itōn sóa sitinkáchr'enka. Mé xíkaha tjako tí ch'ín Himeneo la ko ch'ín Fileto. ¹⁸ Jehe sín mé ó kjuixin kuítóhe sín tí ntia ntoá la ntáchro sín kixin ó kjuixin k'uátsínka tí tsōxechón chojni. Ntá xíkaha ch'iyehē sín tí í so sín la tsjitóxinhin sín tí nkehe tinkáchónki sín. ¹⁹ Kjánchó tí sín tinkáchónki Dios éxi yóhē tí xro

xrankixín tjat'o xitjahya tsoxíka la chóna éxi ijnko sello tí itén Dios ntáchro kixin: "Ínchéni mé tjatsoan ch'an tí chojni kuènté ch'an",* la kjaxin ntáchro kixin: "Kaín tí sín tinkáchónki Cristo mé t'ichjánxin chrókuítqhe sín kaín nkehe jínahya." mé xikaha ichro itén Dios.

²⁰ Ijnko nchia jié kuènte tí sín rico la siín vaso tsík'óna chica oro la ko vaso tsík'óna chica plata. La kjaxin siín nkehe tsík'óna ntachiso la ko nkehe tsík'óna nchetje. Iso la xra ó tsík'óna kuènte tí xra tjetóan la í so la tsík'óna kuènte tí xra tjetuanhya. ²¹ A ntá ijnko chojni chrókuítqhe kaín jié chrókóyóqhe éxi ijnko vaso tjóá jína kixin chrókuicháxinhin Ínchéni. A ntá tí nkexro xikaha chrókjuich'ehya tí nkehe jínahya kixin chrókuicháxinhin Ínchéni tí xra jína.

²² Títqhé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuèhé kaín chojni la ko kjuaxróxin chrók'uejokoa kaín sín. Mé xikaha chrók'uejó kaín xín tí sín kótjóá asén mé kaín tí sín tinkáchónki Ínchéni. ²³ Jaha chrókuaehya kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín. ²⁴ A ntá nkexro ch'ehe xra Ínchéni chrókjuanjonko kichó sín kixin jína chrókjuinkitsa kichó sín. Chrókónohe sín kaín nkehe jína chrókjuako sín la ko chrókónínakuenhya sín kichó sín. ²⁵ Kaín asén sín jnkojína chrónixjehe sín tí sín titekakonhya kixin chróchónhen sín kixin Dios chrókjuinkitsa tí sín a chrók'uixinkí tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín ²⁶ kixin t'ichjánxin chrókónohe sín nkexrí chrókuaáxin sín kixin ch'in Tsochren tjinkaon chrókjuich'iyehé sín ntá chrókjuasin sín jié.

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni. ² Tí sín chjasintajni tsinkáchónkihya Ínchéni mé imá chrók'uetqan sín jehó la ko imá tsoxrjínhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios. ³ Tsojtjuèhya sín kichó sín la ko tsikonóqheya kichó sín la ko tsjonta sín kichó sín la ko nkexró tsochrakuenhya sín la ántqсэн sín tsjasin sín jié, la ko imá tsojiqhe sín la ko imá tsonínkakonhen sín kaín nkehe jína. ⁴ Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsojtjinkaon sín tsjeyá sín tí nkehe ntáchro asén sín ó a ntá tsjeyáhya sín Dios. ⁵ Jehé sín la éxi chojni tinkáchónki Dios xikaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxra jaha la chrókuankiehya tí chojni ch'e xikaha. ⁶ Iso tí sín a mé ixri sín t'ixenhen ntqé ókjé chojni la ch'iyehé sín tí chojni chjin lontj tjasin jié la nchexiteyèqhe sín kaín tí ntáchro asén sín. ⁷ La xráxin ó tinkák'itja sín kjánchó nunca kuénxínhya sín tí nkehe chaxín ntoá. ⁸ A ntá éxi yóqhe tí sín k'uékjinchexroan mé ch'in Janes la ko ch'in Jambres mé k'uénínkakonhen sín ch'in Moisés mé xikaha tí sín tjako ijie núnkakonhen sín tí nkehe chaxín ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxín tinkáchónkini. ⁹ Kjánchó tsjachahya sín sich'ia sín isé kixin kaín

* 2:19 Números 16.5; Juan 10.14

chojni tsonohe kixin tí sín a mé lontj sín kixin éxi xikaha tsikónhen tí yaá sín k'uékóninkakonhen ch'in Moisés.

Tí nkehe kjuixín k'uetuñhen ch'in Pablo tí ch'in Timoteo

¹⁰ A ntá jaha mé ó kuítekavan tí nkehe kjuákua. Ó noha nkexrí kjuak'e janhan la ko ó noha tí xra kjuít'a janhan. Ó noha nkexrí tinkachónkia Ìnchéni la ko noha kixin tjokahya kónínkavan la ko noha nkexrí tjuaha chojni. Ó noha kixin kjónté kónínkaon chojni la kuitoahya tí xra a ¹¹ kjónté chónkina sín la ko kjuasótena. Ó noha nkehe kónna tí chjasin Antioquia la ko Iconio la ko Listra. Chrók'óyanna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna. ¹² Kaínxín tí sín tjínkaon tjóá chrók'u'ejó sín nchexiteyéhe Cristo Jesús la t'ichjánxín tsjasóte sín. ¹³ A ntá tí sín jínahya la ko tí sín ixri ch'ia sín mé ts'óna sín antsi jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuítekavan. Jaha la ó noha tí nkexro kjuakoha. ¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. ¹⁶ Ntá kuénté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuxinni tí nkehe chaxín la ko tíha mé jína tsjentuéheni la ko tsjinkítsani tsonoheni nkexrí chrók'uejóni ntoá ¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxi ijnko rey la sinchekítóexín ijíe kaín chojni tjejóhón la ko tí chojni tsík'en, ² mé tétuanhan chrókjuákua itén Dios kaín asán kjónté á chrókuinhin sín o náhi. Nixjehé sín jnkójina kixin tsitekaon sín la ko tjéntuéhé sín jnkójina. Chrókóninkákonhya chrókjuákohé sín. ³ Itsi ijnko yaon ntá tsotjinkakonhya sín tsinhin sín tí nkehe jína. A ntá sinchexiteyéhe sín tí nkehe ntácho asén sín ó. Tsjeyá sín nchónhya maestro tsjakohé sín jehó tí nkehe tóxrjnhin sín chrókuinhin sín. ⁴ Méxra tsítóhe sín tí nkehe chaxín ntoá la ntá itsa sín kuénté kaín nkehe chaxínhya. ⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xikaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'èn. ⁷ Ó kjuánjonkian jína kaín tí nkehe jínahya la ko ó kjuixinna tí xra kuéntana la ko kuitoahya jína kuinkachónkia Ìnchéni. ⁸ A ntá ijie la tí nkehe tsitonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehé ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sín ch'án la ko chéhe sín tjejóhónhen sín tió tsi ch'án.

Ch'in Pablo k'uetoan tsjijtsjehé sín ch'án

⁹ Jaha chrókóxakonhan tjoka chrók'uinkatsjehé tí janhan ¹⁰ kixin ch'in Demas la kuitohe ch'án tí janhan kixin imá kóxrjnhin ch'án tí nkehe kuénte chjasintajni. Sátsíkji ch'án chjasin Tesalónica. Ch'in Crescente mé sátsíkji ch'án chjasin Galacia a ntá ch'in Tito sátsíkji ch'án chjasin Dalmacia. ¹¹ Jehó ch'in Lucas naxa tjékian ch'án. Tjikjéyá ch'in Marcos la tsjikuana ch'án

ntihi kixin jehe ch'án mé jina tsjinkĩtsa ch'án tí xr̄a chonta ntihi. ¹² A ntá ch'ín Tíquico mé kuétuñhan ch'án sátsji ch'án chjasin Éfeso. ¹³ Tió ts'inka ts'inkakuana tí ka t'ítsate kuítóha chjasin Troas ntóé ch'ín Carpo la ko kjaxin ts'inkakuana tí libro kuéntana la ko koi tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xr̄a chica mé nchónhya nkehe jínahya kjuich'ena ch'án. Kjánchó Ìnchéni mé tsjenkehe ch'án kaín nkehe kjuich'e ch'án. ¹⁵ Jaha mé tóxakonhan kixin tí jehe ch'án kixin imá nínkakohen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkĩtsahyana. Kaín sín me kuítóna sín janhván. Kjónté xíkaha la tjáncháha Dios kixin chrókuahya ch'án kuéntá kixin xíkaha kjuich'e sín. ¹⁷ Kjánchó Ìnchéni mé chaxín kjuinkĩtsana ch'án la kjuanjon ch'án kjuachaxin kixin tsjachana naxa jina tsákua itén ch'án. Ntá kuínhin kaín tí sín jehya judío. A ntá Ìnchéni kjuinkĩtsana kixin kjónehya koxr̄a. ¹⁸ Ìnchéni mé tsjinkĩtsana kixin naxa tsonnahya kaín nkehe jínahya. Jehe ch'án mé ts'ayakonna ch'án ts'ixanhan tí tjet'etoan ch'án nkaya nkajní. Kjuasáyé ch'án kixin xíkaha jnkochr̄xín tsoxiteyá. Amén.

Ch'ín Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín siín ntóé ch'ín Onesíforo. ²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kónihi ch'án. ²¹ Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkójina.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énnen ch'án tí ch'ín Tito

Ch'ín Pablo nixjehe tí ch'ín Tito

¹ Janhan Pablo mé t'aha xra Dios la ko tsikjeyána Jesucristo kixin tsjákoħa tí í so sín tsikjeyá Dios kjaxin kixin ts'itja sín tsoñohe sín kixin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochóna sín kjuachón jnkochrín. Dios la xitjahya sich'ia la kaín tí nkehe tsíchronka ch'án ósé tí naxa k'ónahya chjasintajni la mé xíkaha tsoñhen. ³ Ntá tí yaon tsintáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'ueŋan kixin si't'aha ch'án xra tsjákuia itén ch'án. ⁴ Ikjian tí xroon í chr'anhan jaha Tito. T'íkuan éxi chaxín xjanna tí jaha kixin yóini tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókjuintayavan la ko chrókuiikonóħa ch'án la ko chrótjaha ch'án kjuaxróxin.

Tí xra sich'e tí ch'ín Tito chjasin Creta

⁵ Kujtoħa jaha tí isla Creta kixin jaha chrókuetuñhen tí sín siín ntiha kixin nkexrí chrók'uejó sín la ko chrókónoxín nkexro ts'etōan kuènte jnkojnko nínko jnkojnko chjasin éxi tí kuétuñhan jaha. ⁶ T'ichjánxin kixin tí nkexro ts'etōan xra kuènte nínko la jina chrókjuak'e kixin kohya nkexro chrók'ueka jie, la ko chróchóna jnkokoħa ichjién la ko tí xjeen sín chrókuinkáchónki Ìnchéni kixin tsokohya nkexro chrókjuanchia jie kixin jehya tí jina tjejóch'e sín, la ko kjaxin chrókójieħya sín. ⁷ Mé xíkaha tí nkexro ts'áyéħe tí xra ts'etōan xra kuènte nínko mé ts'etōan nkexrí tsoñhen xra kuènte Dios la ntá t'ichjánxin ijnko nkexro tsjenkayáxin jina, chrókjuasinhya jie. La chrókjuinchehneħya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjejá kjuanínkaon la ko chrókóxrjienħya sín chrókjuich'ia sín ntá chrókjuacha sín chichaon. ⁸ Kjaxin jina chrókjuak'e ch'án kixin tí tsjiji ijnko nkexro ntoe ch'án chrókjuanjon ch'án kjuachaxin chrókjuak'e tí nkexro a. La ko jina chrókjuak'e ch'án la ko jina chrókjuenkayáxin ch'án kixin ijnko nkexro ó tsíkjinchetjóá Dios la ko chróchóna ch'án kjuasáyé ch'án. ⁹ Kjaxin t'ichjánxin chrókuiŋtoehya ch'án tí tan jina xrákoħe ch'án kixin ntá jina tsjákoħe ch'án í so chojni tí nkehe ntoá la kjónté nkexro tjinkakonhya tsinhin la jina chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi loñtj sín mé xíkaha ch'iyehé sín chojni. ¹¹ Tí sín a la chrók'uíkjeħeni ir'va sín kixin tjachroé sín nchónhya chojni kixin tjako sín tí nkehe jehya jina kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchronka ch'án nkexrí tjejó tí sín chjasén ch'án. Ntáchro ch'án kixin: "Kaín tí chojni chjasénni mé imá ch'ia sín la ko imá jieħe sín la ko imá kóchjinka sín la ko séhe sín", mé xíkaha chrónka ch'án. ¹³ Tí nkehe tsíchronka ch'án mé chaxín ntoá. Méxra antsí fuerte chrókjuéntuéhé sín kixin ntá jina chrók'uejó sín chróxraxinkaon sín Dios. ¹⁴ Nixjehé sín kixin chrókuaħya sín kuénté kaín tí nkehe tsik'axrjenixin kja tí sín judío tjako la ko chrókuitekakonhya sín tí nkehe t'etōan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. **A** ntá tí nkexro titekakonhya la tjuáhya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáhya. ¹⁶ Ntáchro sín kixin chóxin sín Dios a ntá tí t'ikonni nkexrí ch'e sín ó noexinni kixin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. **A** ntá tí xíkaha ch'e sín la, ¿nkexrí chrókuich'e sín tí xra jína?

2

Chrókuako ch'in Tito tí tan chaxín

¹ A ntá jaha chrókuakua éxi tí chrónka tí tan jína chaxín. ² Tjákohé tí sín ó táda kixin chrókoanhya sín la ko jína chrók'uejó sín la ko chróchónta sín kjuasáyé sín la ko chróchónta sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókónínkakonhya sín kjónté tsjasóte sín. ³ **A** ntá kjaxin xíkaha tí sín ó nána la kjaxin jína chrók'uejó sín la kjaxin chrókuinchekuáxinhya sín chrókuinkáchónki sín kjuach'ia la ko kjaxin chrókoanhya sín. Chrókuakoxin sín ijnko kjuaxrexinkaon jína ⁴ kixin xíkaha chrókuakuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín ⁵ la ko chrókuich'e sín xra jína la ko ntoá chrókuenkayáxin sín la ko jína chrók'uayakonhen sín nchia ntóé sín la ko chrókójína sín la ko chrókuitekakonhen sín xii sín. Tí xíkaha chrókuich'e sín chrókuinchechiteyá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xíkaha chrókuinchechexaxinkávan tí sín ntasoá kixin jína chrók'uejó sín chróchónta sín kjuasáyé sín. ⁷ Jaha mé chrókuakoéxian sín kaín nkehe jína la ko chrókuakohé sín kixin ntoá chrók'uejó sín. ⁸ Jaha la chrónixja tí nkehe jína kixin kohya nkexró chrók'uántaxín la ntá xíkaha chrókósuèhe tí sín nínaon la ntá kohya nkehe jínahya chróntáchro sín kuènte tí jeheni.

⁹ Tétuènhén tí sín xrich'exón xra kixin chrókuinchechiteyéhe sín tí lamo kuènte sín la ko chrókójína sín la ko chrónixjankehyá sín tí nkexro ch'ehe sín xra ¹⁰ la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjakoxin sín kixin náxrjón tí itén Dios chrókuaáxinni.

¹¹ Kixin Dios mé kjuakoxin ch'án kixin nkexrí tjuèheni ch'án kixin jehé ch'án mé tsaáxin kaín chojni. ¹² Kjuasáyé Dios mé tjakoheni ch'án kixin chrókuítgheni kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios. ¹³ Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jie itsi Dios la ko Jesucristo tí nkexro tsaáxinni. ¹⁴ **A** ntá jehé ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jie chóntani kixin ntá jeheni mé ts'ónani ijnko chojni sich'ehe ch'án xra la ko tsóxrjínhini sich'eni kaín xra jína tjinkaon ch'án.

¹⁵ Tíhi mé chrókuakua la ko chrókuinchechexaxinkávan sín la ko chrókuétuènhén sín kjuachaxién Dios. Chrókuítóéhya kixin ninkexró chrókókjoniéhya tí nkehe tjákua jaha.

3

Jína chrók'uejó tí sín tinkáchónki Cristo

¹ Chrókjuinchexraxinkávan sín kixin sinchexiteyéhe sín tí gobierno la ko tsitekaon sín ichrén xṛa ts'etṛoan tí síxreé kixin chrókjuich'e sín kaín xṛa jína ts'etṛoan tí sín a. ² La ko chrók'uántaxiēnhyā sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kixin jehya ijnko chojni nchehnke la chrókjuikosáyehe sín kaín chojni.

³ Jeheni kjaxin óse k'uélontini la ko k'uékitekakonhyani Dios. Chjini k'uék'ajini la k'uékóxrjinhinni kaín nkehe jinahya. La ko jehya jína k'uék'ejóni la ko k'uéchóntani kjuachjinoxinhin la ko k'uéchjinoxienhenni í so chojni. ⁴ A ntá tí Dios tsaáxinni mé kjuakuexinni ch'án kixin jína ch'án la ko tjuēhe ch'án kaín chojni. ⁵ Jehē ch'án kuaáxinni ch'án la jehya kixin ichrén xṛa jína chrókjuich'e heni ch'án. Náhi, ó jehí kuikonóeheni ch'án la ntá kjuínchekaáni ch'án la ko kjuínchetjóáni ch'án. Ntá kokjihini nixin kixin tí Nchakuen ch'án la mé kuáyēxinni kjuachón nixin. ⁶ Kjuasáyé Jesucristo tí nkekro tsaáxinni ntá kjuínchekitonhenni Dios Nchakuen ch'án kixin tsochóntani kjuachaxin kuénté ch'án. ⁷ A ntá xikaha kjuasáyé ch'án kjuínchetjóáni ch'án kixin ntá tjejóhónhenni tí kjuachón jnkochríxín tsjanjon ch'án.

⁸ Kaín tíha mé chaxín. Tjínkavan kixin jaha chrókuétoan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni. ⁹ A ntá jaha mé tjuohé tí sín tjachaxin kichó sín lontí sín la ko tjuohé tí nkehe tinkáchónki sín kuénte tí sín tsík'axrjeníxin sín la ko tjuohé tí sín tjanjonxin tí ley kuénte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkojín nkekro tjinkaon tsjixrónkáxin tí tójnkotsé nínko ntiha la nixjehé ch'án jnkojína senó la ko yóxin inaá ntá tí titekakonhyā ch'án ntá tjuohé sátsji ch'án ¹¹ kixin ó noha kixin tí chojni xikaha a mé ntoáhya tjenkayáxin sín kixin jehó sín nchek'ánkí sín ijje sín.

Tí nkehe k'uetṛoan ch'ín Pablo

¹² Tí tsétuanhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsínkajia tí nchakuen kin. ¹³ Jína chrókjuínkítsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín. ¹⁴ Ntá tí sín í so chrók'uitja sín nkexrí sich'e sín tí xṛa jína la ko chrókjuínkítsa sín kichó sín ichrén nkehe t'ichjánxinhin sín kixin chrókjuakoxin sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkekro tjékian janhan ntiha nixjaha sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuēheni sín. Dios mé chrókjuincheyaonrá ch'án kaín rá. Amén. Ó tjen.

Tí xroon chr'énhen ch'ín Pablo tí ch'ín Filemón

Ch'ín Pablo nixjehę ch'ín Filemón

¹ Janhan Pablo tjéçhjinaxián tí xra kuente Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóçh'eni xra kuente Dios. ² Kjaxin chrókuinhin kaín tí sín tinkáchónki Ìnchéni tójnkotsé nta la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni. ³ Kjuasáyé It'eni Dios la ko Ìnchéni Jesucristo chrókuintayaonrá ch'án kixin chrótjáhará ch'án kjuaxróxin.

Ch'ín Filemón tjuhe ch'án chojni la ko tinkáchónki ch'án Jesús

⁴ Xráxin tjáncháha kjuasáyé Dios tí xráxinkavan tí jaha tí nixjaha Dios ⁵ kixin ó kuinhan kixin imá tinkachónkia Ìnchéni Jesucristo la ko imá tjuéhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkitsa ch'án tí sín kuitekaon tió kjuákohé sín kixin ntá tsienxin sín jina nkexri kaín tí nkehe chóntani kixin kjuíncheyaooni Cristo Jesús. ⁷ Imá chana kixin ó nõna kixin jaha kichó ni imá tjuéhé tí sín kichua ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóhę tí ch'ín Filemón kixin tsikonóhę ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuanhan jaha tí nkehe chrókuich'e. ⁹ A ntá íchá jina jehó xrjannóaha tsitékavan kixin jaha tjuéhé tí janhan. Janhan Pablo mé ó tádana la ko tjéçhjinaxián tí xra kuente Jesucristo. ¹⁰ Méxra xrjannóaha tsjinkitsa tí ch'ín Onésimo. Jehé ch'án mé t'ikuån éxi xjana kixin kjuankixin ch'án tsinkáchónki ch'án Jesucristo tí tjéçhjinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jina. A ntá ijie ó nõna kixin imá jina sit'aha ch'án xra tí jaha la ko jina sich'ena ch'án xra kjaxin. ¹² Ntá ijie tsétuanhan ch'án tsiji ch'án tí tjen jaha inaá. Chrótjuéhé ch'án éxi chrótjuéhé tí janhan. ¹³ Janhan tjínkavan chrókuitonakian ch'án ntihi kixin chrókuinkitsana ch'án chrínki tí chrókuak'e jaha kixin tjéçhjinaxián tí itén Jesucristo. ¹⁴ Kjánchó tjínkakhya tsjáncháha xikaha tí tjínkakhya jaha. Jehya kixin jaha chrókuinkitsani kixin chrókuétuanhan xikaha. Náhí. Jehí tjinkaonni éxi jaha tóxrjinhán chrókuich'e. ¹⁵ Tí ch'ín Onésimo kuítóha ch'án iso yaon a ntá jie la tsochonta ch'án jnkochrixín. ¹⁶ Ijie la jehya éxi ijnko chojni tsik'íná chrók'uikuan ch'án. Náhí. Ntá jie la éxi ijnko nkexro ch'e xra antsi jina mé éxi ijnko kichua chrótjuéhé ch'án. Janhan na tjuaha ch'án kjánchó tí jaha la antsi má chrótjuéhé ch'án. Jehya éxi chojni ó chrók'uikuan ch'án. Náhí. Chrók'uikuan ch'án éxi ijnko kichua kuente Ìnchéni.

¹⁷ Méxra tí chaxín t'ikuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan. ¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha. ¹⁹ Janhan Pablo mé tjána kjínxian tí xroon i na mé janhan tsjénkaha tíha. A ntá janhan tjínkakhya chrókuintaxraxinkávan tí jaha kixin kaín tí nkehe tjasikána tí janhan kixin kjuákohá jaha. ²⁰ Méxra kichó ni tsotsenkávan sich'e tí nkehe tjáncháha chaxín tinkachónkia Ìnchéni. Mé xikaha sinchechéhé asenná kixin jaha mé kichó ni tinkachónki Cristo.

²¹ Méxra ikjian tí xroon i chr'anhan kixin ó nòna kixin jaha la sìnchexiteyá tíha la ko ó nòna kixin jaha la sích'e antsí má que tí nkehe tjáncháha jaha.

²² Kjaxin tjáncháha kixin tjéyá ijnko nchia tsjak'é. Tjéçonhan kixin jahará la nixjehérá Dios la ntá Dios chrókjuanjon kjuachaxin kixin chrókjuasántsjahará.

Kjuixixín nixja ch'in Pablo

²³ Kjaxin ch'in Epafras mé nixjahará ch'án jnkojina. Jehe ch'án mé tjéçjinakian ch'án jnkokoá tí ntóéchiso ntihi kixin kjaxin tinkáchónki ch'án Cristo Jesús. ²⁴ Ch'in Marcos la ko ch'in Aristarco la ko ch'in Demas la ko ch'in Lucas mé kaín sín nixjaha sín jnkojina. Jehe sín mé tjinkitsana sín tí xra.

²⁵ Tjéjtáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjenixinni nchónhya veces kixin nchónhya nkexrí chrókiénxín sín, nixjaxin ch'án tí sín k'uéchrónka tí itén ch'án. ² A ntá jie tió tsjixixín Dios nixjaxin ch'án tí Xjeen ch'án, na mé Dios kjuich'éna ch'án kaín xín nkehe siín kixin kjuachaxién tí Xjeen ch'án, mé tí nkexro k'uáyéhe kaín xín nkehe. ³ Jehe ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe siín kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chóntani, ntá sákjui ch'án kjuák'etjaxin ch'án tí tja chjina It'é ch'án tí tjen ch'án t'etqan ch'án nkaya nkajni.

Tí Xjeen Dios imá t'etqan, a ntá tí sín ángel la kénhyó

⁴ Tí Xjeen Dios k'uáyéhe ch'án kjuachaxin ts'etuénhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'etqan ch'án, a ntá tí jehe sín la náhi. ⁵ Méxra Dios ntáchehya nijnko ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuènte nijnko ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntáchro Dios kixin:

Kaín tí sín ángel kuènte Dios chrókjuikosáyehe tí jehe ch'án.†

⁷ A ntá ntáchro Dios kuènte tí sín ángel kixin:

Tí sín ángel ch'éna ch'án éxi xrjnto kixin nchakuen sín ó,

la ko tí sín ch'ehe ch'án xra la ch'éna ch'án éxi xrohinene.‡

⁸ A ntá ntáche ch'án tí Xjeen ch'án kixin:

Tí trono kuénta itjen jnkochrixin, jaha Dios,

la mé jaha mé ijnko nkexro t'etqan jina.

⁹ Jaha tóxrjínhan tí nkehe jina, a ntá ninkákonhén tí nkehe jínahya.

Mé xikaha tí Dios tsíkjejá jaha, la Dios kuénta kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntáchro kixin:

Jaha Ínchéni, tí xrankixixín kjuich'éna chjasintajni,

la ko jaha kjuich'éna nkajni.

¹¹ Táha mé ts'itjáyan, a ntá jaha la tsjak'e jnkochrixin.

Kaín tíha tsontaxín éxi iké chojni,

¹² éxi ijnko iké chojni xikaha tsoxrát'o,

ts'ixinkí éxi ijnko iké chojni.

A ntá jaha la ts'ixitóxinhya jnkochrixin tsjak'e,

a ntá tí kjuachón chonta jaha la nunca tsjejehya.*

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4

§ 1:9 1.8-9 Salmo 45.6-7 * 1:12 1.10-12 Salmo 102.25-27

¹³ Dios la ntáchehya nijnko tí sín ángel kuènte ch'án kixin chrók'uejò sín tja ch'án chjina ntahó chrók'uetòan sín, tsjixinjian kaín xín tí sín nínkakonhen sín la chrókjuachahya sín chrók'uetòan sín.† ¹⁴ Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkĩtsa tí sín ts'áyehé kjuachaxin tsaá sín.

2

Chrókjoniéhyaní tí nkehe tsaáxinni

¹ Mé xikaha chrókjuenkayáxinni jína tí nkehe ó kuínhinni kixin chrókuítegehyaní tí ntja ó kuákjani. ² A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítekakonyha sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. ³ ¿Xá nkexrí chrókuaáni tí chrókuahyani kuéntá tí nkehe jie chrókuaáxinni? Jehé Ìnchéni tsíchronka ch'án saoxín nkexrí chrókuaáxinni, a ntá chr'èxin tí sín tsíkínhin mé kjuakohé sín tí jeheni. ⁴ Méxra Dios kjuakoxín ch'án kjuaxroan jie la ko kjuachaxin jie kixin chaxín tíha, la ko noexinni kaín tí kjuachaxièn Nchakuen ch'án tsík'áyehèni éxi tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéhya tí sín ángel kjuachaxin kixin chrók'uetòan chjasintajni chr'èxin éxi tí jie tjejónixjani. ⁶ Náhí. Éxi níxja xroon itén Dios chronkaxín kixin:

¿Xá nkexéhe tí chojni a, jaha It'èni Dios, kixin imá xráxinkávan tí jehé ch'án?

¿Xá nkexro tíha kixin imá tóxakonhan kixin tí jehé ch'án?

⁷ Jaha tsíkjich'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin, a ntá jie la imá kjuíkosáyehé ch'án;

⁸ la jaha tsíchjehé ch'án kjuachaxin kixin kaín nkehe ts'etuenhen ch'án.*

Mé xikaha ntácho tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuítegehya ninkehó nkehe chrókuítekakonyha ch'án. Kjánchó naxa t'ikonhyani kixin á kaín nkehe títekakonhen ch'án. ⁹ Kjánchó ó noheni kixin Jesús la tsíkjich'éna Dios éxi chojni t'etuanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyehé ch'án kjuachaxin náxrjón la ko Dios tjikosáyehe tí jehé ch'án kixin tí kjuasóte ch'án, ik'uén ch'án.

¹⁰ Kaín nkehe siín la kuènte Dios la ko tjejó kixin tí kjuachaxin kuènte tí jehé ch'án. A ntá Dios tjinkaon ch'án kixin kaín xín tí xjeen ch'án chrók'uejò sín tí tjeen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jína kjuakoxín ch'án kixin ntá jehé ch'án tsaáxinni ch'án. ¹¹ Kaín tí sín tsíkótjóá la ko tí nkexro kjuínchetjóá na mé chóna jnkokoá It'é. Méxra tí Xjeen Dios tósuèhya ch'án tsontácho ch'án kixin kichó ch'án tí jehé sín. ¹² Éxi ntácho tí xroon itén Dios kixin:

Tsochénkani tí sín kichó ni kixin nkexro tí jaha,

tsjikosáyahani tsotsjeni himno tí tójnkotsékoni tí sín kichó ni.†

¹³ Kjaxin ntácho kixin:

Janhan títekavan Dios.‡

La ko kjaxin ntáchro ínaá kixin:

Ntihi tjékian tí xjeen Dios tsíkjanjon ch'án tsík'ayáha.[§]

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'in Jesús xikaha tsík'óna ch'án nto la ko ijni kixin jina its'en ch'án kixin jina sinchek'itjáyan ch'án tí nkexro chóna kjuachaxin t'óyan chojni, na mé t'axrxéin kixin diablo tíha, ¹⁵ mé xikaha chrókuinchekaá ch'án kaín tí sín chraqonhen sín tí kjuach'en, tjejó sín éxi t'ítuenhen sín kaín yaon tjejó sín. ¹⁶ Kjaxin kuihya ch'án kixin chrókuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjeníxin ch'in Abraham. ¹⁷ A ntá t'ichjánxin chrókóyóhe ch'án éxi tí sín kichó ch'án kixin jina chrók'óna ch'án nchat'á t'etqan kuente Dios la chrókuikonógheni ch'án, ntá jina tsjatsen ch'án ijie kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí Jínahya tjinkaon chrókuachroe ch'án la kjuachahya, a ntá jie la jina tsjinkitsa ch'án tí sín chrókuachroe tí Jínahya kixin chrókuasinhya sín jie.

3

Antsí tjeotan ch'in Jesús, a ntá ch'in Moisés la kánhyó

¹ A ntá kichó ni, jahará la tsikótjóará, la mé Dios tsík'yahará ch'án kixin ts'ónará xjeen ch'án, a ntá chrórxaxinkáonrá jina Cristo Jesús na mé jehe ch'án mé tí apóstol la ko tí nchat'á t'etqan kuente tí nkehe tinkáchónkini. ² Tí ch'in Jesús jina kuitekakonhen ch'án Dios, mé tí nkexro tsíkjeýá ch'án sich'ehe ch'án xra, éxi kjaxin ch'in Moisés jina kjuich'e ch'án xra k'uáyakonhen ch'án ntqe Dios. ³ Dios antsí kjuikosáyehe tí ch'in Jesús, a ntá ch'in Moisés la kénhyó, éxi antsí tjikosáyehe sín tí nkexro kjuich'éna ijnko nchia, a ntá tí nchia la kénhyó tjikosáyehe sín. ⁴ Jnkojnko nchia k'óna kixin síin nkexro kjuich'éna, kjánchó Dios mé kjuich'éna kaín nkehe síin. ⁵ Ch'in Moisés jina kjuich'e ch'án xra k'uáyakonhen ch'án tí nchia kuente Dios. Tí xra kjuich'e ch'án mé k'uénixja ch'án kuente tí nkehe tsontácho Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteýá ch'án jina la t'ayakonhen ch'án tí nchia kuente Dios, la tíha mé jeheni, kixin tí tsítqehyani ch'án la naxa tsinkáchónkini ch'án ntá tsqchéheni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxi ntáchro Nchakuen Dios nixja xroon itén Dios kixin:

A ntá jie tí chrókuinhínra tí nkehe ntáchro Dios,

⁸ chrókuich'ehyará éxi kjuich'e tí sín ósé kuitekakonhya sín Dios tí yaon kjuich'ehe sín prueba Dios tí nteje.

⁹ A ntá ntaha tí sín tsík'axrjeníxinrá ósé kjuich'éna sín prueba, kjónté cuarenta nánó k'uikon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: “Xráxin xrichoe asén sín, tjinkakonhya sín tsochóxin sín ntjaná.”

¹¹ Méxra kónínkakonhan tí jehe sín, ntátjan sín

kixin chaxín tsoxiteýá kixin ts'ixenhya sín ts'ok'éhe sín tí tjén janhan.*

¹² Kichóni, chrókóxakonhanrá kixin chrókókohya nijnko tí jahará chróchontará asánrá jínahya chrókujtóhérá Dios tjechón chrókuitekákuenhyará tí jehe ch'án. ¹³ Chrókuinchechéhérá kichuárá jnkojnko yaon naxa tjen

tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójjahará. ¹⁴ A ntá tí chrók'uejóni jnkójina hasta tsjixixín éxi kuinkáchónkini tí xrankixixín, ntá siín kjuachaxin ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios, chrókjuich'ehyará éxi kjuich'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsikakitsjexín ch'ín Moisés tí nación Egipto? ¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje? ¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya? ¹⁹ A ntá ó noheni kixin kjuachahya sín k'uixenhen sín kixin kuítekakonhya sín.

4

¹ Méxra, tsintáchro Dios kixin tsjanjon ch'án kjuachaxin ts'ixenhenni ts'ok'éheni tí tjen ch'án, a ntá tóxakonhenni kixin ách'e jnkójín tí jahará chrókjuachahyará chrók'uixenhenrá ntiha. ² Kixin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkítsahya sín tí tan jina kuínhin sín, kixin kjónté kuínhin sín tí tan na kuítekakonhya sín. ³ A ntá jeheni kuítekaonni, ntá ts'ixenhenni ts'ok'éheni ntaha, éxi tsintáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjen janhan.*
Kixin Dios la tió kjuixinhin ch'án xra kjuich'éna ch'án chjasintajni ntá kjuák'e ch'án k'ok'éhe ch'án. ⁴ Mé xikaha í jnko nketí nixja tí xroon itén Dios chrónka kuente tí yaon yatoxin ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxin.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjen janhan.‡

⁶ Kjánchó naxa t'itjayan jnkójín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakonhya sín tí tan a. ⁷ Méxra Dios tsikjeyá ch'án í jnko yaon, mé tí yaon jie, a ntá chr'éxin nixjaxin ch'án tí nkehe tsíchrónka ch'ín David éxi ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuinchexiteyará.§

⁸ Kixin tí chrókjuanjon ch'ín Josué kjuachaxin kixin chrók'ok'éhe tí sín israelita,* ntá Dios la í chrónixjahya ch'án kuente í jnko yaon. ⁹ A ntá naxa tjechónhen tí ts'ok'éhe tí sín tinkáchónki Dios; ¹⁰ kixin tí nkexro ts'ixenhen ts'ok'éhe tí tjen Dios tsikjixinhin ch'án tí xra kuente ch'án éxi yóhe kjaxin Dios kjuixinhin ch'án tí xra kuente ch'án ntá kjuák'e ch'án k'ok'éhe ch'án. ¹¹ T'ichjánxin kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóghyani éxi tí sín kuítekakonhya.

¹² Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí njnka asén chojni la ko nchakuen chojni hasta tí nkaya asén chojni. Tíha mé

† 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11 § 4:7 Salmo 95.7-8 * 4:8 Josué 22.4

nchexraxinkaon chojni kaín nkehe tjenkayáxin sín la ko kaín nkehe ntáchro asén sín. ¹³ Kohya ninkehó nkehe tsíkjich'éna Dios tsjacha chrók'uejóméhe tí jehe ch'án kixin kaín nkehe la noxín siín t'ikon tí nkexro ts'áyéhe kuéntá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuénténi mé k'uixenhen tí tjen Dios la méxra chrókuítóehyani tí tinkáchónkini tí jehe ch'án. ¹⁵ Méxra jehe ch'án mé tí nchat'á tjetooan kuénténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xíkaha kónhen ch'án. ¹⁶ Méxra kaín aséni chrókóchjineheni Dios tí tjen ch'án t'etooan ch'án kixin chrókujikonóeheni ch'án la ko chrókjuinkítsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etooan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjáyanxín tí jie kuénte chojni. ² Kjaxin tí nchat'á a la fuértehya kixin chojni ó, a ntá chrókóninkakuenhya ch'án tí sín noehya la ko tí sín tsíkjichroe. ³ Kjaxin jehe ch'án, kixin fuértehya ch'án t'ichjánxín tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuénte tí í so chojni chóna jie.

⁴ Ninkexró xitjahya jehó sich'éna asén nchat'á t'etooan. Náhí. Jehó tí sín tsíkjejá Dios tsík'áyéhe tí xra éxí tsík'áyéhe ch'ín Aarón. ⁵ Mé xíkaha Cristo, kjuich'énahya ch'án jehó ch'án asén ch'án nchat'á t'etooan. Náhí. Dios mé kjuikosáyehe ch'án mé tsikjanjon tí xra éxí tsintáchro kixin:

Jaha mé xjanna;

Janhan mé kjuít'ána ijie.*

⁶ Kjaxin í jnko nketí nixja xroon itén Dios ntáchro kixin:

Jaha mé ijnko nchat'á tsjak'e jnkochrixín,

éxí yóhe k'uékjak'e ch'ín Melquisedec.†

⁷ Tió kjuák'e Cristo ntihi chjasintajni imá tsjánka ch'án la ko itsen chrónóehé ch'án Dios, kixin Dios chóna kjuachaxin chrókjuinchekaá ch'án kixin chrók'uenhya ch'án; la Dios la kuínhiin kixin xíkaha kuítekaon ch'án. ⁸ Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án. ⁹ Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrixín kaín tí chojni sinchexiteyéhe tí jehe ch'án. ¹⁰ A ntá Dios mé tsíkjich'éna ch'án nchat'á t'etooan éxí yóhe kjuák'e ch'ín Melquisedec.

Jehya jína chrókuítóeheni tí tinkáchónkini Inchéni

¹¹ Chóntani nchónhya nkehe chróchrónkani kuénte tíha, kjánchó imá xra chróchrónkaxínni tíha kixin tiénxinhyará jahará. ¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxínhanrá nkexro chrókjuakohará inaá tí nkehe xrahya kuénte itén Dios. Éxí xík'ónará lontirá, t'ichjánxín chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjejá sín nkexri

* 5:5 Salmo 2.7 † 5:6 Salmo 110.4

chrók'uejō sín jína. ¹⁴ Á ntá tí nkehe cha mé ine tí chojni ntęto kixin ó nohe sín tí nkehe jína la ko tí nkehe jínahya.

6

¹ Naxa chrókjueyáni kixin jína chrókjuenkayáxinni éxi chojni ntęto. Chróchenkahyani tí jahará ijje tí nkehe kánhyó xřa tsíxrakohará tí xrankíxixín kuęte Cristo. Náhi. T'ichjánxinhya naxa chrókjuakoharáni kixin chrókuítóherá tí jje k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni ts'len, la ko nkexrí chrókuítóexín ijje chojni. ³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyehę sín tí xrohi, la ko ó tsjexín sín tí nkehe kjuanjon Dios, la ko tsík'áyehę sín tí Nchakuen Dios, ⁵ la ko kóxrjnhjn sín tí nkehe jína kuęte itén Dios, la ko kónohe sín nkexrí tí kjuachaxin tsochónta tí chjasintajni chr'ėxin, ⁶ a ntá tí chrókuítóhe sín Dios, í chrókuinkáchónkihya sín, ntá xitjahya tsokjan sín inaá, kixin tí xikaha la éxi chrókjuak'enkani sín ntacruz tí Xjeen Dios inaá la ko chrókjuanoá sín ch'an nkayakon nchónhya chojni. ⁷ Éxi nonte jnkojnko vez t'aniá chrin la tsjatan la ts'óna jína, a ntá kjuacha tí sín kjuich'e xřa kixin Dios kjuíncheyaon ntíha. ⁸ A ntá tí t'óna ntach'i la ko kach'i la ninkehó sínkihya la tsońinkakonhen Dios, la tí tsjixixín mé tsoche.

Tí nkehe tjejóchónhenni mé tjinkitsa kixin jína ts'ejóni

⁹ Kjonté nixjani xikaha, kichó ni, ó noheni kixin chaxín jína tjejorá k'uitjará tí ntja tsaáxinrá. ¹⁰ Kixin Dios la jína, la ts'itjáyenhya ch'an tí xřa jína tjejoch'erá kixin tjeuherá kichuárá, mé xikaha kjuákoxinrá kixin kjuinkitsará tí kichuárá tinkáchónki Cristo la naxa tjejótjinkitsará sín xikaha. ¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuinkitsará kichuárá kixin chaxín ts'ayéherá tí nkehe tjejochonhénra. ¹² Tjinkakonhyani kixin chrókjanrá chrókósáhará. Náhi. Tjinkaonni kixin chrókjuákoxinrá éxi tí sín chaxín tinkáchónki Inchéni tjejóchónhen sín ts'áyehę sín tí nkehe tsintáchro Dios kixin tsjanjon ch'an.

¹³ A ntá Dios, tíó tsintáchro ch'an kixin tsjanjon ch'an nkehe ts'áyehę tí ch'in Abraham la jehó Dios k'uákjenxin asén kixin kohya nkexro antsi tjetoan chrók'uákjenxin ch'an. ¹⁴ Ntáchro ch'an kixin chaxín sincheyaon ch'an tí ch'in Abraham la ko nchónhya chojni ts'axrjenixin tí jehe ch'an.* ¹⁵ Ch'in Abraham kjuák'echónhen ch'an isé kixin ts'áyehę ch'an tí nkehe tsintáchro Dios. ¹⁶ A ntá tíó t'ákjenxin chojni ijnko nkexro la mé t'ákjenxin sín ijnko nkexro antsi tjetoan, a ntá jehó sín la náhi. A ntá ts'ákjenxin sín tí xikaha kixin ijnko nkehe tsoxiteyá, a ntá kohya nkexro tsontáchro ninkehó. ¹⁷ Méxřa Dios k'uákjenxin ch'an asén ch'an tsintáchro ch'an kixin chaxín tsoxiteyá, kixin tjinkaon ch'an chrókjuákoxin ch'an noxín kixin chrókónohe tí sín ts'áyehę tí nkehe tsjanjon ch'an kixin sinchexiteyá ch'an tí nkehe tsintáchro ch'an la í tsjitóxiňhya ch'an ninkehó tíha. ¹⁸ Mé xikaha siın yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexinni kixin chaxín tsoxiteyá, la mé jeheni kjuancheheni ch'an kixin chrók'uayakonhenni ch'an la ko tjejóchónhenni tí nkehe tsjanjon ch'an. ¹⁹ Tí tjejóchónhenni xikaha la jína ts'ejó aséni éxi yóhę tí ntabáro chóna gancho tjechruéxin kixin kohya

*

nketí sátsji. Méxra xikaha kjaxin tí nkehe tjejóchónhenni la sátsíkji hasta nóton tí ka cortina tjen nkaxenhen nínko tjen nkaya nkajní, ²⁰ tí senó k'uixenhen Jesús kuakitjehe ch'án ijnko ntja ts'ixenxínni. Mé xikaha jehe ch'án k'óna ch'án nchat'á t'et'otan jnkochr'ixín éxí yóhe kjuák'e tí ch'ín Melquisedec.

7

Ch'ín Jesús mé nchat'á éxí yóhe k'uékjak'e ch'ín Melquisedec

¹ Tí ch'ín Melquisedec mé k'ué rey kuente chjasin Salem la ko nchat'á kuente Dios tjen nkaya nkajní. A ntá tió ch'ín Abraham kjanxin ch'án tí tsíkjikjanjonko ch'án tí í so sín rey, kjuacha ch'án, ntá ch'ín Melquisedec kjuixinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjacha ch'án tí tsíkjikjanjonko ch'án tí sín rey.* A ntá ihnié ch'ín Melquisedec mé t'axrjexín saoxín kixin "ijnko rey jina"; a ntá jehe ch'án k'ué rey kuente chjasin Salem, tíha mé t'axrjexín kixin "kjuaxróxin", la mé xikaha jehe ch'án mé "ijnko rey tjanjon kjuaxróxin". ³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjeníxin ch'án; la ko noehya sín nkesá tsík'ojíhi ch'án la ko nkesá tsík'en ch'án. Mé xikaha tóyóhe tí Xjeen Dios kixin jehe ch'án mé ijnko nchat'á jnkochr'ixín.

⁴ A ntá jie, tsjehérá kixin imá t'et'otan tí ch'ín Melquisedec kixin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjonko ch'án tí sín rey. ⁵ Éxí nixja ley tsík'et'otan ch'ín Moisés, kixin tí sín nchat'á tsík'axrjeníxin tí ch'ín Leví chóna sín kjuachaxin tsjanchehe sín kaín xín chojni diezmo kjónté naxa kjéhya sín, tsík'axrjeníxin sín tí ch'ín Abraham éxí tí jehe sín. ⁶ A ntá ch'ín Melquisedec, kjónté tsík'axrjeníxinhya ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintácho Dios. Mé xikaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontácho kixin chaxinhya kixin tí nkexro ncheyaon la antsí má t'et'otan, a ntá tí nkexro tsíkóyaon la t'et'otanhya. Náhí. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjexín kixin ch'ín Leví la ko kaín xín tí sín nchat'á tsík'axrjeníxin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuente ch'án tí sín ts'axrjeníxin ch'án, naxa kokjéhya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjeníxin sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nchat'á í chrókóyóehya éxí tí ch'ín Aarón. A ntá kjuachahya sín xikaha ntá t'ichjánxin chrókónoxín ijnko nchat'á chrókóyóhe éxí tí ch'ín Melquisedec. ¹² A ntá tí chrók'uixinkí tí nchat'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuente Ìnchéni. A ntá jehe ch'án la tsík'axrjeníxin ch'án í jnko nkexro kuente Israel la kohya ninkexró tsík'óna nchat'á tsík'axrjeníxin tí sín a. ¹⁴ Kixin ó noxín kixin Ìnchéni tsík'axrjeníxin

* 7:2 7:1-2 Génesis 14:17-20

ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjenixin tí ch'ín a tió nixja ch'án kuènte tí sín nchat'á.

¹⁵ A ntá tíhi la antsí má kónoxín kixin tí nchat'á nixin la tóyóhe éxi ch'ín Melquisedec ¹⁶ kixin tió k'óna ch'án nchat'á la jehya kixin xikaha chrók'uetqan ijnko ley kixin nkeexo chrók'uaxrjenixin ch'án. Náhí. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjáyán. ¹⁷ Kixin nixja Dios kixin nkexri tjen tí jehe ch'án, ntáchro kixin:

Jaha mé ijnko nchat'á tsjak'e jnkochríxín, éxi yóhe k'uékjak'e ch'ín Melquisedec.†

¹⁸ Méxra tí nkehe k'uék'etqan senó mé ch'ehya xra jie kixin kánhyó kjuachaxin k'uéchóna la ko kjuachahya, ¹⁹ kixin tí nkehe k'uetqan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe antsí jina tjejóchónhenni kixin tíha mé antsí jina tsochjínexínni Dios.

²⁰ A ntá tió ntáchro Dios tíha la tsík'ákjenxin ch'án asén ch'án jehó ch'án. ²¹ La ntá tí í so nchat'á, tió tsíkónoxín sín, tsík'ákjenxinhya Dios asén ch'án. A ntá tió tsíkónoxín tí nchat'á í la Dios tsík'ákjenxin ch'án asén ch'án. A ntá ntáchro xroon itén Dios kixin:

Ínchéni tsík'ákjenxin asén ch'án

a ntá ts'ixitóxinhya tí nkehe tsíntáchro ch'án:

“Jaha mé ijnko nchat'á tsjak'e jnkochríxín

éxi yóhe k'uékjak'e ch'ín Melquisedec.”‡

²² Méxra ch'ín Jesús ntáchro kixin tí pacto t'etqan ch'án la antsí má jina, a ntá tí pacto senó la náhi. ²³ Ntá k'uixín nchónhya sín nchat'á, kjánchó nkák'en sín, ntá xitjahya naxa chrókjuich'e sín tí xra a. ²⁴ A ntá ch'ín Jesús la ts'enhya ch'án la t'ichjánxinhya kixin í jnko nkeexo chrókuakja tí xra kuènte ch'án chrók'óna nchat'á. ²⁵ Méxra jehe ch'án tsjacha sinchekaá ch'án jnkochríxín tí sín tsochjinehe Dios kixin tinkáchónki sín tí jehe ch'án kixin itjen ch'án jnkochríxín chrónóhehe ch'án Dios kixin chrókjuinchekaáni ch'án.

²⁶ Mé xikaha Jesús mé tí nchat'á t'etqan t'ichjánxinhinni; jehe ch'án mé ijnko nkeexo tjóá, chónahya ninkehó jie, la ko tjenkákjanhya ch'án tí sín tjasín jie, a ntá sákjuí ch'án nkaya nkajní. ²⁷ Ntá tóyóehya tí í so nchat'á t'etqan, kixin t'ichjánxin ts'óyán sín iko tsjanjon sín tsochjéhe sín Dios kaín yaon, saoxín kixin tí jie kuènte sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uén ch'án. ²⁸ Tí ley k'uék'etqan ch'ín Moisés t'etqan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etqan kixin jina kjuínchexiteyá ch'án jnkochríxín.

8

Ch'ín Jesús nixjxin ch'án ijnko pacto nixin

¹ Tí nkehe antsí má tjetqan chrónkani la mé tíhi kixin tí nchat'á kuènteni mé t'etqan ch'án, la ko tjetjxin ch'án nkaya nkajní, nó chjina tí trono t'etqanxín Dios, ² k'óna ch'án nchat'á tí njnko chaxín tsíkjich'éna Ínchéni, la jehya chojni tsíkjich'éna tíha. ³ Kaín nchat'á t'etqan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe. ⁴ Tí chrókjuak'e ch'án chjasintajni, chrók'ónahya ch'án nchat'á kixin naxa síin nchat'á tjanjon nkehe k'uetqan tí ley tsík'áyéhe ch'ín Moisés. ⁵ A ntá tí sín

nchat'á k'uékjanjon nkehe tóyóhó tí nkehe síin nkaya nkajní. Noheni kixin tóyóhó kixin tió ch'ín Moisés chrókjuich'éna ch'án nínko la ntáche Dios tí jehe ch'án kixin: "Tjenkayáxian jína, a ntá sích'éna jaha éxí tí nkehe kjuákuáxian chrítaón jna."* 6 A ntá tí nchat'á t'etōan kuènteni tjech'e ch'án xra antsí jína kixin jehe ch'án mé tí nkexro nixjaxín tí pacto nixin tsintáchro Dios chrónka tí nkehe jína tsonhen chr'éxin.

7 A ntá tí pacto tsík'etōan saoxín la tí chróxiteyá jína, la t'ichjánxinhya chrók'óna yóxin pacto. 8 A ntá Dios k'uúkon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsánjuan ijnko pacto nixin tsochóna tí sín nación Israel la ko tí sín chjasin Judá.

9 Jehya xikaha tí pacto kuétuanhan tí sín tsík'axrjeníxinrá ósé, tí yaon kjuínkita sín k'uaxrxén sín tí nación Egipto; kjánchó kjuínchexiteyáhya sín tí pacto kuétuanhan sín, méxra kujtoha sín, ichro Ìnchéni.

10 Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráinkavan asén sín tí ley tsétōan,

a ntá tí kjuaxrexinkaon kuènte sín tsokjian tí nkehe tsétuanhan sín.

A ntá janhan ts'óna Dios kuènte sín,

a ntá jehe sín mé ts'óna chjasin kuèntana.

11 Ts'ichjánxinhya naxa tsjakohé kichó sín

kixin chróchóxin sín Ìnchéni,

kixin kaín sín tsochóxina sín,

kjonté chojni imá ntsintí la ko chojni imá hyé.

12 Sintak'itjáyan tí nkehe jínahya kjuích'e sín

la ko í tsoxráinkakonhya inaá tí jie chóna sín.†

13 Xikaha nixja Dios kuènte tí pacto nixin ts'etōan ch'án kixin tsíkóntaxin tí pacto saoxín k'uetōan ch'án, tíha mé tinkákóntaxin la ko tinkákjeje, na í séhya ts'itjáyan.

9

Tí nínko chjasintajni la ko tí nínko nkaya nkajní

1 A ntá tí pacto saoxín t'etōan nkexrí chrórxaxinkaonni Dios, kixin tí nínko ntihyó chjasintajni. 2 A ntá tí nínko k'uékjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejójen tí niotja k'uéxrxinkakonxín sín Dios. 3 Nóton tí yóxin ka cortina kjuák'e tí cuarto k'uekjinchek'in sín tí Cuarto Antsí Tjóá. 4 Ntiha k'uékjak'e tí altar tsík'óna chica oro k'uékjakaxin sín tí chjincō la ko k'uékjak'e tí ntacajón chr'ísimá chica oro tjenkáya tí pacto. Nkaxenhen tí ntacajón k'uékjak'e ijnko nchésen tsík'óna chica oro k'uék'inka maná k'óna niotja, la ko kjaxin k'uékjak'e tí nta k'uekjixín ch'ín Aarón kjuankíxin k'uayan nta ntahnte, la ko kjaxin ntiha kjuák'e tí xro chóna tí tan k'uetōan Dios. 5 Chrítaón tí ntacajón k'uék'ejó yaá ángel tsíkjanōya tsíkjentoá kanēnee chrítaón tí kjuák'e tí kjuachaxin kuènte Dios; ntaha k'uékjiinxín tí jie k'uéchóna chojni. A ntá ijie la t'ichjánxinhya naxa tsonixjani kuènte tíha.

* 8:5 Éxodo 25.40 † 8:12 8.8-12 Jeremías 31.31-34

⁶ A ntá xikaha k'u'éjó tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuènte nínko kixin tí xra ch'e sín kuènte nínko. ⁷ A ntá tí yoxín cuarto jehó tí nchat'á t'etóan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni. ⁸ A ntá tí Nchakuen Dios nchenoexinni tíhi kixin nachrohe k'uékjich'e xra tí cuarto saoxín la naxa tjexrankehya kixin chrók'uixenhenni tí Cuarto Antsi Tjóá. ⁹ Kaín tíha tjakoxín ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyán sín xitjahya nchenoexín sín kixin á chaxín kótjóá tí jie k'uéchónta sín kixin xikaha k'uéxaxinkaon sín Dios. ¹⁰ A ntá tíha jehó t'etóan kuènte tí nkehe chrókjóne sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín tíha mé k'uítuohen sín kuènte cuerpo ó la jehó k'uéchónta kjuachaxin tí naxa kjuinkíhya Dios nkexrí chróxaxinkaon sín ch'án.

¹¹ A ntá ó kui Cristo, jehe ch'án mé nchat'á t'etóan kuènte tí nkehe antsi jína itsi. A ntá tí nínko ch'e ch'án xra la antsi jína la ko antsi ntoá, la jehya chojni tsíkjich'éna tíha kixin jehya chjasintajni ntíhi tjen. ¹² Tió k'uixenhen Cristo tí Cuarto Tjóá, la jehya kixin chrókjuanjon ch'án ijnié kotentso la ko ijnié koxintáxjan. Náhi. Ijnie ch'án kjuanjon ch'án; mé xikaha k'uixenhen ch'án jnkokoá vez ntíha mé xikaha kjuenká ch'án kixin chrókuaáxinni jnkochrín. ¹³ A ntá tí ijnié koxinta la ko ijnié kotentso la ko tí nteso kuènte tí koxintáxjan tsíchexín tí altar tikitexín tí sín tjuáhya la mé tíha chóna kjuachaxín tsotjuáxin tí chrítaón ó. ¹⁴ A ntá tí xikaha, la kjá antsi má chóna kjuachaxín tí ijnié Cristo. Kixin tí kjuachaxín Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjóá tí nkehe kjuich'eni senó chrók'uénxinni kixin ntá jie la jína chrókjuich'ehe ni xra Dios tjechón.

¹⁵ Méxra Jesucristo nixjaxín ch'án tí pacto nixin k'uetoan Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuoheneni senó; kixin tí sín k'uíyehé Dios la jína chrók'uáyéhe sín tí nkehe tsjejehya kixin jehe ch'án xikaha tsintáχρο ch'án tsjanjon ch'án. ¹⁶ A ntá tí síin ijnko nkehe tsintáχρο ijnko chojni kjuák'e na ntá ik'uén la t'ichjánxin tsonoxín kixin chaxín tsík'en tí nkexro tsíkjich'éna. ¹⁷ A ntá tí nkehe tsintáχρο ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí. ¹⁸ Méxra tí pacto xrankíxixín tsík'etóan Dios kjuankixin kjuích'e xra kixin k'uítji ijni. ¹⁹ Ch'ín Moisés tsíchronka ch'án kaín nkehe tsík'etóan tí ley kuínhin kaín tí chojni; a ntá chr'éxin kuákja ch'án ichjóén kolélo kjátse la koí ntarama hisopo, ntá kjuínchekjatjaxín ch'án ijnié koxintáxjan la ko ijnié kotentso tsíkjiko ìnta, ntá kuikjanjin ch'án tí libro chóna ley la ko kuikjanjin ch'án kain tí chojni. ²⁰ A ntá ntáχρο ch'án kixin: “Tí jni i tsoxiteyáxin tí pacto k'uetoan Dios chrókjuínchexiteyéherá jahará.”* ²¹ Tí ch'ín Moisés kjaxín kuikjanjin ch'án jni tí nínko la ko kaín nkehe t'ichjánxin tí nkaxenhen nínko. ²² Kixin xikaha ntáχρο tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjinxín ijieni

²³ Méxra t'ichjánxin kixin ik'uén iko kótjuáxin tí nkehe a, táha mé tóyohó tí nkehe síin nkaya nkajni; a ntá tí nkehe chaxín kuènte nkaya nkajni

* 9:20 9.19–20 Éxodo 24.6–8

t'ichjánxín ijnko nkehe antsí jína chrók'u'en. ²⁴ A ntá Cristo k'uixenhya tí nínko tsíkjich'énaxín chojni tja, táha mé ijnko nkehe tóyóhó tí nínko chaxín. Náhi. Jehé ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nixjaxín ch'án kaín ni. ²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhi. A ntá tí nchat'á t'etóan t'ixenhen tí Cuarto Tjóá jnkojnko nánó kixin tsjanjon ch'án ijníe ko ó. ²⁶ A ntá tí xikaha chrókónhen Cristo la t'ichjánxín kixin jnkoyaxón chrók'óyán sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjünxín ijíeni. ²⁷ Mé xikaha kaín ni its'enni jnkokoá vez, a ntá chr'éxin tsitoxén ijíeni. ²⁸ Mé xikaha kjaxín Cristo jnkokoá vez ik'uén ch'án kixin tsjünxín ijíe nchónhya chojni. A ntá chr'éxin itsi ch'án ínaá, jehya kixin naḡa tsjatsen ch'án ijíe chojni. Náhi. Sinchekaá ch'án tí chojni ó tsikótjóá tjejóchónhen itsi ch'án.

10

¹ A ntá tí ley k'uetoanxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxra tí ley kjuachahya kjuínchetjóá tí sín kóchjinehe Dios kjuanjon sín iko its'en jnkojnko nánó. ² A ntá tí chrókjuacha tí ley chrókjuinchetjóá ijíe sín, ntá chrókjuenkayáxinhya sín kixin naḡa chrókónta sín jie, la chrókuitóhe sín, í chrókjuanjonhya sín iko its'en. ³ A ntá xikaha ich'e sín t'óyán sín ko, la jnkojnko nánó xraxinkakonxín sín tí jie tsíkjasin sín ⁴ kixin ijníe koxinta la ko ijníe kotèntso xitjahya tsjünxín ijíe chojni.

⁵ A ntá tío Cristo kui chjasintajni ntáche ch'án Dios kixin: Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhi.

Jaha tsíkjich'éna ijnko cuerpo kixin tsochonta janhan.

⁶ Jaha tóxrjíanhya iko tsíchján la ko tí í so nkehe chrókjuanjonni chrókjuakjünxian ijíe.

⁷ A ntá ntátjan ch'án kixin: “A ntá ijie la ntihi tjeñ janhan kixin sintaxiteyá tí nkehe tóxrjínhan jaha Dios,

éxí nixja xroon chrónka nkexrí chrókjuít'a.”*

⁸ Senó ntácho kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuínxín ijíeni kjónté tí ley k'uetoan kixin xikaha chrókónhen. ⁹ A ntá chr'éxin tsintácho kixin: “A ntá k'uinka janhan kixin sintaxiteyá tí nkehe tóxrjínhan jaha Dios,” ichro ch'án. Mé xikaha kjuatsen ch'án tí ko k'uék'óyán sín óse, a ntá jehe ch'án kjuanjon ch'án ijnko nkehe nixin. ¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhin Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrínin.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjünxín ijíe chojni. ¹² A ntá Jesucristo mé jnkokoá vez k'uenyákonhenni ch'án kixin tsotjuáxín ijíeni la tíha mé sich'e xra jnkochrínin. A ntá kjuixín ntá sákjuí ch'án kjuák'etjaxín ch'án nó tí tja chjina kuènte Dios. ¹³ A ntá ntiha tjechónhen ch'án tsjixinjian kaín tí sín nínkakonhen ch'án tsjachahya sín ts'etóan sín. ¹⁴ Mé xikaha jnkokoá nkehe kjuích'e ch'án chjéhe ch'án Dios, kixin jína ts'ejó tí sín ó tsikótjóá. ¹⁵ A ntá tí Nchaquen Dios nchenoheni tíhi kixin senó tsintácho kixin:

* 10:7 10.5-7 Salmo 40.6-8

16 Tí pacto tsotjahá tí jehe sín tió ts'atsínka tí yaon a, ichro Ìnchéni; Sintaxráinkavan asén sín tí ley tsétoan, a ntá tí kjuaxrexínkaon kuènte sín tsokjian tí nkehe tjínkavan.†

17 Kjaxin ntáchro kixin:

Í tsoxráinkakonhya inaá tí ijje sín la ko tí nkehe jínahya kjuích'e sín.‡

18 Mé xikaha tí ó kótjóá ijjiéni la t'ichjánxínhya í so nkehe chrókjuanjoni chrókótjuáxin tí ijjiéni.

Méxra t'ichjánxin tsochjineheni Dios

19 Kíchóni, a ntá la í kohya kjuachrakon ts'ixenhenni tí Cuarto Antsi Tjóá tí tjen Dios kixin kjuachaxién ijje Jesucristo, 20 chréheni tí ntja nixin mé tí ntja tjechón kuakitjehé ch'án nóton tí ka cortina, tíha mé tí cuerpo kuènte ch'án. 21 Jesús mé tí nchat'á tjeotan kuènteni t'etotan tí ntje Dios.

22 Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókjuenkayáxinhanyi kixin naxa chóntani jie kixin tí cuerpo kuènteni kótjuáxin tí ntja jehó.§

23 Chrókuitóehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintáchro ch'án. 24 Chrókjuéyani nkexrí chrókjuinkitsani kíchó ni kixin chrótjuèheni kíchó ni la chrókjuich'eni tí nkehe jína. 25 Chrókuitóehyani chrókójkotséni, chrókójeohyani éxi tí sín í tójkotséhya sín. Náhí. Chrókjuinchechéheni kíchó ni antsí má jie kixin ó noheni kixin í séhya tsokjian Ìnchéni.

26 A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jie chóntani. 27 A ntá jehó itjen tí kjuachrakon jie tsitóexín jie la ko tí xrohi tjeche ts'itjáyanxín tí sín nínkakonhen Dios. 28 A ntá tí tjen jnkójín nkexro titekakonhya tí ley k'uetóanxín ch'ín Moisés, la tsónoxín yaá o y'á tí sín tsík'ikon tí jie tsíkjasin sín, tíha mé ts'énxín sín la kohya nkexro tsikonóehé tí jehe sín. 29 ¿Á tjenkayáxinhayará kixin antsí má chrókjuasóte tí sín kuítেকakuenhya tí Xjeen Dios la ko chóntehya sín kjuasáya tí ijje ch'án la ko t'ántaxínhin sín tí Nchakuen Dios tjuèheni? Kixin tí jni chrónkaxín kixin ts'etóanxín tí pacto la ko tí jni k'ujmáxinni. 30 Noheni kixin tsintáchro Ìnchéni kixin: “Janhan mé tóna tocar sintakitóaxián ijje chojni la ko janhan tsjénkaha sín.”* Kjaxin tsintáchro kixin: “Ìnchéni sinchekitóexín ijje tí sín tinkáchónki ch'án.”† 31 Méxra kjuachrakon jie chrók'uanótjenyáni tí tja Dios tjechón.

32 A ntá chróxráinkáonrá jahará tí nkehe tsikónhen ósé kixin tió jahará nantá tsík'ayéherá tí nkehe t'inkaséyan, a ntá kjuachará kjónté tí nchónhya nkehe tsikónhanrá. 33 A ntá jnkójín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkita tí sín tsík'ekon. 34 A ntá jahará kuikonóehérá tí sín tjejóchjina ntóechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajni chontará nkehe antsí jína chónhya tsjeje. 35 Chrókuitóehyará tí nkehe tinkáchónkirá kixin ó nohará kixin tíha mé ts'ayéxínrá nkehe chr'éxin. 36 Kjaxin jahará t'ichjánxin chrók'uejochónhénrá chrókóninkákonhyará kjónté ichrén nkehe chrókónhanrá, kixin sich'erá tí

† 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25

* 10:30 Deuteronomio 32.35-36 † 10:30 Deuteronomio 32.35-36

nkehe tjinkaon Dios, kixin xikaha chrók'uayéherá tí nkehe tsintáchro tí jehe ch'án. ³⁷ Kixin xikaha ntáchro xroon itén Dios kixin:

Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsítóhe tí janhan la í tsochànahya tí xikaha ch'e sín. †

³⁹ Kjánchó jeheni jehya xikaha chrókuítóheni chrókuinkáchónkiyhani tí jehe ch'án kixin ntá chrókjuasinni jie chrók'uitjáyanxinni. Náhí. Tinkáchónkini ch'án la tíha chrókuaáxinni.

11

Tífe

¹ Tí fe chótani la mé noexínni chaxín kixin tsoxiteyá ts'áyéheni tí nkehe tjejóchónhenni, la ko noexínni chaxín kixin kjónté ijnko nkehe t'ikonhyani la chaxín tjen. ² Tí sín tsík'axrjeníxinni ósé la kóxrjínhjn Dios kixin k'uéchónta sín fe.

³ Tí fe mé noexínni kixin Dios tsík'jich'éna kaín nkehe tí kjuachaxin tí nixja ch'án la ko noexínni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhí. Méxra Dios kóxrjínhjn tí nkehe kjuanjon ch'ín Abel ntá ntáchro Dios kixin jína tí ch'ín a. Kjónté ó tsík'en ch'ín Abel la tí nkehe tsík'jich'e ch'án naxa tjakoxin kixin jína tí fe k'uéchónta ch'án.*

⁵ A ntá tí fe k'uéchónta ch'ín Enoc la Dios sátsík'jiko tí jehe ch'án la k'uénhya ch'án, a ntá k'uitjahya sín ch'án kixin Dios sátsík'jiko. Naxa sákjuíhja ch'án la xráxin kóxrjínhjn Dios nkexrí k'uékjak'e ch'án. † ⁶ A ntá tí chróchóntahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchónta ch'ín Noé tí Dios chénka tí jehe ch'án tí nkehe naxa k'uikonhya ch'án tsonhen, la kuítekaon ch'án kjuích'éna ch'án ntabáro kixin tsaáxin ch'án la ko tí sín naxa kjéhya ch'án. Tí fe k'uéchónta ch'án kjuakoxin kixin tí í so chojni chjasintajni la jínahya sín tsjasóte sín. A ntá kóxrjínhjn Dios tí jehe ch'án kixin kuítekaon ch'án la tí xra kjuích'e ch'án mé kuaáxin ch'án. †

⁸ A ntá tí fe k'uéchónta ch'ín Abraham tí k'uíyehé Dios tí jehe ch'án la kuítekaon ch'án sákjui ch'án tí nonte tsjanjon Dios ts'áyéhe ch'án, ntá k'uaxrjéxin ch'án chjasén ch'án kjónté noehya ch'án nketi nó sátsji ch'án. †

⁹ A ntá tí fe k'uéchónta ch'án k'uékjak'e ch'án tí nonte chrókjuanjon Dios, éxi jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchónta ch'ín Isaac la ko ch'ín Jacob la ko kjaxin jehe sín tsík'áyéhe sín tí nkehe tsintáchro Dios.* ¹⁰ A ntá ch'ín Abraham k'uékjak'echónhen ch'án tí chjasin tsík'jich'éna Dios ts'itjáyanhya.

¹¹ A ntá tí fe k'uéchónta tjan Sara kjónté ó nána tjan, k'uáyéhe tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuítekaon tjan kixin Dios sinchexiteyá tí nkehe tsintáchro ch'án. † ¹² Kjaxin xikaha ch'ín Abraham, kjónté ó mero chrók'uen ch'án kixin ó táda ch'án, la

† 10:38 10.37-38 Habacuc 2.3-4

* 11:4 Génesis 4.3-10

† 11:5 Génesis 5.21-24

‡ 11:7 Génesis

6.13-22 § 11:8 Génesis 12.1-5

* 11:9 Génesis 35.27

† 11:11 Génesis 18.11-14; 21.2

k'uaaxrjenixin ch'án nchónhya chojni éxí konotsé siín nkajní o éxí nchesen siín chrínta ntayaon, xitjahya ts'ekini.‡

13 A ntá kaín tí chojni a ik'ueén sín k'uaáyehya sín tí nkehe tsíntáchro Dios kixin chrók'uaáyehé sín, a ntá k'ueéchónta sín fe, la kjónté ikjín k'uúikon sín la ko kuítekaon sín kóchéhé sín. Mé xíkaha k'ueéchrónka sín kixin tí chjasintajni jehya chjasén sín. 14 Mé xíkaha k'ueénixja sín la tienxínni jína kixin náxa xritjeyá sín nketi chrók'óna chjasén sín. 15 A ntá tí chrórxaxinkaon sín tí chjasin tsík'axrjexín sín ntá jína chrókjan sín ntilha inaá. 16 Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuehya ch'án kixin chrókjuinçek'in sín ch'án tí Dios kuènte tí jehe sín, kixin ó tjechónhen tí chjasin ts'áyehé tí jehe sín.

17 A ntá fe k'ueéchónta ch'in Abraham kixin Dios kjuíuch'e prueba tí jehe ch'án kjuanchia tí xjeen ch'án Isaac, a ntá kjuíkáo ch'án chrók'óyán ch'án, chrókjuanjon ch'án. Tjechónhen ch'án chrókjuanjon ch'án kjónté jnkokóaxón xjeen ch'án tsíkjanjon Dios § tsíntáchro kixin: 18 “Tí ch'in Isaac ts'axrjenixin nchónhya xjan.”* 19 A ntá ch'in Abraham kjuátsoan ch'án kixin Dios imá chóntha kjuachaxin, la kjónté chojni tsík'en na nchexechón ch'án, la éxí yóhé chrók'uen tí xjeen ch'in Abraham ntá chrók'uaáyehé ch'án inaá.

20 A ntá tí fe k'ueéchónta ch'in Isaac kjuíncheyaon ch'án tí xjeen ch'án ch'in Jacob la ko Esaú, kixin jína ts'ejó sín.† 21 A ntá tí fe k'ueéchónta ch'in Jacob tió chjina its'en ch'án kjuíncheyaon ch'án jnkojnko tí xjeen ch'in José, a ntá tí nta tjixin ch'án kjuisóijixin ch'án nixjehé ch'án Dios.‡ 22 A ntá tí fe k'ueéchónta ch'in José tió chjina its'en ch'án tsíntáchro ch'án kixin tí sín israelita la chr'éxin ts'axrjexín sín chjasin Egipto, tsík'etoan ch'án kixin tió sátsji sín la sátsjiko sín tí huesogé ch'án. §

23 A ntá tí fe k'ueéchónta it'é la ko iné ch'in Moisés tió kokjíhi ch'án kjuak'ema sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhya sín tí nkehe tsík'etoan tí ch'in rey kixin chrók'óyán sín xjan.* 24 A ntá tí fe k'ueéchónta ch'in Moisés tió kónteto ch'án la chrohya ch'án its'in ch'án xjeen tí tjan xjeen ch'in rey Egipto.† 25 Náhi. Kjueyá ch'án kixin kjónté chrókjuasóteko ch'án tí sín tinkáchónki Dios, la kóxrjienhya ch'án kixin séhya náxrjón chrókjuak'e ch'án chrókjuasin ch'án jie. Náhi. 26 Kjuenkayáxin ch'án kixin antsí tjeoan chrókjuasótexín ch'án tí tinkáchónki ch'án tí Cristo itsi chr'éxin, a ntá kánhyó tjeoan chróchóntha ch'án kaín nkehe tjete siín chjasin Egipto. Kjuenkayáxin ch'án kixin chrók'uaáyehé ch'án tí nkehe chrókjuanjon Dios. 27 A ntá tí fe k'ueéchónta ch'in Moisés sákjuixin sín tí chjasin Egipto,‡ chrakonhya ch'án kjónté kónínkaon tí ch'in rey, a ntá kuíteohya ch'án tí tinkáchónki ch'án Dios kixin éxí t'ikon ch'án tí Dios ninkexró t'ikonhya.

28 A ntá tí fe k'ueéchónta ch'in Moisés kjuasin ch'án tí kia pascua, k'uetóan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan saó kuènte tí sín Israel.§ 29 A ntá tí fe k'ueéchónta tí sín israelita k'uatóye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhe sín xíkaha la kjánchó kjuínhin sín tí nta a.*

‡ 11:12 Génesis 22.17 § 11:17 Génesis 22.1–14 * 11:18 Génesis 21.12 † 11:20 Génesis 27.27–29,39–40 ‡ 11:21 Génesis 47.31–48.20 § 11:22 Génesis 50.24–25 * 11:23 Éxodo 1.2; 2.2 † 11:24 Éxodo 2.10–12 ‡ 11:27 Éxodo 2.15 § 11:28 Éxodo 12.21–30 * 11:29 Éxodo 14.21–31

³⁰ **A** ntá tí fe k'u'échonta tí sín israelita la xítjen tí tjat'õ t'inkákuènxín tí chjasin Jericó, tió kjuixin k'uántatjen sín yato yaon tí chjasin a.† ³¹ **A** ntá tí fe k'u'échonta tí tjan Rahab, na mé ijnko tjan k'u'échonta nchónhya chojni ntoa, ntá k'u'énkohya tjan kaín tí sín jiêhe kuítekakonhya, kixin tsíkjanjon tjan kjuachaxin kixin kjuaxróxin tsíkitohe ntoe tjan tí sín israelita kjujitsàya sín tí chjasin Jericó.‡

³² ¿Nkehe naxa chróntáxrjan? Sintak'itjáyan tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta. ³³ Kíxin tí fe k'u'échonta tí jehe sín kjuacha sín k'uetõan sín jina ókjé chjasin, la ko jina kjuínchekitõexin sín ijíe chojni, la ko k'uáyéhe sín tí nkehe tsintáchro Dios kixin tsjanjon ch'án, la ko k'uikjehe sín ir'va koxra, ³⁴ la ko k'uanka tí xrohi chróchexin sín, la ko kjuachahya tí espada chrók'uenxín sín. **A** ntá tí sín chrakon la kófuerte sín, k'óna sín chojni tsehe kjuacha sín kjuánjonko sín tí sín soldado tsíkjiixin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuènte sín tsixechón inaá.

A ntá í so sín la kjuasote sín k'uénxin sín kixin kjuínchemáhya sín kixin kuinkáchónki sín Dios kixin ó nohe sín kixin tsoxechón sín antsí jina inaá. ³⁶ **A** ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixro k'uénxin sín, la í so sín cierra chrít'õxin sín, la í so sín la nchónhya nkehe kjuasótexin sín, la í so sín k'uénxin sín espada, la í so sín k'uék'aji sín tsík'inkáya sín tjoe kolélo la ko tjoe kotèntso, nõa sín, kjuasóte sín, kjuaxróxinhya la náxrjónhya k'uéjõ sín. ³⁸ **A** ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjuí sín nteje, la ko jna, la ko tjo síxra la ko tõe. ³⁹ Kaín tí sín a kónhen sín prueba kixin á chaxín chóna sín fe la kjónté xikaha k'uáyéhya sín tí nkehe tsintáchro Dios kixin tsjanjon ch'án ⁴⁰ kixin Dios kjuenkayáxin ch'án ijnko nkehe antsí jina kixin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuinkáchónkini

¹ Méxra tí jeheni la tsík'antátjenni nchónhya chojni tsíkjakõxin sín tí fe k'u'échonta sín, la ntá chrókúitõeheni ntáha kaín tí nkehe t'inkákonhen, la ko tí jiê chrókjuachroeni, a ntá chrókjuich'eni jina tí xra chóntani la ntá chrókjuachani antsí má chrókónoheni. ² Jehó Jesús chrókuinkáchónkini kixin jehe ch'án kjuanjõn tí fe chóntani kixin jina kjuakõxin ch'án kjuínchexiteyá ch'án, la kjuasótexin ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kixin nohe ch'án kixin tsjixin tsjasóte ch'án ntá náxrjõn tsjak'e ch'án la ko tsochéhe ch'án kixin tsjak'etjaxin ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakõxin ch'ín Jesús. Tí sín chóna jiê imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkachónkirá ch'án. ⁴ **A** ntá jahará naxa k'uénxinhyará tí tjanjonkoará tí jiê. ⁵ ¿Á k'uitjáyanhanrá tí jahará tí nkehe ntaxraxinkaonrá Dios kixin éxi xjeen ch'án t'ikon ch'án tí jahará? Éxi ntáchro xroon itén Dios kixin:

† 11:30 Josué 6.12-21 ‡ 11:31 Josué 2.1-21

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kíxin Ìnchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekáonrá tí nkehe t'etqan Dios kíxin Dios t'ikon kíxin éxí xjeen ch'án tí jahará. ¿Á siín ijnko it'é xjan chrokjuentuéhya tí xjeen? ⁸ A ntá tí chrókjuentuáhyará Dios tí jahará éxí tjentuéhe ch'án kaín tí xjeen ch'án, ná jahará kjá jehya xjeen ch'án chaxín. ⁹ A ntá tí naxa k'uéchánjanni, na mé it'éni ntíhi chjasintajni kjuentuéhe tí jeheni, la jeheni kjuikosáyehe ni sín. A ntá xíkaha ántsí chrókjuinchexiteyéhe ni It'éni tjen nkaya nkajní kíxin chróchóntaxínni kjuachón. ¹⁰ It'éni ntíhi chjasintajni kjuentuéhe ni ch'án kjónté kánhyó sé éxí nkexrí kóxrjnhjín ch'án; a ntá It'éni Dios tjentuéhe ni ch'án kíxin jnkojína chrók'uejóni, kíxin chrók'ónani tjóá kíxin jehe ch'án la tjóá ch'án. ¹¹ Chaxín ninkehó xíkaha chrókjuinchekjasóte Dios tí jeheni chrókóxrjnhjínni tí nantá chrókóhenni kíxin tí kjuatjóté. A ntá xíkaha ts'itjaxínni tí kjuaxróxin éxí ijnko nkehe náxrxón kjuachani.

Tí sín tjanoá tí kjuasáyé Dios

¹² Méxra tjisójirá tí tjará tsíkóxrjé la ko tóch'inrá chóntahya fuerza, ¹³ la ko chrókjuéyará tí ntja ntoá. A ntá tí totará níhi xitjahya tjixinrá chrókuitóhe jína la ko chrókóniehya inaá.

¹⁴ Chrókóxakonhanrá kíxin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni. ¹⁵ Chrókóxakonhanrá kíxin nijnkorá chrókuitóqéhyará tí kjuasáyé Dios la ko nijnkorá chrók'ónahyará éxí ijnko nuèe ka tsjá chónta veneno chrókóniéxin tí í so chojni. ¹⁶ Nijnko tí jahará chrókjuásinkoará jie ijnko chojni chjín ókjé, la ko chrókjoniéhyará tí nkehe tjóá éxí kjuích'e ch'in Esau, kíxin jnkokoá comida kjuínchekjixín ch'án tí nkehe chróchónta ch'án kíxin xjan saó jehe ch'án.† ¹⁷ Jahará ó nohará kíxin chr'éxin, tió tjínkaon ch'án kíxin chrókjuincheyaon it'é ch'án tí jehe ch'án la í xitjahya tsoyaon ch'án kíxin kohya nkexri chrók'uixitóxín tí nkehe tsíkjjich'e ch'án kjónté imá chrótsjánka ch'án.‡

¹⁸ A ntá jahará la jehya kóchjinará éxí kóchjina tí sín israelita tí jna jína chrótsé sín tí síchr'ákjen xrohi, tí tjen tí sítié t'inkaséyanhya la ko tí chjéhe xrxjnto. ¹⁹ Na ni tsíkíenhyará tí tsíntáchro trompeta, la ko tí itén Dios nixja. A ntá tí sín tsíkinhin tí tan a na mé chronòa sín kíxin í chrónixjahya ch'án inaá,§ ²⁰ mé xíkaha ichro sín kíxin tsjachahya sín sinchexiteyá sín tí nkehe k'uetqan ch'án kíxin “Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen.”* ²¹ Ijnko kjuachrakon jíé tí nkehe k'uíkon sín la kjónté ch'in Moisés tsíntáchro ch'án kíxin: “Kjaxín síxránkana chrakonna.”†

²² A ntá jahará tsíkóchjineherá tí jna Sión, tí chjasén Dios tjechón, mé tí Jerusalén itjen nkaya nkajní, la ko nchónhya miles ángel ²³ tsíkójkótsé sín kíxin tsochjéhe sín kjuasáyá Dios, la ko tí sín tsíkójkótsé sín tsík'óna sín xjeen Dios saoxín ts'ínixín ihjé sín nkaya nkajní. Jahará tsíkóchjineherá Dios, jehe ch'án mé Juez sinchekitoxín ch'án ijje kaín chojni, la ko tsíkóchjineherá tí nchákuen chojni jína ó tsíkjinchetjóá Dios, ²⁴ la ko tsíkóchjineherá ch'in

* **12:6** Job 5.17; Provérbios 3.11–12 † **12:16** Génesis 25.29–34 ‡ **12:17** Génesis 27.30–40 § **12:19** Éxodo 19.16–22, 20.18–21 * **12:20** Éxodo 19.12–13 † **12:21** Deuteronomio 9.19

Jesús, jehe ch'án mé nixjaxin ch'án tí pacto nixin kixin tí ijnié ch'án k'uitji kjuínchetjuáxinni ch'án. A ntá antsí jina chrónkaxin tí ijnié ch'án, a ntá kánhyó tí ijnié ch'in Abel.

²⁵ Chrókóxakonhanrá chrókuítekákónhénrá tí nkexro tjenixja. Kixin tí sín kjuanoá Dios tíó kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuitekakuenhyani tí nkexro nchexraxinkaonni kuixin nkaya nkajni. ²⁶ A ntá tí itén Dios tí yaon a kjuínchekinkí nonte. A ntá jie tsíntáchro ch'án kixin: “A ntá inaá jehya nonte ó sintakinkí. Náhi. Kjaxin nkajni sintakinkí”,[‡] ²⁷ A ntá tí tsíntáchro ch'án kixin “inaá” mé t'axrxjén kixin tsjakjiin ch'án tí nkehe jina tsinkí, a ntá tsítøhe ch'án tí nkehe xitjahya tsinkí. ²⁸ A ntá tí ts'áyéhéni tí kjuachaxin kjuanjon Dios la xitjahya ts'ixinkí tíha. Méxra chróchéheni Dios kjuasáya chrórxaxinkaonni ch'án chróchrakønheni ch'án ²⁹ kixin tí Dios kuènteni mé éxi ijnko xrohi tsjacha sinchek'itjayan kaín nkehe. §

13

Nkexrí chrók'uejóni kixin chrókóchéhe Dios

¹ Méxra chrókuítóéhyará chróttjuèherá kichuárá. ² Chrók'uitjányanhyará chrókjuánjonrá kjuachaxin chrókuítóhe ntøará tí sín tsíkjiixin kjín. Mé xikaha kjuích'e iso sín la kjónté ángel tsík'áyéhe sín la kónoehya sín.*

³ Xráxinkáonrá tí sín tjejóchjina éxi kjaxinrá chrók'uejóchjinakoará tí jehe sín. Xráxinkáonrá tí sín tsík'ekon éxi kjaxin tí jahará xikaha chrókonhanrá kjaxin.

⁴ Káinrá chróchonteherá kjuasáya tí kótehe chojni. A ntá jahará tsíkótahará la jina chrók'uejokoará kichuárá chróttjuèhérá kichuárá. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

⁵ Kénhyó má chrókórxjínhanrá itsjé chichaon. Chrókócháhará kjónté tí kánhyó tsjé chontará; kixin tsíntáchro Dios kixin: “Janhan na tsítóahya tí jahará la ko ts'itjáyanahya tí jahará.”† ⁶ Mé xikaha chrakonhyani tsontáchroni kixin:

Inchéni mé tjinkitsani,

méxra chróchrakonhyani kjónté ichrén nkehe chrókjuích'e heni chojni.‡

⁷ Chrórxáxinkáonrá tí sín kjuínkítsa tí jahará kjuakøhará sín itén Dios, chrókjuenkayáxinrá nkexrí k'uejó sín ntá xikaha chrókóyøhará sín éxi tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrín. ⁹ Chrókuítóéhyará chrókjuakøhará chojni ijnko nkehe ókjé chrókuinkachónkirá. Íchá jina tí asánrá chrók'uáyéhe fuerza kixin Dios tjuaahará la jehya tjeotan chrókjuínchexiteyéheni tí nkehe t'etøan nkehe sineni. Mé xikaha tí sín kjuích'e xikaha kjuínchexiteyá tí nkehe k'uituenhen sín nkexrí chrókjóné sín la ninkehó kjuínkítsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuích'e xra nkaxenhen njnko ósé.

¹¹ A ntá tí nchat'á t'etøan judío kjuíko sín tí ijnié ko nkaxenhen tí Cuarto Antsí Tjóá kixin tí nkehe la tsjatsen tí ijie sín. A ntá tí cuérpoé tí ko kjuaxin sín ikon tí chjasin k'uejó sín. ¹² Kjaxin Inchéni Jesús kjuasóte ch'án k'uénxin

‡ 12:26 Hageo 2.6
Deuteronomio 31.6

§ 12:29 Deuteronomio 4.24

* 13:2 Génesis 18.1-8, 19.1-3

† 13:5

‡ 13:6 Salmo 118.6

ch'án ikon chjasin kixin tsotjuáxin kaín ijje chojni tí ijnié ch'án. ¹³Tsochréheni Ìnchéni Jesús éxí k'uénxin ch'án ikon chjasin kjónté tsjasóteni éxí kjuasóte tí jehe ch'án kjuikosáyehya sín tí jehe ch'án. ¹⁴A ntá ntihi chjasintajni chóntahyani nijko chjaséni chrók'uitjáyanhya; a ntá xritjeyáni tí chjasin itsi chr'éxin. ¹⁵Méxra chrókuítqehyani chrókjuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhe tí ko tsík'en tsíchjehe sín Dios. Yóhe xíkaha chrókjuanjoni kixin ir'vani ó chrókjuikosáyexínni ch'án. ¹⁶Chrók'uitjáyanhyará chrókjuich'erá xra jína la ko chrókjuinkĩtsará kíchuará. Tí xíkaha chrókjuich'erá la imá tóxrjínhin Dios.

¹⁷Chrókuítekakónhénrá tí sín tjakoḡhará chrókjuinchexiteyéhérá tí jehe sín. Jehe sín mé t'ayakonhen sín asánrá kixin jehe sín la ó nohe sín kixin tsjanjon sín kuentá tí tjen Dios. Tsjínkĩtsará sín kixin tsochéhe sín sich'e sín xra la tsonínkakhya sín. A ntá tí chrókjuinchek'ávárá sín, ntá ninkehó tsjachahya sín tsjinkĩtsa sín tí jahará.

¹⁸Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni. ¹⁹Tjánchiá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰Tí Dios tjanjon kjuaxróxin, mé tí nkexro kjuínchexechón Ìnchéni Jesucristo kjónté tsík'en ch'án, jehe Jesucristo mé tí Pastor tjetean t'ayakonhen tí kolélo, la tí ijnié ch'án mé tsoxiteyáxin tí pacto sich'e xra jnkochrín, ²¹jehe Dios mé tsjinkĩtsa tí jahará kixin jína chrók'uejorá la ko kaín xra jína chrókjuich'erá kixin xíkaha tjinkaon ch'án; kixin jehe ch'án t'etuenhenni ch'án kaín nkehe nkexrí tjinkaon ch'án kixin tí kjuachaxin chóna Jesucristo. Mé xíkaha chjeheni Cristo kjuasáya jnkochrín. Amén.

²²Kíchóni, xrjanóḡhará kixin tóninkákonhyará kixin tí palabra xrjanka sjntaxaxinkáonrá. Méxra ikjian tí xroon kjónté kánhyó tsje nixja ts'ayéhérá. ²³Chrókónohará kixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasántsahará tí jahará.

²⁴Nixjehérá jnkójina kaín tí sín tjítaón ntja tjako la ko kaín tí sín kíchó ni tinkáchonki Dios. Tí sín tinkáchónki Ìnchéni tjejó Italia mé nixjahará sín.

²⁵Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

1 Janhan Santiago mé t'ahá xrá Dios la ko Ìnchéni Jesucristo nixjaha kaín tí sín tsík'axrjeníxin tí teyó xjeen ch'ín Israel tsíxikayéhe sátsíkji kuente chjasintajni.

Dios mé tsjanjon tí kjuaxrexinkaon jína

2 Jahará kichó ni, chrókócháhará kjónté chrók'uats'ínkará ichrén nkehe náxrjónhya. 3 Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. 4 Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanyha ninkehó.

5 Tí jnkojín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakhonhya ch'án. 6 Tió chrókjuancheherá Dios nkehe la kénxin asánrá chrókjuanchiará la chrókjóhya asánrá ninkehó. A ntá tí chojni tjo asén la éxi ntayaon tjiko xrínto ijnko lado la í jnko lado. 7 A ntá tí xíkaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. 8 A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkoqóáhya nkehe tjenkayáxin.

9 Tí kichó ni tinkáchónki Cristo la kjónté nóa chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha. 10 A ntá tí nkexro rico kjónté chrók'uitjáyan tí nkehe chóntha la antsí chrókóchéhe kixin tinkáchónki ch'án Ìnchéni, kixin tí nkehe chóntha ch'án la kánhyó sínkí la ts'itjáyan éxi itsjo tsík'óna ka. 11 Tió tsjiton yaon la tsosóa imá la tí ka tsqxámá la ko tí tsjo la ts'ánótjen la tí náxrjón tsjehe la tsjeje. Mé xíkaha tsonhen tí ch'ín rico, ts'itjáyan ntá tsítóhe ch'án tí xrá k'uéchóntha.

Tí nkehe tsonhen chojni

12 Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuente kjuachón kixin Dios tsintácho ch'án kixin tíha mé tsochjéhe ch'án tí sín tjuéhe ch'án. 13 A ntá jnkojínrá tí chróntácho asánrá chrókjuich'erá ichrén nkehe jínahya, la chróntáchrohyará kixin Dios tsíkjanjon kjuachaxin xíkaha s'ich'erá kixin Dios la tjinkakhonhya chrókjuich'e ch'án nkehe jínahya la ko tjinkakhonhya ch'án chrók'uetqan ch'án kixin ninkexró chrókjuich'e ijnko nkehe jínahya. 14 A ntá jnkojín chojni tí ó jehó tjenkayáxixín asén tí jínahya la mé xíkaha tsjachroe, tsjasin sín jie. 15 Mé xíkaha tí nkehe jínahya tjenkayáxin chojni mé tjixín tí jie. La mé xíkaha ts'ánkí tí jie la ntá tíha ts'énxín chojni.

16 Kichóni, chrókjuich'iyéhyará asánrá. 17 Kaín nkehe jína ntoá t'áyéheni mé tixín nkajní tí tjen Dios tí nkexro kjuich'éna kaín tí xrohi kuente nkajní. Jehe ch'án mé Dios jnkochríxin la jehe ch'án mé xitjahya ts'ixitóxin. 18 Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxi tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Kainrá chrók'uejorá chrókuinhínra jína la tjokahya chrónixjará kixin tjokahya chrókóninkáonrá. ²⁰ A ntá tí chojni tjoka tónínkaon la ch'ehya tí xra jína éxi tóxrjínhin Dios. ²¹ Méxra tjtóhérá tí nkehe tjuáhya la ko tí nkehe jínahya kjuachjínqxínhin síin nkúxín la chrókjuínchehnkehyará, chrók'uayéhérá tí itén Dios chrók'uinka nkaya asánra. Tí tan a mé chóna kjuachaxin kixin chrókuaáxinra.

²² Jehya kixin chrókuinhónra; jahará chrókjuich'erá éxi tí nkehe tjako tí tan a. A ntá tí náhi la jahóra ch'yehérá asánra. ²³ A ntá tí chojni tsinhón tí tan la ntá sinchexiteyáhya la éxi ijnko chojni tsjéxin xrosentá tí kon ó. ²⁴ A ntá tí k'uikón tí kon la sátsji la tuénxin k'uitjáyenhen nkexrí tsjehe. ²⁵ A ntá tí nkexro k'uitjáyenhya tí nkehe kuínhin la mé tsjehe ch'an jína tí ley chaxín ntoá, mé tí nkehe chaxín tsaáxinni la titekaon ch'an jína la ich'e ch'an nkehe t'etqan tíha la ntá náxrjón tsjak'e kixin kjuínchexiteyá ch'an.

²⁶ A ntá njkojin nkexro tjenkayáxin kixin imá tinkáchónki ch'an Dios kjánchó tí noehya tsochjéhe freno nejen la jehó ch'yehé asén la ninkehó sínkíhya tí nkehe tinkáchónki ch'an. ²⁷ A ntá tí nkexro tinkáchónki Dios chaxín jína la ko tjasinhya jie nkayakon It'eni Dios la mé tíhi: mé chrókjuinkítsa tí chojni nóe la ko tí chojni k'an chónahya nkehe sine sín o níhi sín, la ko chrókjuasinhya tí jie jínahya síin chjasintajni.

2

Jnkokón chrókjuikosáyehé kichó ni

¹ Kichóni, jahará tinkáchónkirá Ínchéni Jesucristo imá tjetóan la t'ichjánxin chrókjuikosáyehérá kain chojni jnkokón. ² Éxi ijnko chojni rico chrók'uixenhen tí tójnksérá la chóna koch'aninko oro la ko chóna iké náxrjón, a ntá ntiha kjaxin chrók'uixenhen ijnko chojni nóa chóna iké ntaxin. ³ A ntá tí chrókjuikosáyehérá tí chojni t'itsa ka jína la tsontácherá ch'an kixin: "Níhi antsí jína tjak'e." A ntá tí chojni nóa tsontácherá ch'an kixin: "Jaha la tjak'éxian totá ntiha o tjak'e nonte ó." ⁴ Mé xíkaha la jnkokónhya tjikosáyehérá kichuára la tí nkehe jínahya tjenkayáxinra.

⁵ Kichóni tjuahará, tsinhínra tíhi: Dios tsíkjeýá tí sín nóa ntihi chjasintajni kixin antsí má tsinkáchónki sín tí jehe ch'an kixin ts'áyéhe sín tí kjuachaxin kuente ch'an éxi tsintáchro ch'an tsochjéhe ch'an tí sín tjuéhe ch'an. ⁶ A ntá jahará mé tjikosáyehará tí sín nóa. A ntá tí sín rico mé tjikosáyehérá. ¿Á jehya tí sín rico tjanchia sín jie sájtiko sín tí jahará nkayakon tí sín t'etqan ní? ⁷ ¿La á jehya jehe sín t'ántaxínhin sín tí ihnié Cristo tjikosáyeheni?

⁸ A ntá jahará la jína tjejoch'erá tí nchexiteyará éxi t'etqan tí ley éxi nixja tí xroon itén Dios kixin: "Chrótjuéherá kichuára éxi tjuèxíná asánra". ⁹ A ntá tí jnkokónhya tjikosáyehará chojni la ntá xíkaha la tjásinra jie la nchexiteyehará éxi tí nixja tí ley kuente Dios. ¹⁰ A ntá ijnko nkexro titekaon kain tí ley la ntá kjuínchexiteyáhya jnkokoá tí nkehe tjetóan la mé tí xíkaha la kjuínchexiteyáhya kain tí nkehe t'etqan tí ley. ¹¹ Ntá Dios tsintáchro kixin: "Chrókuákjahará í jnko chojni chjin ókjé", la kjaxin tsintáchro ch'an kixin: "T'oyánhyará kichuára." A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyáhya tí nkehe t'etqan tí ley. ¹² A ntá jahará chrónixjará la ko chrókjuínchexiteyará kixin chrókjuanchiahya jie tí ley sinchekaáni. ¹³ A ntá tí nkexro kuíkonóehya í jnko chojni la kjaxin

tsjikonóehya Dios tí jehe. **A** ntá tí nkexro kujikonóehę kichó la mé xikaha tsjacha tsaáxin ch'án tí yaon tsjixixín tsitqexín jię.

Tí fe ch'ehya xra la tsik'en

¹⁴ Kichóni, ¿nkehe tsonhen ntáchrórą kixin chontará fe a ntá ninkehó nkehe jına tjákoxinhyará? ¿Á ntáchrórą kixin xikahó chrokuaáxinrá? ¹⁵ Éxi ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxinhin sín jnkojín yaon. ¹⁶ Ntá jnkojín tí jahará tsontácherá sín kixin: "Sátjia jnkojína la ko ts'itsa ká la ko sinte jına." **A** ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrórą. ¹⁷ La mé xikaha tónhen tí fe la tí tjákoxinhyará ninkehó nkehe jına kjuich'erá la éxi nkehe tsik'en tí ntáchrórą.

¹⁸ **A** ntá jnkojín chojni tsontáchró kixin: "Jaha chonta fe a ntá janhan it'a tí xra jına." Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jına jtét'a. ¹⁹ Jaha títékávan kixin jnkojóą Dios itjen la chaxín jına xikaha, kjánchó kjaxin tí jínahya títékaon tíha la ko síxranką chrakon. ²⁰ T'ónahyará lónti. Jahará la nohará kixin tí fe ch'ehya xra la chónkó tíha. ²¹ Dios kóxrjínhin tí nkehe chrókjuich'e ch'ín Abraham, tí nkexro k'uaxrjenixinni ósé, tíó chrók'óyan ch'án tí xjeen ch'án Isaac la chrókjuanjon ch'án chrók'uáyehę Dios. ²² Chrókónohará kixin tí fe k'úechóna ch'ín Abraham la kjuákoxin ch'án tí xra kjuich'e ch'án la ntá xikaha kjuákoxin ch'án kixin antsí má kuinkáchónki ch'án Dios. ²³ Mé xikaha xiteyá éxi ntáchró xroon itén Dios kixin: "Abraham kuítékaon Dios la ntá Dios ntáchró kixin jına ch'án", la ntá Dios kjuínchek'in ch'án amigo kuénte ch'án.

²⁴ Chrókónohará jahará kixin Dios la t'áyehę ch'án chojni la nchetjóą ch'án kixin tí xra jına ch'e sín la jehya kixin jehó chrókuinkáchónki sín ch'án. ²⁵ Mé kjaxin xikaha kónhen tí tjan Rahab, tí tjan k'úechóna nchónhya chojni ntoa. Jehe tjan kjuanjon tjan kjuachaxin kuítqhe ntqę tjan tí sín kjuítsjehe chjasén tjan la ko kjuínkítsa tjan sákjuixin sín ókjé ntia, a ntá Dios la kóxrjínhin tí nkehe kjuich'e tjan. ²⁶ Éxi tí cuerpoé chojni chóntahya nchakuen la tsik'en la kjaxin xikaha tí fe la tsik'en tí ninkehó tjákoxinhya tí nkehe jına chrókjuich'e sín.

3

Tí kjuachaxin chóna nejen chojni

¹ Kichóni, chrók'ónahya tí jahará nchónhya maestro kixin tí ntoáhya chrókjuákorá la tíha mé chrókjuasótiaxinrá imá. ² Kaínni chóntani jię, a ntá tí nkexro ninkehó jię ntáchróhya la ijnko chojni jına tíha la ó tsjacha ch'án ts'etuenhen ch'án kuénté tí cuerpo kuénte ch'án. ³ Éxi tí kokaę tsochóna chica freno tí ir'va va kixin tsítékaon va la sátsjiko tí lnché va la tsjacha ch'án ts'etuenhen kuénté tí cuerpo kuénte va. ⁴ Tjenkayáxinrá kjaxin nkexri tjejó tí ntabárcq kjónté imá jíe la tsjacha tí xrinto chjéhe tjian sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxin ch'án tí tjinkaon ch'án sátsjiko ch'án. ⁵ Mé xikaha tí ir'va chojni. Kjónté ijnko nkehe imá ntsí kuénte tí cuerpo kjánchó nchónhya nkehe jínahya ntáchró éxi ijnko xrohi ntsí la tsjacha tsochéxin kuénté ijnko jna jíe. ⁶ Mé xikaha tí ir'vani la éxi ijnko xrohi kixin nchónhya jię t'axrjexín la éxi ijnko veneno nchenihi cuerpo mé xikaha mé tsjasixín kuénté cuerpoé chojni jię. La tí kjuachaxin kuénte ir'vani la mé tjixin tí infierno la tíha mé tjixin tí ts'itjáyaxínni. ⁷ Tí chojni la tsjacha sinchesáncho kaín ko jięhe la ko tí ko xritjaká la ko tí konche la ko tí ko sínkanki

ntayaon la mé xikaha kjuacha sín nchesáncho sín va. ⁸ A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsosáncho. Tíha mé éxi ijnko nkehe chón'ta nchónhya veneno ts'lenxín chojni. ⁹ Tí ir'vani la kjaxin tjikosáyexinni It'éni Dios la tíha kjaxin t'ántaxíenxinni chojni tsíkijch'éna Dios éxi tsjehe tí jehe ch'án. ¹⁰ Kjaxin tí ir'vani t'axrjéxín tí nkehe itsjeni kuénte Dios la kjaxin tíha t'ántaxíenxinni. Kíchóni, xikaha chrókjuich'erá. ¹¹ Jnkokoá tòye xitjahya ts'axrje ntá xé la ko kjaxin ntá tsjá. ¹² Kíchóni, ¿á jína tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xíjnta la ko ntiha kjaxin chrók'uaxrje ntá xé.

Tí kjuaxrexinkaon jína

¹³ Tí tjen jnkójín nkexro tí tjejorá nohe jína la ko tienxín la chrókjuákoxin ch'án jnkójína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chón'ta kjuachjinoxínhin asánra la tjinkáonrá jahorá chrókúetoanrá. A ntá tí xikaha la chrókjuinchehnkexínhýará tí nkehe nohará kixin tí xikaha la ch'iyará la tjinkákonhýará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kúixín tí tjen Dios. Tí xikaha la kjuachaxin kuénte chojni chjasintajni ó la ko kuénte ch'ín Tsochren. ¹⁶ A ntá tí xikaha síin kjuachjinoxínhin la ko tjinkaon chojni jehó chrók'uetóan la ntá xitjahya tsonhen xra yóxin kixin xikaha síin nkehe jínahya. ¹⁷ A ntá tí síin kjuaxrexinkaon jína tsíkixín tí tjen Dios la saoxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkójína nixjehe kíchó sín la ko kjaxin tjikonóehé kíchó sín la ko tí xra jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'uenka sín kjuaxróxin la ko xikaha chrótjá sín tí nkehe jína.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínra kíchuará? Táha la mé jahorá t'axrjenixínra kaín tí kjuanínkaon a. ² Jahará tjinkáonrá tsochontará ichrén nkehe ntá chontahýará ntá tónínkáonrá t'oyánra kíchuará. Tóchjinoxínhanrá kixin tsjachahýará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios. ³ La tí tjanchiará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínra. ⁴ Jahará chojni titekakonhýa Dios. ¿Á noahýará tí jahará kixin tí imá tsotjuéherá chjasintajni la ntá tsonínkáonhérra Dios? A ntá tí jnkójínra tjinkáonrá tsotjuéherá chjasintajni la tsokjanrá tsonínkáonhérra Dios. ⁵ ¿Á tjenkayáxinra kixin tí nkehe ntáchro xroon itén Dios la á chónkó? Ntáchro xíkíhi: "Tí Nchakuen Dios kjuanjon ch'án k'uayéherá la tjuahará ch'án la tsonínkaon tí tsjtohérra ch'án." Mé xikaha ichro Dios. ⁶ Kixin Dios la imá tjinkítsani ch'án, méxra ntáchro xroon itén Dios kixin: "Dios la nínkakohen tí chojni nchehnke a ntá tjinkítsa ch'án tí chojni nchehnkehya."* ⁷ Méxra chrókjuinchehnkehýará. Íchá jína chrókuítekáonrá Dios la chrókjuánjonhýará kjuachaxin tí jínahya chrók'uetuanhanrá ntá chrók'uíkon tí jínahya kixin chrók'uetuanhýa ntá sáchrókjuí. ⁸ Chrókóchjineherá Dios, la tí jehe ch'án kjaxin tsochjinahará ch'án.

* 4:6 Proverbios 3.34

Jahará chojni chóna jje la chrókjonemará tjárá. Chrókjuinchetjóará asánra kixin chrótuèhéra Dios la kánhyó chrótuèhéra chjasintajni. ⁹ Chrók'uavará la ko chrótsjan kará. Chrókjuínkírá tí tjanorá la chrótsjan kará la chrókjuínkí tí cháhará la chrók'uavará. ¹⁰ Chrókjuinchehnkehyará chróxráinkáonrá Ìnchéni a ntá jehe ch'án chrókjuínkítsa ch'án antsi chrókónohará.

Chrók'uantaxíenhyani kichó ni

¹¹ Kichóni, chrók'uantaxíenhyará kichuára. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jje tí ley. A ntá tí t'eka ch'án jje tí ley la mé t'óna juez chrínki chrókuitekaon tí ley. ¹² Kixin jnkokoá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjásóte ch'án chojni. ¿A ntá nkexro tí jaha kixin chrókjuanchéhé jje tí kichuá?

Ínoehyani nkehe tsonhen ntóye

¹³ A ntá jje jahará chrókuinhírá tíhi kixin tsintáchorá kixin: “Ijie o ntóye sáchrókjuini ijnko chjasin la ntiha chrók'uejóni ijnko nánó chrókjuinchejkjini nkehe chrókjuachani chichaon.” ¹⁴ A ntá jahará noahyará nkehe tsonhen ntóye kixin tí tjejóchónni la éxi ijnko tjuj nonte ts'íkonní a ntá tuénxín ts'itjáyán. ¹⁵ Íchá jína chróntáchorá kixin: “Tí tjinkaon Ìnchéni la naxa chrók'uejóchónni la chrókjuich'eni tíhi o tíha.” ¹⁶ A ntá jahará tí nixjará la imá ihnkerá la kaín tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xikaha la mé antsi tjasin jje.

5

Tí nkehe chrókuinhin tí sín rico

¹ Jahará rícorá chrókuinhírá tíhi. Chrótsjan kará la ko chrók'uíyatorá kixin tí nkehe tsonhanrá tsjasótíará. ² Tí nkehe rícoxínrá la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoqxín kixin nkexrí tsonhen ntqará tsoche. ¿Nkehe tsonhen kjuásintonrá nkehe kixin ó tsi tí yaon tsjixixín? ⁴ A ntá tí nkehe chrókjuacha tí sín kjuít'ahará xra la kjuénkehyará sín la ntá tjanchia sín jje tí jahará la t'èya sín, ntá Ìnchéni imá t'etqan mé kuínhin kixin xikaha ichro tí sín kjuích'e xra. ⁵ A ntá ntihi chjasintajni la náxrjón tjeorá la kaín nkehe tóxrjínhanrá ch'erá la éxi iko imá jína ine la tsíkótsanka la ntá itsji yaon ntá its'en la mé xikaha tsonhanrá. ⁶ Kixin jahará la kjuinchekjásóterá la k'oyánrá chojni ninkehó jje chóntahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkákonhyará chróchonhénra tsokjanjian Ìnchéni. Éxi tí ch'in ch'e xra nontee chónhen xrakoa chrin senó la ko tí chrin tsjixixín ntá tsotjá ch'án tí nkehe náxrjón k'óna. ⁸ Mé xikaha jahará la kjaxin chrókóninkákonhyará chróchonhénra chrókóxrjéhyará kixin tí yaon itsi Ìnchéni la ó chjina tsi. ⁹ Kichóni, chrókóninkákuenhyará kichuára kixin ntá chrókjuanchahya Dios jje tí jahará kixin Dios la mé tí juez la ó tjen ch'án tí ntója puerta. ¹⁰ Kichóni, chrókuankíhírá éxi tí sín k'uéchronka itén Dios k'uéchronkaxín sín kjuachaxin ihnjé Ìnchéni. Jehe sín kjónté kjuasóte sín la kóninkakonhya sín. ¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhírá kixin nkexrí kónhen ch'in

Job. Ó nohará kixin Ìnchéni kjuinkĩtsa ch'án hasta kjuixixín kixin Ìnchéni la imá jina ch'án la kuikonóge ch'án tí ch'ín a.

¹² A ntá kichó ni, chrókuakjénxinhýará ihnié Dios tjen nkaya nkajní la ko ni chjasintajni la nijnko nkexro chrók'uakjénxinhýará. Tí chróntáchrórá chaxín la chaxín la tí náhi la náhi kixin Dios la chrókjuinchekjásótiahýará.

¹³ A ntá jnkojín tí jahará náxrjónhýa tjeorá la chrónixjehérá Dios, a ntá jnkojínrá náxrjón tjeorá la chrótsjerá kuente Dios. ¹⁴ A ntá tí jnkojín nkexro níhi la chrók'uíyehé sín tí sín táda t'etóan kuente njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihnié Ìnchéni.

¹⁵ Chrónixjehérá Dios kaín asánrá kixin tí sinníhi chrókuítóhe jina la ntá Ìnchéni chrókjuinkĩtsa sín, a ntá ichrén jje kjuasin sín la jehe ch'án sinchek'itjáyán tíha. ¹⁶ Méxra chróchenkará kichuára tí jje chontará la ko chrónixjehérá Dios kixin chrókuítóhará jina. Tí nixjehé Dios ijnko chojni jina tinkáchónki Ìnchéni la chóna nchónhýa kjuachaxín tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhýa chrin la ntá k'uániáhýa chrin chjasintajni iní nánó ko t'ó. ¹⁸ A ntá chr'éxín kjuanchehe ch'án Dios kixin ts'aniá chrin la ntá k'uániá chrin inaá chjasintajni la jina k'óna tí nkehe k'uenká sín.

¹⁹ Kichóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuinkĩtsa kixin chrókjan tí nkexro a ²⁰ la chrókónohará tí jahará kixin jnkojín chojni tjinkĩtsa ijnko nkexro chóna jje tsokjanxín tí ntja jínahýa k'uék'aji ch'án la ntá ó kjuinkĩtsa kixin tsaáxin asén tí ch'ín a kixin ts'itjáyanhýa ch'án la ntá chrók'uitjáyán tí nchónhýa jje k'uéchóna ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énnen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhárrá jahará sátsíkjirá ókjé chjasin tjejórá, mé tjejórá estado Ponto, la ko Galacia, la ko Capadocia, la ko Asia, la ko Bitinia. ² Kjueyará It'eni Dios kixin jehe ch'án tsíkjenkayáxin ch'án ósé xíkaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijníé Jesucristo. Kjuasáyé ch'án chrókjuintayaonrá ch'án kixin antsi chrókuákjárá tí kjuaxróxin kuente ch'án.

Tjejóchónhenni kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kujikonógheni ch'án kixin éxi kokjéxinni nixin kixin xechón Jesucristo. Mé xíkaha tjejóchónhenni sinchekaáni ch'án. ⁴ Mé xíkaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjayan, la ko chónhya tsokjita, la ko chónhya tsoxamá. ⁵ Dios mé t'ayakuanáxinrá ch'án tí kjuachaxin kuente ch'án kixin jahará tinkachónkirá ch'án kixin ntá tsjacha tsaárá éxi tsíkjenkayáxin ch'án ósé mé tjinkaon ch'án kixin chrókuaárá tí tsjixixin tsjeje chjasintajni.

⁶ Méxra xíkaha chrókócháhará kjónté ihrén nkehe chrókónhanrá iso yaon kixin jehí t'ichjánxin xíkaha itsjé nkehe chrókónhanrá. ⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xíkaha t'ichjánxin ts'atsínka tí sín xrohi tsotsjéxin sín á chaxin jina kohya nkehe tsonhen. A ntá antsi má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xíkaha tí tinkachónkirá Ìnchéni t'ichjánxin xíkaha tsonhanrá kixin tsontáchro Dios kixin jina kjuachará ntá ts'ayéhérá kjuachaxin tió tsi Jesucristo.

⁸ Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyógheni kixin imá náxrjón tíha. ⁹ Mé xíkaha k'uitjará nkexrí tsaáxin asánrá. Tíha mé tí nkehe tjejochonhénrá tinkachónkirá.

¹⁰ Mé xíkaha tí sín profeta síki óse la kjueyá sín nkexrí chrókuaáxin chojni la ko k'uéchrónkaxin sín tí nkehe kjuasáyé Dios chrókjuanjon ch'án chrók'uayéhérá tí jahará. ¹¹ Nchakuen Cristo kjuínchenohe tí sín k'uéchrónka itén Dios kixin Cristo tsjasóte la ko chr'éxin ts'áyéhe ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsonhen tí nkehe chrónkaxin Nchakuan Ìnchéni. ¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uejó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhinrá, mé tí tan tsaáxinni k'uéchrónkaxin tí sín kjuakohará kixin tí kjuachaxin Nchakuen Dios kuixin nkaya nkajni mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexrí tíha.

Dios k'uíyehé ch'án tí jeheni kixin tjóá chrók'uejóni

¹³ Méxra chrókjuenkayáxinrá jina nkehe chrókjuich'erá kixin chrók'uejórá jnkojina. Kaín asánrá chrók'uejochonhénrá kixin tí nkehe sintakítõnhanrá

a ntá tí sín tsitekaon tí jehe ch'án mé tsqsuèhya sín.*

⁷ A ntá jahará títekaonrá tí xro kixin imá tje. A ntá tí sín kuítekakonhya, la mé tsoxiteyá éxi ntáchro xroon itén Dios kixin:

Tí xro náxrjónhya kuitqenta tí sín ch'éna tjat'ò,
mé ijie mé k'óna tí xro tjeoan.†

⁸ La ko kjaxin tsoxiteyá tí nkehe ntáchro xroon itén Dios kixin:

Tí xro mé tsóténkixin sín la mé tíha ijnko tjo tsjitsinkaxín sín.‡

Kjánchó jehe sín kóténkixin sín tí xro kixin kuítekakonhya sín tí itén Dios mé xráxín tsikjtoenxín sín xikaha tsonhen sín.

Tí sín tinkáchónki Dios

⁹ A ntá jahará tsík'axrjenixínrá tí sín tsikjeyá Dios la ko tsik'ónará nchat'á ch'eherá xra tí rey, la ko tsik'ónará ijnko nación tjóá, la ko tsik'ónará ijnko chjasin kuente Dios kixin ntá tsochronkará tí xra náxrjón kuente Dios. K'uuyahará ch'án kixin ts'axrjéxínrá tí sitié ntá ts'ixenhénrá tí sín xrohi náxrjón t'inkaséyan kuente ch'án. ¹⁰ A ntá jahará tí ósé la jehya chjasén Dios, a ntá jie la tsik'ónará chjasén ch'án. Tí ósé la Dios k'uékikonóahará. A ntá jie la kujkonóahará Dios.

Chrók'uejóni ch'ehe ni xra Dios

¹¹ Kichóni, xrxanóahará tí jahará kixin éxi chojni tsikjixin ókjé chrók'uejorá ntihi chjasintajni chrókjuánjonhyará kjuachaxin chrókóxrjínjin asánrá tí nkehe sín chjasintajni, mé tí nkehe tjanjonko asánrá. ¹² Jína chrók'uejorá tí sín tí sín chónhya Dios kixin kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kixin jína tjejoch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuch'erá.

¹³ Jahará tinkachónkirá Ìnchéni chrókjuinchexiteyéhérá kaín tí sín t'etqan kuente chjasintajni, á tí ch'ín rey kixin imá t'etqan ch'án, ¹⁴ o á tí ch'ín gobernador ichr'án Dios kixin sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kixin jína chrók'uejorá kixin tí sín noehya la ko tí sín lqntj la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kixin chróchontaxínrá kjuachaxin kixin chrókjuich'erá tí jínahya. Náhi. Chrókjuáqoxínrá éxi chojni ch'ehe Dios xra. ¹⁷ Chrókjuikosáyeherá kaín chojni. Chrótjuèherá tí sín kichó ni, la ko chróchontehérá Dios kjuasáya, la ko chrókjuikosáyeherá tí ch'ín gobierno t'etqan.

Tóyoqxin éxi tí nkehe kjuasótéxín Cristo

¹⁸ Jahará chojni ch'exón xra, chrókjuinchexiteyéhérá tí lámqará, chróchontehérá kjuasáyé sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuáqoxínrá kjónté chrókjuasótíaxínrá ijnko nkehe jínahya kixin xikaha mé chrókjuinchexiteyéhérá Dios. ²⁰ A ntá tí tjejoch'erá ichrén nkehe jínahya, ntá nchekjasótíaxínrá sín la ¿nkehe tsonhen kixin chrókóninkákonhyará? A ntá tí chrókjuasótíaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínjin Dios. ²¹ Méxra xikaha k'uuyahará Dios kixin Cristo kjuasótéyakonhánrá. Tíha mé kjuáqoxin ch'án kixin mé xikaha chrókjuich'erá. ²² Kixin Cristo la ninkehó jie kjuasinhya ch'án la ko ninkexró kjuich'yehya ch'án, ²³ la ko ninkehó kjuátéehya

* 2:6 Isías 28.16 † 2:7 Salmo 118.22 ‡ 2:8 Isaiás 8.14

ch'án tió k'uántaxínhjin sín ch'án; a ntá tió kjuínchekjasóte sín ch'án la ninkehó k'ókjanxínhya ch'án. Náhí. Jehe ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nchekitoexín ijíe chojni. ²⁴ Cristo mé kuamá ch'án tí ijíeni kixin tí cuérpóe ch'án kjuák'enkáni ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkójina. Kixin Cristo kjuasóte ch'án, chrít'ó ch'án kixin jahará chrókuítgaxínrá jina. ²⁵ A ntá jahará k'uék'ejorá éxi kolélo tsíkijchroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsíkótēhe

¹ Kjaxin jahará chojni chjin ó tsíkótahará chrókuítekákonhénrá tí xiyará, kixin kjaxin jnkójin tí sín titekakonhya itén Dios chrókuítekaon sín kixin jina tjen tí tjachjin, kjónté t'ichjánxínhya chróchrónka tjan kixin jina tjen tjan, ² kixin chrók'uikon sín xikaha kixin jina tjen tí tjachjin chóna kjuasáyé tjan. ³ Chrókjuínchehnkexínhyará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuínchejínará asánrá, kixin tí nkehe náxrjón chrók'uitjáyanhya na mé tí asén chojni tójiehya la ko náxrjón. Tíha mé imá sínkí nkayakon Dios. ⁵ A ntá tí ósé xikaha k'uékjenkayáxin tí chojni chjin jina. Jehe sín mé kuinkáchónki sín Dios la ko kjuínchexiteyéhe sín xì sín. ⁶ Mé xikaha kjuich'e tjan Sara kjuínchexiteyéhe tjan tí ch'ín Abraham, mé kjaxin ntácho tjan kixin ìnché tjan tí jehe ch'án. A ntá tí jahará tí xjeen tí jehe tjan la chrókjuínchexiteyará jina la ko ninkehó kjuachrakon chróchontahyará.

⁷ Kjaxin jahará chojni ntoará tsíkótahará chróchontehérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuích'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jina kjuích'e sín

⁸ Méxra, jnkokoá chrókjuenkayáxinrá kaín rá chrókjuikonóghérá kichuárá, chrótjuèhérá kichuárá. Jnkójina chrónixjehérá kichuárá la chrókjuínchehnkexiyará asánrá. ⁹ Tí ichrén nkehe jínahya chrókjuít'ahará sín la jahará la xikahya chrókjuích'ehérá sín. Tí chrók'uántaxínhanrá sín la jahará chrók'uantaxíenhyará sín. Náhí. Íchá jina chrókjuancheherá Dios kixin chrókjuíncheyaon ch'án sín kixin Dios la k'uíyághará ch'án kixin chrók'uayéhérá kjuachaxin kuénte ch'án. ¹⁰ Kixin:

Tí nkexro tjinkaon tsojtjuèhe asén kixin jina chrókjuak'e kaín yaon la chrónixjahya ch'án ninkehó nkehe jínahya

la ko ninkehó kjuach'ia chrók'uaxrxjexínhya ir'va ch'án.

¹¹ Tí nkexro la chrókuítóhe tí nkehe jínahya la íchá jina chrókjuích'e tí nkehe jina,

la ko íchá jina chrókjueyá ch'án kjuaxróxin chrókjuak'e ch'án.

¹² Kixin ìnchéni t'ayakonhen tí nkexro jina

la ko tinhin ch'án tí nixjehe sín ch'án,

a ntá tí sín ch'e tí jínahya la tjinkítsahya ch'án.*

* 3:12 3.10-12 Salmo 34.12-16

¹³ ǂXá nkexro chrókjuít'ahará nkehe jínahya tí jahará tjejoch'erá nkehe jína? ¹⁴ Kjonté chrókjuasótexinrá tí nkehe jína tjejoch'erá kjonté la chrókócháhará chróchrakuenhyará ninkexró la ko chróchrakonhyará. ¹⁵ Náhi. Íchá jína chrókjuíkósáyeherá Cristo nkaya asánrá kixin Ínchárá. Chrók'uejorá listo chrókjuátēherá tí nkehe chrókjuanchankíhará kaín chojni kixin nkexrí tinkachónkirá Ínchéni, la chrókjuinchehnkehyará la kjuasáya chrókjuátēherá. ¹⁶ Chróchontará ijnko kjuaxrexinkaon jína kixin ntá tí sín xrich'ia sín t'ántaxínhanrá sín kjonté jína tjejorá tinkachónkirá Cristo la mé chrókósuēhe sín kixin tí nkehe ntáchro sín la ntoáhya. ¹⁷ Íchá jína chrókjuasótiaxinrá kixin tí jína tjejoch'erá tí xíkaha tjinkaon Dios, a ntá chrókósuáhará chrókjuasótiaxinrá tí ichrén jie chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jie kuènteni, ónaá k'uén ch'án kixin para jnkochríxín. Jehe ch'án la jína ch'án la kjuasóteyákonhenni ch'án kjonté jínahyani, kixin ntá jína sáchrókjuíkoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón inaá, ¹⁹ kixin tí Nchakuen ch'án sákjuíkjakohē tí nchakuen tí sín tsík'en tjejóhchina. ²⁰ Tí sín a mé kuítakonhya sín tí ósé tió kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sít'óna tí arca, na mé ijníkóá chojni kuítakaon sín mé kuaá sín tí kuíteē sín ntá. ²¹ Tí ntá a mé tóyóhē tí tikítexín chojni ijie kixin tí xíkaha tsonhenni la tsaáxinni ijie. A ntá tí tikite chojni la jehya kixin tsotjuáxin tí cuerpo. Náhi. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ínchéni Jesucristo, ²² mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etóan.

4

Chrókjuich'eheni Dios xra éxi tí kjuachaxin kjuanjon ch'án

¹ Méxra éxi Cristo kjuasóte tí cuérpōē ch'án ntá kjaxinrá kjonté xíkaha chrókjuasóterá chrókókakuanhyará kixin tí nkexro kjuasóte tí cuérpōē la ó kuítōhe tí jie. ² A ntá tí naḡa chrók'uejochónrá intsi la chrók'uejorá éxi tóxrjínhin Dios. Jehya éxi k'uékóxrjínhanrá. ³ A ntá tí ósé nchónhya nkehe k'uékjich'erá éxi ch'e tí sín naḡa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jie k'uéchontará ókjé chojni chjin la ko k'uékókoanrá la k'uekjásinrá kia ntá ntiha kjuánjonxin chojni la ko k'uékinkachónkirá tí nkehe tsíkjanōya. ⁴ A ntá ijie la jahará t'itohyará tí sín a kixin tí jínahya ch'e sín. Méxra xíkaha t'ántaxínhanrá sín. ⁵ A ntá tí jehe sín tsjanjon sín kuentá tsochénka sín tí nkexro tjechónhen sinchekitōexín ijie tí sín tjejóhón la ko tí sín tsík'en. ⁶ Méxra kjonté tí sín tsík'en tsíxrákōhē sín tí itén Dios kixin tí nchakuen sín chrók'uejó éxi tjinkaon Dios kjonté naḡa k'uejó sín ntihi chjasintajni la kuítōexín tí ijie sín éxi tsitōexín ijie kaín chojni.

⁷ Ó kuichjina tsjeje chjasintajni a ntá xíkaha chrók'uejorá jnkójina la ko chrók'uejotsjehérá chrónixjehérá Dios. ⁸ Tí nkehe imá tjetōan kixin antsi chrótjuēherá kichuárá. A ntá tí tjuēherá kichuárá la mé tíha chrók'uitjáyaxín tí nchónhya jie chontehérá kichuárá. ⁹ Chrókjuánjonrá kjuachaxin chrókuitōhe jnkójin kichuárá ntōará chrókóninkákuénhyará nijnko tí jehe sín. ¹⁰ Jnkójnkorá nkehe tí xra tjáhará Dios k'uayéherá chrókjuínkítisará kichuárá. Xíkaha jína chrókjuákōxinrá tí kjuasáyé ch'án tjáhará ch'án kixin nchónhya xra

k'uayéherá. ¹¹ Tí jnkojínrá tjinkáonrá chrónixjará ichrén nkehe la chrónixjará éxi nixja itén Dios. Ti jnkojínrá tjinkáonrá chrókjuínkĩtsará la chrókjuákoxínrá tí kjuachaxin tjáhará Dios. Kaín tí xra chrókjuich'erá chrókjuancheherá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la kaín tí kjuachaxin siín la kuènte ch'án jnkochríxín. Mé xikaha chaxín. Amén.

Íchá jína chrókjuasótexínni kixin tí tinkáchónkini Cristo

¹² Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxínrá. ¹³ Náhi. Íchá jína chrókócháhará kixin xikaha chrókjuasóterá éxi kjuasótexín Cristo, kixin kjaxínrá tsocháhará imá tió ts'ikonrá tí kjuachaxin tsikao Ínchéni tí itsi ch'án. ¹⁴ Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehe sín t'ántaxínjin sín ch'an, a ntá jahará tjikosáyehérá ch'án. ¹⁵ A ntá tí jnkojínrá tjeotjasóterá chrókójehya kixin ichrén nkehe chrókjuich'erá chrókjuáyará o chrókueerá o ichrén nkehe jínahya chrókjuich'erá o chrókjuatérá kjuanínkaon kuènte ókjé chojni. ¹⁶ Náhi. A ntá jnkojínrá chrókjuasótiaxínrá kixin tinkachónkirá Cristo la chrókósuàhyará. Náhi. Chrókjuancheherá Dios kjuasáya kixin xikaha kónhanrá.

¹⁷ Ntá jie ó kui tí tsitoxén ijje chojni mé xrankixixín tí sín tsík'óna xjeen Dios. A ntá tí xikaha tsitoxén ijje tí jeheni xrankixixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xikaha tsonhen sín ntá tsaá sín a ntá íchá tí sín jínahya chóna jie kjá antsí tjasóte sín.* ¹⁹ A ntá tí nkexro tjasóte éxi tjinkaon Dios la kjónté xikaha la naxa chrókjuich'e sín nkehe jína la ko chrókjuanjon sín asén sín chrók'uayakonhen Dios mé tí nkexro kjuich'éna sín la mé jehe ch'án xráxín jína ch'án.

5

Tí k'uítuenhen tí sín t'etöan kuènte nínko

¹ Tjínkavan tétuanhan tí chojni t'etöan kuènte tí nínko tjejorá ntiha kixin kjaxín janhan tétöan kuènte nínko éxi tí jehe sín, a ntá janhan mé k'uúkuän kixin nkexrí kjuasóte Cristo, la ko kjaxín janhan mé tsochonta kjuachaxin kuènte Dios éxi tsochóna tí jehe sín tió itsi Ínchéni chr'éxin. ² Jahará chrók'uayakonhénrá tí kolélo kuènte Dios ntiha kixin xikaha tí xra k'uayéherá. Jnkojína chrókjuínkĩtsará sín éxi tjinkaon Dios la jehya kixin ijnko chojni chrók'uetuanhanrá chrókjuich'erá xra, la ko kjaxín jehya kixin imá chrókórxjínhanrá chichaon. Náhi. Kaín asánrá chrókjuich'erá xra jína. ³ Jehya jahará kuèntará tí jehe sín kixin chjini chrókúetuenhénrá sín. Náhi. Jnkojína chrókjuákoéxínrá tí jehe sín. ⁴ A ntá tió tsí tí Pastor chaxín t'etöan ntá jahará ts'ayéherá ijnko corona náxrxón tsjehehya.

⁵ Kjaxín jahará ntasoará chrókjuínchexiteyéherá tí sín t'etöan kuènte nínko. Kaínrá chrókjuínchexiteyéherá kíchuará chrókjuínchehnkehyará kixin: Dios la tsonínkakonhen tí sín nchehnke, a ntá tí sín nchehnkehya mé tsjinkĩtsa ch'án.*

⁶ Méxra chrókjuínchehnkehyará, chrókjuínchexiteyéherá Dios kixin jehe ch'án imá ts'etöan ch'án kixin tsjixraká tí yaon mé jehe ch'án tsotjáhará

* 4:18 Proverbios 11.31 * 5:5 Proverbios 3.34

ch'án kjuachaxin kixin tsétoanrá. ⁷ Chróchjehérá Dios kaín tí kjuaxrexinkaon chontará kixin kjaxin jehe ch'án tóxakonhen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro nínkakonhanrá mé tí ch'ín Tsochren éxi ijnko koxra tsjánka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kichuára nkuixín chjasintajni xikaha tjejtjasóte sín kixin tinkáchónki sín Inchéni. ¹⁰ Kjánchó kánhyó sé tsjasótiará, a ntá Dios antsí tsjinkitsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyahará ch'án kixin ts'ejokoará ch'án jnkokoá tí tjen Jesucristo chóna kjuachaxin jnkochrixin. ¹¹ Jehe ch'án tsjancheheni ch'án kjuasáya kixin chóna ch'án kjuachaxín ts'etoan ch'án jnkochrixin. Amén.

Kjuixixin nixja ch'ín Pedro

¹² Ch'ín Silvano mé t'íkuan ijnko kichó ni jína mé kjuínkítsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xikaha kjuakoxin ch'án kixin chaxín tjuahará ch'án. Méxra xikaha jína chrók'uejorá kixin tjuahará ch'án.

¹³ Tí njnko tjen Babilonia mé tsíkjeyá Dios éxi tsíkjeyá ch'án tí jahará nixjahará sín la ko kjaxin nixjahará ch'ín Marcos, mé éxi xjanna t'íkuan tí jehe ch'án.

¹⁴ Nixjehérá kichuára jnkojína. Kjuaxróxin chrók'uejorá tinkachónkirá Jesucristo. Amén.

Xroon yóxin tsíkjin ch'ín Pedro

Ch'ín Pedro chr'énhen ch'án tí xroon tí sín tinkáchónki Cristo

¹ Janhan Simón Pedro, na mé t'ahá xrá Jesucristo. Ikjian tí xroon ts'ayéherá jahará ó tinkachónkirá Ìnchéni éxí tinkáchónkini jeheni kixin Dios la ko Jesucristo tí nkexro sincheakaáni na mé jina ch'án. ² Sintayaonrá Dios la ko antsí ts'ayéherá kjuaxróxin kixin ó nohará nkexrí tjen Dios la ko Ìnchéni Jesús.

Jina chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jina chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrá imá jié kjuích'e ch'án. ⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xíkaha kjuakoxin ch'án kixin chrók'uyéherá kjuachaxin chrók'uejorá éxí tjinkaon ch'án la ko chrókuítoghérá tí nkehe jínahya kixin chrók'uitjáyaxínhyará tí nkehe k'uékjenkayáxinrá síin chjas-intajni. ⁵ A ntá jahará tinkachónkirá Ìnchéni la kjaxin chrókjuéyará kixin chrók'uejorá jnkójina; a ntá tí jina tjejorá ntá chrókjuachará antsí chrókónohará; ⁶ a ntá tí kónohará ntá chrókjuachará chrókjuenkayáxinrá jina; a ntá tí tjenkayáxinrá jina ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótjuèhérá kichuára; a ntá tí tjuèhérá kichuára ntá chrókjuachará chrótjuèhérá kaín chojni.

⁸ A ntá xíkaha tjejoch'erá tinkák'ánkí tí kjuaxrexinkaon kuéntará, ntá jehya kixin chónkó kuinkachónkirá Ìnchéni Jesucristo. ⁹ A ntá tí nkexro ch'ehya xíkaha la mé éxí ijnko chojni t'ikonhya o ijnko chojni t'ikonhya jina, kixin ó k'uitjáyenhen kixin Ìnchéni ó kjuixin kjuínchetjótá tí jié k'uéchóna ósé. ¹⁰ Méxrá xíkaha kichó ni jnkójina chrók'uejorá kixin ntá tsonohará jina kixin Dios tsíkjeýará tí jahará la ko tsík'íyáhará ch'án kixin xíkaha jina chrókjuenkayáxinrá, a ntá xitjahya chrókjuichroerá. ¹¹ A ntá xíkaha chrókuítekáonrá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etqan ch'án jnkochrín. Jehe ch'án mé tí nkexro kjuíncheakaáni.

¹² Méxrá titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará. ¹³ Ntáxraján kixin jina tí naxa tjen chrókjuíntaxráxinkáonrá kaín tí nkehe a ¹⁴ kixin Ìnchéni Jesucristo kjuínchenóna kixin í séhya its'én janhan. ¹⁵ Na mé kaín tíha tjet'a kixin tió its'én, ntá jahará tsoxráxinkáonrá jnkochrín kaín tí nkehe kjuít'a.

Tí sín k'uikon tí kjuachaxin kuènte Cristo

¹⁶ Tí nkehe kjuákoaharáni kuènte tí kjuachaxin kuènte Ìnchéni Jesucristo la ko nkexrí itsí ch'án na mé jehya ijnko cuento kjuích'éna chojni chrókjuích'iyáxin. Náhi. Ikonni k'uikonxíncon Ìnchéni la ko tí kjuachaxin kuènte ch'án. ¹⁷ K'uikonni tíha tió It'eni Dios kjuikosáyehé ch'án tí Xjeen ch'án, la ntá kuínhinni nixja Dios tjen nkaya nkajni ntáchro ch'án kixin: “Tíhi mé xjanna tjuahá ch'án. Imá chána kixin nchexiteýá ch'án éxí tjinkavan janhan,”

ichro Dios. ¹⁸ Mé kuínhinni itén Dios kuixin nkaya nkajni kixin xikaha ntáchro tió k'uejókoni Ìnchéni chrítaón tí jna tjóá.

¹⁹ Mé xikaha k'uechrónka tí sín tsíkjin itén Dios ósé ntá noexínni kixin chaxín tsoxiteyá. A ntá jahará chrók'uejorá chrókuinhínra jina nkehe k'uentáchro sín kixin tí tan mé éxi ijnko xrohi t'inkaséyanxín tí sitié tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánra. ²⁰ A ntá tjeoan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókienxín. ²¹ Náhi. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhi. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia (Judas 4-13)

¹ Kjaxin k'uek'ixin tí sín ntoáhya k'uechrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehé sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótéxin tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxienxín chojni tí ntja ntoá kuènté Ìnchéni. ³ Tsoxrjínhin sín tsochónta sín nchónhya chichaon, ntá tsjanchiáxinra sín chichaon tí nkehe ntoáhya tsjakohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jie la kujkonóehya ch'án sín la k'uetóan ch'án kixin sátsji sín tsjasóte sín sátsjik'ikjehé sín tí sitié na tjejóchjina sín tsjixrakájia tí tsitóexín ijíé sín. ⁵ La ko kjaxin kujkonóehya Dios tí sín k'uejó chjasintajni ósé ntá ichr'án ch'án nta kuíteé tí sín jínahya, a ntá Dios kjuíncheakaá jehó tí ch'ín Noé, na mé tí nkexo kjuako tí tan jina la ko kjuíncheakaá ch'án tí yato sín ó.* ⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xikaha tsonhen sín.† ⁷ Kjánchó Dios kjuíncheakaá ch'án tí ch'ín Lot kixin ijnko chojni jina tí jehe ch'án la ko imá kóxakonhen ch'án tí k'uikon ch'án tí jie kjuasin tí sín jínahya. ⁸ Tí ch'ín Lot mé jina asén ch'án mé k'uekjak'e ch'án tí sijn tí sín jínahya ntá kaín yaon kóxakonhen asén ch'án k'uikon ch'án la ko kuínhin ch'án tí nkehe jínahya k'uekjich'e sín.‡ ⁹ A ntá Ìnchéni na sincheakaá ch'án tí sín kaín asén kuitekaon tí jehe ch'án kjónté nchónhya kónhen sín. A ntá tí sín jínahya la sincheckjasóte ch'án tí yaon tsitóexín ijíé chojni.

¹⁰ Dios antsí sincheckjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéhe sín tí nkehe t'etóan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin tí sín a nkayakon Ìnchéni.

¹² A ntá tí chojni a la éxi yóhe iko tjenkayáxinha ninkehó la nchexiteyéhe tí nkehe ntáchro asén, la kokjhi kixin ts'óyán kichó ó. T'ántaxínhin sín tí nkehe tienxínha sín, mé xikaha its'en sín éxi its'en tí ko a. ¹³ Tíha mé tsjasótéxin

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29

sín kixin jehe sín kjuínchekjasóte í so chojni. Xrácín tóxrjínhin sín ich'e sín tí nkehe ntáchro asén sín. Ijnko kjuatósuehë kixin tjejóntaxín sín ntekoará sín tí kia chontará la kjónté tí xíkaha la naḡa tjasin sín jie.

¹⁴ Kohya nijnko chojni chjin chrokJuasinkohya sín jie. Tóxrjéhya sín tjasin sín jie tsjasótéxin sín. ¹⁵ Kúitöhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhin ch'án chrókJuacha ch'án nchónhya chichaon tí nkehe jínahya chrókJuich'e ch'án. ¹⁶ A ntá t'ichjánxin tsjasóte ch'án kixin tí jie kjuasin ch'án. A ntá injko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jie chóna ch'án ntá kúitöhe ch'án tí nkehe jínahya chrókJuich'e ch'án.^S

¹⁷ Tí chojni tjako mé éxi yöhe töyë tjíáhya ntá la ko éxi tjuj tjakáko xrínto ó; ó kjuixin k'uituenhen sín sátsji sín tí imá sitié tsjasóte sín jnkochrícín. ¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókúitöhe sín tí jie. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkójnko chojni mé nchexiteyéhe tí nkehe kjuacha k'uetuenhen sín. ²⁰ A ntá tí nkexro ó chóxin Ìnchéni Jesucristo tsaáxinni mé kúitöhe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín ntja jínahya inaá tí chrókJuacha tí jínahya chrókJuachroe sín, a ntá antsí má jínahya chrókónhen tí jehe sín. ²¹ Íchá jína chrókónoehya sín tí ntja jína. A ntá jehya jína tí ó nohe sín ntá tsítöhe sín tí nkehe k'uetöan Dios kuínhin sín. ²² A ntá tí jehe sín kjuínchexiteyá sín éxi ntáchro tí proverbio kixin: "Tí konjá t'ókjan ntá xíkjan xíkjne inaá,* la ko tí cochíno na ntá tsik'ónti tjóá ntá xíkjan kjíankí tí nchet'ö kjíta."

3

Tió tsi Ìnchéni

¹ Kíchóni tjuahará tíhi la xroon yöxin ikjian ts'ayéherá. Yóí tí xroon a ntáxrácinkáonrá kixin jína chrókJuenkayáxinrá. ² Chróxrácinkáonrá tí nkehe tsíchronka tí sín k'uechrónka itén Dios ósé la ko tí nkehe k'uetöan Ìnchéni, mé tí nkexro tsaáxinni, kjuakohará tí sín kjueya ch'án.

³ Tjetoan chrókónohará tíhi kixin tí yaon tsjixín la itsi chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntáchro asén sín. ⁴ Tsjančankí sín nkehe kónhen tí nkehe tsíntáchro Cristo kixin tsokjan ch'án, kixin desde ik'uén tí sín tsik'axrjenixinni k'uejó ósé la xíkaho naḡa sítóhen éxi tíó k'óna chjasintajni. ⁵ Tí sín a titekakonhya sín kixin ósé k'uenixja Dios ntá k'óna nkajní la ko chjasintajni na mé kjuin tí ntá ntá kúitöhe nonte xamá. ⁶ A ntá tí ntá k'uitjáyanxín chjasintajni inaá. ⁷ A ntá tí nkajní la ko tí chjasintajni naḡa tjejó jie tjejóchónhen tsoche kixin xíkaha k'uetöan Dios kixin xrohí tsochexín tí yaon tsjixín tsitöexín ijje chojni la ko kaín tí sín jínahya tsjasóte sín.

⁸ A ntá kíchó ni, chrók'uitjáyanhyará kixin Ìnchéni tí injko yaon t'ikon ch'án éxi mil nánó la ko mil nánó t'ikon ch'án éxi injko yaon ó.* ⁹ Ntá Ìnchéni í séhya sinchexiteyá ch'án tí nkehe tsíntáchro ch'án la jehya éxi tjenkayáxin í so chojni kixin ó má sé tjejóchónhen sín. Náhí. Jehí tjechónhen ch'án kixin

ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xíchge itsi tí tie. A ntá tí nkajní ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajní na mé ts'itjáyan tsoche, la ko tí chjasintajni tsoche la ko kaín nkehe síin.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráxinkáonrá Dios. ¹² Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajní tsoche, la ko kaín nkehe tsoxíka ts'itjáyan kixin imá tsosóa. ¹³ A ntá jeheni tjejóchónhenni nkajní nixin la ko chjasintajni nixin éxí tsintácho Dios kixin tsjanjon ch'án. A ntá ntilha la mé imá náxrjón la ko kjuaxróxin ts'ixin tí chojni jína.

¹⁴ Méxra xikaha kichó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkójina chrók'uejorá kixin ts'ikon Dios kixin kjuaxróxin tjejorá chontahará jie. ¹⁵ Chrókónohará kixin naxa tjechónhen Ìnchéni, tjokahya itsi ch'án kixin í so chojni naxa chrókuitekaon sín ch'án. Kjaxin xikaha tsíkjin tí kichó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xikaha. ¹⁶ Jnkójnko tí xroon tsíkjin ch'án nixja xikaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrxjén tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷ Méxra kichó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jínahya ntá chrókuítoghérá tí nkehe jína ntoá tinkáchónkirá. ¹⁸ Ichá jína antsí má chróchoxínrá Ìnchéni Jesu-cristo, mé tí nkexro sinchekaáni la ko antsí chrók'uánkí tí kjuachaxién ch'án chróchontará. Méxra tsjikosáyeheni ch'án ijie la ko jnkochrxín. Amén. Ó tjen.

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon i ts'ayéherá kixin tsonohará kuente tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikónxín konni. Kíxin tí nkexro mé k'uikónni la ko tí nkexro kuákóxín tjani, mé tí nkexro nixja tí tan tsjanjon kjuachón. ² Kjuákoxín ch'án nkexrí kjuák'e ch'án, a ntá kaín tí jeheni k'uikónni ch'án, mé xíkaha chrónkaxínni nkexrí kjuák'e ch'án; a ntá tjakuexínni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uikónni la ko tí nkehe kuínhinni, kixin kjaxinrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'éni Dios la ko tí Xjeen ch'án Jesucristo. ⁴ Mé xíkaha ikjinni tí nkehe i, kixin chrókuintaxín chrókócháhará la ko chrókóchéñi.

Dios mé tí xrohi

⁵ Tí tan i mé Inchéni Jesucristo kjuakohe tí jeheni, a ntá jie tjakoaharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xíkaha ch'iani kixin ch'ehyani tí nkehe ntáchroni. ⁷ A ntá tí xritjéjóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijnjé Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jina ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni. ¹⁰ A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xíkaha tsixroni la chaxínhya tsík'áyéñi tí tan kuente ch'án.

2

Cristo mé tsonixjayákonhenni ch'án

¹ Kíchóni, éxí xjanna t'íkuan tí jahará, a ntá tjékjian tí xroon ts'ayéherá tochrónka kixin chrókuásinhyará jie. A ntá tí jnkojínrá chrókuásinrá jie la chóntani ijnko nkexro tsonixjayákonhenni nkayakon It'éni Dios, tíha mé Jesucristo, la jehe ch'án mé ijnko nkexro jina. ² Jesucristo mé k'uenyákonhenni ch'án kixin tí jie chóntani; a ntá jehya ijéni ó. Náhí. Ijé kaín chojni síin chjasintajni.

³ Tí tsitekaonni tí nkehe k'ueñoan Dios ntá tsonoexínni chaxín kixin chóxinni ch'án. ⁴ A ntá jnkojín nkexro ntáchro kixin chóxin Dios, a ntá titekakonhya tí nkehe tsík'etöan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etöan Dios la chaxín tjuèhe Dios; mé xíkaha noheni kixin chaxín jnkokoá tjejókoni ch'án. ⁶ Tí nkexro ntáchro kixin chaxín tinkáchónki Dios chrókuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'etōan Dios. Náhi. Tíha mé tí nkehe k'uayéherá tí xrankíxixín, mé tí mandamiento ósé tjen, mé tí nkehe ó tsíkinhínrá. ⁸ Kjánchó tí nkehe ikjian mé yóhē ijnko nkehe nixin, éxí kjuakoxin Cristo mé xíkaha tjakoxinni, kixin tí sítíe la tinkák'itjáyán kixin ijie la ó t'inkaséyanxín tí xrohi chaxín.

⁹ A ntá tí nkexro tsonáchro kixin ixri tí t'inkaséyan, a ntá naḡa nínkakonhen kichó, na mé tí xíkaha naḡa itjen tí sítíe a. ¹⁰ A ntá tí nkexro tjuèhe kichó mé tjen tí t'inkaséyan, a ntá xíkaha jína tjen, chóntahya jie la chrókjuachruèhya ch'án ninkexró kixin chrókjuasin sín jie inaá. ¹¹ A ntá tí nkexro nínkakonhen kichó mé tjejó sín la ko ixri sín tí sítíe a la ko noehya sín nketí nó sátsji sín kixin tí sítíe la kjuích'éna ntakótán sín.

¹² Éxí xjanna t'íkuan tí jahará, la méxra tjékjian tí xroon ts'ayéherá kixin tsonohará kixin kjuachaxin ihníe Dios kjuínchetjuáxinrá tí ijjárá kixin k'uenyákonhenni Ínchéni Jesucristo. ¹³ Jahará it'é xjan, ikjian tí xroon ts'ayéherá jahará kixin choxínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéherá jahará kixin kjuachará kixin kjuachahya tí Jínahya chrók'uetuānhanrá.

Ikjian tí xroon ts'ayéherá jahará chánjanrá, kixin choxínrá It'éni. ¹⁴ A ntá jahará it'é xjan ikjian tí xroon ts'ayéherá kixin ó choxínrá tí nkexro itjen tí xrankíxixín tí naḡa t'ónahya chjasintajni. Ikjian tí xroon ts'ayéherá jahará ntasoírá, kixin naḡa fuérterá, la ko k'uayéherá tí itén Dios, la ko kjuachará kixin kjuachahya Tsochren chrók'uetuānhanrá.

¹⁵ Chrótjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éni Dios. ¹⁶ Kixin ninkehó tí nkehe chrókjuanjon chjasintajni chrókuixín tí tjen It'éni Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e asénni tí nkehe ts'íkonní, la ko tí kjuahnke xrikoni kixin itsjé nkehe chróchóntani. ¹⁷ A ntá tí chjasintajni sítinkákjeje la ko tí nkehe jínahya tjenkaḡáxin chojni; a ntá tí nkexro nchexitéyá tí nkehe tóxrjínhin Dios mé ts'ejó sín jnkochrízín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuan tí jahará, la chrókonohará kixin ó kuichjina tí yaon tsjixixín. Jahará ó kuínhínrá kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín. ¹⁹ Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhi. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naḡa chrók'uejókoni sín jnkokoá. A ntá xíkaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéherá kaín rá, ntá jie tiénxinrá intsí kuènte ch'án. ²¹ Ikjian tí xroon ts'ayéherá kixin ó nohará tí nkehe chaxín, jehya kixin chrókonohayará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'éni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra t' nkehe tsíkinhínrá tí xrankíxixín la chróxráxinkáonrá jnkochrín. A ntá xíkaha tí chróxráxinkáonrá jnkochrín tí nkehe tsíkinhínrá tí xrankíxixín, la kjaxín xíkaha jnkokoá chrókuinkachónkirá tí Xjeen Dios la ko tí It'é ch'án. ²⁵ Kíxín Jesucristo tsíntáchro ch'án kíxín tsjanjon ch'án tí kjuachón jnkochrín.

²⁶ Méxra xíkaha tjékjan tí xroon í ts'ayéherá kíxín chrókónohará kuènte tí sín tjinkaon chrókjuit'ayahará. ²⁷ Kjánchó jahará la ó chontará Nchakuen Dios tsítjehará Jesucristo, a ntá xíkaha la í t'ichjánxínnya kíxín ókjé nkexro chrókuakohará, kíxín tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuítóéhyará chrókuinkachónkirá Cristo, kíxín tió tsi ch'án la antsí chróchoxínrá ch'án la ko chrókósuàhyará chrókóchjinará tió tsi ch'án, ²⁹ kíxín ó nohará kíxín Jesucristo la jína ch'án. A ntá chrókónohará kíxín kaín nkexro jína la xjeen Dios tíha.

3

Tí sín xjeen Dios

¹ Chrókónohará kíxín It'éni Dios, imá tjuèhe tí jeheni kíxín nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kíxín jehe sín la xráxín chónhya sín Dios. ² Mé xíkaha kíchó ní, ó tsík'ónani xjeen Dios, a ntá naxá tjakoxínnya ch'án nkehe tsonhenni tí tsjixixín. Kjánchó ó noheni kíxín tió itsi Ìnchéni Jesucristo la ts'ónani éxí tí jehe ch'án, kíxín ts'íkonní kíxín nkexr'í tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijíé sín kíxín tsotjóa sín kíxín jehe ch'án la tjóá ch'án.

⁴ Kíxín kaín tí nkexro tjasin jie mé jínahya ch'e sín, kíxín tió tjasin chojni jie la mé xíkaha kuítekakonhya sín tí ley a. ⁵ Jahará ó nohará kíxín Jesucristo kui chjasintajni kíxín tsjatsen ch'án tí ijíéni, a ntá jehe ch'án la ninkehó jie chóntahya ch'án. ⁶ Mé xíkaha kaín tí sín chaxín tinkáchónki tí jehe ch'án la mé tjasinnya sín jie; a ntá kaín tí sín tinkákjasin jie la tsík'íkonhya sín ch'án la ko xráxín chónhya sín ch'án. ⁷ Éxí xjanna t'íkuan tí jahará; méxra chrókuítóéhyará kíxín ninkehró chrókjuit'ayahará; a ntá tí nkexro ch'e nkehe jína la jína ch'án, kíxín Ìnchéni la jína ch'án. ⁸ A ntá tí nkexro xritjasin jie la mé kuènte tí Jínahya; kíxín tí Jínahya mé kjuankíxín kjuasin jie desde tí xrankíxixín k'óna chjasintajni. Méxra tí Xjeen Dios mé kui chjasintajni kíxín sinchek'itjáyan ch'án kaín tí xra kjuich'e tí Jínahya.

⁹ Nijnko tí chojni tsík'axrjeníxín Dios naxá chrónkákjasin jie, kíxín ó chóna tí kjuachón kjuanjon Dios; la í xitjahya naxá chrókuasin jie kíxín ó tsík'óna xjeen Dios. ¹⁰ Mé xíkaha tónoxín kíxín nkexro tí xjeen Dios la ko nkexro tí xjeen tí Jínahya, kíxín tí nkexro ch'ehya tí jína la ko tjuèhya kíchó mé jehya xjeen Dios tíha.

Chrótjuèheni kíchó ní

¹¹ Méxra tí tan tsíkinhínrá tí xrankíxixín mé tíhi, kíxín chrótjuèheni kíchó ní. ¹² Chrókuich'ehyani éxí kjuich'e ch'ín Caín, kíxín jehe ch'án mé kuènte tí Jínahya, kíxín k'óyán ch'án tí kíchó ch'án. ¿Nkekuènte kíxín k'óyán ch'án? Kíxín tí ch'ín Caín la tí nkehe jínahya kjuich'e ch'án, a ntá tí kíchó ch'án la kjuich'e ch'án tí nkehe jína.

¹³ Kíchóni, chróchrakonhyará tí nínkakonhanrá tí sín siín chjasintajni. ¹⁴ A ntá noheni kixin k'uat sínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxi tsík'en sín xikaha xritjejó sín. ¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochrín. ¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. ¹⁷ A ntá tí tjen ijnko nkexro rico t'íkon kixin ijnko tí kichó ch'án t'ichjánhinhin nkehe, a ntá tí tsjinkítsahya tí kichó, ¿a ntá nkexrí chró tjuèhe ch'án Dios kaín asén ch'án? ¹⁸ Éxi xjanna t'íkuan tí jahará, méxra chró tjuèxinhyani tí kichó ni tí tan náxrjón chrónixjani ó. Náhí. Chrókjuakoxinni tí nkehe jina chrókjuich'eni.

Jína tsochjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxi tjínkaon Dios. ²⁰ A ntá tí tjoni asénni kixin chónani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xikaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyèni tí nkehe k'ueṭoan ch'án la ko ch'eni tí nkehe tóxrjínhin ch'án. ²³ Tí nkehe tsík'ṭoan ch'án la mé tíhi kixin chrókuitekaonni tí Xjeen ch'án Jesucristo, la ko chró tjuèheni kichó ni éxi k'ueṭoan ch'án. ²⁴ Tí nkexro nchexiteyèhé tí nkehe k'ueṭoan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókoni ch'án kixin tí Nchakuen ch'án tsíkjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kíchóni, chrókuitekákonhyará kaín tí sín ntáchro sín kixin Nchakuen Dios mé níxjaxín tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhi, kixin tí chjasintajni la ixri nchónhya chojni ch'ia, ntáchro sín kixin níxja sín tí itén Dios. ² A ntá xikaha mé chrókónoaxínra kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chóna sín Nchakuen Dios. ³ A ntá tí nkexro titekakonhya kixin xikaha tsíki Jesús, na chónahya sín Nchakuen Dios. Náhí. Chóna sín tí nchakuen tí nkexro nínkakonhen Cristo. Jahará ó kuínhínra kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekáonra Dios, a ntá kjuachará kixin kjuachahya tí sín ch'ia chrók'ueṭoan, kixin tí nkexro tjejókoará la imá t'ṭoan, a ntá tí nkexro t'ṭoan chjasintajni la kánhyó t'ṭoan.

⁵ Kixin jehe sín la kuènte chjasintajni ó, méxra níxja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín. ⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjínkakonhya sín chrókuinhin sín tí nkehe tjakoni. A ntá tíha mé tjatsoanxinni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chró tjuèheni kichó ni, kixin tí tjuèheni kichó ni mé tixín tí tjen Dios. Kaín nkexro tjuèhe kichó mé xjeen Dios, la ko chóxin Dios. ⁸ A ntá tí nkexro tjuèhya kichó na mé chónhya Dios kixin Dios la xráxin tjuèhe chojni.

⁹ Dios la ó kjuakoxin ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxinni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uétjuèheni tí jehe ch'án. Náhí. Jehe ch'án mé xráxín tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xíkaha Dios tjuèhe tí jeheni, a ntá kjaxinni jeheni xíkaha chrótjuèheni kíchó ni. ¹² A ntá Dios la ninkexró k'uikonhya. Kjánchó tí chrótjuèheni kíchó ni la Dios ts'ejókoni ch'án, a ntá tsjinkitsa ch'án kixin chaxín tsotjuèheni kíchó ni. ¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kixin It'eni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkójín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xíkaha mé noexínni la ko titekaonni kixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xíkaha chaxín chrótjuèheni Dios kixin ntá chróchrakonhyani tí yaon tsitqexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. ¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkójín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni. ²⁰ A ntá jnkójín nkexro ntáchro kixin jehe mé tjuèhe Dios, a ntá tuénxín nínkakonhen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. ²¹ Tíhi mé tsík'etqan Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etqan ch'án, a ntá noheni kixin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxín kixin chrókuitekaonni tí nkehe k'uétqan ch'án, kixin tí nkehe t'etqan ch'án la jehya ijnko nkehe imá xra ⁴ kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Ìnchéni la mé tsjachaxínni la tsjachahya tí chjasintajni. ⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etqenhen sín.

Tí nkehe chrónkaxín nkexrí tjen tí Xjeen Dios

⁶ Tíó kui Jesucristo la kjuakoxin tí intá la ko tí jni. La jehya kixin jehó tí intá kjuakoxin ch'án. Náhí. Kjaxin intá la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá. ⁷ Síin iní nkexro chrónkaxín nkaya nkajni: ijnko la It'eni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá síin iní tí nkehe chrónkaxín ntihi chjasintajni, mé tí Nchakuen Dios, la ko tí intá la ko tí jni; a ntá tí iní mé jnkokón chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetqan

kíxin táha la Dios tsíchrónkaxín kíxin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kíxin Dios la ch'ia ch'án kíxin kuítekakonhya sín tí nkehe tsintáchro Dios kíxin nkexrí tjen Xjeen ch'án. ¹¹ Tí nkehe tsíchrónka Dios mé tíhi kíxin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án. ¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kíxin jahará ó titekáonrá tí Xjeen Dios, kíxin mé tsonoxínrá kíxin chaxín chontará kjuachón jnkochrín.

¹⁴ Tíhi mé chóxixínni Dios kíxin noheni kíxin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. ¹⁵ A ntá tí xíkaha ó noheni kíxin Dios tjetinhin tí nkehe nixjeheni ch'án, a ntá kjaxin ó noheni kíxin ó chóntani tí nkehe kjuancheheni ch'án.

¹⁶ A ntá jnkojínrá ts'ikonrá ijnko kichuára tjasin jie, a ntá tí jehya ijnko jie chrók'uenxín ch'án, la chrókjuancheherá Dios kíxin chrókjuinchexraxinkaon ch'án kíxin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kíxin íchá jína chrókjuanchehyará Dios kíxin chrókjuinkítsa tí ch'ín a. ¹⁷ Kaín nkehe jínahya la ijie tíha. Kjánchó síin jie ts'énxínnya chojni.

¹⁸ Ó noheni kíxin tí nkexro tinkáchónki It'éni Dios tjasinnya sín jie, kíxin tí Xjeen Dios tjinkítsa tí jehe sín, a ntá tí Jínahya tsjachahya tsjachroe tí jehe sín.

¹⁹ Ó noheni kíxin Dios t'ayakonhen tí jeheni, a ntá tí Jínahya chóna kjuachaxin t'etuènen kuenté chjasintajni.

²⁰ Ó noheni kjaxin kíxin Xjeen Dios kui, la ko kjuínkítsa ch'án tí jeheni kíxin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín. ²¹ Éxí xjanna t'íkuan tí jahará, la títòherá tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakanhen nínko mé ikjian tí xroon ts'áyéhe tí sín tsíkjeýá Dios tójnkotsé sín ntiha, la mé chaxín tjuahá sín: a ntá jehya janhván, la kjaxin kaín tí sín chóxin tí tan chaxín. ² Tjuahará tí jahará kixin tí tan chaxín ó chónta asénni, tíha mé ts'ejókoni jnkochrixin. ³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókuiikonóahará ch'án la ko chrótjahará ch'án kjuaxróxin kixin chaxín tjuahará ch'án.

⁴ Imá chàna k'uikuan kixin isorá tjejorá títeáonrá tí nkehe chaxín, éxi tsík'etóan It'éni Dios. ⁵ A ntá jie jahará kichó ni, xrjanóahará kixin chrótjuèhéra kichuára. Méxra xikaha tjékjian tí xroon i, la jehya ijnko nkehe nixin tsík'etóan Dios. Náhi. Tíha la mé tí nkehe tsík'áyéheni tí kjuák'e Ìnchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxi tsík'etóan Dios; a ntá tí nkehe tsík'etóan Dios la mé ó tsikinínrá jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xikaha mé ixri xrich'ia la ko nínkakonhen Cristo. ⁸ Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhéra tí nkehe tsjintaxín ts'ayéhéra.

⁹ A ntá tí síin ijnko nkexro kuitóhe tí nkehe kjuako Cristo ntá kjuichroe la mé chóntahya sín Dios; a ntá tí nkexro títoehya tí nkehe kjuako Cristo mé chónta sín It'éni Dios la ko tí Xjeen ch'án. ¹⁰ A ntá jnkojín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitóhe tí sín a ntóará la ko ni chrónixjeéhyará sín jnkojína. ¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxi tóxrjnhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnkotsé kuente nínko ntihi, mé tí sin kjaxin tsíkjeýá Dios, mé nixjahará sín. Amén. Ó tjen.

Tí nixin xroon tsíkjin ch'ín Juan

¹ Janhan mé tí nkexro t'ayakonhen n̄nko mé tjékjjan tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuəḡa.

² Kíchóni, tjáncháḡa Dios kixin éxi jaha jina tjen tinkachónkia Ìnchéni la jina chrók'uaxrje kaín xra ch'e la ko jina chrókjuak'e jaha. ³ Imá kóchàna tió kui iso tí sín kíchó ni chrónka sín kixin jina tjákoḡian tí tan chaxín. ⁴ Kohya ijnko nkehe antsi má nchechàna éxi tió kuñḡan kixin tí sín t'íkuan éxi xjanna tjejóititekaon sín tí tan chaxín

⁵ Kíchóni, chaxín jina tjech'e xra tjínkita tí sín kíchó ni la ko antsi tjínkita tí sín tsíkjin ókjé chjasin. ⁶ A ntá tí tsíkójkotsé tí sín kíchó ni la tsíchrónka sín kixin nkexri tjuèhé tí jehe sín. Jaha chrókjuinkita tí nkehe t'ichjánxin sín tí sátsji sín. Xikaha mé tóxrjinhin Dios. ⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuente tí sín chónhya Dios. ⁸ Méxra tí jeheni t'ichjánxin chrókjuinkitsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótfes

⁹ Janhan ikjian ijnko xroon k'uáyéhe tí sín tójnksé ntiha. Kjánchó ch'ín Diótfes kuítেকakonhya ch'án tí nkehe k'uətuənhenni ch'án kixin tjinkaon ch'án chrók'uətoan ch'án jehó ch'án. ¹⁰ Méxra xikaha tí sátsjia ntiha tsonixjəḡa ch'án kixin tí kjuach'ia ntáchro ch'án t'ántaxinhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjon kjuachaxin la t'ətoan ch'án kixin tsjanjonhya sín kjuachaxin la ko t'ətoan ch'án kixin tsəchjinahya sín tí tójnksé tí chojni.

¹¹ Kíchóni chrókjuákoḡinhya tí nkehe jínahya. Íchá jina chrókjuákoḡian tí nkehe jina. Tí nkexro ich'e nkehe jina na mé kuente Dios. A ntá tí nkexro ich'e nkehe jínahya la mé tsík'ikonhya sín Dios.

Jina tjákoḡin tí ch'ín Demetrio

¹² Kaín sín ntáchro sín kixin jina tjákoḡin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixin nixja ch'án

¹³ Janhan chonta nchónhya nkehe tsontáxrjan, kjánchó tjínkaonhya tsokjian ó ¹⁴ kixin tjínkavan tjoka ts'íkuan tí jaha, a ntá tsjoni.

¹⁵ Kjuaxroxin chrókjuak'e jaha. Kaín nkexro choxian ntihi nixjaha sín. Tətuḡanhan nixjéḡe jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'aha xra Jesucristo, la sana mé Jacobo la mé ikjian tí xroon í ts'áyehé tí sín tsíkjejá It'eni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikónóghará ch'án ntá ts'ayehérá kjuaxróxin kixin tjuahará ch'án.

Tí sín ntoáhya tjako (2 Pedro 2.1-17)

³ Kíchóni, imá tjínkavan tsokjian tí xroon ts'ayehérá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayehérá tsoxrjanóaxínrá kixin jína chrókiéxinrá nkehe chrókuáteherá kixin nkexrí tinkachónkirá Ìnchéni kixin tí fe la mé ónaá tsík'áyehó tí sín tsíkjinchetjóá Dios. ⁴ A ntá jie ó kuik'ixenhen iso sín ch'ia tí tjejorá. A ntá ósé nixja xroon itén Dios kuénte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etóan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyán ch'án tí sín kuítekakonhya sín tí jehe ch'án. ⁶ Kjaxin tí sín ángel kuítekakonhya sín tí k'uetóan Dios ntá kuítóhe sín tí kjuachaxin tsíkjanjon Dios tsík'áyehé sín la ko kuítóhe sín tí k'uek'ejó sín jína, a ntá jie Dios k'uetóan ch'án kixin ts'ejóchjina sín tí sítié la ts'ejóchónhen sín tsijia tí yaon tsitoexín ijje sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítekakonhya la kjuasinko sín jie chojni chjin ókjé la ko kjuasinko sín jie kíchó sín kjónté jnkokón ntoa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochríxín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítekakonhya sín tí kjuachaxién Ìnchéni la ko chrók'uantaxínhin sín tí sín ángel chóna kjuachaxin t'etóan. ⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuénte ch'ín Moisés.† A ntá jehe ch'án kjónté xikaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.” ¹⁰ A ntá tí chojni ní t'ántaxínhin sín tí nkehe tienxínhya sín la tjenkayáxin sín éxi ko tienxínhya nchexiteyehé tí nkehe ntáchro asén, mé xikaha tí nkehe jínahya kjuích'e sín ts'itjáyánxin.

¹¹ jNòá tí jehe sín! Chréhe sín éxi kjuích'e ch'ín Caín.‡ Tjinkaon sín chrókjuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uéen ch'ín Coré kixin kuítekakonhya sín. ¹² Ijnko kjuatósuehe kixin tjejóyáxanxin sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuj chóntahya ntá tjakáko xrinto; la ko éxi ijnko nta t'ónahya to tí

* 1:5 Éxodo 12.51 Números 14.29-30 † 1:9 Deuteronomío 34.6 ‡ 1:11 Génesis 4.3-8 § 1:11 Números 31.16 * 1:11 Números 16.1-3

nitjó chrók'óna to, éxí yáya tsík'len tsík'axrjenkíxin nuèé. ¹³ Jehe sín na mé éxí ntayaon jiehe sixróji lóxrjo ó chóntahya ntá jína mé xíkaha chónkó tí nkehe ch'e sín mé ijnko kjuatósuèhe tíha; la ko éxí konotsé kjuíchroe sákjuí ókjé; a ntá tjechónhen sátsji sín tsjasóte sín sítie jnkochrín.

¹⁴ A ntá kjuák'e ch'ín Adán, a ntá yatoxin chr'éxin kui ch'ín Enoc nixjxin kjuachaxien Dios ntácho ch'án kixin k'uíkon ch'án itjen Ìnchéni kuikao nchónhya mil tí sín ángel kuente ch'án, ¹⁵ kixin sinchekitogéxin ch'án ijje kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhin sín tí jehe ch'án. ¹⁶ Xrácín tóxrjénhya sín nkehe sítónhen la ko ixri sín tjonta kíchó sín. Jehó xritjeyá sín tí nkehe tóxrjínhin sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókuinjitsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kíchó ni, xrácinkáonrá kixin tí sín tsíkjeyá Ìnchéni Jesucristo ¹⁸ ntácho sín kixin tí yaon tsjixixín tsjejixin chjasintajni ts'ixín chojni tsitekakonhya sín ts'ántaxínhin sín tí nkehe tjínkaon Dios la ko tsotjínkaon sín sinchexiteyéhé sín tí nkehe jínahya ntácho asén sín ó. ¹⁹ Tí sín a mé tjínkaon ts'óxika tí sín jnkokoá tjejótojnkotsé kixin naxa tóxrjínhin sín sich'e sín nkehe síin chjasintajni kixin chóntahya sín Nchakuen Dios.

²⁰ A ntá jahará kíchó ni tjuahará, antsí jína chrók'uejorá tinkachónkirá Ìnchéni. Chrónixjexínrá Dios tí kjuachaxin kuente Nchakuen ch'án. ²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókujikonóghérá tí sín naxa tienxínhya. ²³ Jnkojin sín chrókuinjchekaará chrókuakitsjekjanxínrá sín chríkjan xrohi, la ko chrókujikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jie.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jie la ko tíó tsjjini tí tjen ch'án la ninkehó jie chróchóntahyani, imá tsóchéni tí tjen ch'án ntíha. Kjuasáyé Dios imá chóna ch'án kjuachaxin t'etqan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

18

Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuénte ch'án kixin nkexrí chrókónohe tí ch'ín Juan ch'ehe ch'án xra. ² A ntá jehe ch'án mé k'uituenhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsik'ikon ch'án nkexrí kjuakoxin Dios.

³ Náxrjón tjejó tí sín nchekuáxin tí xroon i la ko kjaxin tí sín tjejótinhin tí palabra chrónka nkehe tsonhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéherá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxin tí yato Nchakuen ch'án tjejó tí trono t'etoxanxin ch'án mé tjanjon kjuaxróxin.

⁵ La ko kjaxin kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixixin xechón kjónté tsík'en kixin tjetoan ch'án kixin t'etuenhen ch'án kjónté kaín tí sín rey la ko tí sín t'etoxan sín chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jje chóntani.

⁶ Jehe ch'án mé tsikjanjon kjuachaxin tsik'ónani nchaf'á kixin sich'ehehi xra It'éni Dios. Tí kjuachaxin kuénte ch'án me ts'etoxan jnkochríxín. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxin tí sín k'uékónínkakonhen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin sín chjasintajni tsotsjáanka sín tíó ts'ikon sín tí jehe ch'án. Mé xikaha tsonhen. Amén.

⁸ Janhan mé tí xrankixixin la ko tí tsjixixin éxi tí letra xrankixixin A la tsjixixin Zeta. Mé xikaha ichro Ìnchéni Dios, tí nkexro imá t'etoxan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsik'ikon ch'án kixin Cristo chónka kjuachaxin

⁹ Janhan Juan mé ijnko kíchó tí jahará mé tjékjan Jesús la ko tí kjuachaxin kuénte Dios chonta la mé jahará la ko jeheni jnkokón tjejótjasóteni la jehe ch'án tjinkitsani kixin tsjachani. Kjuakua itén Dios éxi chrónka Jesucristo la mé tíha kjuak'échjinaxián tí isla it'in Patmos. ¹⁰ A ntá ijnko yaon xraxinkakonxinni Ìnchéni la ikui kjuachaxin Nchakuen Dios tí tjén tí janhan la kuñhan kixin nóton tí janhan ijnko nkexro nixja imá itsen éxi itén ijnko trompeta. ¹¹ Mé ntácho ch'án kixin:

—Janhan mé tí xrankixixin la ko tí tsjixixin éxi tí letra xrankixixin A la tsjixixin Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjaha kixin nkexro itén tí tjenixjana ntá xrinahya k'uíkuan yato candelero tsík'óna chica oro. ¹³ A ntá chríkjan tí yato candelero k'uíkuan

ijnko nkexro éxí yóhé Xjeen Dios tsík'óna chojni. Ntá tí iké ch'án la ika kjinjin tjenkáya ch'án hasta tsíkóyóhé toté ch'án la ko mé chóna ijnko cinta jehó oro tjenkáni ntakuin ch'án. ¹⁴ Tí kaxihí ch'án la tjóá éxí kaxree kolélo tjóá o éxí chrinta tsjehe la ko tí ikon ch'án la éxí xrohi nene tsjehe. ¹⁵ Ntá tí toté ch'án la éxí chica sine tjákiní na ntá tsík'axrjexín tja. A ntá tí itén ch'án la itsen éxí tóvntó nchónhya ntarío. ¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrjexín chica espada iyo, yánjin taté. A ntá imá tjákiní tsjehe ikon ch'án la éxí yaon t'inkaséyanxín imá.

¹⁷ A ntá tí k'uíkuan xikaha la kjuáchr'ítsinka toté ch'án éxí tsík'éna. A ntá jehe ch'án kjuak'etja tja ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankíxixín la ko tí tsjixixín. ¹⁸ Janhan tí nkexro tjechón. Ik'uéñ, a ntá ijie la tjéchuán inaá la itjén jnkochríxín. Amén. Janhan chonta llave kuènte chojni its'en la ko kuènte tí siín tí sín tsík'en. ¹⁹ Méxra ikjian jaha tí nkehe k'uíkuan mé tí nkehe siín ijie la ko tí nkehe tsonhen chr'éxin. ²⁰ Ninkexró k'uékiénxínhya nkexrí t'axrjexín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjexín kixin tí yato ángel t'ayakonhen tí yato njnko la ko tí yato candelero k'uíkuan me kjaxín t'axrjexín tí yato njnko.

2

Tí tan k'uáyéhe tí yato njnko: Tí tan k'uáyéhe tí sín chjasin Éfeso

¹ Tsokjian tí nkehe ts'áyéhe tí ángel t'ayakonhen tí njnko Éfeso: “Xikaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xikihí: ² Janhan nòna kaín tí xra ch'erá la ko nòna kixin tóxrjánhyará tí sín jínahya. Janhan la ó nòna kixin kjuich'erá prueba tí sín ntáchro kixin apóstol tí jehe sín la ntá jehya la ntá kónoxín kixin xrich'ia tí jehe sín. ³ Nchónhya kjuasótiará la kjónté chonhénra kóninkákonhyará la imá kjuich'erá xra kixin tinkachónkirá njna la ko nunca kóxrjéhyará. ⁴ Kjánchó tjánchía ijnko jie tí jahará kixin tinkachónkihyará éxí kjuankíxixínra k'uétjuanará. ⁵ Méxra chrórxáinkáonrá kixin ó kujtohéra tí k'uétjuanará la ntá chrókuínkirá tí nkehe tjenkayáxinra la ko chrókuich'erá xra éxí tí kjuankíxixínra. A ntá tí náhi, la tjoka tsjasán la tsjakíyan tí candelero tí tjeorá tí nunca tsjínkihyará tí nkehe jínahya tjenkayáxinra la tí tsokjanhyará tsórxáinkáonrá Dios. ⁶ Kjánchó chrókonohará kixin tóxrjina tí nkehe tjejoch'erá kixin tóxrjánhyará tí xra ch'e tí sín nicolaítas kixin kjaxin janhan nínkakonhan tí nkehe ch'e sín. ⁷ Tí nkexro tjinkaon chrókuinhin la chrókuinhin sín tí nkehe nixjehe Nchakuen Dios tí njnko ntáchro kixin: Tí sín tsjacha sinchexiteyána sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasin Esmirna

⁸ Ikjian tí nkehe ts'áyéhe tí ángel t'ayakonhen tí njnko Esmirna: “Xikaha ichro tí nkexro xrankíxixín la tsjixixín, mé tí nkexro ik'uéñ la ntá jie tjechón: ⁹ Janhan la ó nòna kaín nkehe tjejoch'erá. Ó nòna kixin nkexrí tjejótjasótiará la ko ó nòna kixin nòará kjánchó jehya. Náhi. Jehe sín mé tójnkoté sín tí njnkoé tí Jínahya. ¹⁰ Kjánchó chrakonhyará kjónté tsjasótiará. Tí ch'in Tsochren tsochr'ánxanhanrá ntóechiso jnkojín tí jahará kixin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókujtoéhyará Dios

kjonté chrók'uennrá ntá janhan tsotjáhará tí kjuachón chr'éxin. ¹¹ Tí nkexro tjínkaon chrókuinhin la chrókuinhin tí nkehe nixjehe Nchakuen Dios tí núnko: Tí nkexro tsjacha sinchexiteyána sín la í tsjasótehya, la tí yóxin its'en chojni la í ts'enhya tí jehe sín."

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí núnko Pérgamo: "Mé xikaha ichro tí nkexro chóntha chica espada yánjín taté: ¹³ Janhan ó nóna kaín nkehe tjeoch'erá la ko ó nóna nketí tjeorá kixin tí tjeorá la t'etöan ch'ín Satanás la kjonté la jína kuinkachónkirá tí janhan. Jahará kuitöehyará kuinkachónkirá tí janhan kjonté tí yaon tsík'en ch'ín Antipas, ijnko nkexro kjuínchexiteyána jína. Jehe sín tsík'óyánxin sín ch'án tí tjeorá ntiha kixin ntaha t'etöan ch'ín Satanás. ¹⁴ Kjánchó janhan tjánchía ijnko jie tí jahará kixin iso nkehe ntoáhya ch'erá. Siín ntiha chjasin Pérgamo tí tjeorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuñhen ch'án tí ch'ín Balac kixin tí sín israelita chrókjuasin sín jie chrókjóné sín tí nkehe tsíkjokehe sín tí nkehe tsíkjanoya la ko chróchóntha sín chojni chjin ókjé chrókjuasinko sín jie. ¹⁵ Kjaxin xikaha tí tjeorá la siín iso sín tjinkakonhya sín tsítóhe sín tí nkehe tjako tí sín nicolaitas. Janhan mé tjínkaonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhi, la tjoka tsjasán tí tjeorá la tsjánjonkianxian sín tí espada t'axrxéxin ir'va. ¹⁷ Tí nkexro tjínkaon chrókuinhin la chrókuinhin sín tí nkehe nixjehe Nchakuen Dios tí núnko ntácho kixin: Tí nkexro tsjacha sinchexiteyána sín la tsotjáha sín kjuachaxin chrókjóné sín maná tjechónhen la ko tsotjáha sín ijnko xro tjóá la tí xro la ts'ínixín ihnjé sín núnxin chónhya ninkexró. Jehó tí nkexro ts'áyéhe mé tsoñohe."

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí núnko chjasin Tiatira: "Mé xikaha chro tí Xjeen Dios, tí nkexro ikon éxi yóhe xrohi nene sít'axrxéxin la ko toté éxi chica sine tjákiní tsjehe. ¹⁹ Janhan ó nóna kaín tí nkehe tjeoch'erá la ko ó nóna kixin tjuañará la ko tinkachónkirá tí janhan la ko ó nóna tí xra tjeoch'erá la ko ó nóna kixin tjeochonhénrá tóninkákonhyará. La ko ó nóna kixin antsi tjeoch'erá xra ijie ntá tí kjuankixixínrá la kénhyó. ²⁰ Kjánchó tjánchía ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntácho tjan kixin nixja tjan itén Dios kjánchó ch'iyehé tjan tí sín ch'ena xra kixin kjaxin sín chrókjuasinko sín jie chojni chjin ókjé la ko chrókjóné sín tí nkehe tsík'óyán sín tsíkjokehe sín tí nkehe tsíkjanoya. ²¹ A ntá janhan ó kuitöha tjan intsi kixin chrókjuinkí tjan tí tjenkayáxin tjan kjánchó tjinkakonhya tjan sich'e tjan xikaha la tjinkakonhya tjan chrókuítóhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsoñhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjínkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí núnko tsoñoexín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xra kjuich'erá. ²⁴ A ntá tí í sorá tjeorá chjasin Tiatira tí chrehyará tí nkehe ntoáhya tjako sín la ko tjínkákonyará chrókónohará tí nkehe jínahya kuénte ch'ín Tsochren la xikahó la í tsétuanhyará í jnko xra. ²⁵ A ntá jahará la tí nkehe ó chontará la t'ayakonhénrá hasta tsokjan janhan. ²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkavan

xikaha chrókjuich'e sín na mé janhan tsjánjuan kjuachaxin ts'etuenhen sín kaín nación. ²⁷ Na mé xikaha T'aná mé chjina kjuachaxin tsétuan la kjaxin xikaha jehe sín mé ts'etuenhen sín tí nación yóhé chróchónta sín ijnko chica vara kixin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjahá sín tí konotsé tí tji nchítjen. ²⁹ A ntá ti nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí njnko chjasin Sardis: "Xikaha ichro tí nkexro chóna yato Nchakuen kuènte Dios la ko chóna tí yato konotsé: Janhan nòna kaín nkehe ch'erá, ó nòna kixin éxi tsík'en tí xra ch'erá kjónté ncheknerá kixin tjejochónrá. ² T'ayará. Naxá t'ayakonhénrá kjónté í tsjéhya tí nkehe kuítóhe kixin kjaxin tíha mero its'en. Ó k'uíkuān kixin tí xra ch'erá la t'íkon tí Dios kuèntana kixin ntoáhya. ³ Chróxráxinkáonrá tí nkehe tsíxrakohará la ko tíha chrókjuich'erá la chrókjanrá chróxráxinkáonrá Dios. A ntá tí naxá tjejochrinrá la tíháya tsjasán éxi ijnko síchee la tsonohyará nkesá tíha. ⁴ Kjánchó naxá síin iso chojni ntaha chjasin Sardis naxá kjuínchekjítahya sín iké sín la jehe sín la ts'ájikian sín kixin chóna sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxikahya ihnié sín chóna tí libro ts'inixín ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án. ⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí njnko chjasin Filadelfia: "Xikaha ichro tí nkexro tjóá la ko chaxín mé tí nkexro chóna llave kuènte ch'in rey David. A ntá tí tsakitjehé ch'án puerta la ninxeró tsjachahya ts'ikjéhe, a ntá tí ts'ikjéhe ch'án puerta la ninxeró tsjachahya tsakitjehé. ⁸ Janhan ó nòna kaín nkehe tjejoch'erá. Kjuaké tí tjejorá ijnko puerta xitjehé la ninxeró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. ⁹ Tí sín tsíkitekaoan Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrinkí totará la ntá tsonhe sín kixin chaxín janhan tjuahará. ¹⁰ Ó kuítekáonrá tí nkehe kuétuanhanrá la jina tjejorá la mé xikaha janhan ts'ayakonhanrá tí ichrén nkehe tsonhanrá tíó tsi tí nkehe tsonhen kuénté chjasintajni kixin ó jehí xikaha tsonhen kaín chojni tjejó chjasintajni. ¹¹ Janhan mé tjoka ts'inka. Méxra t'ayakonhénrá tí nkehe chontará kixin ninxeró chrókuakitsjahará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuènte njnko kuènte Dios kuèntana la nunca xitjahya sátsjixin sín ntíha. La janhan tsokjian ihnié tí Dios kuèntana tsjiko sín la ko tsokjian ihnié chjasén Dios kuèntana mé tí Jerusalén njxin tsixin nkajni tí tjen Dios kuèntana. Kjaxin tsokjian njina njxin tsochóna sín. ¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí njnko chjasin Laodicea: "Xikaha ichro tí nkexro chaxín ntoá mé tí nkexro chrónka tí nkehe chaxín.

Tí kjuachaxiën ch'án kjuích'énaxín Dios kaín nkehe. ¹⁵ Ó ñona kaín nkehe tjejoch'erá. Ó ñona kíxin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶ A ntá jahará la yásorá la jehya ikinrá la jehya sóará. A ntá ijie ir'vã ó tsikja tí jahará la ts'itjia. ¹⁷ Ntáchrorá kíxin jahará rícorá la imá jína tjejorá la ko ninkehó t'itjáyanhya tí tjejorá, ichrorá. Kjánchó chontahyará kjuachéhe la ko jehya jína tjejorá la ko ñonará la ko ntakótánrá la ko tjóchínrá. ¹⁸ Méxra ijie ntáxraxinkáonrá janhan sintakjihará tí nkehe oro náxrjón ts'ík'axrjéxín tjã kíxin ntá chaxín ts'ónará rico. La ko janhan sintakjihará ika tjóá kíxin ts'ínkayará ntá tsjiinhanrá kjuatósuehe kíxin í tjóchínhyará. La ko janhan tsjánjuan xroã kolirio tsjiankí ikonrá kíxin ts'ikonrá. ¹⁹ Janhan mé tsjéntuáha kaín tí sín tjuaha. Méxra íchá jína chrókjan sín chrókuinkáchónki sín Dios. ²⁰ Tsjeherá janhan itjén ntója puerta, tjé'eyã. A ntá jnkojín nkexro chrókuinhin tí tanná ntá chrókuakitjehe tí puerta ntá chrók'uixanhan ntóe sín la chrókjónékian sín la ko jehe sín la ko janhan. ²¹ A ntá tí sín chrókjuacha chrókjuinchexiteyãna la tsjánjuan kjuachaxin ts'ejókian sín tí tétóanxian ntiha la éxí xikaha janhan kjuacha ntá T'aná kjuanjon kjuachaxin tjékian ch'án tí tjen ch'án t'etóan ch'án ntiha. ²² Tí nkexro tjínkaon chrókuinhin la chrókuinhin tí nkehe nixjehé Nchakuen Dios tí njnko."

4

Tí sín tjikosáyehe Dios nkaya nkajní

¹ Ntá chr'éxin janhan k'uikuan ijnko puerta tjebrankehé nkaya nkajní. Ntá kujnhan ijnko itén nkexro éxí trompeta mé tí nkexro nixjana tí xrankixixín, ntá jehe ch'án nixjana ch'án, ntáchro ch'án kíxin:

—T'it'ótjen ntihi ntá tsjáqoha kaín nkehe tsõnhen chr'éxin.

² Ntá tuénxin ikui tí kjuachaxin kuente Nchakuen Dios k'uayáha ntá k'uikuan tí trono itjen nkaya nkajní ntá ntiha tjetjaxín ijnko nkexro. ³ A ntá tí ch'ín tjetjaxín tí trono mé tjákini tsjehe éxí ixro jaspe o ixro cornalina. A ntá jnkotatjen tí trono itjen ijnko konchécha tjákini tsjehe éxí ijnko xro esmeralda. ⁴ A ntá kjaxin jnkotatjen tí trono k'uikuan í so veinticuatro trono kjaxin tjejótjaxín veinticuatro sín táda, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuente Dios la ntiha sít'axrjéxín tí sítjónkixín la ko sítjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjaxin itjen ijnko ntayao éxí xroxro tsjehe.

A ntá tí jnkosiné la ko jnkotatjen tí trono tjejó noó nkexro tjejóchón chõnta nchónhya ikon nkayakon la ko nóton. ⁷ A ntá tí nkexro tjechón k'uikuan saoxín mé éxí koxra tsjehe. A ntá tí nkexro yóxin tóyóhe éxí koxinta, a ntá tí nkexro níxin tsjehe éxí chojni. A ntá tí noóxin la éxí kotjuanhnko xritjaká tsjehe. ⁸ A ntá jnkojnko tí noó nkexro tjejóchón chõnta injon kanengee sín la chõnta nchónhya ikon nóton la ko nkaxenhen, la nchakotjin la ko tie titóehya sín ntáchro sín kíxin:

Santo, santo, santo,

Ínchéni Dios, jaha chonta kaín kjuachaxin,

jaha xráxin tjen la ko itjen ijie la ko jaha ts'inka inaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehé sín ch'án chjéhe sín kjuasáyé tí nkexro

tjetjaxin tí trono mé tí nkexro tjechón jnkochrín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

¹¹ Inchéni Dios kuènteni, jaha la imá jina la t'ayéhe kjuasáya kixin tjikosáyahani tí jaha kixin tí kjuachaxin chonta; kixin jaha kjuich'éna kaín nkehe siín kixin jaha kórxjínhan xikaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uikuán ijnko libro mé tsíkjin sín nkaxenhen la ko nóton la ko mé tsíkjèxin yato sello. ² La k'uikuán ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jina chrókjuacha chrókuakitjehé tí libro la ko chróokhrítõn tí sello chóna?

³ La ninkexró ní nkajní o ní chjasintajni o ní chrínkí nonte tsjachahya tsakitjehé tí libro la ní komáhya sín. ⁴ A ntá janhan la imá tsjanka kixin naxa tónoxínhya ninkexró chrókjuacha chrókuakitjehé tí libro o chrókuinchekuáxin tí libro o chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxra k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehé tí libro la ko tsóchrítõn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uikuán tjexín toté ijnko Kolélo tsjehe éxi tsík'óyán sín mé chóna yato ntéé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjóxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsikaón chjincõ. Tíha mé oración nixjehé Dios kaín tí sín tsíkjinchetjóá ch'án. ⁹ Itsje sín nkehe níxin ntáchro kixin:

Jaha mé ijnko nkexro jina kjuacha kuákja tí libro la ko kóchrítuan tí sello; kixin tsík'óyán sín tí jaha la ko tí ijniá k'uenaixin tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjich'é nani reyes la ko nchat'á sich'e heni xra Dios kuènteni, la ko jaha tsíkjánjuan kjuachaxin ts'etõanni chjasintajni. Mé xikaha ichro sín.

¹¹ Ntá tuénxín k'uikuán la ko kuínhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin: Tí Kolélo tsík'óyán sín, tíha mé kjuacha k'uáyéhe kjuachaxin ts'etõan la ko k'uáyéhe tí nkehe tje te kuènte Dios, la ko tí kjuaxrexinkaon jina la ko kjuachaxin sich'e xra la ko mé xikaha tjikosáyeheni ch'án.

¹³ Kjaxin kuınhan kixin kaın nkehe kjuıch'ena Dios siın nkajni la ko chjasintajni la ko ti nkehe siın chrinki nonte la ko kaın nkehe siın ntayaon la kaın tiha me ntachro kixin:

Chjeheni kjuasaya ti nkexro tjetjaxin ti trono la ko ti Kolelo kixin chonta kjuachaxin jnkochrixin.

¹⁴ A ntá ti noó sín tjejóchón ntáchro sín kixin:

—Xikaha tsonhen. Amén.

La ko ti veinticuatro ti sín tada k'uejoxin toch'in sín la chjehe sín kjuasáyé ti nkexro tjechón jnkochrixin.

6

Tiyato sello

¹ A ntá k'uikuau kixin ti Kolélo kóchrítõn ti xránkixixin ti yato sello ntá kuınhan ijnko ti noó ti noó ti sín tjejóchón nixja ch'an éxi kjõnta, la ntáchro ch'an kixin:

—Xrákiá tsjehé.

² Ntá k'uikuau ijnko kokate tjóá. A ntá ti nkexro tjekjen ti kokate chonta ch'an ijnko arco ti tja ch'an la tsik'áyéhe ch'an ijnko corona. Jehé ch'an mé kjuacha ch'an la naxa xikjacha ch'an inaá.

³ A ntá ti Kolélo kóchrítõn ti yoxin sello ntá kuınhan ti nkexro yoxin tjechón ntáchro kixin: —Xrákiá tsjehé.

⁴ Ntá sákjuı í jnko kokate kjátse. A ntá ti ch'in tjekjen k'uáyéhe ch'an kjuachaxin tsjakjin ti kjuaxroxin siın chjasintajni kixin ntá chojni mé ts'óyan kichó sín kixin jehé ch'an mé tsik'áyéhe ch'an ijnko espada ijié.

⁵ A ntá ti Kolélo kóchrítõn ti nixin sello la ntá kuınhan nixja ti nixin nkexro tjechón ntáchro kixin:

—Xrákiá tsjehé.

Ntá k'uikuau ijnko kokate tié. A ntá ti nkexro tjekjen ti kokate chonta itja ch'an ijnko báscula. ⁶ La ntá kuınhan itén ijnko nkexro jnkosiné ti tjejó ti noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjanchó chrókjuınchek'itjáyanhya ti aceite la ko ti vino. (Tiha mé t'axrjéxin tsokjinta.)

⁷ A ntá ti Kolélo kóchrítõn ti noóxin sello ntá kuınhan ti noóxin ti nkexro tjechón ntáchro kixin:

—Xrákiá tsjehé.

⁸ Ntá k'uikuau ijnko kokate sine. A ntá ti ch'in tjekjen va a mé it'in ch'an Muerte. A ntá nóton ti jehé ch'an la ikui nkehe tóyóhe ti tjejó ti sín tsik'en. Jehé ch'an k'uáyéhe kjuachaxin ts'etõan ch'an noóxin parte chjasintajni kixin ntá ts'óyan kichó sín la tsokjinta la ko ts'enxín sín ichin la ko kaın ko jjehe siın chjasintajni mé tsjaya va.

⁹ A ntá ti Kolélo kóchrítõn ti n'óxin sello ntá k'uikuau chrinki ti altar ti asén ti sín tsik'enxín ti tan kuente Dios tsichronka sín. ¹⁰ Ntáchro sín itsen kixin:

—Jaha mé Inchéni tjóá jina la jaha mé sijnchexiteyá ti nkehe tsintáchrúa, ¿la nkesá sijnchekitõexián ijié ti sín siın chjasintajni tsik'óyan ti jeheni? —ichro sín.

¹¹ A ntá ti sín a mé k'uáyéhe sín iké sín tjóá ntá k'uítuenhen sín naxa ts'ok'éhe sín í so yaon tsoxetajia ti número ti kichó sín ch'ehe xra Cristo naxa ts'enxín sín éxi k'uén ti jehé sín.

¹² **A** ntá tí Kolélo kóchrítõn tí injonx̄in sello ntá x̄rínghya imá kuínkí nonte. **A** ntá tí yaõn la kótié éxí ika tjiko chojni tsik'en. **A** ntá nitjõ k'óna kjátse éxí jñi. ¹³ **A** ntá konotsé sít'ánótjẽx̄in nkajní sítjitsínka nonte éxí yóhẽ tí inta t'óna to higo la síxènjin tí to yoa tiõ tsjixraya tí nta kíxín tí imá fuerte chjéhe x̄rintõ. ¹⁴ **A** ntá nkajní k'uitjáyan éxí ijnko xroon tsíx̄rèya. Ntá kaín jñá la ko tí nonte ntsíntí síin jnkosíné ntayaõn sákjuí ókjé. ¹⁵ **A** ntá kaín tí sín reyes síin chjasintajni la kjáxin tí sín t'etõan la ko chojni rico la ko comandante la ko tí sín chóna kjuachaxin la ko kaín tí sín ch'exón x̄rã la ko tí chojni náhi mé k'uixenhen sín tjõ síin nteje ts'ejómáxin sín. ¹⁶ Ntáche sín tí jñá la ko tí tjõ kíxín: —Xrákíá xrátja tí jeheni nchemáni kíxín chrók'uikonhyani tí nkexro t'etõan tjetjãx̄in trono la ko chrókjuasótehyani tí kjuachrakon jíé tsjanjon tí Kolélo.

¹⁷ Kíxín ó kui tí yaõn imá jíé kuènte kjuachrakon la, ¿xá nkexro chrókjuacha chrók'uejó ntiha?

7

Tí sín israelita chóna sello

¹ **A** ntá chr'éx̄in k'uikuan noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó x̄rintõ kíxín tsochjéhya x̄rintõ chjini chrítaón chjasintajni la ko ní chrítaón ntayaõn la ko nijnko tí nta yoa. ² Kjáxin k'uikuan í jnko ángel kjuix̄in nó tjtõxin yaõn la chóna sello kuènte Dios tjechón. Ntá tí ángel mé k'uíyehẽ ch'án itsen tí noó ángel tsík'áyéhe kjuachaxin sincheníhi nonte la ko ntayaõn. ³ Ntáchro ch'án kíxín:

—Náhi, s̄incheníehya nonte la ko ntayaõn la ko kjáxin tí nta la náhi tí naxã tsikahya sello totjen tí sín ch'ehe x̄rã Dios kuènteni.

⁴ Kujnhan tí número tí sín tsíka sello la me ciento cuarenta y cuatro mil kain tí sín tsík'axrjenixin tí sín israelita. ⁵ Teyó mil tí sín tsíka sello tsík'axrjenixin tí Judá la ko teyó mil tí sín tsíka sello tsík'axrjenixin Rubén la ko teyó mil tí sín tsíka sello tsík'axrjenixin sín Gad ⁶ la ko teyó mil tí sín tsíka sello tsík'axrjenixin sín Aser, la ko teyó mil tí sín tsíka sello tsík'axrjenixin sín Neftalí la ko teyó mil tí sín tsíka sello tsík'axrjenixin sín Manasés ⁷ la ko teyó mil tí sín tsíka sello tsík'axrjenixin sín Simeón la ko teyó mil tí sín tsíka sello tsík'axrjenixin sín Leví la ko teyó mil tí sín tsíka sello tsík'axrjenixin Isacar ⁸ la ko teyó mil tí sín tsíka sello tsík'axrjenixin sín Zabulón la ko teyó mil tí sín tsíka sello tsík'axrjenixin sín Benjamín.

Sín nchónhya chojni chóna ka tjóá

⁹ Ntá kjuixin tíha ntá k'uikuan nchónhya chojni kaín xín nación la ko kaín xín nkexrí tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjain tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kíxín:

Dios kuènteni mé kjuínchekaáni.

Jehe ch'án mé tjetjãx̄in tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkontãtjen tí trono la ko jnkontãtjen tí sín táda la ko tí noó sín tjejóchón la ntá k'uejóxin toch'in sín la k'uisen sín hasta kãx̄in ikja sín nonte nkayakon tí trono la tjanchehe sín kjuasáye Dios.

¹² Ntáchro sín kíxín:

Amén. Kjuíncheyaõnni Dios la tsochjéheni Dios kjuasáya kíxín kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyehehi ní kjuachaxin kuènte ch'án kixin tjinkjitsani ch'án jnkochrín.
Amén.

¹³ A ntá ijnko tí sín tãda kjuanchankina, ntáchro kixin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkijxin sín?

¹⁴ Ntá janhan ntáxrjan kixin:

—Inchéni, jaha ó noha. Ntá jehe ch'án ntáchro ch'án kixin:

—Tí sín í tsíkijxin sín tí kjuaxróxinhya k'uék'ejó sín, la tí sín a mé tsíjen sín iké sín la ko tsikótjuáxin ijné tí Kolélo. ¹⁵ Méxra xikaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen njnko kuènte ch'án. A ntá tí nkexro tjetjaxin chrítaón tí trono mé t'ayakonhen ch'án sín. ¹⁶ A ntá tí sín a mé ts'enxinhya sín kjinta la ko ts'enxinhya sín intã la ko tsochjãnxinhya sín yaon la ko ní sóa kohya nkehe sich'ehe sín. ¹⁷ Kixin tí Kolélo tjen jnkosiné tí trono mé t'ayakonhen ch'án tí jehe sín éxí iko kuènte ch'án la ko sátjiko ch'án tí tjáá ntã tjanjon kjuachón la Dios mé sinchexamá kaín tí ntãkon tí jehe sín.

8

Tí yatoxin sello la ko tí ihnti oro

¹ A ntá tí Kolélo kóchrítõn tí yatoxin sello kuènte tí libro la ntá kohya ninkehó ruido nkajní chjina it'õ hora. ² Ntá tuénxín k'uikuãan yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta. ³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincõ tsjak'e ch'án kixin sátsjiko tí oración kuènte kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono. ⁴ A ntá tí ihnchi kuènte chjincõ chrínxín tja tí ch'ín ángel tí tjen Dios la ko kjaxín tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí altar la ik'ue ch'án chjasintajni. La ntá kjõnta la ko nchónhya ruido la ko sitjõnkixin la ko kuínkí nonte.

Tí trompeta

⁶ A ntá tí yato ángel mé chõnta sín jnkojnko trompeta ó yaxínhin sín kixin ts'ánoa sín.

⁷ A ntá tí ángel saoxín k'uánoa trompeta ntá k'uáníá toni la ko xrohi tsínkíkjan jnj mé xikaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxí ijnko jnã jíé tjeche la sákjuí kjuáankí ntayaon la ntá níxin parte tí ntayaon la k'óna jnj. ⁹ A ntá tí níxin parte kaín tí nkehe síin tí ntayaon la ik'uén la ko níxin parte kaín tí ntabárcõ la xíka.

¹⁰ A ntá tí níxin ángel k'uánoa trompeta la ntá xrínãhya k'uánótjen ijnko konotsé jíé k'uánótjenxin nkajní mé tjeche éxí ijnko xrohi jíé. K'uánótjen chrítaón níxin parte ntãríõ la ko tí sit'axrje ntã. ¹¹ Tí konotsé mé it'ín Itsjá la tsíkjiankí níxin parte tí ntã ntá kótsjá tí ntã la nchónhya chojni ik'uén kixin tí ntã xikaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuitõhe sítíe la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uíquān la ko kuññan ijnko ángel tjetjaká jnkosiné nkajni t'èya ch'án itsen, ntáchro ch'án kíxin:

—Nòa tí sín tjejó chjasintajni tió tsontáchro tí trompeta ts'ánoa tí iní ángel inaá.

9

¹ A ntá tí n'óxin ángel k'uánoa trompeta la k'uíquān ijnko konotsé tsik'ánótjenxin nkajni chrítaón chjasintajni ntá k'uáyéhe tí llave kuente tí tóye ñinka. ² A ntá tuénxín xitjehé tí tóye ñinka ntá ntiha chríinxín nchónhya ihñchi kuente tja ntá tí t'inkaséyanxín yaon la ko tí xrinto k'uúxin tié kíxin tí ihñchi kuente tí tóye. ³ A ntá tí ihñchi mé k'uaxrjéxín kochjóa xritjaká chrítaón chjasintajni. A ntá tí kochjóa k'uáyéhe kjuachaxin éxí tí chóna konchjā síin chjasintajni. ⁴ K'uútuennen va kíxin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chóntahya sello kuente Dios tí totjen mé sincheníhi va. ⁵ Kjánchó k'uáyéheya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkijehé konchjā. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjóté tjinkaon sín chrók'uen sín la tí muerte sátsikji ókjé.

⁷ A ntá tí kochjóa éxí kokaṭe tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsik'óna oro la ko tí kàré la tóyóhe éxí kàré chojni. ⁸ A ntá tí kaxree va tsjehe tóyóhe éxí kaxihí chojni chjin, a ntá tí neno va la tóyóhe neno koxra. ⁹ A ntá tí cuérpóé la tjejanjin nkehe tsik'óna chica kíxin kohya nkehe tsñhen va. A ntá ruido kuente kanenee la éxí nchónhya carro tinkánkákjen kokaṭe tió xritinká tí síin kjuanínkaon. ¹⁰ A ntá tí ntané va mé tsjiate chojni la éxí ntané konchjā, la tíha mé tschóna kjuachaxin sincheníhi chojni hasta in'ó nitjó. ¹¹ A ntá tí kochjóa mé chóna ijnko nkexro t'etóan mé ijnko ángel kuente tí tóye ñinka. Tí ángel mé nkíva hebreo mé it'in Abadón la nkíva griego la mé Apolión mé t'axrjéxín kíxin táha mé sinchek'itjāyan nkehe.

¹² Mé xíkaha kónhen tí kjuachrakon xrankíxixín. A ntá ñaxa t'itjāyan yaá inaá.

¹³ A ntá tí injonxin ángel k'uánoa trompeta la kuññan ijnko itén nkexro k'uaxrjéxín tí tjejó tí noó ntèé kuente tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóna trompeta kíxin:

—Tjasintankehé tí noó ángel kuente tí jínhya tjejóchroé chjinaxón tí ntario jie it'in Eufates.

¹⁵ Ntá xíkaha xintankehe tí noó sín ángel kíxin ts'óyan sín tí níxin parte chojni. Mé xíkaha yaxínhin sín sátsji sín tí hora la tí yaon la tí nitjó la tí nánó.

¹⁶ Ntá kuññan tí número tí soldado la ko tí kokaṭe la doscientos millones.

¹⁷ Mé xíkaha xrináhya k'uíquān tí kokaṭe. A ntá tí sín tjejókjen kokaṭe la tí ntakuin sín chóna nkehe tsik'óna chica kjátse la azul la sine. A ntá tí kokaṭe la ikja la éxí kja koxra la tí ir'va la k'uaxrjéxín xrohi la ko ihñchi la ko azufre. ¹⁸ A ntá níxin parte chojni tsik'énxín tí iní clase tí chin tsik'axrjéxín ir'va kokaṭe mé xrohi la ihñchi la azufre. ¹⁹ Tí kjuachaxin chóna tí kokaṭe la k'uaxrjéxín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

²⁰ A ntá tí í so chojni kuítóhe k'uénxinhya tí chin a la kjóté kjuinkíhya sín tí nkehe tjenkayáxin sín la kuítóehya sín tinkáchónki sín nchakuen jínhya la ko

tí nkehe tsíkjangya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xíkaha la kuitoehya sín tí nkehe jínahya ch'e la ko tí chrók'óyán kíchó la ko tí nchekjiko kíchó la ko tí chóna sín chojni chjin ókjé la ko tí tjínkaon sín chrókueé.

10

Ijnko ángel la ko tí librito ntsí

¹ Ntá k'uikuan í jnko ángel imá chonta kjuachaxin k'uínkajinxin nkajni tjenkakjan ch'an tjuí la ko ijnko konchecha chritaón tí ikja ch'an. A ntá tí káré ch'an imá tjákini tsjehe éxí yaon, a ntá tí toté la éxí xrohi síchr'ákjen. ² Tjexraá ch'an ijnko libro ntsí tjexrankehe, la ntá toté ch'an chjina la chritaón ntayaon la ntá toté ch'an kjon la chritaón nche. ³ Ntá xrínahya k'uèya ch'an itsen éxí ijnko koxra tsjánka va tí tónínkaon va mé xíkaha k'uèya la yato kjónta kjuatéya tí itén ch'an. ⁴ Ntá kjuixin ntáchro tí yato kjónta la chrókjan ntá kuínhan ijnko itén nkexro nkaya nkajni ntáchro kixin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uikuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajni. ⁶ Ntá kjuasin ch'an testigo tí nkexro tjen jnkochrín mé tí nkexro a mé kjuích'èna nkajni la ko chjasintajni la ko ntayaon la ko kaín xín nkehe síin la ntáchro ch'an kixin:

—Í séhya má naxa tsoxrjen ⁷ ntá tsjixraká tí yaon tí yatoxin ángel ts'ánoa trompeta ntá tsoxidéya tí nkehe jehó Dios nohe kixin xíkaha tsíchénka ch'an tí sín k'uékjich'ehe ch'an xra ósé k'uéchronka sín itén ch'an.

⁸ A ntá tí itén nkexro kuínhan k'uaxrxjén nkaya nkajni ntá xínixjana inaá ntáchro kixin:

—Sátjia tákjá tí libro ntsí tjexrankehe tjexraá tí ángel itjen toté ch'an chritaón ntayaon la ko chritaón nche.

⁹ Ntá sákjua kjuáncháha tí ángel tí libro ntsí ntá jehe ch'an ntáchro ch'an kixin:

—Tákjá la inte. A ntá tí ir'va la tsóxé éxí tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxé éxí tsjen ntá chr'éxin la kótsjá nkaya tsena. ¹¹ Ntá tuénxín k'uètuanna ch'an kixin:

—Inaá tsochronkaxián itén Dios tsinhin nchónhya chjasin la nación la ko nkíva la ko tsinhin tí sín reyes.

11

Iyó testigo

¹ A ntá chjina ch'an ijnko ntavara éxí tji tsjehe tsjáchroaxián ntá ntáchro ch'an kixin:

—T'áyá tjáchroa nkaxenhen njnko kuènte Dios la ko tí altar la tékia nkekjaín nkexro tjejó ntiha tinkáchónki Dios. ² Kjánchó tí ntašin itjen ntója njnko la tjáchroahya kixin táha ó tsik'áyéhe tí sín tsikjixin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuèntana tsonixjaxinna mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni. ⁵ A ntá tí jnkojín sín tjínkaon sich'ehe sín dañó la jehe sín la xrohi ts'axrxjén ir'va sín la tsoche kaín tí sín njnkakonhen sín la mé

xikaha its'en kaín tí sín tjinkaon sich'ehe sín dañó tí jehe sín. ⁶ A ntá tí testigo i chóna kjuachaxin ts'ikjehe nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tson táche sín tí ntá kixin ts'óna jni la ko sinchekjasótéxín sín chojni chjasintajni nchónhya clase chin nchónhya veces éxí tí tjinkaon sín. ⁷ A ntá tí kjuixinhin sín tí xra ntá tí ko jjehe ts'axrjexin tí tóye njnka mé tsjankixin tsjanjonko tí jehe sín ntá tsjacha va ts'óyan va tí jehe sín. ⁸ A ntá tí cuérpoé sín tsitöhe sítsínka tí calle kuènte chjasin jié tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto. ⁹ A ntá iní yaon ko t'ó la kaín chojni itsjé chjasin la ko kaín nkexrí tsjehe sín la ko nchónhya nkíva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsochéhe sín kixin xikaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kixin xikaha ik'uén tí yaá sín k'uechrónka itén Dios kixin jehe sín kjuaxróxinhya k'uék'ixín sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'ó la ntá Dios kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákía antsí ntihi.

Ntá chrínxín sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínkí nonte la ntá ijnko ite parte chjasin ntiha la k'uitjayan la yato mil chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí níxin kjuachrakon inaá.

Tí yatoxin trompeta

¹⁵ A ntá tí yatoxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etqan ch'án jnkochríxín.

¹⁶ A ntá tí veinticuatro tí sín táda tjejótjaxin sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios. ¹⁷ Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'ínka inaá.

Kixin jaha k'uayéhé kjuachaxin jié kixin xráxin tétqan.

¹⁸ A ntá kaín tí nación kónínkaon,

a ntá ó kui tí yaon jaha sijnchekjasóte sín

la ko kjaxin jaha sijnchekitqexián ijjeé tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuínchetjóá la ko tí sín kjuikosáyehe tí ihnjá,

mé tí chojni nteto la ko tí sín chánjan ntsínsí.

Jaha tjoka sijnchek'itjayan tí sín chrókjuinçek'itjayan chjasintajni.

¹⁹ **A** ntá xitjehe tí nĩnko Dios tjen nkaya nkajní, a tí nkaxenhen kónoxín tí caja tjínká tí nkehe tsík'etōan Dios. **A** ntá sítjónkíxín la ko nchónhya ruido sítjonta la ko kuínkí nonte la ko imá tsanká k'uánía toni.

12

Tí chojni chjin la ko tí dragón

¹ **A** ntá kónoxín nkajní ijnko kjuaxroan jié mé ijnko chojni chjin iké tjákiní éxí yaon tsjehe la chrínkí toté tjan itjen nitjó. **A** ntá tí kja tjan tjenkáya ijnko corona chóna teyó konotsé. ² **A** ntá tí chojni chjin a mé tjejá tjan la t'èya tjan kixin tjtó tjan kixin sinchekokjíhi tjan xjeen tjan. ³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntèe la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé nkánkákjen níxin parte konotsé kuènte nkajní la ik'ue chrítaón chjasintajni. **A** ntá tí dragón kjuák'e chók'èxin tí tjen tí chojni chjin mero tsokjhi xjeen kixin tjinkaon tjoka chrókjone tí xjan tsokjhi. ⁵ **A** ntá tí xjan kjuínchekokjíhi tjan mé xjan ntoa kixin jehe ch'án mé ts'etuenhen ch'án kaín nación la tsochóna ch'án ijnko vara chica ts'etōanxín ch'án. Ntá tí xjeen tjan la mé Dios sákjuiko tí tjen ch'án t'etōan ch'án. ⁶ **A** ntá tí chojni chjin la kuínká tjan sákjuí tjan nteje kixin tsíkjincheyóxin Dios nketí sátsji tjan kixin ntaha tsoxranjon nkehe sine tjan mil dos cientos sesenta yaon.

⁷ Ntá chr'èxin xrinàhya k'uúxin kjuáninkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó kjuachahya tí dragón la kohya lugar kuènte nkaya nkajní. ⁹ Mé xíkaha kuakitsjexín sín tí dragón nkajní. Jehe mé tí konche ósé íkjí mé nchek'in sín diablo la ko Satanás. Jehe mé k'uékjich'iyehé tí chojni kuènte chjasintajni. Jehe la ko tí sín ángel kuènte k'uaxrjexín ntíha la kjuítsínka chjasintajni.

¹⁰ Ntá kũnhan itén ijnko nkexro nkaya nkajní itsen níxja ntáchro kixin:

—Ó kui tí tsaáximni tí kjuachaxién tí Dios kuènténi la ko tí kjuachaxin t'etōan Cristo kixin ó k'uaxrjexín nkajní tí nkexro t'eka jié tí kichó ní mé kjuanchia jié nchakotjin la ko tie nkayakon Dios kuènténi. ¹¹ Tí sín kichó ní la kjuacha sín kuaáxin sín kixin tí ijnjé tí Kolélo k'uítji la ko kixin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín. ¹² **A** ntá jie la tócháhará kaín rá tjejorá nkajní. Ntá nòa tí sín tjejó chjasintajni la ko ntayaon kixin k'uínkajin tí ch'ín diablo la imá níinkaon ch'án kixin ó nohe ch'án kixin í kánhyó sé tsjak'e ch'án.

¹³ Ntá tí ch'ín dragón ó nohe kixin k'uánótjexín nkajní ikui chjasintajni ntá sákjuíchréhe tí chojni chjin chóna tí xjan ntoa kixin chrókjuínchek'itjáyán tjan. ¹⁴ Kjánchó tí chojni chjin k'uáyéhe yaá kanenee kuènte kotjuanhnko ijié kixin jina tsjaká tjan sátsji nteje kixin ntá íkjín tsitohe tí konche. Sátsji tjan kixin ntíha tsoxranjon nkehe sine tjan iní nánó ko t'ō. ¹⁵ **A** ntá tí konche mé k'uaxrjexín ntá ir'va kixin ts'óna ijnko ntarío kixin tjinkaon va chrók'uátjoáko tí tjan a tí ntá a. ¹⁶ **A** ntá tí nonte kjuínkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uixenhen. ¹⁷ **A** ntá tí dragón la imá kónínkakonhen tí tjan a ná imá kónínkaon kjuánjonko tí í so sín naxá kjéhya tí tjan a kixin naxá titekaon sín tí nkehe tsík'etōan Dios la naxá tinkáchónki sín tí nkehe tsíchronka Jesucristo.

13

Tíyaá bestia

¹ Tí kjuak'é chrínta ntayaon ntá ntaha k'uíkuañ chriinxín ijnko bestia chónnta yato kja la ko ite ntèe chojni t'ántaxínñin Dios. ² Tí bestia k'uíkuañ mé tóyóhe kotigre la chónnta toté éxí toté ko oso la ko tí ir'va la éxí ir'va koxra. Tí dragón kjuanjon kjuachaxin imá ts'etoan tí bestia a. ³ A ntá ijnko kja tí bestia chónnta ijnko tsíchrit'ó jíe chónnta chrók'uenxín ntá tsíkitohe jína ntá kuénté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kixin jehe kjuanjon tí kjuachaxin k'uáyéhe tí bestia ntá kjaxin kjuikosáyehe sín tí bestia la ntácho sín kixin:

—¿Xá nkexro chrókóyóhe tí bestia la xá nkexro chrókjuacha chrókjuanjonko tí jehe?

⁵ Kjaxin tí bestia k'uáyéhe kjuachaxin tsontácho kixin chónnta kjuachaxin má la ts'ántaxínñin Dios la tsochónnta kjuachaxin cuarenta y dos nitjó. ⁶ Ntá mé xikaha kjuich'e k'uántaxínñin Dios la ko k'uántaxínñin ihñié Dios la ko k'uántaxínñin tí nñinco tjen nkaya nkajní la ko kaín tí sín tjejó ntiha. ⁷ Kjaxin tsík'áyéhe kjuachaxin tsjanjonko tí sín tinkáchonki Dios hasta tsjacha ts'etuñhen tí sín ntá k'uáyéhe kjuachaxin ts'etuñhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. ⁸ A ntá tí bestia mé kaín xín chojni sín chjasintajni mé tsjikosáyehe sín tí bestia. Tí chojni a mé ts'inixínnya ihñié tió k'óna chjasintajni, mé ts'inixínnya ihñié sín tí libro ts'inixín ihñié tí sín tsaá. Tí xroon a mé chónnta tí Kolélo tsík'óyán sín.

⁹ La jnkojín nkexro tjinkaon chrókuinñin la chrókuinñin tíhi. ¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxin espada la kjaxin espada ts'énxín. A ntá tí nkexro tinkáchonki Dios la t'ichjánxin tsónínkakonhya la ko tsochónnta fe.

¹¹ A ntá chr'éxin k'uíkuañ í jnko bestia k'uaxrxéxin nonte, chónnta yaá ntèe éxí tsjehe ntèe coronta la mé nixja éxí nixja tí dragón. ¹² Tí bestia la chónnta kaín xín kjuachaxin éxí k'uéchónnta tí bestia saoxín tí k'ué la t'etuñhen tí sín sín chjasintajni kixin tinkáchonki sín tí bestia saoxín mé tí bestia tsíchrit'ó kja ntá tsíkitohe jína. ¹³ Kjaxin kjuasin kjuaxroan jíe hasta xrohi k'uánótjénxin nkajní ikui nonte ntá nchónnya chojni k'uíkoxín kon sín kixin xikaha kónhen. ¹⁴ Mé xikaha tí bestia tsík'áyéhe kjuachaxin kjuasin kjuaxroan tí tjen tí bestia saoxín la kjuich'iyehé nchónnya chojni sín chjasintajni. La ntá k'uetuñhen tí sín sín chjasintajni sich'éna sín ijnko nkehe tsíkjanoya éxí yóhe tsjehe tí bestia tsíchrit'oxín espada la kjónté xikaha naxa kjuák'echón. ¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsíkjanoya tóyóhe tí bestia saoxín kixin ntá tí nkehe tsíkjanoya la jína tsonixja la ko jína ts'etoan its'en kaín nkexro tinkáchónkihya tí jehe. ¹⁶ Kjaxin ts'etoan kixin kaín chojni tsochónnta marca, á chojni hyé ó chojni ntsintsí, la á chojni rico, la á chojni nóa la á chojni ch'exón xra la ko chojni náhi, mé kaín sín tsochónnta sín marca, á tja sín chjina ó totjen sín. ¹⁷ Ntá ninkexró xitjahya ts'ena la ko ninkexró xitjahya sinchekji tí chónntaha sín marca ó ihñié tí bestia ó chónntaha sín número kuénté ihñié tí bestia. ¹⁸ T'ichjánxin chrókiénxínrá tíhi. Tí nkexro tienxín la chrókónohe tí número chónnta tí bestia kixin tíhi mé tí número chónnta ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uúkuān tí Kolélo tjexin tóté chrítaon tí jnā Jerusalén. Jehe ch'án tjeke ch'án ciento cuarenta y cuatro mil chojni ts'inixín totjen sín ihnié tí Kolélo la ko ihnié It'é ch'án. ² Ntá tuénxín kuññan ijnko itén nkexro kuixín nkaya nkajní mé ijnko ruido éxí nchónhya ntárió la ruido éxí sítjonta itsen la éxí ijnko ruido nchónhya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixín chojni k'uékjasin jje la ko tí sín a mé éxí ijnko ofrenda xrankixín k'uáyéhe Dios la ko tí Kolélo kjaxin. ⁵ Kónoxínhya ninkehó kjuach'ia k'uaxrxjínhya ir'va sín. La tí sín la ninkehó jje chóntahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uúkuān ijnko ángel tjetjaká jnkosiné nkajní chrónka tí tan tsaáxinni jnkochrixin tsinhin tí sín síin chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntácho kíxin:

—Chróchrakonrá la chrórxáinkáonrá Dios la chróchjehérá ch'án kjuasáya kíxin ó kjuixraká tí yaon sinchekitōexín ch'án ijje chojni. Tjikosáyeherá ch'án kíxin jehe ch'án kjuich'éna ch'án nkajní la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntácho kíxin:

—Ó kjuixin kjuítsínka, ó kjuixin kjuítsínka tí chjasin jje Babilonia. Mé ntiha kuixín tí vino kókuānxín sín kaín nación ntá kjuasin sín jje chóna sín chojni chjin ókjé.

⁹ Ntá xíki tí nixin ángel nixja itsen, ntácho kíxin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítōhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótéxín sín kuixín tí tjen Dios kíxin xíkaha tjechónhen tí kjuanínkaon kuènte Dios ntá ntiha tsjasótéxín sín tí xrohi la ko azufre mé xíkaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótéxín sín síchriin jnkochrixin la tí sín a kuinkáchónki tí bestia la ko tí nkehe tsíkjanoya kuènte o chóna sín ihnié kuènte. ¹² A ntá tí sín tinkáchónki Dios la kuítekaon sín tí nkehe k'uetoan ch'án la ko naxá jína tinkáchónki sín Jesús mé t'ichjánxin chrókuítōehya sín titekaon sín ch'án.

¹³ Ntá kuññan itén ijnko nkexro kuixín nkajní ntácho kíxin:

—Ikjian tíhi: “Náxrjón tjejó tí nkexro kjónté its'en sín ijje o chr'éxin kíxin tinkáchónki sín Ìnchéni.” Kjá jína, ichro Nchakuen Dios, kíxin tí jehe sín ts'ok'éhe sín kíxin ó kjuich'e sín xra la tí xra kjuich'e sín mé kjuacha sín.

Tí nkehe tsík'óna chjasintajni

¹⁴ Ntá xrínghya k'uúkuān ijnko tjuj tjóá la chrítaon tí tjuj tjetjaxín ijnko nkexro éxí yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexraá ch'án. ¹⁵ A

ntá nkaxenhen n̄nko mé k'uaxrjexín í jnko ángel itsen nixja ch'án nixjehē ch'án tí nkexro tjetjaxin chrítaón tjuí ntáchro ch'án kixin:

—Tjankíxian t̄atexian ch̄ica hoz kixin ó kjuixraká tí yaon tsojtá tí nkehe síin chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxin chrítaón tjuí ntá kjuínchek'átsínka ch'án ch̄ica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí n̄nko tjen nkaya nkajní la kjaxin sákjuiko ch'án ijnko ch̄ica hoz imá taté. ¹⁸ Ntá sákjuixin í jnko ángel tí tjen altar la chóna ch'án kjuachaxin kuènte xrohi la itsen k'uúyehē ch'án tí nkexro chóna tí ch̄ica hoz imá taté la ntáchro ch'án kixin:

—Tjankíxian t̄atexian tí ch̄ica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'atsínka tí ch̄ica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuik'enká ch'án to tí tjat'ó ts'ényaxín sín to. Tíha mé t'axrjexín kixin xikaha Dios sinchekjasóte chojni. ²⁰ A ntá tí to uva tsík'ényaxín sín tjat'ó tí ikon chjasin a ntá tí tjat'ó a mé k'uaxrjexín nchónhya jni noixín éxí tí freno tjinká ir'va kokate la trescientos kilómetro kjínxin sátsíkji tí jni a.

15

Tí yato tí ángel la ko tí chin tsjixixín

¹ Ntá k'uúkuan tí nkajní í jnko kjuaxroan jié mé ijnko kjuachrakon: mé tí yato sín ángel kuikao tí yato chin tsjixixín tsoníexín chojni. Tíha mé tí kjuanínkaon kuènte Dios tsjixixín.

² Kjaxin k'uúkuan ijnko nkehe tóyóhē ijnko ntayaon tsík'óna éxí xrosenta tsínkíjan xrohi. La tí sín tsíkjača kixin kuínkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnjé tí bestia mé tjejóxin toté sín chjinaxón ntayaon tsík'óna éxí xrosenta la ko chóna sín isón arpa tsíkjanjon Dios tsík'áyehē sín. ³ Itsje sín isón k'uétsje ch'ín Moisés, tí nkexro kjuích'ehe xra Dios la ko isón kuènte tí Kolélo la mé ntáchro kixin:

Imá ijié tí kjuaxroan kuéntá kixin kaín nkehe tsíkjich'éna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'etoan kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha

kixin k'uúkon sín tí xra tsíkjich'e la jína tíha.

⁵ Kjuixin tíha la k'uúkuan nkajní tjexrankehē tí n̄nko la ko tí cuarto tjóá t'inkachjina tí nkehe tsík'etoan Dios. ⁶ A ntá tí n̄nko a k'uaxrjexín yato ángel kuikao yato chin. Tí iké sín la ika tjete tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uáyehē jnkojnko tí yato ángel mé copa tsík'óna ch̄ica oro tsíkaón tí nkehe tsjasetexín chojni kuixín tí tjen Dios tí nkexro tjechón jnkochríxín. ⁸ A ntá tí nkaxenhen n̄nko la tsíkaón ihnchi kuixín tí kjuachaxin jié kuènte Dios la n̄jnko nkexro xitjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjinká nkehe tsjasótexín chojni

¹ Ntá kujnhan ijnko itén ijnko nkexro imá itsen k'uaxrjexín nkaxenhen njnko, ntáche tí yato sín ángel kixin:

—Sátjia tikikjanjian chrítaón chjasintajni tí nkehe tjía tí yato copa la táha mé tsjasótexín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsikjanoya kuènte tí bestia mé tsík'ayan sín tosóa, imá tjtóhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxi ijnié ijnko chojni tsík'óyán kichó la kaín ko sínkánki ntayaon ik'uén.

⁴ A ntá tí nixin ángel sákjuik'itji tí nkehe tjía copa chrítaón ntarío la ko chrítaón tí ntá sí'axrje tóye, la ntá tí ntá k'óna jni. ⁵ Ntá tuénxin kujnhan nixja tí ángel kuènte ntá ntácho kixin:

—Jaha mé ijnko nkexro jína kixin kjuinchekitóexián ijie chojni. Ichéni jaha ijnko Dios jína, óse tjen la ko naxa tjen ijie ⁶ kixin jehe sín k'óyán tí sín tinkáchónki tí jaha la ko tí sín tsichónka itan la ntá jaha Inchéni chjehé sín ijni its'i sín kixin mé xikaha síjasóte tí jehe sín.

⁷ Kjaxin kujnhan nó altar ijnko nkexro ntácho kixin:

—Chaxín Inchéni Dios, jaha mé chonta kaín kjuachaxin la ntoá jína kjuinchekitóexián tí ijie a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuènte.

⁹ A ntá kaín chojni chjánxin tí imá sóa kuènte yaon la k'uántaxínjin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjía copa chrítaón tí trono t'etqanxín tí bestia. A ntá kaín tí k'uéchóna kjuachaxin k'uék'etqan tí bestia la k'uixin tié. A ntá tí chojni a la netja nejen sín kixin tjtóhe sín. ¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínjin sín Dios tjen nkaya nkajni kixin tjtóhe sín kixin xikaha kónhen sín.

¹² A ntá tí injonxin ángel sákjuik'itji tí nkehe tjía copa chrítaón ijnko ntarío jie it'in Eufrates. A ntá tí ntarío la kjuixié kixin tsakitjehé sín ijnko ntja tsjixin tí sín rey tsjixin nó tjitoxin yaon.

¹³ A ntá k'uíkuan kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe. ¹⁴ Tíha mé nchakuen tí jínahya kjuasixin sín kjuaxroan. A ntá sákjuikjinchejójnkotsé kaín rey síin chjasintajni kixin tsjanjon sín ijnko yaon jie kuènte Dios chóna kaín kjuachaxin. ¹⁵ "Tsjehe, janhan titaya ts'inké éxi ijnko xichee. Chéhe tí nkexro tjejótseje la t'ayakonhen tí iké kixin ts'itjáyanyha kixin chrók'uajihya sín tjóchin sín la chróksuehya sín kixin chrókonoxin kixin tjóchin sín." ¹⁶ A ntá tsojnkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuik'itji nkehe tjía copa chrítaón tí xrinto ntá nkaxenhen njnko nkaya nkajni k'uaxrjexín ijnko itén chojni itsen nixja mé kuixín tí tjen tí trono la ntácho kixin:

—Ó kjuixin kónhen tíha.

¹⁸ **A** ntá sítjónkíxín la ko ruido sítjonta la ntá imá kuínkí nonte fuerte. La desde tí kjuankíxín k'uíxín chojni chjasintajni la xíkaha kónhen kuínkí nonte a ntá jie antsí fuerte kuínkí nonte. ¹⁹ **A** ntá tí chjasin jie xitjehe nonte la iní k'óna, chjenca. La koí kaín chjasin síin chjasintajni tsík'oya. **A** ntá Dios xraxinkaon kíxín chrókjuínchekjasóte tí sín síin tí chjasin jie Babilonia la k'etjoan ch'án its'i sín tí vino tsjasótexín sín kíxín mé xíkaha kónínkaon ch'án. ²⁰ **A** ntá kain tí nonte sínkátaón ntayaon k'uániankí ntá la ko tí jnā k'uitjāyan. ²¹ **A** nta nkajni k'uánótjenxín toni ijie xrátja chojni mé cuarenta kilo yexín jnkojnko toni. **A** ntá chojni na antsí má k'uántaxínhín sín Dios kíxín tí xíkaha kónhen sín xratja sín toni la imá kjoté sín.

17

Tsjasóte tí tjan jínahya

¹ **A** ntá ikui ijnko tí yatoxín ángel chóna tí yato copa la ntáchro ch'án kíxín: —Xrákiá tsjákoħa nkexrí tsjasóte tí chojni chjin tjasin jie tjetjaxín tjan chrítaón tí nchónhya ntá. ² Tí sín rey t'etjoan chjasintajni kjuasinko tjan jie la ko tí chojni síin chjasintajni kókuaxín sín tí vino a mé kjaxín kjuasixín sín jie.

³ **A** ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxín chrítaón ijnko bestia kjátse la kuenté tí ko a la símá ihnié náxrjónhya tsík'ántaxiexín sín Dios la chóna yato kja la ko ite ntéé. ⁴ **A** ntá jehe tjan chóna tjan iké tjan morado la ko kjátse la teya tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jie Babilonia, mé iné tí chojni chjin tjasin jie la ko kain chojni jínahya ch'e síin chjasintajni.” ⁶ Ntá kónona kíxín tí tjan a la tsékanxín tí ijnié tí sín tinkáchónki Dios la ko tí ijnié tí sín tsík'enxín tí chrónka sín kíxín tinkáchónki sín Jesús. Ntá k'uíkuan xíkaha imá chrakonna. ⁷ **A** ntá ijnko ángel ntáchro ch'án kíxín:

—¿Nkekuénté chrakuan? Ntá ijie sntanoha tí nkehe tienxínhya chojni kuénte tí tjan a la ko kuénte tí bestia tjekjen tjan chóna yato kja la ko ite ntéé. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochrínxín tí tòye njnka ntá chr'éxín ts'itjāyan. **A** ntá tí sín síin chjasintajni ts'ínixínhya ihnié sín tí libro ts'ínixín ihnié chojni tsaá desde k'óna chjasintajni, la mé jehe sín tsochrakon sín tíó ts'íkon sín tí bestia kjuák'e ósé la tsík'en la ntá ijie xikjan inaá.

⁹ Tí jnkojín nkexro chrókienxín la mé tí yato kja la t'axrjexín yato jnā tjekjen tí chojni a. ¹⁰ **A** ntá tí kja kjaxín t'axrjexín yato rey la ntá in'ó tí sín rey la í t'etjoanhya sín ijie la ijnko tí jehe sín t'etjoan ijie la í jnko naxa tjihya. **A** ntá tíó tsji tí yatoxín la í kánhyó sé ts'etjoan. ¹¹ **A** ntá tí bestia kjuák'e senó la ijie tjechónhya mé tí jnixin rey la jehe ch'án kuénte tí yato rey la chr'éxín la ts'itjāyan.

¹² **A** ntá tí ite ntéé tsík'ikuan mé ite rey naxa t'etjoanhya. **A** ntá ijie la ts'áyéhe sín kjuachaxín ts'etjoanko tí bestia kjánchó kánhyó sé. ¹³ Tí ite tí rey la jnkokoá tsjenkayáxin sín la tsjanjon sín kjuachaxín kuénte sín kíxín ts'etjoan tí bestia. ¹⁴ Tsjanjonko sín tí Kolélo a ntá tí Kolélo la tsjacha ts'etjoan kíxín jehe ch'án mé Inché kaín chojni la ko jehe ch'án mé tí Rey ts'etuenhen kaín rey la

ko tí sín tjejóko ch'án mé tsík'íyehē Dios la tsíkjejá ch'án sín la jína nchexiteyá sín.

¹⁵ Kjaxin ntáchro tí ch'ín ángel kixin:

—Tí ntá k'uikuān la chrítaón tjetjaxin tí chojni chjin tjasin jie la mé t'axrjéxín kixin nchónhya chjasin la ko nchónhya chojni la ko nchónhya nación la ko nchónhya nkiva. ¹⁶ A ntá tí bestia k'uikuān la ko tí ite ntéé la tíha mé tsonínkakenhen tí tjan tjasin jie la tsitōhe tjan tjóchín tjan la sine tí bestia tí nto chóna cuérpōé tjan la ko tsoche tí huésōé tjan. ¹⁷ Dios tsík'etūenhen asén sín kixin xikaha sich'e sín éxí tjinkaon ch'án kixin jnkokoá tsjenkayáxín sín la ko tsjanjon sín kjuachaxin kuente tí sín rey kixin ts'etōan tí bestia tsoxiteyájia tí nkehe tsintáchro Dios. ¹⁸ A ntá tí chojni chjin k'uikuān la táha mé tí chjasin jie t'etōan tí sín rey t'etōan chjasintajni.

18

Kjuítsínka chjasin Babilonia

¹ Ntá chr'éxín k'uikuān í jnko ángel k'uínkajínxín nkajní chóna nchónhya kjuachaxin ntá chjasintajni antsí k'uínkaséyanni tí tjákiní tsjehe ch'án. ² Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jie Babilonia. Ntá tí jínahya ó kjuacha k'uíxehen t'etōan ntiha la ntiha siín kaín xín clase nchakuen jínahya la ko siín kaké ko xritjaká tjuáhya la ko jínahya. ³ A ntá kaín xín nación kókuānxín tí vino kjuínchekji tjan ntá kjuasinko tjan sín jie la ko tí sín rey t'etōan chjasintajni kjaxin kjuasinko tjan jie. La tí sín nchekji nkehe chjasintajni kórikoxín sín kixin k'uēna tjan nchónhya nkehe.

⁴ Ntá kuínhan í jnko itén nkexro kuixín nkaya nkajní ntáchro kixin:

—T'axrjéxínrá tí chjasin ntiha kixin tí jahará tinkachónkirá tí janhan kixin chrók'uicahyará tí ijíé sín la ko chrókjuasótéxínhyará tí nkehe tsonhen sín. ⁵ Kixin tí nchónhya jie tinkák'ánkí hasta kjuixraká nkajní la Dios ó nohe tí jie chóna sín. ⁶ Ch'eherá tjan éxí tí jehe tjan kjuích'ehe tjan í so chojni kixin xikaha tsjasótéxín tjan. Chrókjuenkehérá tjan iyo veces éxí tí tsík'ieh'ēna tjan ik'ui í so chojni. ⁷ Antsí chrókjuasóte tjan tóyóhé tí nkehe kjuích'e tjan kixin kjuínchehnke tjan la ko k'uéchóna tjan kaín nkehe tóxrxínhin tjan. Jehe tjan ntáche asén tjan kixin: “Ntíhi tjetjaxian éxí ijnko reina. Jehya ik'ána kixin chrókjuasótena.” ⁸ Mé xikaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kixin Inchéni imá chóna kjuachaxin la jehe ch'án sinchekjasóte ch'án tjan.

⁹ A ntá tí sín rey siín chjasintajni tsíkjasinko sín tjan jie la ko nchónhya nkehe kjuínchexenko sín tjan la mé tsotsjánka sín la ts'ēya sín tió ts'ikon sín ts'aya ihnchi tió tsoche tjan. ¹⁰ Ntá jehe sín tsitōhe sín ikjín kixin chrakon sín kixin xikaha tsjasóte tjan la tsontáchro sín kixin:

—Nòa tí jaha chjasin jie Babilonia, chjasin imá t'etōan kixin titáya kjuasótia.

¹¹ Tí sín xrinchekji nkehe la kjaxin tsjánka sín, t'ēya sín kixin xikaha kónhen tí chjasin ntiha kixin kohya nkexro ts'enēhe sín tí nkehe sinchekji sín. ¹² Kjuínchekji sín chica oro la chica plata la ko ixro náxrxón la ko perla la ko ika náxrxón lino la ko ka seda la ko ika color morado la kjáste la ko kjaxin kaín xín clase nta náxrxón xraxé la ko tí nkehe tsík'óna neno elefante la ko inta náxrxón la ko bronce la ko ixro chica la ko ixro mármol. ¹³ Kjaxin xrinchekji sín canela la ko xroān xraxé náxrxón la ko chjincō la ko xroān mirra la ko crema la ko

vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kjaxin kjuínchekji sín. ¹⁴ Tsontáche sín tí chjasin a kixin:

—Í chontahya kain to tjete imá k'uékóxrjínhan. Ó k'uitjáyán kain nkehe náxrjón tjete k'uéchonta.

¹⁵ Tí sín k'uékjinchekji tí nkehe la kóricó sín kixin kjuacha sín tí xra kjuích'e sín tí chjasin ntiha. Ikjín k'uéjo sín kixin chrakon sín kixin xikaha kónhen kjuasóte tí chjasin. Tsjánka sín la t'eya sín ¹⁶ la tsontácho sín kixin:

—Nòa tí chjasin jié. Éxí ijnko chojni chjin tsík'itsa ka lino náxrjón la ko ika morado la kjátse la ko teya nkehe oro la ko xro náxrjón tjete la ko perla. ¹⁷ A ntá jnkorato koá kjuixin kjuéje tí nkehe imá tjete —íchro sín.

Kain tí nkexro t'etóan tí ntabárcó la ko tí sín tsík'ixenhen tí ntabárcó la ko tí sín ch'e xra chrítaón ntayaon kuitóhe sín ikjín ¹⁸ la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jié í?

¹⁹ La tjikjanjin kja sín nche la tsjánka sín t'eya sín kixin:

—Nòa tí chjasin jié. Kóricó tí sín k'uéchóna ntabárcó chrítaón ntayaon kixin tí chjasin i la ntá jnkorató koá kjuixin k'uitjáyán tí nkehe chóna sín.

²⁰ A ntá jahará tjejorá nkajní tócháhará kixin xikaha kónhen tí chjasin a. Tócháhará jahará k'uájikoará Închéni la ko jahará k'uéchronkará itén Dios la ko kain rá kuinkachónkirá tí jehe ch'án kixin Dios kjuínchekjasóte tí chjasin a kixin tí jié kjuasin sín kjuínchekjasótiará sín tí jahará.

²¹ A ntá ijnko ch'in ángel chóna kjuachaxin kjuatsen ijnko xro éxí ijnko xro jié kuènte molino la k'uenkí ch'án ntayaon la ntá ntácho ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xra ntiha la ko kjaxin tsienhya sín ninkehó tóvéntó xro molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotéhe chojni ntiha. Tí sín k'uékjinchekji nkehe ntiha la imá k'uék'etóan kuènte chjasintajni la tí sín k'uékjich'iyehé tí sín síin chjasintajni la k'uékjich'e sín jínahya, k'uédkjinchexroán sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajni.

19

¹ Ntá chr'éxin ntá kuínhan itén nchónhya nkexro tjejó nkaya nkajní itsen níxja, ntácho sín kixin:

¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuènteni.

² Kixin jehe ch'án ntoá kjuínchekjasóte ch'án tí tjan kjuasin nchónhya jie kixin jehe tjan kjuachroe tjan chojni síin chjasintajni kixin tí nkehe jínahya k'uékjich'e tjan.

Dios kjuínchekjasóte tjan kixin k'óyán tjan tí sín k'uékjich'ehe ch'án xra.

³ La ntá kjaxin inaá xintácho kixin:

—¡Aleluya! Kjuasáyé Dios kixin tí ihnchi síchexín tí jehe tjan tsítóehya chrìn hasta tí ntihi.

4 **A** ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxín kja sín nonte kjuikosáyéhe sín Dios tí nkexro tjetjaxín tí trono la ntáchro sín kíxín:

—¡Amén! ¡Aleluya! ¡Kjuasáyé Dios!

5 Ntá xríñghya kuínhin sín itén ijnko nkexro tjen nó trono ntáchro kíxín: Chjehérá kjuasáya tí Dios kuènteni kaín rá ch'ehérá ch'án xra la kuítekákohénrá ch'án, mé kaín tí jahará kjónte chánjan ntsíntsí o chojni nteto.

Tí kia tsotehe tí Kolélo

6 Kjaxín kuínhan nkehe éxí itén nchónghya chojni éxí nchónghya ntario sítovéntó la ko imá itsen síjtonta la ntáchro kíxín:

¡Aleluya! Kjuasáyé Ìnchéni ó kjuankíxín t'etōan Ìnchéni Dios kuènteni chóna kaín kjuachaxín.

7 Chrókóchéheni la chrókjuikosáyeheni Dios kíxín ó kjuixraká tí yaon ts'ixín kia kuènte Kolélo.

La tí tjan tsotehe la tsíkóyaxínhin tjechónhen,

8 mé tsík'áyéhe kjuachaxín tsík'itsa ka lino náxrjón tjóá tjákini.

A ntá tí ka lino náxrjón a mé t'axrjéxín kíxín tí jína k'uéjío tí sín tinkáchónki Dios.

9 Ntá tí ch'ín ángel k'uētōan ch'án kíxín:

—Ikjian túhi: “Náxrjón tjejó tí nkexro k'uáyéhe kjuachaxín sátsji tí kia tsotehe tí Kolélo.”

A ntá ntáchro ch'án inaá kíxín:

—Tí palabra a mé chaxín ntoá nixja Dios.

10 Ntá kjuak'éxian toçh'ian toté tí ángel kíxín chrókjuikosáyaha ch'án, kjánchó jehe ch'án ntáchro ch'án kíxín:

—Xikahya chrokjuich'e kíxín janhan kjaxian t'aha xra Dios éxí tí jaha la ko éxí tí sín kichuá kuítoehya kuítekaon tí tan jína chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

11 Ntá k'uíkuan kíxín nkajíní tjexrankehe la ntaha kónoxín ijnko kokate tjóá la ko tí nkexro tjejen va mé it'in Jína la ko Chaxín kíxín ntoá kjuínchekitoexín ch'án ijje chojni la ko ntoá kjuánjonko ch'án chojni. 12 **A** ntá tí ikon ch'án mé tjákini éxí xrohi nene xikaha tsjehe. **A** ntá tí kja ch'án la chóna nchónghya corona la ko ts'ínixín ijnko ihnjé ijnko nkexro la jehó ch'án mé nohe ch'án tíha. 13 Tjenkáya ch'án ijnko ka tsík'ixikjanjin jni ntá ihnjé ch'án mé Itan Kuènte Dios. 14 Chréhe tí sín soldado kuènte nkajíní. Iké sín mé ka lino náxrjón tjóá la tjejójen sín kokate tjóá. 15 Ir'va tí jehe ch'án k'uaxrjéxín espada imá taté kíxín táha mé tsjik'óyáxín ch'án tí sín sín kaín nación la ko ts'etōanxín ch'án ijnko chica vara. Jehe ch'án mé sinchekitoexín ch'án ijje sín éxí t'énxín sín to uva toté sín mé xikaha ts'etuenhen ch'án kíxín its'i sín vino tsjasótéxín sín kíxín mé xikaha tsjixín tí kjuanínkaon kuènte Dios chóna kaín kjuachaxín. 16 Iké ch'án mé ts'ínixín kíxín jehe ch'án me Rey t'etuenhen kaín rey la ko jehe ch'án mé Ìnché kain chojni.

17 Ntá tuénxín k'uíkuan ijnko ángel tjejin toté tí tjen yaon la k'uéyato ch'án itsen k'uéyatohe ch'án tí ko xritjaká, ntáchro ch'án kíxín:

—Xrákirá tójnoktsérá ntihi kíxin Dios tsjanjon nkehe sinterá ijie. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jiehe la ko ntøe kokate la ko cuerpo kuènte tí sín tsíkjiták'a va la ko cuerpo kuènte kaín chojni libre o chojni ch'exón xrå la chojni hyé o chojni ntsínsí.

¹⁹ K'uikuån tí bestia la ko tí sín reyes t'etøan chjasintajni la ko tí soldado kuènte sín, tsíkójnoksé sín tsjanjonko sín tí nkexro tjejkjen kokate la ko koí tí sín soldado kuènte ch'án. ²⁰ A ntá itsé sín tí bestia kíxin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xíkaha kjuích'e tí nkexro ntoáhya kjuako, kjuích'iyehé ch'án tí sín tsíkítóhe tsíka marca kuènte tí bestia la ko kjuikosáyehé sín tí nkehe tsíkjanøya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí síin xrohi tsoche tjejóchónxinhín sín tsochéxin azufre. ²¹ A ntá tí í so sín la ts'enxín tí espada k'uaxrjexín tí ir'va tí nkexro tjejkjen tí kokate tjóá la kaín ko xritjaká ts'ixin tí síin tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrínghya k'uikuån ijnko ángel k'uínkajinxín nkajní tjexraá llave kuènte tí tøyeninka la ko ijnko cadena jie tjexraá ch'án. ² A ntá tí ángel a itsé tí dragón mé tí konche óse kjí mé tíha tí ch'ín diablo la ko Satanás la kjuak'echroé ch'án ijnko mil nánó. ³ Ich'án ch'án sákjuí tøyeninka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni síin kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uikuån tí trono la ko tí sín tjejótjaxín tsík'áyéhe sín kjuachaxin sinchekitøexín ijie chojni. Kjaxin k'uikuån asén chojni tsíchrínjin kja kíxin kuítekaon sín Jesús la ko tsíchrónkaxín sín itén Dios. Jehe sín la kuínkáchónkihya sín tí bestia la ko tí nkehe tsíkjanøya kuènte la ko kuítóehya sín ikuá sín marca tí totjen sín o tí itja sín. Mé k'uikuån kíxin tsíxechón sín la ko ts'etøanko sín Cristo ijnko mil nánó. ⁵ Ntá í so chojni tsík'en la naça xechónhya hasta ts'atsínkajia tí mil nánó. Tíha mé xrankíxixín tsoxechón chojni. ⁶ Náxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chóntahya ninkehó kjuachaxin naça xíkaha chrókónhen sín. Jehe sín mé ncha't'a kuènte Dios la ko kuènte Cristo la ts'etøanko sín ch'án tí mil nánó.

⁷ A ntá ts'átsínka tí mil nánó ntá ch'ín Satanás tsoxintankehe tí kjíchroé. ⁸ La sátsjikjich'iyehé tí chojni síin kuenté chjasintajni la ko sátsjikjich'iyehé tí chjasin Gog la ko Magog. La tsojnoktsé sín kíxin tsjanjon sín la ko tí soldado kuènte tí jehe sín. Nchónhya sín tsojnoktsé ntiha éxí tí nchesen síin ntayaon. ⁹ Mé xíkaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jie tjuèhe ch'án. A ntá xrohi tsíxín nkajní kíxin tsochexín tí sín jínahya ts'itjáyaxín sín. ¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín ncha'kotjin la ko tie jnkochríxin.

Tsitøexín ijie chojni tí tjen tí trono jie tjóá

¹¹ Ntá k'uikuān ijnko trono jié tjóá la ko tí nkexro tjetjāxin nó ntiha. **A** ntá tí tjen ch'án ntiha la ó k'uitjáyankoá nonte la ko nkajní la í kónoxínhya ínaá tí nonte. ¹² Ntá k'uikuān tí sín tsík'en; chojni hyé la ko chojni ntsíntsi tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihnié tí sín tsaá. Ntiha tsitōexín ijje chojni tsík'en éxí nixja tí í so libro nkehe tí xṛā kjuích'e sín ts'ínixín ntiha. ¹³ Tí sín tsík'enxín ntayaon la ntiha xrakuāxin sín la tí sín sátsíkji tí síin chojni tsík'en la ntiha xrakuāxin sín kaín sín tsochjina sín tsitōexín ijje jnkojnko sín kixin nkexrí tí xṛā kjuích'e sín. ¹⁴ Ntá tí kjuachaxin kuènte kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihnié sín tí libro ts'ínixín ihnié chojni tsaá.

21

Nkajní nixin la ko nonte nixin

¹ Ntá k'uikuān ijnko nkajní nixin la ko ijnko nonte nixin kixin tí nkajní saoxín la ko tí nonte saoxín tsík'itjāyan la ko kjāxin kohya ntayaon. ² Janhan Juan k'uikuān tí chjasin jié tjóá. Táha mé tí Jerusalén nixin k'uínkajínxín nkajní kujxin tí tjen Dios la kuenté tsikóyóxin éxí ijnko chojni chjin tsoṭehe tsík'itsa kixin tsákja tí xii. ³ Ntá kuínhan ijnko itén ijnko nkexro itsen kujxin nkajní ntáchro kixin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntákon sín la í tsokehya nkexro its'en la tsokehya nkexro tsotsjánka la ko ts'áváhya sín la ko tsokehya kjuatjoté kixin kaín tí nkehe k'uékónhen ósé la ó kjuixin k'uátsínka.

⁵ **A** ntá tí nkexro tjetjāxin tí trono ntáchro ch'án kixin:

—Janhan mé t'ána kaín nkehe nixin.

Kjāxin ntáchro ch'án kixin:

—Íkjian tíha kixin tíha mé palabra chaxín la chrókuítekávān kaín tíha.

⁶ Ntá chr'éxin chrónka ch'án kixin:

—Kaín nkehe la ó kjuixin tsík'óna. Janhan la tí xrankixixín la ko tí tsjixixín éxí tí letra xrankixixín A la ko tsjixixín Zeta. Tí nkexro t'enxín ntā la janhan tsoṭjāhā sín tí ntā its'i sín mé tí ntā tjanjon kjuachón la ninkehó ts'ixinkíehya sín tíha. ⁷ Tí nkexro tsjacha tsitōehya tí janhan la ts'áyéhe sín kaín tí nkehe tsoṭjāhā sín. La janhan mé ts'óna Dios kuènte sín, ā ntā jehe sín mé xjāna ts'íkān tí jehe sín. ⁸ **A** ntá tí chojni chrakon la chojni titekakonhya la tí sín chjinoxínhin la ko tí chojni ts'óyān kíchó la ko tí chojni tsákja chojni chjin ókjé la ko tí chojni xrinchexroān la ko chojni tinkáchónki nkehe tsíkjanoya la ko kain chojni ch'ia mé tí sín a mé ts'ítuenhen sátsji sín tí síin xrohi tsochexín sín azufre tíó itsi tí yóxin muerte.

Tí Jerusalén nixin

⁹ Ntá ikui ijnko tí yatōxin ángel chóna tí yatōxin copa tsíkaón tí yatōxin chin tsjixixín tsjasótexín chojni. Ntá ntáchro ch'án kixin:

—Xrákia tsjákōha tí tjan tsoṭehe tí Kolélo.

¹⁰ Ntá k'uikuān ijnko nkehe kjuakōxin Nchakuen Dios la ntá tí ángel sákjuikian ijnko jnā jié la ko noi la kjuakōna ch'án tí chjasin jié tjóá mé tí Jerusalén ts'inkajínxín nkajní tsíkixín tí tjen Dios. ¹¹ **A** ntá tí chjasin a mé tjákinixín kjuachaxin kuènte Dios. **A** ntá tjákiní éxí ijnko xṛō imá náxṛjón tje

éxi xro jaspe éxi xrosenta tsjehe. ¹² A ntá jnkotatjen tí chjasin chóna tjat'o noi la chóna teyó puerta la jnkoinko ángel jnkoinko puerta tjejónta la ihnié tí teyó tí sín tsík'axrjenixin sín Israel ts'inixin jnkoinko puerta. ¹³ La iní puerta la nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'o tsík'antatjen tí chjasin chóna teyó xro chóntaxin fuerta tí tjat'o la jnkoinko ihnié tí teyó tí sín k'uájiko tí Kolélo a mé ts'inixin jnkoinko tí xro a.

¹⁵ A ntá tí ángel tjenixjana chóna ijnko nta vara oro, éxi tji tsjehe, tsja-choaxín tí chjasin la tí puerta kuènte chjasin la ko tí tjat'o t'inkakuénxin. ¹⁶ Tí chjasin la cuadrada la tí kjinjinxin jnkokón la ko tonxin la jnkokón. A ntá tí ángel kjuachoxín tí chjasin tí nta vara éxi tji tsjehe tsikjachoa ch'an tí chjasin mé chóna dos mil dos cientos kilómetro tí kjinjinxin la ko tí ntetoxin la ko tí tonxin la jnkokón. ¹⁷ Ntá tsikjachoa ch'an tí tjat'o tsikjintajin tí chjasin a la chóna sesenta y cuarto metro kixin éxi tjachroa chojni chjasintajni mé xikaha kjuachoa tí ángel.

¹⁸ Tí tjat'o tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosenta tjóá. ¹⁹ Tí xro tsík'óna xrankixixin tsík'antatjen tí tjat'o la nchónhya xro chjini náxrjón tsínikjan. A ntá tí xro xrankixixin la jaspe, a ntá tí xro yóxin la zafiro, la tí xro níxin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxin la cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkoinko puerta tsík'óna jnkokoá perla. A ntá tí ntia jíe kuènte chjasin la tsík'óna jehó chica oro éxi xrosenta tsjehe.

²² Ntaha la k'uikónhya ninkehó njnko tí chjasin a, kixin Ìnchéni Dios chóna kaín xín kjuachaxin la jehe ch'an la ko tí Kolélo mé tí njnko ntiha. ²³ Tí chjasin a mé t'ichjánxinha yaon la ko ni nitjó ts'inkaséyanxin. Kixin tí t'inkaséyanxin la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsíkaá la ts'ikonxin tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsikjèhya tí nchakotjin la ntaha la tsokohya ts'ixin tie. ²⁶ Ntaha sátsjiko kaín xín nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxinhin o chojni ch'ia. Jehó ts'ixenhen tí sín ts'inixin ihnié tí libro ts'inixin ihnié tí sín tsaá, mé tí libro chóna tí Kolélo.

22

¹ A ntá tí ángel kjuakona ijnko ntario tjóá, a ntá tí nta a mé tjanjon kjuachón. Táha mé t'ikonxinni éxi xrosenta la mé k'uaxrjexin tí trono kuènte Dios la ko tí Kolélo. ² A ntá jnkosiné tí calle tjeotan kuènte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkoinko nánó kixin t'óna to jnkoinko nitjó. Tí ka kuènte tí nta la xroqan tsitoxin jina tí nación siín ntiha. ³ La mé ntiha tsokohya ninkehó kjuachjinoxinhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehé ch'an xra la mé tsjikosáyehe sín ch'an. ⁴ Ts'ikon sín tí kare Dios la ko tsochóna sín ihnié ch'an tí totjen sín. ⁵ Ntiha la tsokohya ts'ixin tie la tí sín siín ntiha la t'ichjánxienhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxin sín ntiha la ko tsochóna sín kjuachaxin kuènte Dios jnkochrixin.

Tí itsi Ìnchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuitekákonnén tí tan a. La ko Ìnchéni mé tí Dios nchexraxinkaon tí sín nixja kjuachaxin ihnjé ch'án mé ichr'án ch'án tí ángel kuènte ch'án kixin tsjakuexin ch'án tí sín ch'ehe ch'án xra, tí nkehe tjoka tsonhen.

⁷ —Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuinhan la ko k'uikuán tíha. A ntá chr'éxin kjuixin kuinhan la ko k'uikuán tíha ntá kjuak'éxian toch'ian chrínki toté tí ángel kixin xikaha kjuakona la ntá chrókuikosáyaha ch'án. ⁹ A ntá jehe ch'án ntáchro ch'án kixin:

—Xikahya sích'e kixin janhan kjaxin t'aha xra Dios éxi tí jaha xikaha la ko éxi tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuikosáyehé.

¹⁰ Kjaxin k'uetuanna ch'án kixin:

—Chrókjuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjinhin Dios la naxa chrókjuich'e xikaha la ko tí nkexro tsikjinchetjóá Dios la naxa jína chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkorá kixin nkexrí tí xra chuich'erá. ¹³ Janhan mé tí xrankixixín la ko tí tsjixixín la janhan mé tí saoxín la ko tí tsjixixín éxi tí letra xrankixixín A la tsjixixín Zeta.

¹⁴ Náxrjón ts'ejó tí nkexro tsíkjen iké kixin tsochónta sín kjuachaxin tsochjinehe sín tí nta tjanjon kjuachón kixin jína ts'ixenxín sín tí puerta kuènte chjasin. ¹⁵ A ntá ntója tsitöhe tí chojni jínahya kuitekakonhya la ko tí chojni nchexroan la ko tí sín chónta nchónhya chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjinhin xrich'ia.

¹⁶ —Janhan Jesús mé ichr'an tí ángel kuèntana kixin tsochénta kaín nínko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkáséyan. ¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enxín ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxi nixja tí libro i. ¹⁹ A ntá jnkojín nkexro tsjatsen jnkojín palabra chónta tí libro i la Dios tsjatsen tí nkehe chrók'uáyéhe sín chónka tí libro ts'ínixín ihnjé tí sín tsaá la ko Dios tsjatsen tí nkehe chróchónta sín tí tjen tí chjasin tjóá kixin éxi nixja tí libro i.

²⁰ A ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyaonrá kaín rá. Amén.